


Jusiñamui uai:  
Jusiñamui jito rafue  
illa rabenico



New Testament in Huitoto, Murui (PE:huu:Huitoto, Murui)

# **Jusiñamui uai: Jusiñamui jito rafue illa rabenico**

## **New Testament in Huitoto, Murui (PE:huu:Huitoto, Murui)**

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

### **Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 18 Apr 2025 from source files dated 29 Jan 2022

145a1f66-dca1-5de3-9c00-4e533605e488

Contents

MATEO . . . . .	1
MARCOS . . . . .	52
LUCAS . . . . .	82
JUAN . . . . .	132
HECHOS . . . . .	167
ROMANOS . . . . .	208
1 CORINTIOS . . . . .	227
2 CORINTIOS . . . . .	249
GÁLATAS . . . . .	261
EFESIOS . . . . .	268
FILIPENSES . . . . .	275
COLOSENSES . . . . .	280
1 TESALONICENSES . . . . .	285
2 TESALONCENSES . . . . .	289
1 TIMOTEO . . . . .	291
2 TIMOTEO . . . . .	296
TITO . . . . .	300
FILEMÓN . . . . .	302
HEBREOS . . . . .	303
SANTIAGO . . . . .	319
1 PEDRO . . . . .	324
2 PEDRO . . . . .	330
1 JUAN . . . . .	333
2 JUAN . . . . .	338
3 JUAN . . . . .	339
JUDAS . . . . .	340
APOCALIPSIS . . . . .	342

## MATEO JESUCRISTO ENIRUEMO ILLA RAFUE CUIAFUE

*Jesucristo ie usumatiai  
(Lc 3.23-38)*

<sup>1</sup> Jesucristo rafuena omoimo cue lloiacana jira, naimie cominina nano lloiticue. Jesucristo usumatiai micoriai mameciaina omoimo lloiticue. Naimie usumadi David micori. Jiaie usuma Abraham micori.

<sup>2</sup> Abraham micori jitodi Isaac micori. Isaac micori jitodi Jacob micori. Jacob micori jitodi Judá micori. Judá micori amatiai micoriai moo jiai Jacob micori.

<sup>3</sup> Judá micori jitodi Fares micori. Jiaie jitodi Zara micori. Iaimaiai micori eidi Tamar micori. Fares micori jitodi Esrom micori. Esrom micori jitodi Aram micori.

<sup>4</sup> Aram micori jitodi Aminadab micori. Aminadab micori jitodi Naasón micori. Naasón micori jitodi Salmón.

<sup>5</sup> Salmón micori jitodi Booz micori. Booz micori eidi Rahab micori. Booz micori jitodi Obed micori. Obed micori eidi Rut micori. Obed micori jitodi Isaí micori.

<sup>6</sup> Isaí micori cai illaima David micori moo. David micori jitodi Salomón micori. Salomón micori eidi Urías micori ai. Naiñaiña ollená, David micori Urías micorina jobaimemo orede. Jobaimemo naimie fiodailla mei, naiñaiña ote.

<sup>7</sup> Salomón micori jitodi Roboam micori. Roboam micori jitodi Abías micori. Abías micori jitodi Asa micori.

<sup>8</sup> Asa micori jitodi Josafat micori. Josafat micori jitodi Joram micori. Joram micori jitodi Uzías micori.

<sup>9</sup> Uzías micori jitodi Jotam. Jotam micori jitodi Acáz. Acáz micori jitodi Ezequías micori.

<sup>10</sup> Ezequías micori jitodi Manasés. Manasés micori jitodi Amón. Amón micori jitodi Josías.

<sup>11</sup> Josías micori jitodi Jeconías micori. Jeconías micori amatiai micoriai jiai itimaci. Naie facaiseconi Babilonia railla nairai dine naie nairai soldaduai cai cominina uitimaci.

<sup>12</sup> Naie meinomo Jeconías micori Salatiel micorina comuitate. Salatiel micori jitodi Zorobabel micori.

<sup>13</sup> Zorobabel micori jitodi Abiud micori. Abiud micori jitodi Eliaquim micori. Eliaquim micori jitodi Azor micori.

<sup>14</sup> Azor micori jitodi Sadoc micori. Sadoc micori jitodi Aquim micori. Aquim micori jitodi Eliud micori.

<sup>15</sup> Eliud micori jitodi Eleazar micori. Eleazar micori jitodi Matán. Matán micori jitodi Jacob micori.

<sup>16</sup> Jacob micori jitodi José micori. José micoridi María ini. Naiñaiñodi Jesús ei. Naimie mameci jiaicidi Cristo.

<sup>17</sup> Abraham micori illa facaisemona David micori jeicia facaisemo Jesús ie catorce nanoramaci mameci jai ite. David micori facaisemona Babiloniamó ite nairai anamo cai jaiagái illa facaisemo catorce nanoramaci mameci jiai ite. Babiloniamó ite nairai anamo cai jaiagái illa facaisemona Jesús jeicia facaisemo catorce nanoramaci mameci jiai ite.

*Jesús jeicia rafue  
(Lc 2.1-7)*

<sup>18</sup> Jesucristo comuilla rafuena lloiticue. Jesús eidi María. Naiñaiña jicanotimiedi José micori. Naimie micori diga naiñaiño nia iñenia, Jesiñamui Joreño ie uaido naiñaiña uruesitate.

<sup>19</sup> José micori maremie. María jai uruesillana naimie micori fidianona, naiñaiña meidaitañellena jira, naiñaiña bainino dotaacade. Jaiimie diga illamona urueside raillanona comecina facajanona, naiñaiña dotaacade.

<sup>20</sup> Naimie micori comecina iemo facaia, naimie micori nicañirillanona, naimie micorimo Jusiñamui jaienicí bairiano raite:

—José, David micori jito, Maríana jaciruiñeno ono, o aina illena. Jusiñamui Joreño naiñaiña jai uruesitate.

<sup>21</sup> Himana jocoite. Ie comini naimaci jeacinomona naimie jilloitajaiBILLA jira, Jesúna o jitalle naimie mamecidi —raite.

<sup>22</sup> Bie rafue suide, Jusiñamuidi ie lloraíma micori jaié llotataga uaina suillena.

<sup>23</sup> Jaié llotatate:

Himana uifioñediñaiño como comuite uruedi.

Himana jocoite.

Emanuel ie mameci jitalle.

Bie mameci oni dobaifnuamona raite: “Jusiñamui cai diga ite”.

<sup>24</sup> José micori casidemo, Jusiñamui jaienici lloga uaina fnode. Maríana ote, ie aina illena; <sup>25</sup> iadedi nai jítóna naiñaiño nia jocoñenia, naiñaiño diga naimie micori nia iniñede. Naiñaiño jito jeicia mei, José micori jítade naimie mamecina Jesúsna.

## 2

### *Monamo ite ramo comeciaina facauidino rafue*

<sup>1</sup> Judea railla eniruemo Jesús jeiciga. Naimie jeicianodi Belén. Naie facaiseconi ite illaimadi Herodes micori. Monamo ite ramo comeciaina facauidino naie facaiseconi Jerusalémo jítoma billafo dinena bitimaci. Jerusalémo itinómo jicanotimaci:

<sup>2</sup> —¿Ninomo como jeiciga omoi judíuái illaimadi? Jítoma bisoillafomo como bairede ucuduna ciodicai. Naiemona naimie jeiciana jai uiñotícaí. Naimiemo iobillacinona fecallena bitícaí.

<sup>3</sup> Herodes micorídi naicinona cacajanona, ie comeci jarire ite. Jiaimie naimie meifomo illana jítaiñede. Jerusalémo itinodi jiaí jarire itimaci.

<sup>4</sup> Ie facaise Herodes micori judíuái illaicominina uaiduanona, naimacimo Cristo raillamie jeiciana jicanote.

<sup>5</sup> Uai otimaci:

—Judea railla eniruemo. Belémo. Iena Jusiñamui facaina micorídi jaie cueda:

<sup>6</sup> Judea eniruemo Belén nairai ite; ia naie nairai eo janorede.

Naie nairaimona damie jeiciamona, omoi illaimana jaite.

Naimiedi cue Israel railla cominina sedaite.

Iemona Belén nairai Judea illaicomini baifemo faite cueda.

<sup>7</sup> Iena cacaja mei, Herodes micorídi monamo ite ramo comeciaina facauidino bainino uaidote. Naie ucudu bairia facaise raise uiñollena jicanote.

<sup>8</sup> Naimacina Belémo orede. Llote:

—Naie uruena raise jeno. Naimiena omoi cúa mei, cuemo luuabi, naimie dine cue jailla. Naimiemo iobillacinona jiaí feaacadicue —llote.

—Jii —fairiotimaci.

<sup>9-10</sup> Iena naimie micori llua mei, jaidimaci. Ucuduna naimaci dane cuamona, eo iobidimaci. Naimaci cúa ucududi naimacina ifuanona, monamo naie urue afemo ride.

<sup>11</sup> Fo jaillano uruena, ie ei María diga, ciotimaci. Naimiemo iobillacinona fecallena, caiñici ifodo ana rainadatimaci. Naimaci bolsas sebiñuanona, naimiemo rana jamai fecadimaci. Oro fecadimaci. Caimare sorirede rana jiaí fecadimaci.

<sup>12</sup> Naimaci inia anamo naimaci nicairillanona, Jusiñamui llote:

—Herodes dine abido jaiñeno —llote. Ie jira Jerusalémo jaiñeno abido naimaci eniruemo jaidimaci.

### *Egiptomo Jesús jailla rafue*

<sup>13</sup> Naimaci jailla mei, José micori inia anamo nicairite. Nicairillanona, Jusiñamui jaienici naimiemo bairiano raite:

—Egiptomo nai o urue diga, ie ei diga, mai jai. Omo cue llua dinori nainomo i. O abido billirui lloticue. Herodedi nai uruena jenoite, naimiena meinellena —raite.

<sup>14</sup> José micori raire casillano, nai urue diga, Jesús ei diga, Egiptomo naiona jaide.

<sup>15</sup> Herodes micorí fiodaille dinori nainomo ite. Ie muidona Jusiñamui ie facaina lloraima micorí llotataga uai jai suide. Jaie lloga: “Egiptomona cue Jítóna jai uaidotícaí”.

### *Mena años itisaiái dierisedena faia rafue*

<sup>16</sup> Egiptomo Jesús jaillana Herodes micorí fidiñede. Monamo ite ramo comeciaina facauidino naimaci eniruemo abido jaillana naimie micorí jiaí fidiñede. Naimie micorí dine naimaci abido biñena jira, naimie micorina naimaci jifua jira, naimie micorí eo icirite. Ie jira mena años itisaiái dierisedena faetate. Nana Belémo ite iisaiái diese faetate. Belén ecimo itino uruina jiaí faetate. Naie ucudu mena años jaie nano bairena jira, mena años itisaiái dierisedena faetate.

<sup>17</sup> Raquel micorí jaie eia isoi, Belén itino birui eedimaci. Jeremías micorí iena jaie cueda:

<sup>18</sup> Ramá railla nairai dinena Raquel micorí eo eiana cacadicue.

Cai usuño Raquel micorí eede.

Naiñaiño micorí uruiai micoríai facaina eede.

Jiaie cominimona firaduacinona jítaiñede, naiñaiño uruiai micoríai jai fiodailla jira.

<sup>19</sup> Digarui illanona, Herodes micorí fiodailla mei, Egiptomo José micorí dane nicairillanona, Jusiñamui jaienici naimiemo bairede.

<sup>20</sup> Llote:

—O comini eniruemo na o urue diga, ie ei diga, abido mai jai. Nai o uruena meineia-cadimie jai fiodaite.

<sup>21</sup> Ie jira ie eniruemo naie urue diga, ie ei diga, abido jaide.

<sup>22</sup> Herodes micori jitodi ie moo ifomo jai illana José micori fidiano, jaciruite. Herodes micori jito mamecidi Arquelaio. Nainomo José jaiacaiñede. José micori dane nicairillanona, Jusiñamuidi Galilea railla eniruemo naimie jaillena naimiemo llote.

<sup>23</sup> Nazaret railla nairai dine jaide, nainomo illena. Iemona Jusiñamui facaina lloraini micoriai jaie cuegafuiai jai suide. Cristona jaie cуетimaci: “Naimiedi Nazaret imie”.

### 3

*Jofue iñenanomo Juan Bautista micori illa rafue*  
(Mr 1.1-8; Lc 3.1-9, 15-17; Jn 1.19-28)

<sup>1</sup> Diga años illanona, Juan Bautista raillamie micoridi jofue iñenanomo illanona, cominina dafaiña, Jusiñamui rafuena naimacina llofueuide.

<sup>2</sup> Comini naimie micori dine billanona, naimacimo llote:

—Omoi jeacinona fainonocaida, omoi comeciai iuaillai meido. Jusiñamui dibeimo omoi i. Naimie anamo omoi illana naimie jitailla jira, omoimo iena lloiticue —llote.

<sup>3</sup> Isaías micoridi Jusiñamui facaina lloraima. Juan Bautista micori nia iñenia, Isaías micoridi naimie micorina jaie cuete:

Jofue iñenanomo damie jidai-jidaillana cacadicue.

Naimie llote: “Cai Nama biite.

Naimie naiso atona raise fino” llote.

Iese llote; iadedi naimie uaina naimaci feiñollena, naimaci comeciai marena finuana ñaite.

<sup>4</sup> Juan micoridi camello itiraijai ie nilla iniroina jitate. Igoi iena ie moilligaina jitate. Fioduaina rite. Ciifona mete. Jamai rana guite.

<sup>5</sup> Diga comini naimie micori dine jai jaisoidimaci. Jerusalémona, nana Judeamona, nana Jordán fue mona jai jaisoidimaci.

<sup>6</sup> Jusiñamuimo naimaci jeacinona naimaci llua meino, naimacidi Juan micori bautizaga.

<sup>7</sup> Bautizallena, diga fariseuai, diga saduceuai, naimie micori dine bitimaci; iadedi naimaci billana naimie micori ciuano llote:

—Maraiñede rafuena finocana omoi jailla jira, jaio nairai isoidomoi. ¿Niese Jusiñamui riicailifue mona jilloitomoi? Cue dine omoi billena, ¿bu omoimo llua?

<sup>8</sup> Omoi comeciai iuaillai meido. Omoi jeacinona fainonocai. Iemona Jusiñamui jitaillacinona fino. Mare rafuena finocana jai. Naiemona omoi comeciai iuaillai meiduana uifioiticaí. Ie mei omoi bautizallomoi.

<sup>9</sup> Omoi comeciaina facañeno: “¿Bue ñellena o llua isoi finoiticaí? Jusiñamui Abraham micorina jaie eo raise nabaide. Abraham micori cai moo illamona, Jusiñamui riicailifue mona jilloiticaí”. Ero, omoimo lloiticue: Cue llua isoi omoi finoñenia, naimie riicailifue mona jilloñeitomoi. Abraham micori uruaidomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite nificimona naimiedi Abraham micori facaina uruaina comuitarede.

<sup>10</sup> Ero, lliñede riará tiedomoi. Tiaa mei, maraiñena jira, iena jobaidomoi. Ie isoidomoi. Omoi maraiñena jira, Jusiñamui omoína jai duere finoacade. Ie riicailafue anamo jai itomoi. Omoi comeciai iuai omoi meidoñenia, omoína duere finoite.

<sup>11</sup> Jusiñamui dibeimo omoi comeciai iuai omoi meidoia, jinui diga omoína bautizaiticue. Cue baifemo faitimie bie facaise biite. Naimie cue ifo meidoite. Jamai bue cue isoilla jira, naimiena cue canuana uifioñedicue. Naimie bia, naimie dibeimo omoi jaillanona, Jusiñamui Joreño omoimo itataite. Omoi comeciai iuai omoi meidoñenia, omoína duere finoite.

<sup>12</sup> Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isode. Naimie rafuena lluanona, comeciai iuaillai meidotinona ie moo illanomo naimiedi ofitaite; iadedi jiaie cominina duere finoite. Iraimo dotaite. Naie irai jaca duñede —llote.

*Jesús bautizaja rafue*  
(Mr 1.9-11; Lc 3.21-22)

<sup>13</sup> Juan micori Jordán dine nia ia, Galileamoná Jesús bite. Naimiena bautizallena, Juan micori dine bite.

<sup>14</sup> Juan dinena naimiemo llote:

—Bautizallena cuemo bitio; ia dama ite. Cuena o bautizaia, cuemona mare.

<sup>15</sup> Jesús uai ote:

—Cuena mai o bautiza. Nana Jusiñamui jitailla rafue coco finoia, mare.

Juan:

—Jee —raite. Ie facaise naimiena bautizade.

<sup>16</sup> Jesús bautizaja mei, jinuimona bite. Mona bojodena ciode. Jusiñamui Joreño, ucugi isoi, naimie emodomo ana billana ciode.

<sup>17</sup> Ie facaise monamona Jusiñamui llote:

—Bimie cue eo isiruiga jito. Naimieri iobidicue.

## 4

*Jesúna Taife ramo faia rafue*

*(Mr 1.12-13; Lc 4.1-13)*

<sup>1</sup> Naie facaise nainomo naimiena ramo Taife faillena, jofue iñenanomo Jusiñamui Joreño Jesúna uite.

<sup>2</sup> Cuarenta digarui Jesús guiñede. Naie facaise fuilla mei, guiñeno illamona, aimetaite.

<sup>3</sup> Ie facaise Taife naimie dine bite. Jesús aimetaillana naimie uiñuamona llote:

—Jusiñamui Jitodiodena, naimiemo llono: “Ore Moo, cue guillesa, bie noñici llomenicono jaita”.

<sup>4</sup> Jesús uai ote:

—Dama ite. O lluana finoñeiticue. Jusiñamui facaina lloraíma micori iena jaie cuega: “Jiaie rafuedi llomenico guilla baifemo faite. Dama guillermo comecina facañeno; iadedi Jusiñamui lloga uaimo cai comeci facajamona, ie uaido cai jailla” cuega.

<sup>5</sup> Ie mei Jerusalémo Jusiñamui jofo muidomo Taife Jesúna uite.

<sup>6</sup> Raite:

—Jusiñamui Jitodiodena, eniruemo mai ana uai. David micori ona jaie cuega: Ona eenollena, Jusiñamuidi ie jaienisaimo lloite.

Eniruemo o uaiñellena, o abi bofedaiñellena, ona feiñoitimaci

cuega. Naie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

<sup>7</sup> Jesús uai ote:

—Dama ite. Ana uaiñeiticue. Ero, ie cominimo Moisés micori jaie cuega: “Cai Nama Jusiñamuina facaciñeno”. Naimie cuena raise eenuana jai uiñoticue. Jamai ebena naimiena facaciñeiticue. O lluana finoñeiticue.

<sup>8</sup> Ie mei a ite anedumo Taife naimiena uite, naie anedumona nana nairaiaina cioillena. Naie nairaiái eo ebire eruaide.

<sup>9</sup> Naimiemo llote:

—Nana bie nairaiái cue anamo birui illamona, cuena o sedaia, nana bie nairaiái omo iiticue. O caiñici ifodo ana rainada, cuemo iobillacino o fecallena.

<sup>10</sup> Jesús uai ote:

—Dama ite. Ona sedañeiticue. Ie cominimo Moisés micori jaie cuega: “Cai Nama Jusiñamuina seda. Dama naimiemo iobillacinona feca”. Taife, mai cuemona oni jai.

<sup>11</sup> —Ie facaise naimiemona Taife jaide. Naimie jailla mei, Jusiñamui jaienisai Jesús dine bitimaci. Naimiena ecallena bitimaci.

*Galileamo Jesús illa rafue*

*(Mr 1.14-15; Lc 4.14-15)*

<sup>12</sup> Naie facaise Juan Bautista micorina Herodes gaitajana naimie fidiano, Galilea railla eniruemo Nazareto Jesús jaide.

<sup>13</sup> Nainomo rilla mei, Capernaumo jaide. Capernaum nairai jorai fuemo ite. Nainomo Zabulón railla enirue ite. Neftalí railla enirue jiai ite.

<sup>14</sup> Nainomo Jesús jailla jira, Isaías micori jaie cuegafuiaí jai suide.

<sup>15</sup> Naimie micori naie cominina jaie cuega:

Bie eniruemo diga nairai ite.

Zabulón ite. Neftalí ite.

Monaillai fuemo nairai ite. Jordán ruicafebeimo nairai ite.

Galileamo nairai jiai ite. Nainomo judúuaiñedino jai itimaci.

<sup>16</sup> Jeacino anamo naimaci illamona, naga naie eniruemo ite comini jitiredinomo itimaci isoidimaci

Jusiñamuina uiñoñeno fiodaicana jaidimaci; iadedi eo mare rafue birui cacaitimaci.

Naie rafue naimaci comeciaina lligaiñoite. Naie rafuena uitimie baireniete

cuega. Jusiñamuina naimaci uiñoñena jira, naimacina iese cuega. Jesús nainomo birui llofuia jira, mare rafuena jai cacadimaci.

<sup>17</sup> Galileamo rilla mei, Jesús llocana jaide. Llofuede:

—Jusiñamui dibeimo illena, omoi jeacinona fainonocaida, omoi comecia: iuaina meido. Ie cominina omoi jaillena birui jitaide.

*Ie llofueoicaiganona jaillena, Jesúdi nagaamagamiena fetua rafue  
(Mr 1.16-20; Lc 5.1-11)*

<sup>18</sup> Jiairuido Galilea railla jorai fuemo Jesús macaritemo, menamienna ciode. Naga ie ama iaímaia. Damie Simón. Jiaici naimie mamecidi Pedro. Ie ama Andrés diga ite. Lloijina faíraima iaímaia. Iese jaca naie iaímaiaidi maijuidiiaímaia.

<sup>19</sup> Iaímaiaimo llote:

—Cue diga omico jaoicaillena, cue diga mai bi. Cue llofueganona omico jaillena jitaicue. Lliciaina birui ocabitomico; iadedi cominina oitomico, cue dibeimo naimaci illena.

<sup>20</sup> Iena cacajanona, ieconi iaímaia: lloijina fainonocaida, naimie diga jaidiaímaia. Ie llofueganona jaillena, jaidiaímaia.

<sup>21</sup> Lliai bai Jesús jaidemo, jiaie menamienna ciode. Naga ie ama iaímaia. Damie Jacobo. Jiaimie Juan iaímaia: moodi Zebedeo. Naimie diga botemo itiaímaia. Lloijina sigaidimaci. Jesús iaímaia naie uaidote, naimie llofueganona jaillena.

<sup>22</sup> Ieconi iaímaia: moona fainonocaida, botemona ari billanona, Jesús diga jaidiaímaia.

*Jesús ailluena cominina llofua rafue  
(Lc 6.17-19)*

<sup>23</sup> Nana Galileamo Jesús jaide. Judiaí ofiracuaimo llofueuide. Naimie anamo comini illana Jusiñamui jitailla jira, Jesúdi Jusiñamui dibeimo naimaci comecia: iuaina meiduanona llofueite. Ie cominina naimaci illena llofueite. Naga isoide duiconona duidinona jillotate.

<sup>24</sup> Iemona nana Siria railla eniruemo naimie mameci soride. Naie comini naga isoide duiconona duidinona naimie dine atidimaci. Abi isiredinona atidimaci. Janania: anamo illa cominina atidimaci. Naillidinona atidimaci. Niraidanidinona atidimaci. Nana naimacina jillotate.

<sup>25</sup> Ailluena comini naimienna racadimaci. Galileamona, Decápolimona, Jerusalémona, Judeamona, Jordán ruica dibeimona comini bitimaci.

## 5

*Anedumo naimie ia, Jesús lloga rafue  
(Lc 6.20-23)*

<sup>1-2</sup> Ailluena cominina Jesúna racadimaci. Naimacina Jesús ciuanona, anedu muidomo jaide. Ie llofueoicaigano naimie diga jaidimaci. Nainomo ana raita, Jesús naimacimo llote: —Omoína Jusiñamui ie cominina sedaacana rafuena ja llofueite. Naimie anamo naimaci illena llofueite.

<sup>3</sup> Ero, Jusiñamui naimienna jitaidinona sedaite. Comeciaina facadimaci: “Naimie jitaillacinona daní finonidica: ia naimie caina canuanona, iena finoitica:”. Naimie cominina naie isoidino illamona, naimie naimacina canoite. Iemona caimare iitimaci.

<sup>4</sup> Jusiñamui sunaitinona sedaite. Ailluena comini jeacinona finocana jaidimaci. Iena uínuamona, damierie sunaitimaci. Naimie cominina naie isoidino illamona, Jusiñamui naimaci comeciaina ocuñotaite. Iemona caimare iitimaci.

<sup>5</sup> Jusiñamui abina iedoñedinona sedaite. Naimie cominina naie isoidino illamona, Jusiñamui nana enirue naimacimo iite. Eniruemo cominina ico cue sedaia, iese iite. Iemona caimare iitimaci.

<sup>6</sup> Jusiñamui naimie jitaillacino finodinona sedaite. Jusiñamui mare rafuena naimaci finuana canoite. Iemona caimare iitimaci.

<sup>7</sup> Jusiñamui cominina duenaitinona sedaite. Naimacina naimie duenailamona, Jusiñamui naimacina ico duere finoite. Iemona caimare iitimaci.

<sup>8</sup> Jusiñamui jeanide comeciredinona sedaite. Naimie cominina naie isoidino illamona, naimie diga jaca iitimaci. Iemona caimare iitimaci.

<sup>9</sup> Jusiñamui naimie diga uri itinona sedaite. Naimie cominina naie isoidino illamona, jiaie cominina uri itatitimaci. Naie isoidino naimie cominina jaca mamecirenitimaci. Iemona caimare iitimaci.

<sup>10</sup> Jusiñamui jitaillacinona finuamona, damierie duere sefuitimaci. Jusiñamui naie isoidinona sedaite. Naimie cominina naimaci illamona, naimie sedajanomo jaca jainaitimaci. Iemona caimare iitimaci.

<sup>11</sup> Cuemo omoi duia, duere sefuitomoi. Jiaie comini omoína jeare ñaitimaci. Omoína duere finoitimaci. Omoi joreñona tainona lloitimaci. Duere sefuitomoi; iadedi Jusiñamui omoína caimare itataite.



<sup>12</sup> Omoí isoi omoí jaiagaimona Jusiñamui facaina lloraini micoriai jaié duere sefuidimaci. Iena omoí uiñuamona, monamo Jusiñamuimona ailluena ibana ico omoí feiñua jira, birui omoí duere sefua, iocire omoí jai.

*Jesús comini illa rafue  
(Mr 9.50; Lc 14.34-35)*

<sup>13</sup> Jesús llote:

—Jusiñamui ie cominina sedaacalle rafue nia llofueiticue. Llicisi rifaia, jai maraiñede. Iena rifaiñellena, llicisimo sal joneticai. Sal isoidomoi. Jusiñamui jitailla isoi omoí illamona, jiaie comini maraiñede rafuena eo finoñedimaci. Sal ie caimano jai iñenia, çniese dane nibaiamona caimarenite? Jai maraiñede. Jitaiñena jira, iena oni faiga. Ie isoide. Jusiñamui jitailla isoi omoí iñenia, naimie omoína duere finoite.

<sup>14</sup> Cuelmo omoí duilla jira, jiaie cominina Jusiñamuina omoí uiñotajamona, lligaiñora isoidomoi. Anedumo ite nairai jaca bairede. Ie illanona jaca uiñoticaí. Jusiñamui jitailla isoi omoí illamona, jiaie comini naimiena uiñoitimaci.

<sup>15</sup> Lamparin unia mei, cirigai anamo buna rainañega. Jaca ie rainarafomo rainaca, nana jofu jeraina lligaiñollena.

<sup>16</sup> Ie isoide. Cue rafuena jamaiñeno; iadedi omoí marena illamona, cominina Jusiñamuina uiñota. Omoí marena illamona, comini omoí mare finoca rafuena uiñoitimaci. Iemona: “Jusiñamui maremiéna” raitimaci.

*Jesúdi Moisés micorina llofua rafue*

<sup>17</sup> Jesús llote:

—Jusiñamui ie cominina sedaacalle rafue nia llofueiticue. Iena cue llofua jira, omoimona damerie comecina facade: “Bimie Moisés micori lloga rafuedo jaiñede”. Ero: “Moisés micori llogacinuai maraiñede” raiñedicue. “Jusiñamui facaina lloraini micoriai jaié llogacinuai maraiñede” jiaí raiñedicue; iadedi omoína naie llogacinaina raise uiñotaacadícue.

<sup>18</sup> Biemo omoí comeciaina faca. Mona, enirue diga, nia ia, nana naie llogacinuai jaca suite.

<sup>19</sup> Omoí einamací raitimaci: “Dajerie llogacino jiaie llogacino baifemo faite”. Cue raiticue: Naga llogacino omoí iñoñenia, naga omoí llofueñenia, nana Jusiñamui jitaillacinona finoñedomoi.

<sup>20</sup> Ero, Jusiñamui jitailla rafuedo judíuai illaicomini baifemo omoí jaiñenia, Jusiñamui sedajanomo jaca iñeitomoi. Naimaci naie jaié llogacinuai uiñoitimaci; iadedi naimaci comeciái Jusiñamui díbeimo iñedimaci.

*Jesúdi iciriñena llofua rafue  
(Lc 12.57-59)*

<sup>21</sup> Jesús llote:

—Omoí llofueraimona bie jai cacadomoi. Moisés micori omoí jaiagaimo llote: “Comena meineñeno. Comena bu meineia, jeacino jai finode. Naimie fiodaillena juez llua”.

<sup>22</sup> Naie llogacino jai jaicabidomoi. Omoímo birui jiaie rafue lloiticue. Jiaimie diga bu iciria, jeacino jai finode. Naimie duere sefuillena, juez dine naimie uiga. Jiaimiena bu jeare ñaia, jeacino jai finode. Naimie duere sefuillena, illaicomini dine naimie uiga. Jiaimiena bu faidoia, jeacino jai finode. Jusiñamui naimiena duere finoite. Iraimo jaite.

<sup>23-24</sup> Jerusalémo Jusiñamui jofomo omoí jeacino facaina naimiemo ra fecallena omoí jaia, omoí comini diga uri nano i. Jiaimie omoí diga icirillana omoí uibiñoia, omoí ra faionocaida, naimie dine nano mai jai. Naie rafue raise finollena, naimie dine jai. Ie mei Jusiñamuimo omoí rana feca.

<sup>25</sup> Omoína bu llogidoia, juez dine nia omoí riñenia, omoína llogidotimie diga naie rafuena raise fino. Iena raise finoñenia, juez dine omoí ria, nainomo duere sefuitomoi. Calabozomo omoína oretaite.

<sup>26</sup> Nana raise ibañenia, juez llua isoi, jino jaiñeitomoi. Iese omoímo suiñellena, jiaimie diga rafuena comuitañeno. Jeacino finoñellena, jiaimie diga iciriñeno.

*Jesúdi iima ie aiñede riño diga illa llua rafue*

<sup>27</sup> Jesús llote:

—Omoí llofueraimona bie jai cacadomoi. Moisés micori jaié llote: “Omoí aiñede riñoñiaí diga iñeno. Omoí iniñede iñiaí diga iñeno”. “Tena bu finoia, jeacino jai finode” raitomoi.

<sup>28</sup> Jiaie rafue birui lloiticue. Ie aiñede riñoero eruailamona naiñaiñoña bu nicidoia, naiñaiño diga jamai iniacananona naimie comeci facajamona, jeacino jai finode. Naiñaiño diga iñede; ia naiñaiño diga jamai iniacananona naimie comeci facajamona, jeacino jai finode.

29-30 Biena ñaiticue. Nie isoide rafue omoína jeacino finotaia, iemo eruaiñeno. Iena llinoñeno. Iemo começina facañeno. Omoí ciua rana jira, omoí jitaillamona jeacino finodomoí. Rana omoí jetaja jira, omoí jitaillamona jeacino finodomoí. Omoí abina omoí namatañenia, omoí uisina juicono. Omoí onolli jaita. Omoí começina ñaiticue. Omoí abina omoí raise namatallena, omoí começi nano raise fino. Jeacino omoí finoia, iraimo jaitomoí. Nana omoí abi diga iraimo jaitomoí. Iramo omoí jaiñellena, jeacino finoñeno.

*Jesúdi ima ie aina dotaja llua rafue*  
(Mt 19.9; Mr 10.11-12; Lc 16.18)

<sup>31</sup> Jesús llote:

—Omoí llofuerañimona bie jai cacadomoí. Moisés micorí jaie llote: “Ie aina bu dotaacania, naiñaiño mo dotajacanabena fecaja”. Iedo jai jaicabidomoí. Iena bu finoia, omoímona mare.

<sup>32</sup> Jiaie rafue birui lloiticue. Jiaimie diga naiñaiño iñenia, ie aina bu dotajia, maraiñede. Jaiiruido jiaimie diga naiñaiño ia, nanodí ie ini muidona naiñaiño jeacino jai finode. Dotaca riñoña ie aina illena bu ua mei, naimiedi jeacinona jai finode. Jeacino finoñellena, aina dotañeno.

*Jesúdi Jusiñamui mameçi jamai ebena llinoñenana llua rafue*

<sup>33-35</sup> Jesús llote:

—Omoí llofuerañimona bie jai cacadomoí. Moisés micorí omoí jaiagaímo llote: “Taino lloñeno; ia Jusiñamui omoí lloga uaina fino”. Iedo jai jaicabidomoí. Omoí lloga uai omoí finollena jiaie comini uiñollena, Jusiñamui mameçina llinotomoí. “Iena cai llinoia, cai lloga uaina cai finoñenia, Jusiñamui caina duere finoite” raitomoí. Jusiñamui mameçi omoí llinoñenia, omoí lloga uai omoí finoñenia, omoímona mare. “Jusiñamui caina duere finoite” raitomoí. Iemona monamo ite ra mameçina jamai ebena llinotomoí. Eniruemo ite ra mameçina jamai ebena llinotomoí. Jerusalén railla nairai mameçina jamai ebena llinotomoí. Omoí ifogí mameçina jamai ebena jiaí llinotomoí. Jusiñamui mameçina jamai ebena llinoñedomoí; ia jiaie ra mameçina jamai ebena llinotomoí. Ero, monamo ite ra mameçina omoí llinoia, Jusiñamui mameçina jiaí llinotomoí, nainomo ie illano illa jira. Eniruemo ite ra mameçi omoí llinoia, iena Jusiñamui finua jira, iena naimie sedaja jira, naimie mameçina jiaí llinotomoí. Jerusalén railla nairai mameçina omoí llinoia, Jerusalén naimie nairaina jira, naimie mameçina jiaí llinotomoí.

<sup>36</sup> Omoí jitrede ifotiraina usere omoí jaitanina jira, omoí userede ifotiraina jitre omoí jaitanina jira, omoí ifogí mameçi jiaí llinoñeno. Dama Jusiñamui iena usere itataja jira, dama naimie iena jitre itataja jira, ifotirai mameçina omoí llinoia, Jusiñamui mameçina jiaí llinotomoí.

<sup>37</sup> Ie jira Jusiñamui mameçi jamai ebena llinoñeno. Jiaie ra mameçi jamai ebena llinoñeno; iadedí nie isoide rafuena omoí finoia, omoí lloga uaina taino lloñeno fino. Uanaicinona jaca llono. Uanaicinona omoí lloñenia, Taifemona omoí uaina otomoí.

*Jesúdi iba oñenana llofuia rafue*  
(Lc 6.29-30)

<sup>38</sup> Jesús llote:

—Omoí llofuerañimona bie jai cacadomoí. Moisés micorí jaie llote: “Fuirillamona o uisina jiaimie jino juiconoia, juez naimie uisina juiconuana llua. O isidona jiaimie oni tainoia, juez naimie isidona oni tainuana llua. Jiaimie ona duere finoia, o duere sefuilla isoí, juez naimie na duere finua”. Iedo birui jai jaicabidomoí;

<sup>39</sup> Iadedí birui omoímo lloiticue: Ibana oñeno. Maraiñede rafue finodimie mona omoí abina riidoñeno. Omoí cacaina naimie dutaia, naimie diga iciriñeno. Enefebeimo omoí uieco dobaíño, enefebéi omoína naimie dutallesa. Naimie omoína duere finoia, ibana oñeno.

<sup>40</sup> Omoí iniroí bairollena omoína bu llogidoia, juez nia omoímo lloñenia, naimie jitailla iniroí baifero naimie mo feça.

<sup>41</sup> Daje kilómetro naimaci raruiaí omoína uillana illaicomini ocuia, iena uiño. Nibai omoí começi jitaíñede; ia naimacina canollena, iena mena kilómetros uiño. Naimaci ocuilla baifero uiño.

<sup>42</sup> Omoímo ite rana bu jicaia, iena caidiñeno. Omoí rana bu jamai jicuano uia, abido atillena, iena caidiñeno feça.

*Jesúdi omoína gañenano isiruillena llua rafue*  
(Lc 6.27-28, 32-36)

<sup>43</sup> Jesús llote:

—Omoí llofuerañimona bie jai cacadomoí. Llotimaci: “Omoí cominina isirui; iadedí omoí nairaiñedinona enoi”. Iedo jai jaicabidomoí.

<sup>44</sup> Omoimo birui lloticue: Omoi nairaiñedinona isirui. Omoi gaiñenanona isirui. Omoína duere finodino facaina Jusiñamuimo jii. Naimaci comeciai luai meiduana naimiemo jicano.

<sup>45</sup> Jusiñamui cominina omoi illamona, naimaci facaina jii. Ero, Jusiñamui nana cominina daje isoi canode. Nana cominina daje isoi isiruilla jira, naimiedi jitomana maraiñedinona lligaiñotade. Mareuidinona jiai lligaiñotade. Maraiñedino dine noci deitate. Mareuidino dine jiai noci deitate.

<sup>46</sup> Naimie comini omoi illamona, nana comini daje isoi isirui. Omoína isiruitinona omoi isiruia, mare; iadedi omoína gaiñenanona omoi isiruiñenia, Jusiñamui omoína: “Mare” raiñeite. Maraiñede finoraini naimacina isiruitinona isiruitimaci. Nana cominina omoi isiruiñenia, maraiñede finoraini baifemo faiñedomoi. Naimaci isoi itomoi.

<sup>47</sup> Dani omoi cominina omoi uaidoia, mare; ia omoína gaiñenanona omoi uaidoñenia, naimaci baifemo faiñedomoi. Jusiñamuina inoñedino baifemo faiñedomoi. Naimaci isoi itomoi.

<sup>48</sup> Iena omoi uiñuamona, omoi Moo Jusiñamui finua isoi, mare rafuena finocana omoi jai.

## 6

### *Jesús di mare rafue finuana luua rafue*

<sup>1</sup> Jesús llote:

—Omoína nia llofueiticue. Jiaie comini iena cioillena, mare rafuena omoi finoiadedi, omoína: “Mareuidinodimaci” naimaci raillena, Jusiñamuimona ibana feiñoñeitomoi. Ie jira mare rafuena finoñeno, iena jiaie comini jamai cioillena. Iena ja ñaiticue.

<sup>2</sup> Dueredinomo rana omoi jamai fecaia, iena uainino feca. Jiaie cominimona iobillacinona omoi feiñoñellena, iena fecañeno. Ofiracomo maredinona abi caitadino isoi omoi iñeno. Naisomo maredino abi caitadino isoi iñeno. Iena comini cioillena, dueredinomo rana marefodo fecacabidimaci. Cominimona naimaci iobillacino birui jai feiñoñeitomoi. Jusiñamuimona ico feiñoñeitomoi.

<sup>3</sup> Dueredinomo rana omoi fecaia, jiaie cominimo iena lloñeno.

<sup>4</sup> Iena bainino feca. Bainino iena omoi fecaia, Jusiñamui iena uiñote. Naimiemona ibana feiñoñeitomoi. Omoína: “Mare” raite.

### *Jesús Jusiñamuimo jia rafue*

*(Lc 11.2-4)*

<sup>5</sup> Jesús llote:

—Jusiñamuimo omoi jiiia, maredinona abi caitadino isoi omoi iñeno. Ofiracomo naimacina comini cioillena, marefodo jiidimaci. Jicabilla facaiseconi naisomo naimaci ia, naimacina comini cioillena, marefodo jiai jiidimaci. Naimacina: “Jusiñamuina eo sedadimaci” comini raillana jitaaidimaci. Cominimona iobillacinona birui jai feiñoñeitomoi.

<sup>6</sup> Omoi jiiacania, omoi jofomo fo jai. Nainomo Jusiñamuimo anado omoi jii. Iena Jusiñamui uiñuamona, omoi jicaca rafue naimiemona feiñoñeitomoi.

<sup>7</sup> Jusiñamuimo omoi jiiia, naimiena inoñedino isoi jamaicinona ñaiñeno. Naimaci comecina facadimaci: “Daje jiracinona diga icañño cai jia jira, ja muidomo cai Moo caina raise cacaite”.

<sup>8</sup> Naimaci isoi iñeno. Nia omoi jicañenia, naimie omoi jitaile rafuena uiñote.

<sup>9</sup> Naimiemo omoi jiiacania, iese jii:

Ore Moo, monamo itio.

Comini ori iobidesa.

<sup>10</sup> O illaimana jira, nana cominina o anamo raire itata.

O jaienisaí o jitaillacinona finua isoi, cominina o jitaillacinona finota.

<sup>11</sup> Nagarui guille caimo itata.

<sup>12</sup> Caina jeare jiaino finoia, iena caimona feilla isoi, cai jeacinona omona feilla jira, cai jeacinona oni dota.

<sup>13</sup> Caimo ramo bu faia, caína cano, iena cai inoi raillano. Jeacinona finuamona caina jillota. Iese omoi jii.

<sup>14</sup> Omoína jiaie comini jeare finoia, iena omoi feitaia, omoi monamo ite Moo omoi jeacinona iena faitajanona, jiai oni dotaite;

<sup>15</sup> iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

### *Jesús guiñenaruina luua rafue*

<sup>16</sup> Jesús llote:

—Omoína nia llofueiticue. Raitomoi: “Jusiñamuina eo raise cai sedajanona, birui cai guiñeiticai. Iemona naimie caina eo duenaite” raitomoi. Iese Jusiñamuina omoi sedajia, sunaiñeno, mareuidinona abi caitadino isoi. Sunaitimaci. Naimaci uieco finobicabicide.

Naimaci guiñenarui facaise illana comini uifñollena, naimacina comini cioillena, iese itimaci. Naimacina: “Mare” comini raillamona, iobillacinona birui jai feiñotimaci. Jusiñamuimona ico iena feiñoñeitimaci.

<sup>17</sup> Ero, naimaci isoi omoi iñeno; iadedi omoi guiñenarui ia, omoi abiai raise fino.

<sup>18</sup> Iemei cominidi omoi guiñenarui illana uifñoñeitimaci. Naimacimona iobillacinona feiñoñeitomoi. Dama Jusiñamui iena uifñoite. Bainino omoi finoca rafue naimie uiñua jira, naimiemona iba feiñoñeitomoi.

*Jesúdi Jusiñamuimo comecina facaja rafue*  
(Lc 12.33-34)

<sup>19</sup> Jesús llote:

—Omoi jofomo ailluena rana eenocana uifño. Güireco iena guicabite. Dajerie ra nemuide. Omoi jofomona jiaie comini iena fiacadimaci. Ailluena ra eenuamo omoi comeciaina facañeno;

<sup>20</sup> iadedi Jusiñamui dine monamo omoi ra illa isoi, iemo omoi comeciaina faca. Naimiemo comeciaina cai facajamona, nainomo cai iobillacino iite. Güirecuaimona, nemuillamona, firirainimona, iena nainomo faifñeitomoi.

<sup>21</sup> Aillue ra omoimo ia, Jusiñamuimo comeciaina facañedomoi; iadedi naimie jitaillacinona omoi finoia, naimiemo comeciaina facadomoi.

*Jesús cai comecina llua rafue*  
(Lc 11.34-36)

<sup>22-23</sup> Jesús llote:

—Cai uisi diga rana ciodicai. Cai uisi marañenia, rana raise cioñedicai. Ie isoide. Cai comeci marañenia, marañedicinona finocana jaidicai. Jusiñamuina uifñoñedicai. Ie rafuena jiai uifñoñedicai. Naimiena nabaiñedicai.

*Jesús raruiaina llua rafue*  
(Lc 16.13)

<sup>24</sup> Jesús llote:

—Mena patrones diga daruido buna jaca maijinide. Mena diga bu maijiacania, damiena jiaimie baiñemo gaiite. Ie gaiamie ocuica rana finoite. Jiaimie ocuica rana raise finoñeite. Ie isoide. Raruia: ollemo comecina omoi eo facaia, Jusiñamui jitaillacinomo comecina raise facañeitomoi.

*Jesúdi Jusiñamui cai sedajana llua rafue*  
(Lc 12.22-31)

<sup>25</sup> Jesús llote:

—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillemo jarire comecina facañeno. Omoi jitalle iniroimo jarire comecina facañeno. Jusiñamui omoina itataja muidona, guille omoimo iite. Naimie omoi abi finua muidona, iniroidi omoimo iite.

<sup>26</sup> Silliñiaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baiñemo omoi faia jira, naimie omoina canoite.

<sup>27</sup> Omoimona, ¿bu ie comeci jarire facajamona a sairite? Iese jaca buna a sairñede. Dama Jusiñamui omoina a sairitarede.

<sup>28</sup> ¿Bue ñellena iniroimo jarire comecina facadomoi? Safiamo omoi comecina faca. ¿Niese sicodimaci? Maijiñedimaci. Iniroina tiforiñedimaci;

<sup>29</sup> iadedi Salomón micori naimaci isoi jaiie iñede. Naimie illaimana jira, naimie micori iniroi eo ebirede; iadedi safia naimie iniroi baiñemo ebire eruaide.

<sup>30</sup> Jusiñamui safiana ebiretacabide. Dallu facaise illanona, safiadu duide. Safia baiñemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena ino.

<sup>31</sup> Omoi comeci jarire finoñeno. “¿Buena guiticai? ¿Buena jitaicai?” raiñeno. Iemo comeciaina eo facañeno.

<sup>32</sup> Jusiñamuina inoñedino iemo comecina facacabidimaci. Nana omoi jitaillacinona omoi Moodi uiñua jira, naimaci isoi iñeno.

<sup>33</sup> Jusiñamui anamo raise omoi i. Naimie jitaillacinona finocana omoi jai. Naimiemo omoi comeci facaia, omoi illamo omoi comecina jarire facañeitomoi. Iemona guille omoimo iite. Iniroi omoimo iite.

<sup>34</sup> Jusiñamui omoi birui jitailla ra omoimo iite. Iena uiñuamona, jairuido suille rafuemo jarire comecina facañeno. Ico omoi jitailla ra omoimo jai iite.

## 7

*Jesúdi jiaie cominina mameriñenana llua rafue*  
(Lc 6.37-38, 41-42)

<sup>1</sup> Jesús llote:

–Omoína nia llofueiacadicue. Jiaie cominina mameriñeno. Jiaie cominina omoi mameria, omoimo ite maraiñede rafue facaina Jusiñamui omoína duere finoite.

<sup>2</sup> Jiaie cominina omoi mamerilla diaese Jusiñamui omoína duere finoite.

<sup>3</sup> Omoi ecimo itimiemo janore maraiñedicino illana omoi uiñoia, iemo comequina facañeno; iadedi omoimo ailluena ite maraiñedinomo nano omoi comequina faca.

<sup>4</sup> Omoimo maraiñedicino illamona, çniese omoi ecimo itimiema mameritomo?

<sup>5</sup> Omoimo ite maraiñedicinomo omoi comequina facacaiñena jira, maredinona abi caitadinodomo. Omoi comeaiana nano raise fino. Iemei omoi ecimo itimiema canorenitomo. Naimie comequina raise canorenitomo.

<sup>6</sup> Ero, eo mare rana omoi jiconiaimo fecañeno. Eo raifide rana omoi chanchuaimo fecañeno. Naimacimo omoi fecaiadedi, iena feiñoñeitimaci. Omoína gaiñenamona, jiconiaí omoína ainitimaci. Chanchuai iena jamaillamona, iena saítaitimaci. Ie isoide. Damierie Jusiñamui uaina uaitacabitimaci. Iena naimaci jaca feiñoñena jira, naie rafue naimacimo llocabiñeno. Naimacimo omoi llocabia, omoína duere finoitimaci. Omoi rafuena jamaitimaci.

*Jesúdi cai jitailla ra jicaja llua rafue*  
(Lc 6.31; 11.9-13)

<sup>7-8</sup> Jesús llote:

–Daje ra omoi faifia, iena jenodomo. Raise jenoia, iena baitomo. Damiena omoi jenoia, naimie illanomo jaidomo. Nainomo naimiema baillamona, omoína feiñoite. Ie isoide. Buena omoi jitaia, Jusiñamuimo jica. Iena omoi jicaja jira, iena naimie cacajamona, omoimo iite.

<sup>9</sup> Ero, omoimona naimiemo llomenicono ie moomo ie jito jicaia, noficina fecañede.

<sup>10</sup> Lliciaina jicaia, jaiena fecañede.

<sup>11</sup> Jeacinona finocabidomo; iadedi mare ra omoi uruiaimo fecacabillana uiñotomo. Cai Moo Jusiñamuidi jaca mareuidimie. Cai baifemo naimie faite. Ie muidona naimiemo jicanotinomo mare rana fecate.

<sup>12</sup> Jusiñamui jitaillacinona omoi finuamona, jiaie cominina marena fino. Jiaie comini omoína finuana omoi jitailla isoi, naimacina fino. Naimaci omoína marena finuana omoi jitaia, naimacina marena fino. Naimaci omoína maraiñeno finuana omoi jitaia, naimacina ie isoi maraiñeno fino. Moisés micori ie isoidicinona jaie llofuede. Jusiñamui facaina lloraini micoriai ie isoidicinona jaie jiai llofuetimaci.

*Jesúdi Jusiñamui dine rille llua rafue*  
(Lc 13.24)

<sup>13-14</sup> Jesús llote:

–Jusiñamui dine omoi rillena, janorede naisodo omoi jailla isoi isoilla. Naisomo ite nasedi janorede isoide. Naimie dine naie rilla jira, naiedo omoi jai. Nainomo jaidino jaca iitimaci. Naimie dine rillena eo sefuiarena jira, janore comini naiedo jaidimaci. Jiaie naiso ite. Naie naisodi aillue. Naie naisomo ite nasedi jiai aillue. Naiedo jaidino faifitimaci. Jusiñamui dine riñeitimaci. Sefuinina jira, ailluena comini naiedo jai jaidimaci.

*Jesúdi abi caitadinomona abi rairuillana llua rafue*  
(Lc 6.43-44)

<sup>15</sup> Jesús llote:

–Jusiñamui facaina llorainina abi caitadinomona abina rairui. Mare lloraini isoi bitimaci; iadedi Jusiñamui rafuedo omoi raise jaiñellena, omoína jifueiacadimaci. Naimaci llofuacinodo omoi jaia, Jusiñamui rafuedo raise jaiñeitomo.

<sup>16</sup> Naimaci lloga rafuemona naimaci Jusiñamui llorainiñenana uiñotomo. Ero, eecuaimona uvas railla riaro oñega. Eecuaimona higos railla riaro jiai oñega.

<sup>17</sup> Mare riaromona mare llisilla comuide. Maraiñede riaromona maraiñede llisilla comuide.

<sup>18</sup> Mare riaromona maraiñede llisilla comuiñede. Maraiñede riaromona mare llisilla comuiñede.

<sup>19</sup> Mare llisilla comuitañena jira, naga maraiñede riaro jaitaca, iena jobaillena.

<sup>20</sup> Ie isoide. Naimaci finoca rafuemona nie isoide lloraini naimacina uiñotomo. Jusiñamui llorainidena uiñotomo. Jusiñamui lloraiñedinodena uiñotomo. Naimaci maraiñena jira, Jusinamui naimacina duere finoite.

*Jesúdi ie Moo ie comini sedajanomo ille llua rafue  
(Lc 13.25-27)*

<sup>21</sup> Jesús llote:

—Naga cuemo: “Odi cue Namadio” raitimiedi Jusiñamui ie cominina sedajanomo iñeite; iadedi dama cue Moo jitaille rafue finodimiedi nainomo iite.

<sup>22</sup> Cominimo juez isoi Jusiñamui ico llua facaiseconi, diga cominidi cuemo lloitimaci: “Nama, caina o oretatio cai raillamona, o rafuena llocabiticai. O uaido jananiaina oni oredicai. O uai diga siño rafuena finodicai” lloitimaci.

<sup>23</sup> Uai oiticue: “Omoína uifnoñedicue. Cue cominiñedomoi. Jeacino omoi comecimo nia illa jira, cuemona oni omoi jai. Cue Moo ie comini sedajanomo jaca iñeitomoi”.

*Jesúdi naimiëna inuana ñaia rafue  
(Lc 6.47-49; Mr 1.22)*

<sup>24</sup> Jesús llote:

—Cue lluaana cacadomoi; iadedi omoimona nana inoñedomoi. Cue lluaana inotimiedi abi uifnotimie. Jofona raise finodimie isoide. Jofona raise finodimiedi ie jofona finodemo, jofona goifnellena, nofici illa dinori eo ana raite.

<sup>25</sup> Noci deidemo, eo jinuidemo, jofomo ille toia, aifi bitemo, jofo raise finua jira, jofo goifede. Iena faifñede. Ie isoide. Cue lluaana inotimie faifñeite.

<sup>26</sup> Cue lluaana inoñedimiedi abi uifnoñedimie. Jofona raise finoñedimie isoide. Jofona raise finoñedimiedi ie jofona finodemo, conillie emodomo iena finode. Ana raifede.

<sup>27</sup> Noci deidemo, eo jinuidemo, jofomo ille toia, aifi bitemo, jofo goillamona, jai eo judaisite. Iena faifide. Ie isoide. Cue lluaana inoñedimie faifite —llote.

<sup>28-29</sup> Moisés micori rafue uifnoraini isoi naimie llofueña jira, illaimamo ite uai itimie isoi naimie llofuia jira, nainomo ite cominidi naimie lluari rajicaidimaci.

## 8

*Jesúdi efonaitimiena jillotaja rafue  
(Mr 1.40-45; Lc 5.12-16)*

<sup>1</sup> Naimie llofuia mei, anedumona Jesús ie llofueoicaigano diga ana bite. Ailluena comini naimiëna racadimaci.

<sup>2</sup> Efonaitimie naimie ñine billanona, naimiëna raise uaiduamona, caifñici ifodo ana rainadate. Raite:

—Maestro, o jitaia dedi, cuena jillotaredio.

<sup>3</sup> Jesús ie onolli naimiemo oni ñuitajanona, naimiëna jetade. Raite:

—Ona jillotaiacaducue. Mai o jillo. —Iecon naimie jillode.

<sup>4</sup> Jesús naimiemo llote:

—O jilluana bumo lloñoeno; iadedi Jerusalémo, Jusiñamui jofomo, Jusiñamui diga ñairaima ñine mai jai. O jilluana comini raise uifollena, naimiemo o abina acatajai. Moisés micori jaie lloga rana Jusiñamuimo fecu. —Iemei Jesús oni jaide.

*Jesúdi capitán mullaimana jillotaja rafue  
(Lc 7.1-10)*

<sup>5</sup> Capernaum railla nairaimo Jesús ria, capitán raillamie naimie ñine bite. Naie capitán Roma railla nairai imie. Judifnoñedimie. Billanona, duere llote:

<sup>6</sup> —Maestro, cuena cano. Cue jofomo cue mullaima ite. Ie abina niraidanide. Naimie abi eo isirede. Naimiëna jillota.

<sup>7</sup> Jesús uai ote:

—Naimie ñine jaiticue, naimiëna cue jilloitallena.

<sup>8</sup> Naie capitán dane llote:

—Jaiñoeno. Jamai bue isoidicue. Iemo, ¿ñiese cue jofomo biitio? O uaido bene lluanona cue mullaima jilloite.

<sup>9</sup> Jiaie illaicomini anamo iticue. Naimaci lloga uaina inotivicue. Cue anamo jiaie soldaduai illanona, cue uaina inotimaci. Cue anamo cue mullaima illa jira, naimiedi cue uaina inote. O anamo naie duico illa jira, o uaina o lloia, cue mullaima jilloite.

<sup>10</sup> Tena cacajanona, Jesús rajicaide. Naimie diga jaidinomo llote:

—Bie isoi cue uaina inotimienä jaca baiñedicue. Cai judíuai cominimona biesedimienä jaca iñede.

<sup>11</sup> Ero, Jusiñamui ie cominina sedajanomo naimaci illena, diga judíuaiñedino cue llua uaina inoitimaci. Naga nairaiaimona inoitimaci. Jusiñamui cominina Abraham micori, Isaac micori, Jacob micori illamona, naimaci diga Jusiñamui ie cominina sedajanomo bie judíuaiñedino iitimaci. Nainomo caimare nabaitimaci.

<sup>12</sup> Ailluena judíuainfedino inoitimaci. Jusiñamui ie cominina sedajanomo duillanodi omoi judíuiai. Naimiena omoi inoñena jira, omoína oni dotaite. Dotaja mei, eo duere sefuillamona eitomoi.

<sup>13</sup> Capitámo Jesús llote:

—Mai jai. Cue uai siñonana o inua jira, o jitailla rafue omo jai suide. —Ieconí naimie mullaima jillode.

*Jesús Pedro jifaiñoña jillotaja rafue*

(Mr 1.29-31; Lc 4.38-39)

<sup>14</sup> Oni jaillanona, Pedro jofomo Jesús ridemo, Pedro jifaiño duillana ciode. Naiñaiño abi cuaride.

<sup>15</sup> Naiñaiño dine jaillanona, naiñaiñoña jetade. Jetajamona ieconí naiñaiño jillode. Abi cuariñede. Naiñaiño naidacaillanona, guille finuanona, ie jofomo itinona ecade.

*Jesúdi ailluena duidinona jillotaja rafue*

(Mr 1.32-34; Lc 4.40-41)

<sup>16</sup> Naie naiona naimie dine comini ailluena jananiai anamo itinona atidimaci. Ie uaido naimiedi jananiaina oni oretate. Nana atica duidinona jiai jillotate.

<sup>17</sup> Naimacina Jesús jillotajamona, Isaias micorí jaiie cuegafuiái íese jai suide. Naimie micorí jaiie cuega: “Caina jilloitajanona, cai duiconá oni oretáite”.

*Jesús ie llofuegamiena damie jaillana ie rafue*

(Lc 9.57-62)

<sup>18</sup> Ailluena comini naimie ecimo illana Jesús ciuanona, ie llofueoicaiganomo ruica dine jaillena llote.

<sup>19</sup> Ieconí Moisés micorí rafue llofueraíma naimie dine billanona, llote:

—Maestro, o jaillinomo o diga jaiacadícue. O llofuegamiena jaiacadícue.

<sup>20</sup> Jesús uai ote:

—Janorede ocainaíaidi joforedimaci. Silliñaii jillainiáiredimaci; iadedi jofonidícue. Monamona billanona, imana jaidícue; iadedi buenidícue. Jofonidícue. Cue diga o jaiacania, bue isoidena cuemona oñeítio. Iemo o comecina raise faca.

<sup>21</sup> Ie facaise jiaie llofuegamie Jesúmo llote:

—O diga jaitícue; ia cue moo nia fiodiañena jira, o diga nia jaiñeíticue.

<sup>22</sup> Jesús naimie uai ote:

—Cue diga idai mai bí. Cuena inoñedinodi o moona canoredimaci. Naimie fiodiaia, naimiena naimaci raille. Cue rafue jiaie rafue baifemo faite. Cue diga mai bí.

*Jesúdi joraina llicaitaja rafue*

(Mr 4.35-41; Lc 8.22-25)

<sup>23</sup> Naie llofuegamie diga Jesús ñaia mei, ruica dine jaillena, botemo jaide. Ie llofueoicaigano jiai jaidimaci.

<sup>24</sup> Botemo jailla mei, Jesús inide. Bai jorai motomo jaidimacimo, eo riire aifi billamona, joraidi eo bagode. Baguamona botemo jinui a uaide. Bote oruiacana jira,

<sup>25</sup> jaciruillamona, Jesúna casitatimaci. Raitimaci:

—Maestro, caina cano. Jai buisaidícai. Jai corobaisaidícai.

<sup>26</sup> Jesús uai ote:

—¿Bue ñellena jacinaitomoi? Cuena raise inoñedomoi. Jacinaíñeno.

Iemei Jesús naidacaillano, aifna lletade. Joraina jiai llicaitade. Ieconí llicaide. Bagoñede.

<sup>27</sup> Naimie llofueoicaigano iemona rajicaidimaci. Iemona raitimaci:

—Bimiedi, ¿nie isoidimie? Aifi naimie uaina inote. Jorai naimie uaina jiai inote.

Bai jaillanona, ruica dine ridimaci.

*Jesúdi Gadara railla eniruemo illa rafue*

(Mr 5.1-20; Lc 8.26-39)

<sup>28</sup> Ruica dine naimaci ridemo, Gadara railla eniruemo sijidimaci. Ieconí menamie Jesús dne bitiaímaiaí. Jananiaí anamo ite iaímaiaí. Comini raioillanomo nofie moto ifuaímona bitiaímaiaí. Nai iaímaiaí eo riirena jira, jaca bu nainomo jainide.

<sup>29</sup> Jesúna iaímaiaí ciua facaise jananiaí iaímaiaína cuiroitate:

—Jusiñamui Jitodio. ¿Níese cocona níbaíacadio? Coco duere sefuille facaise nia íñede; iadedi birui cocona duere finuaíbidio —cuiroidiaímaiaí.

<sup>30</sup> Naie bai iaíre ailluena chanchuai guillano itimaci.

<sup>31</sup> Jananiaí Jesúmo duere llotimaci:

—Oni caina o oretajanona, chanchuai abímo caina oreta.

<sup>32</sup> Jesús uai ote:

—Mai jai.

Ieconí nai iaimaiaimona jananiai oni jaillanona, chanchuai abímo jaide. Iemona iconiaido chanchuai joraimo aisicana jaillanona, corobaiside.

<sup>33</sup> Iena ciuanona, chanchuai sedaraini imaci nairai dine aisicana jaidimaci. Nana naie rafuena llotimaci. Jaive jananiai anamo illa iaimaiaia rafuena llotimaci.

<sup>34</sup> Te jira ailluena comini Jesús dine bitimaci. Naimiena ciuano, naimiemo duere llotimaci, naimaci illanomona naimie jaillena. Naimaci jitailla jira, Jesús oni jaide.

## 9

*Jesús tisitaitimiena jillotaja rafue*

(Mr 2.1-12; Lc 5.17-26)

<sup>1</sup> Botemo ie llofueoicaigano diga Jesús jaillano, ruica dine abido jaide. Capernaumo ie illanomo ride.

<sup>2</sup> Nainomo rilla mei, naimie dine comini ie bíramo bíde tisitaitimiena atide. Naimiena atidinodi Jesús naimiena jillotajana inote. Iena Jesús uíñuanona, tisitaitimie mo lloite:

—Moo, o comecina ocuño. O jeacino cue feitaja jira, iena jai oni dotadicue. Ie facai ibana jai oñeiticue.

<sup>3</sup> Jesús dine ofidinomona dajerie Moisés micori llogacinona llofueraíni itimaci. Jesús lluana naimaci cacajano, Moisés micori llogacinona llofueraíni comecina facadimaci: “Dama Jusiñamui jeacinaona dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”.

<sup>4</sup> Naimaci comeciaina facajacinona Jesús uíñuamona, Jesús dinena jicanote:

—¿Bue ñellena omoi comecina jeare facadomoi?

<sup>5</sup> Bimiemo: “O jeacinaona jai oni dotadicue” cue lloia, cue uai siñonana uíñoñeitomoi; ia bimiemo: “Mai naidacaillanona macari” cue lloia, cue uai siñonana uíñoitomoi.

<sup>6</sup> Monamona jaie cue billanona, imana jaidicue. Ie jira jeacino oni dotaja uai cuemo ite. Iena omoi uíñoñellena, tisitaitimie mo lloite: “Mai naidacaí. O bíra ferianona, o jofomo mai jai”.

<sup>7</sup> Iese naimie raillamona, tisitaitimie jillode. Naidacaida, ie jofomo jaide.

<sup>8</sup> Comini iena ciuanona, jacinaitimaci. Bimiemo ie uaina Jusiñamui fecajana naimaci uíñuamona, Jusiñamuimo iobillacinona fecadimaci.

*Jesúdi Mateona fetua rafue*

(Mr 2.13-17; Lc 5.27-32)

<sup>9</sup> Jesús bai macaritemo, cuena ucubena oranomo cue raillana ciode. Mateodicue. Gobierno ucube oraimadicue. Jesús cuemo lloite:

—Cue llofuegamiena o jaillena, cue diga bi.

Naidacaida, naimie diga jaidicue.

<sup>10</sup> Nailli cue jofomo Jesús ie llofueoicaigano diga guite. Diga gobierno ucube oraini jiai guisaibitimaci. Diga Moisés micori llogacinodo jaiñedino jiai guisaibitimaci.

<sup>11</sup> Nainomo fariseuai comini jamai bitimaci. Moisés micori llogacinodo eo jaidimaci. Jesúsna ciuanona, naimie llofueoicaigano jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Moisés micori llogacinodo ucube oraini raise jaiñenamona, naie isoidino diga, fariseuai comini nabairiñena jira, iese jicanotimaci.

<sup>12</sup> Iena cacajano, Jesús lloite:

—Ecairedinodi médicono jitañedimaci; ia duidinodi médicono jitañedimaci. Ie isoide. Mareuidino cuena jitañedimaci; ia maraiñedino cuena jitañedimaci.

<sup>13</sup> Jusiñamui facaina lloraima micori jaie cuega rafuemo omoi comeciaina faca: “Jusiñamui lloite: ‘Rana cuemo omoi fecajana jitañedimaci; ia cominina omoi dueruillana jiai jitañedimaci’ lloite”. Cominina cue dueruilla jira, Jusiñamui dibeimo naimaci illena, maraiñedinona itatajaibititue; iadedi Jusiñamui dibeimo naimaci illena, maraiñedinona itatajaibititue. Omoimona maraiñedino diga nabairititue; ia naimacina uaibititue.

*Jesús dine Juan Bautista llofueoicaigano billa rafue*

(Mr 2.18-22; Lc 5.33-39)

<sup>14</sup> Naie facaise Juan Bautista llofueoicaiganodi Jesús dine bite. Naimiemo lloite:

—Cai einamaci llua isoi, Jusiñamuina cai raise iobitallena, guiñenaruillai illa facaiseconi guiñedicaí. Cai jeacino facaina sunaicabiticaí. Fariseuai comini jiai guiñedimaci; iadedi o llofueoicaigano guítimaci. Cai einamaci llogacinodo jaidicaí. ¿Bue ñellena o llofueoicaigano iedo jaiñedimaci?

<sup>15</sup> Jesús uai ote:



—Jiaie rafuedo iena lloiticue. Coniruedi ie aina uarui ia, iobilla jira, ie nabaiñia sunañedimaci. Iobillamona guitimaci. Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

<sup>16</sup> Jiaie rafuedo iena lloiticue. Nia jocoñega comue iniroidi jacaie iniroimo jillifnega. Jilliadi, joca mei, comue iniroi jacaie iniroimona fo llirite. Eo fodo cuararite. Jai marañeno cioite.

<sup>17</sup> Jacagomona finoca bolsa como finoca vino joneñega. Jonegadena, mairiñena jira, sirillamona, igoi raire cuararite. Vino faifite. Igoi jiaí faifite. Como finoca vino comogomo jonelle. Iemei iena faifiñeite. Ie isoide. Omoi einamací rafue ifomo jiaie rafue birui ite. Iena omoimo llocabiticue. Iedo jaidicai —llote.

*Jesúdi mena duide riñona jillotaja rafue*  
(Mr 5.21-43; Lc 8.40-56)

<sup>18</sup> Juan Bautista llofueoicaigano diga Jesús llotemo, jiaimie naimie dine bite. Naimiedi judíuai ofiraco sedaraima. Jesúsna duere jicanollena, cañnici ifodo rainadacaida llote:

—Cue jisa como fiodaite. O onolli naiñaiñomo o jonellesa, naiñaiño jilloillea, cue jofomo cue diga mai bi.

<sup>19</sup> Iena cacajano, Jesús naimie diga jaide. Ie llofueoicaigano jiaí jaidimaci.

<sup>20</sup> Bai jaillanona, duidiñaiño jinafona jaide. Naimie iniroina jetallena, naimie dine bite. Ie jeraimona doce años jaca diaide. Billanona naimie iniroina jetade.

<sup>21</sup> “Naimie iniroi cue jetajamona jilloiticue” comecina facajamona, naiñaiño naimie iniroina jetade.

<sup>22</sup> Ieconí Jesús dobaidacaida, abido erodatemo, naiñaiñoña ciode. Raite:

—Ñoo, o comecina ocuñño. Cuená o ñnua jira, jai jillodio.

Ieconí naiñaiño jillode.

<sup>23</sup> Ofiraco sedaraima jofomo Jesús rillano, naie jofó nama jisa jai fiodailla jira, comini merire fillana cacade. Ailluena failliñailana cacade.

<sup>24</sup> Jesús dinena raite:

—Jofomona nana omoi jino jaillana jitaidicue. Cuemona biñaiño fiodañedesa. Jamai inide.

Iena cacajano, naiñaiño jai fiodaite uññuamona, Jesúsni jaisitimaci.

<sup>25</sup> Comini jino oretaja mei, naiñaiño onollina naimie llinuano, fiodaillamona naiñaiño jillode. Jillua mei, naiñaiñodi naidacaide.

<sup>26</sup> Naie rafue nana naie enirue itinomo llocana jaide.

*Jesúdi uisínide iaímaiaína jillotaja rafue*

<sup>27</sup> Ofiraco sedaraima jofomona Jesús bai jaidemo, uisínide iaímaiaí naimie jinafona jaidiaímaiaí. Jesúsna ado uaidotiaímaiaí:

—Cai illaíma David micorí jítodio. Jusiñamuiomona o billa jira, cocona duenai.

<sup>28</sup> Uai oñeno Jesús Capernaumo jaide. Naimie fo jailla mei, naimie dine bitiaímaiaí. Iaímaiaímo Jesús jicanote:

—¿Omicóna cue jillotajana ñnotomíco?

Fairiotiaímaiaí:

—Jii.

<sup>29</sup> Iaímaiaí uisína Jesús jetajano raite:

—Cuená omíco ñnua diese jilloitomíco.

<sup>30</sup> Ieconí iaímaiaí uisídi ciode. Jesúsna naie rafuena lluaña eo janotade.

—Bumo lloñeno —llote;

<sup>31</sup> Iadedi iena llocana jaidiaímaiaí. Iemona Jesús mameci nana naie eniruemo itinomo soride.

*Jesús ñañedimiená jillotaja rafue*

<sup>32</sup> Capernaumona Jesús bai jaidemo, naimie dine Janaba anamo illamiená jiaie comini atidimaci. Janaba anamo naimie illa jira, naimie ñañide.

<sup>33</sup> Jesús Janabana oni orede. Oretaja mei, naie iima ñañite. Nainomo ite comini raijicaillanona raitimaci:

—Cai comini dine bie isoide iima jilluana jaca cioñedicaí.

<sup>34</sup> Ie jira fariseuai comini dinena raitimaci:

—Taife dibeimo Janaba illamona, Jesúsdi Taife uaido Janabana oni orede —raitimaci.

*Jesúdi cominina duenaila rafue*

<sup>35</sup> Diga nairaiáimo ie llofueoicaigano diga Jesús llocana jaide. Nainomo judíuai ofiracuaímo llofueuide. Naimie anamo comini illana jusiñamui jitailla jira, Jesúsdi jusiñamui

dibeimo naimaci comeciaí uaina meiduana llofuete. Ailluena duidinona jillotate. Naga isoide duicomona jillotate.

<sup>36</sup> Naimacina duenaite. Naimaci comeciaí iticino oni duíñoitímie ifēna jira, naimacina duenaite. Ailluena cominina ciode. Toica llaudaiaí isoi ebe isoi jaidimaci. Naimaci comeciaí ocuifñonidimaci. Jusiñamui naimacina sedaacana uifñofedimaci.

<sup>37</sup> Naimacina duenaillamona, ie llofueoicaiganomo llotē:

—Ilimo ailluena trigo ia, iena ollena, ailluena maijirainina jitailla. Ie isoide. Ailluena comini ite naimacimo Jusiñamui rafuena cai llollena; iadedi naie rafuena lloraini eo ifñedimaci.

<sup>38</sup> Ie rafue naimaci llollena, ailluena cominina raire naimie oretallena Jusiñamuimo jicano.

## 10

*Jesúdi ie doce llofueoicaiganona fetua rafue*

(Mr 3.13-19; Lc 6.12-16)

<sup>1</sup> Ie doce llofueoicaiganona Jesús uaiduanona, naimacimo ie uai ifñonocaide, jananiaí anamona cominina jilloitallena. Duicono oni oretallena, iena jiai ifñonocaide.

<sup>2</sup> Ie llofueoicaiganodi iese mameciredimaci: Simón. Naimie mameci jiaicidi Pedro. Andrés. Naimiedi Simón ama. Jacobo. Juan. Iaimaiaí Zebedeo jito iaimaiaí.

<sup>3</sup> Felipe. Bartolomé. Tomás. Cueno jiai uaidote. Mateodicue. Gobierno ucubena oraimadicue. Jiaie Jacobo. Naimiedi Alfeo jito. Tadeo.

<sup>4</sup> Jiaie Simón. Naimiedi cananista comini facaisemo duide. Judas Iscariote micori. Naimiedi Jesúsna gaitatate.

*Jesúdi ie llofueoicaiganona oretaja rafue*

(Mr 6.7-13; Lc 9.1-6)

<sup>5</sup> Jesús ie llofueoicaiganona oni oretajanona, raite:

—Judíuifñedino dine jaiñeno. Samaritano railla comini dine jaiñeno;

<sup>6</sup> ia cai judíuái comini dine jai. Naimacimona ailluena comini Jusiñamui rafuena nia ifñofedimaci. Faifcana nia jaidimaci.

<sup>7</sup> Omoi jaillanona, cominimo llono: “Jusiñamui facaina jaiē lloraini micoriaí llogamie jai bene ite. Naimie anamo omoi illana Jusiñamui jitailla jira, naimie dibeimo omoi comeciaí uaina meido”.

<sup>8</sup> Duidinona jillota. Fiodaitinona jillota. Efonaitinona jillota. Jananiaina oni oreta. Cue uaina jamaí omoi feiñua jira, cominina jilloitajana ibatañeno.

<sup>9</sup> Ucubena uifñeno. Guille ifo meidollena, rana uifñeno.

<sup>10</sup> Ailluena rana omoi uifñellena, bolsana uifñeno. Abi meidolle iniroina uifñeno. Meidolle zapatona uifñeno. Omoi abi riidollena, jiguidana uifñeno. Jiaie cominina omoi canua isoi, omoína naimaci canua. Naimacimona omoi jitailla rana omoi ono. Ie jira ailluena rana uifñeno.

<sup>11</sup> Nie nairaimo omoi ria, omoi rafuena jitaídimeña jeno, naimie jofomo omoi illena. Naie jofomo omoi i, naie nairaimo omoi ille dinori.

<sup>12</sup> Naie jofomo omoi rillanona, naie cominina marena uaido.

<sup>13</sup> Omoína naimaci raise feiñoía, naimaci uri illena, naimacimo marecinona llono; iadedi omoi rafuena naimaci jitaíñenia: “Jusiñamui omoína canoite” naimacimo lloñeno.

<sup>14</sup> Omoína bu feiñoiacaiñenia, omoi uaina bu cacarefiacaiñenia, naie nairaimona omoi jaillanona, omoi eilliaimo ite jearacuaina jaidino. Maraiñede rafuena naimaci finuana naimaci uifñollena, omoi eilliaina jaidino.

<sup>15</sup> Omoimo uanaicinona lloticue. Omoína naimaci feiñoñenia, Jusiñamuidi naimacina duere finoite. Sodoma railla nairai jaiē jeacinona eo finodimaci. Gomorra railla nairai jaiē jeacinona eo finodimaci. Ie jira Jusiñamui naimacina jaiē duere finode. Omoína comini birui feiñoñenia, Jusiñamuidi naimacina Sodoma nairai baifemo duere finoite. Gomorra nairai baifemo duere finoite.

*Jesús duere sefuillifuena llua rafue*

<sup>16</sup> Jesús ie llofueoicaiganomo nia llote:

—Naimacina janallari fañellena, naimaci duere sefuifñellena, toica llaudaiaí raise sedajana jitaídimaci. Ie isoide. Eo maraiñede comini motomo omoína oretaiticue. Omoína duere finoacantimaci. Raise sedajana jitaídomoi. Jaiō fiodaiñellena, aiside. Naimiēna bu meineñellena, ie abina eenollena, jaiō aiside. Ie isoi omoi abi uifñocana omoi jai. Ucugidi buena jeare finoñede. Ie isoi omoi illa. Jeacino finuamona eneno omoi i.

<sup>17</sup> Abina rairui. Dajerie omoína llogidoitimaci. Omoína gaitaja mei, naimaci ofracomo omoína faitimaci.

<sup>18</sup> Cue rafue omoi llua muidona, omoína gaitajanona, illaicomini dine omoína uitimaci. Omoína llogidoitonomo cue rafuena lloitomoi. Naie illaicominimo iena jiai lloitomoi.

<sup>19</sup> Naie illaicomini dine omoi ia, omoi riidollicinomo omoi comeciaina jarire facañeno. Naie facaise omoi ñaillicinona uifñoitomoi.

<sup>20</sup> Dani omoi comeciái icinodo ñañaitomoi; ia Jusiñamui Joreño uaido ñaitomoi.

<sup>21</sup> Cuen a ñnotomoi; ia ailluena cuena ñnoñeitimaci. Cuen a omoi ñnua jira, omoína enoitimaci. Iemona dajerie ie amana meinetalena, naimiena llogidoite. Dajerie moodi ie uruena meinetalena, naimiena llogidoite. Dajerie uruiaidi naimaci moona, naimaci eina meinetalena, naimacina llogidoitimaci.

<sup>22</sup> Cue muidona ailluena comini omoína enoitimaci; iadedi cue uaina fainonocañedimie cue Moo diga monamo ja muidomo jaca iite. Naimiena jillotaiticue.

<sup>23</sup> Cue rafue naimaci jitaiñenamona, omoína nie nairai duere finoia, dinomona cue rafuena lllollena, jiaie nairaimo raire jai. Cue rafuena omoi lllollena, diga juduái illanuaímoma nia jaitomoi. Nana naie comini nia ñnoñenia, Jusiñamui dinena dane abido biiticue.

<sup>24</sup> Ero, ie llofueraima duere sefua, ie llofuegamie daje isoi duere sefuite. Ie eci illamie duere sefua, ie mullaíma daje isoi duere sefuite.

<sup>25</sup> Ie isoide. Cue cominina omoi jaillamona, cue duere sefua, jiai duere sefuitomoi. Taife mameci jiaici llinuanona, “Beelzebúdi” jiaíno cuena raitimaci. Iese cuena naimaci jeare ñaia jira, cue cominina omoi illa jira, omoína jiai jeare ñaitimaci.

*Jesúdi jaciruiñeno llofua rafue*

*(Lc 12.2-9)*

<sup>26</sup> Jesús nia llote:

–Cuen a ñnoñedino omoína jeare ñaitimaci; ia nana cue rafuena llocana omoi jailla jira, naimacina jaciruiñeno.

<sup>27</sup> Omoímoma rafuena anado jai lloticue. Iena nana cominimo marefodo llono. Ado llono.

<sup>28</sup> Omoi abina meineredimaci; ia omoi joreñona meinenidimaci. Omoína naimaci meinea, omoi joreño Jusiñamui dine jaite. Iena uifñuamona, omoi meineiacadinona jaciruiñeno. Cue rafuedo omoi raise jaíñenia, Jusiñamuina jacirui. Naimiedi omoi abina, omoi joreño diga, iraimo dotarede.

<sup>29</sup> Omoína duere finoacadinona jaciruiñeno. Ero mena janorede sillina fecadomoina, eo janore ibaca; iadedi cai Moo Jusiñamui jitaiñenia, naimacimona daje fiodaiñede.

<sup>30</sup> Ero, niga ifotirai omoímoma illana Jusiñamui uifñote.

<sup>31</sup> Naimiedi omoína sedajana jiai uifñote. Silliñiaí baífemo Jusiñamui isiruigaomoi. Omoi duere finoacadinona jaciruiñeno. Jusiñamui jitaiñenia, omoímoma jaca buena suifñote.

*Jesús naimiena janoñenana llofua rafue*

*(Lc 12.8-9)*

<sup>32</sup> Ie llofueoicaiganomo Jesús nia llote:

–Cue rafuena omoi lluamona, jiaíno omoína duere finoitimaci. Cuen a birui omoi janoñenia, nana comini Jusiñamui uicomoma íco ia, nainomoma omoína janoñeiticue. “Cue cominidomoi” omoína raiticue.

<sup>33</sup> Cuen a birui omoi janoia, nana comini Jusiñamui uicomoma íco ia, nainomoma omoína janoiticue. “Cue cominiñedomoi” omoína raiticue.

*Jesús muidona nana comini uri iñena rafue*

*(Lc 12.51-53; 14.26-27)*

<sup>34</sup> Ie llofueoicaiganomo Jesús nia llote:

–Nana cominina uri itatallena eniruemo biñedicue. Cuen a ñnoñedinodi cuena ñnotinona enoitimaci. Enollamona cuena ñnotinona duere finoitimaci.

<sup>35</sup> Cue lloga rafuena damierie ñnua muidona, ie moo illa díbeimo ie jito iñeite. Ie ei illa díbeimo naiñaiño jisa iñeite. Ie jifaiño illa díbeimo naiñaiño mio iñeite. Iese cominina uri itatañedicue.

<sup>36</sup> Omoi comini coninina enoitomoi. Iemona duere sefuitomoi.

<sup>37</sup> Ero, ie moona cue baífemo bu isiruia, ie eina cue baífemo bu isiruia, cue jitaila ra naimie finoacañena jira, cuemo raise duiñede. Ie uruiaí cue baífemo bu isiruia, cuemo raise duiñede.

<sup>38</sup> Cue facaina bu fiodaiacañenia, cuemo raise duiñede. Naimiedi cue comini naimiena lloiacañedicue.

<sup>39</sup> Cue facaina fiodaiacañedimie ja muidomoma faífite. Cue diga jaca iñeite; iadedi cue facaina fiodaitimie monamo cue diga jaca iite.

*Jesús Jusiñamuimona ibana feiñua llua rafue*

*(Mr 9.41)*

<sup>40</sup> Jesús llote:

—Cue rafuena omoi llocana jaia, diga jofuemo riitomoí. Cue comínina omoi illamona, omoina feiñotino cuena jiai feiñotimaci. Omoina bu feiñoia, cuane jiai feiñote. Cuena feiñotimiedi cuena oretatimiena jiai feiñote.

<sup>41</sup> Naimie cue comini illamona, damierie Jusiñamui facaina lloraimana feiñotimaci. Jusiñamui facaina lloraimana bu feiñoia, Jusiñamuimona ibana feiñoite, naie lloraima Jusiñamuimona feiñua isoi. Cue jitaillacinona finodinona bu feiñoia, naimaci Jusiñamuimona feiñua isoi, Jusiñamuimona ibana feiñoite.

<sup>42</sup> Cue dibeimo itinona bu janore canoia, Jusiñamuimona ibana feiñoite. Naimacimo nibai jamai jinuina fecade; iadedi naimacina canuamona, Jusiñamuimona ibana feiñoite —llote. Iemei Jesús ie llofueoicaiganona, ie rafuena lollena, orede.

## 11

*Jesús dine Juan Bautista micori ie llofueoicaiganona oretaja rafue  
(Lc 7.18-35)*

<sup>1</sup> Ie doce llofueoicaiganona Jesús oretaja mei, iaírei ite comini illanuaimo naimiedi ie rafuena llocana jaide.

<sup>2</sup> Ie facaiseconi cárcelmo Juan Bautista micori Jesús finoca rafuena fidiano, iena raise uñollena, Jesús dine ie llofueoicaiganona orede.

<sup>3</sup> Jesúsúmo llotimaci:

—Juan Bautistamona biticai. Jofue iñenanomo navui naimie ia, “Jusiñamuimona damie biite” naimie llofuecabite. Juan llofuegamiena o illana uñoiacadicai. Imieñediadena, jiaimie billemo nia ocuriridicai.

<sup>4</sup> Jesús uai ote:

—Cue lluaa cacadomoi. Cue finoca rafuena ciodomoi. Juan dine abido omoi jaillanona, iena naimiemo llono.

<sup>5</sup> “Uisindino jai ciodimaci. Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fiodaillamona damierie jai jillodimaci. Dueredino mare rafuena jai cacadimaci” naimiemo llono.

<sup>6</sup> Jiai llono: “Nibai nana cue rafuena raise cacaiñedio; ia cuena jaca nia ñnocana o jaia, caimare iitio”.

<sup>7</sup> Juan llofueoicaigano abido jailla mei, naimie ecimo ailluena ite cominimo Jesúsú Juan rafuena llote:

—Jofue iñenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena comecina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoñede. Nie isoide rafue naimiemo ia, cue rafuena llocana jaide.

<sup>8</sup> ¿Bue ñellena naimie dine jaidomoi? Mare ñiroina jitañadinona cioñedomoi. Mare ñiroina jitañadinona omoi cioacaniadedi, illaicomini dine jaidomoi.

<sup>9</sup> Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie lua jira.

<sup>10</sup> Malaquías micori naimiema jaie cueba:

Jusiñamui raite: “Ero, o uicodo cue rafuena lollena, damiema oretaiticue, comini comeaina marecinona duñollena”  
cueba. Malaquías Juan Bautistana cuete.

<sup>11</sup> Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofueite; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioñede. Iemona naimie baifemo faitomoi.

<sup>12</sup> Juan llofua tainiamona ailluena comini cue rafuena ñnuamona, Jusiñamui dibeimo birui duere iacadimaci.

<sup>13</sup> Nana Jusiñamui facaina lloraini micoriaidi cue billena jaie llotimaci. Moisés micori iena jiai jaie llote. Juan facaise naie llogacino jai suide.

<sup>14</sup> Jusiñamui facaina lloraima jaie llote: “Bie rafue sulle facaise Elías isoidimie biite”. Naimie rafuena ñnotomoidena, Juandi naimiema uñotomoi.

<sup>15</sup> Omoi jeforena jira, raise fueollena, cue llamo cacarei.

<sup>16</sup> Jesús nia llofueite:

—Ero, omoina ñaiticue. Jifanote uruiaí isoidomoi. Uruiaí jifanoiacania, naimaci nabaiñiema uaiduanona, raitimaci:

<sup>17</sup> “Omoï diga jifanoiacadicaï; iadedi caï diga jifanoiacaifedomoï. Caimarede rafuena caï jifanoiacania, sunailla rafuena jifanoiacadomoï. Sunailla rafuena caï jifanoiacania, caimarede rafuena jifanoiacadomoï. Coninina nabairiñedicai” raitimaci.

<sup>18</sup> Te isoidomoï. Juan jirorainide. Caimare guifede; ia naimie diga nabairiñedomoï. Naimiena gaifedomoï. Te jira omoïmona dajerie naimiena raitimaci: “Janaba anamo naimie illanona, naimie uairico isoi ite” raitimaci.

<sup>19</sup> Monamona billanona, iimana jaidicue. Omoï isoi guiticue. Caimataidicue; ia cue diga nabairiñedomoï. Cuenajai gaifedomoï. Te jira cuena jeare ñaitomoï. Raitomoï: “Guillaredimie. Jiroruidimie. Jearede rafue finodino diga nabairitimiedio”. Iese raitomoï; iadedi Jusifñamuina ñnotinodi cue finoca rafuena marenana uifnotimaci.

*Dajerie nairai Jesúsna ñinoñena rafue  
(Lc 10.13-15)*

<sup>20</sup> Ailluena comini Jesús dina nia ia, naimacimo ie navui jailla nairaiaina ñaite. Naimie siño finoca rafuena uifnotimaci; iadedi naimaci comeciái uai meidoñedimaci. Te jira naimacina ñaite.

<sup>21</sup> Llote:

—Omoïmona damierie Corazín railla illanomona bitomoï. Omoïmona damierie Betsaida railla illanomona bitomoï. Cue rafuena omoï ñinoñena jira, duere sefuitomoï. Omoï dine cue navui siño finoca rafuena Tiro railla nairaimo jaie finodicuena, Sidón railla nairaimo jaie finodicuena, naimaci comeciái eo isinotaillamona, naimaci comeciái uai meidotimaci. Naimaci comeciái uaina meiduana uifnotallena, ebinide iniroina jítajanona, naimaci ifogiaimo jusefona jonetimaci.

<sup>22</sup> Jusifñamui uicomo nana comini ico ia, Tiro nairai baifemo duere sefuitomoï. Sidón nairai baifemo duere sefuitomoï.

<sup>23</sup> Omoïmona damierie Capernaum railla illanomona bitomoï. Birui abina iedoiacadomoï; iadedi jiairuido sunaitomoï. Omoï dine navui cue siño finoca rafuena Sodoma railla nairaimo jaie finodicuena, naie nairaidi birui niadedi nia ite. Omoï comeciái uai omoï meidoñena, monamo cue Moo diga jaca iñetomoï; iadedi naimie omoïna duere finollemona sunaitomoï.

<sup>24</sup> Jusifñamui uicomo nana comini ico ia, cue rafuena omoï ñinoñena jira, Sodoma railla nairai baifemo duere sefuitomoï —llote.

*Jesús ie Moo diga ñaia rafue  
(Lc 10.21-22)*

<sup>25-26</sup> Te facaiseconi Jesús ie Moo diga ñaianona raite:

—Ore Moo, oca mona Namadio. Oca enirue Namadio. Abina uifnotinona bie isoide rafuena uifnotañedio; iadedi jamai bue isoidinona iena uifnotadio. O jitailla jira, iese uifnotadio. Te jira iobillacinona omo fecaacadicue. Mai.

<sup>27</sup> Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uifnote. Dama cue Moona raise uifnoticue. Cue jitailla diese omoïna naimiena uifnotadicue. Te muidona naimiena uifnotomoï.

<sup>28</sup> Omoï jeacinomona omoï jillobillena, duere jaidomoï. Omoï comeciái marena uri illena, cue dibeimo mai omoï i.

<sup>29</sup> Cue llucacino anamo omoï i. Cue rinina jira, cuemona omoï fueo. Iemei omoï comeciái marena uri iite.

<sup>30</sup> Omoïna cue canua jira, cue llucacino anamo omoï iacanano ia, sefuinide. Omoïna cue canolle jira, cue llucacino finuana sefuinide.

## 12

*Sábadoruimo Jesús llofueoicaigano maijia rafue  
(Mr 2.23-28; Lc 6.1-5)*

<sup>1</sup> Te rafue llumona, ie llofueoicaigano jai abido bitimaci. Te facaiseconi sábadoruimo Jesús ie llofueoicaigano diga, trigo motodo joide naïdo jaide. Te llofueoicaigano aimetailla jira, trigona tijano, golluano, guicana jaidimaci.

<sup>2</sup> Dajerie fariseuai iena ciuano, llotimaci:

—Ero, o llofueoicaigano rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijiamona, caïmona jai maijidimaci. Iese caï abimo jeacinona jai finodimaci.

<sup>3</sup> Te llofueoicaiganona riiduanu, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille ifenia, naimie aimetaiia, ie nabaiñiai diga, Jusiñamui jofomo fo jaide.

<sup>4</sup> Jusiñamuimo fecaca llomeniconona uanona, guitimaci. Jamai bue isoidino naie llomeniconona guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga David micori iena guite; ia Jusiñamui naimacina duere finoñede.

<sup>5</sup> Moisés micori llogacino jai raise comeciaina facañedomoi. Moisés micori jaie llua isoi, sábadoruimo Jusiñamui jofomo Jusiñamui diga ñairaini maijuidimaci. Jusiñamuina naimaci sedallena, ocainana fatimaci. Iraina bonodimaci. Iese maijuidimaci; iadedi Jusiñamuimona jeacino finoñedimaci. Moisés micori jaie cuegafuiaina raise cacañedomoi. Iena raise facañedomoi.

<sup>6</sup> Omoimo nia lloiticue. Jusiñamui jofomo finoca rafue baifemo faiticue.

<sup>7</sup> Jusiñamui facaina lloraima iena jaie cuega: “Cuemo rana omoi fecajana jitaidicue; ia omoi jitaillamona, jaie cominina omoi duenaillacinodi rana cuemo fecajacino baifemo faite”. Iena omoi uiñotomoidena, cue llofueoicaiganomo: “Maraiñedicinona finodomoi” lloñedomoi. Cuemona cue llofueoicaigano jeacino finoñedimaci.

<sup>8</sup> Monamona billanona, imana jaidicue. Ie muidona sábadoruimo finolle rafuena rairuredicue. Nairuimo finoñelle rafuena jai rairuredicue.

*Jesúdi onollina idisarodimiena jillotaja rafue  
(Mr 3.1-6; Lc 6.6-11)*

<sup>9</sup> Bai jaillanona, nairai dine rillanona, naimaci ofiracomo Jesús fo jaide.

<sup>10</sup> Nainomo onollina idisarodimie illanona, fariseuai dinena Jesúmo jicanotimaci:  
—¿Sábadoruimo bimiena o jilloitajana mare? —jicanotimaci. Sábadoruimo duidimiena bu jillotaia, naimacimona naimie jai maijide. Uai uanona: “Mare” Jesús raiadedi, naimacimona naimie jai maijiacana jira, naimiena llogidoiacadimaci.

<sup>11</sup> Jesús uai ote:

—Sábadoruimo omoimona damie ie toica llaua ifomo uaidena, nairuido ari iena ote. Naimiemo buena lloñedomoi.

<sup>12</sup> Ero, cominidi llaua baifemo faite. Sábadoruimo mare rafuena finuadi mare. Bimiena cue jillotaia, mare rafuena finodicue.

<sup>13</sup> Onollina idisarodimie mo lloite:

—O onolli mai oni ñuita.

Iena ñuitajamona jillode.

<sup>14</sup> Iena ciuanona, fariseuai jino jaidimaci. Naimiena meinellena, coniniri siadotimaci.

*Isaias micori jaie Jesúna ñaia rafue*

<sup>15</sup> Naimiena naimaci meineiacanana Jesús uiñuamona, nainomona oni jaide. Diga comini naimie diga jaidimaci. Naimacimona nana duidinona jillotate.

<sup>16</sup> —Cuena llocana jaiñeno —naimacimo lloite. Naimie mameci are sorillana jitañede. Fariseuai diga ie uai uaitaiacañede.

<sup>17</sup> Iemona Isaias micori jaie cuegafuijai jai suide. Jusiñamui Isaias micorina jaie cuetataga: 18 Ero, cue fetoca mullaia ite.

Naimiedi cue isruigamie. Naimieri iobidicue.

Cue Joreño naimiemo cue fecajanona, judíuainedino naimacina cue jilloitaacanana lloite.

<sup>19</sup> Uai uaitañeite. Ie rafuena ado lloñeite.

Nairai illano motomo naimie rafue llocabiñeite.

<sup>20</sup> Comeciai ocuinidinona canoite.

Dueredinona canoite. Naimacina duere finoñeite; ia naimacina canoite.

Ie mare rafue lluamona, naimiena ñnotinona canoite.

Nana comini naimie anamo ille dinori iese naimie canoite.

<sup>21</sup> Naimaci jillobillena, ie rafue cacajanona, ailluena judíuainedino naimiena ñnoitimaci.

*Fariseuai Jesúna jeare ñaia rafue  
(Mr 3.19-30; Lc 11.14-23; 12.10)*

<sup>22</sup> Jesús dine damieredi Janaba ie anamo illamiena atidimaci. Janaba anamo naimie illa jira, naie aticamiedi cioñede. Jai ñañede. Jesús Janabana oni oretajanona, naimiena jillotate. Naimie uaina botade. Ñaite. Ciode.

<sup>23</sup> Naiena ciolino rajicaillanona raitimaci:

—Ñibai bimiedi David micori jito. Cai illaimana naimie illena, naimie micori jitomo ocuiridicai.

<sup>24</sup> Iena damierie fariseuai cacajano, raitimaci:

—Beelzebúdi Janaba comini. Beelzebú anamo naimie illamona, Beelzebú uaido Janaba illa cominimona Jesús Janabana oni oretate —raitimaci.

<sup>25</sup> Naimiena naimaci enoillana Jesús uifuanona, naimacimo llote:

—Daje isoi comeciaina lloillamo daje nairai facañenia, danomo majjnidimaci. Oni jaidimaci. Daje isoi comeciaina lloillamo daje jofomo itino facañenia, danomo jainaiainidimaci. Oni jaidimaci.

<sup>26</sup> Je isoide. Beelzebú uaido jananiaina omoi llua isoi cue oretai, Janaba ie dibeimo itino diga jai nabairifede. Iemona naimie comini danomo ifeitimaci.

<sup>27</sup> Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uifollena. Iemei cue finoca rafuena uaitañeitomoi.

<sup>28-29</sup> Ero, mairidimie ie jofomo ite rana nibai fiicadomoi. Iena fiillena, naimiena nano raise omoi maiga. Raise maia mei, ie rana fiiredomoi. Ie isoide. Janaba anamona cominina jillotacabiticue. Naimie afemo nano cue ifenia, cominina jillotanidicue. Naimie afemo cue illa jira, iena finoredicue. Jusiñamui Joreño uaido naimiena anafefitaticue. Iemona Jusiñamui rafuena cue llua jai uifotomoi.

<sup>30</sup> Cue dibeimo ifedimie cuena enoide. Cue dibeimo cominina itatañedimiedi naie cominina cuena inotañede.

<sup>31</sup> Je jira omoimo lloiticue: Jusiñamuidi nana comini jeacinona dotarede. Naimiedi comini marañedicinona dotarede; iadedi naimiedi ie Joreñona jeare ñaiacinona dotañeite.

<sup>32</sup> “Jusiñamui Joreño uaido siño rafuena finoñedio; ia Janaba uaido siño rafuena finodio” cuena raitomoi. Jusiñamui mona biticue. Cuena omoi jeare ñaia, Jusiñamui iena feitarede; iadedi naimie Joreñona omoi jeare ñaia, Jusiñamui iena birui feitañeite. Iena ico jaca feitañeite.

*Jesúdi riará llisilla llua rafue*

*(Lc 6.43-45)*

<sup>33</sup> Jesús llote:

—Llisillamona nie isoide riará illana uifoticaí. Amena ie llisilla llillamona, amena marena uifoga. Llillamona, amena marañenana jiaí uifoga.

<sup>34</sup> Je isoide. Omoi ñaiamona omoína uifoticaí. Cuena omoi marañeno ñaia jira, omoi comeciái iticinona uifoticaí. Omoi marañena jira, jaió nairaidomoi isoidomoi.

<sup>35</sup> Mareuidimie mare ie comecimona ñaite; iadedi marañedimie marañede ie comecimona ñaite.

<sup>36</sup> Jamai ebena birui omoi ñaia, Jusiñamui uicomo nana comini ico illa facaiseconi Jusiñamui iba oite.

<sup>37</sup> Omoi jeare ñaiaconi duere sefuitomoi; iadedi omoi mare ñaiaconi duere sefuiñeitomoi. Ie jira Jusiñamui dibeimo omoi comeciái iuai meido.

*Dajerie Jesús siño rafuena finuana jitailla rafue*

*(Mr 8.12; Lc 11.29-32)*

<sup>38</sup> Naie facaiseconi dajerie Moisés micori llogacinona llofueraíni dajerie fariseuai diga Jesúmo llotimaci:

—Maestro, o lloga uaina caí inollena, siño rafuena o finuana cioacadicaí.

<sup>39</sup> Jesús uai ote:

—Marañedicinona finocabidomoi. Jusiñamui dibeimo iacaiñedomoi; iadedi siño rafuena cioacadomoi. Iena omoi jamai cioillena, siño rafuena finoñeiticue. Ero, Jonás micori jaié ite rafuena uifotomoi. Naiemo omoi comeciaina omoi faca.

<sup>40</sup> Darui amani raiafomo iiticue. Iemei naiemona jilloiticue. Ie isoite. Cue fiodailla mei, darui amani raiafomo iiticue. Iemei naiemona jilloiticue.

<sup>41</sup> Lliciaí jeraimona naimie jillua mei, Nínive railla nairai dine Jonás micori jaié. Nainomo Jusiñamui rafuena llote. Naie comini iena cacajano, naimaci comeciái icinuaina meidotimaci. Cue rafuena omoi cacajamona, omoi comeciái icinuaina birui omoi meidoñena jira, Jusiñamui uicomo ico nana comini illa facaiseconi: “Cue cominidomoi” omoína rañeiticue. Jonás micori baifemo birui uaidicue; iadedi cuena inoñedomoi.

<sup>42</sup> Ero, Saba railla nairai ie illaño micori di Salomón micori dine jaié aarena jaié. Naimie micori uifuanacina nairañiño micori cacareillena, aarena jaié. Salomón micori baifemo birui uaidicue; iadedi cuena inoñedomoi. Omoi comeciái icinuaina birui omoi meidoñena jira, Jusiñamui uicomo nana comini ille facaiseconi nairañiño micori omoína ico ñaite: “Naimiedi siño rafue finuana ciodomoi. ¿Bue ñellena naimiena inoñedomoi?” omoína ico ñaite.

*Janaba anamo illamie rafue  
(Lc 11.24-26)*

<sup>43</sup> Jesús naimacimo nia llote:

—Birui bene ite marañede cominidi Janaba anamo illamie isoidimaci. Naimiemona Janaba oni jaiia, jiaie illanona baillena, jofue iñenanomo jaide; iade baiñede.

<sup>44</sup> Baiñena jira, naimie comecina facade: “Navui cue anamo illamie dine abido jaiticue”. Abido naimie bia, naie iima comeci namanidena naimie baite.

<sup>45</sup> Temei oni jaillanona, jiaie siete jananiaina naimie diga atide, naimaci anamo naie iima illena. Naie siete jananiái naimie baiñemo marañedimaci. Iemona naie iima eo fodo jaide. Ie isoide birui ite marañede comini. Cue rafue naimaci iñoñenia, eo fodo jaitimaci.

*Jesús ie comini  
(Mr 3.31-35; Lc 8.19-21)*

<sup>46</sup> Jofomo comini diga Jesús nia ñaia, naimie ei, ie amatiai diga, bite. Naimie diga ñaiacanano, jino naidaide.

<sup>47</sup> Damie Jesúsomo llote:

—O ei, o amatiai diga, jino ite. O diga ñaiacade.

<sup>48</sup> Naimiemo Jesús dinena jicanote:

—¿Bu cue ei? ¿Bu cue amatiai?

<sup>49</sup> Ie llofueoicaigano dine ie onolli ñuitajanona, raite:

—Jadí, cue ei, cue amatiai.

<sup>50</sup> Cue Moo monamo ite. Naimie jitaillacinona finodimiedi cue amana, cue miriñona, cue eina. Imaci ua cue cominina.

## 13

*Trigo judaidimie rafue  
(Mr 4.1-9; Lc 8.4-8)*

<sup>1</sup> Nai jofomona nairui Jesús jaillanona, jorai fue dine jaide.

<sup>2</sup> Ailluena comini nainomo ofilla jira, botemo Jesús jaillano, ana raide; iadedi comini jorai fueo itimaci.

<sup>3</sup> Ailluena rafue naimacimo llote:

—Jusiñamui omoína sedaacana omoi fueollena, bie rafuena lloiticue. Damie trigona judaiaide.

<sup>4</sup> Naimie judaiamona, naisomo janore iduai juide. Naimie bai jailla mei, silliñia iena guisaibitimaci. Ie jira sicoñede.

<sup>5</sup> Nofiemo jiaie iduai juide. Nainomo enirue raise iñede. Sicode; iadedi enirue raise iñena jira,

<sup>6</sup> raise jainañena jira, ecasillamona duide. Ie jira llisiñede.

<sup>7</sup> Eecuai illanomo jiaie iduai juide. Eecuai sicuamona, riará eecuai ibaica. Ie jira llisiñede.

<sup>8</sup> Mare eniruemomo jiaie iduai juide. Sicode. Llisillamona danademomo cien diga llisillana ote. Jiaianamona sesenta diga llisillana ote. Jiaianamona treinta diga llisillana ote.

<sup>9</sup> Omoi jeforena jira, raise fueollena, cue lluomo cacarei. Iena iño.

*Jesús ie como lloga rafuena llofuiá rafue  
(Mr 4.10-12; Lc 8.9-10)*

<sup>10</sup> Ie llofueoicaigano Jesúsomo jicanuaibiside:

—¿Bue ñellena bie isoide rafuedo cominina llofuetio?

<sup>11</sup> Uai ote:

—Jusiñamuidi omoína ie sedaacana rafuena jai uiñotade. Jaiie iena uiñotedomoi. Jiaie cominina iena nia uiñotañede.

<sup>12</sup> Jusiñamuina inotimie Jusiñamui rafuena inocana jaite. Jusiñamui naimiëna uiñotaite; iadedi Jusiñamuina inoñedimie Jusiñamui rafuena uiñotëcana jaite.

<sup>13</sup> Ie jira bie isoidicinodo naimacimo lloticue. Cue siño finoca rafuena cioidimaci; iadedi iena naimaci inoñena jira, uiñoñeno jaitimaci. Cue llofuiana jamai cacadimaci; iadedi naimaci inoñena jira, raise cacaiñedimaci. Uiñoñedimaci.

<sup>14</sup> Isaías micori naimacina jaie cuega rafue birui jai suide. Jaiie raite:

Jusiñamui llote: “Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

<sup>15</sup> Omoi comeciai jai tainomomo ite isoide.

Omoi jefona jai cacaiñedomoi isoidomoi. Cue rafuena jai cacacaiñedomoi.

Jai uisindomoi isoidomoi. Siño rafuena jai cioiacaiñedomoi.

Iena jai uiñoiacaiñedomoi.

Cue dibeimomo iacaiñedomoi, omoína cue jilloitai raillanona”.



Isaías micorí Jusiñamuina ñnoñedinona iese jaie cuete;

<sup>16</sup> iadedi bie siño rafuena birui omoi jai ciua jira, cue lloga rafue omoi jai cacaja jira, iena birui omoi ñnua jira, ni ua omoi marena ille jillaci.

<sup>17</sup> Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioñedimaci. Iena cacacadimaci; ia cacaiñedimaci. Jusiñamuina jaie ñnotino micoriai iena cioacadimaci; iadedi cioñedimaci. Iena cacacadimaci; iadedi cacaiñedimaci.

*Jesúdi trigo judaidimena llua rafue*

*(Mr 4.13-20; Lc 8.11-15)*

<sup>18</sup> Jesús llote:

—Ero, omoina trigo iduaina judaidimie rafuena llofueiticue.

<sup>19</sup> Dajerie iduai naisomo juide. Dajerie comini comeciai naie naiso isoidimaci. Jusiñamuidi ie cominina sedaja rafuena cacadimaci; iadedi iena cacaiñedimaci. Ie jira Taifedi naimaci comeciaino cacaja uaina ñnotañede.

<sup>20</sup> Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacai, iena caimare feiñotimaci.

<sup>21</sup> Nofiemo riga iduai jainaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefua, abido danomo uaidimaci.

<sup>22</sup> Jiaie iduai eecuai illanomo juide. Naie iduai sicua mei, iena eecuai ibailla jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. ñnotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciaino itabiñede. Jusiñamui jitaille rafuena finocana jaiñedimaci.

<sup>23</sup> Jiaie iduai mare enirüemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Eo lliside isoidimaci. Jusiñamui jitaille rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

*Raiticiai trigo motomo ñlla rafue*

<sup>24</sup> Jesús jiaie rafuena llote:

—Jusiñamui ie cominina sedaacana rafuena lloiticue. Naimie dibeimo comini jaillena, naimie rafue llocana jaidicue. Jiaie uaido iena omoimo lloiticue. Damie trigona judaiaide. Ie ñllo mare iduaina judaide.

<sup>25</sup> Naimie inia mei, ie enoidimie trigona eruaide raiticiaina bainino judaiaide. Iemei oni jaide.

<sup>26</sup> Trigo sicuamona lliside. Naie facaise naie raiticiai como raise bairede.

<sup>27</sup> Judaidimie maijiraini iena ciuanona, naimiemo llote: “Mare iduai navui ritio. ¿Niesedeta raiticiai eo sicode?”

<sup>28</sup> Uai ote: “Cuen a enoidimie iese finoca”. Naie maijiraini naimiemo jicanotimaci: “¿Birui nai raiticiai cai raitiana jitaidio?”

<sup>29</sup> Uai ote: “Dama ite. Raiticiai omoi raitia, trigona jiai jaitaitomoi. Dama iesede.

<sup>30</sup> Danomo sicoite. Ua facaiseconi cue maijirainimo lloiticue: “Raiticiai nano jaita. Danomo ofita, jobaillesa. Trigo uanona, cue jofomo atianona, eeno”.

*Jesúdi mostaza ido llua rafue*

*(Mr 4.30-34; Lc 13.18-19)*

<sup>31</sup> Jesús jiaie rafue llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Damie mostaza idona rillamona, naiemona eo aillue riar a sicode.

<sup>32</sup> Mostaza ido eo janorede; iadedi sicua mei, eo aillue riar a jaillamona, nainomo silliniñai jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

*Jesús siritate rana llofua rafue*

*(Mr 4.33-34; Lc 13.20-21)*

<sup>33</sup> Jesús jiaie rafuena llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

<sup>34</sup> Naie isoide rafuedo Jusiñamui ie cominina sedaacana rafuena cominimo Jesús llote. Jiaie rafuedo iena lloñede.

<sup>35</sup> Jusiñamui facaina lloraima micorí iena jaie cuela:

Jusiñamui llote: “Jiaie isoide rafuedo cominimo lloiticue.

Comini ñia uññoñega rafuena lloiticue. Enirue finua facaisemona jaca bu iena uññoñede.

Birui naimaci uifollena, iena lloiticue”.

*Jesús trigo motomo riga raiticiaina llofuia rafue*

<sup>36</sup> Comini jino faínonocaida, Jesús ie risoilla jofomo abido jaide. Ie llofueoicaigano naimiemo llotimaci:

—Iena raise cai uifollena, trigo motomo riga raiticiai rafuena caimo llono.

<sup>37</sup> Uai ote:

—Mare iduai judaidimiedi cue. Jusiñamui rafuena lloticue.

<sup>38</sup> Naie illidi nana comini. Mare iduaidi Jusiñamuimo duide comini. Raiticiaidi Taifemo duide comini.

<sup>39</sup> Naie marañede iduai judaidimiedi Taife. Ua facaisedi cue abido bille facaise. Trigo otinodi Jusiñamui jaienisaí. Trigodi cuena ñotino.

<sup>40</sup> Jobaillena raiticiai ofitaja isoi, ico abido cue bia, daje isoi iite.

<sup>41</sup> Cue jaienisaína oretaiticue, nana jeacinona finoraini diese ofitallena, cue illanomona iraimo dotallena.

<sup>42</sup> Nainomo eo duere sefuillamona, eetitimaci. Subicaitimaci.

<sup>43</sup> Iemei jitoma lligañua isoi, Jusiñamui sedajanomo naimiema ñotinodi marena bairenitimaci. Omoi jeforena jira, raise fueollena, cue lluomo cacarei. Bie isoi omoi duere sefuihellena, cue lluaña ñno.

*Jesúdi eniruemo isiruiga reica rana llofuia rafue*

<sup>44</sup> Jesús llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Eniruemo isiruiga raifide ra bu baia, ie nama jai iñena jira, naie eniruena uainino ibaacade, naie ra ollena. Ucube ollena, naie rari iobilla jira, nana naimiemo ite raruiaína fecaite. Iemei eniruena ibaite. Ie isoide. Jusiñamui illanomo omoi illena, jiaie rafue uanona jaiñeno. Dani Jusiñamui rafuena uanona jai. Dani iemo omoi comeciaina faca.

*Perlas railla rafue*

<sup>45</sup> Jesús llote:

—Jusiñamui dibeimo comini jailla rafuena lloiticue. Iena omoi raise uifollena, perlas railla rana ibaraimana lloiticue. Eo mare perlas iballena jenocabide.

<sup>46</sup> Eo raifide perla naimie baia, naie perlana iballena, nana ie raruiaína fecaite. Ie isoide. Jusiñamui ie cominina sedaacaja rafuena omoi cacaja jira, iena ocana jai.

*Jesús llojjina ñaia rafue*

<sup>47</sup> Jesús llote:

—Jusiñamui dibeimo comini jailla rafuena lloiticue. Iena omoi raise uifollena, llojjina lloiticue. Joraimo llojjina comini faianona, naga isoide lliciaína otimaci.

<sup>48</sup> Ari sonua mei, mare lliciaí diese fetodimaci. Marañede lliciaí diese oni faitimaci.

<sup>49</sup> Ie isoide. Ico abido cue bia, iese iite. Jusiñamuina ñotinomona naimiema ñnoñedino diese oni fetollena, Jusiñamui jaienisaí biitimaci.

<sup>50</sup> Iemei iraimo Jusiñamuina ñnoñedinona dotaitimaci. Nainomo eo duere sefuillamona eetitimaci. Subicaitimaci.

*Jesús llofueoicaiganodi mare rafuena jai uifua rafue*

<sup>51</sup> Ie llofueoicaiganomo Jesús jicánote:

—¿Nana cue lluaña cacadomoi?

Uai otimaci:

—Jii, nana cacadicaí.

<sup>52</sup> Naimacimo llote:

—Ie jofomo comini bia, naimacina raise nafuellena, naimacina caimare itatallena, jofu nama ie mare raruiaimona naimaci jitailla ra naimacimo fecade. Comini comeciaina lloticue. Jusiñamui facaina lloraini micoriai llogacinona uifotomoi. Cuemona Jusiñamui ie cominina sedaja rafuena fueocana jiaí jai jaidomoi. Comini comeciaina caimare itatallena, birui llofueredomoi.

*Nazaretmo Jesús illa rafue*

(Mr 6.1-6; Lc 4.16-30)

<sup>53</sup> Naie rafuena Jesús llua mei, nainomona Nazaretmo jaide.

<sup>54</sup> Ie eniruemo rillanona, Nazaretmo ite ofiracomo llofue. Naiemona cominidi rajicail-lamona raitimaci:

—¿Ñiese naimiedi eo abina uifote? ¿Ñiese siño rafuena naimiedi finode? Naimiedi jamai fue isoidimie.

<sup>55</sup> Naimie amederaima jito. Naimie eidi María. Naimie amatiáidi Jacobo, José, Simón, Judas.

<sup>56</sup> Naimie miriñotiaidi cai motomo jiai ite. Naimaci diga nagarui nabairiticaí. Naimieori cai nabairicabilla. Ie jira, ¿ninena ie siño uaina ote?

<sup>57</sup> “Cai comena naimie ite” raillanona, naimie uaina jamaidimaci. Jesús naimacimo llote: —Naga illanomo cominidi Jusiñamui facaina lloraima uaina feiñotimaci; iadedi naimie nairaimo naimie ia, ie risoilla jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina iñoñedomoi.

<sup>58</sup> Naimie uaina naimaci iñoñena jira, Jesús ailluena siño rafue finoñede.

## 14

*Juan Bautista micori fiodailla rafue*  
(Mr 6.14-29; Lc 9.7-9)

<sup>1</sup> Naie facaiseconi Herodes railla gobernador Jesús mamecina cacade.

<sup>2</sup> Naimie ecimo maijiuidinomo llote:

—Fiodaillamona Juan Bautista micori jai jillode. Jesús raillamiedi naimie. Ie jira naimiedi siño rafuena finocabide.

<sup>3-4</sup> Iese raite, Herodes Juan micorina navui meinetaja jira. Juan Bautista micorina nia meinetañenia, Herodes ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

Herodes Juan micori lluana gaiñenano, naimiena duere finode. Herodes Juan micorina gaitatajanona, cárcelmo jonetade.

<sup>5</sup> Naimie micorina meinetaacade; iadedi Herodes dinena cominina jaciruite. Juan micoridi Jusiñamui facaina lloraimana naimaci raillanona, naimie micorina jaciruite.

<sup>6</sup> Iemei Herodes cumpleaños ie rafuena finode. Nainomo jiaie cominina uaidote. Ra-fuemo Herodías jisa naimaci uicomo saillamona, Herodena iobitade.

<sup>7</sup> Ie jira naiñaiño mo llote:

—Nie isoide rana o jitaiadedi, omo iiticue. Ilaima uai cuemo illa jira, iena ua finoiticue.

<sup>8</sup> Naiñaiño ei naiñaiño mo lluanona, naiñaiño uai ote:

—Juan Bautista ifogí bandejamo jonecaida, cuemo ine.

<sup>9</sup> Iena cacajano, naimie sunaite; iadedi naimie jino ie llua uaina jira, nainomo naimie uaidogano jiai jai cacaja jira, Juan micorina meinetajana llote.

<sup>10</sup> Ie lloga uaina finollena, cárcelmo soldadona orede. Nainomo Juan micori ifogina jaitade.

<sup>11</sup> Bandejamo naimie micori ifogí jonecaida, soldado atiano, Herodías jisamo fecade. Ieconí ie eimo fecade.

<sup>12</sup> Iena fidianona, Juan micori llofueoicaigano naimie micori abina uai bitimaci. Iena naimaci raia mei, Jesús mo lluidimaci.

*Jesús cinco mil iñiaina ecaja rafue*  
(Mr 6.30-44; Lc 9.10-17; Jn 6.1-14)

<sup>13</sup> Juan micori meiniana Jesús fidiano, nainomona comini iñenanomo ie llofueoicaigano diga botedo jaide; iadedi naimie jaillana comini fidiano, naimiena racadimaci. Diga comini illanuaimona eillido bitimaci.

<sup>14</sup> Enirruemo Jesús sijia, ailluena cominina dafaiñede. Naimacina ciuanona, naimacina duenailanona, duidinona jillotate.

<sup>15</sup> Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuiacade. Cominina mai abido oreta. Ianori ite nairaimo naimaci guille ollena, naimacina oreta.

<sup>16</sup> Uai ote:

—Naimacina oretañeiticue. Naimacina omoi eca.

<sup>17</sup> Uai onaisite:

—Dani caimo ite cinco llomenico, mena lliciai diga.

<sup>18</sup> Uai ote:

—Iena cuemo ati.

<sup>19</sup> Raitie illanomo comini ana raillesa llono —raite.

Naie cinco llomenicono naie mena lliciai diga uanona, monamo eruailanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena.

<sup>20</sup> Nana guillanona monidimaci. Monillamona, fiebide guillena iraidimaci. Doce cirigaaimo oruitatimaci.

<sup>21</sup> Cinco mil iñiaia diese guitimaci. Naimaci aitiai jiaa guitimaci. Naimaci uruiaa jiaa guitimaci.

*Jesús jinui emododo macarilla rafue*  
(Mr 6.45-52; Jn 6.16-21)

<sup>22</sup> Guilla mei, botedo ie llofueoicaigano ruica dine jaillena llote. Naie facaiseconi naimie cominina nia facadote.

<sup>23</sup> Cominina facadua mei, aneduaimo dane jaide, Jusiñamui diga ñaillena. Jitibicaidemo nainomo dama ite.

<sup>24</sup> Naie facaiseconi ie llofueoicaigano jorai motomo itimaci. Aifi billamona, eo bagode. Naimacimo riire aifi rilla jira, riire jaitimaci.

<sup>25</sup> Nia monañedemo, jinui emododo naimaci dine Jesús bite.

<sup>26</sup> Naimiena naimaci cuanona, jacinallamona, raitimaci:

—¿Bu joreño caimo billana ciodica? —Jacinallamona cuiriidimaci.

<sup>27</sup> Naie dacaño Jesús naimacimo llote:

—Omoi joreñoncañeno. Cuesa. Jaciruñeno.

<sup>28</sup> Pedro uai ote:

—Uanaa cai Namadio. O dine cue billesa cuemo llono.

<sup>29</sup> Jesús uai ote:

—Cue dine bi. —Ie jira botemona jinui emodo Jesús dine Pedro macarite;

<sup>30</sup> iadedi aifi billana naimie cuanona, jacinante. Jinuimo anabaiacade. Ado cuirioide:

—Nama, cuena cano.

<sup>31</sup> Jesús ie onolli oni ñuitajanona, naimiena llinuanona, raite:

—Eo janore cue uaina ñnotio. ¿Bue ñellena eo ñnotiedio? Cuena ñnotiodena, jinui emododo cue dine niadedi ridio.

<sup>32</sup> Botemo a iaiaiaa jaillamona, ie facaise aifi llucaide.

<sup>33</sup> Ie jira botemo itino Jesúsimo iobillacinona fecadimaci.

—Odi ua Jusiñamui Jitodio —raitimaci.

*Jesúsdi duidinona Genesaret eniruemoo jillotaja rafue*  
(Mr 6.53-56)

<sup>34</sup> Ruica dine jaillanona, Genesaret railla eniruemoo ridimaci.

<sup>35</sup> Jesúsna nainomo itino uiañuamona, naimie dine duidinona atillena, nana nairaimo jiaie cominina oredimaci.

<sup>36</sup> Naimie dine billanona, dani ie ñiroi fuedamo jutadallena naimiemo jicanotimaci. “Naimie ñiroimo cai jutadallemona jilloiticaa” raillamo comeaiana facadimaci. Nana jutadate diese jillodimaci.

## 15

*Jesúsdi comini comeaiana ñaia rafue*  
(Mr 7.1-23)

<sup>1</sup> Jerusalémona fariseuai comini Jesús dine bitimaci. Moisés micori llogacinona llofueraiaa jiaa bitimaci.

<sup>2</sup> Naimiemo jicanotimaci:

—¿Bue ñellena o llofueoicaigano cai einamacia rafuedo jaiñedimaci? Naimaci guiacania, naimaci onolli cai einamacia llua isoi raise jocoñedimaci. Ie jira cai abimo jeacino finodomoi.

<sup>3</sup> Jesús uai ote:

—¿Bue ñellena nana Jusiñamui llogacinodo jaiñedomoi? Omoi einamacia llogacinodo jaidomoi; iadedi nana Jusiñamui llogacinodo raise jaiñedomoi.

<sup>4</sup> Jusiñamui jaie llote: “O moo uai ñnuanona, naimiena cano. O ei uai ñnuanona, naiañiañona cano. Ie moori jeare ñaitimie, ie eiri jeare ñaitimie meinelle”.

<sup>5</sup> Iese Jusiñamui llote; iadedi omoi einamacia llotimaci: “Jusiñamuimo cai ucubena cai fecajamona, cai moona, cai eina jai canonicicaa”.

<sup>6</sup> Iese omoi finocabilla jira, omoi einamacia llogacinodo omoi jaillamona, Jusiñamui uaina jamaidomoi.

<sup>7</sup> Mareuidinona abi caitaidinodomoi. Isaías micori omoina jaie raise llote. Naimiedi Jusiñamui lluaa cuete:

<sup>8</sup> Bimaci naimaci uaido marecinona cuemo llote; iadedi cue rafuedo raise jaiacaiñedimaci. “Ona isiruiticaa” llotimaci. “Ona sedadicaa” llotimaci.

Jamaa ñaitimaci. Naimaci comeiaa cue dibeimo raise iñede.

<sup>9</sup> Cue uai itena, jamaa comini llucacinona naimaci llofuecabilla jira, tainona cuena sedadimaci.

<sup>10</sup> Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoi uifollena, cue lluomo cacarei.

<sup>11</sup> Omoi einamaci isoi omoi guifenia, naimaci isoi omoi onollina omoi jocoñenia, omoi comeciaina jearetañedomoi. Omoi guigamona, omoi onollina jocuamona, Jusiñamuina nabaiñedomoi. Omoimo jeacino illa jira, Jusiñamuina nabaiñedomoi. Omoi comeciai jearena jira, jeacinona finocabidomoi.

<sup>12</sup> Ie llofueoicaigano naimiemo lluaibitimaci:

—O llua muidona, fairseuai cominina icidio.

<sup>13</sup> Naimie dinena uai ote:

—Dama ite. Nana cue Moomona ofiega rafuedi jai ieconi duite. Naimaci rafue cue Moomona ofenia, ja muidomo ieconi duite.

<sup>14</sup> Naimacina fainonocai. Uanaicinona naimaci uifofena jira, uisnidino isoidimaci. Jiaimiena uisnidimie ifoia, dafomo uaidiamaiai. Ie isoide. Uanaicinona fariseuai uifofena jira, uanaicinona llofuenidimaci. Uanaicnodo jaiñedimaci. Ja muidomo faifitimaci.

<sup>15</sup> Pedro naimiemo llote:

—Aillinano o llua caimo raise llono.

<sup>16</sup> Uai ote:

—¿Niese cue lluaa jiai nia cacaiñedomoi?

<sup>17</sup> Nie isoide ra guitomoina, omoi jebemo jaide. Ie mei omoi abiamona jino bite;

<sup>18</sup> Iadedi omoi comeciaino iticinomona jearedena ñaitomoi. Omoi comeciai jearena jira, jearede rafuena finocabidomoi.

<sup>19</sup> Omoi comeciai jearena jira, jeare comeciaina facacabidomoi. Comena meinocabit-omoi. Omoi aiñede riño diga icabitomoi. Omoi iniñede ñima diga icabitomoi. Firicabitomoi. Tainona llogiricabitomoi. Jiaie comini joreña jeare ñaicabitomoi.

<sup>20</sup> Bie isoidicinuai omoi comeciaino illa jira, jearede rafuena finocabidomoi; iadedi omoi einamaci llua isoi, omoi onolli jocoñenamona jeacino comuifede.

*Jesús di judío iñaiñediñaiñona jillotaja rafue*

*(Mr 7.24-30)*

<sup>21</sup> Genesaret railla eniruemona ie llofueoicaigano diga Jesús jaillanona, Tiro railla eniruemo jaide. Sidón railla eniruemo jiai jaide.

<sup>22</sup> Ie facaiseconi naie eniruemona judiñediñaiñodi billanona, raite:

—Maestro, David micori jitodio. Jusiñamuimona o billa jira, cuena duenai. Cue jisa Janaba anamo ite. Naiñaiño eo duere sefuicabide.

<sup>23</sup> Jesús uai ofede. Ie jira ie llofueoicaigano naimie dine billanona, duere llote:

—Naiñaiñoa abido ie jofomo oreta. Caimo duere jicanuai bitesa.

<sup>24</sup> Jesús uai ote:

—Faificana jaillana naimaci jai jailla jira, dani cai judiui cominimo cue Moo cuena oretate. Naimiedi judiñediñaiñomo cuena oretañede.

<sup>25</sup> Ie facaise naimie dine naiñaiño billanona, naimiemo iobillacinona fecallena, caiñici ifodo ana rainada raite:

—Maestro, cuena cano.

<sup>26</sup> Judiuiñedinona naimie canoñenana naiñaiño uifollena, naiñaiñomo Jesús llote:

—Uruiai guillamona jiconiaina ecadicaidena, marañede.

<sup>27</sup> Naiñaiño dinena uai ote:

—Jii, maestro; iadedi jiconiaidi imaci nama guillamona fiebide guillemona gutimaci. —Iese llote; ia jiaie rafuemo comecina facade. Uruiaina llote; iadedi judiuiñemo comecina facade. Jiconiaina llote; ia judiuiñedinomo jiai comecina facade. Comecina facade: “O cominimo o rafue duide; ia cai Namana o illa jira, nibai o rafue caimo janore duide”.

<sup>28</sup> Jesús uai ote:

—Cue uaina o ñnua jira, o jitailla rafuena fnoiticue. —Ieconi naiñaiño jisa jillode. Janaba naiñaiñomona oni jaide.

*Jesús ailluena duidinona jillotaja rafue*

<sup>29</sup> Nainomona Jesús bai jaillanona, Galilea railla jorai fuedo jaide. Iemei aneduaimo jaillanona, nainomo ana raide. Nainomo rilla mei,

<sup>30</sup> ailluena comini naimie dine bitimaci. Ailluena duidinona atidimaci. Ñuja-ñujacaida macaritinona, onollina idisaruidinona, uisnidinona, uainidinona atidimaci. Diga duidinona naimie dine atidimaci. Iemei naimacina jillotate.

<sup>31</sup> Ailli uainidino jai ñaiana cacajamona, ailli onollina idisaruidino onolli jai marenana illana ciuamona, ailli ñuja-ñujacaidino macaritano jai marena macarillana ciuamona, ailli

uisinidino jai ciuana ciuamona, nainomo ite comini eo rajijcaidimaci. Cai Jusiñamuimo iobillacinona fecadimaci.

*Jesúdi cuatro mil iññiaina ecaja rafue*  
(Mr 8.1-10)

<sup>32</sup> Jesús ie llofueoicaigano naimie dine uaiduanona, raite:

—Bie comini darui amani bene cue diga illa jira, naimacimo guille jai iñede. Naimacina aimeri oretaiacaiñedicue, naisomo naimaci baii raillanona. Naimacina cue duenaila jira, naimacina canoacadicue.

<sup>33</sup> Jicanotimaci:

—¿Ninomona guille oiticaí, naimacina cai ecallena? Ailluena comini ite; iadedi jofue iñenanomo iticaí.

<sup>34</sup> Jesús jicanote:

—¿Niga llomenico omoimo ite?

Uai otimaci:

—Siete. Janorede llicisiriai caimo jiai ite.

<sup>35</sup> Comini ana raillena Jesús llote.

<sup>36</sup> Naie llomenico llicisiriai diga uanona, Jusiñamuimo iobillacino fecade. Tailluanona, ie llofueoicaiganomo fecade, naie cominimo fecallena.

<sup>37</sup> Nana gutimaci. Monidimaci. Monillamona, fiebide guillena iraidimaci. Siete cirigaiaimo oruitatimaci.

<sup>38</sup> Nainomo cuatro mil iññiai gutimaci. Naimaci ainiai jiai gutimaci. Naimaci uruijai jiai gutimaci.

<sup>39</sup> Temei cominina naimaci jofuemo orede. Naimacina oretaja mei, botedo Magdala railla eniruemo Jesús jaide.

## 16

*Fariseuai comini Jesúmo siño rafuena finuana jicanuano billa rafue*  
(Mr 8.11-13; Lc 12.54-56)

<sup>1</sup> Dajerie fariseuai comini Jesús dine bitimaci. Naimiena facacillena, dajerie saduceuai comini jiai bitimaci. Siño rafuena naimie finuana jiacacadimaci. Iena naimie finoñedena, naimie ie llua isoi iñenana uiñoitimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

<sup>2</sup> Jesús uai ote:

—Jitoma sojicaidemo, mona jiairenia, raitomoi: “Ico are maremonanite”.

<sup>3</sup> Jiai raitomoi: “Jitiramo mona jiairenia, ja noci deite”. Monamo omoi eruailamona, marena monaillana uiñotomoi; iadedi birui cue finoca rafuena raise uiñoiacaiñedomoi. Omoi motomo birui suide rafuena raise cacaiñedomoi. Abina uiñotinona abi caitadomoi.

<sup>4</sup> Jeacinona finocabidomoi. Jusiñamui dibeimo raise iacaiñedomoi. Siño rafuena finoñeticue. Jonás micorimo jaie suide rafuena uiñotomoi. Jusiñamui naimiemo siño rafuena finode. Naiemo comeciaina omoi faca. Fiodaillamona naimie jillode. Ie isoi cue jiai jilloiticue. —Ie llua mei, naimacimona Jesús ie llofueoicaigano diga oni jaide.

*Jesús siritate rana llofuiia rafue*  
(Mr 8.14-21)

<sup>5</sup> Ruica dine naimaci rillanona, ie llofueoicaigano llomeniconica feillana uibiñotimaci.

<sup>6</sup> Iena naimie uiñuamona, naimacimo Jesús llote:

—Fariseuai siritate ramona abina rairui. Saduceuai siritate ramona abina rairui. —Iese Jesús llote; iadedi naimaci llofuiacinomona abi rairuillena ñaite.

<sup>7</sup> Jesús iese llua jira, iena naimaci raise cacaiñena jira, dani coniniri siadotimaci:

—Llomeniconica cai atñena jira, caimo iese llote.

<sup>8</sup> Naimaci siaduana Jesús uiñua jira, naimie llua naimaci nia raise cacaiñena jira, naimacimo llote:

—Cue uaina nia raise iñoñedomoi. Omoina canoredicue. ¿Bue ñellena dani omoi llomenico iñenana siadotomoi?

<sup>9</sup> ¿Niese iñoñedomoi? ¿Niese cue navui siño finoca rafuemo comeciaina facañedomoi? Navui cinco mil iññiai cinco diganicodemo gutimaci. Monillamona, guigamona fiebillamona, doce cirigaiaimo iraidomoi.

<sup>10</sup> Jiaicaiño cuatro mil iññiai siete diganicodemona gutimaci. Monillamona guigamona fiebillamona, siete cirigaiaimo iraidomoi.

<sup>11</sup> Omoina cue ecallena, ¿niese cuena birui iñoñedomoi? Llomeniconica ailli ñañedicue. Fariseuai siritate ramona abina rairuillena ñaiticue. Saduceuai siritate ramona abina rairuillena ñaiticue.

<sup>12</sup> Ie facaise naimie lluana jai cacadimaci. Llomenico siritate rana naimie ñaiñede; iadedi fariseu; llofuaičinomona naimaci abina rairuillena ñaite. Saduceu; llofuaičinomona naimaci abina rairuillena ñaite.

*Pedro Jesúsna llua rafue*  
(Mr 8.27-30; Lc 9.18-21)

<sup>13</sup> Cesarea Filipo railla eniruemo Jesús jaidemo, ie llofueoicaiganomo jicanote:

—¿Niese jiaie comini cuena raitimaci?

<sup>14</sup> Uai otimaci:

—Damierie raitimaci: “Odi Juan Bautista micoridio”. Damierie raitimaci: “Odi Elías”. Jiaino raitimaci: “Jeremías micoridio”. Jiaino raitimaci: “Jusiñamui facaina lloraima micoridio”.

<sup>15</sup> Jesús dane jicanote:

—¿Niese omoi cuena raitomoi?

<sup>16</sup> Pedro uai ote:

—Odi cai Jilloitaraimadio. Cristodio. Jusiñamui facaina lloraini micoriai o billena jaiel llotimaci. Cai cajede Jusiñamui Jitodio.

<sup>17</sup> Jesús dinena uai ote:

—Simón Pedro, Jonás jitodio. Marena llotio. Comini ona iena uiñotañede; iadedi cue Moo Jusiñamui ona iena uiñotade.

<sup>18</sup> Pedro, o comecina uiñoticue. Cuena como o lloga uaina meidoñeítio. Bie rafuena jiaie cominimo o llua mona, jiaí ñinoítimaci. Cuena ñnuamona, cue cominina jaitimaci. Cue ñibeimo ñnedino iena itatanidimaci.

<sup>19</sup> Ailluena cominimo Jusiñamui ie cominina jailla rafuena nano lloraimana jaitio. O llua cinodo jaitino cue cominina jaitimaci. O llua cinodo jaiñeítino cue cominina jaiñeítimaci

<sup>20</sup> Iena llua mei, ie llofueoicaiganona rairuide:

—Cue Cristonana bumo nia lloñeno.

*Jesús ie fiodaillena llofuia rafue*  
(Mr 8.31-9.1; Lc 9.22-27)

<sup>21</sup> Naie facaisemona ie llofueoicaiganomo Jerusalémo naimie jaillena marefodo lloste:

—Nainomo cai judiúi illaicomini cuena eo duere finoítimaci. Cuena meineítimaci; iadedi darui amani illanona, fiodaillamona jilloíticue.

<sup>22</sup> Pedro dinena lletade:

—Nama, ¡Jusiñamui iena jitañede! Bie isoide rafue omo suiñeite.

<sup>23</sup> Jesús jinafo dine naimiemo erodate. Raite:

—Cuemona oni jai. Iese ñaiñeno, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio. Iese o comecina facañeno.

<sup>24</sup> Ie llofueoicaiganomo llote:

—Cue cominina bu jaiacania, ie jitaile rafuedo jaiñena. Cue ñibeimo naimie jaillamona, duere sefuicana jaiete. Nibai naiemona fiodaite. Bu iese jaiacania, cue ñibeimo naimie iite.

<sup>25</sup> Duere sefuillana jaciruillamona cue cominina bu jaiacaiñenia, ja muidomo faifite; iadedi duere sefuillana jaciruñenamona cue cominina bu jai, jaca faifñeite.

<sup>26</sup> Cue cominina bu jaiñenia, nibai eo duere sefuiñeite. Nibai ailluena ra naimiemo iite; ia, ¿niese cue Moo dine riite? Nainomo naimie riñeno faifite.

<sup>27</sup> Cue jaienisai diga cue Moo dinena monamona ico biitícue. Cue Moo uai cuemo illanona, ebirena biitícue. Nagamie imaci finoca rafue diese cue iba ollena biitícue. Cue comiñedinona duere finoíticue.

<sup>28</sup> Uanaicinona omoimo lloíticue. Omoimona dajerie nia fiodañeítomoi, illaimana cue bairellena cioitomoi.

## 17

*Jesús abi meidocailla rafue*  
(Mr 9.2-13; Lc 9.28-36)

<sup>1</sup> Seis digarui illanona, anedumo comini ñenanomo Jesús jaiete. Naimie diga jaillena, Pedrona uite. Jacobona jiaí uite. Jacobo ama, Juan, jiaí uite. Jiaie llofueoicaiganona uiñede.

<sup>2</sup> Nainomo rilla mei, naimaci uicomo naimie abi meidocaide. Jitoma isoi naimie uieco bairecaide. Naimie iniroi naie dacaiño eo userecaide.

<sup>3</sup> Naie facaise naimacimo Moisés micori joreño, Elías diga bairede. Elíadi Jusiñamui facaina jaiete lloraima. Jesús diga ñaitiaimai.

<sup>4</sup> Jesús mo Pedro llote:

—Nama, bene cai illana mare. O jitaia, daje amani bisaini finoíticue. Daje oue; jiaie Moisés micori ie; jiaie Elías ie.

<sup>5</sup> Iena naimie nia lluanona, quenirede uillie billanona, naimacina ibaide. Uillie motomona Jusiñamui naimacimo llote:

—Bimie cue isiruiga Jito. Naimieri iobidicue. Naimie llamo cacareillanona, iena ñino llote.

<sup>6</sup> Jesús llofueoicaigana iena cacajanona, eo jaciruillanona, naimaci uieco dinena ana bitadatimaci.

<sup>7</sup> Jesús naimaci dine billano, naimacina jetajanona, raite:

—Mai jaciruiñeno naidacai.

<sup>8</sup> Naimaci erorillamona, dama Jesúna ciodimaci.

<sup>9</sup> Anedumona bitimacimo, naimacimo Jesús llote:

—Omoi ailli cúa rafuena bumo lloñeno, cue fiodaillamona cue jillua dinori.

<sup>10</sup> Naimiemo llotimaci:

—Moisés micori llogacinona llofueraini birui raicabitimaci: “Elías raillamie dane biite. Ie mei cai Jilloitaraima biite” raitimaci. Jusiñamuimona o billana ñnoticai. Odi cai Jilloitaraimana ñnoticai. Odi cai Jilloitaraimadiomo, ¿bue ñelli iese raitimaci?

<sup>11</sup> Uai ote:

—Raise ñnotomoi. Elías isoidimie jai bite, nana Jusiñamui jitaille rafue raise lllona. Jusiñamui díbeimo naimaci illena, comini imaci comeciai meiduaana llote.

<sup>12</sup> Ero, naimie jai bite; iadedi bie comini naimiema raise uifioñedimaci. Naimaci jitaille jira, naimiema jai meinetimaci. Ie isoide. Naimacimona duere sefuiticue. Monamona biticue, iimana cue jaillena; iadedi duere sefuiticue.

<sup>13</sup> Ie muidona Jesús llofueoicaigano naimiedi Juan Bautista micorina ñaiana jai uifioñtimaci.

*Jesúdi Janaba anamo itimiema jillotaja rafue*

*(Mr 9.14-29; Lc 9.37-43)*

<sup>14</sup> Ie jiaie llofueoicaigano dine Jesús abido ria, nainomo ailluena comini itimacimo ride. Jesús dine damie billanona, naimiema raise uaiduanona, cañicai ifodo rainadacaida raite:

<sup>15</sup> —Maestro, cue jitona duenai. Janaba anamo naimie ite. Iemona naillcabide. Duere sefuide. Uai-uacabide. Jiaicaiñodedi iraimo uaillanona, uside. Jinuimo jiaie uaillanona, niadedi corobaite.

<sup>16</sup> Naimiema jilloitallena o llofueoicaigano dine naimiema atidicue; iadedi naimiema jillotanidimaci.

<sup>17</sup> Iena cacajanona, Jesús ie llofueoicaiganomo llote:

—Cue uai siñonana nia ñnoñedomoi. Cue mare rafuedo nia raise jaiacaiñedomoi. Omoi diga are iticue. Raise omoi ñnollena, ¿nie dinori omoi diga iiticue?

Naie duidimie moomo llote:

—O jito cue dine mai ati.

<sup>18</sup> Naimiema atiamona, Jesús naimiemo Janaba illana uifioñote. Janabana Jesús lletaja jira, naie uruemonona Janaba oni jaide. Ieconí naie urue jillode.

<sup>19</sup> Ie mei ie llofueoicaigano Jesúmo anado jicanotimaci:

—¿Bue ñellena Janabana oni oretanidicai?

<sup>20</sup> Uai ote:

—Raise nia omoi ñnoñena jira, uanaicinona omoimo lloiticue. Janaba oni oretallena, cue uai navui omoimo iticue. Birui raise cuena omoi ñnoñena, bie Janaba oni oretanidomoi. Jusiñamuina eo janore ñnotomoidena, diga rana finodomoi. “Oni bai jai” bie anedumo llotomoidena, omoína naimie canuamona, bie anedu oni liai bai jaite. Jusiñamuina omoi ñnoia, naga rana finoredomoi.

<sup>21</sup> Jusiñamuimo omoi comeciaina facallena omoi guiñenamona, Jusiñamui diga omoi ñaiana, bie isoide Janabana oni oretaredomoi.

*Jesús ie fiodaillena dane llofuia rafue*

*(Mr 9.30-32; Lc 9.43-45)*

<sup>22</sup> Galileamo ie llofueoicaigano diga danomo itemo, Jesús naimacimo llote:

—Monamona billanona, iimana jaidicue. Jusiñamui jitaille jira, cuena jiaie comini gaitajanona, illaicominimo fecaitimaci.

<sup>23</sup> Naie illaicomini cuena meineitimaci; iadedi darui amani illamona, cue Moo cuena jillotaite. —Iena cacajanona, ie llofueoicaiganodi sunaitimaci.

*Jesúmo Jusiñamui jofo facaina damie ibataja rafue*

<sup>24</sup> Capernaumo naimaci rilla mei, Jusiñamui jofo ucube oraini Pedro dine jicanuai bite:

—Moisés micori: Ilua isoi, ¿o llofueraima Jusiñamui jofomo ucubena fecacabide?

<sup>25</sup> Pedro dinena uai ote:



—Jii, fecacabide. —Ucube oraini jailla mei, jofomo Pedro billanona, Jesúmo iena nia lloñedemo, Jesús dinena naimiemo jicanote:

—Simón Pedro, ¿niese o começina raitio? ¿Bumona illaicominidi imaci ucubena ocabitimaci? Imaci jitonaiçmona ocabiñedimaci; ia naimacimo duide cominimona otimaci.

<sup>26</sup> Uai ote:

—Raise llotio. Naimacimo duide cominimona ocabitimaci.

Je jira Jesús raite:

—Naimaci jitonaiçna ibatañede. Ie isoide. Naie ucube Jusiañamui jofomo comini fecajamona, Jusiañamui duide. Jusiañamui Jitona cue illa jira, naimie jofa facaina naimie cuena ibatañede;

<sup>27</sup> iadedi Jusiañamui jofa ucube orainina coco icifellesa, ucubena jenuai. Joraimo aimajaitosa jai. Nano o olle lliciai fuena jibui. Nainomo ucubena baitio. Iena uanona, Jusiañamui jofomo coco facaina feca. —Pedro iena finode.

## 18

*Jesús ie llofueoicaigano moto imiçna ille rafue*

(Mr 9.33-37; Lc 9.46-48)

<sup>1</sup> Naie facaiseconi naimie dine ie llofueoicaigano jicanuaitimaci:

—Jusiañamui ie cominina sedajanomo ico cai ia, çbu cai moto imiçna ille?

<sup>2</sup> Iena cacajanona, Jesús daje urue uaiduanona, naimaci motomo jonete.

<sup>3</sup> Uai ote:

—Uanaicinona omoimo lloticue. Jusiañamui dibeimo omoi illena, jeacinona omoi faionocaiñena, bie urue isoi omoi moto imieñedimiena illanona, Jusiañamui sedajanomo iñeitomoi. Cue cominina omoi ia, bie urue isoi iitomoi.

<sup>4</sup> Bie urue isoi abi iedoñedimiedi Jusiañamui ie cominina sedajanomo imie moto naimiçna ille.

<sup>5</sup> Bie isoidimie cuemo duillamona, naimiçna feiñotimiedi cuena jai feiñote;

<sup>6</sup> iadedi cuena iñotimiena jeacinona finotaiacadimie iena finoñellena, jeacinona finotaiacadimie cimaiçmo aillue nofici maiçnana joraimo corobaillena, naimiçna dotacadena, cuemona mare.

*Jesúdi jeacinona fiñoñenana llofua rafue*

(Mr 9.42-48; Lc 17.1-2)

<sup>7</sup> Jesús llote:

—Ramo faitino duere sefuillesa. Diga ramo omoi faicana uitinomo riitomoi; iadedi Jusiañamui omoi ramo faitimiena duere finoite.

<sup>8-9</sup> Biena ñaiticue. Nie isoide rafue omoina jeacino finotaia, iena llinoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacino finodomoi. Omoi abina omoi namatañeniadedi, omoi onolli jaita. Omoi uisina juico. Iemona jeacinona finoñellena, Jusiañamui dine daje onolli diga, daje eilli diga, daje uisi diga riitomoi; ia jeacinona omoi finoia, iraimo jaitomoi. Omoi começina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iramo omoi jaiñellena, jeacino finoñeno.

*Jesúdi naimiçna iñotinomona damie faifillana jitañena rafue*

(Lc 15.3-7)

<sup>10</sup> Jesús llote:

—Urue isoi omoi illena como lloticue. Iena dane lloticue. Cue Moo naimacina uiñua jira, bie urue isoidinona jamaiñocaiñeno. Monamo cue Moo ecimo naimaci jaiçnisai jaca ite, naimacina canollena.

<sup>11</sup> Jusiañamuiçmona cue billanona, naimiçna iñoñedinona naimaci jeacinomona jilloitallena biticue.

<sup>12</sup> Ero, omoimo iena jiaie rafuedo lloticue. Damie mo cien diga toica llauda ite. Naiemona daje feiraite. Iena faifñellena, jiaie llaudaiaçna faionocaida, iena jenuaite.

<sup>13</sup> Iena baillanona, ieri iobite. Baillari oni jaiñedinori baifemo iobite.

<sup>14</sup> Ie isoide. Jusiañamui naimiçna iñotinomona damie faifillana jitañede. Ie jira naimacina jeacinona finotañeno.

*Jesús omoi ecimo itimie omoina jeare fiñuana llofua rafue*

(Lc 17.3)

<sup>15</sup> Jesús nia llote:

—O ecimo itimie ona jeare finoia, naimie dine iena lluai. Daimaiaçna iena omico llono. O uai naimie fairioia, naimie o dibeimo jai iite.

<sup>16</sup> O uai naimie fairioñenia, jiaie menamiēna uñño, o lluomo iaimaiaie cacareillesa.

<sup>17</sup> O uai naimie fairioñenia, omoi ofiracomo bicabitinomo iena llono. Naimaci uai naimie fairioñenia, Jusiñamuina iññoñedimiena omoi nabaiñena isoi, Moisés llogacínodo raise jaiñedino omoi nabaiñena isoi, naimiēna nabaiñeno. Omoi ofiracomo naimiēna feiñoñeno.

<sup>18</sup> Iese omoi finoia, omoi comeciaie daje isoi lloillamona, Jusiñamuimona mare.

<sup>19</sup> 'Omoimo nia lloiticue. Daje isoi comecina cue Moo Jusiñamuimo jicallena menamaiaie facajamona, cue Moomo iaimaiaie jianona, cue Moo iaimaiaie jitaill rafuena finoite.

<sup>20</sup> Menamie cue dibeimo illamona, damie amani cue dibeimo illamona, naimaci motomo iticue.

<sup>21</sup> Pedro naimiemo jicanuaibite:

—Nama, cue ecimo itimie cuena jeare finoia, ¿niga icaiño ibana cue ofñeno iena feitaiticue? Nibai siete digacaiño.

<sup>22</sup> Jesús dinena uai ote:

—“Nibai siete digacaiño” raitio. Ona jeare finodimie ie finoca rafuena naga icaiño feita. Iena omoi raise uññollena, bie rafuena lloiticue.

<sup>23-24</sup> 'Jusiñamui ie dibeimo itinona iese sedaite: Daje nairai illaimadi ie maijirainina uaidote, naimaci cuentas iballena. Damie eo debede. Diez mil ucubena debede.

<sup>25</sup> Naimie ucube iñena jira, naie illaimadi ie cuenta iballena, naimie ai, ie uruiaie diga, nana ie raruiaie diga, fecallena llote.

<sup>26</sup> Iena cacajano, ie illaima uicomo caññici ifodo raita duere jicade: “Nama, dama ite. Fecuisse omo ibaiticue”.

<sup>27</sup> Naimie duenailamona, naie illaima llote: “Ibatañeiticue. Cuemo jai debeñedio. Mai jai”.

<sup>28</sup> Te mei naimie jaide. Bai jaillanona, jiaie maijiraime diga dafaifide. Jai debeñedimie mo janore debede. Cien ucubena debede. Jai debeñedimie dinena ie cimaiona llinuana llote: “O debia cuemo mai iba”.

<sup>29</sup> Ie jira debedimie caññici ifodo ana rainadacaida, duere jicade: “Ucube cuemo iñede; iadedi cuena duenai. Fecuisse omo ibaiticue”.

<sup>30</sup> Uai ote: “Ja raire jitaidicue”. Naimiēna duenaiñena jira, cárcelmo naimiēna jonetade, ie cuenta iballe dinori.

<sup>31</sup> Naimie nabaiñiaie iena fidianona, sunaitimaci. Ie jira naimaci illaima dine nana naie rafuena lluidimaci.

<sup>32</sup> Naie illaimadi nano debedimiena abido uaiduano, naimiemo llote: “Maraiñedio. Navui o cuentana ibatañedicue, cuemo o duere jicanua jira.

<sup>33</sup> ¿Bue ñe o nabaina duenaiñedio, ona cue duenaila isoi?”

<sup>34</sup> Icirillamona, naie illaima naimiēna cárcelmo jonetade, nainomo duere sefullena, nana ie cuenta iballe dinori.

<sup>35</sup> Ie isoide. Cue Moo Jusiñamui omoina duere finoite, omoi comeciaie jitaillamona omoi ecimo itimie ie maraiñede finoca rafuena omoi feitañenia —llote.

## 19

*Jesús iima ie aina dotaja rafuena llofuia rafue*

*(Mr 10.1-12; Lc 16.18)*

<sup>1</sup> Ie llofueoicaigano diga Galileamona jaillanona, Jordán railla ille ruica dibeimo Judeamo Jesús jaide.

<sup>2</sup> Ailluena comini naimiēna racadimaci Nainomo duidinona jillotade.

<sup>3</sup> Naimiēna facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise ofñenia, naimiēna duere finoacadimaci. Jicanotimaci:

—¿Iima ie aina dotajana rairuidio? ¿Nie isoide rafue muidona damie ie aina dotarede?

<sup>4</sup> Jesús dinena uai ote:

—Moisés micori jaie cuete: “Enirue finua facaiseconi Jesiñamuidi come iaimaiaina finode. fimana finode. Riñona jiai finode”.

<sup>5</sup> Ie jira Jusiñamuidi jaie llote: “Ie ai diga illena, iima ie moona faimonocaite. Ie aina jiai faimonocaite. Ie ai diga illamona, menade comedi daamiēna jai jaide” llote.

<sup>6</sup> Menade come jai damiēna jai ite. Jusiñamui iese iaimaiaina itataja jira, iima ie aina dotañellesa. Riño ie inina dotañellesa.

<sup>7</sup> Dane jicanotimaci:

—¿Bue ñe Moisés micori cuete: “Iima ie aina dotaacania, dotalle rabena nano cueite. Ie mei naiñaiñona dotaite?”

<sup>8</sup> Jesús uai ote:

—Jusiñamui uaina raise omoi iñoñena jira, Moisés micori iima ie aina dotajana rairuiñede; iadedi nano dofoconi iese iñede.

<sup>9</sup> Jiaie riño diga naimie illena, ie aina bu dotaia, jiaie iima diga naiñaiño iñenia, naimiedi jeacina jai finode. Ie aina dotajana rairuidicue.

<sup>10</sup> Naimiemo ie llofueoicaigano dinena llotimaci:

–Iese ia, cai jitaillamona aina jamai cai dotanina jira, damamei ainidicai.

<sup>11</sup> Naimacimo Jesús llote:

–Nana comini omoi como llucinodo jainidimaci. Dani Jusiñamuina jitaicino iedo jairedimaci.

<sup>12</sup> Dajerie naimaci jeiciamona aireiacañedimaci. Dajerie naimaci abina diamona aireiacañedimaci. Dajerie Jusiñamuina eo sedaacanano aireiacañedimaci.

*Jesúdi naimie dine uruai jitailla rafue*

*(Mr 10.13-16; Lc 18.15-17)*

<sup>13</sup> Jesús dine comini naimaci jesanidena atisite. Ie onolli naimacimo naimie joniamona, naimaci facaina naimie Moo diga naimie ñaillena atisite. “Naimacina raise cano” ie Moomo llollena jitaicimaci. Ie llofueoicaigano iena rairuidimaci;

<sup>14</sup> iadedi Jesús raite:

–Uruai cue dine billesa. Naimacina rairuiño. Cuen a bie isoide innotinodi Jusiñamui ie cominina sedajanomo jainiaidimaci.

<sup>15</sup> Ie jira ie onolli naimacimo jonete. Naimie facaina Jusiñamui diga ñaite, naimaci marena illena. Ie mei ie llofueoicaigano diga naimie oni jaide.

*Ucuberedimie Jesús diga ñaia rafue*

*(Mr 10.17-31; Lc 18.18-30)*

<sup>16</sup> Jesús oni jaillanona, conirue Jesús dine bite. Jicanote:

–Maestro, Jusiñamui diga cue jaca illena, ¿nie isoide mare rafuena finoiticue?

<sup>17</sup> Jesús dinena uai ote:

–¿Bue ñe cuemo mare rafuena finuana jicanotio? Dama damie maremie. Naimiedi Jusiñamui. Naimiemo jicano; ia jaca o illena, Jusiñamui jai llogacinuaina inocana jai.

<sup>18</sup> Uai ote:

–¿Nie llogacinuaina inoiticue?

Jesús dinena uai ote:

–Comena meineño. O añede riño diga iño. Fñeño. Jiaimena o llogidoia, tainona lloño.

<sup>19</sup> O moo uaina ino. O ei uaina ino. O abina o isiruilla isoi, nana cominina isirui.

<sup>20</sup> Naie conirue uai ote:

–Nana iena jai inoiticue. ¿Nie isoide rafuena nia finoiticue?

<sup>21</sup> Jesús dinena uai ote:

–Jusiñamui jitaicacimodo o jaiacania, o raise marebicaiacania, omo ite raruiaina feca. Naie ucubena dueredinomo feca. Cuen a o inuamona, monamo ico jaca iitio. Cue llofuegamiena o illena, mai cue diga bi.

<sup>22</sup> Iena naimie cacajano, sunaite. Naimiemo eo ailluena ra illa jira, iena fecaañede.

<sup>23</sup> Jesús ie llofueoicaiganomo llote:

–Uanaicinona omoimo lloticue. Ucuberedimiedi Jusiñamui cominina jaillena eo sefuirite.

<sup>24</sup> Tena nia lloticue. Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jai raise jainide.

<sup>25</sup> Tena ie llofueoicaigano cacajano, Jusiñamui cominina ucuberedino raise jainina jira, “¿Niese dueredinodicaidi Jusiñamui cominina jaitica?” raillamo comeciaina facadimaci. Raijicaillanona, raitimaci:

–Nana comini rana jitailla jira, buca jillobiti.

<sup>26</sup> Naimacimo eruailanona, Jesús raite:

–Nana comini dani jillobinidimaci; iadedi Jusiñamuidi naimacina jillobitarede.

<sup>27</sup> Pedro uai ote:

–Ero, o llua isoi nana cai rana faionocaida, o diga jaicabidicai. ¿Niese Jusiñamuimona ibana feiñoiticai?

<sup>28</sup> Jesús dinena uai ote:

–Illaimana ico cue ia, eo ebirede illanomona cominina sedaiticue. Cue diga omoi jaicabilla jira, nainomo omoi illanuai jia iite, nainomona omoi juduai doce nairaiaina omoi sedallena.

<sup>29</sup> Cuen a naimie isiruillamona, ie jofona bu faionocaia, ie amatiaina bu faionocaia, ie miriñuaina bu faionocaia, ie moona bu faionocaia, ie eina bu faionocaia, ie uruiaina bu faionocaia, ie eniruena bu faionocaia, Jusiñamuimona ailluena ibana feiñoite. Monamo ico caimare iocire jaca iite. Nainomo benomo baifemo iocire caimare iite.

<sup>30</sup> Jamai bue isoidomoi. Omoimona jaino jamai bue isoifnedimaci; ia naimie cominina naimaci jaillamona, Jusiñamuimona naimaci diga daje isoidomoi. Naimie diga jaca iitomoi.

## 20

*Jesús Jusiñamui ie cominina sedaacana llua rafue*

<sup>1</sup> Jesús llote:

—Jusiñamui díbeimo comini jailla rafuena lloiticue. Naimie cominina naimaci jaillamona, Jusiñamuimona nana naimie comini daje isoidimaci. Iena raise omoi uiñollena, bie rafuedo iena lloiticue. Jitiramo daje patrón ie illimo maijillena, maijuuidinona jenuaide.

<sup>2</sup> Dajeriena baillanona, “Omoimo daberie ibaiticue” llote. “Jee” raitimaci. Ieconí ie illimo maijillena, naimacina orede.

<sup>3</sup> Jitoma nia oni daidemo, mercadomo naimie jainona ciode. Jamai itimaci.

<sup>4</sup> Ie jira naimacimo llote: “Cue illimo maijiai. Raise ibaiticue” llote.

<sup>5</sup> Ie mei jaidimaci. Jitoma naidai ia, jainona ciuanona, naimacimo maijillena llote. Jitoma oni caidemo, jainona ciuanona, naimacimo maijillena jiai llote.

<sup>6</sup> Jitoma jasici muido itemo, jainona ciuanona, jicanote: “¿Bue ñellena namonana jamai itomoi?”

<sup>7</sup> Uai otimaci: “Jaca caimo maijille rana budi lloñede”. Ie jira naimacimo llote: “Mai. Cue illimo maijiai” llote.

<sup>8</sup> Jitoma edacídemo, naie patrón ie mullaímamo llote: “Maijirainina uaido. Jinafona maijiaidinona raise nano iba. Ie mei jitiramo maijiaidinona jinafo iba” llote.

<sup>9</sup> Ie jira jinafona maijiaidinona nano ibade. Dabe ibade.

<sup>10</sup> “Naimaci baifemo feiñoiticaí” raillamo jitiramo maijiaidino comeciaina facadimaci; iadedi iese feiñoñedimaci. Nana daberie feiñoitimaci.

<sup>11</sup> Ie jira naie patrón joreñona jeare ñaitimaci:

<sup>12</sup> “Jinafona maijiaidino dallu maijidimaci. Ecasilla facaise maijiñedimaci; iadedi namonana maijidicai. Dani cai ibaja isoi ibadio” ñaitimaci.

<sup>13</sup> Naimacimona damiemo naie patrón llote: “Ero, ona jeare finoñedicue. ‘Omo daberie facaiticue’ omo lloticue. O dinena: ‘Jee’ raitio.

<sup>14</sup> O ucubena jai o feiñua jira, mai jai. Cue jitailla jira, da o ibaja isoi dallu maijidinona ibadicue.

<sup>15</sup> Cue ucubena jira, cue jitaille isoi cue ibaia, ¿ñiese cuena jeare ñaitomoi? Jiaionona cue duenaillanona, ¿bue ñellena uradoidomoi? Mai jai” llote. Jusiñamui ie cominina sedaacana omoi raise uiñollena, bie rafue jai lloticue.

<sup>16</sup> Jamai bue isoidomoi. Omoimona jaino jamai bue isoifnedimaci; ia naimie cominina naimaci jaillamona, Jusiñamuimona naimaci diga daje isoidomoi. Naimie diga jaca iitomoi.

*Jesús ie fiodaillena dane llua rafue*

(Mr 10.32-34; Lc 18.31-34)

<sup>17</sup> Jerusalémo ie llufueoicaigano diga Jesús jaidemo, dani naimaci diga ñaillena, naimacina oni uite.

<sup>18</sup> Raite:

—Ero, Jerusalémo jai jaidicai. Monamona billanona, iimana jaidicue; iadedi omoi illaicomini cuena gaitaitimaci. Gaitaja mei, cue meinellena lloitimaci.

<sup>19</sup> Judiuaiñedino illaicominimo cuena fecaitimaci. Cueri jifanoitimaci. Cuena faitimaci. Ie mei cuena coraitimaci; iadedi cue fiodailla mei, darui amani illanona, Jusiñamui cuena jillotaite.

*Jesús dine Jacobo Juan iaímaiaí ei billa rafue*

(Mr 10.35-45)

<sup>20</sup> Naie facaise Jesús dine Jacobo, Juan iaímaiaí ei diga, bitiaímaiaí. Iaímaiaí moodi Zebedeo. Jesús dine iaímaiaí ei rillanona, naimiena raise uaidollena, cañici ifodo ana rainadacaida llote:

—Omo daje rafue jicanoiacadicue.

<sup>21</sup> Naiñaiñoimo Jesús dinena jicanote:

—¿Bue ñiaibitio?

Naiñaiño uai ote:

—Illaímana o jailla mei, cue jito iaímaiaí o ecimo illana o lluaña jitaidicue. Damie o nabeimo. Jiaime o jarifebeimo. —Jaino baifemo iaímaiaí illena, naiñaiño iese llote.

<sup>22</sup> Naimacimo eruaiñanona, Jesús dinena uai ote:

—O jitaillacinona raise uiñoñedio. Cue duere sefuiticue.

Naiñaiño jito iaímaiaímo jicanote:

—¿Ie isoi duere sefuiacadomico?

Uai otiaiaimai:

—Jii.

<sup>23</sup> Jesús dinena raite:

—Cue isoi duere sefuitomico; iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

<sup>24</sup> Iena jiaie llofueoicaigano cacajano, naie iaiaimaiari iciritimaci.

<sup>25</sup> Jesús nana naimacina uaiduanona, raite:

—Nana illaicominidi naimaci anamo itinona ocuicabidimaci;

<sup>26</sup> iadedi omoi dine iese ifena. Omoimona bu imienna iacania, omoi mullaimana naimie jaisoillasa.

<sup>27</sup> Omoimona bu imienna iacania, omoina naimie canocana jaisoillasa.

<sup>28</sup> Cuemona fueo. Biñedicue cominina cue ocuillena; iadedi cominina canuaibidicue. Cue jitailla jira, nana comini facaina fioidaisabiticue. Naimaci jeacinomona naimaci jillobillena, fioidaisabiticue. Ailluena comini cuena inuamona jilloitimaci. Coninina omoi canua —lote.

*Jesús mena uisindiaimaiaina jillotaja rafue*

*(Mr 10.46-52; Lc 18.35-43)*

<sup>29</sup> Jericó railla nairaimona jaidimacimo, ailluena comini naimaci jinafona racadimaci.

<sup>30</sup> Ie facaiseconi mena uisindiaimaiai nai fuemo raidiaimaiai. Jesús naiedo jaillano cacajano, naimienna ado uaidotiaimaiai:

—David micori Jitona o illamona, Jusiñamui mona o billa jira, cocona duenai. Cocona cano.

<sup>31</sup> Iaimaiaia llicaillena, Jesús diga jaidino iaiaimaiaina lletade; iadedi eo cuirioidiaimaiai:

—Maestro, David micori Jitona o illamona, cocona duenai.

<sup>32</sup> Iaimaiaia Jesús cacajano, ieconi naidadajanona, iaiaimaiaina uaidote. Jicanote:

—¿Niese omiconona cue nibaiana jitaidomico?

<sup>33</sup> Uai otiaiaimai:

—Maestro, coco uisina o ciotajana jitaidicoco.

<sup>34</sup> Iaimaiaia duenaillanona, iaiaimai uisina jetade. Ieconi iaiaimai uisidi ciodo. Iaimaiaia jai ciuanona, ie llofueganona iaiaimai jaillena, Jesús diga jaidiaimaiai.

## 21

*Jesús illaia isoi Jerusalémo jailla rafue*

*(Mr 11.1-11; Lc 19.28-40; Jn 12.12-19)*

<sup>1</sup> Oni jaillanona, Jerusalémo iaieicaidimacimo, Betfagé railla nairaimo Jesús ie llofueoicaigano diga ridimaci. Olivos railla anedumo ite. Ie llofueoicaiganomona Jesús menamienna orede.

<sup>2</sup> Raite:

—Bie nairai illa uicomo mai omico jai. Nainomo cuinaca burrana baitomico. Ie ecimo ie uruena baitomico. Naie iaiaimaiaina suiñuano bene ati.

<sup>3</sup> Omicomo “¿Bue ñellena bie suiñodomico?” bu jicanoia, llono: “Coco Nama naie iaiaimaiaina jitaide. Nailli naimie iaiaimaiaina raire abido oretaita” —raite.

<sup>4</sup> Jusiñamui facaina lloraima micori jaie llua isoi, bie rafue suide.

<sup>5</sup> Naimie micori jaie cuete:

Jerusalén itinomo llono:

“Ero, omoi illaia omoina sedallena biite.

Abi iedoñeno biite.

Burra urue emododo naimie biite”

cuete.

<sup>6</sup> Iaimaiaia jaillanona, Jesús llua isoi finodiaimaiai.

<sup>7</sup> Burra ie urue diga atidiaimaiai. Burra urue emodomo naimie llofueoicaigano naimaci iniroina jobianona, ie emodomo Jesús rainadate.

<sup>8</sup> Naimienna iobitallena, illaia isoi naimie jaillena, ailluena comini imaci iniroi diga, naiso motomo jobedimaci. Jiaino raforono uanona, naiso motomo jobedimaci.

<sup>9</sup> Dajerie Jesús uicomo jaidimaci. Dajerie naimie jinafona jaidimaci. Ado cuiriisite:

—¿Cai Jilloitaraima billa! ¡Naimiedi David micori Jito! ¡Jusiñamui mamecido bitimie eo mare! ¡Jusiñamui caina jilloitajasa!

<sup>10</sup> Jerusalémo naimie ridemo, nana nainomo itino naie rafuena uifoiacaidimaci.

—¿Buta bite? —jicanotimaci.

<sup>11</sup> Jesús diga bitino dinena uai otimaci:

—Jesús bite. Naimiedi Jusiñamui facaina lloraima. Galileamo ite Nazaret imie.

*Jesúdi Jusiñamui jofomona damierena dotaja rafue*

(Mr 11.15-19; Lc 19.45-48; Jn 2.13-22)

<sup>12</sup> Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomo ite. Jusiñamui ofomaiaina fecallena, naimiemo toica llaudaiaina fecallena, nainomo comini jaisoidimaci. Naie cominina ibatajanona, ofomaiaina, toica llaudaiaia diga, damierie fecauidimaci. Iena Jesús cuanona, naimaci mesaiaina oni caicode. Ucugina fecauidino rairacuai jiai oni caicode.

<sup>13</sup> Naimacimo llote:

—Ie facaina lloraima Jusiñamui llogacino jaie cuega: “Cue jofo ite, nainomo cuemo comini jiiillena” cuega. Ero, ailluena omoi ibataja jira, naimie jofona fiiriruidino jofona omoi finoca.

<sup>14</sup> Ie facaise uisnidino Jusiñamui jofomo naimie dine bitimaci. Ñuja-ñujacaida macaritano jiai bitimaci. Naimaci billanona, Jesús naimacina jillotate.

<sup>15</sup> Nainomo Jesúdi diga mare rafuena finode. Diga cominina jillotate. Iena cuanona, nainomo ite uruiaia ado cuiriisite:

—David micori Jitori iobidicai. Jusiñamui lloraini micoriai jaie llua isoi, cai Jilloitaraima jai ite.

Iena cuanona, iena cacajanona, judíuai illaicomini iciritimaci.

<sup>16</sup> Naimiemo jicanotimaci:

—¿Bie uruiaia cuirillana cacadio?

Jesús dinena uai ote:

—Jii, cacadicue. David micori iena jaie cuete. ¿Niese iena cacaiñedomoi? Naimie cuete:

Naimiemo Jusiñamuidi uruiaina mare iobillacinona fecataite.

<sup>17</sup> Naimacina faionocaida, Betaniamo Jesús jaide, nainomo inillena.

*Jesús higuera railla riarana faidua rafue*

(Mr 11.12-14, 20-26)

<sup>18</sup> Ie areruido Jerusalémo abido ie llofueoicaigano diga Jesús bia, aimetaita.

<sup>19</sup> Nai fuemo higuera railla riarana cuanona, iena jibuide. Naiemo naie llisilladi iñede. Dama ie ibena ciode. Ie jira naie amenana llote:

—Biemona jaca llisiñeite. —Iese railla dacaiño naie riaradi duide.

<sup>20</sup> Ie llofueoicaigano iena cuanona, rajjicaillamona raitimaci:

—¿Niese naie riar raire duide?

<sup>21</sup> Jesús dinena uai ote:

—Uanaicinona omoimo lloiticue. Cue Moona raise omoi iñoia, bie isoide rafuena finoitomoi. Raise omoi iñoia, omoi comeci igireñenia, bene ite anedumo omoi lloia: “Monaillaimo o illena, benomona mai jai”, Jusiñamui o jitaille rana finoitte.

<sup>22</sup> Naimie iena finuana omoi iñuamona, nie isoide rafue cue Moomo omoi jicajia, iena naimie finoitte.

*Jesúdi ie siño uaina llua rafue*

(Mr 11.27-33; Lc 20.1-8)

<sup>23</sup> Jerusalémo rillanona, Jusiñamui jofomo Jesús fo jailla mei, nainomo ite cominina llofue. Judíuai illaicomini naimie dine billanona, jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

<sup>24</sup> Jesús dinena uai ote:

—Omoimo daje rafuena nano jicanoiticue. Raise omoi fairioia, omoimo cue uaido cue finoca rafuena lloiticue.

<sup>25</sup> Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori lluana iñiñedomoi?”

<sup>26</sup> “Comini” cai fairioia, bene itino caina nibai meineitimaci, Juan micoridi Jusiñamui facaina lloraima naimaci railla jira.

<sup>27</sup> Ie jira fairiotimaci:

—Uiñoñedicai.

Jesús dinena raite:

—Ie muidona cuemo nie isoide uai illana omoimo lloñeiticue.

*Jesúdi mena jito iaiaiaia illa llua rafue*

<sup>28</sup> Judíuai illaicominimo Jesús llote:

–Bie rafuemo omoi comeaiina faca. Damiemo mena jito ite. Nano doforamiemo llote: “Moo, cue illimo birui maijiai”.

<sup>29</sup> Uai ote: “Jaiacaiñedicue” llote. Dallu illanona, ie comecina dane facajano, maijiaide.

<sup>30</sup> Jiaie jitomo daje isoi llote. Naimie uai ote: “Jii, maijaiiticue” llote. Iese llote; iadedi maijiañede.

<sup>31</sup> ¿Nie jitoca ie moo jitailla rana finode? –jicanote.

Uai otimaci:

–Nano doforamie.

Jesús dinena naimacimo llote:

–Uanaicinona omoimo lloiticue. Omoina ñaiticue. Omoimona marañedicuaci; iadedi Jusiñamui cominina naimaci jaillamona, gobierno ucube oraini Jusiñamui illanomo iitimaci. Callirediñaiñuaidi nainomo jiai iitimaci; iadedi nainomo jaca iñeitomoi.

<sup>32</sup> Marena omoi comeaiina itatallena, Juan micorí navui bite; iadedi naimie micorína iñoñedomoi. Ucube oraini naimie micorí rafuena iñotimaci. Callirediñaiñuai naimie micorí rafuena iñotimaci. Iena uiñotomoi; iadedi omoi comeaii uaiillaina meidoñedomoi. Iñoñedomoi.

*Jesúdi marañede maijiraini rafuena llua rafue*

*(Mr 12.1-12; Lc 20.9-19)*

<sup>33</sup> Judíuai illai cominimo Jesús llote:

–Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jaiiruido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona jainomo fecade. Ie mei jiaie eniruemo jaide.

<sup>34</sup> Uvas jai einaiilla facaise riaraiaina sedaraini dine naie patrón janore mullaiaina orede, naimie facaise iedinona naimie feiñollena;

<sup>35</sup> iadedi naie sedarainidi ie mullaiaina duere finosite. Daje mullaimana fatimaci. Jiaimiena meinetimaci. Jiaimiena noficina fairinotimaci.

<sup>36</sup> Ie mei patrón jiaie mullaiaina orede. Naimacina jiai duere finodimaci.

<sup>37</sup> Ja muidomo ie jitona orede. “Cue jitona jaciruitimaci. Naimie uaina iñoitimaci” comecina facade.

<sup>38</sup> Riaraiaina sedaraini naimiena ciuanona, coniniri raitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” raitimaci.

<sup>39</sup> Naimiena jino dotajanona, naimiena meinetimaci.

<sup>40</sup> Naie illi nama ico abido bille mei, ¿nie isoide rafuena naimie naie illina sedarainina finoitoe? Cuemo llono –llote.

<sup>41</sup> Judíuai illai comini uai otimaci:

–Naie marañedinona dueruiñeno meineite. Ie mei jiaie cominimo naie illi fecaite, iena sedallena, naiemona riarana feiñollena.

<sup>42</sup> Naimacimo Jesús llote:

–Naie illi sedaraini isoidomoi. Jusiñamui facaina lloraima micorí omoina jaie cuete. Ie ciegafuena raise facañedomoi. Naimie micorí cueda:

Jofo finoraini jitaiñena noficidi nana naie jofomo ite nofici baifemo jai uaide.

Jusiñamui iena finotate.

Iena cai uiñuamona, “Eo mare” raiticai

cueda. Jusiñamui cominina damierie jaillana naimie micorí cuete. Jusiñamui oretagamiena damierie jitaiñenamona, naimie cominina jaiñeitimaci; iadedi Jusiñamui oretagamiena ail-luena iñuamona, naimie cominina jaitimaci. Ero, naimie micorí caina cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi.

<sup>43</sup> Jusiñamuidi ie cominina sedajanomo omoina itatañeite; iadedi jiaie cominina nainomo itataite, naimie jitailla rafuena naimaci finua jira.

<sup>44</sup> Jesús llote:

–Naie noficina dane ñaiticue. Noficimo bu eicaitaia, bofedaita; ia naie nofici bummo ana uai, naimiena saitaite. Ie isoide. Cue lluaana omoi jamaia, duere sefuitomoi. Iena omoi iñoñena, ja muidomo faifitomoi.

<sup>45</sup> Jesús lluaana naie judíuai illai comini cacajanona, naimiedi naimacina ñaiana jai uiñotimaci.

<sup>46</sup> Icirillamona, naimiena gaitaacadimaci; iadedi cominina jaciruitimaci, cominidi naimie Jusiñamui facaina lloraimana raillanona.

## 22

*Jesúdi illaíma ie jito aina ua llua rafue*

<sup>1</sup> Jusiñamui jofomo Jesús nia illanona, nainomo itinona llofuede:

<sup>2</sup> —Jusiñamui díbeimo comini jailla rafuena omoimo lloiticue. Iena omoi uifollena, bie rafuedo iena lloiticue. Illaímadí ie jito aí ua rafue finode.

<sup>3</sup> Naimie ie mullaini orede, rafuemo llogano uaidollena; iadedi nai llogano bia-caíñedimaci.

<sup>4</sup> Dane jiaie mullaini oretajano llote: “Nai lloganomo llono: ‘Rafue guille jai finocasa. Firetaíai, farediretaíai diga, jai faga. Jai nana fuite. Rafuemo mai bi’ ”.

<sup>5</sup> Naimaci cacarefiacaíñede. Damie ie illimo jaide. Jiaimie ie chinganamo jaide.

<sup>6</sup> Jiaino mullainina gaitadimaci. Gaitajanona naimaciri jifanotimaci. Ja muidomo naimacina meinetimaci.

<sup>7</sup> Ie jira naie illaíma eo icirite. Naimie soldaduai oretate, naimie mullaini meinetinona meinellena. Naimie naimaci illano jobaitate.

<sup>8</sup> Ie meinoconi ie fiebide mullainimo llote: “Rafue guille jai nana finoca; ia llogano maraiñedimaci.

<sup>9</sup> Naiso bojicaillanomo jai. Nana o ciolle diese llono: ‘Rafuemo bi’ llono”.

<sup>10</sup> Ie jira ie mullaini jai naisona jaide. Maraiñedino baillanona diese ofitatimaci. Jiai maredino diese ofitatimaci. Rafue finua jofo naie llogano diga oruide. Illaíma nainomo fecaca iniroina jitadimaci.

<sup>11</sup> Illaíma fo bia, mesamo itino jibuillena, dinomo daje íima rafue ie mare iniroina jitañenana ciode.

<sup>12</sup> Naimiemo jicanote: “Nabai, ¿niese bene rafue ie mare iniroina jitañeno bitio?” jicanote. Naimie uainicaide.

<sup>13</sup> Ie jira naie illaíma ie mullaíaimo llote: “Naimie cuena inoñena jira, naimie onolli dajemo nitaicaida maino. Ie eilina daje isoi maino. Cuemona naimie jino dota. Nainomo itino diga duere sefuite. Jiai sunaite” llote.

<sup>14</sup> Ero, naie rafuemono omoi fueo. Illaíma ailluena uaidote; ia nana biñedimaci. Ie isoide. Jusiñamui ailluena cominina uaidote; iadedi naimacimona janore fetode.

*Jesúmo gobiernomo ucubena fecajana jicanua rafue*  
(Mr 12.13-17; Lc 20.20-26)

<sup>15</sup> Naimacimo Jesús llua mei, fariseuai comini abido jaillanona, coniniri siadotimaci. Naimie raise uai oñedena, naimiena duere finollena, Jesúsna facaciacadimaci.

<sup>16</sup> Ie jira naimie dine naimaci cominimona dajerie oredimaci. Herodianuai railla cominina jiai jaidimaci. Jesús dine rillanona, raitimaci:

—Maestro, uanaicinona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio.

<sup>17</sup> Omo rafuena jicanoíacadicai. Dani Jusiñamuina sedadicaí; iadedi romanos railla nairai anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono —lloitimaci.

<sup>18</sup> Naimaci comeciaina maraiñedicinona facajana Jesús uifuaomona, uai ote:

—¿Bue ñellena cuena facacitomoí? Maredinona abi caitadomoi.

<sup>19</sup> Ucube cuemo acata —llote. Ie jira acatatimaci.

<sup>20</sup> Jesús dinena jicanote:

—¿Bu ie joreño nainomo ite? ¿Bumo jainaiáide bie cuega radi?

<sup>21</sup> Uai otimaci:

—César.

Jesús dinena raite:

—César iena itedi Césarmo ille. Jusiñamui iena itedi Jusiñamuimo ille —raite.

<sup>22</sup> Naimie lluaana cacajano, rajicaidimaci. Naimie jeare uai oñena jira, naimie dinomona oni jaidimaci.

*Jesús dine saduceuai railla comini billa rafue*  
(Mr 12.18-27; Lc 20.27-40)

<sup>23</sup> Naie faaise saduceuai railla comini naimie dine bitimaci. Fiodaillamona jaca buna jilloñellena inotimaci. Jesúmo lloitimaci:

<sup>24</sup> —Maestro, Moisés micori jaie cuega: “Íima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega.

<sup>25</sup> Ero, cai motomo siete amatiai ite. Nano doforamie ie aina ote. Naimie nia uruiainide fiodailla. Ie emodo imie ie ama feciñoona ote. Uruiainide jiai fiodailla.

<sup>26</sup> Naie siete digamiedemona iese sefuide.



<sup>27</sup> Ja muidomo naie riño jiai fiodaite.

<sup>28</sup> Fiodaillamona, ico naimaci jilloiadedi, ¿bu naie riño ienite? Naiñaño siete digamiena inirede –lloimaci.

<sup>29</sup> Jesús uai ote:

–Moisés micori cuegafuaina raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi.

<sup>30</sup> Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisai ainidimaci. Ininidimaci. Ie isoi iitimaci.

<sup>31</sup> Fiodaitino jilluana omoimo lloiticue. Jusiñamui omoi jaiagaimo jaie llogacinona inoñedomoi. Naimie llote:

<sup>32</sup> “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. Jai fiodaitimaci; ia naimaci joreñuai nia itimaci. Jusiñamuidi dani cagedino imaci Jusiñamuina jira, naimaci joreñuai naimie dine itimaci. Ico naimaci abiaina jiai jillotaite –llote.

<sup>33</sup> Nainomo ite comini iena cacajano, naimie llofuari rajicaidimaci; ia saduceuai dinena uainicaidimaci.

*Jesús nanoca llogacinona llofuia rafue*

*(Mr 12.28-34)*

<sup>34</sup> Saduceuai comini uainicaillana fariseuai jai fidiano, Jesús dine ofidimaci.

<sup>35</sup> Naimacimona damiedi Moisés micori jaie llogacinona eo uiñote. Jesúna facacillena, naimiemo jicanote:

<sup>36</sup> –Maestro, Moisés micori jaie llogacinuaimona, ¿nie llogacino ua nanoca llogacinona?

<sup>37</sup> Jesús dinena uai ote:

–Moisés micori jaie cuega: “Omoi jitailla jira, nana omoi comecimona cai Nama Jusiñamuina isirui. Naimiemo omoi comecina eo faca”.

<sup>38</sup> Bie ua nanoca llogacino.

<sup>39</sup> Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”.

<sup>40</sup> Bie mena llogacinomona nana jaie llogacinuai comuide. Nana Moisés micori llogacinuai naiemona comuide. Nana Jusiñamui facaina lloraini micoriai llogacinuai naiemona comuide –llote.

*Jesús dinena fariseuai cominimo jicanua rafue*

*(Mr 12.35-37; Lc 20.41-44)*

<sup>41</sup> Naimie dine nia fariseuai comini ia, Jesús naimacimo llote:

<sup>42</sup> –Jusiñamui lloraini micoriai jaie raitimaci: “Jusiñamuidi Cristo raillamiena oretaite, ie cominina sedallena”. ¿Niese naimiena raitomoi? ¿Bu jito naimiedi?

Uai otimaci:

–David micori jito. David micori isoi Cristo ie cominina sedaite.

<sup>43</sup> Jesús dinena jicanote:

–Naimiedi David micori isoidena, ¿bue ñellena David micori “Cristodi cue Nama” llote? Jusiñamui Joreñodi David micori ñaitatajanona, David micori llote:

<sup>44</sup> Jusiñamuidi cue Namamo llote:

“Illaimana o illamona, cue nabei dine ana rai.

Ona inoñedino o anamo itataiticue”.

<sup>45</sup> “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi jamai David micori jitoñede; ia jiai ie Nama.

<sup>46</sup> Uaina onidimaci. Naie facaisemona Jesús ie uaina dane uaitañedimaci.

## 23

*Jesúdi judiui illaicominina ñaia rafue*

*(Mr 12.38-40; Lc 11.37-54; 20.45-47)*

<sup>1</sup> Jusiñamui jofomo Jesús nia illanona, naimie dine ailluena comini bitimaci. Ie llofueoicaigano nainomo jiai illanona, nana naimacimo llote:

<sup>2</sup> –Moisés micori llogacinuaina llofueraididi naie rafuedo jai jaicabidimaci. Fariseuai comini iedo jiai jaicabidimaci.

<sup>3</sup> Naimaci llofuacinodo omoi jai. Naimaci llofuiana omoi cacarefi; iadedi naimaci illa isoi omoi iñeno, naimaci llofuacinodo naimaci jaiñena jira.

<sup>4</sup> Omoi einamaci llogacinuaido raise omoi jaillena, diga rafuena omoi finuana jitauidimaci; iadedi iedo omoi jaillena, omoina jaca canoñedimaci. “Jusiñamuina eo raise sedadica!” comecina facadimaci. Temo naimaci comecina facajamona,

<sup>5</sup> iena omoi cioillena, nana naimaci finua rafuena marefodo finodimaci. Jiaie cominimo ite Jusiñamuimo jiarabe baifemo faitibena uiacacabidimaci. Iniroi fuedadi aillofena jonegana gaidimaci.

<sup>6</sup> Rafue ia, naimaci jamai bue isoifedimomo comecina facajanona, rafue nama ecimo raiaacadimaci. Ofiracomo uicomo raiaacadimaci, comini naimaciri acarillena.

<sup>7</sup> Nine naimaci jai, nana comini naimacina uaiduana gaidimaci. Maestrodicinona uaiduana jiai gaidimaci.

<sup>8</sup> Jusiñamuina eo raise naimaci sedajana omoi uiñuana jitaidimaci. Naimaci isoi iñeno. Omoi damacina jira, omoimona damie omoi baifemo faiamo comecina facañeno. Naimiena maestriona raiñeno. Omoi baifemo cue illanona, omoi maestrodicue.

<sup>9</sup> Omoi Moo Jusiñamui monamo illanona, dama naimiena seda. Jiaimiena sedañeno. Jusiñamui isoi jiaimiena “Moo” raiñeno.

<sup>10</sup> Omoi damacina jira, omoimona damiena “Cai illaima” raiñeno. Omoi illaimana jai iticue.

<sup>11</sup> Omoimona bu imiena jaiacania, omoi mullaimana naimie nano jaillamona, omoina naimie canua.

<sup>12</sup> Jusiñamuidi “Jiaino afemo iticue” raillano comecina facadimiena jamai bue isoidimiena itataite; ia Jusiñamuidi “Jiaino afemo iñedicue” raillano comecina facadimiena jamai bue isoifedimiena itataite.

<sup>13</sup> Naie facaise Moisés micori llogacinona llofuerañidi fariseuai comini diga illanona, Jesús naimacimo llote:

–Jusiñamui omoina duere finoite. Mareuidinona abi caitadinomoi. Jusiñamui dibeimo comini illana jitaiñedomoi. Naimie dibeimo omoi illana jiai jitaiñedomoi. Ie muidona Jusiñamuimona duere sefuitomoi.

<sup>14</sup> “Jusiñamuina eo sedadimaci” omoimo comini comeciaina facajana jitaidomoi. Ie jira are jiidomoi; iadedi iese iñedomoi. Maraiñede rafuena finocabidomoi. Jifuianova feciñuai rana bairocabidomoi. Ie jira Jusiñamui omoina eo duere finoite.

<sup>15</sup> Damiena omoi dibeimo itatallena, omoi isoi Jusiñamui rafuedo naimie jaillena, diga rafuena finodomoi. Omoi dibeimo illa mei, omoi baifemo omoi einamaci llogacinodo naimie jaillana jitaidomoi. Omoi diga ico naimie ua faifite. Cominina uanaiñedicinodo jaitatomi. Iese omoi illa jira, duere sefuitomoi.

<sup>16</sup> Omoi llofuiacino diga cominina canoñedomoi. Mareuidinona abi caitadinomoi. Raicabitomoi: “Cai lloga uai cai finollena jiai comini uiñollena, Jusiñamui jofomo ite oro mamecina llinotica; iadedi Jusiñamui jofu mamecina cai llinoia, cai lloga uaina cai finoñena, caimona mare. Jusiñamuimona duere sefuiñeitica;” raicabitomoi.

<sup>17</sup> Abi uiñoñedomoi. Omoi llofuiacino diga cominina canoñedomoi. Jusiñamui jofomo naie oro jainaiilla jira, naie orodi mare; iadedi naie oro naie jofu baifemo uaiñede. Abina omoi uiñoñena jira, Jusiñamui omoina duere finoite.

<sup>18</sup> Jiai raitomoi: “Jusiñamuimo faga toica ocaina jobaisoillano mamecina cai llinoia, cai lloga uaina cai finoñena, caimona mare; iadedi Jusiñamuimo fecaca toica ocaina mamecina cai llinoia, cai lloga uaina jaca finoitica;”.

<sup>19</sup> Abi uiñoñedomoi. Omoi llofuiacino diga cominina canoñedomoi. Naie jobaisoillanomo naie ocaina illa jira, naie ocaina mare; iadedi naie ocaina naie jobaisoillano baifemo uaiñede.

<sup>20</sup> Ero, Jusiñamuimo ocaina jobaisoillano mamecina omoi llinoia, nainomo ite ocaina mamecina jiai llinotomoi.

<sup>21</sup> Jusiñamui jofu mamecina omoi llinoia, Jusiñamui nainomo illa jira, naimie mamecina jiai llinotomoi.

<sup>22</sup> Monamo ite ra mamecina omoi llinoia, Jusiñamui illano nainomo illa jira, nainomona cominina naimie sedaja jira, naimie mamecina jiai llinotomoi. Omoi llua rafuena omoi finoñena, Jusiñamui omoina duere finoite.

<sup>23</sup> Mareuidinona abi caitadinona omoi illamona, omoimo nia lloiticue. Nana omoi illimo ite ramona, nana omoimo ite ucubemona Jusiñamuimo janore jisa fecacabidomoi. Nana comini omoi isoi illena jitaidomoi. Mare; iadedi nanoca rafuena jaca finoñedomoi. Jiaie cominimo omoi comecina facañedomoi. Jiaie cominina duenaiñedomoi. Omoi lloga uaina finoñedomoi. Nana naie isoide rafuena omoi jiai finua. Iena omoi finoñena, Jusiñamui omoina duere finoite.

<sup>24</sup> Abina uiñoñedomoi. Jallecima jiroracomo ia, iena oni faiga; ia aillue ra nainomo ia, iena cioñeno namo gutadomoi. Ie isoide. Omoi llofuiacino diga cominina canoñedomoi. Jusiñamui ie eo jitaila rafuedo comini jaillana llofueñedomoi. Nanocafueñededo comini jailla rafuena llofuetomoi. Nanoca rafuedo comini jaillana llofueñedomoi.

<sup>25</sup> 'Omoimo nia lloiticue. Omoi einamací llogacínodo eo jaidomoi; iadedi omoi comeciaina raise finoñedomoi. Eo fiidomoi. Jifuianona comini rana bairodomoi. Jeacinona finocana jaidomoi.

<sup>26</sup> Abina uiñoñedomoi. Da pocillos jinafo, da platos jinafo jocodino isoidomoi. Pocillos jerai, platos jerai jocoñedino isoidomoi. Omoi abina finodomoi; iadedi omoi comeciaina raise finoñedomoi. Nano omoi comecina raise fino. Mare rafue finocana jai. Omoi einamací rafuemo comecina facañeno; ia Jusiñamui rafuemo comecina faca. Iese omoi jaiñenia, Jusiñamui omoína duere finoite.

<sup>27</sup> 'Omoimo nia lloiticue. Marena finoca raiafo isoidomoi. Jinofe marena eruaide; iadedi nainomo mare ra iñede. Comini illaici jamai ite. Jai maraiñede.

<sup>28</sup> Ie isoidomoi. Marena eruaidomoi; iadedi maredinona abi eo caitadomoi. Omoi comeciai eo maraisiñede. Omoi comecina raise omoi finoñenia, Jusiñamui omoína duere finoite.

<sup>29</sup> 'Omoimo nia lloiticue. Naimacimo birui omoi comeciaina raise facallena, Jusiñamui facaina lloraini micoriai raiafona marena eruaillena finodomoi. Mareuidino micoriai raiafo emodo marena eruaillena finodomoi,

<sup>30</sup> raillano: "Cai jaiagai Jusiñamui facaina lloraini micoriaina meinetimaci. Naie facaiseconi iticaidena, naimaci isoi finoñedicaí. Cai jaiagai isoi birui iñedicaí?" raitomoi;

<sup>31</sup> iadedi omoi llumona Jusiñamui facaina lloraini micoriai meinetinó uruiai omoína uiñoticaí.

<sup>32</sup> Omoi jitailla jira, omoi jaiagai isoi jeacinona eo finocana mai jai. Naimaci jai taineca rafuena mai omoi finocana jai.

<sup>33</sup> Omoi maraiñena jira, jaió nairai isoidomoi. Ja muidomo iraimona jillobiñeitomoi. Nainomo duere sefuitomoi.

<sup>34</sup> Cue rafuena llolena, cue facaina llorainina omoi dine oretaiticue. Cue rafuena eo uiñotinona omoi dine oretaiticue. Cue rafuena omoi raise uiñollena, llofueraini omoi dine jiai oretaiticue. Dajeriena meineitomoi. Naimacina coraiitomoi. Omoi ofracomo dajeriena faitomoi. Diga nairaimo naimacina duere finoitomoi.

<sup>35</sup> Abel micori jaié ite. Naimie maremie. Ie ama naimiena meinete. Naimie facaise-mona omoi jaiagai ailluena mare cominina meinetimaci. Ie mei omoi jaiagai Zacaríana meinetimaci. Naimiedi Berequias jito. Jusiñamui jofomo Jusiñamuimo toica ocaina jobaisoil-lano ecimo naimiena meinetimaci.

<sup>36</sup> Uanaicino omoimo lloiticue. Naimacina omoi jaiagai meinia muidona, omoimona Jusiñamui birui ibana oite. Naimaci isoi maraiñede rafuena finocana jaidomoi. Jusiñamui omoína duere finoite.

*Jesús Jerusalémo itinomo llua rafue  
(Lc 13.34-35)*

<sup>37</sup> Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaié meinetomoi. Naimie omoi dine oretaganona noficina fairinuano, naimacina meinetomoi. Omoína cue sedallena, atava ie uruiai sedaja isoi, diga icaiño cue anamo omoína uaidoia-cadicue; iadedi omoi dinena cuena jitañedomoi.

<sup>38</sup> Jemona Jusiñamuidi omoi illanona jai fainonocaide.

<sup>39</sup> Cue Moo dine jaiticue. Cue jailla mei, cuena cioñeitomoi. Ico abido cue bia, omoi comini cuena lloitimaci: "Jusiñamui oretaganmie eo mare. Naimiedi cai Nama" lloitimaci

## 24

*Jesúdi Jerusalémo ite Jusiñamui jofó judaiana llua rafue  
(Mr 13.3-23; Lc 17.22-24; 21.5-24)*

<sup>1</sup> Jusiñamui jofomona ie llofueoicaigano diga Jesús jino jaidemo, Jesúsna nai jofona eruaitatimaci.

<sup>2</sup> Jesús dinena llote:

—Bie jofona ciodomoi. Uanaicinona omoimo lloiticue. Nana bie jofomo ite noficiai ico judaisite —llote.

<sup>3</sup> Ie mei Olivos railla anedu dine rillanona, Jesús naie muidomo raidemo, ie llo-fueoicaigano naimiemo iena anado llotimaci:

—Jusiñamui jofó judaiana omo jicanoiacadicaí. ¿Niruido iena suite? Caimo llono. O abido billirui iaírei ía, ¿nie isoide rafue suite, o abido billiruina cai uiñollena?

<sup>4</sup> Uai ote:

—Omoína bie rafuena bu jifueñellena, omoi abina rairui.

<sup>5</sup> Ailluena comini cue mamecido billanona: “Cristodicue” raitimaci. Diga cominina jifueitimaci. Iemona omoi abina rairui.

<sup>6</sup> Jobaimia illena fidiitomo; iadedi jaciruiñeno. Iese suite; iadedi abido nia biñeiticue.

<sup>7</sup> Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo comini aime guitimaci. Diga illanuaimo ñuisañuai suite.

<sup>8</sup> Iese suia, omoi duere sefuillifue omoimo suite.

<sup>9</sup> Cuen a ñnoñedino omoina gaitatajanona, omoina meineitimaci. Cue cominina omoi illamona, nana nairaiia omoina enoitimaci.

<sup>10</sup> Naie facaise cue dibeimo itinomona ailluena abido danomo jaitimaci. Iemona duere omoi sefuillena, omoina janoñeitimaci; iadedi omoina enoillamona, omoina llogidoitimaci.

<sup>11</sup> Naie facaise diga comini raitimaci: “Jusiñamui facaina llorainidicai”; iadedi Jusiñamui facaina llorainifedimaci. Uanaicinona lloñeitimaci. Diga comini naimaci dibeimo itaitimaci.

<sup>12</sup> Jeacino eo comuicana jailla jira, ailluena comini conini isiruiñeitimaci;

<sup>13</sup> iadedi cuena fañonocañedimie ja muidomo monamo jaca iite. Naimie jillotaiticue.

<sup>14</sup> Diga cominidi Jusiñamui dibeimo comini ille rafuena nana nairaimo lloitimaci, nana nairaiia iena cacaillena. Ie mei abido biiticue.

<sup>15</sup> Cue luamo cacarei. Daniel micori Jusiñamui facaina lloraima. Naimie micoridi jiaimie jearede rafue finollena jiae llote. Naie rafue suia, Jusiñamui jofomo Jusiñamuina sedañeitimoi. Nainomo naie jearede rafue finuana omoi ciuanona,

<sup>16</sup> naiemona omoi jillobillena, duere omoi sefuiñellena, Judeamo omoi illamona, aneduai dine omoi aisi.

<sup>17</sup> Jofo emodomo omoi ia, ana billanona, aneduai dine raire rillena, jofomo jaiñeno. Nainomo ite rana omoi diga uiñeno.

<sup>18</sup> Aneduai dine raire rillena, illimo omoi ia, abido jofomo biñeno, omoi iniroi omoi diga uillena.

<sup>19</sup> Naie rafuemon a jillobillena, naie facaise urueside riño duere sefuite. Uruena nia jirode riñodi jiai duere sefuite.

<sup>20</sup> Eo duere sefuiñellena, Jusiñamuimo omoi jicano, rollime facaiseconi bie rafue suiñellena. Moisés micori sábadomo are jaillana jiae rairuide. Sábadoruimo bie rafue suiñellena, Jusiñamuimo jicano.

<sup>21</sup> Naie facaise comini eo duere sefuitimaci. Enirue finua facaise mona iese comini nia duere sefuiñedimaci. Ico iese eo duere sefuiñeitimaci.

<sup>22</sup> Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

<sup>23</sup> Ie facaise omoimo bu raia: “Jai, Jusiñamui facaina lloraima benomo birui bairedo. Naimiedi Cristo”, iena ñnoñeno. Jiaimie raia: “Oni batine Cristo birui bairedo”, iena ññoñeno.

<sup>24</sup> Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci.

<sup>25</sup> Ero, bie rafue nia suiñenia, iena omoimo jai lloticue.

<sup>26</sup> Omoimo naimaci raia: “Ero, batine jofue iñenanomo Cristodi ite”, nainomo jaiñeno. Naimaci raia: “Ero, bene bie jofomo Cristo ite”, iena ñnoñeno.

<sup>27</sup> Mona borillamona mona jillacidi usere ciode. Nana cominimo bairedo. Ie isoide. Cue abido bia, nana comini iena uiñoitimaci.

<sup>28</sup> Urujaisai rifaide ramo ofillana uiñua isoi, nana cuena ñnotino cue billena uiñoitimaci.

*Jesús abido ie bille rafue*

*(Mr 13.24-37; Lc 17.26-30, 34-36; 21.25-33)*

<sup>29</sup> Jesús llote:

—Naie duere sefuilla facaise meinoconi jitoma lligaiñoñeite. Fivui jiai lligaiñoñeite. Monamona ucuai llujite. Nana naie radi jaidisite.

<sup>30</sup> Ie mei monamo baireiticue. Iecon nana nairaiia jarire iitimaci. Jacinaitimaci. Uillie motodo cue billena cioitimaci. Ebire biiticue. Naimacina cue sedallena, illaimana biiticue.

<sup>31</sup> Cue jaienisaina cue ecimona oretaiticue. Ado trompeta ficiretajano, cue fetocano diese naganomona ofitaitimaci.

<sup>32</sup> Higuera railla riaromona omoi fueo. Bie eniruomo naie riaru firuillamona, fiemona raire illana uiñotomoi.

<sup>33</sup> Ie isoide. Bie rafue ico suia, cue billirui iairei illena uiñoitimoi.

<sup>34</sup> Uanaicinona omoimo lloiticue. Nana bie rafue suille facaiseconi bie nairai nia iite.

<sup>35</sup> Mona enirue diga fuite; iadedi cue lloga uai jaca suite.

<sup>36</sup> Cue abido billirui jaca bu uiñoñede. Jusiñamui jaienisa iena uiñoñedimaci. Jusiñamui Jitodicue; iadedi cue abido billiruina jiai uiñoñedicue. Dama cue Moo iena uiñote.

<sup>37</sup> Abido cue billirui iairei ia, Noé micori facaiseconi itino isoi comini iitimaci. Naimaci duere sefuillemo Noé micori facaise itinodi comeciaina facañedimaci.

<sup>38</sup> Naie facaiseconi nia eo noci deiñenia. Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori.

<sup>39</sup> Nia noci deiñenia, Noé micori lloga uaina inoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue.

<sup>40</sup> Naie facaiseconi menamie illimo danomo iitiaiamaiai. Damie Jusiñamui dine jaite. Jiaimie fiebillanona, Jusiñamuimona duere sefuite.

<sup>41</sup> Mena riño danomo doberitiaifuai. Dañaiño Jusiñamui dine jaite. Jiañaiño fiebillanona, Jusiñamuimona duere sefuite.

<sup>42</sup> Cue billirui omoi uiñoñena jira, iemo ocuiri.

<sup>43</sup> Bie rafuemo omoi comeciaina omoi faca. Jofu namadi firiraima nie naiona billena uiñotena, ie rana faifñellena, ie jofona raise sedade.

<sup>44</sup> Ie isoi cue billemo ocuiri. Monamona ico abido biiticue. Omoi ocuiriñena facaisemo riiticue. Ie jira cue billemo nagarui ocuiri.

*Jesúdi patrón ie mullaimana ie jofona sedataja llua rafue*

*(Lc 12,41-48)*

<sup>45</sup> Jesús llote:

—Cue billena omoi raise cacaillena, jiae rafuedo iena lloiticue. Patrón daje mullaimana ie jofona sedatate. Naie mullaimana inogamie. Abina uiñotimie. Nainomo itinona raise ecacabide. Naie mullaimana ie jofona sedataja mei, naie patrón oni jaide.

<sup>46</sup> Patrón ico abido bia, ie jofona ie mullaima raise sedaia, mullaimari naimie iobillanona, ie mullaima marena iite.

<sup>47</sup> Iobillanona, patrón ie mullaimana nana ie raruiaina sedatataite;

<sup>48</sup> iadedi ie mullaima marañenia, ie comecina facaite: “Cue patrón are biñeite. Naimie lloga uaina finoñeticue”.

<sup>49</sup> Ie comecina iese facaja jira, naimie anamo ite mullaiana faite. Ie jitaiilla rafue finuamona, jifairuidino diga jirocabite. Naimacina nabaillanona, naimaci diga guite. Naimaci isoi jearede rafuena finoite.

<sup>50</sup> Ie ocuiriñena facaise ie patrón abido billanona, naimiena duere finoite.

<sup>51</sup> Ie isoide. Cue abido bia, cuena inotinori iobiticue; ia cuena inotinona abi caitadino dine cuena inoñedinona dotaiticue. Nainomo duere sefuillano eetimaci.

## 25

*Jesúdi diez jitaiñuaina llua rafue*

<sup>1</sup> Jesús llote:

—Abido cue bia, Jusiñamui ie cominina sedaite. Cue billemo ocuiritinona sedaite. Naie facaise ite cominidi diez jitaiñuaimo ite rafue isoidimaci. Naiñaiñuailampariniai llinuanona, iima ie aina ua meinomo finoca rafuemo jaiacadimaci.

<sup>2-4</sup> Lampariniai unellena, farena naiñaiñuai uilla jira, cinco diga abina uiñotimaci. Farena naiñaiñuai uiñena jira, cinco diga abina uiñoñedimaci.

<sup>5</sup> Iima diga ie rafue dine jaiillemo ocuiritimaci. Iima are biñena jira, inidimaci.

<sup>6</sup> Daje diberuse damie ado lluana cacadimaci. Llote: “Jadi, naie iimadi jai bite. Mai bi, naimie uicomo naimiemo cai dafaiñillesa”.

<sup>7</sup> Casillanona, naie jitaiñuailampariniai unedimaci.

<sup>8</sup> Abi uiñoñediñaiñuai dinena abi uiñotiñaiñuaimo jicadimaci: “Farena caimo feca. Cai lampariniai boacañedesas”.

<sup>9</sup> Uai otimaci: “Fecaacañedicai. Omoimo cai fecaiadedi, caimo baiñeite. Omoi jitaia, chinganomo ibajai”.

<sup>10</sup> Naiñaiñuai ibajaiilla mei, naie iima ride. Naimiemo ocuiriñaiñuai diese naimie diga nainomo guillena, rafuemo jaidimaci. Naimaci fo jailla mei, nase naie iima ibaide.

<sup>11</sup> Ie mei naie farena ibajaiñaiñuai abido billano, raitimaci: “Nase econo”.

<sup>12</sup> Naie iima uai ote: “Uanaicnona omoimo lloiticue. Omoina uiñoñedicue. Econoñeticue”.

<sup>13</sup> Ie isoide. Cue billiruina omoi uiñoñena jira, nagarui cuemo omoi ocuiri.

*Jesúdi patrón ie mullaiaimo ucubena fecaja llua rafue*

<sup>14</sup> Jesús llote:

—Abido cue bia, Jesiñamui ie cominina sedaite. Naie facaise ite comini daje patrómo ite rafue isoude. Patrón jiaie enirue jaiacana jira, ie mullaiaia ie ucubena eenotade.

<sup>15</sup> Damie mo cinco diga ucubena fecade. Jiaimie mo menacubena fecade. Jiaimie mo dacubena fecade. Nagamie ie maijille dinori fecade. Ie mei oni jaide.

<sup>16</sup> Cinco diga ucubena feiñotimie jaillanona, iena fecallena, rana ibade. Iemona jiaie cinco diga ucubena ote.

<sup>17</sup> Menacubena feiñotimie iena fecallena, rana ibade. Iemona jiaie menacubena ote.

<sup>18</sup> Dacubena feiñotimie eniruemo naie ucube eenote. Iena fecallena, rana ibañede. Iemona buena oñede.

<sup>19</sup> Digarui illanona, naie patrón abido bite. Naimaci cuentas siadollena, ie mullaiaia uaidote.

<sup>20</sup> Cinco diga ucubena feiñotimie bite. Ie ucube atiano raite: “Patrón, cinco diga ucubena cuemo fecadio. Jiaie cincona oticue”.

<sup>21</sup> Patrón uai ote: “Raise marena maijidio. Eo mare mullaímadio. Janore ucube o raise sedaja jira, ona ailluena rana sedataiticue. Cue diga caimare jaca iitio”.

<sup>22</sup> Menacubena feiñotimie bite. Raite: “Patrón, cuemo menacubena fecadio. Iemona jiaie menacube oticue”.

<sup>23</sup> Naimie patrón uai ote: “Raise marena maijidio. Eo mare mullaímadio. Janore ucube o raise sedaja jira, ona ailluena rana sedataiticue. Cue diga caimare jaca iitio”.

<sup>24</sup> Dacubena feiñotimie bite. Raite: “Patrón, o riirenana uiñoticue. O mullaiaia maijiamona ganacabidio.

<sup>25</sup> Ucubena cue fañiñellena ona jaciruiticue. Ie jira eniruemo o cuemo iga ucubena eenoticue. Jadi, iena jai abido atidicue”.

<sup>26</sup> Patrón uai ote: “Maraiñedio. Rairaiedio. Cue mullaiaia maijiamona cue ucube uana uiñotio.

<sup>27</sup> Bancomo naie ucubena jonetodena, naie ucubemona jiaie ucube janore uamona, abido cue bia, iena feiñoticue”.

<sup>28-30</sup> Ie mullaiaimo llote: “Naimiemona ie ucubena bairo. Diez ucube illamie mo iena feca. Bie maraiñede mullaiaima jitiredinomo cuemona oni dota. Nainomo comini duere sefuillanona eeitimaci”. Jusiñamui ie jitailla rafuena finodinona: “Mare” raite; iadedi ie jitailla rafuena finoñedinona duere finoite. Jusiñamui omoína duere finoñellena, cue abido billirui omoi uiñofena jira, Jusiñamui jitaillacinona finocana omoi jai.

*Jesúdi cominina duere finolle llua rafue*

<sup>31</sup> Jesús llote:

—Omoína nia llofueiticue. Abido cue bia, nana cue jaienisai diga biiticue. Illaimana íco cue bia, illaiaima illa ifomo iiticue. Eo siño uaido biiticue.

<sup>32</sup> Cue uicomo nana nairaiái ofitimaci. Toica llaudaiaí sedaraiaima ie chivos motomona ie llaudaiaí oni fetua isoi, naimacina fetoiticue.

<sup>33</sup> Cue jitaillacinona finodino diese cue fetuanona, cue nabeimo itataiticue. Cue jitaillacinona finoñedino diese cue fetuanona, cue jarifebeimo itataiticue.

<sup>34</sup> Cue illaimana jira, cue nabeimo itinomo lloiticue: “Cue Moo omoiri iobillanona, omoína jai caimare itatate. Cue Moo cominina omoi illa jira, cue sedajanomo mai bi. Nainomo duidomoi.

<sup>35</sup> Cue jitaillacinona omoi finuamona navui aimetaiticuemo, cuena ecadomoi. Jiroacadicuemo, jinui cuemo fecadomoi. Omoi nairai dine cue macaria, cuena omoi uiñofeno omoi jofomo cuena feiñotomoi.

<sup>36</sup> Iniroinidicuemo, iniroi cuemo fecadomoi. Duidicuemo, cuena canollena, cuena jibuisaibidomoi. Cárcelmo iticuemo, cuena canollena, cuena jibuisaibidomoi”.

<sup>37</sup> Cue jitaillacinona finodino dinena cuemo jicanoitimaci: “Nama, ¿niruido aimetaitiomo, ona ecadicaí? ¿Niruido jiroacadiomo, jinui omo fecadicaí?”

<sup>38</sup> ¿Niruido ona ciodicaí, cai jofomo ona feiñollena? ¿Niruido iniroina omo fecadicaí?”

<sup>39</sup> ¿Niruido duidiomo, ona jibuisaidicaí? ¿Niruido cárcelmo itiomo, ona jibuisaidicaí?”

<sup>40</sup> Uai oiticue: “Uanaicinona omoimo lloiticue. Cuena inotinomona jamai bue isoidimena canodomoi, cuena jiaí canodomoi” lloiticue.

<sup>41</sup> Iemei cue jarifebeimo itinomo lloiticue: “Cuemona oni mai jai. Cue cominiñedomoi. Jai fañidomoi. Duere omoi sefuillena, iraimo mai jai. Naie irai jaca duiñede. Jusiñamuidi naiena Taife iena jai finode. Jusiñamuidi Taife comini iena jiaí jai finode.

<sup>42</sup> Cue jitaillacinona omoi finoñenamona, navui aimetaiticuemo, cuena ecañedomoi. Jiroacadicuemo, jinui cuemo fecañedomoi.

<sup>43</sup> Omoi nairai dine cue macaria, omoi jofomo cuena feiñoñedomoi. Iniroinidicue, iniroi cuemo fecañedomoi. Duidicue, cuena canollena, cuena jibuisaibiñedomoi. Cárcelmo iticue, cue canollena, cuena jibuisaibiñedomoi”.

<sup>44</sup> Cuemo jicanoitimaci: “¿Niruido aimetaitiomo, ona ecañedicaí? ¿Niruido jiroacadíomo, jinui omo fecañedicaí? ¿Niruido ona ciodicaí, cai jofomo ona feiñollena? ¿Niruido iniroinidíomo, omo fecañedicaí? ¿Niruido duidíomo, ona jibuisaibiñedicaí? ¿Niruido cárcelmo itíomo, ona jibuisaibiñedicaí?”

<sup>45</sup> Uai oiticue: “Uanaicinona omoimo lloiticue. Diga comini cuena iinotimaci. Naimacimona jamai bue isoidimiena omoi canoñena jira, cuena canoñedomoi” lloiticue.

<sup>46</sup> Naimaci jaca isi cacaitimaci; iadedi cue jitaillacinona finodino cue Moo sedajanomo jaca iitimaci.

## 26

*Judiuai illaicomini Jesúna gaitallena siadua rafue*

(Mr 14.1-2; Lc 22.1-2; Jn 11.45-53)

<sup>1</sup> Ie llofueoicaiganona llofuaí mei, naimacimo Jesús llote:

<sup>2</sup> —Pascua railla rafue illena, menarui fiebide. Iena uiñotomoi. Monamona jaie cue billamona, iimana jaidicue. Cue fiodaillena cue Moo cuena oretate. Illaicomini cuena coraillena, birui cuena gaitaitimaci —llote.

<sup>3</sup> Naie facaiseconi Jusiñamui diga nanoca ñairainidi, jiaie illaicomini diga, nanoca ñairaima jofomo ofidimaci Nanoca ñairaimadi Caifás.

<sup>4</sup> Jesúna jifuiamo gaitallena coniniri siadotimaci. Naimiena meinellena jiaí siadotimaci.

<sup>5</sup> Raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gañenamona, comini cai diga fuiritimaci. Nia sedaiticai.

*Jesúno riño caimare soride ra totaja rafue*

(Mr 14.3-9; Jn 12.1-8)

<sup>6</sup> Betania railla nairaimo Jesús jaillanona, Simón jofomo jaide. Simódi jaie efonaitimie.

<sup>7</sup> Naifomo mesamo Jesús guitemo, daje riñodi noticimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide.

<sup>8</sup> Jesús llofueoicaigano iena ciuanona, iciritimaci. Coniniri dani ñaitimaci:

—Naie caimare soride ra jamai dotade. Jai faifide.

<sup>9</sup> Iena fecacadena, eo ailluena raifide. Naie ucube dueredinomo fecadena, caimona mare.

<sup>10</sup> Naimaci ñaiana Jesús uiñua jira, naimacimo llote:

—¿Bue ñellena naiñaiñoa jeare ñaitomoi? Mare rafuena cuemo finode.

<sup>11</sup> Omoi diga dueredino jaca itimaci; iadedi omoi diga jaca iñeiticue.

<sup>12</sup> Cue abimo bie caimare soride ra naiñaiño totajamona, cue fiodaillirui facaina naiñaiño iese finode.

<sup>13</sup> Omoimo uanaicinona lloiticue. Ninomo cue mare finoca rafuena bu lloia, naiñaiñoa uibiñollena, nana cominimo naiñaiño finoca rafuena lloite.

*Judas micori raillamie Jesúna gaitataiacana rafue*

(Mr 14.10-11; Lc 22.3-6)

<sup>14</sup> Ie facaise Jesús llofueoicaiganomona Judas Iscariote micori raillamiedi Jusiñamui diga nanoca ñairaini dine jaide.

<sup>15</sup> Naimacimo jicanote:

—Omoimo Jesúna cue fecaia, ¿niga ucubena cuemo fecaitomoi? —jicanote. Naimaci siadua mei, treinta ucubena naimiemo fecadimaci.

<sup>16</sup> Naie facaiseconimona Jesúna gaitatallirui naimie ocuride.

*Jesúdi ie fiodaile rafuena llua rafue*

(Mr 14.12-25; Lc 22.7-23; Jn 13.21-30; 1 Co 11.23-26)

<sup>17</sup> Pascua railla rafue ia, siritaga rana guiñedimaci. Dani llomenicono guitimaci. Egiptomona cai jaiagai jillobillana começillena, naie rafue ite. Naie rafue tainiaruimo ie llofueoicaigano Jesús dine billano, jicanotimaci:

—¿Ninomo pascua railla rafue ie guille finuana jitaideo?

<sup>18</sup> Uai ote:

—Jerusalémo omoi jaillanona, omoimo cue llogamiena omoi ciuanona, naimiemo llono: “Cai llofueraima fiodaile facaise iaie ite. O jofomo ie llofueoicaigano diga pascua rafuena finoacade” llono.

<sup>19</sup> Ie muidona ie llofueoicaiganodi ie lluana finodimaci. Pascua railla rafue guille finodimaci.

<sup>20</sup> Nairui jitoma ana itemo, Jesús ie doce llofueoicaigano diga nainomo guisaide.

<sup>21</sup> Naimaci mesamo guitimacimo, Jesús llote:

—Omoimona damie cuena gaitataite —llote.

<sup>22</sup> Iena cacajanona, eo sunaitimaci. Damierie naimiemo jicanoside:

—¿Cuena ñaitio?

<sup>23</sup> Uai ote:

—Omoimona damie bie platomo cue diga llomenico diga mutade.

<sup>24</sup> Jusiñamui facaina lloraima ciega isoi, monamona jai billamona fioidaiticue; iadedi cuena gaitaitimie eo duere sefuite. Naimie jeiciñegadena, cuemona mare.

<sup>25</sup> Jesúsna gaitaitimiedi Judas micori. Naimie jicanote:

—Maestro, ¿ona iese finotaiticue?

Uai ote:

—Jii, iese finotaitio.

<sup>26</sup> Naimaci nia guitimacimo, llomenicono Jesús llinuana, Jusiñamuimo iobillacinona fecaja mei, llomenicono tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi comecina facajano, iena guiño.

<sup>27</sup> Ie mei naimie jiroracono jiai llinote. Jusiñamuimo iobillacinona llua mei, naie jirora como jai totaca vino naimacimo fecajano, raite:

—Biemona nana omoi jiro.

<sup>28</sup> Cue fiodaillamona, dama cue diaillamona, naimaci jeacino anamona ailluena biruimona jilloitimaci. Jusiñamuidi omoimo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. Cue llua isoi bie vinona omoi jiruamona, cue fiodaillamo omoi comeci.

<sup>29</sup> Omoina bene dane iese caimare nabaiñeiticue. Cue Moo sedajanomo omoi diga cue ia, nainomo omoina dane iese caimare marena nabaiticue. —Iena jirodimaci.

*Jesúdi Pedro naimiena januana llua rafue*

*(Mr 14.26-31; Lc 22.31-34; Jn 13.36-38)*

<sup>30</sup> Naimaci guilla mei, Jusiñamuimo iobilla ruana rotimaci. Ie mei Olivos railla anedumo jaidimaci.

<sup>31</sup> Jesús naimacimo llote:

—Cuemo suille rafue muidona, ja naio cuena fainonocaitomoi. Jusiñamui facaina lloraima micori iena jaie ciega: “Toica llaudaii sedaraimana meinetaicue. Naimie toinaia uaficaida jaitimaci” ciega. Naimie micori caina cuete.

<sup>32</sup> Ero, fiodaillamona cue jillua mei, omoi uicodo Galileamo jaiticue, nainomo omoi diga dafai fillena.

<sup>33</sup> Pedro uai ote:

—O finolle rafue muidona nana jiaio ona fainonocaia, ona jaca fainonocaiñeiticue.

<sup>34</sup> Jesús dinena raite:

—Uanai omo lloiticue. Ja naio itava nia ñaiñenia, dacaño amani cuena janoitio.

<sup>35</sup> Pedro uai ote:

—O diga cue fiodaiaedi, ona janoñeiticue.

Nana ie llofueoicaigano daje uaido jiai raitimaci.

*Jesúdi Getsemanímo Jusiñamuimo jia rafue*

*(Mr 14.32-42; Lc 22.39-46)*

<sup>36</sup> Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena, jaiticue.

<sup>37</sup> Pedrona uite. Zebedeo ie jito iaiaiaina jiai uite. Naimie sunaicaide. Ie comeci uri iñede.

<sup>38</sup> Naimacimo llote:

—Cue comeci sunaicaide. Niadi fioidaiticue. Benomo fiebi; ia nia iniñeno cue facaina omoi jii.

<sup>39</sup> Naimie janore bai jaillanona, eniruemo bitadate. Jiide:

—Ore Moo, o jitaia, cuena duere finoñeno; iadedi cue comeci jitaillacinona finoñeno. Cuemo o jitaillacino fino —jiide.

<sup>40</sup> Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—¿Niese raire inidio? daje hora nia iñedemo.



<sup>41</sup> Iniñeno. Taife ramo omoína fai raillano, iena omoi ñnoñellena, Jusiñamuimo jii. Omoi comeci mare rafuena finoacade; iadedi omoi comeci dani ocuiñoñede. Ie muidona Jusiñamuimo jii, omoína naimie ocuiñotallena —llote.

<sup>42</sup> Ie mei dane jillena jaide. Raite:

—Ore Moo, o jitaia, cue duere sefuillamona cuena jillota. Cue fiodaillana o jitaia, o jitailla rafuena finoiticue.

<sup>43</sup> Ie llofueoicaigano dine dane billanona, naimaci uisi llirioilla jira, naimaci inisitemo ride.

<sup>44</sup> Abido jaillanona dane jüde. Ailli daje isoiduaido jüde.

<sup>45</sup> Ie mei ie llofueoicaiganomo dane billanona, llote:

—Nia inidomoi. Jafaici nia otomoi. Monamona jaiie billanona, iimana jaidicue; ia ja fiodaiticue. Cuena ja gaitajanona, Jusiñamui jitailla jira, naimiëna ñnoñedino anamo ja iiticue.

<sup>46</sup> A naidacai. Maiña. Cue gaitataitimie jai bite.

*Jesúna gaitalle rafue*

(Mr 14.43-50; Lc 22.47-53; Jn 18.2-11)

<sup>47</sup> Jesús nia ñaitemo, ieconi Judas micori bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Butaralluna jiai atidimaci. Jusiñamui diga nanoca ñairainimona bitimaci. Einamaci dinena jiai bitimaci.

<sup>48</sup> Jesús dine naimaci nia riñenia, Judas micori naimie diga bitinomo jai llote:

—Jesúna omoi uiñollena, naimiëna libanoiticue. Ie mei naimiëna gaita —llote.

<sup>49</sup> Jesús dine naimaci rillanona, Judas micori Jesús dine raire jaide. Naimiëna uaidote:

—Maestro, jai biticue. —Ieconi naimiëna libanote.

<sup>50</sup> Jesús dinena raite:

—¿Bue ñiaiibitio?

Ie mei Judas micori diga bitinodi Jesúsna gaitadimaci.

<sup>51</sup> Iena ciuanona, Jesús diga itinomona damie ie lloebi llinuanona, Jusiñamui diga nanoca ñairaima ie mullaima jefona jaibonote.

<sup>52</sup> Jesús naimiemo llote:

—O fuiriacania, o jiai fiodaicio. O lloebi dane eeno. Cue riiduanona, fuiriñeno.

<sup>53</sup> Cuena riidollena, cue Moomo cue jicaia, eo ailluena jaienisai cue dine naimie oretaitie;

<sup>54</sup> iadedi iese cuena riidoia, Jusiñamui facaina lloraini micoriai cuegafuiai suiñeite. Cue fiodailla rafuena cuetimaci —llote.

<sup>55</sup> Ieconi naimie dine bitinomo Jesús llote:

—Omoi butaralluna uitomoi. Omoi lloebi diga jiai bitomoi. Fuiriraimadicueta cuena omoi gaitajaiibilla. Jusiñamui jofomo nagarui llofuecabiticue; iadedi cuena gaitañedomoi.

<sup>56</sup> Nana bie rafue suide, Jusiñamui facaina lloraini micoriai cuegafuiai suillena —llote. Ie facaise nana naimie llofueoicaigano naimiëna fañonocaillano, aisidimaci.

*Jesúdi judíuai illaicomini dine illa rafue*

(Mr 14.53-65; Lc 22.54-55, 63-71; Jn 18.12-14, 19-24)

<sup>57</sup> Jesúsna gaitadinodi Caifás jofomo Jesúsna uitimaci. Caifás Jusiñamui diga nanoca ñairaima. Naimie jofomo jiaie illaicomini jai ofidimaci. Moisés micori llogacinona llofueraini ofidimaci. Einamaci jiai ofidimaci.

<sup>58</sup> Jesús jinafona Pedro aarena jaide. Caifás jofo nairaiñimo jaide. Naie rafue fuiduana naimie uiñollena, nainomo ite jofomo maijiraini diga raide.

<sup>59</sup> Naimiëna meinellena, nana naie illaicomini Jesúsno nicino illana uiñoiacadimaci.

<sup>60</sup> Iena coniniri siadotimaci; iadedi naimiemo jaca nie isoide marañede rafue illana uiñoñedimaci. Diga comini Jesúsna ñaitimaci; iadedi taino llotimaci. Ie mei menamie bitiaimaiai.

<sup>61</sup> Raitiaimaiai:

—Bimie llote: “Jusiñamui jofona judaiedicue. Judaia mei, darui amani illanona, iena dane finoredicue” —lloitiaimaiai.

<sup>62</sup> Jusiñamui diga nanoca ñairaima Jesúsno jicanote:

—¿Niese iaimaiai uai oitio? ¿Nie isoide rafue ona llogidotiaimaiai?

<sup>63</sup> Jesús uai oñede. Naie ñairaima dinena llote:

—Cai Jusiñamui cajede. Naimie caina uiñua jira, uanaicinona cai lloñenia, caina duere finoite. Uanaicinona caimo llono. “¿Odi Cristodio?” omo jicanoticue. “¿Odi Jusiñamui Jitodio?” omo jicanoticue.

<sup>64</sup> Jesús dinena uai ote:

—Jii, naimiedicue. Iena raise llotio. Monamona jaie cue billamona, iimana jaidicue;; iadedi ico jiairuido illaimana cue illena, Jusiñamui ecimo cue raillana omoi nairai cioitimaci. Mona uillie motodo cue abido billena jiai cioitimaci.

<sup>65</sup> Iena cacajanona, naimiemona Jusiñamuina Jesús jeare ñaia jira, naie nanoca ñairaima dama ie iniroina cuaranote. Raite:

—Naimiedi Jusiñamuina jeare ñaite. Jiaie naimiena llogidotinona jai jitaiñedicaí. Ie ñaiaimona dama naimie abina llogidote.

<sup>66</sup> ¿Niese naimiena raitomoi?

Jiai illaicomini dinena uai otimaci:

—Naimie fiodaílesa.

<sup>67</sup> Te mei naimie uiecona tuallaitimaci. Naimiena ducoídımaci. Jiai bucoídımaci.

<sup>68</sup> Raitımaci:

—O Cristodiodena, ¿bu o bucoia? caımo llono.

Jesús uai oñede.

*Pedrodi Jesúsna janua rafue*

(Mr 14.66-72; Lc 22.56-62; Jn 18.15-18, 25-27)

<sup>69</sup> Naie facaise Pedro naie jofo nairairimo ite. Naie jofo nama mullaíño naimie dine billanona raite:

—Galileamona Jesús bite. Odi ie cominidio. Naimie diga jaicabidio —raite.

<sup>70</sup> Nana nainomo itinomo Pedro llote:

—O lluana uiñoñedicue.

<sup>71</sup> Nase fuemo Pedro jaidemo, naimiena jiaie mullaíño ciuanona, nainomo itinomo llote:

—Bimiedi Nazaret ie Jesús comini imie.

<sup>72</sup> Pedro uai ote:

—Uanaicinona cue lluana Jusiñamuidi uiñote. O llogamienna uiñoñedicue.

<sup>73</sup> Dallu illanona, nainomo itino Pedro dine billano, naimiemo llotımaci:

—Ua Jesús comini imiedio, o uai bairia jira. Naimie isoi ñaitio.

<sup>74</sup> Uai ote:

—Uanaí cue lloñenia, Jusiñamui cuena duere finoite. Uanaicinona cue lluana naimie uiñote. Ero, Jesúsna uiñoñedicue. —Ieconí itava ñaite.

<sup>75</sup> Iena cacajano, Pedro Jesús lluana uibiñote. Jaive Jesús Pedromo llote: “Itava nia ñaiñenia, dacaíño amani cuena janoitio” llote. Iena uibiñuanona, Pedro jino jaillano, sure eede.

## 27

*Pilato dine Jesús illa rafue*

(Mr 15.1; Lc 23.1-2; Jn 18.28-32)

<sup>1</sup> Monaidemo, nana Jusiñamui diga nanoca ñairainidi, nana einamacı diga, Jesúsna siadotımaci. Naimiena meinellena siadotımaci.

<sup>2</sup> Siadua mei, Jesúsna maianona, Poncio Pilatomo uitımaci. Romanuai railla nairai anamo naimaci illa jira, Pilatodi naimaci gobernador.

*Judas micori fiodaílla rafue*

<sup>3</sup> Judas micori Jesúsna jai gaitatate. Naie illaicomini Jesúsna meiniana lluana naimie micoridi uiñuamona, ie comeci iuaina meidote. Illaicominimo ie treinta diga ucubena abido atide.

<sup>4</sup> Raite:

—Jesús maraiñede rafuena jaca finoñede. Naimie fiodaiñeite. Naimiena cue gaitatajamona, maraiñedinona jai finodicue.

Uai otımaci:

—¿Bue ñe caımo lluaıbitio? O rafue caımo duiñede.

<sup>5</sup> Ie mei Judas micori Jusiñamui jofo jeraimo naie ucubena fo jamai faite. Jino jaillanona, oni jaide. Dama naimie abina meinellena, cimaıo llirinote raona.

<sup>6-7</sup> Jusiñamui diga nanoca ñairaini naie ucubena iraiıa mei, iena siadotımaci. Coniniri raitımaci:

—Naie isoide ucube nainomo joniana Moisés micori jaie rairuilla jira, Jusiñamui jofomo ite ucube ocabiranomo jonenidicaı. Naie ucube diga damie meinellena ibadicaı. —Ie jira naie ucube diga enruena ibadımaci. Naie illanodi jiñora ouilla enirue. Jiaie nairaimona bu bía, naimie fiodaıa, naie eniruemo naimiena raillena, iena ibadımaci.

<sup>8</sup> Naie ucube muidona damie fiodaılla jira, birui naie enirue mamecidi dirue ie enirue.

<sup>9</sup> Iemona Jeremías micori jaie cuega rafue jai suide. Naimie micoridi Jusiñamui facaina lloraima. Naimie micori cuega: “Cai Israel railla cominimona damierie railla jira, naimiena meinellena, treinta ucubena fecaitimaci.

<sup>10</sup> Naie ucube diga jiñora ocabilla eniruena ibaitimaci, cai Nama Jusiñamui llua isoi” cuega.

*Pilato dine Jesús illa rafue*

*(Mr 15.2-5; Lc 23.3-5; Jn 18.33-38)*

<sup>11</sup> Pilato railla gobernador uicomo Jesúna atia mei, Pilato Jesúsno jicanote:

—¿Judíuai comini illaimadio?

Jesús uai ote:

—Jii. Raise llotio.

<sup>12</sup> Ie mei Jusiñamui diga nanoca ñairainidi, einamací diga, naimiena llogidote; iadedi naimie dinena uai oñede. Ie abina riidoñede.

<sup>13</sup> Ie muidona Pilato naimiemo llote:

—Diga rafuena ona llogidotimaci. ¿Niese uai oñedio?

<sup>14</sup> Jesús nia uai oñede. Ie jira Pilato uainicaide.

*Pilatodi Jesús fiodaillana llua rafue*

*(Mr 15.6-20; Lc 23.13-25; Jn 18.38-19.16)*

<sup>15</sup> Naga año pascua railla rafue facaiseconi cárcelmo itinomona Pilatodi comini jicacamiena jamai jino orede.

<sup>16</sup> Bie año cárcelmo Barrabás raillamie ite. Naimie mameci eo are soride.

<sup>17</sup> Naie rafue illa jira, ailluena comini naimie dine ofillano, naimacimo Pilato jicanote:

—Bie año cárcelmona, ¿bumie jino cue oretajana jitaidomoi? Barrabás raillamie ite. Jesús raillamie jiai ite. Naimiedi Cristona jiai mameciredede.

<sup>18</sup> Iese jicanote; iadedi naimiedi Jusiñamui diga nanoca ñairaini Jesúri uradoillana uiñote. Naimaci Jesúna meineiacanana jiai uiñote.

<sup>19</sup> Ie maijiracomu naimie nia illanona, naie facaise Pilato ai naimie dine rabe orede. Cuete: “Bimiedi marañede rafuena jaca fiñoñede. Naimiena duere fiñoñeno. Jaive naio cue nicairillano, naimie muidona cue comeci jarire ite”.

<sup>20</sup> Ailluena comini Pilato dine ofillanona, Jusiñamui diga nanoca ñairainidi, einamací diga, cominimo llotimaci:

—Pilato caimo jicanoia, Barrabás jino oretallena jica. Jesús meinellena jica —llotimaci.

<sup>21</sup> Comini ofilla mei, naimacimo Pilato dane jicanote:

—¿Nimie cue jino oretajana jitaidomoi?

Uai otimaci:

—Barrabás.

<sup>22</sup> Pilato dinena jicanote:

—¿Niese Jesúna cue finuana jitaidomoi? Naimiedi Cristona jiai mameciredede.

Nana uai otimaci:

—Naimiena cruzmo corai.

<sup>23</sup> Pilato dane jicanote:

—¿Nie isoidede marañede rafuena finode?

Naimaci dinena ado ibi llonoidimaci:

—Naimiena corai.

<sup>24</sup> Jesúna jino oretajana jitañedimaci. Iena Pilato uiñuamona, comini jai uri iñenana naimie ciuanona, jinui diga ie onollina jocuanona raite:

—Bimie fiodaillana cue muidonañede. Bie rafue cuemo jai duiñede. Naimie fiodaite omoi muidona.

<sup>25</sup> Uai otimaci:

—Dama iesede. Naimie fiodaite cai muidona. Jiai cai uruiai muidona.

<sup>26</sup> Ie mei Pilatodi Barrabás naimaci jitailla jira, jino orede; iadedi Jesúna sechedotajanona, naimiena coraillena orede.

<sup>27</sup> Dajerie soldaduai di Pilato jofomo Jesúna uite. Nana soldaduai nainomo ofidimaci.

<sup>28</sup> Naimie iniroi duiñuano, naimiemo jiduirede iniroina jitañimaci.

<sup>29</sup> Ecuaimona niga nuiciraina naimie ifogimo jitañimaci. Ie nabeillimo radosina jonete, illaimana naimie illa isoi. Caiñici ifodo rañimaci, illaimana naimie illa isoi. Raitimaci:

—Jadi, judíuai illaima. —Iese raillanona naimiena jifanododimaci.

<sup>30</sup> Naimiena tuallaitimaci. Naimie onollimo ite radosina naimaci llinocaida, naiedo naimie ifogina buta-butadimaci.

<sup>31</sup> Jesúna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jitañimaci. Ie mei naimiena coraillena oni uitimaci.

*Jesúna coraia rafue**(Mr 15.21-32; Lc 23.26-43; Jn 19.17-27)*

<sup>32</sup> Jerusalémona naimaci jaillanona, Cirene railla eniruemona bitimiemo dafaifidimaci. Naimie mameci Simón. Naimiena Jesús uiga cruzna rocatatimaci.

<sup>33</sup> Gólgota raillanomo jaidimaci. Ffocoraia eruailla jira, iese mameciredede.

<sup>34</sup> Nainomo rillanona, ie abi isirena cacaiñellena, vinomo erirede rana faianona, naimiemo fecadimaci; iadedi iena naimie facajano, iena jiroñede.

<sup>35</sup> Naimie coraia mei, cruzna naidania mei, naie soldaduai naimie iniroi dani coninimo fecasite. Naie iniroi bu uille raillanona uifollena, jifanododimaci.

<sup>36</sup> Te mei ana raidimaci, naimiemo eruaillena.

<sup>37</sup> Naimie ifogi afebeimo ie llogiduafuena jonetimaci. Iese cuela: “Bimiedi Jesús. Judúuai comini illaia”.

<sup>38</sup> Te mei mena firiruide iaiaiaia coraidimaci. Damie Jesús nabeimo coraica. Jiaimie Jesús jarifebeimo coraica.

<sup>39</sup> Naisodo jamai jaidino Jesúsna mameritimaci. Mamerillanona, ifogiaina jaididimaci.

<sup>40</sup> Raitimaci:

—Navui raisoidio: “Jusiñamui jofona judaiticue. Darui amani illanona, iena dane finoiticue” raisoidio. Ie muidona dama o abina mai jilloita. Jusiñamui Jitodiadena, cruzmona ana bi.

<sup>41</sup> Ie facaise Jusiñamui diga nanoca ñairaini naimiena mameritimaci. Moisés micori llogacino llofueraini naimiena jiai mameritimaci. Einamaci naimiena jiai mameritimaci. Raitimaci:

<sup>42</sup> —Jiaie cominina jillotate; iadedi dama naimie abina jilloitanide. Naimiedi cai judúuai comini illaia raillamiedena, cruzmona naimie ana niade billasa. Ie mei naimiena inoitica.

<sup>43</sup> “Jusiñamui Jitodicue” naimie railla jira, naimiedi Jusiñamuina ja innotena, Jusiñamui jitaia, Jusiñamui naimiena jillotaite. —Iese naimiena mameritimaci.

<sup>44</sup> Naimie diga coraica iaiaiaia daje isoi naimiena mameritiaiaiaia.

*Jesús fiodailla rafue**(Mr 15.33-41; Lc 23.44-49; Jn 19.28-30; Heb 9)*

<sup>45</sup> Jitoma naidai itemona, daje amani horas mona jitibicaide.

<sup>46</sup> Te meinomo judúuai railla uaido Jesús ado jidaioide:

—Elí, Elí, ¿lama, sabactani? —jidaioide. Iena oni dobaiñuamona raite: “Cue Jusiñamui, cue Jusiñamui, ¿bue ñellena cuena faionocaidio?” raite.

<sup>47</sup> Iena cacajano, nainomo jamai itinomona damierie raitimaci:

—Naimie jaie Jusiñamui facaina lloraima Elíana uaidote —raitimaci.

<sup>48</sup> Naimacimona damie jarire jaillanona, fibecode ramo vinona faite. Radosimo jillillano jirollena, naimiemo a fecade.

<sup>49</sup> Ieconí jiaino raitimaci:

—Ena nai. Dallu seda. Elías naimiena jilloitajaibillena sedaitica.

<sup>50</sup> Ieconí Jesús dane ado cuirioita, fiodaite.

<sup>51</sup> Naie facaise Jusiñamui jofomo ie fetaca iniroife ana anaba jillacimo motodo menafe cuararide. Ieconí ñuisaño suide. Iemona nofie oni bojode.

<sup>52</sup> Diga raiafuaí econote. Jesús jillua mei, raiafomona, fiodaillanona, ailluena Jusiñamuina innotinodi jillodimaci.

<sup>53</sup> Te mei Jerusalémo naimaci jaillanona, diga comini naimacina ciodimaci.

<sup>54</sup> Nainomo ite capitán, ie soldaduai diga, Jesús fiodaillana eruaidimaci. Ñuisaño ñuillana cacadimaci. Nana suide rafuena ciuanona, eo jacinaillanona, naimie raite:

—Uanai bimiedi Jusiñamui Jito.

<sup>55</sup> Ailluena riñoniai naie rafuena aarena ciodimaci. Naimiena canollena, Galileamona Jesús diga navui bitimaci.

<sup>56</sup> Naimaci motomo María Magdalena ite. Jiaie María jiai ite. Naiñaiñodi Jacobo ei. Naiñaiño jiai José ei. Zebedeo uruaí ei jiai ite.

*Jesús raiafomo jonia rafue**(Mr 15.42-47; Lc 23.50-56; Jn 19.38-42)*

<sup>57</sup> Jitoma ana ítemo, eo ucuberedimie Pilato dine jaide. Naimiedi Arimatea ñairai imie. Naimie mameci José. Jesús dibeimo jaidimie.

<sup>58</sup> Jesús abina jicallena, Pilato dine jaide. Pilato “Jee” raillanona, Jesús abina naimie ollena llote.

<sup>59</sup> Te mei Jesús abina cruzmona ana José uanona, jeanide mare userede iniroi diga naimie abina ferinote.

<sup>60</sup> Nofici ie raiafomo jonete. Naie raiafo dama José jaie finoca, naimie iena. Jesús abi nainomo jonía mei, José naifomo noficina ñuitade. Naifo ibaide. Ie mei oni jaide.

<sup>61</sup> María Magdalena raiafo uico dine jaie María diga rainadatiñuaí.

*Soldaduai Jesús raiafo sedaja rafue*

<sup>62</sup> Ie areruido, pascua railla rafue illarui, dajerie judíuai illaicomini Pilato dine jaidimaci.

<sup>63</sup> Raitimaci:

—Ero, naie abi caitadimie nia fiodiañenia, navui llote: “Cue fiodaillamona, darui amani illanona, jilloiticue”.

<sup>64</sup> Ie jira o uai oreta, darui amani raifi naie raiafo raise ibaillena, naimie llofueoicaigano nainomo jaillanona, naimie abi ari oi raillano. Naimie abina naimaci ñianona lloitimaci: “Naimie jai jillode”. Iese suia, cominina eo jifueitimaci.

<sup>65</sup> Pilato uai ote:

—Soldaduai omoido oreiticue, naie raiafo raise sedallena.

<sup>66</sup> Ie jira jaidimaci. Raona nitajano, raiafo raise ibaidimaci. Naiena sedallena, soldaduaína nainomo fainonocaidimaci.

## 28

*Jesús fiodaillamona jillua rafue*

(Mr 16.1-8; Lc 24.1-12; Jn 20.1-10)

<sup>1</sup> Sábado fuilla mei, monaiacania, María Magdalena, jaie María diga, raiafona jibuisaidiñuaí.

<sup>2</sup> Ieconí ñuisaño suide. Monamona billanona, Jusíñamui jaienici raiafomo ibaica noficina oni ñuitade. Naie noficimo raide.

<sup>3</sup> Eo queniredena eruaide. Naimie iniroi eo userede.

<sup>4</sup> Nainomo ite soldaduai naimiena eo jacinailamona, abi docaidimaci. Iemona fiodaitino isoi dallu itimaci.

<sup>5</sup> Ie facaise naie jaienicidi dinena naie riño iañuaímo llote:

—Jaciruiñeno. Coraica Jesúsna omuiño jenuana uiñoticue.

<sup>6</sup> Naimie bene iñede. Naimie llua isoi, fiodaillamona naimie jai jillode. Naimie ifo jeraimo billano mai jibuisaíbi.

<sup>7</sup> Ie mei ie llofueoicaigano dine raire omuiño jai. Fiodaillamona naimie jilluana naimacimo llono. “Galileamo omoi uicomo naimie jaite” llono. Bie rafue omuiño jai lloticue —llote.

<sup>8</sup> Ie jira raiafomona rajicaillanona, eo iobillanona, raire jaidiñuaí. Ie llofueoicaigano dine aisidiñuaí.

<sup>9</sup> Ie llofueoicaigano dine iañuaí nia riñenia, Jesús iañuaímo dafaiñillano, raite:

—Itomuiño. —Naimie dine iañuaí rillanona, naimiena sedallena, naimie eillina llinotiñuaí.

<sup>10</sup> Jesús dinena raite:

—Jaciruiñeno. Cue llofueoicaiganomo llono: “Galileamo jai. Nainomo omoina cioiticue” llono.

*Soldaduai raiafona sedademo suide rafue*

<sup>11</sup> Jaidiñuaímo, nainomo ite soldaduaímona dajerie Jerusalémo jaide, nanoca Jusíñamui diga ñairainimo nana naimacimo suide rafue llollena.

<sup>12</sup> Iena cacajano, einamací diga iena siadotimaci. Ie mei naie soldaduaímo ucubena fecadimaci.

<sup>13</sup> Raitimaci:

—Jaie cominimo llono: “Cai inia mei, ie llofueoicaigano ie abina ñiano uitimaci” llono.

<sup>14</sup> Iena cai gobernador fidií, naimie diga ñaiticai, omoina naimie duere ñinoñellena —raitimaci.

<sup>15</sup> Ie jira naie ucubena feiñuanona, cominimo illaicomini llua isoi llotimaci. Naie rafue uiñocana jaide. Birui nia iena uiñocana jaide.

*Jesús ie llofueoicaiganomo iraicaiño lloga rafue*

(Mr 16.14-18; Lc 24.36-49; Jn 20.19-23)

<sup>16</sup> Ie mei Galileamo naie once llofueoicaigano jaidimaci. Jesús lloga anedumo jaidimaci.

<sup>17</sup> Naimiena naimaci cüanona, naimiena sedadimaci; iadedi dajerie Jesús jilluana raise nia ñinoñedimaci.

<sup>18</sup> Jesús dinena raite:

—Cue Moo cue uai cuemo iga, monamo cue jitailla rafue cue finollena, enñuemo cue jitailla rafue cue finollena.

<sup>19</sup> Ie jira naga nairaimo jai, cue dibeimo naie cominina itatallena. Cue dibeimo naimaci jailla mei, cue Moo dibeimo naimacina illamona, naimaci cue dibeimo illamona, ie Joreño anamo naimaci illamona, naimacina bautiza.

<sup>20</sup> Nana omoimo cue lloga rafuena naimaci iena #nollena, llofue. Nia abido cue biñenia, omoina canollena, omoi diga cue Joreño jaca iite –llote. Mai. Macaibaite. Mateodicue.

## MARCOS JESUCRISTO ENIRUEMO ILLA RAFUE CUIAFUE

*Jofue iñenanomo Juan Bautista micori illa rafue*

*(Mt 3.1-12; Lc 3.1-9, 15-17; Jn 1.19-28)*

<sup>1-2</sup> Jesucristo rafuena omoimo lloiacadicue. Naimiedi Jusiñamui Jito. Naimie rafue mare. Isaías micori Jusiñamui facaina jaie llumona, Juan Bautista micori llofuellena lloste. Iena suillamona, Jesucristo eniruemo ite rafue tainede. Iena nano lloiacadicue. Isaías micori cuete:

“Ero, o uicodo cue rafuena llolena, damiena oretaiticue” Jusiñamui raite.

<sup>3</sup> Jofue iñenanomo damie jidai-jidaillana cacadicue.

Naimie lloste: “Cai Nama biite. Naimie naiso atona raise fino” lloste.

Naisona lloste; iadedi naimie uaina naimaci feñollena, naimaci comeciai marena finuana ñaite.

<sup>4</sup> Isaías micori llua isoi, Juan Bautista raillamie micoridi Jusiñamui rafuena jofue iñenanomo llofuecana jaide. Cominina dafaifia, naimacimo lloste:

–Omoi jeacinona fainonocaida, Jusiñamui dibeimo omoi comeciai iuaillai meido. Iemona omoi jeacinona feitaite. Omoi comeciai iuaillai omoi meidoia, cominina iena uifotallena, mai omoi bautizallomoi.

<sup>5</sup> Diga comini naimie micori dine jai jaisoidimaci. Jerusalémona, nana Judeamona, nana Jordán fuemona jai jaisoidimaci. Jusiñamuimo naimaci jeacinona naimaci llua meino, naimacidi Juan micori bautizaga.

<sup>6</sup> Juan micoridi camello itiraiái ie nilla iniroina jitade. Igoi iena ie moilligaina jitade. Fioduaina rite. Cifona mete. Jamai rana guite.

<sup>7</sup> Cominimo lloste:

–Cue baifemo faitimie bie facaise biite. Jamai bue cue isoilla jira, naimiena cue canuana uifoneidicue.

<sup>8</sup> Jusiñamui dibeimo omoi illamona, jinui diga omoína bautizadicue; ia naimie bia, naimie dibeimo omoi jaillamona, Jusiñamui Joreño omoimo itataite.

*Jesús bautizaja rafue*

*(Mt 3.13-17; Lc 3.21-22)*

<sup>9</sup> Jordán dine Juan micori nia ia, Galileamona, Nazaretmona naimie dine Jesús bite. Nainomo Jesúdi Juan bautizaga.

<sup>10</sup> Bautizaja mei, jinuumona billanona, ieconi mona bojodena ciode. Jusiñamui Joreño, ucugi isoi, naimie emodomo ana billana ciode.

<sup>11</sup> Monamona Jusiñamui lloste:

–Cue isiruiga Jitodio. Ori iobidicue.

*Jesúna Taife ramo faia rafue*

*(Mt 4.1-11; Lc 4.1-13)*

<sup>12</sup> Jesús bautizaja mei, Jusiñamui Joreño jofue iñenanomo naimiena uite.

<sup>13</sup> Comini nainomo iñede. Difai ocainaiái itimaci. Nainomo cuarenta digarui ite. Ie facaise Taife naimiena ramo faite; ia Jusiñamui jaienisai naimiena sedadimaci.

*Galileamo Jesús illa rafue*

*(Mt 4.12-17; Lc 4.14-15)*

<sup>14</sup> Naie facaise Juan Bautista micorina Herodes gaitaja mei, Galilea railla eniruemo Jesús jaide. Jusiñamui ie mare rafuena llocana jaide.

<sup>15</sup> Lloste:

–Jusiñamui birui omoína sedaacade. Ie cominina omoi jaillena birui jitaide. Jusiñamui dibeimo illena, omoi jeacinona fainonocaida, omoi comeciai iuaina meido. Bie rafuena mai omoi iino.

*Ie llofueoicagano jaillena, Jesúdi nagaamagamiensa fetua rafue*

*(Mt 4.18-22; Lc 5.1-11)*

<sup>16</sup> Jaiiruido Galilea railla jorai fuemo Jesús macaritemo, menamiensa ciode. Naga ie ama iaimaiái. Damie Simón. Jiaimie Andrés. Llojjina fairaíma iaimaiái. Iese jaca naie iaimaiái; maijuidi iaimaiái.

<sup>17</sup> Iaimaiáimo lloste:

–Cue diga omico jaiocaillena, cue diga mai bi. Cue llofueganona omico jaillena jitaide. Lliciaína birui ocabitomico; iadedi cominina oitomico, cue dibeimo naimaci illena.

<sup>18</sup> Iena cacajanona, ieconi iaímaiaí llojjina fainonocaida, naimie diga jaidíiaímaiaí. Ie llofueganona jaillena, jaidíiaímaiaí.

<sup>19</sup> Lliaí bai Jesús jaidemo, jiaie menamiéna cide. Naga ie ama iaímaiaí. Damie Jacobo. Jiaimie Juan. Iaímaiaí moodi Zebedeo. Botemo iaímaiaí llojjina sigaidíiaímaiaí.

<sup>20</sup> Jesús iaímaiaína uaidote, ie llofueganona jaillena. Ie maijiraini diga iaímaiaí moona fainonocaida, botemona ari billanona, Jesús diga jaidíiaímaiaí.

*Jesúdi Janaba anamo itimie jillotaja rafue*  
(Lc 4.31-37)

<sup>21</sup> Bai jaillanona, Capernaumo ie llofuegano diga Jesús ride. Nainomo naimie ia, sábadoruimo judíuai ofiracomu jaide. Nainomo llofueite.

<sup>22</sup> Moisés micori llogacino llofueraini isoi llofueñede. Illaíma uai isoi naimie llofuia jira, nainomo ite comini naimie llofuiamona rajjicaídímaci.

<sup>23</sup> Janaba anamo illamie nainomo ite.

<sup>24</sup> Jesús llofuiána cacaita, Janabadi íimána ado cuirioitate:

—Odi Nazaret ie Jesús. ¿Bue ñeacadio cai diga? Caina duere finuaíbidio. Ona uíñoticue. Odi Jusiñamui ie mare fetocamiedio.

<sup>25</sup> Jesús naimiána lletade:

—Lliícai. Naimiemona oni jai.

<sup>26</sup> Janaba naimiána docaitajanona, ado cuirioillanona, naimiemona oni jaide.

<sup>27</sup> Iena ciuanona, nana nainomo itino rajjicaídímaci. Coniniri siadotímaci:

—¿Ñiese ite? Bimie jiaie uaido llofueite. Janabamo naimie llua mei, íimamona Janaba oni jaide. Janaba Jesús uaina ínote.

<sup>28</sup> Iemona nana Galilea eniruemo Jesús mameci are soride.

*Jesús Pedro jifaiñona jillotaja rafue*  
(Mt 8.14-15; Lc 4.38-39)

<sup>29</sup> Ofiracomona Jesús jaillanona, ie llofuegano diga, Simón jofomo jaide. Andrés nainomo jiai jaiñaíde. Jacobo, Juan diga jiai fo jaide.

<sup>30</sup> Ie facaise Simón jifaiño duide. Abi cuaride. Nainomo itino Jesúsno naiñaiño duillana llote.

<sup>31</sup> Iena cacajanona, naiñaiño dine jaillanona, Jesús naiñaiño onollina llinote. Naiñaiñona naidacaitade. Ieconi abi cuarilla fainonocaide. Guille finuanona, ie jofomo itinona ecade.

*Jesúdi ailluena duidinona jillotaja rafue*  
(Mt 8.16-17; Lc 4.40-41)

<sup>32</sup> Navuuda, jítibicaídemo, Jesús dine comini ailluena duidinona atídímaci. Janaba anamo itinona jiai atídímaci.

<sup>33</sup> Nana Capernaum comini naie jofu nasemo ofídímaci.

<sup>34</sup> Jesúdi diga duicono ailluena duidinona jillotate. Ailluena comini Janaba anamona jillotate. Naimiána jananiai uíñua jira, Jesús naimaci ñaiana rairuide.

*Galileamo Jesús llofuia rafue*  
(Lc 4.42-44)

<sup>35</sup> Ie areruido nia monaiñenia, Jesús casillanona, Capernaumona comini íñenanomo Jesús jaide. Nainomo Jusiñamuimo jide.

<sup>36</sup> Monaia, casidemo, jofomo Jesús íñena jira, Simón, ie nabaíñiai diga, Jesúsna jenuaide.

<sup>37</sup> Baillanona, raite:

—Nana comini ona jenodímaci.

<sup>38</sup> Jesús uai ote:

—Jiaie nairaiaí dine mai cai jailli. Nainomo llofueiacadicue. Ie jira Capernaumona jino biticue.

<sup>39</sup> Nana Galileamo Jesús jaide. Judíuai ofiracuaimo llofuecana jaide. Ailluena cominimona jananiaína oni oretate.

*Jesúdi efonaitimie jillotaja rafue*  
(Mt 8.1-4; Lc 5.12-16)

<sup>40</sup> Ie facaise efonaitimie Jesús dine billanona, naimiána raise uaiduamona, caiñici ifodo ana rainadate. Raite:

—O jítaiadedi, cuena jillotaredio.

<sup>41</sup> Naimiána duenaíllamona, Jesús ie onolli naimiemo oni ñuitajanona, naimiána jetade. Raite:

—Ona jillotaiacadicue. Mai o jillo.

<sup>42</sup> —Ieconi naimie jillode.

<sup>43</sup> Ie facaise Jesús naimiána oretaiacanano, naimiemo riire llote:



<sup>44</sup>—O jilluana bumo lloñeno; iadedi Jerusalémo Jusiñamui jofomo Jusiñamui diga ñairaima dine mai jai. O jilluana comini raise uifollena, naimiemo o abina acatajai. Moisés micori jaije lloga rana Jusiñamuimo feca.

<sup>45</sup> Tese Jesús naimiemo llote; iadedi Jesús finoca rafue llocana eo uite. Ie muidona ailluena comini Jesúsna cioacana jira, Jesús marefodo comini illanomo jaisoiñede; ia comini iñenanomo jaisoide. Iese jaisoide; ia naganomona naimie dine biñoidimaci.

## 2

### *Jesús tisitaitimiena jillotaja rafue*

(Mt 9.1-8; Lc 5.17-26)

<sup>1</sup> Nigarui illanona, Capernaumo Jesús dane abido ride. Comini iena fidianona,

<sup>2</sup> ie risoillacomo naimie dine ofidimaci. Ailluena billa jira, fo illino iñede. Nasemo jiaie eo ofidimaci. Jesús naimacimo Jusiñamui rafuena llofuete.

<sup>3</sup> Cominina Jesús llofuetemo, naimie dine nagaamagamie ie biiramo biide tisitaitimiena atidimaci.

<sup>4</sup> Ailluena comini illa jira, Jesús dine naimaci rinidimaci. Naie jofu biñanilla jira, jofu emodomo a jaidimaci. Jofu beicimo ite tidabacuido a jaidimaci. Jofu emodo econuano, Jesús ecimo naimiema ie biiramo biide diga, rao diga, ana ñuitadimaci.

<sup>5</sup> Iena Jesús cianona, tisitaitimie jilluana naimaci iñuana Jesús uifote. Tisitaitimiemo llote:

—Nabai, o jeacino cue feitaja jira, iena jai oni dotadicue. Ie facai ibana jai oñeitcue.

<sup>6</sup> Nainomo itinomona damierie Moisés micori llogacinona llofueraini nainomo raidimaci. Comecina facadimaci:

<sup>7</sup> “¿Niese bimiedi iese llote? Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”.

<sup>8</sup> Naimaci comeciari facajacinona Jesús uifuanona, naimacimo jicanote:

—¿Bue ñellena omoi comeciaina iese facadomoi?

<sup>9</sup> Bimiemo: “O jeacinona jai oni dotadicue” cue lloia, cue uai siñonana uifoiñeitomoi; ia bimiemo: “Mai naidacaillanona, o biira ferinocaida, mai macari” cue lloia, cue uai siñonana uifoiñeitomoi.

<sup>10</sup> Monamona jaije cue billanona, imana jaidicue. Ie jira jeacino oni dotaja uai cuemo ite. Iena omoi uifollena, tisitaitimiemo lloiticue:

<sup>11</sup> “Mai naidacai. O biira ferianona, o jofomo mai jai”.

<sup>12</sup> Iese naimie raillamona, tisitaitimie jillode. Naidacaida, ie biira feria mei, naimacimona jino jaije. Nana nainomo itino rajicaidimaci. Iemona Jusiñamuimo iobillacinona fecadimaci. Raitimaci:

—Bie isoide siño comena jaca cioñedicai.

### *Jesúdi Levína fetua rafue*

(Mt 9.9-13; Lc 5.27-32)

<sup>13</sup> Jiairuido jorai fuemo Jesús dane jaide. Ailluena comini naimie dine ofillanona, naimacina llofuete.

<sup>14</sup> Llofua mei, Jesús bai macaritemo, Leví raillamiena ciode. Levídi Alfeo jito. Gobierno ucube oullanomo naimie maijuide. Nainomo raidena Levína ciode. Naimiemo llote:

—Cue llofuegamiena o jaillena, cue diga bi. —Naidacaida, Jesús diga jaide.

<sup>15</sup> Ie mei Leví jofomo Jesús ie llofueoicaigano diga guisaide. Naie facaise ailluena comini naimie diga jaisoidimaci. Naimacimona diga gobierno ucube oraini nainomo guisaibitimaci. Moisés micori llogacinodo raise jaiñedino jiaie guisaibitimaci.

<sup>16</sup> Ie facaise fariseuai comini, Moisés micori llogacinona llofueraini diga, nainomo jamai bitimaci. Jesúsna cianona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite. Naie isoidino diga fariseuai comini nabairiñena jira, iese jicanotimaci.

<sup>17</sup> Iena cacajano, Jesús llote:

—Ecairedinodi médicona jitañedimaci; ia duidinodi médicona jitañedimaci. Ie isoide. Mareuidino cuena jitañedimaci; ia maraiñedino cuena jitañedimaci. Jusiñamui dibeimo mareuidinona uaiñedimaci; iadedi maraiñedinona uaiñedimaci. Omoi mona maraiñedino diga nabairiticue; ia naimacina uaiñedimaci.

### *Jesúmo comini guifñenana jicanua rafue*

(Mt 9.14-17; Lc 5.33-39)

<sup>18</sup> Ie facaise Jusiñamuina raise iobitallena, Juan Bautista llofueoicaigano guifñenaruillai ite. Ie facaise fariseuai comini jiaie guifñenaruillai ite. Jesús dine comini billanona, naimiemo llote:

—Cai einamací llua isoi, Jusiñamuina naimací raise iobitallena, guiñenaruillai illa facaiseconí Juan Bautista llofueoicaigano guiñedimací. Naimací jeacino facaina sunaicabitimací. Fariseuai llofueoicaigano iedo jiaí jaidimací; ia o llofueoicaigano jaca guitimací. ¿Bue ñellena cai einamací rafuedo jaiñedimací?

<sup>19-20</sup> Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiaí sunaiñedimací. Iobillamona guitimací. Jiairuido jai aireiacade conirue naimací diga iñenia, naimací comece sunaillamona, naimací jitaia, guiñenaruillaidi iite. Ie isoide. Cue comini diga birui cue illa jira, iocire itimací. Ico cue jaille mei, sunaitimací. Ie muidona birui cue llofueoicaigano guicabitimací.

<sup>21</sup> Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite.

<sup>22</sup> Jacagomona finoca bolsa como finoca vino joneñega. Jonegadena, mairiñena jira, sirillamona igoi raire cuararite. Vino faifite. Igoi jiaí faifite. Como finoca vino comogomo jonelle. Iemei iena faifineite. Ie isoide. Omoi einamací rafue ifomo jiaie rafue birui ite. Iena omoimo llocabiticue. Iedo jaidicai —llote.

*Sábadoruimo Jesús llofueoicaigano majia rafue*

*(Mt 12.1-8; Lc 6.1-5)*

<sup>23</sup> Jiairuido sábadoruimo Jesús, ie llofueoicaigano diga, trigo illa illi motodo joide naisonaa jaide. Ie llofueoicaigano trigona tijiano, guicana jaidimací.

<sup>24</sup> Dajerie fariseuai iena ciuano, llotimací:

—Rairuica rana finosite. Moisés micori rairuilla jira, sábadoruimo maijinidicai; iadedi trigona naimací tijiamona, caimona jai maijidimací. Iese cai abimo jeacimona jai finodimací.

<sup>25</sup> Ie llofueoicaigana riiduano, Jesús uai ote:

—Cuemona jeacino finoñedimací. David micori jaie finoca rafuemo omoi comeciaí raise facañedomoi. David micori guille iñenia, naimie aimetaia, ie nabaiñiaí diga, Jusiñamui jofomo fo jaide.

<sup>26</sup> Naie facaise Jusiñamui diga nanoca ñairaimadi Abiatar. Jusiñamui jofomo naimací fo jailla mei, Jusiñamuimo fecaca llomeniconaa uanona, guitimací. Jamai bue isoidino naie llomeniconaa guillana Jusiñamui rairuide. Dani Jusiñamui diga ñairaini iena guiredimací. Ie nabaiñiaí diga, David micori iena guite; ia Jusiñamui naimacina duere finoñede.

<sup>27</sup> Jusiñamui sábadona finuamona, sábado ite, nairui illamona comini caimare illena; ia omoi llofuimona, iese iñedimací. Nairuimo rairuica rana finoñellena, comini iese illena llofuecabitomoi.

<sup>28</sup> Monamona cue billamona, iimana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiaí rairuiredicue. Ie jira nairuimo cue jitaila rafuena finoredicue.

### 3

*Jesúdi onollina idisarodimiēna jillotaja rafue*

*(Mt 12.9-14; Lc 6.6-11)*

<sup>1</sup> Jiaie sábadoruimo judiauí ofiracomo Jesús dane jaide. Ie facaise onollina idisarodimie nainomoi ite.

<sup>2</sup> Nainomoi itino Jesús eruaidimací, sábadoruimo Jesús naimie raabaca ie segoitai. Iena Jesús finoia, naimacimona sábadoruimo naimie jai majia jira, naimiēna llogidoiacadimací. Sábadoruimo bu majia, naimacimona jeacino finode.

<sup>3</sup> Onollina idisarodimiēmo Jesús llote:

—Cue ecimo mai bai bi.

<sup>4</sup> Jesús nainomoi itinomoi jicanote:

—¿Nie isoide rafue sábadoruimo finuadi mare? Bimie birui cue jillotaiadedi, birui mare rafuena finodicue. Cuena birui omoi meineiadedi, birui maraiñede rafue finodomoi. Sábadoruimo, ¿nie isoide rafue finuana rairuidomoi?

Comini dinena uai oñedimací.

<sup>5</sup> Naimie uaina naimací iinoñena jira, riccaillanona, Jesús naimacimoi erodate. Duidimiēmo llote:

—O onolli mai oni ñuita.

Iena oni ñuitajamona jillode.

<sup>6</sup> Iena ciuana, fariseuai jino jaidimací. Naimiēna meinellena, illaima Herodes dibeimo itinona baillanona, naimací diga coniniri siadotimací.

*Jorai fuemo Jesúdi ailluena cominina llofua rafue*

<sup>7</sup> Naie nairaimona jorai fueo Jesús, ie llofueoicaigano diga, oni jaide. Galilea railla eniruemona ailluena comini naimie dine bitimaci. Judeamona jiaino bitimaci.

<sup>8</sup> Jerusalémoma, Idumeamona, Jordán ruicafabellemona, Tiro jinofemo ite eniruemona, Sidón jinofemo ite eniruemona ailluena bitimaci. Nana naimie siño finoca rafuena cacajanona, naimiena cioacadimaci.

<sup>9</sup> Comini naimiena meetasi raillanona, ie llofueoicaiganomo daje botemo naimie jaillena eenogana llote.

<sup>10</sup> Ailluena duidinona naimie jai jillotaja jira, nana duidino naimiemo riacadimaci. Jilloillena naimiena jetaacadimaci. Iemona naimie illa bote eenuana jitaide.

<sup>11</sup> Jananiai anamo itino Jesúna cioia, Jesús uicomo ana bitadajanona, jananiai naimacina ñaitatajamona, raitimaci:

–Jusiñamui Jitodio.

<sup>12</sup> –Ia Jesús naimiena naimaci lluana rairuide.

*Jesúdi ie doce llofueoicaiganona fetua rafue*

*(Mt 10.1-4; Lc 6.12-16)*

<sup>13</sup> Naie facaise anedumo Jesús jaide. Ie jitaillano diese naimie dine uaidote. Naimie dine billa mei,

<sup>14</sup> doce digamiena fetode. Naimie diga jaicabillena, naimacina fetode. Ie rafuena lloillena, naimacina oretaiacade.

<sup>15</sup> Janaba anamo itinomona Janabana oni oretallena, ie uai naimacimo ite.

<sup>16</sup> Iese mameciredimaci: Simón; naimie mameci jiaicidi Jesús jitaca Pedrona.

<sup>17</sup> Jacobo, Juan; iaiaiaia Zebedeo jito iaiaiaia. Jiaie mameci iaiaiaia Jesús jonete Boanergesna. Naie mameci oni dobaifuaomona mona guruama. Iciriruilla jira, iese mamecirediaiaiaia.

<sup>18</sup> Andrés, Felipe, Bartolomé, Mateo, Tomás, jiaie Jacobo; naimiedi Alfeo jito. Tadeo, jiaie Simón; naimiedi cananista comini facaisemo duide.

<sup>19</sup> Judas Iscariote micori; naimiedi Jesúna gaitatimie.

*Fariseuai Jesúna jeare ñaia rafue*

*(Mt 12.22-32; Lc 11.14-23; 12.10)*

<sup>20</sup> Te llofueoicaiganona fetua mei, ie risoilla jofomo naimaci diga Jesús abido jaide. Ailluena comini naimie dine billa jira, naimie guillena, naimie abi juanide.

<sup>21</sup> Naimiena ie comini fidiano: “Naimiedi jai uairico isoi iacade” raillanona, comecina facadimaci. Ie jira naimiena ie ei jofomo isaibiacadimaci.

<sup>22</sup> Jerusalémoma Moisés micori llogacinona llofueraini naie facaise billanona, raitimaci:

–Beelzebúdi Janaba comini. Beelzebú anamo Jesús illamona, Beelzebú uaido Janaba illa cominimona Jesúdi Janabana oni oretate –raitimaci.

<sup>23</sup> Naimaci raillana naimie cacajanona, naimie dine Jesús naimacina uaidote. Llote:

–Janaba dibeimo Beelzebú illamona, dama ie abina oretanide.

<sup>24</sup> Ero, daje isoi comeciaina lloifienamo daje nairai facañenia, danomo majinidimaci. Oni jaidimaci.

<sup>25</sup> Daje isoi comeciaina lloifienamo daje jofomo itino facañenia, danomo jainaiaidimaci. Oni jaidimaci.

<sup>26</sup> Te isoide. Beelzebú uaido jananiaia omoi llua isoi cue oretai, Janaba ie dibeimo itino diga jai nabairifede. Iemona naimie comini danomo ifeitimaci. Ie uai leconi saite.

<sup>27</sup> Ero, mairidimie ie jofomo ite rana nibai fiacadomoi. Iena fillena, naimiena nano raise omoi maiga. Raise maiga mei, ie rana fiiredomoi. Ie isoide. Janaba anamona cominina jillotacabiticue. Naimie afemo nano cue ifñenia, cominina jillotanidicue. Naimie afemo cue illa jira, iena finoredicue.

<sup>28</sup> Ie jira bie omoimo lloiticue. Jusiñamui nana comini jeacinona dotarede. Naimiedi naimaci jeare ñaiacinona dotarede;

<sup>29</sup> iadedi naimiedi ie Joreñoa jeare ñaiacinona jaca dotañeite. Jusiñamui iena jaca feitañeite –llote.

<sup>30</sup> –Beelzebú anamo Jesús ite. Jusiñamui Joreño uaido siño rafuena finoñede; ia Janaba uaido siño rafuena finode –Jesúna raitimaci. Iese naimaci railla jira, “Jusiñamui naie isoide ñaiacinona jaca dotañeite” iese Jesús llote.

*Jesús ie comini*

*(Mt 12.46-50; Lc 8.19-21)*

<sup>31</sup> Jesús comini naimie dine rillanona, naimie diga ñaiacanano jino naidaidimaci.

<sup>32</sup> Ie facaise ailluena comini naimie ecimo raidimaci. Naimie comini rillana naimaci cacajano, naimiemo llotimaci:

—O ei, o amatiai diga jino ite. O diga ñaiacade.

<sup>33</sup> Jesús dinena uai ote:

—¿Bu cue ei? ¿Bu cue amatiai?

<sup>34</sup> Naimie ecimo itinomo erodajanona, llote:

—Jadí, cue ei, cue amatiai.

<sup>35</sup> Jusiñamui jitaillacinona finodimie cue amana, cue miriñona, cue eina. Imaci ua cue cominina.

## 4

*Jesúdi trigona judaidimiena llua rafue*

(Mt 13.1-9; Lc 8.4-8)

<sup>1</sup> Jiairuido jorai fuemo dane jaillanona, ailluena comini naimie dne ofillamona, Jesús naimacina llofujete. Ailluena comini nainomo ofilla jira, botemo Jesús jaillano, ana raide; iadedi comini jorai fuemo itimaci.

<sup>2</sup> Ailluena rafuena naimacina llofujete. Raite:

<sup>3</sup> —Omoi fueollena, bie rafuemo raise cacarei. Damie trigona judaiaide.

<sup>4</sup> Naimie judaiaimona, naisomo janore iduai juide. Naimie bai jailla mei, silliñiai iena guisaibitimaci. Ie jira sicoñede.

<sup>5</sup> Nofiemo jiaie iduai juide. Nainomo enirue raise iñede. Sicode; iadedi enirue raise iñena jira,

<sup>6</sup> raise jainañena jira, ecasillamona duide. Ie jira llisiñede.

<sup>7</sup> Eecuai illanomo jiaie iduai juide. Eecuai sicuamona riana eecuai ibaica. Ie jira llisiñede.

<sup>8</sup> Mare eniruemo jiaie iduai juide. Sicode. Llisillamona danademo treinta diga llisillana ote. Jiaimona sesenta diga llisillana ote. Jiaimona cien diga llisillana ote.

<sup>9</sup> Omoi jeforena jira, raise fueollena, cue lluomo cacarei. Iena ñno.

*Jesús ie como lloga rafuena llofua rafue*

(Mt 13.10-23; Lc 8.9-15)

<sup>10</sup> Ailluena cominimona jailla mei, naimie diga jaisoidnodi, ie doce llofueoicaigano diga, Jesús ie llofuiana jicanotimaci.

<sup>11</sup> Uai ote:

—Jusiñamuidi omoína ie sedaacana rafuena jai uiñotade. Jiaie iena uiñoñedomoi. Jiaie cominina iena nia uiñotañede.

<sup>12</sup> Ie jira bie isoidicinodo naimacimo lloticue. Cue siño finoca rafuena ciodimaci; iadedi iena naimaci ñnoñena jira, uiñoño jaitimaci. Cue llofuiana jamaí cacadimaci; iadedi naimaci ñnoñena jira, raise cacaiñedimaci. Uiñoñedimaci. Jusiñamui dibeimo naimaci jaiacaiñena jira, Jusiñamui naimaci jeacinona oni dotañeite. Iena feitañeite.

<sup>13</sup> Cue como llofuiacinona omoi raise cacaiñenia, dane cue llofua, iena jiaie raise nibai cacaiñeitomoi;

<sup>14</sup> ia iena omoína llofueiticue. Trigona judaidimiedi Jusiñamui rafue lloraíma isoide.

<sup>15</sup> Dajerie iduai naisomo juide. Dajerie comini comeciai naie naiso isoidimaci. Jusiñamui uaina cacadimaci; ia Taife naimaci comeciaimo cacaja uaina ñnotañede.

<sup>16</sup> Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaia, iena caimare feiñotimaci.

<sup>17</sup> Nofiemo riga iduai jainaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefua, abido danomo uaidimaci.

<sup>18</sup> Jiaie iduai eecuai illanomo juide. Naie iduai sicua mei, iena eecuai ibailla jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. Finotimaci;

<sup>19</sup> iadedi naimaci comeciai jarire illamona, naimaci raruiaína ebiruillamona, naie uai naimaci comeciaimo itabiñede. Jusiñamui jitaile rafuena finocana jaiñedimaci.

<sup>20</sup> Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise feiñotimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

*Jesúdi lamparína ñaia rafue*

(Lc 8.16-18)

<sup>21</sup> Jorai fuedo Jesúsdi cominina nia llofujete:

—Jai uneca lamparín jiaie illanomona atia mei, jiaie ra biide anamo rainañega; iadedi joforaimo lligaiñollena, nainomo bite comini raise cioillena, ie rairanomono rainade.

<sup>22</sup> Ie isoide. Cue rafue llocana jaiá, comini comeciaí iticinona uifnotade. Uanaicino naimaci cacajamona, damierie innotimaci. Damierie innoñedimaci.

<sup>23</sup> Omoi jeforena jira, raise fueollena, cue lluomo cacarei. Iena ino.

<sup>24</sup> Cue lluomo raise cacarei. Omoi cacaja diese Jusiñamui omoína uifnotaita.

<sup>25</sup> Iena omoi inoia, Jusiñamui omoína canoite. Omoína uifnocana jaitaite. Jiaimie iena janore cacajamona, iena inoñenia, Jusiñamui naimiena faifitaite.

*Jesúdi Jusiñamui ie cominina sedaacana llofuia rafue*

<sup>26</sup> Jesús llote:

—Jusiñamui dibeimo comini jailla rafuena nia lloiticue. Naimie dibeimo comini jaillena, naimie rafue llocana jaidicue. Jiaie uaido iena omoimo lloiticue. Damie ie illimo judaiaide.

<sup>27</sup> Judaia mei, ie illimo nagarui ie maijicabilla isoi naimie jaide. Niese iduai denuana naimie raise uifnoñede;

<sup>28</sup> ia eniruemono nano sicode. Monaila mei, lliside. Iemono naicuai comuide.

<sup>29</sup> Jai einaia, iena ote. Ie isoide. Jusiñamui rafuena raise cacaiñedomoi; ia iena inocana jaidomoi.

*Jesúdi mostaza ido llua rafue*

*(Mt 13.31-35; Lc 13.18-19)*

<sup>30</sup> Jesús jiaie rafuena llote:

—Jusiñamui dibeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci.

<sup>31</sup> Jiaie rafuedo iena omoimo lloiticue. Damie mostaza idona rillamona, naiemona eo aillue riará sicode. Mostaza ido eo janorede;

<sup>32</sup> iadedi sicua mei, eo aillue riará jaillamona, ie onogaillai jegairiena jira, icairo anamo manaidinomo sillifiaí jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

<sup>33</sup> Naie isoide rafuaido Jesúdi Jusiñamui ie cominina sedaacana rafuena cominimo llote.

<sup>34</sup> Naimaci cacaja diese llote. Naimacimo jiaie rafuedo lloñede; ia ie llofueoicaiganomo iena eneno llofute.

*Jesúdi jorai baguana llucaitaja rafue*

*(Mt 8.23-27; Lc 8.22-25)*

<sup>35</sup> Ailluena comini llofuia mei, jitoma jai sojicaidemo, ie llofueoicaiganomo Jesús llote:

—Ruica enefebeimo mai cai jailli.

<sup>36</sup> Cominina faionocaida, botemo naimie jai illamona, naimie llua isoi, oni jaidimaci. Jiaie botes jai jaide.

<sup>37-38</sup> Bai jaillanona, jillacimo Jesús inide. Ie ifogi almohadamo biide. Ie facaise aifi eo riire bite. Joraidi eo bagode. Baguamona, botemo jinui a uaide. Oruicacana jira, jacinaillamona, Jesúna casitatimaci. Raitimaci:

—Maestro, ¿niese itio inoilla? Caina cano. Jai buisaidicai. Corobaisaidicai.

<sup>39</sup> Naimie casillano, aifina lletade. Jinui baguana llucaitade. Ieconí aifi llucaide. Bagoñede.

<sup>40</sup> Ie llofueoicaiganomo jicanote:

—¿Bue ñellena jacinaitomoi? ¿Niese cuena raise inoñedomoi?

<sup>41</sup> Uai ofeno eo rajicaidimaci. Coniniri ñaitimaci:

—Bimiedi ¿nie isoidimie? Aifi naimie uaina innote. Jorai naimie uaina jiai innote. —Bai jaillanona, ruica dine ridimaci.

## 5

*Jesúdi Gadara railla eniruemo illa rafue*

*(Mt 8.28-34; Lc 8.26-39)*

<sup>1</sup> Ruica dine naimaci ridemo, Gadara railla eniruemo sijidimaci.

<sup>2</sup> Botemona ari Jesús jaidemo, naimie dine damie bite. Naimiedi Janaba anamo itimie.

<sup>3</sup> Comini rajioillanomo nofie moto ifuaimo naimie i-isoide. Janaba anamo naimie illamona, comini diga marena jaca irainide.

<sup>4</sup> Diga icaiño lloeo diga ie onollidi maiga; iadedi oni ecocaida, lloeona ticonote. Ie eilli jiai maiga; iadedi saitaicaida, lloeona ticonote. Ie jira buna naimiena raise mainide.

<sup>5</sup> Nagarui nofie motomo ite. Anedumo jaisoide. Cui-ricurisoide. Dama ie abina nofici diga jaidode. Iese naimie isoide.

<sup>6</sup> Nofiemona Jesúna cuanona, aisicana Jesús dine bite. Naimiena sedallena, ie caiñici ifodo ana rainadate.

<sup>7-8</sup> Jesús llote:

—Janaba, bimiemona oni jai.

Janabadi iimana ado llotatate:

—Nanoca Jusiñamui Jitodio. ¿Niese cuena nibaiacadio? Jusiñamui mamecido cuena duere finofiño.

<sup>9</sup> Jesús Janabamo jicanote:

—¿O mameci bu?

Uai ote:

—Aillosiedicai.

<sup>10</sup> Bie illanomona naimacina oretañellena Jesúmo duere jicanotimaci.

<sup>11</sup> Naie facaise nainomo ite anedumo ailluena chanchuai itimaci.

<sup>12</sup> Chanchuai abimo naimaci jaillena Jesúmo duere jicanotimaci.

<sup>13</sup> Jesús dinena:

—Jee —raite. Ieconí iima abimona oni jaillanona, chanchuai abimo jaidimaci. Dos mil chanchuai nainomo itimaci. Iena suidemo, iconí jillacimo joraimo chanchuai aisiano corobaisidimaci.

<sup>14</sup> Iena ciuanona, chanchuai sedaraini naimaci nairai dine aiscana jaidimaci. Naie rafuena llocana jaidimaci. Ie jira diga comini jaide, naie rafuena raise fidillena.

<sup>15</sup> Jesús dine naimaci ridemo, jaive Janaba anamo illamiēna Jesús ecimo raillana ciodimaci. Naimie iniroina jai jitade. Naimie jai uairicoñede. Iena ciuanona, Jesúsna jaciruitimaci.

<sup>16</sup> Naie rafuena ciodino jaive Janaba anamo illamie jilluana llotimaci. Chanchuaimo suide rafuena jiai llotimaci.

<sup>17</sup> Naie enirue itinodi Jesúmo naimaci eniruemona oni jaillena duere jicanotimaci.

<sup>18</sup> Botemo Jesús jaiacania, jaive Janaba anamo illamie Jesúmo jicanote, naimie diga jaillena;

<sup>19</sup> ia Jesús raite:

—Dama ite. O nabaiñiai dine jai. Nana Jusiñamui omo finoca rafuena naimacimo llono. Jusiñamui ona duenaillana naimacimo llono.

<sup>20</sup> Ie jira oni jaide. Nana Decápolis railla eniruemo Jesús nana naimiemo finoca rafuena llocana jaide. Iena cacajamona, nana comini rajicaidimaci.

*Jesúdi mena duide riñona jillotaja rafue*

*(Mt 9.18-26; Lc 8.40-56)*

<sup>21</sup> Ruica díbeimo ie llofueoicaigano diga Jesús abido rilla mei, ailluena comini naimie dine ofidimaci. Jorai fuedo naimie nia ia,

<sup>22</sup> Jairona mameciredimedi Jesús dine bite. Naimiedi judíuai rafue ofiraco sedaríma. Jesúmo duere jicanollena, ana bitadate.

<sup>23</sup> Duere jicanote:

—Cue jisa jai fiodaiacade. Cue jofomo cue diga bi, o onolli naiñaiñomo o jonellena, naiñaiño jilloillena.

<sup>24</sup> Iena cacajano, ie llofueoicaigano diga, naimie diga Jesús jaide. Ailluena comini Jesúmo ñajjillanona jaidimaci.

<sup>25</sup> Bai jaillanona, duidiñaiño Jesús jinafona jaide. Naiñaiño jeraimona doce años jaca diaide.

<sup>26</sup> Diga manorainimona duere sefuide. Jilloñede; ia fodo jaide. Nana ie ucube jiai fuite.

<sup>27</sup> Jesús duidinona jilluana naiñaiño fidiamona, jinafo dinena billanona, naimie iniroina jetade.

<sup>28</sup> “Naimie iniroi cue jetajamona jilloiticue” comecina facajamona, naiñaiño naimie iniroina jetade.

<sup>29</sup> Ieconí diailladi fainonocaide. Ie abi jilluana naiñaiño jai uifnote.

<sup>30</sup> Ie abimona ie uai oni jaillana Jesús uifñuana, dobaicaide. Cominimo jicanote:

—¿Bu cue iniroina jetade?

<sup>31</sup> Ie llofueoicaigano dinena uai otimaci:

—Ailluena comini o ecimo jaidimaci. Omo ñajjidinona: “¿Bu cue iniroi jetade?” raitio.

<sup>32</sup> Raise uifñollena, Jesús ie ecimo itinomo erodate.

<sup>33</sup> Duidiñaiño ie jilluana uifñua jira, Jesús dine jacirucana bite. Naimie uicomo ana bitadajanona, nana naiñaiño ite rafuena llote.

<sup>34</sup> Naiñaiño Jesús llote:

—Ñoo, cuena o #nua jira, jai jillodio. Mai marena o jai. O duicomona jai jillobidio.

<sup>35</sup> Naiñaiño diga Jesús nia ñaitemo, Jairo jofomona jiaino bite. Jairomo llote:

—O jisa jai fiodaite. Maestrona ñaidoñeno.

<sup>36</sup> Iena cacajano, Jairomo Jesús llote:

- O começi jarire iñeno; ia cuena nia ñno.  
<sup>37</sup> Ailluena comini naimie diga jaillana rairuide. Dani diese jaillana jitaide: Pedro, Jacobo, Juan. Juandi Jacobo ama.  
<sup>38</sup> Jairo jofomo rillanona, nainomo itino eecuinaillana cacade. Failliñailana cacade.  
<sup>39</sup> Jesús fo jailla mei, nainomo itinomo jicanote:  
 —¿Niese itomoi eecuinailla? Cuemona naiñaiño fiodaiñedes. Jamai inide.  
<sup>40</sup> Iena cacajano, naiñaiño jai fiodaite uiñuamona, Jesúsri jaisitimaci. Naimacina Jesús jino oretaja mei, nai jitaño moo diga, naiñaiño ei diga, ie llofueoicaigano diga, naiñaiño ecimo Jesús jaide.  
<sup>41</sup> Naiñaiño onollina llinocaida, judíuai uaido raite:  
 —Talita, cumi. —Iena oni dobaiñuamona: “Jitaibici, mai naidacai” raite.  
<sup>42</sup> Teconi jilluanona naidacaide. Jai jilluano macarite. Naiñaiñomo doce años jai ite. Nana nainomo itino ieri eo rajicaidimaci.  
<sup>43</sup> —Bumo bie rafuena lloñeno —naimacimo Jesús llote. Guillena naiñaiñoña ecajana jiai llote.

## 6

### *Nazaretmo Jesús illa rafue (Mt 13.53-58; Lc 4.16-30)*

- <sup>1</sup> Naie illanomona Jesús oni jailla mei, ie llofueoicaigano diga Nazaretmo ride.  
<sup>2</sup> Rilla mei, sábadoruimo nainomo ite ofiracomo llofue. Iena cacajanona, nainomo itino rajicaidimaci. Raitimaci:  
 —¿Niese eo abina uiñote? ¿Bumona ie uaina ote? ¿Niese siño rafuena naimiedi finode? Naimiedi jamai bue isoidimie.  
<sup>3</sup> Naimiedi amederaima. María jito. Ie amatiáidi Jacobo, José, Judas, Simón. Naimie miriñotiaidi cai motomo jiai ite. —“Cai comena naimie ite” raillanona naimie uaina jamaidimaci.  
<sup>4</sup> Jesús naimacimo llote:  
 —Naga illanomo cominidi Jusiñamui facaina lloraima uaina feiñotimaci; iadedi naimie nairaimo naimie ia, ie jofomo naimie ia, ie comini naimie uaina feiñoiacasifede. Jamaisite. Ie isoide. Cue cominidomoina jira, cue uaina ñnoñedomoi.  
<sup>5</sup> Ie muidona nainomo siño rafuena eo finonide. Damierie duidinona jetajamona, naimacina jillotate;  
<sup>6</sup> ia naimaci ñnoñenari rajicaide. Ie mei diga nairaimo Jesús llofuecana jaide.

### *Jesúdi ie llofueoicaiganona oretaja rafue (Mt 13.53-58; Lc 4.16-30)*

- <sup>7</sup> Ie doce llofueoicaiganona Jesús uaiduanona, naimacimo ie uai iñonocai, jananiai anamona cominina jilloitallena. Ie rafuena lloñena, jiaie illanuaimo naimacina menamierie oretaiacade.  
<sup>8</sup> Raite:  
 —Ailluena rana uiñeno. Omoi abi riidollena, jiguidana uiño. Llomenicon a uiñeno. Ailluena rana omoi uiñellena, bolsana uiñeno. Ucubena uiñeno.  
<sup>9</sup> Zapatona jitajano jai. Abi omoi meidolle iniroina uiñeno.  
<sup>10</sup> Nie nairaimo omoi jaia, daacomo omoi ri. Naie nairaimo omoi ille dinori, daacomo omoi i.  
<sup>11</sup> Omoina bu feiñoiacañenia, omoi uaina bu cacarefiacañenia, naie nairaimona omoi jaillanona, omoi eilliaimo ite jearacuaina oni jaidino. Marañede rafuena naimaci finuana naimaci uiñollena, omoi eilliaina jaidino.  
<sup>12</sup> Jesús naimacimo lua mei, jaidimaci.  
 —Omoi jeacinona fainonocaillanona, Jusiñamui díbeimo omoi comeciai iuai meiduana omoi jai —llofuecana jaidimaci.  
<sup>13</sup> Janaba anamo ite cominimona Janabana oredimaci. Duidino abimo farena gia mei, naimacina jillotate.

### *Juan Bautista micori fiodailla rafue (Mt 14.1-12; Lc 9.7-9)*

- <sup>14</sup> Jesús mameci are sorilla jira. Herodes railla gobernador Jesús finoca rafuena fidide. Naimie raite:  
 —Fiodaillamona Juan Bautista micori jai jillode. Jesús raillamiedi naimie. Ie jira naimie siño rafuena finocabide.  
<sup>15</sup> Jiaie comini raisoidimaci:  
 —Elias jai bairede.

Jiaino raisoidimaci:

—Fiodaillamona Jusifamui facaina jaie lloraima micori jai jillode.

<sup>16</sup> Jesúna fidiano, Herodes comecina facade: “Juan micori ie ifogina navui jaitataticue. Fiodaillamona naimie jai jillode”.

<sup>17-18</sup> Iese comecina facade, Herodes Juan micorina navui meinetaja jira. Juan Bautista micorina nia meinetañenia, Herodes ie ama Felipe aina ote. Naiñaiño mamecidi Herodías. Ie jira Juan micori naimiemo lloste:

—O ama ai diga itio. Marañede rafuena finodio. Jusifamui iena rairuide.

<sup>19</sup> Ie muidona Herodías dinena Juan Bautista micorina jearuite. Naimiena meinetaia-cade;

<sup>20</sup> ia finonide, Juan Bautista micorina Herodes jaciruilla jira. Naimiedi Juan micorina mareuidimiena uifote. Naimie Juan micori Jusifamui rafuedo jaillana jiai uifote. Ie muidona naimie Juan micorina raise eenote. Diga icaiño naimie micori lluana cacade. Iena gaide; ia iena raise cacañede. Ie muidona Herodías naimie micorina meinetanide;

<sup>21</sup> ia ja muidomo naiñaiño sedallirui ride. Herodes cumpleaños ie rafuena finode. Ailluena illacomínina ie rafuemo uaidote. Eo ucuberedinona jiai uaidote.

<sup>22</sup> Rafuemo Herodías jisa saillamona, Herodena iobitade. Ie uaidoganona jiai iobitade. Iobillamona, Herodes naiñaiño lloste:

—O jitailla ra cuemo jica. Iena omo fecaiticue.

<sup>23</sup> Illaima uai cuemo illa jira, iena ua finoiticue. Nie isoide rana o jitaia, omo iiticue. Cue anamo ite nairai o jicadiodena, atuedo omo iiticue.

<sup>24</sup> Iena cacajano, naiñaiño ie ei dine jino jaide.

—¿Buena jicaiticue? —ie eimo jicanote.

Ie ei uai ote:

—Juan Bautista ifogina jica.

<sup>25</sup> Herodes dine raire abido billanona, lloste:

—Juan Bautista ifogi bandejamo ja joncaida, cuemo ine.

<sup>26</sup> Iena cacajano, Herodes sunaite; iadedi naimie lua jira, nainomo naimie uaidogano jiai illa jira, ie lloga uaina janoiacañede.

<sup>27</sup> Ie facaise ie soldaduaimona Herodes damie cárcelmo orede. Juan ifogina atillena ocuide. Herodes ocuilla isoi finode. Juan ifogina jaitade.

<sup>28</sup> Bandejamo naimie ifogi joncaida, iena atiano, Herodías jisamo fecade. Ieconie ie eimo fecade.

<sup>29</sup> Iena fidianona, Juan micori llofueoicaigano naimie micori abina uaibitimaci. Iena raitimaci.

*Jesús cinco mil iñiaina ecaja rafue  
(Mt 14.13-21; Lc 9.10-17; Jn 6.1-14)*

<sup>30</sup> Jesús llofueoicaigano abido bia, Jesúmo nana naimaci finoca rafuena llotimaci.

<sup>31</sup> Ie facaise ailluena comini naimaci dine biñoidimaci. Ie jira jafaici ollena abi juanide. Guillena jiai abi juanide. Ie jira Jesús ie llofueoicaiganomo lloste:

—Jafaici cai ollena, eneno oni mai cai jailli. Comini iñenanomo mai cai jailli.

<sup>32</sup> Ie muidona botedo comini iñenanomo dani jaidimaci.

<sup>33</sup> Ailluena comini naimaci oni jaillana ciodimaci. Naimacina uifamona, diga nairaiamona aisicana jaidimaci. Jesús nia riñenia, uicodo ie jaillanomo ridimaci.

<sup>34</sup> Jesús sijianona, ailluena cominina ciode. Naimacina sedallena bu iñena jira, toica llaudaiaina sedaraima iñena isoi, isoidimaci. Iena uifamona, Jesús naimacina duenaite. Ailluena rafuena naimacina llofuede.

<sup>35</sup> Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuiacade.

<sup>36</sup> Comini mai abido oreta. Ianori ite nairaiamo, ianori ite jofuemo naimaci guille ollena, bie cominina abido oreta.

<sup>37</sup> Jesús uai ote:

—Naimacina bene eca.

Uai onaisite:

—Naimaci guillena doscientos ucube raifi llomenico cai uana nibai jitaideo.

<sup>38</sup> Naimacimo jicanote:

—¿Niga llomenico omoimo ite? Mai jibuisai.

Jibuisailla mei, raitimaci:

—Cinco llomenico mena llicai diga.

<sup>39</sup> Iena cacajano, cominimo raitie illanomo dajerise ana raillena Jesús lloste.

<sup>40</sup> Naimaci cien digamierie ana raisite. Jiaino cincuenta digamierie ana raisite.



<sup>41</sup> Naie cinco llomeniconona, naie mena lliciaí diga, Jesús uanona, monamo eruaillanona, Jusiñamui iobillacinona fecade. Iemei taillude. Ie llofueoicaiganomo fecade, cominina ecallena. Iese naie mena lliciaí nana cominimo fecade.

<sup>42</sup> Nana guillanona monidimaci.

<sup>43</sup> Monillamona, fiebide guillena iraidimaci. Doce cirigaiaimo oruitatimaci.

<sup>44</sup> Cinco mil iñiaí diese guitimaci. Naimaci ainiaí, imaci uruiaí diga, jiaí guitimaci.

*Jesús jinui emododo macarilla rafue*

(Mt 14.22-27; Jn 6.16-21)

<sup>45</sup> Guilla meí, botedo ie llofueoicaigano ruica dine Betsaidamo jaillena llote. Naie facaiseconi cominina naimie nia facadote.

<sup>46</sup> Cominina facadua meí, aneduaimo dane jaide, Jusiñamui diga ñaillena.

<sup>47</sup> Jitibicaidemo, nainomo dama ite. Ie llofueoicaigano jorai motomo jai itimaci.

<sup>48</sup> Aifi naimacimo riire rilla jira, riire jaitimaci. Iena Jesús cianona, jinui emododo naimaci dine bite. Naimaci ecido naimie jaisaide;

<sup>49</sup> ia naimiena naimaci cianona, comecina facadimaci: “¿Bu joreño caimo billana ciodicaí?”

<sup>50</sup> Naimiena ciamona, nana jacinaillamona cuirioidimaci. Naie dacaiño Jesús naimacimo llote:

—Omoi joreñonicaiño. Cuesa. Jaciruiño.

<sup>51</sup> Botemo Jesús jaide. Ie facaise aifi lliciaide. Ieri eo rajicaidimaci.

<sup>52</sup> Janore guillemona ailluena cominina naimie eajana jaive ciodimaci; ia naimie uai siñonana nia raise uiñoñedimaci. Naimiena nia raise iñoñedimaci.

*Jesúdi duidinona Genesaret eniruemoto jillotaja rafue*

(Mr 14.34-36)

<sup>53</sup> Ruica dine jaillanona, Genesaret railla eniruemoto ridimaci. Nainomo sijidimaci.

<sup>54</sup> Botemona ari jaidemo, nainomo itino Jesúsna uiñoñotimaci.

<sup>55</sup> Nana naie eniruemoto aiscana jaidimaci, duidino naimie dine atillena. Naimaci biira emododo duidinona atisite. Jesús illana naimaci fidiano, iese atuidimaci.

<sup>56</sup> Diga nairaiamo naimie jaide. Nie nairaimo Jesús ria, naimaci illano motomo duidinona atisite. Jilluana jitaídimaci. Ie iniroi fueda jetallena naimiemo duere jicanotimaci. Nana naimie iniroina jetadino diese jillodimaci.

## 7

*Jesúdi comini comeciaina ñaia rafue*

(Mt 15.1-20)

<sup>1</sup> Naie facaise fariseuaí cominidi Jesús dine bitimaci. Moisés micori llogacinona llofueraíni Jerusalémona jiaí bitimaci.

<sup>2</sup> Jesús llofueoicaiganomona damerie naimaci isoi guiñenana ciodimaci.

<sup>3-5</sup> Fariseuaí dinena Jesúsno jicanotimaci:

—¿Bue ñellena omoi llofueoicaigano caí einamací rafuedo jaiñedimaci? Naimaci guiacania, naimaci onolli caí einamací llua isoi, raise jocoñedimaci. Ie jira caí abimo jecino finodomoí.

Iese jicanotimaci, naimaci einamací rafuedo naimaci jailla jira. Maraiñede rafue naimacimo suiñellena, iese ailluena judíuaí jaidimaci. Naimaci guiacania, naimaci einamací llua isoi, onollina diga icaíño jocuano, guitimaci. Mercadomona bia, naimaci einamací llua isoi, abina lleredimaci. Naimaci einamací llua isoi, tazones, ollas, bandejas jiaí jocodimaci. Iese jaisoidimaci. Comecina facadimaci: “Iese caí finoia, Jusiñamui mona mare. Iese caí finoñenia, Jusiñamui mona maraiñede. Naimie caina duere finoite”. Jearede rafue naimaci abimo oñellena, iese finouidimaci.

<sup>6</sup> Jesús uai ote:

—Mareuidinona abi caitauidinodomoí. Isaías micori jaie omoína raise llote. Naimiedi Jusiñamui llua cuete:

Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruiticaí” llotimaci.

“Ona sedadicaí” llotimaci.

Jamai ñaitimaci. Naimaci comeci caí cue díbeimo raise iñede.

<sup>7</sup> Cue uai itena, jamai comini llucinona naimaci llofuecabilla jira, tainona cuena sedadimaci

cuete.

<sup>8</sup> Isaías micori llua isoi itomoí. Jusiñamui llogacinona fainonocaida, omoi einamací rafuedo jaidomoí.

<sup>9</sup> ¿Bue ñellena nana Jusiñamui llogacínodo jaiñfedomoi? Omoi einamací llogacínodo jaidomoi; iadedi nana Jusiñamui llogacínodo raise jaiñfedomoi.

<sup>10</sup> Moisés micorí jaié llote: “O moo uai ñnuanona, naimiēna cano. O ei uai ñnuanona, naiñaiñona cano. Ie moorí jeare ñaitimie, ie eirí jeare ñaitimie meinelle”.

<sup>11-12</sup> Iese Moisés micorí llote; iadedi omoi einamací llotimaci: “Jusiñamuimo cai ucubena cai fecajamona, cai moora, cai eina jai canonidicai”.

<sup>13</sup> Iese omoi finocabilla jira, omoi einamací llogacínodo omoi jaillamona, Jusiñamui uaina jamaidomoi. Bie isoide rafuedo jaca jaidomoi.

<sup>14</sup> Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoi uiiñollena, cue lluomo cacarei.

<sup>15</sup> Omoi einamací isoi omoi guíñenia, naimaci isoi omoi onollina omoi jocoñenia, omoi comeciaina jearetañedomoi. Omoi guillamona, omoi onollina jucamona. Jusiñamuina nabaiñedomoi. Omoimo jeacino illa jira, Jusiñamuina nabaiñedomoi. Omoi comeciái jearena jira, jeacina finocabidomoi.

<sup>16</sup> Omoi jeforena jira, raise fueollena, cue lluomo cacarei. Iena ñino.

<sup>17</sup> Cominimona oni jaillanona, Jesús ie risoilla jofomo jaide. Nainomo ie llofueoicaigano aillinano ie lluaña jicanotimaci.

<sup>18</sup> Uai ote:

—¿Ñiese cue lluaña jiaí nia cacaiñedomoi? Nie isoide ra guitomoina, omoi comeciáimo jeare iñede.

<sup>19</sup> Omoi comeciáimo jaiñede; ia omoi jebemo jaide. Ie mei omoi abiaimona jino bite.

Jesús lluamona, nana guille radi mare uiiñotícaí.

<sup>20</sup> Jesús llote:

—Omoi comeciái jearena jira, jearede rafuena finocabidomoi.

<sup>21</sup> Omoi comeciái jearena jira, jeare comeciaina facacabidomoi. Omoi aiñede riño diga icabitomoi. Omoi ñiñede iima diga icabitomoi. Fñricabitomoi. Cominina meinecabitomoi.

<sup>22</sup> Jiaí comini rana nicidocabitomoi. Jearede rafuena finocabidomoi. Iena eburitomoi. Jifuericabitomoi. Abina uradoicabitomoi. Jiaie comini joreñona jeare ñaicabitomoi. Abina iedocabitomoi. Ebena jaicabitomoi.

<sup>23</sup> Bie isoidicinuai omoi comeciáimo illa jira, jearede rafuena finocabidomoi; iadedi omoi einamací llua isoi, omoi onolli jocoñenamona jeacino comuiñede.

*Jesúsdi judío iñaiñodeñaiñona jillotaja rafue  
(Mt 15.21-28)*

<sup>24</sup> Nainomona Jesús jaillanona, Tiro railla eniruemo jaide. Sidón railla eniruemo jiaí jaide. Nainomo jofomo jaillanona, iena buna fidiana jitañede; ia iena janonide.

<sup>25-26</sup> Ie facaise judío iñaiñodeñaiñona dañó bite. Naiñaiñodi sirofenicia nairai iñaiño. Ie jisa Janaba anamo ite. Jesúna fidianona, naimie dine bite. Naimiēna raise uaiduanona, naimie ecimo ana bitadate. Ie jisamona Janabana oni oretallena Jesúmo duere jicade.

<sup>27</sup> Judúaiñedinona naimie canoñenana naiñaiño uiiñollena, naiñaiñomo Jesús llote:

—Uruiaí guillamona jiconiaina ecadicaidena, maraiñede. Uruiaí nano ecadicai.

<sup>28</sup> Naiñaiño dinena uai ote:

—Jii, maestro; iadedi jiconiaidi uruiaí guillamona fiebide guillemona gutimaci. —Iese llote; ia jiaie rafuemo comicina facade. Uruiaína llote; iadedi judúaiño comecina facade. Jiconiaina llote; ia judúaiñedinomo jiaí comecina facade. Comecina facade: “O cominimo o rafue duide; ia cai Namana o illa jira, nibaí o rafue caimo janore duide”.

<sup>29</sup> Jesús uai ote:

—Raise llotio. O jofomo mai abido jai. O jisamona Janaba oni jaide.

<sup>30</sup> Naimie llua isoi jofomo jaide. Ie jisa biiramo biidena ciode. Janaba naiñaiñomona oni jaillana jai uiiñote.

*Jesús jefona cacaiñedimiena jillotaja rafue*

<sup>31</sup> Tiro railla eniruemona Jesús oni jaide. Jaillanona, Sidón railla eniruemo jaide. Decápolis railla eniruemo jiaí jaide. Ja muidomo Galilea railla jorai fuemo ride.

<sup>32</sup> Iena fidiano, naimie dine comini jefona cacaiñedimiena atide. Naimie gogoma. Naimiēna jilloitallena, naimiemo ie onolli jonellena Jesúmo jicadimaci.

<sup>33</sup> Ailluena comini naimie dine jai billa jira, jefona cacaiñedimiena eneno oni uite. Nagafebe jefomo onocai ñuitade. Ie onocaimo tuajanona, iima iifena jetade.

<sup>34</sup> Jusiñamui dine monamo eruaita, naimiēna duenailamona, jafaicína faite. Judúai uaido naimiemo llote:

—¡Efata! —Oni dobaiñuamona: “¡Ecoricai!” raite.

<sup>35</sup> Ieconí ie jefodí ecoricaide. Jai raise cacade. Jai raise ñaite.

<sup>36</sup> Cominimo:

—Bimie jai jilluana bumio lloñeno —Jesús diga icaíño llote; ia naimie uaina inoñedimaci. Iena llocana uitimaci.

<sup>37</sup> Naimieri eo rajjicaidimaci. Coninina naimiena raitimaci:

—Naga rafuena raise finode. Jefona cacaiñedimiena jai jillotote. Gogonaitimiena jai jillotote.

## 8

*Jesúdi cuatro mil iñiaina ecaja rafue*

*(Mt 15.32-39)*

<sup>1</sup> Naie facaise naimie dine ailluena comini illanona, naimaci guille jai iñena jira, Jesús ie llofueoicaigano naimie dine uaidote. Raite:

<sup>2-3</sup> —Bie comini darui amani bene cue diga illa jira, naimacimo guille jai iñede. Damierie eo aarena bitimaci. Naimacina aimeri oretaiacaiñedicue, naisomo naimaci baii raillano. Naimacina cue duenailla jira, naimacina canoiacadicue.

<sup>4</sup> Jicanotimaci:

—¿Niese naimacina bene ecaiticaí? Jofue iñenanomo iticai.

<sup>5</sup> Jesús jicanote:

—¿Níga llomenico omoimo ite?

Uai otimaci:

—Siete.

<sup>6</sup> Comini ana raillena Jesús llote. Naie llomenicono uanona, Jusiñamuimo iobillacinona fecade. Tailluanona, ie llofueoicaiganomo fecade, naie cominimo fecallena. Iena finodimaci.

<sup>7</sup> Naimacimo janore llicisiriai jiai ite. Ie facaina Jusiñamuimo iobillacinona fecaja mei, cominimo fecallena Jesús llote.

<sup>8</sup> Nana gutimaci. Monidimaci. Monillamona, fiebide guillena iraidimaci. Siete cirigaiaimo oruitatimaci.

<sup>9</sup> Nainomo cuatro mil iñiaí gutimaci. Naimaci ainiaí, imaci uruiaí diga, jiai gutimaci.

<sup>10</sup> Guilla mei, cominina naimaci jofuemo Jesús orede. Ie llofueoicaigano diga, botemo jaillanona, Dalmanuta railla eniruemo jaide.

*Fariseuai comini Jesúmo siño rafuena finuana jicanuano billa rafuena*

*(Mt 16.1-4; Lc 12.54-56)*

<sup>11</sup> Dajerie fariseuai comini Jesús dine bitimaci. Naimie uaina uaitaiacadimaci. Naimiena facacillena, siño rafuena finuana jicanoiacadimaci. Iena naimie finoñedena, naimie ie llua isoi iñenana uifnotimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

<sup>12</sup> Sunaillanona, Jesús jafaici faite. Raite:

—¿Bue ñellena siño rafuena finuana cioiacadomoi? Omoi facaina iena finoñeiticue.

<sup>13</sup> Ie llua mei, naimacimona oni jaidimaci. Ie llofueoicaigano diga, botemo dane jaillanona, ruica dine Jesús jaide.

*Jesús siritate rana llofuia rafue*

*(Mt 16.5-12)*

<sup>14</sup> Ruica dine rilla mei, Jesús llofueoicaigano llomenicono feillana uibiñotimaci. Naimacimo daje llomenico ite.

<sup>15</sup> Iena naimie uifnuamona, naimacimo Jesús llote:

—Fariseuai siritate ramona abina rairui. Illaíma Herodes siritate ramona abina rairui. —Iese Jesús llote; iadedi naimaci llofuiaicnomona abi rairuillena ñaite.

<sup>16</sup> Jesús iese llua jira, iena naimaci raise cacaiñena jira, daní coniniri siadotimaci:

—Llomenicono cai atañena jira, caimo iese llote.

<sup>17</sup> Naimaci siaduana Jesús uifnuu jira, naimie llua naimaci raise nia cacaiñena jira, naimacimo jicanote:

—¿Bue ñellena iese siadotomoi? ¿Niese cuena inoñedomoi? Cuemo siño uai illana nia raise cacaiñedomoi.

<sup>18</sup> Uisiredomoi. Jeforedomoi. ¿Niese cue navui siño finoca rafuemo comeciaina facañedomoi?

<sup>19</sup> Navui cinco mil iñiaí cinco diga llomenicono gutimaci. Monillamona, guigamona fiebillamona, ¿níga cirigaiaimo iraidomoi?

Uai otimaci:

—Doce.

<sup>20</sup> Jesús llote:

—Jiaicaiño cuatro mil iññiai siete diga llomenicon a guitimaci. Monillamona, guigamona fiebillamona, ¿niga cirigaiamo iraidomoi?

Uai otimaci:

—Siete.

<sup>21</sup> Jesús dinena jicanote:

—¿Niese cuena nia raise iñoñedomoi? Siño uai cuemo illana nia raise iñoñedomoi.

*Jesús uisínidimiena jillotaja rafue*

<sup>22</sup> Oni macarillanona, Betsaidamo Jesús, ie llofueoicaigano diga, ride. Ie facaise naimie dine comini uisínidimiena atide. Naimiena jilloitallena, naimiena jetallena, Jesúmo jicanote.

<sup>23</sup> Iena Jesús cacajanona, ie onollina llinuanona, nairai illa jinofemo uisínidimiena uite. Ie mei ie uisina tuade. Ie uisina jiai jetade. Naimiemo jicanote:

—¿Buena ciodio?

<sup>24</sup> A eruaiñlanona, uai ote:

—Comini macarillana ciodicue; ia amena isoi eruaidimaci. Nia raise cionidicue.

<sup>25</sup> Ie uisina Jesús dane jetade. Iemona oni erocaillamona, jai jillode. Jai raise ciode.

<sup>26</sup> Jai jillua jira, ie jofomo naimiena abido orede. Jesús llote:

—Betsaidamo itino o jilluana lloñeno; ia nainomo jaiñeno o jofomo mai abido jai.

*Pedro Jesúsna llua rafue*

*(Mt 16.13-20; Lc 9.18-21)*

<sup>27</sup> Cesarea Filipino enirueemo ite nairaiamo Jesús jaidemo, ie llofueoicaiganomo jicanote:

—¿Niese jiaie comini cuena raitimaci?

<sup>28</sup> Uai otimaci:

—Damierie raitimaci: “Juan Bautista micoridio”. Damierie raitimaci: “Odi Elíadio”. Jiaino raitimaci: “Jusiñamui facaina jaie ite llorainimona damie jai jillode. Imedio”.

<sup>29</sup> Jesús dane jicanote:

—¿Niese omoi cuena raitomoi?

Pedro uai ote:

—Odi cai jilloitaraimadio. Jusiñamui facaina lloraini micoriai o billena jaie llotimaci

<sup>30</sup> Jesús iena bumo lluaana rairuide.

*Jesús ie fiodaillena llofuia rafue*

*(Mt 16.21-28; Lc 9.22-27)*

<sup>31</sup> Ie facaise ie llofueoicaiganona ie duere sefuillena llofuede. Llote:

—Cai judíuai illaicomini cuena eo duere finoitimaci. Cuena jitaiñellemona, cuena meineitimaci; iadedi darui amani illanona, fiodaillamona jilloiticue.

<sup>32</sup> Iena marefodo naimacimo llote. Iena cacajano, Pedro dinena lletade:

—Dama ite. Iese lloñeno. Bie isoide rafuena lloñeno.

<sup>33</sup> Ie llofueoicaiganomo erodajanona, Jesús Pedromo riire llote:

—Cuemona oni jai. Iese ñaiñeno, Taiife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio.

<sup>34</sup> Naimie dine ailluena comini uaidua mei, ie llofueoicaigano nainomo jiai illanona, naimacimo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibai naiemona fiodaite. Bu lese jaiacania, cue dibeimo naimie iite.

<sup>35-37</sup> Duere sefuillana jaciruillamona, cue cominina bu jaiacaiñenia, ja mudidomo faifite; iadedi duere sefuillana jaciruiñenamona, cue cominina bu jai, jaca faifíñeite. Cue cominina bu jaiñenia, nibai eo duere sefuiñeite. Nibai ailluena ra naimiemo iite; ia, ¿niese cue Moo dine riite? Nainomo naimie riñeno faifite.

<sup>38</sup> Birui ite comini Jusiñamuina jitaiñedimaci. Naimiena jai fañonocaidimaci. Jeacinona finocana jaidimaci. Cuena bu meiruia, cue rafuena bu meiruia, dane cue bia, naimiena meiruiticue. Cuena meiruillamona: “Cristomo duidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaienisai diga, cue Moo dinena, monamona ico biiticue. Cue Moo uai cuemo illanona, ebire biiticue.

## 9

<sup>1</sup> 'Omoimo uanaicinona lloticue. Omoimona dajerie nia fiodaiñeitomoi, illaimana ebire cue bairellena ciotomoi.

*Jesús abi meidocailla rafue*

*(Mt 17.1-13; Lc 9.28-36)*

<sup>2</sup> Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobo jiai uite. Juan jiai uite. Jiaie llofueoicaiganona uifñede. Nainomo rilla mei, naimaci uicomo naimie abi meidoaide.

<sup>3</sup> Naie dacaño naimie iniroi eo quenirecaide. Eo userecaide. Cai iniroimo jítoma lligaiñuamona ie isoi usere jaca jaiñede.

<sup>4</sup> Naie facaise naimacimo Moisés micori joreño, Elías diga, bairede. Elíadi Jusiñamui facaina jaie lloraima. Jesús diga ñaitiñaimaia.

<sup>5</sup> Iaimaia jaiacania, Pedro Jesús mo llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie.

<sup>6</sup> Eo jaciruilla jira, naimie ñaia rafuena raise uifñoño jamai ebena ñaite.

<sup>7</sup> Eo facaise uillie billamona, naimacina ibaide. Uilliemona Jusiñamui llote:

—Bimie cue isiruiga Jito. Naimie luamo cacareillanona, iena ñino —llote.

<sup>8</sup> Iecononi erodajanona, dama Jesúsna ciodimaci. Jiaionona cioñedimaci.

<sup>9</sup> Anedumona bitimacimo, naimacimo Jesús llote:

—Omoi ailli cúa rafuena bumo lloñoño, cue fiodaillamona cue jillua dinori.

<sup>10</sup> Jesús llua isoi finodimaci. Iena bumo lloñedimaci; ia fiodaillamona naimie jilluana naimaci raise nia cacaiñena jira, iemo comecina facadimaci.

<sup>11</sup> Naimiemo llotimaci:

—Moisés micori llogacinona llofueraini birui raicabitimaci: “Elías raillamie dane biite. Eo mei cai Jilloitarama biite” raitimaci. Jusiñamuimona o billana inoticaí. Odi cai Jilloitarama inoticaí. Odi cai Jilloitaramadiomo, ¿bue ñelli iese raitimaci?

<sup>12</sup> Uai ote:

—Raise inotomoi. Elías isoidimie jai bite, nana Jusiñamui jitailla rafue raise lloñena. Jusiñamui dibeimo naimaci illena, comini imaci comeciaí meiduana llote. Jusiñamui facaina lloraini micoriaí cue eo duere sefuillena cuetimaci. Comini cue jeare finollena cuetimaci. Iemo omoi comeciaina jiai faca.

<sup>13</sup> Elías isoidimie jai bite; iadedi Jusiñamui facaina lloraima micori jaie cuega isoi, naimaci jitailla jira, naimiema jai meinetimaci.

*Jesúsdi Janaba anamo itimiena jillotaja rafue*

*(Mt 17.14-21; Lc 9.37-43)*

<sup>14</sup> Eo jiaie llofueoicaigano dine Jesús abido ria, nainomo ailluena comini itimacimo ride. Moisés micori llogacinona llofueraini dinena ie llofueoicaigano uaina uaitaside.

<sup>15</sup> Jesús billana comini cuanona, jacainaisidimaci. Naimiema feiñollena, naimie dine aisida jaidimaci.

<sup>16</sup> Moisés micori llogacinona llofuerainimo Jesús jicanote:

—¿Niese cue llofueoicaigano uaina uaitatomoí?

<sup>17</sup> Uai oñedimaci; ia cominimona damie uai ote:

—Maestro, Janaba anamo cue jito illa jira, o dine naimiema atidicue. Cue jito Janaba anamo illamona ñainide.

<sup>18</sup> Nagarui Janaba bille diese, naimiema eniruemo uaitate. Iemona fuedi mullede. Eo isidodi murude. Eo abi jaiare jaide. O llofueoicaiganomo jicadicue, Janabana oni oretallena; ia oretanidimaci. Eo jira Moisés micori llogacinona llofueraini bie rafuena, o llofueoicaigano diga, uaina uaitatimaci.

<sup>19</sup> Iena cacajanona, Jesús ie llofueoicaiganomo llote:

—Cue uai siñonana nia inoñedomoi. Omoi diga are iticue. Raise omoi inollena, ¿nie dinori omoi diga iiticue?

Naie duidimie moomo llote:

—O jito cue dine mai ati.

<sup>20</sup> Naie urue Jesús dine atianona, Janaba naimiema naillitate. Iemona urue eniruemo uaide. Jabi-jabide. Fue mullede.

<sup>21</sup> Jesús dinena naie urue moomo jicanote:

—¿Nie dinori o jítodi bie isoi ite?

Uai ote:

—Naimie uruenamona.

<sup>22</sup> Janabadi, diga icaíño iraimo usillena, naimiema uaitate. Corobaillena, diga icaíño jinuímo jiai uaitate. Janaba oni o retarenia, cocona duenaillamona, cocona cano.

<sup>23</sup> Jesús uai ote:

—“O oretarenia” raitio. Ero, o jito jillotaredicue. Cuena o inoia, o jito jilloite.

<sup>24</sup> Naie urue moo ieconí llote:

—Ona inoticue. Raise nia cue inoñenia, cuena raise inota.

<sup>25</sup> Naie facaise ailluena comini naimie dine raire ofillana naimie ciuanona, Jesús Janabana lletade:

—Bie uruena ñaitañedio. Naimiena cacaitañedio. Naimiemona oni jai. Naimie dine dane biñeno.

<sup>26</sup> Ado cuirioillanona, naimiena eo riire naillitajanona, Janaba oni jaide. Iemona naie urue fiodaítimie isoi eroacade. Naimiena ciuanona, nainomo itino raitimaci:

—Naimie jai fiodaite;

<sup>27</sup> —ia Jesús naimie onollina llinocaida, naimiena a naidanete.

<sup>28</sup> Iemona oni jaillanona, damie jofomo Jesús nailli ria, naimiemo ie llofueoicaigano anado jicanotimaci:

—¿Bue ñellena Janabana oni oretanidicai?

<sup>29</sup> Jesús uai ote:

—Jusiñamuimo omoi jiamona, naimiena raise omoi inuamona, bie isoide Janabana oretaredomoi. Naimiena omoi raise inoñena jira, bie uruemona Janabana oni oretañedomoi.

*Jesús ie fiodaillena dane llofua rafue*

(Mt 17.22-23; Lc 9.43-45)

<sup>30-31</sup> Ie llofueoicaigano diga Jesús oni jaillanona, Galilea railla eniruemo jaide. Ie llofueoicaiganona naimie llofueiacana jira, naimie ie jaillana jiaie comini fidiana jitañede. Naimacimo lote:

—Monamona billanona, imana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci. Naie illaicomini cuena meineitimaci; iadedi darui amani illanona, jilloiticue.

<sup>32</sup> Ie llofueoicaigano iena raise cacaitañedimaci; ia naimiemo iena jicanuana meirutimaci.

*Jesús ie llofueoicaigano moto imiēna ille rafue*

(Mt 18.1-5; Lc 9.46-48)

<sup>33</sup> Capernaumo Jesús rilla mei, ie risoilla jofomo naimie ia, ie llofueoicaiganomo jicanote:

—Naisona cai bia, ¿nie isoide rafuena coniniri siadotomoi?

<sup>34</sup> Uai oñedimaci. Naimaci moto imiēna illena, naisodo siadocana bitimaci. Meiruilanona, uai oñedimaci.

<sup>35</sup> Naimie ana rainadaja mei, ie ecimo naimacina uaidote. Raite:

—Omoi moto imiēna bu iacania, jamai bue isoidimiēna naimie illa. Omoi muillaimana naimie jailla isoilla.

<sup>36</sup> Iena naimaci raise uiñollena, nainomo ite cominimona daje urue bai jainanocaida, naimaci motomo naimiena jonete. Naimiena menioita, naimacimo lote:

<sup>37</sup> —Jusiñamuimona bie urue jamai bue isoide. Abina iedoñede. Bie isoidimie cuemo duillamona, naimiena feiñotimiedi cuena jai feiñote. Cuena feiñotimie Jusiñamuina jiai jai feiñote, Jusiñamui cuena oretaja jira.

*Jesúdi ie dibeimo itinona llua rafue*

(Mt 10.42; Lc 9.49-50)

<sup>38</sup> Naie facaise ie llofueoicaiganomona Jesúsno Juan llote:

—Maestro, o mamecido jananiaina oretacabitimiēna ciodicai. Cai diga naimie jaicabiñena jira, iena finuana rairuidicai.

<sup>39</sup> Jesús uai ote:

—Naimiena rairuiñeno. Cue mamecido siño rafuena bu finoia, cuena jeare raire ñaiñeite.

<sup>40</sup> Cai dibeimo itimiedi cai facaisena ite.

<sup>41</sup> Ero, cuemo omoi duillamona, omoina bu janore canoia, Jusiñamuimona ibana feiñoite. Omoi mo nibai jamai jinuina fecaitite; iadedi omoina naimie canuamona, Jusiñamuimona ibana feiñoite. Ie jira naimie isoidino siño rafuena finuana rairuiñeno.

*Jesúdi jeacinona finoñenana llofua rafue*

(Mt 18.6-9; Lc 17.1-2)

<sup>42</sup> Jesús nia llofueite:

—Cuena como inotinona jeacinona finotaiacadimie iena finoñellena, naimie cimaimo aillue nofici maianona, joraimo corobaillena naimiena dotacadena, mare.

<sup>43-48</sup> Biena ñaiticue. Nie isoide rafue omoina jeacino finotaia, iena llinoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacinona finocabidomoi. Omoi abina omoi namatañenia, omoi onollina jaita. Omoi eillina jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacino omoi finoia, iraimo jaitomoi. Nana omoi abi diga iraimo jaitomoi. Omoi comecina ñaiticue. Omoi abina omoi raise namatallena,

omoi comeci nano raise fino. Iraimo omoi jaiñellena, jeacino finoñeno. Naimacimo ite aiaí fiodaíñena jira, naie irai jaca duiñenamona, nainomo itino jaca duere sefuitimaci.

<sup>49</sup> Ero, birui omoi duere sefuillamona, cue cominina jai jaidinona uifioiticue.

<sup>50</sup> Guille caimaretallena, sal mare; iadedi ie caimano jai iñenia, iena dane caimaretañedicaí. Ie isoide. Jeacino omoi finoia, omoi comeciaí caimare iñede. Jusiñamui jitaillacinona omoi finuamona, coniniri caimare omoi i. Coniniri uri omoi i.

## 10

*Jesús iima ie aina dotaja rafuena llofua rafue*

*(Mt 19.1-12; Lc 16.18)*

<sup>1</sup> Capernaumona ie llofueoicaigano diga, Jesús oni jaillanona, Judea railla enirue dine jaide. Jordán railla ille ruica díbeimo jaide. Ailluena comini naimie dine ofillamona, naimie llofueuilla isoi, naimacina llofueite.

<sup>2</sup> Naimiena facacillena, dajerie fariseuaí naimie dine bitimaci. Rafuena jicanoiacadimaci. Naimaci uai naimie raise ofñenia, naimiena duere finoacadimaci. Jicanotimaci:

—¿Iima ie aina dotajana rairuidio?

<sup>3</sup> Uai ote:

—¿Niese Moisés micori llote?

<sup>4</sup> Uai otimaci:

—Moisés micori jaie cuete: “Iima ie aina dotaacania, dotalle rabena nano cueite. Ie mei naiñaiñoña dotaite”.

<sup>5</sup> Jesús uai ote:

—Jusiñamui uaina raise omoi iñoñena jira, Moisés micori iima ie aina dotajana rairuiñede;

<sup>6</sup> iadedi nano dofoconi iese iñede. Enirue finua facaiseconi Jusiñamuidi come iaímaiaina finode. Himana finode. Riñoña jiaí finode.

<sup>7</sup> Ie jira Jusiñamuidi jaie llote: “Ie ai diga illena, iima ie moona faimonocaite. Ie aina jiaí faimonocaite. Ie ai diga illamona, menade comedi daamiña jai jaide” llote.

<sup>8</sup> Menade come jai daamiña jai ite.

<sup>9</sup> Jusiñamui iese iaímaiaina itataja jira, iima ie aina dotajana rairuidicue. Riño ie inina dotajana rairuidicue.

<sup>10</sup> Jofomo ie llofueoicaigano diga, naimie nailli illanona, naimiemo bie rafuena jicanotimaci.

<sup>11</sup> Jesús dinena llote:

—Jiaie riño diga naimie illena, ie aina bu dotaia, naimiedi jeacinona jai finode. Ie aina jeare jiaí finode.

<sup>12</sup> Ie inina faimonocaillanona, jiaímiña nie riño uamona, naiñaiño jeacino jai finode.

*Jesúdi naimie dine uruiaí billana jitailla rafue*

*(Mt 19.13-15; Lc 18.15-17)*

<sup>13</sup> Naie facaise Jesús dine comini naimaci jesanide diese atidimaci. Ie onolli naimacimo naimie joniana jitaídímaci. “Naimacina raise cano” ie Moomo lollena jitaídímaci. Ie llofueoicaigano iena rairuidímaci;

<sup>14</sup> iadedi iena cacajano, Jesús icirite. Jesús raite:

—Uruiaí cue dine billesa. Naimacina rairuiñeno. Cuen a bie isoi iñotínodi Jusiñamui cominidímaci.

<sup>15</sup> Bie uruiaí abina iedoñedímaci. Einamacimona jamai bue isoidímaci. Naimaci isoi bu iñenia, Jusiñamui cominina jaiñeitímaci. Jusiñamui naimiena sedallena, Jusiñamui cominina naimie jaiñeite.

<sup>16</sup> Naie uruiaí dasarie meni-menioicaida, naimaci ifogimo ie onollina joneta:

—Jusiñamui omoína canoite —llote.

*Ucuberedímie Jesús diga ñaia rafue*

*(Mt 19.16-30; Lc 18.18-30)*

<sup>17</sup> Ie llofueoicaigano diga Jesús oni jai jaillanona, aiscana damie naimie dine bite. Naimiena raise uaidollena, ie caíñici ifodo rainadate. Raite:

—Maestro, odi maremedio. Jusiñamui diga ico cue jaca illena, ¿buena finoiticue?

<sup>18</sup> Jesús uai ote:

—¿Bue ñellena odi: “Mare” cuena raitio? Dama damie maremie. Naimiedi Jusiñamui. Naimiemo jicano.

<sup>19</sup> Moisés micori llogacinuaina iñocana jai. Jaie cuete: “Comena meineñeno. O aiñede riño diga iñeno. Fiiñeno. Jiaímiña o llogidoia, tainona lloñeno. O moo uaina iño. O ei uaina iño”.

<sup>20</sup> Uai ote:

—Maestro, uruena cue illa facaisemona nana bie llogacinuaina iñoticue.

<sup>21</sup> Jesús dinena naimiemo eruaillanona, naimie ie comecido jaide. Naimiemo llote:

—Omo daje rafue fiebide. Jusiñamui jitaillacinodo o jaiacania, o raise marebicaiacania, omo ite raruiaina feca. Naie ucubena dueredinomo feca. Cuena o #nuamona, monamo ico jaca iitio. Cue llofuegamiena o illena, mai cue diga bi.

<sup>22</sup> Iena cacajano, naimiedi sunaite. Eo aillue ra naimiemo illa jira, iena naimie fecaa-caiñena jira, sure jaide.

<sup>23</sup> Naimie jailla mei, ie llofueoicaiganomo eruaillanona, naimacimo llote:

—Ucuberedinodi Jusiñamui cominina jaillena eo sefuiruitimaci.

<sup>24</sup> Iena cacajano, iena naimaci raise cacaiñena jira, Jesús dane llote:

—Cue cominidomoi. Ero, ucuberedimiedi Jusiñamui cominina jaillena eo sefuiruite.

<sup>25</sup> Igo ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiai raise jainide.

<sup>26</sup> Iena ie llofueoicaigano cacajano, Jusiñamui cominina ucuberedino raise jainina jira, “¿Niese dueredinodicaidi Jusiñamui cominina jaitica?” raillamo comeciaina facadimaci. Raijicaillanona, coniniri raitimaci:

—Nana comini rana jitailla jira, ¿buca jillobiti?

<sup>27</sup> Naimacimo eruaillanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

<sup>28</sup> Pedro dinena llote:

—O llua isoi jai finodica. Nana cai rana fainonocaida, o diga jai jaicabidica.

<sup>29</sup> Jesús uai ote:

—Uanaicino lloiticue. Cuena naimie isiruillamona, cue rafuena naimie lluaamona, ie jofona bu fainonocaia, ie amatiana bu fainonocaia, ie miriñuain bu fainonocaia, ie moonu bu fainonocaia, ie eina bu fainonocaia, ie uruiaina bu fainonocaia, ie enruena bu fainonocaia,

<sup>30</sup> Jusiñamuimona birui ailluena ibana feiñoite. Duere sefuite; ia naimie isoi cue cominina ailluena jaillamona, naimie jofue iite. Ie amatiai, ie miriñuai, ie eitiai, ie urui, ie enruue birui iite. Monamo naimie ico caimare iocire jaca iite.

<sup>31</sup> Birui damieriemo ailluena ra illamona, Jusiñamuimo eo comecina facañedimaci. Naimacimona jamai bue isoifedimaci; ia Jusiñamuimona ico jamai bue isoitimaci. Jaiinomo ailluena ra birui iñede; ia Jusiñamuimo comecina facadimaci. Naimacimona jamai bue isoidimaci; ia Jusiñamuimona ico jamai bue isoifeitimaci.

*Jesús ie fiodaillena dane llua rafue  
(Mt 20.17-19; Lc 18.31-34)*

<sup>32</sup> Jerusalémo nia jaillanona, Jesús uicodo jaide. Nainomo naimie jaciruiñeno jaillamona, ie llofueoicaigano raijicaidimaci. Naimaci diga jaidino jaciruiocaida jaidimaci. Naimacina jiai meiniana jaciruitimaci. Ie llofueoicaigano diga ñaianona, naimiemo suille rafuena llote:

<sup>33</sup> —Ero, Jerusalémo jai jaidica. Monamona billanona, imana jaidicue; iadedi omoi illaicomini cuena gaitaitimaci. Gaitaja mei, cue meinellena lloitimaci. Judiaifñedino illaicominimo cuena fecaitimaci.

<sup>34</sup> Cueri jifanoitimaci. Cuena tuallaitimaci. Cuena faitimaci. Cuena meineitimaci; iadedi cue fiodailla mei, darui amani illanona, jilloiticue —llote.

*Jesús dine Jacobo Juan iaiaiaiai billa rafue  
(Mt 20.20-28)*

<sup>35</sup> Naie facaise Jesús dine Jacobo, Juan diga bitiaiaiaiai. Iaiaiaiai moodi Zebedeo. Raitiaiaiaiai:

—Omo coco jicalle rafue cocoena finuana jitaidicoco.

<sup>36</sup> Jesús uai ote:

—¿Nie isoide rafuena jitaidomico?

<sup>37</sup> Uai otiaiaiaiai:

—Illaimana o jailla mei, o ecimo coco illena o lluaana jitaidicoco. Damie o nabeimo. Jaiimie o jarifebeimo. —Jiaino afemo iaiaiaiai illena, iese llotiaiaiaiai.

<sup>38</sup> Jesús dinena llote:

—Omico jicanuana raise uifñedomico. Cue eo duere sefuiticue. Llegi cacaiticue. ¿Ie isoi duere sefuiaicadomico? ¿Ie isoi llegi cacaiacadomico?

<sup>39</sup> Uai otiaiaiaiai:

—Jii. Sefuiaicadicoco.

Jesús dinena raite:

—Cue isoi duere sefuitomico. Llegi cacaitomico;



<sup>40</sup> iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

<sup>41</sup> Iena jiaie llofueoicaigano cacajano, naie ia:imaia:ri iciritimaci.

<sup>42</sup> Jesús nana naimacina uaiduanona, raite:

—Nana illaicominidi naimaci anamo itinona ocuicabidimaci;

<sup>43</sup> iadedi omoi dine iese ifena. Omoimona bu imi:ena iacania, omoi mulla:imana naimie jaisoillasa.

<sup>44</sup> Omoimona bu imi:ena iacania, omoina naimie canocana jaisoillasa.

<sup>45</sup> Cuemona fueo. Biñedicue, cominina cue ocuillena; iadedi cominina canua:ibidicue. Cue jitailla jira, nana comini facaina fiodaisaibiticue. Naimaci jeacinomona naimaci jillobillena, fiodaisaibiticue. Ailluena comini cuena inuamona, jilloitimaci. Coninina omoi canua —lote.

*Jesúdi Bartimeona jillotaja rafue*

*(Mt 20.29-34; Lc 18.35-43)*

<sup>46</sup> Oni jaillanona, Jericó railla naira:imo Jesús ride. Naiemona ie llofueoicaigano diga jaillanona, ailluena comini Jesús jinafona racadimaci. Naie facaise nai fueo uisinidimie raide. Naimie mameci Bartimeo. Timeo jito. Nainomo jamai raide, ucubena jamai jicajcallena.

<sup>47</sup> Nazaret ie Jesús jaillana naimie cacajano, ado cuirioide:

—David micori Jitona o illamona, Jusifnamuimona o billa jira, cuena duenai. Cuena cano.

<sup>48</sup> Naimie llicaiillena, Jesús diga jaidino naimi:ena lletade; iadedi eo cuirioide:

—Maestro, David micori Jitona o illamona, cuena duenai.

<sup>49</sup> Naimi:ena cacajano, Jesús naidadajanona, llote:

—Naimi:ena cue dine uaido.

Bartimeona uaiduanona, raitimaci:

—O comecina ocuiño. Mai naidacai. Jesús ona uaidote.

<sup>50</sup> Iena cacajano, ie emodomo itiroina duiñuanona, raire naidacaida, Jesús dine bite.

<sup>51</sup> Naimiemo Jesús jicanote:

—¿Niese ona cue niba:iana jitaideo?

Uai ote:

—Maestro, cioacadicue.

<sup>52</sup> Jesús dinena uai ote:

—Cuena o inua jira, jai jillodio. Mai jai. —Ieconí naimie jai ciode. Jesús diga jaidino diga naimie jiai jaide.

## 11

*Jesús illa:ma isoi Jerusalémo jailla rafue*

*(Mt 21.1-11; Lc 19.28-40; Jn 12.12-19)*

<sup>1</sup> Oni jaillanona, Jerusalémo ia:reicaidimacimo, Betfagé railla naira:imo ie llofueoicaigano diga Jesús ride. Betania nainomo jiai ite. Olivos railla anedumo naga naira: ia:imaia: ite. Ie llofueoicaiganomona Jesús menami:ena orede.

<sup>2</sup> Raite:

—Bie naira: illa uicomo mai omico jai. Nainomo omico ria, cuinaca burritona baitomico. Ie emodomo nia buna jaiñede. Iena suiñuanona bene ati.

<sup>3</sup> Omicomo: “¿Bue ñellena iena suiñodomico?” bu jicanoia, llono: “Coco Nama iena jitaide. Nailli iena raire abido oretaita llote”.

<sup>4</sup> Naimie llua isoi, jaidi:imaia:ia. Naisomo jofa nasemo burritona baillanona, iena suiñodi:imaia:ia.

<sup>5</sup> Ie facaise nainomo itino jicanote:

—¿Bue ñellena burritona suiñodomico?

<sup>6</sup> Jesús llua isoi uai oti:imaia:ia. Ie muidona:

—Jee —raitimaci.

<sup>7</sup> Burritona atidi:imaia:ia. Ie emodomo naimie llofueoicaigano naimaci iniroi jobianona, ie emodomo Jesús rainadate.

<sup>8</sup> Naimi:ena iobitallena, illa:ma isoi naimie jaillena, diga comini, imaci iniroi diga, naiso motomo jobedimaci. Jiano nai fueomona raforona uanona, naiso motomo jobedimaci.

<sup>9</sup> Dajerie Jesús uicomo jaidimaci. Dajerie naimie jinafona jaidimaci. Ado cuiriisite:

—¡Cai jilloitara:ma billa! Jusifnamui mamecido bitimie eo mare.

<sup>10</sup> Cai illa:ma David micori ifomo ca:na sedallena, damie billemo birui ocuiridicai. Jusifnamui ca:na jilloitajasa.

<sup>11</sup> Iese Jerusalémo naimie jaide. Nainomo rillanona, Jusiñamui jofomo jaide. Nainomo eruaide. Jitoma ana illa jira, ie doce llofueoicaigano diga, Betaniamoi inillena jaide.

*Jesús higuera railla riarana faidua rafue*  
(Mt 21.18-19)

<sup>12</sup> Ie areruido Betaniamona Jerusalémo abido ie llofueoicaigano diga Jesús bia, aimetaitaie.

<sup>13</sup> Arena higuera railla riarana ciuanona, iena jibuide. Como firuide; ia naie llisilladi ñede. Ie llisilla facaise nia ñede.

<sup>14</sup> Ie jira naie riarana llote:

—Biemona jaca llisiñeite. —Ie llofueoicaigano naimie lluana cacadimaci.

*Jesúdi Jusiñamui jofomona damieriena dotaja rafue*  
(Mt 21.12-17; Lc 19.45-48; Jn 2.13-22)

<sup>15</sup> Jerusalémo Jesús rilla mei, Jusiñamui jofomo naimie jaide. Naie jofu eo aillue. Diga cuartos nainomo ite. Jusiñamuimo ofomaiaina fecallena, naimiemo toica llaudaiaina fecallena, nainomo comini jaisoidimaci. Naie cominina ibatajanona, ofomaiaina, toica llaudaiaia diga, damierie fecaudimaci. Iena Jesús ciuanona, naimaci mesaiaiaina oni caicode. Ucugina fecaudino rairacuai jiai oni caicode.

<sup>16</sup> Jofu facaimo marena tuilla jira, comini rana jamai uillanona, iedo jaisoidimaci. Atona tuidifodo jaisoidimaci. Iena Jesús rairuide.

<sup>17</sup> Naimacina llofueite:

—Ie facaina lloraima micori Jusiñamui llogacino jaie cuega: “Cue jofu ite, nainomo nana comini cuemo jillena” cuega. Ero, ailluena omoi ibataja jira, naimie jofona firiruidino jofona omoi finoca.

<sup>18</sup> Judíuai illaicomini naimie finoca rafuena fidianona, naimiena meinellena, coniniri siadotimaci. Ailluena comini naimie llofuiana ebiruillanona, rajicaidimaci. Ie jira judíuai illaicomini naimiena jaciruillanona, naimiena nia meinenidimaci.

<sup>19</sup> Nairui navuida ie llofueoicaigano diga, Jerusalémona Jesús oni jaide.

*Jesús faidoca riaru duilla rafue*  
(Mt 21.20-22)

<sup>20</sup> Ie are ie llofueoicaigano diga, Jerusalén dine Jesús jaillanona, higuera railla riaru duillana ciodimaci. Nana ie jainao diga duillana ciodimaci.

<sup>21</sup> Jesús navui are lluana Pedro uibiñuanona, naimiemo llote:

—Maestro, ero. O faidoca higuera jai duide.

<sup>22</sup> Jesús uai ote:

—Jusiñamuina ñinocana jai.

<sup>23</sup> Uanaicinona omoimo lloiticue. Jusiñamui lluana raise bu ñnoia, naimie comecei gireñenia, bene ite anedumo naimie lloia: “Monaillaimo o illena, benomona mai jai”, Jusiñamui ie jitaille rana finoite.

<sup>24</sup> Nie isoide rafue Jusiñamuimo omoi jicajia, naimie iena finuana omoi ñnuamona, iena naimie finoite.

<sup>25</sup> Jusiñamuimo o jiacania, jaimie diga o rafue ia iena feita. Ie isoi cai Moo Jusiñamui omoimo ite jeacino jiai feitaite;

<sup>26</sup> iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

*Jesúdi ie siño uaina llua rafue*  
(Mt 21.23-27; Lc 20.1-8)

<sup>27</sup> Jerusalémo naimaci rillanona, Jusiñamui jofomo Jesús fo jailla mei, judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamaci. Diese billanona,

<sup>28</sup> jicanotimaci:

—¿Nie isoide uaido o finoca rafuena finodio? ¿Bu omoi iga uai diga o finoca rafuena finodio?

<sup>29</sup> Jesús dinena uai ote:

—Omoimo daje rafuena nano jicanoiticue. Raise omoi fairioia, omoimo cue uaido cue finoca rafuena lloiticue.

<sup>30</sup> Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

<sup>31</sup> Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori lluana ñnoñedomoi?”

<sup>32</sup> “Cominini” cai fairioia, bene itino caina nibai meineitimaci, Juan micoridi Jusiñamui facaina lloraima naimaci railla jira.

<sup>33</sup> Ie jira fairiotimaci:

–Uiñoñedicaí.

Jesús dinena raite:

–Ie muidona cuemo nie isoide uai illana omoimo lloñeiticue.

## 12

*Jesúdi marañede majiraini rafuena llua rafue*

(Mt 21.33-46; Lc 20.9-19)

<sup>1</sup> Judíuái illaicominimo Jesús llote:

–Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiairuido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona, jainomo fecade. Ie mei jiaie eniruemo jaide.

<sup>2</sup> Uvas jai einaila facaise riaraiaina sedaraini dine naie patrón ie mullaimana orede, naie illimona dajerie riara llisilla ollena;

<sup>3</sup> iadedi naie sedarainidi ie mullaimana fatimaci. Ie mei naimiemo riara fecañoeno naimiema abido oredimaci.

<sup>4</sup> Ie mei patrón jiaie mullaimana orede. Naimie ifogina bofedimaci. Naimiema jeare finodimaci.

<sup>5</sup> Ie mei patrón jaimiema orede. Naimiema meinetimaci. Ie mei ailluena mullaiana orede. Damieriema fatimaci. Damieriema meinetimaci.

<sup>6</sup> Patrómo ie isiruiga jito ite. “Cue jitona jaciruitimaci. Naimie uaina ñnoitimaci. Naimiema oretaiticue” patrón comecina facade.

<sup>7</sup> Riaraiaina sedaraini naimiema ciuanona, coniniri raitimaci: “Bimiemo bie illi fiebiite, naimie moo fiodailla mei. Naimiema cai meinelli, bie illi caimo fiebillesa” raitimaci.

<sup>8</sup> Naimaci dine naimie rilla mei, naimiema meinetimaci. Ie mei ie abina illimona jino dotadimaci.

<sup>9</sup> Iena fidia mei, ¿niese naie patrón nibaite? Ero, naimie billanona, ie illina sedarainina fuidoite. Ie mei jainona ie illina sedataite.

<sup>10-11</sup> Naimacimo Jesús llote:

–Naie illi sedaraini isoidomoi. Jusiñamui facaina lloraima micorí omoína jaie cuete. Ie cuegafuena raise facañedomoi. Naimie micorí cuega:

Jofo finoraini jitañena noficiñi nana naie jofomo ite nofici baifemo jai uaide.

Jusiñamui iena finotate.

Iena cai uiñuamona: “Eo mare” raiticaí

cuega. Jusiñamui cominina damierie jaillana naimie micorí cuete. Jusiñamui oretagamiema damierie jitañenamona, naimie cominina jaiñeitimaci; iadedi Jusiñamui oretagamiema ailluena ñnuamona, naimie cominina jaitimaci. Ero, Jusiñamui facaina lloraima micorí caina cuete. Naie jofona finoraini isoidomoi. Naie nofici isoidicue. Cue rafuena omoi jitañena jira, naimie cominina jaiñeitomoi.

<sup>12</sup> Judíuái illaicominini iena cacajanona, Jesús naimacina ñaiana naimaci uiñuamona, naimiema gaitaacadimaci; ia cominina jaciruitimaci. Ie jira naimiemoni jaidimaci.

*Jesúmo gobiernomo ucubena fecajana jicanua rafue*

(Mt 22.15-22; Lc 20.20-26)

<sup>13</sup> Judíuái illaicominini jailla mei, dajerie fariseuai cominina Jesús dine oredimaci. Illaima Herodes dibeimo itinona oredimaci. Naimie raise uai oñenia, naimiema duere finollena, Jesúsna facaciacadimaci.

<sup>14-15</sup> Naimiemo llotimaci:

–Maestro, uanaicinona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio. Omo rafuena jicanoiacadicaí. Dani Jusiñamuina sedadicaí; iadedi romanuai railla nairai anamo birui cai illa jira, ¿naimaci illaima Césarmo ucubena cai fecajana rairuidio? Caimo llono –llotimaci.

Naimaci mareuidinona abina caitadinona naimie uiñuamona, naimacimo llote:

–¿Bue ñellena cuena facacitomoi? Ucube cuemo acata.

<sup>16</sup> Ie jira acatatimaci. Naimacimo jicanote:

–¿Bu ie joreño nainomo ite? ¿Bumo jainaiáide bie cuega radi?

Uai otimaci:

–César.

<sup>17</sup> Jesús dinena raite:

—César iena itedi, César mo ille. Jusiñamui iena itedi, Jusiñamuimo ille —raite.

Naimie llua na cacajano, naimie raise uai ua jira, ieri rajicadimaci. Naimie iese llua jira, naimiena duere finonidimaci.

*Jesús dine saduceuai railla comini billa rafue*  
(Mt 22.23-33; Lc 20.27-40)

<sup>18</sup> Naie facaise saduceuai railla comini naimie dine bitimaci. Fiodaillamona jaca buna jilloñellena ñnotimaci. Jesúmo llotimaci:

<sup>19</sup> —Maestro, cai facaina Moisés micori jaie cuela: “Íma fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuela.

<sup>20</sup> Bie rafuena uñoiacadicai. Siete amatiai ite. Nano doforamie ie aina ote. Naimie nia uruiainide fiodailla.

<sup>21</sup> Ie emodo imie ie ama feciño ote. Naimie uruiainide jiai fiodailla. Naie siete digamiedemona iese sefuide.

<sup>22</sup> Uruiainide nana fiodailla. Ja muidomo naie riño jiai fiodaite.

<sup>23</sup> Fiodaillamona, ico naimaci jilloiadedi, ¿bu naie riño ienite? Naiñaiño siete digamienna inirede —llotimaci.

<sup>24</sup> Jesús uai ote:

—Moisés micori cuelañuaina raise omoi uñiñoena jira, Jusiñamui uaina raise omoi uñiñoena jira, bie isoide rafuena raise uñiñoedomo.

<sup>25</sup> Fiodaillamona jillua mei, Jusiñamui diga ite comini añnitimaci. Ininitimaci. Monamo Jusiñamui jaienisai añnidimaci. Ininidimaci. Ie isoi naie siete amatiai iitimaci.

<sup>26</sup> Fiodaitino ico jilloillena omoimo lloticue. Moisés micori jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote.

<sup>27</sup> Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaina jiai jillotaite. Fiodaillamona jilluana omoi raise uñiñoedomo —llote.

*Jesús nanoca llogacinona llofua rafue*  
(Mt 22.34-40)

<sup>28</sup> Naie facaise Moisés micori llogacinona llofueraima Jesús dine billanona, naimiedi comini Jesús uaina uaitajana cacade. Jesús raise uai uana cacajano, Jesúmo jicante:

—Moisés micori jaie llogacinuaimona, ¿nie llogacino ua nanoca llogacinona?

<sup>29</sup> Jesús dinena uai ote:

—Moisés micori jaie cuela: “Israel comini, bie rafuemo cacarei. Cai Nama Jusiñamui jaca dajede.

<sup>30</sup> Omoi jitailla jira, nana omoi comeciái diga, cai Nama Jusiñamuina isirui. Naimiemo omoi comeciaina eo faca”.

<sup>31</sup> Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”. Bie mena llogacino jiaie llogacinuai baifemo faite.

<sup>32</sup> Naie llofueraima dinena uai ote:

—Maestro, raise llotio. Jusiñamui jaca dajede. Jiaimie cai sedallena iñede.

<sup>33</sup> Cai jitailla jira, nana cai comeciái diga naimiena cai isiruia, naimiemo cai comeciaina eo facaia, cai abina cai isiruilla isoi cai ecimo itinona cai isiruia, Jusiñamuina raise sedadicai. Bie rafuedo naimiemo toica ocaina fecajana baifemo faite. Bie rafuedi naimiemo cai ra fecajana baifemo faite.

<sup>34</sup> Naimie raise uai ua jira, naimiemo Jesús llote:

—Iese o ñnocana jaiia, Jusiñamui jitailla isoi, ie cominina raire jaitio. —Ie facaisemona buna naimiena facaciaiññede.

*Jesús dinena fariseuai cominimo jicanua rafue*  
(Mt 22.41-46; Lc 20.41-44)

<sup>35</sup> Jusiñamui jofomo Jesús jailla mei, nainomo itinomo jicante:

—¿Ñiese Moisés micori llogacinona llofueraini Cristona raitimaci? ¿Ñiese naimiedi David micori jitona raitimaci?

<sup>36</sup> Jusiñamui Joreñodi David micorina ñaitatajanona, David micori llote:

Jusiñamuidi cue Namamo llote: “Illaimana o illamona, cue nabei dine ana rai. Ona ññoñedino o anamo itataicue”.

<sup>37</sup> “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi jamai David micori jitoñede; ia jiai ie Nama. —Nainomo itino naimie llofuiana iocire cacareidimaci.

*Jesúdi judíuái illaicominina ñaia rafue  
(Mt 23.1-36; Lc 11.37-54; 20.45-47)*

<sup>38</sup> Jusiñamui jofomo Jesús nia llofuianona, raite:

—Moisés micori llogacinona llofuerainimona abina rairui. Ilaicomínina naimaci itimacidená, naimacina comini cioillena, eo mare miroyina jitaacacabidimaci. Níne naimaci macaria, naimaci jamai bue isoifinedinona itimacidená, comini naimacina uaiduana gaidimaci.

<sup>39</sup> Comini naimacimo acarillena, ofiracomo uicomo raicadimaci. Rafue ia: “Jamai bue isoifenedicai” raillamo comecina facajanona, rafue nama ecimo raicadimaci.

<sup>40</sup> Feciñuaimona rana ocabillanona, naiñaiñuaina duere finodimaci. Naimiena eo sedadimacidená, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

*Jesúdi Jusiñamui jofomo duerede feciño ucube fecajana ciua rafue  
(Lc 21.1-4)*

<sup>41</sup> Jusiñamui jofomo Jesús nia ia, ucube fecarano uicomo ana raide. Nainomo comini ucubena joniamo eruai de. Ailluena ucuberedino ailluena ucubena jonetimaci.

<sup>42</sup> Ie facaise eo duerede feciño menaruñu jonete.

<sup>43</sup> Iena ciuanona, naimie dine ie llofueoicaiganona uaiduanona, naimacimo llote:

—Bie eo duerede feciño nana jiaie comini jonia baifemo jonete.

<sup>44</sup> Naimacimo ailluena ite ucubemona janore fecadimaci. Naiñaiño eo duerede; iadedi nana naiñaiñoimo ite ucubena jonete. Ie jira jiaíno baifemo jonete.

## 13

*Jesúdi Jerusalémo ite Jusiñamui jofu judaiana llua rafue  
(Mt 24.1-2; Lc 21.5-6)*

<sup>1</sup> Jusiñamui jofomona ie llofueoicaigano diga, Jesús jino jaidemo, ie llofueoicaiganomona Jesúmo damie raite:

—Maestro, bie jofomo ite noticiái co ebirede. Bico eo ebire ciode.

<sup>2</sup> Jesús dinena uai ote:

—Bie jofu birui eo mare; ia nana bie jofomo ite noticiái íco judaisite —llote.

<sup>3</sup> Ie mei Olivos railla anedu dine rillanona, Jusiñamui jofu uico dine Jesús naie anedu muidomo ana raide. Ie facaise Pedro, Jacobo diga, Juan diga, Andrés diga, eneno illanona, Jesúmo llotimaci:

<sup>4</sup> —Jusiñamui jofu judaisillana omo jicanoiadicaí. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

<sup>5</sup> Uai ote:

—Omoína bie rafuena bu jifueñellena, omoi abina rairui.

<sup>6</sup> Ailluena comini cue mamecido billemona: “Cristodicue” raitimaci. Diga comínina jifueitimaci. Iemona omoi abina rairui.

<sup>7</sup> Jobaimiaí illena fidiitomoí; iadedi jaciruiñeno. Iese suite; iadedi abido nia biñeiticue.

<sup>8</sup> Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaímo ñuisañuái suite. Diga illanuaímo comini aime guitimaci. Iese suia, omoi duere sefuillifue omoímo suite.

<sup>9</sup> Abina rairui. Dajerie omoína llogidoitimaci. Omoína gaitaja mei, naimaci ofiracomo omoína faitimaci. Cuemo omoi duilla jira, omoína gaitajanona, omoína duere finollena, illaicomini dine omoína uitimaci; ia naimacimo cue rafuena lloitomoi.

<sup>10</sup> Diga comini cue rafuena nana nairaimo lloitimaci, nana nairaiái iena cacaillena. Ie mei abido biitucue.

<sup>11</sup> Naie illaicomini dine omoi ia, juez dine omoi ia, omoi abi riidollicinomo omoi comeciaina jarire facañeno. Naie facaise omoi ñaíllicinona uíñoitomoi. Dani omoi comeciái icinodo ñaíñeítomoi; ia Jusiñamui Joreño uaido ñaitomoi.

<sup>12</sup> Cuená ñnotomoi; ia ailluena cuena ñnoñeítimaci. Cuená omoi ñnua jira, omoína enoitimaci. Iemona dajerie ie amana meinetalena, naimiena llogidoite. Dajerie moodi ie uruena meinetalena, naimiena llogidoite. Dajerie uruiaídi naimaci moona, naimaci eina meinetalena, naimacina llogidoitimaci.

<sup>13</sup> Cue comínina omoi illamona, nana nairai omoína enoitimaci; iadedi cuena faínoncaíñedimie ja muidomo monamo jaca íite. Naimiena jillotaitucue.

<sup>14</sup> Cue llua mo cacarei. Jusiñamui facaina lloraímadí jiaímie jearede rafue finollena jiaie llote. Naie rafue suia, Jusiñamui jofomo Jusiñamuína sedañeítomoi. Nainomo ite jearede rafue finuana omoi ciuanona, naiemona omoi jillobillena, duere omoi sefuíñellena, Judeamo omoi illamona, aneduái dine omoi aisi.

<sup>15</sup> Jofo emodomo omoi ia, ana billanona, aneduai dñe raire rillena, jofomo jaiñeno. Nainomo ite rana omoi diga uifñeno.

<sup>16</sup> Aneduai dñe raire rillena, illimo omoi ia, abido jofomo biñeno, omoi iniroi omoi diga uillena.

<sup>17</sup> Naie rafuemona jillobillena, naie facaise uruéside riño duere sefuite. Uruena nia jirode riñodi jiai duere sefuite.

<sup>18</sup> Eo duere sefuiñellena, Jusiñamuimo omoi jicano, rollime facaiseconi bie rafue suiñellena.

<sup>19</sup> Naie facaise comini eo duere sefuitimaci. Jusiñamuidi enirue finua facaisemona iese comini nia duere sefuiñedimaci. Ico iese eo duere sefuiñeitimaci.

<sup>20</sup> Naie facaise ianori fo Jusiñamui oñeítena, buna jaca jillobiñeite. Naimie fetocano muidona, naie facaise Jusiñamui ianori fo oite.

<sup>21</sup> Ie facaise omoimo bu raia: “Jai, Jusiñamui facaina lloraima benomo birui bairede. Naimiedi Cristo”, iena ñnoñeno, Jiaimie raia: “Oni batine Cristo birui bairede”, iena ñnoñeno.

<sup>22</sup> Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci.

<sup>23</sup> Ie jira omoi abina rairui. Ero, bie rafue nia suiñenia, iena omoimo jai lloticue.

*Jesús abido ie bille rafue*

*(Mt 24.29-35, 42-44; Lc 21.25-36)*

<sup>24</sup> Naie duere sefuilla facaise meinocni, jitoma lligaiñeite. Fivui jiai lligaiñeite.

<sup>25</sup> Monamona ucuaí ana llujite. Nana naie radi jaidisite.

<sup>26</sup> Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue.

<sup>27</sup> Cue jaienisaína cue ecimona oretaiticue. Cue fetocano diese naganomona ofitaitimaci.

<sup>28</sup> Higuera railla riaromona omoi fueo. Bie eniruemona naie riaru firuillamona, ñemona raire illana uifñotomi.

<sup>29</sup> Ie isoide. Bie rafue ico suia, cue billirui iaie illena uifñotomi.

<sup>30</sup> Uanaicimona omoimo lloticue. Nana bie rafue suille facaiseconi bie nairai nia iite.

<sup>31</sup> Mona enirue diga fuite; iadedi cue lloga uai jaca suite.

<sup>32</sup> Cue abido billirui jaca bu uifñede. Jusiñamui jaienisaína iena uifñedimaci. Jusiñamui Jitodicue; iadedi cue abido billiruina jiai uifñedicue. Dama cue Moo iena uifñote.

<sup>33</sup> Abina rairuicana jai. Naimie omoína canollena, Jusiñamuimo jiai jicabi. Cue billirui omoi uifñena jira, iemo ocuiri.

<sup>34</sup> Iena omoi raise uifñollena, bie rafuena lloticue. Patrón jiaie eniruemona jaide. Nia jaiñenia, ie mullaiaína ie jofona sedatate. Nagamie ie maijille ocuide. Jofo nasena sedadimemo naimie billemo raise ocuirillena lloti.

<sup>35</sup> Naie patrón abido billena naimaci uifñena jira, naga hora iemo ocuiritimaci. Nibai navuida baife biite. Nibai daferuisse biite. Nibai atava ñaia facaise biite. Monaia, nibai biite.

<sup>36</sup> Ebena naimie biite. Inidimacimo naimaci baisaibi raillanona, naimaci jaca ocuirilla.

<sup>37</sup> Ie isoide. Ebena biiticue. Cue abido billirui omoi uifñena jira, iemo jaca omoi ocuiri.

## 14

*Judíuai illaicomini Jesúna gaitallena, siadua rafue*

*(Mt 26.1-5; Lc 22.1, 2; Jn 11.45-53)*

<sup>1</sup> Naie facaise pascua railla rafue illena, menarui fiebide. Naie facaise llomenico guille rafue jiai ite. Naie rafue ia, siritaga rana jaca guiñedimaci. Egiptomona naimaci jaiaí jillobillana comecillena, naie rafue ite. Judíuai illaicomini Jesúna jifuiano gaitaacimaci. Naimiema meineiacadimaci. Iena siadua mei,

<sup>2</sup> raitimaci:

—Pascua railla facaise naimiema nia gaitañeíticai. Naie facaise naimiema cai gaitataia, iena gaitañemona, comini cai diga fuiritimaci. Nia sedaiticai.

*Jesúmo riño caimare soride ra totaja rafue*

*(Mt 26.6-13; Jn 12.1-8)*

<sup>3</sup> Betania railla nairaimo Jesús jaillanona, Simón jofomo jaide, Simódi jaie efonaitimie. Naifomo mesamo Jesús guitemo, daje riñodi noficimona ñinoca frasco atiano, naie frasco llailanona, nainomo ite caimare soride ra naimie ifogimo totade. Naie ra eo raifide.

<sup>4</sup> Damierie iena ciuanona, iciritimaci. Coniniri dani ñaitimaci:

—Naie ra jamai dotade. Jai faifide.

<sup>5</sup> Iena fecacadena, trescientos ucubena feiñote. Fecaja mei, naie ucube dueredinomo fecadena, caimona mare. —Naiñaiñona iese ñaitimaci.

6 Naimaci ñaiana Jesús uñua jira, naimacimo llote:

—Dama ite. ¿Bue ñellena naiñaiñona jeare ñaitomo? Mare rafuena cuemo finode.

7 Omoi diga dueredino jaca itimaci. Niruido o jitaia, naimacina canoredomo; ia omoi diga jaca iñeiticue.

8 Cue facaina naiñaiño finoacana ñiese jai finode. Nia fiodañedicue; ia cue fiodaillirui facaina naiñaiño iese finode.

9 Omoimo uanaicinona lloiticue. Ninomo cue mare finoca rafuena bu lloia, naiñaiñona uibiñollena, nana cominimo naiñaiño finoca rafuena lloite.

*Judas micori raillamie Jesúsna gaitataiacana rafue*

(Mt 26.14-16; Lc 22.3-6)

10 Ie facaise Jesús llofueoicaiganomona Judas Iscariote micori raillamiedi Jesúsna gaitatallena, Jusiñamui diga nanoca ñairaini dine jaide.

11 Iena cacajano, iobidimaci.

—Iena o finoa, omo ucubena fecaiticai —lloitimaci. Iemona Jesúsna gaitatalliruimo Judas ocuride.

*Jesúdi ie fiodaille rafuena llua rafue*

(Mt 26.17-29; Lc 22.7-23; Jn 13.21-30; 1 Co 11.23-26)

12 Llomenico guille rafue illanona, judíuai comini toica llaudaiaia fajarui illanona, Jesúsno ie llofueoicaigano jicanote:

—¿Ninomo pascua railla rafue ie guille finuana jitaideo?

13 Naimacimona menamiena oretajanona raite:

—Jerusalémo omico jaillanona, nogodo jinuina uitimiena cioitomico. Naimiema raca.

14 Naimie jailla jofo namamo llono: “Coco llofueraima cocona omo jicanotade: ‘¿Ñimai cue guiraco? ¿Ninomo guiticue, cue llofueoicaigano diga?’ ”

15 Ie mei omicommo afebebamo ite aillue cuartona acataite. Na raruia diga ite. Nainomo cai guille fino.

16 Jesús llua isoi jaidiaimaia. Jerusalémo rilla mei, naimie llua isoi baitiaimaia. Pascua rafue guille finodiaimaia.

17 Nairui jitoma ana itemo, ie llofueoicaigano diga, Jesús nainomo guisaide.

18 Mesamo guitimacimo, Jesús llote:

—Omoimona damie cuena gaitataite. Naimie cue diga bene jai guite.

19 Iena cacajanona, sunaitimaci. Damierie naimiemo jicanoside:

—¿Cuena ñaitio?

20 Uai ote:

—Omoimona damie bie platomo cue diga llomenico diga mutade.

21 Jusiñamui facaina lloraíma micori: cuega isoi, monamona jai billamona, fiodaíticue; iadedi cuena gaitataitimie eo duere sefuite. Naimie jeicifegadena, cuemona mare.

22 Naimaci nia guitimacimo, llomeniconna Jesús llinuanona, Jusiñamuimo iobillacinona fecaja mei, llomeniconna tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi comecina facajano, iena guiño.

23 Ie mei naimie jiroracona jai llinote. Jusiñamuimo iobillacinona llua mei, naie jirora-como jai totaca vino naimacimo fecade. Iemona nana jirodimaci.

24 Naimie raite:

—Cue fiodaillamona, dama cue diaillamona, jeacino anamona ailluena jillotaiticue. Jusiñamui ñaie rafue birui itatajamona, naimaci jeacino oni dotajana jai llote. Bie vinodi ñaie rafue facai ie.

25 Omoína bene dane iese caimare nabaiñeiticue. Cue Moo sedajanomo omoi diga cue ia, nainomo omoína dane iese caimare marena nabaiticue.

*Jesúdi Pedro naimiema januana llua rafue*

(Mt 26.30-35; Lc 22.31-34; Jn 13.36-38)

26 Iobilla rua Jusiñamuimo naimaci rua mei, Olivos railla anedumo Jesús ie llofueoicaigano diga jaide.

27 Naimacimo llote:

—Cuena faionocaitomoi. Jusiñamui facaina lloraíma micori iena jaie cuega: “Toica llaudaiaí sedaraímana meinetimaci. Naimie toíniaí uaficaída jaitimaci” cuega. Naimie micori caina cuete.

28 Ero, fiodaillamona cue jillua mei, omoi uicodo Galileamo jaiticue, nainomo omoi diga dafaifillena.

29 Pedro uai ote:

—Nana jiaino ona fainonocaia, ona jaca fainonocaiñeiticue.

<sup>30</sup> Jesús dinena raite:

—Uanai omo lloiticue. Ja naio itava menacaiño nia ñaiñenia, dacaiño amani cuena janoitio.

<sup>31</sup> Pedro dinena riire llote:

—O diga cue fioldaiadedi, ona janoñeiticue.

Nana ie llofueoicaigano daje uaido jiai raitimaci.

*Jesúdi Getsemanimo Jusiñamuimo jüa rafue*  
(Mt 26.36-46; Lc 22.39-46)

<sup>32</sup> Oni jaillanona, Getsemani railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena jaiticue.

<sup>33</sup> Naimie diga Pedrona uite. Jacobona uite. Juan jiai uite. Naimie sunaicaide. Ie comeci uri iñede.

<sup>34</sup> Naimacimo llote:

—Cue comeci sunaicaide. Niadi fioldaiticue. Benomo fiebi; ia nia iniñeno cue facaina omoi jüi.

<sup>35</sup> Naimie janore bai jaillanona, eniruemo bitadate. Naimie duere sefuiñellena, Jusiñamuimo jüde:

<sup>36</sup> —Ore Moo, nana rana finoredio. Cuena llegi cacaitañeno. Cue jitailla isoi cuena finoñeno; iadedi o jitailla isoi cuena fino.

<sup>37</sup> Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—Simón, ¿niese raire inidio? daje hora nia iñedemo.

<sup>38</sup> Iniñeno. Taife ramo omoína fai raillano, iena omoi inoñellena, Jusiñamuimo jüi. Omoi comeci mare rafuena finoacade; iadedi omoi comeci dani ocuiñoñede. Ie muidona Jusiñamuimo jüi, omoína naimie ocuiñotallena —llote.

<sup>39</sup> Ie mei dane jüllena jaide. Ailli naimie jüa isoi, dane jüde.

<sup>40</sup> Ie llofueoicaigano dine dane billanona, naimaci uisi llirioilla jira, naimaci inisitemo ride. Naimacina casitajano, Jesús naimaci diga ñaite; ia naimaci dinena uai uana uiñoñede.

<sup>41</sup> Dane jüa mei, ie llofueoicaiganomo dane billanona, naimacina casitajano, llote:

—¿Niese nia inidomoi? ¿Niese jafaici nia otomoi? Jai macaibaita. Cue fioldaille facaise jai ite. Jusiñamui jitailla jira, cuena ja gaitajanona, naimiena inoñedino anamo ja iiticue.

<sup>42</sup> A naidacai. Maiña. Cue gaitaitimie jai bite.

*Jesúna gaitalle rafue*  
(Mt 26.47-56; Lc 22.47-53; Jn 18.2-11)

<sup>43</sup> Jesús nia ñaitemo, ieconi Judas bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Naimaci butaralluna jiai atidimaci. Jusiñamui diga nanoca ñairainimona bitimaci. Moisés micori llogacinona llofueraainimona bitimaci. Naimaci einamacimona bitimaci.

<sup>44</sup> Jesús dine naimaci nia riñenia, Judas naimie diga bitinomo jai llote:

—Jesúna omoi uifollena, naimiena llibanoiticue. Ie mei naimiena gaita. Naimiena raise maianona, naimiena oni uiño.

<sup>45</sup> Jesús dine naimie rillanona, Judas Jesús dine raire jaide. Naimiena uaidote:

—Maestro, jai biticue. —Ieconi naimiena llibanote.

<sup>46</sup> Ie jira Jesúna gaitadimaci.

<sup>47</sup> Iena ciuanona, Jesús diga itinomona damie ie lloebi llinuanona, naimiedi nanoca ñairaima ie mullaima jefona jaibonote.

<sup>48</sup> Naimiena gaitadinomo Jesús llote:

—Omoi lloebina atidomoi. Omoi butaralluna atidomoi. Cuena gaitallena, firiraimadicueta cuemo omoi billa.

<sup>49</sup> Jusiñamui jofomo nagarui llofuecabiticue. ¿Bue ñe nainomo cuena gaitañedomoi? Cuena jai omoi gaitajamona, Jusiñamui facaina lloraini micoriai cuegafuiai suite.

<sup>50</sup> Ie facaise nana naimie llofueoicaigano naimiena fainonocaillano, aisidimaci.

*Jesús jinafona conirue racaja rafue*

<sup>51</sup> Ie facaise daje conirue Jesús jinafona racade. Jamai abimo iniroi ferinocaida racade. Naimiena ciuanona, comini naimiena gaitadimaci;

<sup>52</sup> ia ie iniroina fainonocaillanona, taimiena aiseide.

*Jesúdi judúuai illaicomini dine illa rafue*  
(Mt 26.57-68; Lc 22.54, 55, 63-71; Jn 18.12-14, 19-24)



<sup>53</sup> Jesúna gaitaja mei, Jusiñamui diga nanoca ñairaima dine naimiena uitimaci. Nana judíuai illaicomini itimaci. Nanoca ñairaini itimaci. Einamací jiai itimaci. Moisés micorí llogacinona llofueraini jiai itimaci.

<sup>54</sup> Pedro naimaci jinafona aarena racade. Jusiñamui diga nanoca ñairaima nairairimoi jaide. Jofono sedadino diga nainomo ite iraimo agaide.

<sup>55</sup> Naimiemo meinellena, nana naie illaicomini Jesúmo nicino illana uifioacadiimaci. Iena coniniri siadotimaci; iadedi naimiemo jaca nie isoide marañede rafue illana uifioñedimaci.

<sup>56</sup> Diga comini Jesúna llogidotimaci; ia tainona llotimaci. Daje isoi lloñedimaci.

<sup>57</sup> Damierie billanona, tainona llogiduanona, raite:

<sup>58</sup> —Bimie llwana cacadicai. Jusiñamui jofona jeare ñaite. Naimie llote: “Jusiñamui jofona comini finodimaci; ia iena cue judaiana, darui amani illanona, jiaie finoiticue. Comini iena finoñeitimaci”.

<sup>59</sup> —Iese llotimaci; ia daje isoi lloñedimaci.

<sup>60</sup> Naimaci motomo Jusiñamui diga nanoca ñairaima naidadajanona, Jesúmo jicanote:

—¿Niese uai oitio? ¿Nie isoide rafue ona llogidotimaci?

<sup>61</sup> Jesús dinena uai oñede. Naie ñairaima jicanote:

—¿Odi Cristodio? ¿Odi Jusiñamui Jitodio?

<sup>62</sup> Jesús uai ote:

—Jii, naimiedicue. Monamona jaie cue billamona, imana jaidicue; ia ico jairuido illaimana cue illena, Jusiñamui ecimo cue raillena, omoi nairai cioitimaci. Mona uillimo cue abido billena jiai cioitimaci.

<sup>63</sup> Iena cacajanona, icirillanona, naie nanoca ñairaima dama ie iniroina cuaranote. Raite:

—Jiaino naimiemo llogidollena jai jitañedicai.

<sup>64</sup> Jusiñamuina naimie jeare ñaiana jai cacadomoi. ¿Niese naimiemo raitomoi?

Jiaie illaicomini dinena:

—Naimie fiodaillena —llotimaci.

<sup>65</sup> Ie facaise damierie naimiemo tuallaitimaci. Ie uiecona ibaila mei, naimiemo ducoitimaci. Raitimaci:

—Bu o ducoia caimo llono.

Naimiemo gaitadino dinena naimiemo jiai ducoitimaci.

*Pedrodí Jesúna janua rafue*

*(Mt 26.69-75; Lc 22.56-62; Jn 18.15-18, 25-29)*

<sup>66</sup> Naie facaise Pedro nairairimoi ite. Naie nanoca ñairaima mullaiñuaimona dañaiño nainomo billanona,

<sup>67</sup> Pedro agaillana ciode. Raite:

—Nazaret ie Jesús cominidio.

<sup>68</sup> Pedro iena januano, raite:

—O llwana uifioñedicue. Iena raise cacañedicue.

Ie mei nase fueo jaide. Naie facaise itava dcañiño ñaite.

<sup>69</sup> Naie mullaiño naimiemo dane cuanona, nainomo jamai itinomo llote:

—Bimiedi Jesús ie llofueoicaigano imie.

<sup>70</sup> Iena Pedro dane janote. Dally illanona, nainomo jamai itino Pedromo llote:

—Odi Galilea imedio. Jesús diga jaicabidio.

<sup>71</sup> Uai ote:

—Uanaí cue lloñenia, Jusiñamui cuena duere finoite. Uanaicinona cue llwana naimie uifioite. Ero, omoi llogamiemo uifioñedicue.

<sup>72</sup> Ieconí itava dane ñaite. Iena cacajano, Pedro Jesús llwana uibiñote. Jaive naio Jesús Pedromo llote: “Itava menacaiño nia ñañenia, dcañiño amani cuena janoitio”. Iena uibiñuamona, Pedro eo eede.

## 15

*Pilato dine Jesús illa rafue*

*(Mt 27.1, 2, 11-14; Lc 23.1-5; Jn 18.28-38)*

<sup>1</sup> Jitiramo monaidemo, judíuai illaicomini danomo siadotimaci. Jusiñamui diga nanoca ñairaini itimaci. Naimaci einamací jiai itimaci. Moisés micorí llogacinona llofueraini jiai itimaci. Siadua mei, Jesúna maianona, Pilatomo uitimaci. Romanuai railla nairai anamo naimaci illa jira, Pilatodi naimaci gobernador.

<sup>2</sup> Pilato naimiemo jicanote:

—¿Judíuai comini illaimadio?

Jesús uai ote:

—Jii.

<sup>3</sup> Ie muidona Jusiñamui diga nanoca ñairaini Jesúna llogidotimaci:

—Naimie diga marañede rafuena finode —llotimaci.

<sup>4</sup> Pilato dinena naimiemo jicanote:

—¿Ñiese uai oñedio? Ona eo llogidotimaci.

<sup>5</sup> Jesús nia uai oñena jira, Pilato uainicaide.

*Pilatodi Jesús fiodaillana llua rafue*

*(Mt 27.15-31; Lc 23.13-25; Jn 18.38-19.16)*

<sup>6</sup> Naga año pascua railla rafue facaiseconi cárcelmo itinomona Pilatodi comini jicacamiēna jamai jino orede.

<sup>7</sup> Bie facaise cárcelmo Barrabás raillamie ite. Gobierno diga naimie navui jobairilla jira, naie facaise comena naimie meinia jira, cárcelmo ite.

<sup>8</sup> Ie facaise ailluena comini Pilato dine ofillanona, cárcelmona naimie finocabilla isoi, damie jino jamai oretallena jicadimaci.

<sup>9</sup> Pilato jicanote:

—¿Bu jino cue oretallena jitaidomoi? Omoi judíuai railla illaïmana nïbai jitaidomoi.

<sup>10</sup> Iese jicanote; iadedi naimiedi Jusiñamui diga nanoca ñairaini Jesúri uradoillana uiñote. Naimaci Jesúna meiniacanana jiai uiñote.

<sup>11</sup> Jusiñamui diga nanoca ñairaini naimacina llotataja jira, comini dinena Barrabás jino jamai oretallena jicadimaci.

<sup>12</sup> Iena cacajano, Pilato naimacimo jicanote:

—¿Ñiese bimienā cue finuana jitaidomoi? Naimiedi omoi judíuai illaïma raillamie.

<sup>13</sup> Ado llotimaci:

—¡Naimiēna corai!

<sup>14</sup> Pilato dane jicanote:

—¿Ñie isoide marañede rafuena finode? —Iena cacajano, ado ibi llonoidimaci:

—¡Naimiēna corai!

<sup>15</sup> Naimacina iobitallena, naimaci jitailla jira, Barrabás jino orede; iadedi Jesúna sechedotaja mei, naimiēna coraïllena orede.

<sup>16</sup> Soldaduai naimiēna gobernador jofo fo uillanona, nana soldaduai nainomo ofidimaci.

<sup>17</sup> Jiduirede iniroi naimiemo jitadimaci. Eecuaimona niga nuiciraina naimie ifogimo jitadimaci.

<sup>18</sup> Naimiēna jifanoduanona, naimiēna uaidotimaci:

—¡Jadi, judíuai illaïma!

<sup>19</sup> Radosi diga ie ifogimo buta-butadimaci. Naimiēna tuallaïtimaci. Naimie illaïmana itena, naimiēna sedallena, cañici ifodo raiedimaci.

<sup>20</sup> Jesúna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jitadimaci. Ie mei naimiēna coraïllena oni uitimaci.

*Jesúna coraïa rafue*

*(Mt 27.32-44; Lc 23.26-43; Jn 19.17-27)*

<sup>21</sup> Jerusalémona naimaci jaïllanona, jamai bitimiemo dafaïfidimaci. Naimiedi Simón. Cirene railla enirue imie. Naimie jito iaïmaïdi Alejandro iaïmaïdi Rufo diga. Jerusalén onifemona naimie billanona, naimiemo dafaïfidimaci. Naimiēna Jesús uiga cruzna rocatatimaci.

<sup>22</sup> Gólgota raïllanomo jaidimaci. Hfocoraïna eruaïlla jira, iese mameciredē.

<sup>23</sup> Nainomo rillanona, ie abi isirena cacaiñellena, vinomo eriredē rana faianona, Jesúmo fecadimaci; iadedi naimie iēna jiroñede.

<sup>24</sup> Ie mei naimie cruzmo coraïa mei, cruzna naidania mei, naie soldaduai naimie iniroi danï coninimo fecasite. Naie iniroi bu uille raïllanona uiñollena, jifanododimaci.

<sup>25</sup> Jitoma nia furi daidemo, naimiēna coraidimaci.

<sup>26</sup> Cruzmo ie llogiduañuena jonetimaci. Jai cuela: “Judíuai comini Illaïma”.

<sup>27</sup> Ie mei mena firiruide iaïmaïaina coraidimaci. Damie Jesús nabeimo coraïca. Jiaïmie Jesús jarifebeïmo coraïca.

<sup>28</sup> Lemona Jusiñamui facaina lloraima micori jaie cuelañu suide. Cuela: “Marañedino isoi naimie jai ite”.

<sup>29</sup> Naisodo jamai jaidino Jesúna mameritimaci. Mamerillanona, ifogiaïna jaididimaci. Raitimaci:

—Navui raisoidio: “Jusiñamui jofona judaïticue. Darui amani illanona, iēna dane finoiticue” raisoidio.

<sup>30</sup> Ie muidona dama o abina mai jillota. Cruzmona ana bi.

<sup>31</sup> Ie facaise Jusiñamui diga nanoca ñairaini naimiēna jifanododimaci. Moisés micori llogacino lloñueraïni naimiēna jiai jifanododimaci. Raitimaci:

—Jiaie cominina jillotate; ia dama naimie abina jillotanide.

<sup>32</sup> Naimiedi Cristodena, naimiedi cai judiuaí comini illaíma raillamiedena, dama niadedi cruzmona ana ie billa. Iena cai cioia, naimiena inoíticai. —Iese naimiena jifanododimaci. Naimie diga coraicamie iaímaíai naimiena jiai jeare ñaitiaímaíai.

*Jesús fiodailla rafue*

(Mt 27.45-56; Lc 23.44-49; Jn 19.28-30)

<sup>33</sup> Jitoma naidai itemona, daje amani horas mona jitibicaide.

<sup>34</sup> Ie meinomo judiuaí railla uaido Jesús ado jidaioide:

—Eloi, Eloi, ¿lama, sabactani? —jidaioide. Iena oni dobaiñuamona raite: “Cue Jusiñamui, ¿bue ñellena cuena fainonocaidio?” raite.

<sup>35</sup> Iena cacajano, nainomo jamai itinomona damierie raitimaci:

—Naimie jiae Jusiñamui facaina lloraima Eliana uaidote —raitimaci.

<sup>36</sup> Naimacimona damie jarire jaillanona, fibecode ramo vinona faite. Radosimo jillillano jirrollena, naimiemo a fecade. Raite:

—Dallu sedaiticai. Elías naimiena jillotajaíbillena uiñoiacadicaí.

<sup>37</sup> Ie facaise ado cuirioita fiodaite.

<sup>38</sup> Naie facaise Jusiñamui jofomo ie fetaca iniroife ana anaba jillacimo metodo menafe cuararide.

<sup>39</sup> Jesúna sedallena, nainomo capitán ite. Jesúmo eruailanona, Jesús fiodaillana ciode. Raite:

—Uanai bimiedi Jusiñamui Jito.

<sup>40</sup> Dajerie riñoniaí naie rafuena aarena cioidimaci. Naimaci motomo María Magdalena ite. Jiaie María jiai ite. Naiñaiñodi Jacobo ei. Naimiedi jamamie. Naiñaiñodi jiai José ei. Salomé jiai ite.

<sup>41</sup> Galileamo Jesús navui illa facaise naie riñoniaí naimie diga jaisoidimaci. Naimiena canouidimaci. Jerusalémo Jesús billanona, ailluena riñoniaí naimie diga jiai bitimaci. Ie fiodaillana jiai cioidimaci.

*Jesús raiafomo jonia rafue*

(Mt 27.57-61; Lc 23.50-56; Jn 19.38-42)

<sup>42</sup> Jitoma ana itemo, sábado rille jai iaírei illanona,

<sup>43</sup> Arimatea nairai imie Pilato dine jaide. Naimiedi José. Naimiedi illaicomini. Maremie. Naimie Jusiñamui ie cominina ico sedajanomo illemo ocuiride. Ie comecina ocuiñocaida, Pilato dine jaide. Iena raillena, Jesús abina jicade.

<sup>44</sup> Tena cacajano, Pilato Jesús fiodaillana raise uiñoiacade. Ie fiodaillana nia fidiñede. Jesúna sedade capitána uaiduanona, naimiemo Jesús fiodaillana jicanote.

<sup>45</sup> —Jesús jai fiodaite —capitán railla mei, Pilato Jesús abina Josémo fecallena llote.

<sup>46</sup> José mare userede iniroi ibaja mei, cruzmona Jesús abi ana ua mei, naie iniroi diga ie abina ferinote. Nofici motomo finoca raiafomo jonete. Naifona ibaillena, aillue nofici nainomo bai ñuitade.

<sup>47</sup> María Magdalena, jiaie María diga, naimie raiana ciode. María José ei.

## 16

*Jesús fiodaillamona jillua rafue*

(Mt 28.1-10; Lc 24.1-12; Jn 20.1-10)

<sup>1</sup> Sábadoruimo jitoma sojicaidemo, María Magdalena caimare soride rana ibade. Jacobo ei, María jiai ibade. Salomé jiai ibade. Jesús abimo jonellena, ie abina raise finollena naimaci enamaci finocabilla isoi, naiñaiñuaí iena ibade.

<sup>2</sup> Domingo jítiramo jitoma como bairedemo, Jesús raiafo dine naiñaiñuaí jaide.

<sup>3</sup> Jaillanona, coníñuaimo jicanote:

—¿Bu noficina caina oni ñuitalle raiafomona?

<sup>4</sup> Raiafo dine rillanona, iemo eruailanona, nofici oni ñuitacana ciode. Naie nofici eo aillue.

<sup>5</sup> Raiafomo jaillanona, naiñaiñuaí coniruena eruaidimena nabeimo raillana ciode. Naimie are userede iniroina jítade. Naimiedi Jusiñamui jaienici. Naiñaiñuaí jacinainte.

<sup>6</sup> Nainomo itimie dinena raite:

—Jacinaíñeno. Nazaret ie Jesúna jenodomoí. Naimiena coraidimaci; ia fiodaillamona naimie jai jillode. Bene jai iñede. Naimie jonianomo mai eroda.

<sup>7</sup> Naimie llofueoicaiganomo iena lluaí. Ua Pedromo llono. Galileamo omoí uicomo naimie jaite. Omoimo naimie llua isoi, naimiena cioitomoí.

<sup>8</sup> Naiñaiñuaí jino jaillanona, raiafomona aisicana jaide. Jacinaillamona abi jaidisite. Jaciruillamona, iena bumó llofedé.

*Jesús María Magdalenamo bairia rafue  
(Jn 20.11-18)*

<sup>9</sup> Domingo jítiramo Jesús jillua mei, María Magdalenamo Jesús nano bairede. Naiñaiño Janaba anamo navui illamona, Jesús naiñaiñomona siete jananiai navui oni orede.

<sup>10</sup> Naiñaiñomo naimie bairia mei, naimie diga jaicabidinomo iena lluaide. Naimacimo iena nia lloñenia, sure eedimaci.

<sup>11</sup> —Naimie jai jillode. Naimiena jai ciodicue —naimacimo naiñaiño llua mei, iena iñoñedimaci.

*Mena llofueoicaiganomo Jesús bairia rafue  
(Lc 24.13-35)*

<sup>12</sup> Ie meinoconi Jesús mena llofueoicaiganomo bairede. Naimie eruaisoilla isoi, eruaiñede. Iaimaiaí naisomo macaria, iaimaiaimo bairede.

<sup>13</sup> Jerusalémo abido iaimaiaí rilla mei, jiaie llofueoicaiganomo iena llotiaimaiaí; ia iñoñedimaci.

*Jesús ie once llofueoicaiganomo bairia rafue  
(Mt 28.16-20; Lc 24.36-49; Jn 20.19-23)*

<sup>14</sup> Ie once llofueoicaigano danomo guitimacimo, Jesús naimacimo bairede. Naimie jillua mei, damierie naimiena ciuanona, ie llofueoicaiganomo iena llote; ia iñoñedimaci. Naimaci iñoñena jira, Jesús naimacimo riire llote.

<sup>15</sup> Naimacimo llote:

—Nana nairaiaimo jai. Nana cominimo cue mare rafue llocana jai.

<sup>16</sup> Cuen a iñoñedimaci, bautizagano diese Jusiñamui mona duere sefuiñeitimaci; iadedi Jusiñamui cuena iñoñedinona duere finoite.

<sup>17</sup> Cuen iñotino Janaba anamo itinomona Janabana oni oretaitimaci. Naimaci nia uiñoñega uaido ñaitimaci.

<sup>18</sup> Jaiona naimaci linoia, naimacina niese nibaiñeite. Bainode ra naimaci jiroia, naimacina niese nibaiñeite. Duidinona naimaci jetajamona, jilloitimaci.

*Jesús monamo jailla rafue  
(Lc 24.50-53)*

<sup>19</sup> Ie llofueoicaigano diga ñaia mei, Jusiñamui cai Nama Jesús monamo uiga. Illaimana Jesús illa jira, Jusiñamui nabeimo naimie raide.

<sup>20</sup> Monamo Jesús jailla mei, ie llofueoicaigano, diga nairaiaimo, ie rafuena llocana jaidimaci. Cai Nama naimacina canuamona, naimacina siño rafuena finotate. Iemona comini dinena Cristomona naimaci rafue illana uiñoñotimaci. Macaibaite. Cue cuega rafue jai fuite. Marcodicue.

## LUCAS JESUCRISTO ENIRUEMO ILLA RAFUE CUIAFUE

*Lucas Teófilomo cartana orede*

<sup>1-4</sup> Teófilo, cue isiruiga nabai. ¿Nigacino? Omo bie cartana oredicue. Cai motomo birui diga rafue jai suide. Jesucristo rafuena omo cueticue. Naimie billa mei, diga comini naimiemo suide rafuena ciodimaci. Iena llocana jiai jaidimaci. Naimacimona bie rafue raise uifnoticue. Bie rafuena fidianona, damierie iena jai cuetimaci. Bie rafuena jiai jai cacadio. Bie rafuena cue raise uifua jira, uanaicinona o raise uifollena, bie cartana jai cueticue. Iese birui cue comeci jitaide.

*Jusiñamui jaienici Juan Bautista micori jeicillena llua rafue.*

<sup>5</sup> Jesucristo nia jeicifenia, Zacarías illa facaise Herodena mameciredo illaimadi. Judea raila eniruena sedade. Zacarías Jusiñamui diga ñairaima. Abías raillasie facaimo duillamona, Jusiñamui jofomo maijuide. Naimie aidi Elisabet. Naiñaiño jaiete ite usumadi Aarón micori. Aarón micoridi Jusiñamui diga nano ñairaima.

<sup>6</sup> Jusiñamuiimona iaimaiai mare, nana naimie lloga uaina raise iaimaiai inua jira.

<sup>7</sup> Naiñaiño oninona jira, uruenidiaimaimaiai. Jiai jai uaicima iaimaiai.

<sup>8</sup> Zacarías facai ite comini maijia facaise ia, Jusiñamui jofo dine naimie maijiaide.

<sup>9</sup> Nainomo naimie maijia, caimare soride ra fo jobaillena, naimiema fetodimaci. Naimaci finouilla isoi, jobaillanona dani Jusiñamui diga ñairaini naimiema fetodimaci. Iemei naimie fo jaide.

<sup>10</sup> Fo jailla mei, naie caimare soride ra boa facaiseconi, Jusiñamui diga naimie ñaiano, ailluena comini Jusiñamui jofo ecimo itimaci.

<sup>11</sup> Ieconni cai Nama Jusiñamui jaieniciidi naie ra boano nabeimo Zacaríamo bairede.

<sup>12</sup> Naimiema cianona, Zacarías jacinaita.

<sup>13</sup> Jaienici naimiemo llote:

—Zacarías, jacinaiñeno. Jusiñamui o jiacinona jai cacade. Iemona o ai uruesite. Himana jocoite. Juan o jitalle naimie mamecidi.

<sup>14</sup> Iemona o comeci caimare iite. Iobitio. Ailluena comini naimie jeiciari iobitimaci.

<sup>15</sup> Jusiñamuiimona naimie jamai bue isoiñeitiemiena jaite. Jifaitate rana jiroñeite. Naimie jeiciamona Jusiñamui Joreño naimiema namataite.

<sup>16</sup> Cai Nama Jusiñamui dibeimo ailluena Israel cominina naimie itataite.

<sup>17</sup> Jusiñamui jitaillacinona finocana jaite. Elíamo Jusiñamui Joreño jaiete siño uai illa isoi, naimiemo iite. Jusiñamui rafuena naimie lluamona, damierie, naimaci jaiagai isoi, Jusiñamuiina inoitimaci. Ailluena Jusiñamui uaina jai inoñedimaci; ia damierie birui inoitimaci. Naimaci comeci Jusiñamui dibeimo meidoitimaci. Iemona cai Nama Jesucristo bia, naimiema inoitimaci.

<sup>18</sup> Zacarías dinena jicanote:

—¿Niese o llua suillena uifnoticue? Jai uaicimadicoco.

<sup>19</sup> Jusiñamui jaienici dinena uai ote:

—Gabrieldicue. Jusiñamuiimona biticue. Cuena oretate, bie mare rafuena omo llollena.

<sup>20</sup> Ero, cue uaina o inoñena jira, uainitio, o jito jeicille dinori. Jaiiruido bie rafue suite.

<sup>21</sup> Jusiñamui jofomo jino itino Zacarías jino billena sedadimaci. “¿Bue ñellena naimie are biñede?” comeciaina facadimaci. Naimie jino are biñena jira, rajicaidimaci.

<sup>22</sup> Naimie jino bitemo, naimaci diga jai ñainide. Ie onolli diga facajamona, Jusiñamui jaienici naimiemo jai llua uifnotimaci. Naimie ñaiñeno ite.

<sup>23</sup> Jusiñamui jofomo naimie maijia facaise fuilla mei, ie jofomo abido jaide.

<sup>24</sup> Digarui illanona, ie aidi urueside. Ie jira jofomo naiñaiño cinco fivui fiebide, comecina facajanona:

<sup>25</sup> “Cue uruesilla jira, iena nia buna lloiacañedicue. Cue Nama cuena jai duenailana uifnoticue. Navui cue urue ifena jira, meiruiticue. Jai meiruiñeiticue. Comini cue joreñona jai ñaiñeiticaci”.

*Jusiñamui jaienici Jesús jeicillena llua rafue*

<sup>26-27</sup> Elisabet seis fivui uruesilla mei, Jusiñamuidi Galileamo ie jaienici Gabrielna orede. Nazaretmo María dine naimiema orede. María nia ininide; ia jai José jicanogañaiño. Naimie usumadi David micori.

<sup>28</sup> Rillanona, naiñaiñomo llote:

—Itio. Cai Nama Jusiñamui ona eo duenaite. Ona jai fetuamona, nana jiaie riñonai baifemo naimiedi ona marena itatate.

<sup>29</sup> Iena cacajanona, naiñaiño jacinaita. Iena naiñaiño raise cacaiñena jira, iemo comecina facade.

<sup>30</sup> Gabriel dinena lloste:

—Jacinaiño. Jusiñamui ona duenaita.

<sup>31</sup> Birui uruesitio. ñimana jocoitio. Naimie mamecina jitaio Jesúna.

<sup>32</sup> Siño Jitona jaite. Nanoca Itimie Jitona jaite. Ie usuma David micori illaima illa isoi, Jusiñamuidi naimiena illaimana itaitaite.

<sup>33</sup> Illaimana illamona, Israel railla nairaina jaca sedaita. Naimie ifomo jiaimie jaca iñeite.

<sup>34</sup> María uai ote:

—Ñima diga ña iñedícue. ¿Ñiese bie ñibaille?

<sup>35</sup> Gabriel lloste:

—Jusiñamui Joreño omo iite. Ie siño uai diga iena finoite. Jusiñamui marena isoi naimie jiaí marenite. Naimiedi Jusiñamui Jito.

<sup>36</sup> O comini iñaiño, Elisabet, ie uaicitaila facaise jiaí jai urueside. Naiñaiño jai jionaide; ia jai seis fivui naiñaiño uruesilla ite.

<sup>37</sup> Jusiñamui nana bie isoide rafuena finorede.

<sup>38</sup> María uai ote:

—Jee. Jusiñamui anamo itícue. O llucino cuemona mare.

Ie facaise Gabriel naiñaiño mona oni jaide.

*Maríadi Elisabet ñine jailla rafue*

<sup>39</sup> Ie facaiseconi María aneduai ñine Judea railla eniruemona Zacarías illanomo raire jaide. Elisabetna cioillena, jaide.

<sup>40</sup> Zacarías jofomo rillano:

—Itio —raillanona, Elisabetna uaidote.

<sup>41</sup> Elisabet naiñaiño uaina cacajano, ieconi naiñaiño jeraimo ite urue iena jiaí uíñuamona, niraide. Ie facaise Jusiñamui Joreño anamo Elisabet jai ite.

<sup>42</sup> Iese illamona, María uruesillana uíñote. Naiñaiño ado lloste:

—Jusiñamui ona eo marena canoite. O uruena marena itaitaite.

<sup>43</sup> Jamai bue isoidícue; ia, odi cue Jilloitaraíma ei illanona, cue ñine bitio. Iena cuemo ña lloñedio;

<sup>44</sup> ia, cuena o uaiduanona, iobillamona cue jeraimo ite uruedi niraide.

<sup>45</sup> Cai Nama omo llotataga uaina suillana o ñinua jira, Jusiñamui ona eo marena canoite. —Jusiñamui Joreño naiñaiño mona illamona, iena lloste.

<sup>46</sup> María dinena uai ote:

Caiñai Nama eo mare. Naimiemo iobillacinona fecaacadicue.

<sup>47</sup> Naimiedi cue Jilloitaraímana jira, naimieri iobidícue.

<sup>48</sup> Jamai bue isoidícue; iadedi cuena fetode.

Ie jira biruimona nana comini cuena marena ñaitimaci.

<sup>49</sup> Naimiedi siño. Naimiedi mareuidimie. Cue facaina eo mare rafuena finode.

<sup>50</sup> Naimiena ñinotina jaca duenaita. Cai jaiaimona jaca duenaita. Caina birui jaca duenaita. Ua nana naimiena ñinotina duenaita.

<sup>51</sup> Diga siño rafuena finoite. Abi iedotino comeciaí facajacinona llucitaitaite.

<sup>52</sup> Naimiedi illaicominina oni dotaita; ia jamai bue isoidinona jamai bue isoiñedinona itaitaite.

<sup>53</sup> Dueredinona eo canoite; ia duenidinoma buena fecañeite.

<sup>54</sup> Duenailamona, cai Israel cominina feitañeite.

<sup>55</sup> Cai jaiaimona naimie jaie lua isoi, birui caina canoite.

Abraham micorimo jaie lloste: “Ona duenaitícue. O cominina jaca duenaitícue”  
María lloste.

<sup>56</sup> Elisabet diga davui amani naiñaiño fiebide. Ie mei ie jofomo abido jaide.

*Zacarías jito jeicia rafue*

<sup>57</sup> Elisabet jocularui jai ridemo, ñimana jocode.

<sup>58</sup> Naiñaiño ecimo ite comini, naiñaiño comini diga, iena fidiama, cai Nama naiñaiño na eo duenailana uíñotimaci. Naiñaiño diga iobidimaci.

<sup>59</sup> Ocho digarui jeicia mei, naimiaci finouilla isoi, urue abina dia rafuemo bitimaci. Ie moo mamecina jitaacadimaci;

<sup>60</sup> iadedi Elisabet lloste:

—Dama ite. Jitaiñedícue. Naimie mamecidi Juan cai jitalle.

<sup>61</sup> Uai otimaci:

—¿Bue ñellena iese raitio? O cominimona jaca bu Juan mameciredimiena iñede.

<sup>62</sup> Jefona cacaiñena jira Zacaríamo onolli diga jicanotimaci, ie jito mamecina jitalle.

<sup>63</sup> Onolli diga Zacarías fairiuano, rabena jicade. Cuete: “Naimie mamecidi Juan”. Ieri rajjicaidimaci. “¿Bue ñelle iena jitade?” comeciaina facadimaci.

<sup>64</sup> Ieconí Zacarías jai dane ñaite. Ie jira Jusiñamui iobillacino fecade.

<sup>65</sup> Nana iaimai ecimo itino rajjicaidimaci.

—Jusiñamui mudona naie rafue suie —lloimaci. Bie rafuena fidiano, nana Judea railla aneduaimo itinodi iena ñaoidimaci.

<sup>66</sup> Iena cacajano, comeciaina facadimaci: “Bimie jamai bue isoiñeitimiena jaite”. Cai Nama naimiena marena jaca canua jira, iese lloimaci.

*Zacarías Jusiñamui iobillacinona fecaja rafue*

<sup>67</sup> Ie facaise Jusiñamui Joreño Zacariana llotatajanona, Zacarías llote:

<sup>68</sup> Cai Nama Jusiñamui mare.

Cai Israel comini dine biite, caina jilloitallena.

<sup>69</sup> David micori Jusiñamuina jaie sedade.

David micori cominimona siño Jilloitaramana cai dine oretaite.

<sup>70</sup> Ie facaina llorainido naimie jaie lua isoi, cai Jilloitaramana oretaite,

<sup>71</sup> Taifemona, Janabamona cai jilloillena.

<sup>72-73</sup> Cai usumatai micoriaimo: “Omoína duenaiticue” llote.

Cai usuma Abraham micorimo jaie llogacinona feitañede.

<sup>74-75</sup> Taifemona cai jilloillena, cai Jilloitaramana oretaite.

Nana cai ille dinori Jusiñamuina jaciruiño sedajana jitaide.

Naimie jitailla isoi cai illena, naimie jitaillacinona cai finollena, cai Jilloitaramana oretaite.

<sup>76</sup> Cue jito, ona lloiticue. Jusiñamui ie lloramana jaitio.

Cai Nama uicomo jaitio, comini comeci: o raise finollena.

<sup>77</sup> Ie cominimo jeacinomona jilluacinona lloitio.

Iena naimaci ñinoia, Jusiñamui naimaci jeacinona feitaite.

<sup>78-79</sup> Jeacino anamo jai cai illa jira, jitreñinomo iticai isoidicai.

Jusiñamuina cai ñia ñnoñenia, fiodaillana jaciruiticai.

Naimie caina duenailamona, cai Jilloitarama billena o llofuellena, ona oretaite.

Naimiena cai ñinoia, jitreñinomo ñneiticai; ia Jusiñamui diga cai comeci: uri iite.

<sup>80</sup> Zacarías jito sairide. Jusiñamuina ñnocana jaide. Cominimo naimie ñia marefodo lloñenia, jofue ñnenanomo ite.

## 2

*Jesús jeicia rafue*

*(Mt 1.18-25)*

<sup>1-2</sup> Jesús jeicia facaise César Augusto anamo ailluena nairaii ite. Romamona naimacina sedauide. Naie facaise Siria railla enirue gobernadori Cirenio. César Augusto, nie diese comini naga nairaimo illana naimie uifollena, nana comini mameciai cuellena ocuide. Jaca bu iese jaie finoñede.

<sup>3</sup> Naimaci jaiagai illanomo mameciai cuiana ocuide.

<sup>4</sup> Ie jira José Galileamona Nazaretmona jaide. Judeamo Belémo jaide. David micori cominimo naimie jainaiaila jira, David micori illanomo jaide.

<sup>5</sup> Ie ai María diga jaide. Naiñaiño fenaí jai eo aillue.

<sup>6-7</sup> Belémo iaimai rillanona, naie facaise comini jofomo inillino ññena jira, jurareta jofomo ridiiaimaia. Nainomo ie doforato jito jeicite. Jocuá mei, iniroina naimiena ferinote. Ie jito inillena, jurareta ecaranomo naimiena jonete.

*Jusiñamui jaienisai toica llaudaiaí sedaraini dine jailla rafue*

<sup>8</sup> Jesús jeicia facaise naie naio Belén ecimo ite pastomo damierie toica llaudaiaina sedaraini itimaci. Naimaci toinaia sedadimaci.

<sup>9</sup> Ieconí cai Nama Jusiñamui daje jaienicí naimacimo ebena bairede. Jusiñamui ie siño uai diga naimacina quetiñote. Jacinaitimaci.

<sup>10</sup> Jaienicí llote:

—Jacinañeno. Mare rafue lloiacadicue. Nana cominina iobitallena, iena lloiacadicue.

<sup>11</sup> David micori illanomo damie como jeiciga. Jusiñamui facaina lloraini micoriai naimie billena jaie llouidimaci. Naimiedi Cristo cai Nama. Naimie omoi Jilloitarama. Jeacinomona omoína jillotaite.

<sup>12</sup> Naimiena jibuisai. Iniroina ferinoga urue jurareta jofomo imaci ecaranomo baitomoi. Iemona cue lluaña uanaicinona uññoitomoi —llote.

<sup>13</sup> Ie facaise naie jaienicí dine ailluena jaienisai bitimaci. Jusiñamui iobillacinona fecajano rotimaci:

<sup>14</sup> Monamo Jusiñamui illanona, naimiemo iobillacinona feaacadicai.

Cominina naimie duenaillamona, naimie diga uri iitimaci rotimaci. Ie mei abido jaidimaci.

<sup>15</sup> Monamo jaienisaí jailla mei, toica llaudaiaí sedaraini coniniri ñaitimaci:

—Belémo mai cai jailli, cai Nama caimo como lloga rafuena cai jibuisaillena.

<sup>16</sup> Ieconí raire jaidimaci. María José diga baitimaci. Iaimaiaí urue jurareta ecaranomo biillana ciodimaci.

<sup>17</sup> Naimiena ciua mei, nana naimacimo jaienici lloga rafuena llotimaci.

<sup>18</sup> Nana naie rafuena cacadinodi ieri rajicaidimaci.

<sup>19-20</sup> Iaimaiaí uruena ciua mei, llaudaiaí sedaraini imaci toiniaí dine abido jaidimaci.

Naimacimo jaienici llua isoi naimacimo suilla jira, iobidimaci. Nana naimaci cacaja rafueri, nana naimaci ciua rafueri Jusiñamuimo iobillacinona fecadimaci. María naie rafuena feitañede; ia iena comecina facauide.

*Jerusalémo Jusiñamui jofomo Jesúna iaimaiaí uilla rafue*

<sup>21</sup> Ocho digarui illanona, naie urue abina dete. Ie ei jeraimo naimie nia comuiñena, Jusiñamui jaienici naimie lloga mamecina jitade. Jusiñamui jaienici llua isoi, Jesúna ie mamecina jitade.

<sup>22-24</sup> Moisés micori jaie llua isoi Jerusalémo Jesúna uitiaimaiaí. Moisés micori jaie cuete: “Cuarenta digarui jocua mei, Jusiñamuimona riño marena illena, Jusiñamuimo mena ficiri naiñaiño fecaja. Jusiñamui diga ñairaima iena faja mei, riño facaina Jusiñamuimo jobaica”. Jiaí cuete: “Naga nano doforamiedi Jusiñamui ie. Ie muidona naimie facaina Jusiñamuimo ucubena fecaja”. Ie muidona Jerusalémo Jesús diga jaidiaimaiaí.

<sup>25</sup> Naie facaise Jerusalémo Simeón raillamie ite. Jusiñamuimona naimiedi mareuidimie. Jusiñamuina eo inócana jaide. Naimie cominina Cristo jilloitallena, Cristo billemo ocuriride. Naie facaise Jusiñamui Joreño anamo naimie ite.

<sup>26</sup> Temona Jusiñamui Joreñodi, naimiena Cristona cioillena, navui uicodo uiñotade. O nia fioidañena, Cristona cioitio raillanona llote.

<sup>27</sup> Jusiñamui jofomo Jusiñamui Joreño naimiena oretate. Jusiñamuimo Jesúna fecallena, Jesús ei, José diga, Jesúna fo uillana Simeón ciode.

<sup>28</sup> Naimaci dine jaillanona, Jesúna meniñote. Jusiñamuimo iobillacinona fecajano jide:

<sup>29</sup> Nama, o anamo iticue.

Cuemo o lloga uai jai suilla jira, uri fioidaiticue.

<sup>30</sup> O oretaga jilloitaramana jai ciodicue.

<sup>31</sup> Naimiena oredio, nana comini jilloillena.

<sup>32</sup> Naimiedi judíuafíedínona uanaicínona uiñotaite.

O cominina iobitaite

jide.

<sup>33</sup> Iena cacajamona, iaimaiaí jitona lloga uairi rajicaidiaimaiaí.

<sup>34-35</sup> Simeón iaimaiaimo caimaredicínona llote:

—Jusiñamui omoína raise canoite —llote.

Maríamo llote:

—Ero, ie rafuena lollena, Jusiñamui o jitona jai fetode. Naimie illamona, comini comecina facajacínona uiñotaite. Naimiemo suille rafuemono o comeci sure iite. Cai cominimona ailluena naimiena jitaiñeitimaci. Ailluena jitaítimaci.

<sup>36</sup> Nairuido Jusiñamui jofomo Ana railla feciño ite. Jusiñamui naiñaiñomo lloga rafuena llouide. Naiñaiño moo Fanuel micori. Naiñaiño nairaidi Aser. Jitaiño facaisemona ie ini diga siete años illanona, naimie fioidaite.

<sup>37</sup> Naiñaiño jai eo uaciño. Ochenta y cuatro años naiñaiñodi jai ite. Jusiñamui jofomo jaca isoide. Nagarui Jusiñamuimo jianona guicabiñeno naimiena sedaude.

<sup>38</sup> Simeón ñaiana cacajano, naiñaiño Jesús comini dine billano, Jusiñamuimo iobillacínona fecade. Naimie billemo naimaci ocurilla jira, naiñaiño naimaci jilloitaramana nainomo itinomo llocana uite.

*Nazaretmo abido naimaci jailla rafue*

<sup>39</sup> Moisés micori lloga uai naimaci fuidua mei, Jesúna uillanona, Galileamo Nazaretmo naimaci illanomo abido jaidiaimaiaí.

<sup>40</sup> Nainomo Jesús sairicana maíricana jaide. Eo abina uiñote. Naimieri iobillamona, Jusiñamui naimiena canouide.

*Jerusalémo Jusiñamui jofomo Jesúna illa rafue*

<sup>41</sup> Naga año Jerusalémo pascua railla rafue dine Jesús moo iaimaiaí jaisoidiaimaiaí. Egiptomona naimaci jaiaigai jillobillana comecillena, naie rafue ite.



<sup>42</sup> Naimiemo doce años illa facaise Jerusalémo iaimaia; jaisoilla isoi, jaidiiaimaia. Naimie doce años illa jira, Jesúna uitiaimaia.

<sup>43-44</sup> Rafue fuilla mei, abido bitiaimaia. Ailluena comini jiai billa jira, Jesús billana raise uiñoñediiaimaia. “Cai comini diga naimie bite” raillanona comecina facadiiaimaia; ia Jesús Jerusalémo fiebide. Darui raifi billa mei, iaimaia cominimo naimiena eo jenodiiaimaia.

<sup>45</sup> Baiñena jira, inia mei, Jerusalémo darui jaillanona, abido jaidiiaimaia.

<sup>46</sup> Ie are Jusiñamui jofomo naimiena baitiaimaia. Moisés micori llogacinona llofueraini motomo naimie ite. Naimaci llofuiana cacade. Iena naimaci diga jiai siadote.

<sup>47</sup> Nana cacadino naimie uiñogacinori rajjicaidimaci. Naimie raise siadogacinori jiai rajjicaidimaci.

<sup>48</sup> Naimiena iaimaia; baia, rajjicaidiaimaia. Ie ei naimiemo jicanote:

—¿Bue ñellena cocona duere finodio? O moocama diga ona eo duere jenodicoco.

<sup>49</sup> Naimie uai ote:

—¿Bue ñellena cuena duere jenodomico? Cue Moo jofomo naimie rafuena finodicue. ¿Niese bene cue illana uiñoñedomico?

<sup>50</sup> Naimie luana raise cacaiñediiaimaia.

<sup>51</sup> Iemei iaimaia; diga Nazaretmo naimie abido jaide. Iaimaia; uai iinuanona, iaimaia; anamo ite. Ie ei María nana naie rafue ie comezimo facauide.

<sup>52</sup> Naimie saircana abina uiñocana jaide. Jusiñamui naimieri iobide. Comini dinena naimiena jiai gaidimaci.

### 3

*Jofue iñenanomo Juan Bautista micori illa rafue*

*(Mt 3.1-12; Mr 1.1-8; Jn 1.19-28)*

<sup>1-2</sup> Jofue iñenanomo diga años Juan illanona, Jusiñamuimona ie uaina feiñote. Naimiedi Zacarías jito. Naie facaiseconi Romamo quince años Tiberio Césardi nanoca illaimana jai ite. Judea railla enirue gobernadori Poncio Pilato. Galilea railla enirue gobernadori Herodes. Naimie amadi Felipe. Iturea railla enirue, Tracante railla enirue diga, gobernadori Felipe. Abilinia railla enirue gobernadori Lisania. Jusiñamui diga nanoca ñairaima iaimaia; Anás, Caifás diga.

<sup>3</sup> Jusiñamui luua jira, nana Jordán fuemo ite comini dine Juan llofuecana jaide. Llote:

—Omoi jeacinona fainonocada, Jusiñamui dibeimo omoi comeci; iuai meido. Iemona Jusiñamui omoi jeacinona feitaite. Omoi comeci iuai omoi meidoia, comini iena uiñollena, mai omoi bautizallomo.

<sup>4</sup> Isaías micori ie rabemo naimiena jaie cuete:

Jofue iñenanomo damie jidai-jidaillana cacadicue.

Naimie llote: “Cai Nama biite. Naimie jaillino atona fino.

<sup>5</sup> Nana iconi oruita.

Naga aneduai diese eniruena judai.

Neicairuai joides nasona atona fino.

Naimo itaicuai illa diese eniruena oruita, daje facai illena.

<sup>6</sup> Nana comini Jusiñamui naimacina jillotaicananana uiñoitimaci”

cuete; ia naimaci comeciaina ñaite. Cai Namana iinuana ñaite. Abina iedoñenana ñaite. Jeacinno finocana jaiñenana ñaite. Cai Nama Jesús bia, Jesús uaina naimaci feiñollena, naimaci comeciaina marena finuana ñaite.

<sup>7</sup> Naimacina bautizallena, ailluena comini naimie dine bitimaci. Naimacimo llouide:

—Maraiñede rafuena finocana omoi jailla jira, jai naira; isoidomo. ¿Niese jilloitomo? Cue dine omoi billena, ¿bu omoimo lloga?

<sup>8</sup> Omoi comeci; iuailla; meido. Omoi jeacinona fainonocai. Iemona Jusiñamui jitaillacinona fino. Mare rafuena finocana jai. Naiemona omoi comeci; iuailla; meiduana uiñoitica. Ie mei bautizallomo. Omoi comeciaina facañeno: “¿Bue ñellena o luua isoi finoitica? Jusiñamui Abraham micorina jaie eo raise nabaide. Abraham micori cai moo illamona, Jusiñamui riicailifuemona jilloitica”. Ero, omoimo lloiticue: Cue luua isoi omoi finoñenia, naimie riicailifuemona jilloñeitomo. Abraham micori uruiaidomo; iadedi; Jusiñamui jitaillacinodo jaiacañedomo. Naimie jitaia, naimie jitaillacinona naimaci finollena, bene ite nificimona naimiedi Abraham micori facaina uruaina comutarede.

<sup>9</sup> Ero, lliñede riarar tiedomo. Tiia mei, marañena jira, iena jobaidomo. Ie isoidomo. Omoi marañena jira, Jusiñamui omoina jai duere finoacade. Ie riicailafue anamo jai itomo. Omoi comeci; iuai omoi meidoñenia, omoina duere finoite.

<sup>10</sup> Iena cacajanona, comini dinena naimiemo jicanotimaci:

—Cai bautizaja mei, ¿niese itica? ¿Nie isoide mare rafuena finoitica?

<sup>11</sup> Juan uai ote:

—Ailluena iniroiredimiedi iniroinidimiemo iniroina feca. Guilleredimiedi guillenidimiemo guillena feca.

<sup>12</sup> Naimacina bautizallena, gobierno ucubena oraini jiai bitimaci. Jicanotimaci:

—Llofueraima, cai bautizaja mei, ¿niese iiticaí? ¿Nie isoide mare rafuena finoiticaí?

<sup>13</sup> Uai ote:

—Gobierno facaina omoi ibataia, cominimona gobierno llua baifemo oñeno.

<sup>14</sup> Naimie dine billanona, soldaduai jicanotimaci:

—Cai bautizaja mei, ¿niese iiticaí? ¿Nie isoide mare rafuena finoiticaí?

Uai ote:

—Cominimona rana bairoñeno. Riicinodo rana oñeno. Tainona llogiduamona, cominimona rana oñeno. Omoi ucube illa diese feño. Ie baifemo ucubena nicidoñeno.

<sup>15</sup> Juan llofuiamona naie facaise cominidi Cristo billemo ocuirilla jira, “Juandi ñibai Cristo” raillanona, Juanmo comeciaina facauidimaci.

<sup>16</sup> Iena fidiano, Juan llote:

—Cristoñedicue. Jusiñamui dibeimo omoi illamona, jinui diga omoina bautizadicue. Cai baifemo faitimie bie facaise biite. Naimie cue ifomo meidoite. Jamai bue cue isoilla jira, naimiena cue canuana uiñoñedicue. Naimiemo omoi duia, naimiedi Jusiñamui Joreño omoimo itataite. Omoi comeciai iuai omoi meidoñenia, omoina duere finoite.

<sup>17</sup> Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isoide. Naimie rafuena lluanona, naimiedi comeciai iuaillaí meidotinona ie Moo illanomo ofitaite; iadedi jiaie cominina duere finoite. Iraimo dotaite. Naie irai jaca duñede —llote.

<sup>18</sup> Bie isoidicinodo cominimo ie mare rafuena llofueuide.

<sup>19</sup> Naie facaiseconi Herodedi gobernador. Ie ama ai ote, ie aina illena. Naiñaiñodi Herodías. Diga jiaie mariñede rafuena finode. Ie muidona Juan naimiena lletade.

<sup>20</sup> Maraiñede rafuena Herodes finocana jaillamona, Juan cárcelmo jonetade.

*Juandi Jesúna bautizaja rafue*

*(Mt 3.13-17; Mr 1.9-11)*

<sup>21</sup> Ailluena cominina Juan bautizaja facaise, Jesúna jiai bautizade. Bautizaja mei, Jesúdi ie Moo diga ñaianona, mona bojode.

<sup>22</sup> Teconi Jusiñamui Joreño ucugina eruaillano, naimie emodomo ana bite. Monamona Jusiñamui llote:

—Cue isiruiga Jitodio. Ori iobidicue.

*Jesucristo ie usumatiai*

*(Mt 1.1-17)*

<sup>23</sup> Jesús treinta años illamona, Jesús ie maijille rafue tainede. “Naimiedi José micori jito” raillano naimiemo cominidi comeciaina facadimaci. Josédi Elí micori jito.

<sup>24</sup> Elídi micori Matat micori jito. Matat micori Leví micori jito. Leví micori Melqui micori jito. Melqui micori Jana micori jito. Jana micori José micori jito.

<sup>25</sup> José micori Matatías micori jito. Matatías micori Amós micori jito. Amós micori Nahum micori jito. Nahum micori Esli micori jito. Esli micori Nagai micori jito.

<sup>26</sup> Nagai micori Maat micori jito. Maat micori Matatías micori jito. Matatías micori Semei micori jito. Semei micori José micori jito. José micori Judá micori jito.

<sup>27</sup> Judá micori Joana micori jito. Joana micori Resa micori jito. Resa micori Zorobabel micori jito. Zorobabel micori Salatiel micori jito. Salatiel micori Neri micori jito.

<sup>28</sup> Neri micori Melqui micori jito. Melqui micori Adi micori jito. Adi micori Cosam micori jito. Cosam micori Elmodam micori jito. Elmodam micori Er micori jito.

<sup>29</sup> Er micori Josué micori jito. Josué micori Eliezer micori jito. Eliezer micori Jorim micori jito. Jorim micori Matat micori jito. Matat micori Leví micori jito.

<sup>30</sup> Leví micori Simeón micori jito. Simeón micori Judá micori jito. Judá micori José micori jito. José micori Jonam micori jito. Jonam micori Eliaquim micori jito.

<sup>31</sup> Eliaquim micori Melea micori jito. Melea micori Mainán micori jito. Mainán micori Matata micori jito. Matata micori Natán micori jito. Natán micori David micori jito.

<sup>32</sup> David micori Isaí micori jito. Isaí micori Obed micori jito. Obed micori Booz micori jito. Booz micori Salmón micori jito. Salmón micori Naasón micori jito.

<sup>33</sup> Naasón micori Aminadab micori jito. Aminadab micori Aram micori jito. Aram micori Esrom micori jito. Esrom micori Fares micori jito. Fares micori Judá micori jito.

<sup>34</sup> Judá micori Jacob micori jito. Jacob micori Isaac micori jito. Isaac micori Abraham micori jito. Abraham micori Taré micori jito. Taré micori Nacor micori jito.

<sup>35</sup> Nacor micorì Serug micorì jito. Serug micorì Ragau micorì jito. Ragau micorì Peleg micorì jito. Peleg micorì Heber micorì jito. Heber micorì Sala micorì jito.

<sup>36</sup> Sala micorì Cainán micorì jito. Cainán micorì Arfaxad micorì jito. Arfaxad micorì Sem micorì jito. Sem micorì Noé micorì jito. Noé micorì Lamec micorì jito.

<sup>37</sup> Lamec micorì Matusalén micorì jito. Matusalén micorì Enoc micorì jito. Enoc micorì Jared micorì jito. Jared micorì Mahalaleel micorì jito. Mahalaleel micorì Cainán micorì jito.

<sup>38</sup> Cainán micorì Enós micorì jito. Enós micorì Set micorì jito. Set micorì Adán micorì jito. Adándi Jusiñamui comuitagamie.

## 4

*Taife ramo Jesús faia rafue*  
(Mt 4.1-11; Mr 1.12-13)

<sup>1</sup> Jusiñamui Joreño anamo Jesús illamona, Jordán railla illemona Jesús jaillano, jofue iñenanamo Jusiñamui Joreño naimiëna orede.

<sup>2</sup> Nainomo cuarenta digarui Taifedi naimiëna ramo faite. Naie facaiseconi Jesús jaca guiñede. Naie facaise fuilla mei, guiñeno illamona, naimie aimetaite.

<sup>3</sup> Jesús aimetaillana Taife uiñuamona, naimiemo llote:

–Jusiñamui Jitodiodena, naimiemo llono: “Ore Moo, bie noficina llomenicono jaita”.

<sup>4</sup> Jesús uai ote:

–Iena lloñeiticue. Jusiñamui facaina lloraïma micorì iena jaie cuega: “Jiaie rafuedi llomenico guilla baifemo faite”.

<sup>5</sup> Ie mei a ite anedumo Taife Jesúna uillano, dallu illanona, naimiemo nana nairaiaïna acatate.

<sup>6-7</sup> Llote:

–Nana bie nairaiaï cue anamo ite. Iena cue iacagamie mo itataredicue. Cuena o sedajamona, iobillacinona cuemo o fecaïa, nana bie nairaiaï omo fecaiticue. Bie nairaiaï illaïmana jaitio.

<sup>8</sup> Jesús uai ote:

–Dama ite. Ona sedañeiticue. Moisés micorì jaie cuega: “Cai Nama Jusiñamuina seda. Dama naimiemo iobillacinona feca”.

<sup>9</sup> Ie mei Jerusalémo Jusiñamui jofo muidomo Taife Jesúna uite. Raite:

–Jusiñamui Jitodiodena, eniruemo mai ana uai.

<sup>10-11</sup> David micorì ona jaie cuega:

Ona eenollena Jusiñamuidi ie jaienisaimo lloite.

Eniruemo o uaiñellena, o abi bofedaiñellena, ona feiñoitimaci

cuega. Naimie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

<sup>12</sup> Jesús uai ote:

–Dama ite. Ana uaiñeiticue. Ero, ie cominimo Moisés micorì jaie cuega: “Cai Nama Jusiñamuina facaciñeno”. Naimie cuena raise eenuana jai uiñoiticue. Jamai ebena naimiëna facaciñeiticue. O lluaña finoñeiticue.

<sup>13</sup> Taife naimiëna ramo faia mei, naimiëmona ie jitaïlle ñinori oni jaide.

*Galileamo Jesús ie rafue llole jillaci*  
(Mt 4.12-17; Mr 1.14-15)

<sup>14</sup> Jusiñamui Joreño naimiemo illamona, Galileamo Jesús abido jaide. Nana naie eniruemo naimie mameci soride.

<sup>15</sup> Ailluena judíuï ofracuaimo naimie llofueuide. Iena cacajanona, comini: “Naimie llofuacino mare” raitimaci.

*Nazaretmo Jesús illa rafue*  
(Mt 13.53-58; Mr 6.1-6)

<sup>16</sup> Macarillamona, Nazaretmo naimie jaide. Navui nainomo naimiedi sairide. Naimie jaisoilla isoi, sábadomo nainomo ite ofracomo jaide. Jaie cuegafuiaïna ado facallena, naimie a naidadate.

<sup>17</sup> Naie lloraco nama mullaïmad; Isaías micorì jaie cuegafuiaï jai ferinoga rabe naimiemo fecade. Tena oni suiñoacida, bie rafuena baïllanona facade:

<sup>18-19</sup> Jusiñamui Joreño cuemo ite.

Dueredinomo mare rafuena llollena, cuena fetode.

Taife anamo ailluena comini illa jira, Jusiñamui naimacina jillotaïacana uiñoñedimaci.

Jusiñamui rafuena ailluena comini uiñoñena jira, naimie illanomo rillena uiñoñedimaci.

Jeacino anamo naimaci illa jira, Jusiñamui naimacina jillotaïacana uiñoñedimaci.

Naimie naimacina duenaïllana birui uiñuana jitaide.

Naimacimo mare rafue llollena, cuena jai oretate.

<sup>20</sup> Naie rafue facaja fuillamona, cuegafuiai abido fecade. Naimacina llofuellena, dane ana raide. Nana nainomo ite comini naimiemo eo eruaidimaci.

<sup>21</sup> Iemei naimie naimacina llofuete. Raite:

—Omoi como cacaja cuegafuiai omoi motomo jai suide. Cuena ñaite.

<sup>22</sup> Naimie lluaana comini cacajano, coninina raitimaci:

—Naimie fue mare. Naimie marena llofuete. —Iemona rajjicaillamona, coniniri raitimaci —, Naimiedi jamai José jito. ¿Niese naie rafue birui suide?

<sup>23</sup> Tena uiñuamona, Jesús dinena llote:

—Cue lluaana ñnoñedomoi. Comeciaina facadomoi: “Capernaumo naimie siño finoca rafuena fididicai. Siño rafuena cai motomo naimie jiai finoia, naimiena ñnoiticai. ‘Ua médico duia, ie abina dama jillotarede’ cai einamací raisoidimaci. Ie isoide. Naimie llua isoi naimie ia, siño rafue cai motomo finorede” comeciaina facadomoi.

<sup>24</sup> Uanaicinona omoimo lloiticue. Naimie comini nairaimo Jusiñamui facaina lloraíma ia, ie comini naimie uaina feiñoiacasiñede. Iena jamaisite. Ie isoide. Cue nairaimo cue illa jira, cue uaina ñnoñedomoi.

<sup>25</sup> Jaiie ie isoide. Elías facaiseconi daje amani años abimo atomonado noci deiñede. Aime guitimaci. Naie facaiseconi bie eniruemo cai comini dine ailluena feciñuái itimaci; iadedi omoi jaiagai Jusiñamui uaina ñnoñedomoi.

<sup>26</sup> Jusiñamuidi Elíana cai comini dine oreñede; iadedi jiaie eniruemo ite feciño dine naimiena orede. Sarepta railla nairaimo orede. Sidón railla eniruemo naie nairai ite. Cai cominiñede feciño mo orede.

<sup>27</sup> Jiaie rafuena lloiticue. Eliseo micoridi Jusiñamui facaina jaiie llote. Eliseo micori facaiseconi bie eniruemo diga efonaitino ite; iadedi naimacimona Jusiñamui buna jillotañede. Omoi jaiagai Jusiñamui uaina ñnoñena jira, Eliseo micori duidinona jillotañede. Naie facaiseconi dama Naamán micorina jillotate. Cai cominimo naimie duiñede; ia Siria railla eniruemo duide. Ie isoidomoi. Cue uaina ñnoiacaiñedomoi —llote.

<sup>28</sup> Jesús lluaana cacajano, naie ofiracomo itino eo iciritimaci.

<sup>29</sup> Naidacaillano, naimiena jino uitimaci. Naie illanodi iconimo ite. Nainomo naimiena uillanona, iconimona naimiena ana dotaacadimaci.

<sup>30</sup> Naimiena meineiacidimaci; iadedi naimaci motomo naimie jaillanona, naimacimona naimie jillobillano oni jaide.

*Jesúdi Janaba anamo itimie jillotaja rafue*

*(Mr 1.21-28)*

<sup>31</sup> Jesús Capernaumo jaide, Galilea railla eniruemo ite. Nainomo naimie ia, sábadoruimo judíuái ofiracomo jaide. Nainomo llofuete.

<sup>32</sup> Illaíma uai isoi naimie llofuia jira, nainomo ite comini naimie llofuiamona rajjicaidimaci.

<sup>33</sup> Janaba anamo illamie nainomo ite. Jesús llofuiana cacaíta, Janabadi iimana ado cuirioitate:

<sup>34</sup> —Odi Nazaret ie Jesús. ¿Bue ñeiacadio cai diga? Caina duere finuaibidío. Ona uiñoticue. Odi Jusiñamui ie Mare Fetocamiédío.

<sup>35</sup> Jesús naimiena lletade:

—Llúcai. Naimiemoni oni jai. —Iena cacajanona, naimaci motomo Janaba iimana ana dotade; ia naimiedi bofedaiñede. Ie mei Janaba naimiemoni oni jaide.

<sup>36</sup> Tena cuanona, nana nainomo itino rajjicaidimaci. Coniniri siadotimaci:

—¿Nie isoide Jesús uai? Janabamo naimie llua mei, iimamona Janabadi oni jaide.

<sup>37</sup> Jesús finoca rafue muidona, naimie mamecidi nana naie eniruemo soride.

*Jesúdi Simón Pedro jifaiñoña jillotaja rafue*

*(Mt 8.14-15; Mr 1.29-31)*

<sup>38</sup> Ofiracomona Jesús jaillanona, Simón Pedro jofomo jaide. Ie facaise Simón jifaiño duide. Abina cuaride. Naiñaiñoña jilloitallena, nainomo itino Jesús mo jicanote.

<sup>39</sup> Naiñaiño dine Jesús jaillanona, ie uai lluaamona, naie duicodi oni jaide. Ieconí naiñaiño jillode. Abi cuariñede. Naidacaillanona, guille finuanona, ie jofomo itinona ecade.

*Jesúdi ailluena duidinona jillotaja rafue*

*(Mt 8.16-17; Mr 1.32-34)*

<sup>40</sup> Nairuido jitoma ana ítemo, comini ailluena duidinona Jesús dine atidimaci. Diga duicuai illanona atidimaci. Naimacina jetajamona, naimacina jillotate.

<sup>41</sup> Jananiaina jiai oni oretajano, jananiái dinena raite:

—Odi Jusiñamui Jitodio. —Naimiena naimaci uifua jira, Jesús naimaci ñaiana rairuide. Naimiedi Jusiñamui Jitona uifotimaci.

*Judeamo Jesús llofua rafue*  
(Mr 1.35-39)

<sup>42</sup> Ie areruïdo jitriramo jofue iñenanomo Jesús jaide; iadedi comini naimiena jenuaidimaci. Baillanona, naimaci motomona naimie jaiñellena jicanotimaci.

<sup>43</sup> Naimacimo llote:

—Jiaie nairaimo cue mare rafuena lloiacadicue. Naimie anamo comini illana Jusiñamui jitailla jira, naimacimo iena lloiacadicue. Ie mare rafuena lloillena, Jusiñamui cuena orede. Oni jaiticue. Omoi diga fiebiñeiticue.

<sup>44</sup> Ie mei Judeamo ite ofiracuaimo Jesús llocana jaide.

## 5

*Jesús muidona, naimaci ailluena lliciaina ua rafue*  
(Mt 4.18-22; Mr 1.16-20)

<sup>1</sup> Jiairuïdo Genesaret railla jorai fuemo Jesús ia, ailluena comini naimie dine bitimaci. Ie rafue raise cacaillena, comini oni ñuicocana naimie ecimo bitimaci.

<sup>2</sup> Ie facaise jorai fuemo Jesús mena sijide botena ciode. Naimaci llojjina naimaci jocua jira, naie botemo lloiji fairaini iñede.

<sup>3</sup> Comini ie llofuiaçinona raise cacaillena, Jesús daje botemo jaide. Naie bote namadi Simón Pedro. Naie bote joraimo janore bai ñuitallena Simómo jicanote. Botemo ana raita, botemona cominina llofuate.

<sup>4</sup> Llofuaia mei, Simómo llote:

—Aforedinomo jai. Nainomo omoi llojjina faino.

<sup>5</sup> Simón uai ote:

—Maestro, cue nabaiñiaia diga namona naio lloiji faiticai; iadedi jaca buena oñedicaia. ¿Ñiese ja oiticai? Iadedi o llua jira, llojjina faiticue.

<sup>6</sup> Iena naimaci faia mei, ailluena lliciaina jiiatimaci. Ie jira naimaci lloiji cuaranoiacade.

<sup>7</sup> Iena ciuano, onolli diga imaci nabaiñiaina uaidote, naimiena naimaci canollena. Naimaci canuaibilla mei, lliciaina naga bote oruïtate. Eo oruilla jira, buiacade.

<sup>8</sup> Iena ciuano, Simón Pedro Jesús mo iobillacino fecallena, caiñici ifodo rainadate. Raite:

—Odi siño Jitodio; ia cue jamai bue isoilla jira, cuemona oni jai. Jeaçinona finouidimiedicue.

<sup>9</sup> Ailluena lliciaina naimaci ua jira, naimaci rajicaillamona, iena naimie llote.

<sup>10</sup> Naimie nabaiñiaimona Zebedeo jito iaimaiaia ite. Juan diga Jacobo iaimaiaia. Simómo Jesús llote:

—Cuenta jaciruïño. Lliciaina birui ocabitomoi; iadedi cue dibeimo naimaci illena, biruimona cominina oitomoi.

<sup>11</sup> Eniruemo sijiano, naimaci raruiaia fainonocaida, Jesús diga jaidimaci.

*Jesúdi efonaitimiena jillotaja rafue*  
(Mt 8.1-4; Mr 1.40-45)

<sup>12</sup> Jiairuïdo Jesúdi jiaie nairaimo ia, efonaitimie naimie dine bite. Naimie eo fodo jaide. Jesúna naimie ciuano, naimiena raise uaiduamona, ana bitadate. Llote:

—Maestro, o jitaiaidedi, cuena jillotaredio.

<sup>13</sup> Jesús ie onolli oni ñuitajanona, naimiena jetade. Raite:

—Ona jillotaicadicue. Mai o jillo. —Iecon jillode.

<sup>14</sup> Jesús naimiemo llote:

—Omo suide rafue jaca bumo lloñoeno; iadedi Jerusalémo Jusiñamui jofomo Jusiñamui diga ñairaimamo o abina acatajai. O jillua jira, Jusiñamui Moisés micori jiaie lloga rana feca Iemona comini o jilluana uifotimaci.

<sup>15</sup> Iese Jesús naimiemo llote; iadedi Jesús finoca rafue llocana eo uite. Ie muidona naimie llua cacaillena, duidinona Jesús jillotallena, ailluena comini naimie dine bitimaci.

<sup>16</sup> Bitimaci; iadedi Jusiñamui diga ñaillena, jofue iñenanomo Jesús jaide.

*Jesúdi tisitaitimiena jillotaja rafue*  
(Mt 9.1-8; Mr 2.1-12)

<sup>17</sup> Jiairuïdo naimie llofueia, diga comini naimie illa jofomo bitimaci. Fariseuai railla comini bitimaci. Moisés micori llogacinuaina llofueraia bitimaci. Galileamona diga nairaimona bitimaci. Judeamona bitimaci. Jerusalémona bitimaci. Jusiñamui uaido Jesús naimie dine bite duidinona jillotate.

<sup>18</sup> Ie facaise ie birramo biide tisitaitimiena Jesús dine damierie atidimaci;

<sup>19</sup> iadedi naimaci uillifo iñena jira, ailluena comini illa jira, riñedimaci. Naie jofu bibanilla jira, jofu emodomo a jaidimaci. Jofu beicimo ite tidabacuido a jaidimaci. Jofu emodo econocaída ifodo naimiēna ie biiramo biide diga, comini motomo Jesús ecimo ana ñuitadimaci.

<sup>20</sup> Iena Jesús ciuanona, tisitaitimie jilluana naimaci ñnuana Jesús uñote. Tisitaitimiemo llote:

—Jadi, o jeacinona cue feitaja jira, iena oni jai dotadicue. Ie facai ibana jai oñeiticue.

<sup>21</sup> Nainomo itinomona Moisés micori llogacinona llofueraini itimaci. Fariseuai jiai itimaci. Comeciaina facadimaci: “Naimie Jusiñamuina jeare ñaite. Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade”.

<sup>22</sup> Naimaci comeciái facajacinona Jesús uñuanona, naimacimo jicanote:

—¿Bue ñellena omoi comeciaina iese facadomoi?

<sup>23</sup> Bimiemo: “O jeacinona jai oni dotadicue” cue lloia, cue uai siñonana uññoñeitomoi; ia bimie: “Mai naidacaillanona macari” cue lloia, cue uai siñonana uññoitomoi.

<sup>24</sup> Monamona jaiē cue billanona, ñmana jaidicue. Ie jira jeacino oni dotaja uai cuemo ite. Iena omoi uññollena, tisitaitimiemo lloiticue: “Mai naidacai. O biira ferianona, o jofomo mai jai”.

<sup>25</sup> Iese naimie raillamona, tisitaitimie jillode. Ieconí naimaci motomo naimie naidaide. Ie biira feriano, Jusiñamuimo iobillacino fecajano, ie jofomo jaide.

<sup>26</sup> Nana naiēna ciolino eo raijicadimaci. Iemona Jusiñamuimo iobillacinona fecadimaci. Eo raijicaillamona, raitimaci:

—Bie isoide siño comena jaca cioñedicai.

*Jesúdi Levína fetua rafue*  
(Mt 9.9-13; Mr 2.13-17)

<sup>27</sup> Jesús jino macarillano, gobierno facaina ucube oraímana ciode. Naimie mameci Leví. Ie ucubena ouillanomo raide. Jesús naimiemo llote:

—Cue llofuegamiēna o jaillena, cue diga bi.

<sup>28</sup> Naidacaiēna, Jesús diga jaillanona, ie maijiana fañonocaide.

<sup>29</sup> Nailli ie jofomo Leví aillue rafuena finode, Jesús iēna. Diga ucube oraíni guisaiñbitimaci. Diga jiaie comini jiai guisaiñbitimaci. Jesús diga danomo gutimaci.

<sup>30</sup> Nainomo fariseuai cominidi, Moisés micori llogacino llofueraini diga, jamai bitimaci. Jesúsna ciuanona, ie llofueoicaiganomo jicanotimaci:

—¿Bue ñelli ucube oraíni diga gutomoi? Marañede comini diga gutomoi.

Moisés micori llogacinodo ucube oraíni raise jaiñenamona, naie isoidino diga fariseuai comini nabairiñena jira, iese jicanotimaci.

<sup>31</sup> Jesús iēna cacajano, llote:

—Ecairedino médicono jitaiñedimaci; iadedi duidinodi médicono jitaidimaci.

<sup>32</sup> Jusiñamui díbeimo mareuidinona uaiñedicue; iadedi marañedinona uaiñiticue.

*Jesúmo comini guiñenana jicanua rafue*  
(Mt 9.14-17; Mr 2.18-22)

<sup>33</sup> Naie facaise fariseuai dinena Jesúsno llote:

—Cai einamaci llua isoi, Jusiñamuina cai raise iobitallena, guiñenaruillai illa facaiseconi guiñedicai. Jusiñamuimo jicabidicai. Cai jeacino facaina sunaicabiticai. Cai einamaci rafuedo Juan Bautista llofueoicaigano jaidimaci. Cai llofuegano iedo jai jaidimaci; iadedi o llofueoicaigano jaca gutimaci. ¿Bue ñellena cai einamaci rafuedo jaiñedimaci?

<sup>34</sup> Jesús uai ote:

—Jiaie rafuedo iēna lloiticue. Coniruedi ie aina uarui ia iobilla jira, ie nabaiñiaí sunañedimaci. Iobillamona gutimaci.

<sup>35</sup> Jiañruído jai aireiacade conirue naimaci diga iñenia, naimaci comeci sunaillamona, naimaci jitaie, guiñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

<sup>36</sup> Jiaie rafuedo iēna lloiticue: Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai marañeno cioite.

<sup>37</sup> Jacagomona finoca bolsa como finoca vino joneñega. Jonegadēna, marañena jira, sirillamona igoi raire cuararite. Vino fañite. Igoi jiai fañite.

<sup>38</sup> Como finoca vino comogomo jonelle. Iemei iēna faññeite.

<sup>39</sup> Navui finoca vino jirua mei: “Navui finoca vino ñia mare” raillamona, como finoca vino buna jiroacaiñede. Ie isoide. Omoi einamaci rafue ifomo jiaie rafue birui ite. Iēna omoiño llocabiticue. Iedo jaidicai; ia omoi einamaci rafuemo omoi fibilla jira, jiaie rafuedo birui jiaicaiñedomoi —llote.

## 6

*Sábadoruimo Jesús llofueoicaigano majia rafue*  
(Mt 12.1-8; Mr 2.23-28)

<sup>1</sup> Jiairuido sábadoruimo Jesús, ie llofueoicaigano diga, trigo illa illi motodo joide naisonaa jaide. Ie llofueoicaigano trigona tijiano, golluano, guicana jaidimaci.

<sup>2</sup> Dajerie fariseuai iena ciuano, llotimaci:

—Rairuica rana finosite. Moisés micori rairuilla jira, sábadoruimo majinidicai; iadedi trigona naimaci tijiamona, caimona jai majjidimaci. Caimona jeacinona jai finodimaci.

<sup>3</sup> Ie llofueoicaiganona riiduano, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga Jusiñamui jofomofo jaide.

<sup>4</sup> Jusiñamuimo fecaca llomeniconaa uanona, guitimaci. Jamai bue isoidino naie llomeniconaa guillana Jusiñamui rairuide. Dani Jusiñamui diga ñairaini iena guiredimaci. David micori iena guite; ia Jusiñamui naimacina duere finoñede.

<sup>5</sup> Monamona cue billamona, iimana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiai rairuiredicue. Ie jira nairuimo cue jitaila rafuena finoredicue.

*Jesúdi onollina idisarodimiena jillotaja rafue*  
(Mt 12.9-14; Mr 3.1-6)

<sup>6</sup> Jiaie sábadoruimo judíuai ofiracomo Jesús jaillanona, llofujete. Ie facaise nainomo nabellimo idisarodimie ite.

<sup>7</sup> Moisés micori llogacinona llofuerañi, fariseuai diga, Jesúsno eruaidimaci, sábadoruimo Jesús naimiena raabaca ie segoitai. Iena Jesús finoa, naimacimona sábadoruimo naimie jai majia jira, naimiena llogidoiacadimaci. Naimacimona sábadoruimo bu majia, jeacinona finode.

<sup>8</sup> Naimaci comeciaina facajacinona Jesús uñuamona, onollina idisarodimienmo llote:

—Cue ecimo naidada. —Iemei Jesús ecimo naidadate.

<sup>9</sup> Jesús nainomo itinomo jicanote:

—¿Nie isoide rafue sábadoruimo finuadena mare? Bimie birui cue jillotaiadedi, birui mare rafuena finodicue. Cuenaa birui omoi meineiadedi, birui marañede rafue finodomo. Sábadoruimo ¿nie isoide rafue finuana rairuidomoi?

<sup>10</sup> Naimacimo eruailanona, duidimienmo llote:

—O onolli mai oni ñuita. —Iena ñuitajanona jillode.

<sup>11</sup> Nainomo itino iena ciuanona, eo iciritimaci.

—¿Niese Jesúsna nibaiticai? —naiemona coniniri siadotimaci.

*Jesúdi ie doce llofueoicaiganona fetua rafue*  
(Mt 10.1-4; Mr 3.13-19)

<sup>12</sup> Nairui aneduaimo Jesús jaide, Jusiñamui diga ñaillena. Namona naio jüide.

<sup>13</sup> Monaidemo, ie llofueganona naimie dine uaidote. Naimacimona doce digamiena fetode. Naimie diga icabillena, naimacina naimie facaina llorainina naimaci jaillena, naimacina fetode.

<sup>14</sup> Iese mameciredimaci: Simón; naimie mameci jiaicidi Jesús jitaca Pedrona. Andrés; naimiedi Pedro ama. Jacobo, Juan, Felipe, Bartolomé,

<sup>15</sup> Mateo, Tomás, jiaie Jacobo; naimiedi Alfeo jito. Jiaie Simóna fetode. Naimiedi cananista comini facaisemo duide.

<sup>16</sup> Judas; naimiedi Jacobo jito. Judas Iscariote micori; naimiedi Jesúsna gaitatatimie.

*Jesúdi ailluena cominina llofua rafue*  
(Mt 4.23-25)

<sup>17</sup> Aneduaimona siniaidinomo ie doce llofueoicaigano diga Jesús bite. Ie jiaie llofuegano naimie dine bitimaci. Ailluena jiaie comini bitimaci. Nana Judeamona bitimaci. Jerusalémona bitimaci. Tiromona bitimaci. Sidómona bitimaci. Tiro monaillai fuemo ite. Sidón monaillai fuemo jiai ite. Naimie lluomo cacareillena bitimaci. Naimaci duicomona jiai jilloiacadimaci.

<sup>18</sup> Jananiai anamo itinomona Jesús jananiaina oni orede.

<sup>19</sup> Nana comini naimiena jetaacadimaci. Naimienmo siño uai illa jira, naimiena jetajamona, naimaci duicomona jillodimaci.

*Jesús lloga rafue*  
(Mt 5.1-12)

<sup>20</sup> Ie llofueganomo eruailanona, Jesús llote:

—Naimie anamo omoi jai illamona, Jusiñamui omoína sedaacana rafuena omoína llofueitícue. Naimiena jitaídomoína, omoína sedaite. Comeciaina facadomoi: “Jusiñamui jitaíllacinona daní finonídicaí; ia Jusiñamui caina canuamona, iena finoíticaí”. Naimie comini omoi illamona, naimie omoína canoite. Iemona caimare iitomoi.

<sup>21</sup> Naimie jitaíllacino omoi finuamona, Jusiñamui omoína sedaite. Naimiedi mare rafuena omoi finuana canoite. Iemona caimare iitomoi. Omoi sunaia, Jusiñamui omoína sedaite. Ailluena comini jeacino finocana jaidimaci. Iena uíñuamona, sunaitomoi. Naie isoidino omoi illamona, Jusiñamui omoi comeciaina ocuítotaite. Iemona iocire iitomoi.

<sup>22</sup> Cuemo omoi duia, duere sefuitomoi. Jiaie comini omoína enoitimaci. Omoína oni dotaitimaci. Omoína jeare ñaitimaci. Cuemo omoi duilla jira, omoína jamaitimaci; ia Jusiñamui omoína caimare itataite.

<sup>23</sup> Omoi isoi omoi jaiagaimona Jusiñamui facaina lloraini micoriai jiaie duere sefuidimaci. Iena omoi uíñuamona, monamo Jusiñamuimona ailluena ibana ico omoi feñua jira, birui omoi duere sefua, iocire omoi jai.

<sup>24</sup> Iese iitomoi; ia Jusiñamuina jitaíñedino ico duere sefuitimaci. Comeciaina facadimaci: “Jusiñamuina jitaíñedicaí. Marena birui iticaí. Nana cai comeCIAi jitaíllacino birui caimo ite”. Iese birui itimaci; ia Jusiñamui naimacina ico duere finoite.

<sup>25</sup> Jusiñamuimona buena birui jitaíñedino ico duere sefuitimaci. “Nana cai comeCIAi jitaílla rafue caimo birui illa jira, Jusiñamuimona buena jitaíñedicaí” raitimaci. Iese birui itimaci, ia Jusiñamui naimacina ico duere finuamona, buenitimaci. “Cai comeCIAina iocire itatallena, Jusiñamuina jitaíñedicaí” damerie birui raitimaci. Naimaci jeacino facaina sunaíñedimaci. Birui ite rafuena eburitimaci. Iese birui itimaci; ia Jusiñamui naimacina ico duere finuamona, sunaitimaci. Eeitimaci.

<sup>26</sup> Naimaciri iobillamona, omoi jaiagaidi Jusiñamui facaina llorainina abi caitadinona marena ñaitimaci. Damerie birui daje isoidimaci. Jusiñamuina iobitaiacañedimaci; ia cominina iobitaiacadimaci. Iemona comini naimacina marena ñaitimaci; ia Jusiñamui naimacina ico duere finoite.

*Jesúdi iba oñenana llua rafue*

*(Mt 5.38-48; 7.12)*

<sup>27</sup> Jesús llote:

—Cue lluana cacajamona, iena iino. Inuamona omoína enoidinona isirui. Naimacina cano.

<sup>28</sup> Omoi jeare ñaitinona marena ñaino. Omoína jeare finodino facaina Jusiñamuimo omoi jii.

<sup>29</sup> Omoi cacaina bu dutaiade, iba oñeno; iadedi enefebeimo dobaida, enefebeimo jiai dutallena. Omoi iniroina bu bairoiacaña, omoimo naimie nia jicañenia, naimie jitaílla iniroi baifemo naimiemo feca.

<sup>30</sup> Omoimo ite rana bu jicaia, iena caidíñeno feca. Omoimona rana bu bairoia, iena abido jicañeno.

<sup>31</sup> Jusiñamui jitaíllacinona omoi finuamona, jiaie cominina marena fino. Jiaie comini omoína finuana omoi jitaílla isoi, naimacina fino. Naimaci omoína marena finuana omoi jitaia, naimacina marena fino. Naimaci omoína maraiñeno finuana omoi jitaia, naimacina ie isoi maraiñeno fino. O finoacaga ra isoi jiaie cominimo fino.

<sup>32</sup> Naimie cominina omoi illamona, nana comini daje isoi isirui. Omoína isiruitinona omoi isirua, mare; iadedi omoína gaiñenanona omoi isiruiñenia, Jusiñamui omoína: “Mare” raiñeite. Maraiñede rafuena finoraini naimacina isiruitinona isiruitimaci. Nana cominina omoi isiruiñenia, maraiñede rafuena finoraini baifemo faiñedomoi. Naimaci isoi itomoi.

<sup>33</sup> Naimie cominina omoi illamona, nana comini daje isoi cano. Omoína canodinona omoi canoia, mare; iadedi omoína canoñedinona omoi canoñenia, Jusiñamui omoína: “Mare” raiñeite. Maraiñede rafuena finoraini naimacina canodinona canodimaci. Nana cominina omoi canoñenia, maraiñede rafuena finoraini baifemo faiñedomoi. Naimaci isoi itomoi.

<sup>34</sup> Naimie cominina omoi illamona, nana cominimo daje isoi rana feca. Omoimo ra fecadinomo rana omoi fecajia, mare; iadedi omoimo rana fecañedinomo rana omoi fecañenia, Jusiñamui omoína: “Mare” raiñeite. Maraiñede rafuena finoraini naimacimo rana fecadinomo rana jiai fecadimaci. Nana cominimo rana omoi fecañenia, maraiñede rafuena finoraini baifemo faiñedomoi. Naimaci isoi itomoi.

<sup>35-36</sup> Omoína gaiñedinona isirui. Naimacimo mare rafuena fino. Naimacimo rana jamai feca. Naimacimona iba uamo ocuriñeno; ia Jusiñamui omoi raise ibaite. Jusiñamui maraiñedinona canocabide. Naimieri iobiñedimaci; ia naimacina canocabide. Naimacina duenaicabite. Ie jira maraiñedinona omoi duenai. Naimie isoi omoi illamona,



maraiñedinodi naimie cominina omoi illana uiñoitimaci. Jusiñamuidi cominina duenailla isoi, cominina omoi jiai duenai.

*Jesúdi jiaie cominina mameriñenana llua rafue*  
(Mt 7.1-5)

<sup>37</sup> Jesús llote:

—Duenailacinona nia llofueiacadicue. Jiaie cominina mameriñeno. Jiaie cominina omoi mameria, omoimo ite maraiñede rafue facaina Jusiñamui omoina duere finoite. Omoimo maraiñede rafuena bu finoia, iena feita. Iena omoi feitañenia, Jusiñamui omoimo ite maraiñede rafuena feitañeite.

<sup>38</sup> Jiaie rafuedo iena lloiticue. Rana omoi fecaia, iena raise omoi gaieia, ico ibana omoi oia, raise gaiecana feiñoitomoi. Ie isoide. Jainomo maraiñede rafuena finoñeno; ia naimacina duenaillamona, naimacimo rana jamai feca. Iena raise feca. O fecaia diese Jusiñamuimona eo raise ibana feiñoitomoi.

<sup>39</sup> Naimacina iena nia llofuiamona, naimacimo Jesús jiaie rafuena llote:

—Cue cominina omoi illamona, bie rafuena cacarei. Uanaicinodo omoi jaiñenia, uisunidimie isoi itomoi. Uisunidimie jiaie uisunidimiena ifonide. Ifo iade, nagamaiaia dafomo uaidiaimaiaia.

<sup>40</sup> Fueotimie ie llofueraima baifemo uaiñede; iadedi naimie raise fueoia, ie llofueraima isoi jaiite. Raise fueollena, cue uaimo cacarei.

<sup>41</sup> Omoi ecimo itimie mo janore maraiñedicino illana omoi uiñoia, iemo comecina facañeno; iadedi omoimo ailluena ite maraiñedicinomo nano omoi comecina faca.

<sup>42</sup> Omoimo maraiñedicino illamona, ¿niесе omoi ecimo itimiena mameritomoi? Omoimo ite maraiñedicinomo omoi comecina facaacaiñena jira, maredinona abi caitadinodomo. Omoi comeciaina nano raise fino. Iemei omoi ecimo itimiena canorenitomoi. Naimie comecina raise canorenitomoi.

*Jesúdi riarra llisilla lilla llua rafue*  
(Mt 7.17-20; 12.34-35)

<sup>43</sup> Jesús nia llofueite:

—Mare riarra maraiñede riarra isoi llisiñede. Maraiñede riarra mare riarra isoi jiai llisiñede.

<sup>44</sup> Llisillamona nie isoide riarra illana uiñoticai. Amena ie llisilla lllillamona amena marena uiñoa. Lllillamona, amena maraiñenana jiai uiñoa. Eecuaimona uvas railla riarana oñedica. Monaigimona higos railla riarana jiai oñedica.

<sup>45</sup> Ie isoide. Naimaci comeciaino iticinomona comini ñaitimaci. Mare comeci iticinomona maremiedi mare rafuena finocabide. Maraiñede comeci iticinomona maraiñedimie maraiñede rafuena finocabide.

*Jesúdi naimiena ñnuana ñaia rafue*  
(Mt 7.24-27)

<sup>46</sup> Jesús nia llofueite:

—Omoimona damierie cuena: “Cai Nama” raitomoi; iadedi cue llogacinona finoñedomoi.

<sup>47</sup> Diga comini cue dine bitimaci. Cue uaina cacadimaci.

<sup>48</sup> Cue uaina ñnotimie jofona raise finodimie isoide. Jofona raise finodimiedi ie jofona finodemo, jofona goiñellena, nofici illa dinori eo ana raite. Noci deidemo, eo jinuidemo, jofomo ille toia, jofu raise finua jira, jofu goiñede. Iena faifiñede. Ie isoide. Cue lluaana ñnotimie faifiñeite.

<sup>49</sup> Cue uaina ñnoñedimie jofona raise finoñedimie isoide. Jofona raise finoñedimiedi ie jofona finodemo, enirue emodomo iena finode. Ana raiñede. Noci deidemo, eo jinuidemo, jofomo ille toia, jofu goillamona, jai eo judaisite. Iena faifide. Ie isoide. Cue lluaana ñnoñedimie faifite —llote.

## 7

*Jesúdi capitán mullaimana jillotaja rafue*  
(Mt 8.5-13)

<sup>1</sup> Ie llua fuillamona, Jesús Capernaumo jaide.

<sup>2</sup> Nainomo romanos railla nairaimo duide illaima ite. Cien soldaduaina sedauide. Naimiedi capitán. Judiuñedimie. Ie mullaima eo duide. Niade fiadaiacade. Capitán naimiena eo gaide.

<sup>3</sup> Capernaumo Jesús illana capitán fidiano, Jesús dine judiaia einamacina orede. Naimie dine Jesús billena jitaide. Ie mullaimana jillotajaibillena jitaide.

<sup>4</sup> Jesús dine naimaci rillano, capitán dine naimie billena, naimiemo duere jicanotimaci. Raitimaci:

—Naimiedi caimona maremiena jira, naimiena o canuana jitaídicaí.

<sup>5</sup> Cai nairaina isiruite. Ie ucube diga cai ofiracona finotate.

<sup>6</sup> Iena cacajamona, Jesús naimaci diga jaide. Capitán jofomo iairei Jesús ria, capitáí Jesús dine ie nabaiñaina orede, Jesúsno lloílena:

—Maestro, biñeno. Jamaí bue cue isoilla jira, cue jofomo biñeno.

<sup>7</sup> Jamaí bue cue isoilla jira, o dine jiaí jaiñedicue. O illanomona o uaido cue mullaíma jilloíta.

<sup>8</sup> Jiaie illaicomini anamo iticue. Naimaci lloga uaina ñnoticue. Cue anamo jiaie soldaduai illanona, cue uaina ñnotimaci. Cue anamo cue mullaíma illa jira, naimiedi cue uaina ñnote. O anamo naie duico illa jira, o uaina bene o lloia, cue mullaíma jilloíte.

<sup>9</sup> Iena cacajano, Jesús raijicaide. Oni dobaidajano, naimie diga jaidinomo llote:

—Bie isoidimie cue uaina ñnotimiena jaca baiñedicue. Cai judiaí cominimona bie isoidimiena jaca ññede. Mai abido jai.

<sup>10</sup> Capitámona bitino abido capitán jofomo rillano, mullaíma jai jilluana cioidimaci.

*Jesúdi feciño jítona jillotaja rafue*

<sup>11</sup> Jiaíruído Naín railla nairaimo Jesús jaide. Ie llofueoicaigano jiaí jaidimaci. Ailluena comini jiaí jaidimaci.

<sup>12</sup> Naie nairai ie nasemo naimie iaireicaia, jai fioidaitimiena comini jino atiana ciode. Naie fioidaitimiedi conirue. Ie eidi feciño. Dajede ie jitodi jai fioidaite. Ailluena Naín itino naie feciño diga jaidimaci.

<sup>13</sup> Jesús naiñaiñona ciuanona, naiñaiñona duenaite. Naiñaiñona raite:

—Mai eñeno.

<sup>14</sup> Fioidaitimie dine Jesús jaillanona, naimaci ieconi naidadallena, ie uiga rana jetade. Naimiena uitinodi ieconi naidadatimaci. Fioidaitimie mo Jesús llote:

—Mai a rainada.

<sup>15</sup> Iena Jesús llua mei, naie fioidaitimie ie uiga ramona a rainadate. Ie meinoconi naimie ññate. Jesús naimiena ie eimo abido ite.

<sup>16</sup> Naieri nana jacinaitimaci. Jusiñamui iobillacinona fecadimaci. Raitimaci:

—Jusiñamui facaina lloraima cai motomo ite. Naimie uai eo siño. Naimiena Jusiñamui oretaja jira, Jusiñamui caina birui canoacana jira, iobidicaí.

<sup>17</sup> Nana Judeamo itino Jesús finoca rafuena fididimaci. Judea enirue fuemo ite nairaiaidi jiaí fididimaci.

*Jesús dine Juan Bautista micori ie llofueoicaiganona oretaja rafue*

*(Mt 11.2-19)*

<sup>18</sup> Juan Bautista micori llofueoicaiganodi nana Jesús finoca rafuena fidiano, iena naimie mo llote. Ie llofueoicaiganomona Juan micoridi menamiena uaidote.

<sup>19</sup> Llote:

—Jofue ññenanomo navui cue ia, jiaimie billena llofuecabiticue. Jesús dine omico jai: “¿Buudio? ¿Odi Juan llofuegamiedio? ¿Jiaimie billemo nia ocuiriticaí?” naimie mo jicano.

<sup>20</sup> Jesús dine iaímaiaí rillano, Jesúsno llotiaímaiaí:

—Juan Bautista cocona orede. Jofue ññenanomo navui naimie ia: “Jusiñamui mona damie biite” naimie llofuecabite. Juan llofuegamiena o illana uíñoiacadicaí. Imieñedi diona, jiaimie billemo nia ocuiriticaí. Cocomo llono.

<sup>21</sup> Jesús dine iaímaiaí billa facaiseconi, Jesús diga isoide duicuai illanona jillotate. Jananiaí anamo itinomona jananiaína oni jiaí orede. Uisinidinona uisina dane ciotate.

<sup>22</sup> Ie jira Jesús iaímaiaí mo llote:

—Cue lluana cacadomico. Cue finoca rafuena ciodomico. Juan dine abido omico jaillanona, iena naimie mo llono. “Uisinidino jai cioidimaci. Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fioidaillamona damierie jai jillodimaci. Dueredino mare rafuena jai cacadimaci”. Iese naimie mo llono.

<sup>23</sup> Jiaí llono: “Ñibaí nana cue rafuena raise cacaiñedio; ia cuena jaca nia ñnocana o jaia, caimare iitio”.

<sup>24</sup> Iaímaiaí abido jailla mei, naimie ecimo ailluena ite cominimo Jesúsdi Juan rafuena llote:

—Jofue ññenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena comecina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuirí bijide. Naimie ie isoíñede. Nie isoide rafue naimie mo ia, cue rafuena llocana jaide.

<sup>25</sup> ¿Bue ññellena naimie dine jaidomoi? Mare iniroina jitaídimiena cioíñedomoi. Mare iniroina jitaídinona omoi cioacaniadedi, illaicomini dine jaidomoi. Naimacimo ailluena ra ite.

<sup>26</sup> Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie lua jira.

<sup>27</sup> Malaquíás micori naimiena jaié cuela: “Jusiñamui raite: ‘Ero, o uicodo cue rafuena llo-l-lena, damiena oretaiticue, comini comeciaina marecinona duiñollena’ ” cuela. Malaquíás Juan Bautistana cuete.

<sup>28</sup> Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofuede; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioiñede. Iemona naimie baifemo faitomoi.

<sup>29</sup> Naimacina navui Juan bautizaja jira, nainomo ite comini iena cacajano, Jusiñamuimo iobillacinona fecadimaci. Gobierno ucube oraínidi jiaí fecadimaci;

<sup>30</sup> iadedi fariseuai iobillacinona fecañedimaci. Moisés llogacinuaina llofueraini jiaí fecañedimaci. Jusiñamui naimacina jillotajana naimaci jamailla jira, naimaci jeacinona Jusiñamuimo lloñena jira, Juan naimacina navui bautizañede.

<sup>31</sup> Jesús llote:

—Cuenta inoñedinona lloiticue: Ero, omoína ñaiticue.

<sup>32</sup> Jifanote uruai isoidomoi. Uruai jifanoiacania, naimaci nabaiñiaína uaiduanona, raitimaci: “Omoi diga jifanoiacadica; iadedi cai diga jifanoiacañedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedica;” raitimaci.

<sup>33</sup> Te isoidomoi. Juan jiroraínide. Caimare guñede; ia naimie diga nabairiñedomoi. Naimiena gaiñedomoi. Ie jira omoimona dajerie naimiena raitimaci: “Janaba anamo naimie illamona, naimie uairico isoi ite” raitimaci.

<sup>34</sup> Monamona billanona, imana jaidicue. Omoi isoi guiticue. Caimataidicue; ia cue diga nabairiñedomoi. Cuenta jiaí gaiñedomoi. Ie jira cuenta jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimedio”.

<sup>35</sup> Iese raitomoi; iadedi Jusiñamuina inotinodi cue finoca rafuena marenana uñotimaci.

### *Jesús Simón jofomo illa rafue*

<sup>36</sup> Jiairuido fariseuai cominimona, ie jofomo naimie diga guillena, damiedi Jesúsna uaidote. Naimiedi Simón. Naimie dine Jesús jaillanona, naimie diga guite.

<sup>37</sup> Jesús guitemo, daje riño fo jaide. Naiñaiñodi marañede rafuena finoraíño. Naicomo Jesús guillana fidiano, naiñaiño fo jaide. Noficimona finoca frascona atide, na soride ra illa diga.

<sup>38</sup> Judíuai aciaita jaca guisoidimaci. Jinafo dine eilli jonesuidimaci. Fo jaillano, naie riño Jesús abimo naidaide. Naiñaiño eiamona, naiñaiño uisimona uaide uillinociai diga Jesús eillina jocode. Safenaillena, naimie eillina ie ifotie diga dote. Ie eillina jiaí libanote. Ie mei ie eillimo frascomona soride rana totade. Naimiena naiñaiño isiruillamona, iese naiñaiño finode.

<sup>39</sup> Tena ciuanona, Simón dama comecina facade: “Bimie Jusiñamui facaina lloraimadena, nie isoide naimiena jetade riñoña niade uñote. Naimiedi naiñaiño marañede rafuena finoraíñoña uñote. Tena naimie uñuamona, naiñaiñoña jino raire orede. Naimiedi Jusiñamui facaina lloraimañede”.

<sup>40</sup> Jesús naimie comecina facajacinona uñuano, naimiemo llote:

—Simón, naiñaiño finoca rafuena o raise fueollena, omo bie rafuena lloiacadicue.

Simón uai ote:

—Maestro, mai cuemo llono.

<sup>41</sup> Jesús llote:

—Damie menamaiaimo ucubena fecade. Damie mo quinientos diga ucubena fecade. Jiaimie mo cincuenta diga ucubena fecade.

<sup>42</sup> Ie iade, naiena abido meidonidiaimaia. Ie jira ucubena fecadimiedi raite: “Dama omico meidoñega. Naiena jai feitatitue”. Ero, Simón, ¿naimieca ucubena fecadimiena eo isiruite?

<sup>43</sup> Simón dinena uai ote:

—Cue comeci raite: Ailluena ucube feitaja jira, eo ailluena ucubena igamie.

Jesús dinena raite:

—Raise cue uaina fairiotio.

<sup>44</sup> Iemei Jesúsdi riño dine dobaidajanona, Simómo llote:

—Biñaiñoña ja lloiticue. O jofomo biticue; ia cuenta raise nafueñedio. O nabai o dine bia, naimiena raise nafuecabitio. Ie jearede eilli jocollena, comini finocabilla isoi, jinui fecadio. Safenaillena eilli dora fecadio. Naimiena libanotio. Ie abi caimare sorillena, janore soride

ra naimiemo jonetio. Iese cuena nafueñedio; ia bie riño cuena isiruillamona, ie uillinociai diga cue eillina jocode. Ie ifotie diga dote.

<sup>45</sup> Naiñaiño cue ecimo fo billanona, cue eillina diga icaiño llibanote.

<sup>46</sup> Naiñaiño cue eillimo soride rana totade.

<sup>47</sup> Naiñaiñomo eo jeacino ite; ia cuena naiñaiño eo isiruillamona, nana ie jeacina jai oni dotajana uiñotici. "Jeacino cuemo raise iñede" começina bu facaia, Jusiñamui naimie jeacina oni dotajamona, naimie Jusiñamuina janore isiruite. Iemo o começina faca.

<sup>48</sup> Naiñaiñomo llote:

—O jeacino jai oni dotaca. Iena jai feitaticue.

<sup>49</sup> Jiaino nainomo guillanona, coniniri ñaitimaci:

—Bimiedi ¿nie isoidimie? Bimie jeacino oni dotanide.

<sup>50</sup> Jesús dinena riñomo llote:

—Cuena o ñnua jira, o jeacinomona jai jillodio. Mai uri o jaillano o i.

## 8

### *Dajerie riñoniai Jesúna canua rafue*

<sup>1</sup> Ie facaise diga nairaimo Jesúsdi mare rafuena llocana jaide. Naimie anamo comini illana Jusiñamui jitailla jira, Jesúsdi Jusiñamui dibeimo naimaci começiai iuaina meiduana llofuede. Ie doce llofueoicaigano naimie diga jaidimaci.

<sup>2</sup> Dajerie riñoniai jai jaidimaci. Naiñaiñuaimona dajerie Jesús navui jananiai anamona orecañaiñuai. Dajerie duicomona jilloitagañaiñuai. María Magdalena ite. Naiñaiñomona siete diga jananiai oni oretate.

<sup>3</sup> Juana ite. Naiñaiño inidi Chuzá. Herodes railla illaima ecimo naimie maijuide. Susana ite. Jiaie riñoniai jai itimaci. Naiñaiñuai ramona Jesúna canouidimaci.

### *Jesúdi trigona judaidimiena lua rafue*

(Mt 13.1-9; Mr 4.1-9)

<sup>4</sup> Diga nairaiamona ailluena comini Jesús dine billanona, naimacimo llote:

—Jusiñamui omoina sedaacana omoi fueollena, bie rafuena lloticue.

<sup>5</sup> Damiedi trigona judaiaide. Naimie judaiamona naisomo janore iduai juide. Comini nainomo jaillano, iena saitadimaci. Bai jailla mei, silliñiai iena jiaie guisabite. Ie jira sicoñede.

<sup>6</sup> Nofiemo jiaie iduai juide. Sicode; iadedi jinui raise iñena jira, duide.

<sup>7</sup> Eecuai illanomo jiaie iduai juide. Eecuai sicuamona, riará eecuai ibaica. Ie jira llisiñede.

<sup>8</sup> Mare eniruemo jiaie iduai juide. Sicode. Llisillamona danademo cien diga llisillana ote. Bie rafuena naimie lua mei, naimacimo llote:

—Omoi jeforena jira, raise fueollena, cue lluomo cacarei. Iena ñno.

### *Jesús ie como lloga rafuena llofua rafue*

(Mt 13.10-23; Mr 4.10-20)

<sup>9</sup> Jesúsno ie llofueoicaigano ie como lloga rafuena jicanotimaci:

—¿Bue ñellena bie isoide rafuedo cominina llofuetio?

<sup>10</sup> Uai ote:

—Jusiñamui omoina ie sedaacana rafuena jai uiñotade. Jiaie iena uiñofedomoi. Jiaie cominina iena ña uiñotañede. Ie jira bie isoidicinodo naimacimo lloticue. Cue siño finoca rafuena cioidimaci; iadedi iena naimaci ñnoñena jira, uiñofeno jaidimaci. Cue llofuiana jamai cacadimaci; iadedi naimaci ñnoñena jira, raise cacaiñedimaci. Uiiñofedimaci.

<sup>11</sup> Omoina cue como lloga rafuena llofueiticue. Naie iduai di Jusiñamui uai.

<sup>12</sup> Dajerie comini começiai naisomo juide iduai isoidimaci. Jusiñamui uaina cacadimaci; ia naimaci naie uaina ñnoi raillano, naimaci naiemona jilloi raillanona, Taife naimaci começaiimo cacaja uaina ñnotañede.

<sup>13</sup> Jiaie iduai nofiemo juide. Dajerie comini começiai naie nofie isoidimaci. Jusiñamui uai nano naimaci cacai, iena camare feiñotimaci. Nofiemo riga iduai jainaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefua, abido danomo uaidimaci.

<sup>14</sup> Jiaie iduai eecuai illanomo juide. Naie iduai sicua mei, iena eecuai ibailla jira, raise llisiñede. Dajerie comini começiai naie illano isoidimaci. Jusiñamui uaina cacadimaci. finotimaci; iadedi naimaci começiai jarire illamona, naimaci raruaiana eburuillamona, naie uai naimaci começaiimo itabiñede. Jusiñamui jitaile rafuena finocana jaiñedimaci.

<sup>15</sup> Jiaie iduai mare eniruemo juide. Dajerie comini começiai naie enirue isoidimaci. Jusiñamui uaina cacajano, iena raise cacadimaci. Mare jeanide começaiamona ñnocana jaidimaci. Eo lliside isoidimaci. Jusiñamui jitailla rafuena sefuiruiño ñnocana jaidimaci.

*Jesús ie rafue llocana jailla llua rafue*

*(Mr 4.21-25)*

<sup>16</sup> Jesús nia llote:

—Lamparín bu unia meinocóni, jiaie ra biide anamo rainañega; iadedi jofo jeraimo lligaiñollena, nainomo bite comíni raise cioillena, ie rairanomo rainaca.

<sup>17</sup> Ie isode. Cue rafue llocana jaia, comíni comeciai iticónona uifñotade. Unaicino naimaci cacajamona, damierie ñnotimaci. Damierie ñnoñedimaci.

<sup>18</sup> Cue lluomo raise cacarei. Iena omói ñnuamona, Jusiñamui omoina canoite. Omoina uifñocana jaitaite. “Jusiñamui rafuena uifñoticue” raitimiedi ñnoñenia, Jusiñamui naimiena faifitaite.

*Jesús dibeimo itinona ñaia rafue*

*(Mt 12.46-50; Mr 3.31-35)*

<sup>19</sup> Comínina Jesús nia llofuia, naimie ñine Jesús ei, ie amataiai diga bitimaci; ia ailluena comíni illa jira, naimiemo riñedimaci.

<sup>20</sup> Nainomo itino naimiemo llote:

—O ei, o amataiai diga jino naidaidimaci. O diga ñaiacadimaci.

<sup>21</sup> Jesús uai ote:

—Jusiñamui uaina cacajamona, iena ñnotino ieca cue eidi, cue amataiai.

*Jesúdi jorai baguana llñcaitaja rafue*

*(Mt 8.23-27; Mr 4.35-41)*

<sup>22</sup> Jiairuido botemo Jesús jailla mei, ie llofueoicaiganomo llote:

—Ruica dibeimo mai cai jailli. —Ie mei jaidimaci.

<sup>23</sup> Naimaci jaidemo, Jesús ñinde. Bai jaidimacimo, eo riire aifi bite. Baguamona botemo jinui a uaide. Oruiacana jira, eo jacinaitimaci.

<sup>24</sup> Jesúsna casitajano, naimiena raitimaci:

—Maestro, jai buisaidicai. Jai corobaisaidicai.

Naimie casillano, aifina lletade. Joraina llñcaitade. Ieconí aifi llñcaide. Bagoñede.

<sup>25</sup> Naimacimo jicanote:

—¿Bue ñellena cuena ñnoñedomoi? —Naimiena jacinaillamona uai oñedimaci. Raijicaillamona, coniniri ñaitimaci:

—Bimiedi, ¿nie isoidimie? Aifi naimie uaina ñnote. Jorai naimie uaina jiai ñnote.

*Jesúdi Gadara railla eniruemo illa rafue*

*(Mt 8.28-34; Mr 5.1-20)*

<sup>26</sup> Ruica dibellemo ridemo, Gadara railla eniruemo sijidimaci. Galilea facaisemo ite.

<sup>27-29</sup> Botemona ari Jesús jaidemo, damie Jesús ñine bite. Naie nairai imie. Janaba anamo illamie. Taimiena jai jaicaisoide. Jofomo naimie irañide; ia comíní raioillanomo noñie moto ifuaimo i-isode. Ebena comínina naimie faei raillanona, lloeo diga ie onollidi maiga. Ie eilli jiai maiga; iadedi lloeo oni ticonote. Ie mei jofue iñenanomo Janaba naimiena jaitate. Iese suisoide.

Jesúna naimie ciuanona, cuirioide. Jesús ecimo uaide. Janaba naimiena ado llotatate:

—Jesús, nanoca Jusiñamui Jitodio. ¿Niese cuena nibaiacadio? Cuena duere finoñeno.

Iese raite, Janaba naie ñmamona oni jai oretajana Jesús llua jira.

<sup>30</sup> Jesús naimiemo jicanote:

—¿O mamaci bu?

Uai ote:

—Aillosiedicai. —Ailluena jananiai naimie ecimo illa jira, iese naimiedi raite.

<sup>31</sup> Jesúmo duere jicanoside, iraimo naimacina nia oretañellena.

<sup>32</sup> Naie facaise nainomo ite anedumo ailluena chanchuai itimaci. Chanchuai abímo naimaci jaillena Jesúmo duere jicanotimaci. Jesús ñinena:

—Jee —raite.

<sup>33</sup> Ieconí ñmamona jaidemo, chanchuai abímo jaidimaci. Iena suidemo, iconí jillacimo joraimo chanchuai aisidimaci. Dinomo corobaiside.

<sup>34</sup> Iena ciuanona, chanchuai sedarainí naimaci nairai ñine aisicana jaidimaci. Naie rafuena llocana jaidimaci.

<sup>35</sup> Ie jira diga comíní jaide, naie rafuena raise fidillena. Jesús ñine naimaci ridemo, jaive Janaba anamo illamiena Jesús ecimo raillana ciodimaci. Naimie ñiroina jai jítade. Naimie jai uairicoñede. Iena ciuanona, Jesúsna jaciruitimaci.

<sup>36</sup> Naie rafuena ciodinodi como bitinomo naimie jilluana llotimaci.

<sup>37</sup> Naimiena naimaci jaciruillanona, naimacimona oni jaillena nana naie eniruemo ite nairaidi Jesúmo jicanotimaci. Ie jira botemo Jesús jaide, ruica dibeimo abido jaillena.

<sup>38</sup> Ieconí jaive Janaba anamo illamíe Jusúmo jicanote, naimíe diga jaillena; iadedí Jesús raite:

—Dama ite.

<sup>39</sup> Mai o jofomo o jai. Nainomo itinomo nana Jusíñamui omo finoca rafuena llono. Ie mei jaide. Nana naimíe nairaimo Jesús naimíemo finoca rafuena llocana jaide.

*Jesúdi mena duide riñona jillotaja rafue*  
(Mt 9.18-26; Mr 5.21-43)

<sup>40</sup> Ruica díbeimo Jesús abido ria, naimíe abido billemo naimaci ocuirilla jira, ailluena comini naimíena feiñotimaci.

<sup>41</sup> Jairona mameciredimíedi Jesús díne bite. Naimíedi judíuai rafue ofiraco sedaraima. Jesúmo duere jicanollena, ana bitadate. Naimíe jofomo Jesús billena duere jicanote.

<sup>42</sup> Dañaiñode ie jisa. Doce años naiñaiñodi ite. Niadedí fiodaíacade. Ie jira Jesúmo jicanuaibite. Iena cacajano, naimíe diga Jesús jaide. Ie llofueoicaigano jiai jaidimaci. Jesús jaillano, diga comini naimíemo ñajisaide.

<sup>43</sup> Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. Naiñaiñoña jaca buna jillotanide.

<sup>44</sup> Jinafo dinena billanona, Jesús iniroi fueda jetade. Iemona diailladi fainonocade. Jillode.

<sup>45</sup> Jesús dinena jicanote:

—¿Bu cuena jetade?

Naimíe ecimo ite comini uai otimaci:

—Ona jetañedicaí.

Ie nabaiñai díga Pedro dinena raite:

—Maestro, ailluena comini o ecimo jaidimaci. Omo ñajidimaci.

<sup>46</sup> Jesús uai ote:

—Damíe cuena jetade. Cue abimona cue uai jaillamona, naimíe jai jillode.

<sup>47</sup> Jaive duidiñaiñodi Jesús naiñaiñoña uíñuana uíñote. Ie jira Jesús díne jaciruicana bite. Naimíe uicomo ana bitadajanona, nana comini uicomo naimíena jetaja rafuena llote. Naiñaiño ieconí jilluana llote.

<sup>48</sup> Jesús dinena naiñaiñoña raite:

—Ñoo, cuena o ñnua jira, jai jillodio. Mai jaillanona, uri o i.

<sup>49</sup> Naiñaiño díga Jesús nia ñaitemo, Jairo jofomona damíe bite. Jairomo llote:

—O jisa jai fiodaite. Maestrona ñaidoñeno.

<sup>50</sup> Iena Jesús cacajano raite:

—O começi jarire iñeno; ia cuena nia ñno. Naiñaiño jilloite.

<sup>51</sup> Jairo jofomo naimaci rillano, ailluena comini naimíe diga fo jaillana rairuide. Dani díese fo jaillana jitaide: Pedro, Jacobo, Juan, nai jitaíbici moo, naiñaiño ei. Jaca díese fo illana jitaide.

<sup>52</sup> Nana nainomo itino eecuinaidimaci. Faillíñaidimaci. Jesús dinena raite:

—Omoí eeñeno. Cuemona naiñaiñodi fiodaíñedesa. Jamai iníde.

<sup>53</sup> Jai fiodaítedi: “¿Bue ñelli iníde raitio?” raillanona jaisitimaci.

<sup>54</sup> Jesús fo jailla mei, naiñaiño onollina llinocaida, raite:

—Jitaíbici, mai naidacaí.

<sup>55</sup> Ieconí naiñaiño joreño abido bite. Naidacaide. Jesús llote:

—Guillena naiñaiñoña eca.

<sup>56</sup> —Naiñaiño moo, ie ei díga, rajicaídiñaimaiaí. Jesús iaímaiaimo llote:

—Bie rafuena bumo lloñeno.

## 9

*Jesúdi ie llofueoicaiganona oretaja rafue*  
(Mt 10.5-15; Mr 6.7-13)

<sup>1</sup> Ie doce llofueoicaiganona naimíe díne Jesús uaiduanona, naimacimo ie uaina iñonocade, jananiaina anamona cominina jilloitallena. Duicuaína oni oretallena, iena jiai iñonocade.

<sup>2</sup> Naimacimo llote:

—Omoí jaillanona, cominimo llono: “Jusiñamui facaina jaie lloraíni micoriaí llogamíe jai bene ite. Naimíe anamo omoí illana Jusíñamui jitailla jira, naimíe díbeimo omoí começai iuaina meido”. Duidinona jillota.

<sup>3</sup> Omoí jaiá, buena uíñeno. Omoí abina riídollena, jiguidana uíñeno. Ailluena rana omoí uíñellena, bolsana uíñeno. Llomeniconna uíñeno. Ucubena uíñeno. Guille ifo meídollena, rana uíñeno. Meídolle iniroina uíñeno.

<sup>4</sup> Naie nairaimo omoi jaia, daacomo omoi ri. Naie nairaimo omoi ille dinori, daacomo omoi i.

<sup>5</sup> Omoina comini feiñoñenia, naimaci nairaimona omoi jaia, omoi eilliaimo ite jearacuaina oni jaidino. Nicino naimacimo illana naimaci uifollena, omoi eilliaina oni jaidino.

<sup>6</sup> Jesús naimacimo llua mei, jaidimaci. Jusiñamui rafuena lluanona, diga nairaimo jaidimaci. Diga comini imaci duicomona jillotatimaci.

*Juan Bautista micori fiodailla rafue*

*(Mt 14.1-12; Mr 6.14-29)*

<sup>7</sup> Naie facaise Herodes railla gobernador nana Jesús finoca rafuena fidide. “Fiodaillamona Juan Bautista micori jai jillode” dajerie railla jira, ie comece uri iñede.

<sup>8</sup> Jiaie comini raisoidimaci:

—Elias jai bairede.

Jiaino raisoidimaci:

—Fiodaillamona Jusiñamui facaina jaie lloraïma micori jai jillode.

<sup>9</sup> Jesúsna fidiano, Herodes comece uri iñede. Comecina facade: “Juan micori ie ifogina navui jaitaticue. Ie muidona ¿birui bu ie rafuena fididicue?” Raise uifollena, Jesúsna cioacade.

*Jesús cinco mil iñiaina ecaja rafue*

*(Mt 14.13-21; Mr 6.30-44; Jn 6.1-14)*

<sup>10</sup> Jesús llofueoicaigano abido bia, Jesúsno naimaci finoca rafuena llotimaci. Ie mei dani ie llofueoicaigano diga Jesús Betsaida railla nairai dine jaide;

<sup>11</sup> Iadedi comini iena fidianona, naimiena racadimaci. Naimie dine naimaci rilla mei, naimacina feiñuanona, naimie anamo comini illana Jusiñamui jitailla jira, Jesúsdi Jusiñamui dibeimo naimaci comeceia iuaina meiduana llofuet. Duidinona jiai jillotate.

<sup>12</sup> Jitoma ana itemo, ie doce llofueoicaigano naimie dine billanona, raitimaci:

—Jofue bene iñede. Bene jaca buedi iñede. Ianori ite nairaimo, ianori ite jofuemo naimaci inillena, naimaci guille ollena, bie cominina abido oreta.

<sup>13</sup> Jesús uai ote:

—Naimacina bene eca.

Uai onaisite:

—Dani caimo ite cinco llomenico mena lliciai diga. Nana naimaci guillena, ¿guille cai iballena nibai jitaïdio?

<sup>14</sup> Cinco mil iñiaï nainomo illa jira, ailluena guille jitaïllana uifotimaci. Naimaci ainiaï, imaci uruiaï diga, jiaï itimaci. Ie llofueoicaiganomo Jesús llote:

—Comini ana raillesa llono. Cincuenta digamierie ana imaci raillesa llono.

<sup>15</sup> Iena finodimaci.

<sup>16</sup> Naie cinco llomeniconona, naie mena lliciai diga Jesús uanona, monamo eruaïllanona, Jusiñamui iobillacinona fecade. Iemei taillude. Ie llofueoicaiganomo fecade, cominina ecallena.

<sup>17</sup> Nana guillanona monidimaci. Monillamona, fiebide guillena iraïdimaci. Doce cirigaïaimo oruitatimaci.

*Pedro Jesúsna llua rafue*

*(Mt 16.13-19; Mr 8.27-29)*

<sup>18</sup> Jiaïruido Jesús ie Moomo jia facaiseconi, ie llofueoicaigano naimie diga illanona, naimacimo jicanote:

—¿Niese cominidi cuena raitimaci?

<sup>19</sup> Uai otimaci:

—Damierie raitimaci: “Juan Bautista micoridïo”. Damierie raitimaci: “Odi Elïadio”. Jiaino raitimaci: “Jusiñamui facaina jaie ite lloraïnimona damie jai jillode. Imiedïo”.

<sup>20</sup> Jesús naimacimo jicanote:

—¿Niese omoi cuena raitomoi?

Pedro uai ote:

—Odi cai jilloitaraimadïo. Jusiñamui facaina lloraïni micoriaï o billena jaie llotimaci. Jusiñamui ona orede.

*Jesús ie fiodaïllena llofuia rafue*

*(Mt 16.20-28; Mr 8.30-9.1)*

<sup>21</sup> Jesús naimaci como llogacino bumo lluana rairuide.

<sup>22</sup> Llote:

—Cai judïuai illaicomini cuena eo duere finoitimaci. Cuena jitaïñellemona, cuena meineitimaci; iadedi darui amani illanona, fiodaïllamona jilloitïcue.

<sup>23</sup> Nana ie llofueoicaiganomo llote:

—Cue cominina bu jaia cania, ie jitaill rafuedo jaiñena. Cue dibeimo naimie jaillamona, duere sefuicana jaita. Nibai naiemona fiodaite. Bu iese jaia cania, cue dibeimo naimie iite.  
<sup>24</sup> Duere sefuillana jaciruillamona cue cominina bu jaia cania, ja muidomo faifite; iadedi duere sefuillana jaciruñenamona cue cominina bu jaia, jaca faifñeite.

<sup>25</sup> Cue cominina bu jaiñenia, nibai eo duere sefuñeite. Nibai aillena ra naimiemo iite; ia, ¿niese cue Moo dine riite? Nainomo naimie riñeno faifite.

<sup>26</sup> Cuena bu meiruia, cue uaina bu meiruia, dane cue bia, naimiena meiruiticue. Cuena meiruillamona: “Cristomo duidicue” bu lloiacañenia, ico cue bia: “Naimiedi cue comini” lloñeiticue. Jusiñamui jaienisai siño uai isoi illanona, cue Moo dinena monamona ico biiticue. Cue Moo uai cuemo illanona, ebire biiticue.

<sup>27</sup> Uanaicnona omoimo lloticue. Omoimona dajerie nia fiodañeitomoimo, illaimana cue bairellena cioitomoí.

*Jesús abi meidocaila rafue*

(Mt 17.1-8; Mr 9.2-8)

<sup>28</sup> Ocho digarui illanona, Jusiñamui jaiñena, anedumo Jesús jaidé. Naimie diga jaillena, Pedrona uite. Juan jiai uite. Jacobona jiai uite. Jiaie llofueoicaiganona uñede.

<sup>29</sup> Naimie jaiamona naimie abi meidocaide. Naimie iniroi naie daciaño eo userecaide.

<sup>30</sup> Ieconí menamie bairiano, Jesús diga ñaitilaimaiaí. Moisés micorí joreño ite. Elías jiai ite.

<sup>31</sup> Ebire baire diaimaimaiaí. Jesús Jerusalémo fiodaill rafuena ñaitimaci.

<sup>32</sup> Ie facaiseconí Pedro ie nabaiñiaí diga jai inidimaci; ia casillamona, Jesús ebirenana cioidimaci. Jesús ecimo itilaimaimaiaí jiai cioidimaci.

<sup>33</sup> Iaimaimaiaí jaia cania, Pedro Jesús mo llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micorí ie, jiaie Elías ie. —Iese raite; ia ie ñaia rafuena raise uññoño jamai ebena ñaite.

<sup>34</sup> Iena naimie nia lluanona, uillie billamona, naimacina ibaide. Uillie ibaibillaconí jacinaitimaci.

<sup>35</sup> Uilliemona Jusiñamui naimacimo llote:

—Bimiedi cue jito. Naimiena fetodicue, cue jitaill rafue finollena. Naimie llua omoi cacareillanona, iena ñno —llote.

<sup>36</sup> Jusiñamui llua mei, dama Jesúsna dane cioidimaci. Jesús diga itino naimaci cúa rafuena naie facaiseconí jaca bumo lloñedimaci.

*Jesús i Janaba anamo itimiena jillotaja rafue*

(Mt 17.14-21; Mr 9.14-29)

<sup>37</sup> Ie areruido anedumona ana bitimacimo, ailluena comini naimacimo dafaífide.

<sup>38</sup> Cominimona damie ado llote:

—Maestro, cue dajede cue jito duillana jibuisaibi.

<sup>39</sup> Janaba naimie anamo illamona, cue jito cuiritate. Cue jitona naillitacabite. Iemona ie fue mullecabide. Naimiena bofedaicabite. Naimiemona oni jaia caniañede.

<sup>40</sup> Janabana oni oretallena, o llofueoicaiganomo jicanoticue; ia oretanidimaci.

<sup>41</sup> Iena cacajanona, Jesús ie llofueoicaiganomo llote:

—Cue uai siñonana nia ñnoñedomoi. Cue mare rafuedo nia raise jaiacañedomoi. Omoi diga are iticue. Raise omoi ñnollena, ¿nie dinori omoi diga iiticue? —Naie duidimie moomo llote—, O jito cue dine mai ati.

<sup>42</sup> Naie urue billano, Janaba naimiena eniruemo ana dotade. Naimiena naillitate; ia oni jaillena Jesús Janabana lletade. Ieconí naie urue jillode. Iemei Jesús ie moomo naimiena fecade.

<sup>43</sup> Comini iena ciuanona, Jusiñamui siño uai naimiemo illari rajicaidimaci.

*Jesús ie fiodaillena dane llofuia rafue*

(Mt 17.22-23; Mr 9.30-32)

Naimaci nia rajicaia, Jesús ie llofueoicaiganomo llote:

<sup>44</sup> —Cue lluaña feitañeno. Monamona billanona, ñmana jaidicue; ia Jusiñamui jitailla jira, jaiaruido illaicomini cuena meineitimaci.

<sup>45</sup> Jesús lluaña raise cacañedimaci. Naimie iena llofueñena jira, iena raise uññoñedimaci. Naimiemo iena jicanuana jiai meiruitimaci.

*Jesús ie llofueoicaigano moto imiema ille rafue*

(Mt 18.1-5; Mr 9.33-37)

<sup>46</sup> Ie facaise Jesús llofueoicaigano conini uaitajanona raitimaci:

—¿Bu cai moto imiema ille?



<sup>47</sup> Jesús naimaci comeciai facajacinona uiñuamona, nainomo ite cominimona daje urue bai jainanocaida, naimaci motomo naimiena jonete.

<sup>48</sup> Raitē:

—Comini dinena bie urue jamai bue isoide; ia bie isoidimie cuemo duillamona, naimiena feiñotimiedi cuena jai feiñote. Jusiñamui cuena oretaja jira, cuena feiñotimie Jusiñamuina jiai jai feiñote. Jamai bue isoidimiedi omoi moto imiena ille.

*Jesúdi ie díbeimo itinona llua rafue*

*(Mr 9.38-40)*

<sup>49</sup> Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimiena ciodicai. Cai diga naimie jaicabiñena jira, iena finuana rairuidicai.

<sup>50</sup> Jesús dinena uai ote:

—Naimiena rairuiñeno. Cai díbeimo itimiedi cai facaisena ite. Ie jira naimie isoidinona rairuiñeno.

*Jesús dinena Jacobo, Juan iaímaiaí lletaja rafue*

<sup>51</sup> Monamo abido Jesús jaillirui iaiei ia, Jerusalémo jaiacanamo naimie comecina facade.

<sup>52</sup> Ie jira dajeriena uicodo oretate. Ie inillinona jenollena, Samaria railla nairaimo jaidimaci;

<sup>53</sup> iadedi Jerusalémo naimaci jailla jira, judíuainedimona samaritanodi gaiñena jira, Jesús llofueoicaiganona feiñoiacaiñedimaci.

<sup>54</sup> Iena fidianona, Jacobo, Juan diga, Jesúmo jicanotiaímaiaí:

—Nama, ¿bie comini jobaillena, monamona irai billena Jusiñamuimo coco jicanuana jitaideo?

<sup>55</sup> Iaímaiaímo eruailanona, Jesús dinena iaímaiaímo riire lletade:

—Dama ite. Iena jitaíñedicue.

<sup>56</sup> Ie mei inillena jiaie illanomo jaidimaci.

*Jesús ie llofuegamiēna damie jaillena ie rafue*

*(Mt 8.19-22)*

<sup>57</sup> Naísona ie llofuecaigano diga, Jesús oni jaillanona, Jesúmo damie llote:

—O jaillinomo o diga jaiacadícue. O llofuegamiēna jaiacadícue.

<sup>58</sup> Jesús uai ote:

—Janorede ocainaiáidi joforedimaci. Silliñiaí jillainiáiredimaci; iadedi jofonidícue. Monamona billanona, íimana jaidícue; iadedi buenidícue. Jofonidícue. Cue diga o jaiacania, bue isoidena cuemona oñeitio. Iemo o comecina raise faca.

<sup>59</sup> Jiaímiemo Jesús llote:

—Cue llofuegamiēna o jaillena, cue diga mai bí.

Naimie uai ote:

—O diga jaitícue; ia cue moo nia fiadaíñena jira, o diga nia jaiñeitícue.

<sup>60</sup> Jesús naimiemo dane llote:

—Dama ite. Cue diga mai bí. Cuena ínoñedimodi o moona canoredimaci. Naimie fiadaia, naimiena naimaci raille. Cue rafue jiaie rafue baífemo faite. Naimie anamo comini illana Jusiñamui jitailla jira, naimie díbeimo naimaci comeciai íuaina meiduana llocana cue diga mai o bí.

<sup>61</sup> Jiaímiē Jesús llote:

—O llofuegamiēna jaiacadícue: iadedi cue jofomo nano jaiacadícue, cue cominina facadollena.

<sup>62</sup> Jesús uai ote:

—Cue llogamiēna jaiacania, jiaie ramo naimie comecina eo facañena. Jiaie ramo naimie comecina eo facaia, Jusiñamui facaina raise maijinide.

## 10

*Ie rafuēna llollena, Jesús setenta dígamiēna oretaja rafue*

<sup>1</sup> Ie llofueganona llofuia mei, naimacimona Jesús setenta dígamiēna fetode. Naga naimie jaiacana nairaiáimo menamiēriena oretate.

<sup>2</sup> Naimacimo llote:

—Diga comini ite, naimacina Jusiñamui rafuēna ínotallena; iadedi eo janore lloraini ite. Jusiñamuimo jicano, jiaie llorainina naimie oretallena.

<sup>3</sup> Mai jai; iadedi abí rairuicana jai. Toica llaudaiaí janallari illanomo illa isoi, omoína oredícue.

<sup>4</sup> Ucubena uifieno. Ailluena rana omoi uifellena, bolsana uifieno. Meidolle zapatona uifieno. Naisomo bu omoimo dafaifia, are ñaifieno.

<sup>5</sup> Bu ie jofomo omoi ria, jofomo itinomo marena uaido.

<sup>6</sup> Nainomo maremie ia, o uaina fairioite. Maremie ifenia, o uaina fairiofenia: “Jusiñamui ona canoite” naimiemo llofieno.

<sup>7</sup> Nie nairaimo omoi ria, daacomo omoi ri. Omoi ecalle rana guiño. Cue facaina omoi maijia jira, comini omoina ecajia, cue facaina omoi maijia facaina omoi guiño. Naga jofomo guicana jaiñeno.

<sup>8</sup> Nie nairai omoi ria, omoina naimaci feiñoia, omoi ecalle rana uaitañeno guiño.

<sup>9</sup> Duidinona jillota. Nainomo itinomo llono: “Naimie anamo omoi illana Jusiñamui jitaila jira, naimie dibeimo omoi comeciái iuaina meido”.

<sup>10</sup> Nie nairaimo omoi ria, omoina naimaci feiñoifenia, ie naiso motomo jaiillanona llono:

<sup>11</sup> “Omoi naisomo cai eillimo ite jaracuái jai jaidinoticiái, marañede rafue omoimo illana omoi uifollena. Jusiñamui omoina sedaacade; ia iena jitaiñedomoi” llono.

<sup>12</sup> Sodoma nairai jaie eo marañede. Jusiñamui iena jaie fuidode; ia nana comini naimie uicomo ico ia, Jusiñamuidi omoina feiñoñedinona Sodoma railla nairai baifemo duere finoite.

*Jesús ie ñinoñedinona llua rafue*

*(Mt 11.20-24)*

<sup>13</sup> Ie fetocanomo Jesús nia llote:

—Corazín railla illanomo navui iticue. Betsaida railla illanomo navui jiai iticue. Naimaci dine diga siño rafuena finodicue; iadedi ñinoñedimaci. Ico duere sefuitimaci. Tiro railla nairaimo, Sidón railla nairaimo naie isoide siño rafuena finodicuena, naimaci comeciái eo isinotaillamona, naimaci comeciái iuai meidotimaci. Naimaci comeciái iuai meiduana jaie comini uifotallena, ebinide iniroina jitajanona, jusefo naimaci ifogiaimo jonetimaci.

<sup>14</sup> Jusiñamui uicomo nana comini ico ia, Corazímo itino Tiro nairai baifemo duere sefuitimaci. Sidón nairai baifemo duere sefuitimaci.

<sup>15</sup> Capernaumo itino jiai duere sefuitimaci. Birui abina iedoiacadimaci; iadedi jiairuido sure iitimaci. Monamo cue Moo diga jaca ifeitimaci; iadedi naimie naimacina duere finollemona, sure iitimaci.

<sup>16</sup> Omoi llua naimaci cacacania, cuena cacadimaci. Omoi llua naimaci jitaiñenia, cuena jitaiñedimaci. Cuena jitaiñedinodi cuena oretagamiena jiai jitaiñedimaci. —Jesús naie fetocanomo iese llua mei, oni jaidimaci.

*Ie setenta fetocano abido billa rafue*

<sup>17</sup> Jiairuido Jesús ie setenta fetocano abido caimare bitimaci. Raitimaci:

—Nama, o facaido cominimona jananiaina oni oredicai.

<sup>18</sup> Jesús naimacimo llote:

—Monamona Taife borilla isoi jaie ana dotajana cidicue. Iemona cue uai naimie uai baifemo faiana uifoticue.

<sup>19</sup> Jaiomona ramo omoi jiriñena uai omoimo jai itataticue. Acaiduaimona ramo omoi jiriñena uai omoimo jiai jai itataticue. Nana cue dibeimo ifedinomo omoi anamo jai itataticue. Omoina niese nibaifetimaci;

<sup>20</sup> iadedi omoi uaina jananiai iñua jira, iobiñeno; iadedi Jusiñamui cominina omoi illamona, omoi mameciái monamo Jusiñamui rabenicomo jai cuiamo iobi.

*Jesús ie Moo diga ñaia rafue*

*(Mt 11.25-27; 13.16-17)*

<sup>21</sup> Ie facaiseconi ie Moo Joreño naimiemo illa jira, Jesús iobide. Raite:

—Ore Moo, oca mona Namadio. Oca enirue Namadio. Abina uifotinona bie isoide rafuena uifotañedo; iadedi jamai bue isoidinona iena uifotadio. O jitaila jira, iese uifotadio. Ie jira iobillacinona omo feaacadicue. Mai.

<sup>22</sup> Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uifote. Dama cue Moona raise uifoticue. Cue jitaille diese omoina naimiema uifotadicue. Ie muidona naimiema uifotomoi.

<sup>23</sup> Ie llofueoicaigano diga eneno ia, naimacimo llote:

—Cue finoca rafuena omoi ciua jira, ni ua omoi marena illino jillaci.

<sup>24</sup> Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioñedimaci. Iena cacacacadimaci; ia cacañedimaci. Jusiñamuina jaie ñinotino micoriai iena cioacadimaci; iadedi cioñedimaci. Iena cacacacadimaci; iadedi cacañedimaci.

*Jesús cai ecimo itimiema isiruillana llua rafue*

<sup>25</sup> Jesús ecimo itinomona Moisés micori llogacinuaina llofueraimadi Jesúna facaciano, naimiemo jicanote:

—Maestro, Jusiñamui illanomo jaca cue illena, ¿bue finoiticue?

<sup>26</sup> Jesús uai ote:

—¿Niese Moisés micori llogacinuai iena raite?

<sup>27</sup> Uai ote:

—Moisés micori jaie cuela: “O jitailla jira, o comecina facajamona, cai Nama Jusiñamuina nana o comeci jitaillamona naimiema eo isirui. O abina o isiruilla isoi, o ecimo itinona isirui”.

<sup>28</sup> Jesús dinena raite:

—Marena cue uai otio. Iena o finoia, Jusiñamui illanomo jaca itio.

<sup>29</sup> Naie llofueraima Jesúmo dane jicanote:

—¿Bu cue ecimo itino?

<sup>30</sup> Jesús uai ote:

—Jaie rafuedo iena omo lloiticue. Jerusalémona Jericómo damie jaide. Naimie jaillano fiiredino naimie dine bitimaci. Ie iniroina bairosite. Naimiema fatimaci. Niade ie meinanona ie ecimona jaisite.

<sup>31</sup> Dallu illanona, Jusiñamui diga ñairaima naie naisona jaide. Fagamiena ciode; iadedi ecido jaide.

<sup>32</sup> Dallu illanona, Jusiñamui jofomo maijiraima jai jaide. Fagamiena ciuanona, ecido jai jaide.

<sup>33</sup> Ja muidomo Samaria nairai imie jaide. Naie nairaina enoidomoi. Fagamiena naimie ciuanona, naimiema duenaite. Iemona naimie canoacade.

<sup>34</sup> Naimie dine jaillano, ie bofellañona manode. Jai maítade. Ie burro emodomo jonecaida, naimiema uite. Inillinomo rilla mei, nainomo naimiema sedade.

<sup>35</sup> Ie areruido ie inia jofo namamo janore ucubena fecade. Raite: “Naimiema seda. Naimie facaina jiaie rana o oia, abido cue bia, iena ibaíticue”. Ie mei oni jaide.

<sup>36</sup> —Naie llofueraimamo Jesús dinena jicanote— ¿Fagamie ecimo itimiedi bu?

<sup>37</sup> Uai ote:

—Fagamiena duenaitimie.

Jesús raite:

—Jai raise uinotio. Mai jai. Ie isoi finocana o jai.

*Jesúdi Marta iañuui María jofomo illa rafue*

<sup>38</sup> Nia macaritimacimo, comini illanomo Jesús ie llofueoicaigano diga ridimaci. Marta raillañaiño ie jofomo naimiema feiñote.

<sup>39</sup> Naiñaiño euiñodi María. Jesús ecimo llaribamo María ana raide, naimie llofuiacinona cacareillena;

<sup>40</sup> iadedi Martamo maijille eo illa jira, naiñaiño naimie llofuiacinona cacarefiñede. Ie jira Jesúmo llote:

—Nama, cue euiño cuena canoacaiñena jira, dañi maijidicue. “O euiñona cano” naiñaiño lono.

<sup>41</sup> Jesús uai ote:

—Ero, Marta, jarire itio. Diga o ramo comecina facadio; ia Jusiñamui rafuemo comecina faca.

<sup>42</sup> María iemo comecina jai facade. Naiñaiño cue llofuiana nano cacaiacade. Ona canollena naiñaiño lloñeiticue.

## 11

*Jusiñamuimo Jesús jia rafue*

*(Mt 6.9-15; 7.7-11)*

<sup>1</sup> Jiairuido ie Moo diga Jesús ñaia, ie llofueganomona damie naimiemo llote:

—Nama, jiaana caina llofue, ie llofueoicaiganona Juan Bautista micori llofui isoi.

<sup>2</sup> Jesús uai ote:

—Omoi jiaia, iese omoi jii:

Ore Moo, comini ori iobidesa.

O illaimana jira, nana cominina o anamo raire itata.

O jaienisai o jitaillacinona finua isoi, cominina o jitaillacinona finota.

<sup>3</sup> Nagarui guille caimo itata.

<sup>4</sup> Caina jeare jiaino finoia, iena caimona feilla isoi, cai jeacinona omona feilla jira, cai jeacinona oni dota.

Caina ramo bu faia, caina cano, iena cai inoñellena.

<sup>5</sup> Iena naimacina nia llofuellena, Jesús jiaie rafuena llote:

—Naiona mona moto llomenicon a jicallena, o nabai dine o jai a, ado lloitio: “Nabai, daje amani llomenicon a jitaidecucue.

<sup>6</sup> Jiaie nabai cue jofomo como ride. Jaca cuemo buedi ife de, naimiena cue ecallena”.

<sup>7</sup> Ie jofu jeraimona o nabai fairioite: “Cuena uaidoñeno. Cue nasedi jai cue ibaicasa. Cue urui ai jai inidimaci. Jia i inidicue. Llomenicon a omo fecallena casiacaifedicue”.

<sup>8</sup> Ja muidomo casillano, omo iena fecaite. Ie nabaina o illa jira, fecañeite; iadedi o eo jitailla jira, o jitaill e rana fecaite.

<sup>9-10</sup> Daje ra omoi faifia, iena jenodomo i. Raise jenoia, iena baitomoi. Damiena omoi jenoia, naimie illanomo jaidomoi. Nainomo naimiena baillamona, omo ina feifioite. Ie isoide. Buena omoi jitaia, Jusiñamuimo jica. Iena omoi jicaja jira, iena naimie cacajamona, omoimo iite.

<sup>11</sup> ‘Ero, omoimo i e moomo llomenicon a ie jito jicaia, noficina fecañede. Lliciaina jicaia, jai ona fecañede.

<sup>12</sup> Jigina jicaia, acaidona fecañede.

<sup>13</sup> Jecinona finocabidomoi; iadedi omoi uruiaimo mare rana fecacabillana uiñotomoi. Cai Moo Jusiñamui jaca mareuidimie. Cai baifemo naimie faite. Ie muidomo naimacina canollena, naimie mo jicadinomo ie Joreña itataite.

*Comini Jesúsna jeare ñaia rafue  
(Mt 12.22-30; Mr 3.19-27)*

<sup>14</sup> Jiairuido Janaba anamo illamiamona Jesús Janabana oni orede. Janabana nia oretañenia, Janaba anamo naimie illamona, naie iima ñainide. Janaba oni jailla mei, naimie ñaite. Ie jira comini rajicaidimaci;

<sup>15</sup> iadedi dajerie raitimaci:

—Beelzebú anamo bimie illamona, Beelzebú uaido jananiaina oni orede —raitimaci. Beelzebúdi Janaba comini.

<sup>16</sup> Jiaino naimiena facaciacasite. Raitimaci:

—Siño uai omo ia, Jusiñamuina siño rafuena finota.

<sup>17</sup> Naimaci comeciaina Jesús uiñua jira, naimacimo llote:

—Daje isoi comeciaina lloillamo daje nairai facañenia, danomo maijinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainaiainidimaci. Oni jaidimaci.

<sup>18</sup> Ie isoide. Beelzebú uaido jananiaina, omoi llua isoi, cue oretaia, Janaba ie dibeimo itino diga jai nabairiñede. Iemona naimie comini danomo ife itimaci.

<sup>19</sup> Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uiñollena. Iemei cue finoca rafuena uaitañe itomoi.

<sup>20-22</sup> Jiaie rafuedo iena lloiticue. Ero, ie rana raise riidumona, mairidimie ie rana raise enoite. Ie jofomo ie ra illanona, iena raise sedait e. Jamai bue isoidimie ie rana finide; iadedi naimie baifemo mairidimie bia, naimiena emodofillamona, ie rana fiirede. Ie isoide. Janaba anamona cominina jillotacabiticue. Naimie afemo nano cue ifenia, cominina jillotanidicue. Naimie afemo cue illa jira, iena finoredicue. Jusiñamui uaido jananiaina cue oretaia, Jusiñamui rafuena cue llua uiñotomoi.

<sup>23</sup> ‘Cue dibeimo ifedimie cuena enoide. Cue dibeimo cominina itañedimiedi naie cominina cuena inotañede.

*Janaba anamo illamie rafue  
(Mt 12.43-45)*

<sup>24</sup> Jesús naimacimo nia llote:

—Birui bene ite marañede cominidi Janaba anamo illamie isoidimaci. Naimiemona Janaba oni jai a, jiaie illanona baillena, jofue ifenanomo jaide; iade baiñede. Baiñena jira, naimie comecina facade: “Navui cue anamo illamie dine abido jaiticue”.

<sup>25</sup> Abido naimie bia, naie iima comeci namanidena naimie baite.

<sup>26</sup> Iemei oni jaillanona, jiaie siete jananiaina naimie diga atide, naimaci anamo naie iima illena. Naie siete janani ai naimie baifemo marañedimaci. Iemona naie iima eo fodo jaide. Ie isoide birui ite marañede comini. Cue rafue naimaci inoñenia, eo fodo jaitimaci.

*Daje riño Jesús eina marena ñaia rafue*

<sup>27</sup> Cominimo Jesús llotemo, comini motomona dañaiño Jesús mo llote:

—O ei caimare illesa. Naiñaiñomona comuidio. Naiñaiño mono i jirodio. Naiñaiño caimare illesa.

<sup>28</sup> Jesús uai ote:

—Marena llotio; ia Jusiñamui uaina naimaci cacajamona, iena ñnuamona, jiaïno eo caimare iitimaci.

*Dajerie Jesús siño rafuena ñnuana jitailla rafue*  
(Mt 12.38-42; Mr 8.12)

<sup>29</sup> Te facaise diga comini Jesús dine biñoidimaci. Naimacimo llote:

—Birui ite cominidomoi marañedomoi. Siño rafuena cue ñnuana cioacadomoi; iadedi iena omoi jamai cioillena, siño rafuena ññoñeticue. Ero, Jonás micori jaie ite rafuena uiñotomoi. Naiemo omoi comeciaina omoi faca.

<sup>30</sup> Naimiemo suide rafuemona Nínive railla nairaidi Jusiñamui naimiena oretajana jaie uiñotimaci. Te isoide. Fiodaillamona cue jilluamona birui ite cominidi Jusiñamui cuena oretajana uiñotimaci.

<sup>31</sup> Ero, Saba railla nairai ie illañño micoridi Salomón micori dine jaie aarena jaide. Naimie micori uiñuacinona naiñañño micori cacareillena, aarena jaide. Salomón micori baifemo birui uaidicue; iadedi cuena ññoñedomoi. Omoi comeciái icinuaina birui omoi meidoñena jira, Jusiñamui uicomo nana comini ille facaiseconi naiñañño micori omoïna ico ñaite: “Naimiedi siño rafue ñnuana ciodomoi. ¿Bue ñellena naimiena ññoñedomoi?” omoïna ico ñaite.

<sup>32</sup> Lliciai jeraimona naimie jillua mei, Nínive railla nairai dine Jonás micori jaide. Nain-omo Jusiñamui rafuena llote. Naie comini iena cacajano, naimaci comeciái icinuaina meidotimaci. Cue rafuena omoi cacajamona, omoi comeciái icinuaina birui omoi meidoñena jira, Jusiñamui uicomo ico nana comini ille facaiseconi: “Cue cominidomoi” omoïna raññeticue. Jonás micori baifemo birui uaidicue; iadedi cuena ññoñedomoi.

*Jesús comini illa rafue*  
(Mt 5.15; 6.22-23)

<sup>33</sup> Jesús llote:

—Lamparín bu unia mei, jofu anamo bainino rainañega. Cirigai anamo rainañega. Ie raïranomo rainaca, comini nainomo bia, jofu jerai lligaiñollena.

<sup>34</sup> Omoi uisí diga rana ciodomoi. Omoi uisí maraññena, rana raise cioñedomoi. Ie isoide. Omoi comeci maraññena, maraññedicinona ñnocana jaidomoi. Jusiñamuina uiññoedomoi. Ie rafuena jiaï uiññoedomoi.

<sup>35</sup> Ie jira omoi comeciaina raise ñno, cue rafuena omoi raise ñnollena.

<sup>36</sup> Nana omoi comeciái marena ia, cue rafuena ñnocana jaitomoi. Iena raise uiñotomoi. Jofomo lamparín raise lligaiñua isoi, cue rafuena raise uiñotomoi.

*Jesúdi judiúi illaicominina ñaia rafue*  
(Mt 23.1-36; Mr 12.38-40; Lc 20.45-47)

<sup>37</sup> Cominina Jesús llofuiua mei, daje fariseo imie naimie dine bite. Raite:

—Cue diga cue jofomo mai guisai. —Jesús fairiua mei, naimie diga guisaide.

<sup>38</sup> Naimie ña guññena, naimaci einamací llogacinodo naimie jaiññenamona, Jesús ie onollina jocoñede. Ie jira naie fariseo imie rajjicaide. Ie comeciña facade: “Naimie eo mare llofueraima. ¿Ñiese cai einamací llogacinodo jaiññede?”

<sup>39</sup> Jesús naimiemo llote:

—Da platos jinafo, da pocillos jinafo jocodino isoidomoi. Da platos jerai, da pocillos jerai jocoñedino isoidomoi. Omoi abina ñnodomoi; iadedi omoi comeciaina ññoñedomoi. Rana eo ñnicidotomoi. Omoi comeciái jearede.

<sup>40</sup> Abi uiññoedomoi. Jusiñamui omoi abiaïna omoi comeciái diga ñnode. Omoi ñnocana rafuena uiñote. Omoi comeciaina facajacinona jiaï uiñote.

<sup>41</sup> Omoi comeciái marena ia, jiaie cominina canodomoi. Iemona Jusiñamuimona omoi abi jiaï mare.

<sup>42</sup> Fariseuai, omoïmo rafuena lloiticue. Nana omoi illimo ite ramona Jusiñamuïmo janore jisa fecacabidomoi; iadedi jiaie cominimo mare rafuena raise ññoñedomoi. Jusiñamuina jiaï raise isiruiñedomoi. Nana naie isoide rafuena omoi jiaï ñnuana.

<sup>43</sup> Comini omoïri acarillena, ofiracomo uicomo raïacadomoi. Nine omoi macaria: “Jamai bue isoññedicaï” omoi comeciaina facajamona, jiaie comini omoïna uaiduana gaidomoi. Iese omoi jailla jira, Jusiñamui omoïna duere ñnoite.

<sup>44</sup> “Bainino ite raïafo emodomoi comini uiññoño macarillamona, naimaci abi jai jearede” raitomoi. Bainino ite raïafo isoidomoi. Omoi diga jiaie cominidi omoïmo ite jeacinona uiññoño nabairillamona, jeacinona jiaï ñnodimaci. Iese omoi ñnocana jiaï, Jusiñamui omoïna duere ñnoite.

<sup>45</sup> Naie facaise Moisés llogacinuaina llofuerainimona damie Jesúmo llote:

—Iese o lloia: “Jeacino ñnodomoi” caina jiaï llotio.

<sup>46</sup> Jesús uai ote:

—Jusiñamuimona jiaí duere sefuitomoi. Omoi einamaci llogacinuaido raise naimaci jaillena, diga rafue comini finuana jitaídomoi; iadedi iedo naimaci raise jaillena, naimacina jaca canoñedomoi. “Jusiñamuina eo raise sedadicaí” comecina facadomoi.

<sup>47</sup> Omoi jaíagaidi Jusiñamui facaina llorainina meinetimaci. Naie lloraini micoriai raíafuai birui marena finodomoi;

<sup>48</sup> iadedi naimaci micoriai llogacinuaido omoi birui jiaí jaíñena jira, omoi jaíagai finoca radi: “Mare” raitomoi. Jusiñamui rafuedo birui omoi raise jaíñena jira, omoi jaíagai isoi itomoi. Iese omoi jailla jira, Jusiñamui omoína duere finoite.

<sup>49</sup> Omoína Jusiñamui abi uíñuamona jai llote: “Cue rafuena llollena, naimaci dine cue facaina llorainina oretaiticue. Cue rafuena eo uíñotinona jiaí oretaiticue. Dajeriena meinetimaci. Jiaínona duere finoitimaci”.

<sup>50</sup> Enirue finua facaisemona ailluena Jusiñamui facaina llorainina meinetimaci. Omoimona Jusiñamui iba oite.

<sup>51</sup> Abel micori jaie ite. Ie ama naimiena meinete. Naimie facaisemona omoi jaíagaidi diga llorainina meinetimaci. Zacaría jiaí meinetimaci. Jusiñamui jofomo Jusiñamuimo toica ocaína jobaisoillano motomo naimiena meinetimaci. Omoimona Jusiñamui birui iba oite.

<sup>52</sup> Omoi llofuíamona comini Jusiñamui rafuena uíñoñedomoi. Jusiñamui rafuena raise uíñoñedomoi. Jiaíno iena raise uíñuana jitaíñedomoi. Iese omoi jailla jira, Jusiñamui omoína duere finoite.

<sup>53</sup> Fariseo jofomona Jesús jailla mei, fariseuai comini icirillamona, Jesúmo diga rafuena jicanotimaci, naimie uaina uaitallena. Moisés micori llogacino llofueraíni daje isoi uai uaitatimaci.

<sup>54</sup> Naimie raise uai oñedena, naimiena duere finoacadimaci.

## 12

### *Jesúdi mareuidinona abi caitadinona llofuia rafue*

<sup>1</sup> Ie facaiseconi eo ailluena comini Jesús dine ofidimaci. Ailluena illa jira, conini eilliaimo naidadatimaci. Ie llofueoicaiganomo Jesús llote:

—Fariseuai siritate ramona abina rairui. Biena ñaiticue. “Maredicaí” raitimaci; iadedi mareuidinona abi caitadimaci. Naimacimona abina rairui.

<sup>2</sup> Naimaci birui finoca rafuena birui bainino finodimaci; ia Jusiñamui naimaci comeciaí iticinona ico uíñotaite.

<sup>3</sup> Ero, cue rafuena birui anado llocana jaidomoi; ia ico marefodo iena llocana jaitomoi.

### *Jesúdi jaciruiñeno llofuia rafue*

(Mt 10.28-31)

<sup>4</sup> Ie llofueganomo Jesús llote:

—Cue nabaiñaidomoi. Omoína meineiacadinona jaciruiñeno. Omoi abina meineredimaci; ie iadedi omoi joreñoña meinenidimaci. Omoína naimaci meinia, omoi joreño Jusiñamui dine jaite. Iena uíñuamona, omoi meineiacadinona jaciruiñeno.

<sup>5</sup> Cue rafuedo omoi raise jaíñenia, Jusiñamuina jacirui. Omoi fiodailla mei, omoi abina omoi joreño diga iraimo ie dotalle uai naimiemo ite. Ie jira naimiena jacirui.

<sup>6</sup> Ero, dabecuero janorede sillina fecadomoina, eo janore ibaca. Silliñiaí eo janore raifide; iadedi Jusiñamui naimaci illana uíñote.

<sup>7</sup> Ero, niga ifotirai omoímo illana Jusiñamui jiaí uíñote. Naimiedi omoína sedajana jiaí uíñote. Silliñiaí baifemo Jusiñamui isiruiñomoi. Omoi duere finoacadinona jaciruiñeno. Jusiñamui jitaíñenia, omoímo jaca buena suíñeite.

### *Jesús naimiena janoñenana llofuia rafue*

(Mt 10.32-33; 12.32; 10.19-20)

<sup>8</sup> Ie llofueoicaiganomo Jesús nia llote:

—Cue rafuena omoi lluamona, jiaíno omoína duere finoitimaci. Cuená birui omoi janoñenia, nana comini Jusiñamui jaienisaí uicomo ico ia, nainomo omoína janoñeiticue. “Cue cominidomoi” omoína raiticue.

<sup>9</sup> Cuená birui omoi janoía, nana comini Jusiñamui jaienisaí uicomo ico ia, nainomo omoína janoíticue. “Cue cominiñedomoi” omoína raiticue.

<sup>10</sup> Jusiñamuidi naga cuena jeare ñaitimie jeacinona feítarede; iadedi Jusiñamuidi ie Joreñoña jeare ñaitimie jeacinona feítañeite.

<sup>11</sup> Cue rafuena omoi llua muidona, duere sefuitomoi. Ilaícomini dine omoína llogidollena comini uia, omoi abi riidollicinomo omoi comeciaina jarire facañeno.

<sup>12</sup> Naie facaiseconi Jusiñamui joreño omoi abi riidollicinona uíñotaite.

*Jesúdi raruia: eo uamona abi rairuillana llofuia rafue*

<sup>13</sup> Nainomo ite cominimona damie Jesúmo llote:

—Maestro, cue moo jai fiodailla mei, cue ama doforamie cue facaina ite rana cuemo iacaiñede. Naimiemo llono, cuemo illena.

<sup>14</sup> Jesús uai ote:

—Juezñedicue. Bie isoide rafue cuemo duiñede.

<sup>15</sup> Ie ecimo itinomo llote:

—Ero, rana nicidoñoeno. Ailluena ra omoimo illamona, Jusiñamui illanomo riñeitomoi.

<sup>16</sup> Tena omoi raise uiñollena, jiaie rafuedo iena lloiticue. Ucuberedimiedi ie illimona ailluena rana ote.

<sup>17</sup> Ie jira comecina facade: “Cue illimona ailluena rana oticue; iadedi ¿ninomo iena eenoiticue?”

<sup>18</sup> Birui cuemo ite eenoracona judaiticue. Ie mei aillue eenoracona finoiticue. Nainomo cue rana eenoiticue”.

<sup>19</sup> Ie comecina facaite: “Cuemo ailluena ra jai ite. Diga años nia iiticue. Jamai iiticue. Marena guiticue. Caimare iiticue”.

<sup>20</sup> Iese comecina facade; iadedi Jusiñamui naimiemo llote: “Abi uiñoñedio. Cue llua jira, ja naiona fiodaitio. Ie mei omo ite ra omo fiebiñeite”.

<sup>21</sup> Dama ramo ie comecina bu facaia, Jusiñamui jitaillacinomo ie comecina bu facañena, faifite.

*Jesúdi Jusiñamui cai sedajana llua rafue*

*(Mt 6.25-34)*

<sup>22</sup> Ie llofueoicaiganomo Jesús llote:

—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillermo jarire comecina facañeno. Omoi jitalle iniroimo jarire comecina facañeno.

<sup>23</sup> Jusiñamui omoína itataja muidona, guille omoimo iite. Naimie omoi abi finua muidona, iniroidi omoimo iite.

<sup>24</sup> Silliñaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baifemo omoi faia jira, naimie omoína canoite.

<sup>25</sup> Omoimona, ¿bu ie comeci jarire facajamona a sairite? Iese jaca buna a sairíñede. Dama Jusiñamui omoína a sairitarede.

<sup>26</sup> Omoi comeciaina facajamona omoi a sairíñena jira, jiaie ramo omoi comeciaina jarire finoñoeno.

<sup>27</sup> Safiamo omoi comeciaina faca. ¿Niese sicodimaci? Maijiñedimaci. Iniroina tforiñedimaci; iadedi Salomón micori naimaci isoi jaie iñede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide.

<sup>28</sup> Jusiñamui safiana ebiretacabide. Dallu facaise illanona, safiadi duide. Safia baifemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiema ino. Jusiñamuina eo janore inotomoi.

<sup>29</sup> Omoi comeciaina jarire icana jaiñeno. “¿Buena guitica?” raiñeno. Iemo comeciaina eo facañeno.

<sup>30</sup> Jusiñamuina inoñedino iemo comecina facacabidimaci. Nana omoi jitaillacinona omoi Moo Jusiñamuidi uifua jira, naimaci isoi iñeno.

<sup>31</sup> Jusiñamui jitaillacinona finocana omoi jai. Naimiemo omoi comeci facaia, omoi illamo omoi comecina jarire facañeitomoi. Iemona guille omoimo Jusiñamui iite. Iniroi omoimo jai iite.

*Jesúdi Jusiñamuimo comecina facaja rafue*

*(Mt 6.19-21)*

<sup>32</sup> Jesús llote:

—Cue cominina omoi illanona, uri omoi i. Omoi Moo Jusiñamui jitailla jira, naimie anamo omoína itatajamona, omoína sedaite.

<sup>33</sup> Omoi raruiaina fecajanona, ucubena dueredinomo feca. Sabiñeite bolsana ono, omoi ra faifi raillano. Monamo omoi ra illa isoi ñaiticue. Monamo omoi ra illa isoi, iena faifiñeitomoi. Firiraima nainomo jaiñede. Gireco nainomo jai iñede.

<sup>34</sup> Aillue ra omoimo ia, Jusiñamuimo comeciaina facañedomoi; iadedi naimie jitaillacinona omoi finoia, naimiemo comeciaina facadomoi.

*Jesús ie abido billemo ocurillana llofuia rafue*

<sup>35-38</sup> Jesús nia llofujete:

—Monamona ico cue abido billemo ocuri. Iena omoi raise cacaillena, bie rafuedo iena lloiticue. Damie ie nabai ie ai ua rafue dine naiona jaide. Ie mullaiaia naimie abido billemo ocuririllana ocuide. Naimie billemo naimaci raise ocuria, iniroina jitajanona, lamparíniaia unianona, ocuriritimaci. Iese naimaci ia, nasena naimie tuia, iena raire econoitimaci. Nie hora naimie abido bia, naimiena naimaci iniñeno ocuria, ieri naimie iobite. Iobillamona, mullaimana naimie itena, mesamo naimacina ecaite. Naimie bille hora naimaci uiñoñena jira, jaca ocuriricana naimaci illa.

<sup>39</sup> Ero, firiraima bille facaiseconi jofo namadi uiñotena, nia caadote, ie ra faifi raillanona.

<sup>40</sup> Monamona ico abido biiticue. Omoi ocuriñena facaisemo biiticue. Ie jira cue billemo raise ocuri.

*Jesúdi patrón ie mullaimana ie jofona sedataja llua rafue*  
(Mt 24.45-51)

<sup>41</sup> Ie como lloga rafuena cacajano, Jesúmo Pedro jicanote:

—¿Bumo bie rafuena llotio? ¿Caimo llotio? ¿Nana cominimo?

<sup>42</sup> Uai ote:

—Bie isoide cominimo lloticue. Ie mullaiaimona patrón damiena fetode, ie jiaie mullaiaina sedallena. Naimacina sedajanona, naimie naimacina jiaie ecade.

<sup>43</sup> Ie mei patrón oni jaide. Jofomo abido naimie bia, ie nanoca mullaiaia raise maijiana fidia, naimiena raise ibaite.

<sup>44</sup> Iobillamona, nana ie raruaiana sedataite;

<sup>45</sup> iadedi naie mullaiaia marañenia, comecina facaite: “Cue patrón are biñeite. Jiaie rafuena finoiticue”. Ie comecina iese facaja jira, naimie anamo ite mullaiaiaia faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite.

<sup>46</sup> Ie ocuriñena facaise ie patrón abido billanona, naimiena meinetaite. Ie uaina iñoñedino isoi, duere finoite.

<sup>47</sup> Naie mullaiaia ie patrón jitailla rafuena finuana uiñote; iadedi iena iñoñede. Ie jira eo duere sefuite;

<sup>48</sup> iadedi marañede rafuena raise uiñoñeno jiaie mullaiaia finoia, janore duere sefuite. Ie isoide. Jusiñamui rafuena raise uiñotino iedo raise jaiñenia. Jusiñamui naimacina eo duere finoite. Iena janore uiñotino iedo raise jaiñenia, Jusiñamui naimacina janore duere finoite. Iese omoimo suiñellena, mare mullaiaia isoi, Jusiñamui jitaillacino finocana omoi jai.

*Jesús muidona nana comini uri iñena rafue*  
(Mt 10.34-36)

<sup>49</sup> Jesús llote:

—Cuena naimaci iñollena, eniruemo comini dine biticue. Cuena dajerie iñuamona, cue cominina jaitimaci. Cuena jaino iñoñenamona, cue cominina jaiñeitimaci. Iemona cominina duere finoiticue. Cue maijia raire fuiduana jitaidicue.

<sup>50</sup> Cue nia eo duere sefuiticue. Iena raire suillena jitaidicue.

<sup>51</sup> Nana cominina uri itatallena eniruemo biñedicue. Cuena iñoñedinodi cuena iñotinona enoitimaci. Enoillamona, cuena iñotinona duere finoitimaci.

<sup>52</sup> Cue billamona, daje jofomo itino diese danomo iñeitimaci. Dabecuero comini nainomo ia, menamie cue dibeimo iite. Daje amani cue dibeimo iñeite. Iese iñenia, daje amani cue dibeimo iite. Mena cue dibeimo iñeite.

<sup>53</sup> Cue lloga rafuena damierie iñua muidona, ie moo illa dibeimo ie jito iñeite. Ie jito dibeimo ie moo iñeite. Ie ei illa dibeimo naiñaiño jisa iñeite. Ie jisa dibeimo ie ei iñeite. Ie jifaiño illa dibeimo ie miodi iñeite. Ie mio dibeimo ie jifaiño iñeite. Iese cominina uri itatañedicue.

*Jesúdi monamo ite rana llofua rafue*  
(Mt 5.25-26; 16.1-4; Mr 8.11-13)

<sup>54</sup> Cominimo Jesús dane llote:

—Bie eniruemo afai dine uilliena omoi cioia, raicabitomoi: “Noci deiacade”. Iese omoi cua meinomo, ua noci deide.

<sup>55</sup> Bie eniruemo beici dinaa afi bia: “Eo ecasiite” raicabitomoi. Iese afi bia, ua eo ecasite.

<sup>56</sup> Abina uiñotinona abi caitadinodomoi. Monamo eruailamona, rafue suillana uiñotomoi; iadedi omoi ecimo suiacalle rafuena raise uiñoñedomoi. Cue lloga rafuena raise cacaiñedomoi.

<sup>57</sup> Iemo omoi comeciaina raise facañedomoi.



<sup>58</sup> Ero, omoína bu llogidoia, juez dine nia omoi riñenia, omoína llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoína jonetaite.

<sup>59</sup> Nana raise ibañenia, juez llua isoi, jino jaiñeitomoi. Ie isoide. Cue rafue omoi cacajamona, naimiemona duere sefuiñellena, Jusiñamui diga omoi rafuena raise fino.

## 13

*Jesúdi comeciai iuai meiduana dana llua rafue*

<sup>1</sup> Cominina Jesús nia llofuetemo, jiaie comini Jesús dine billanona, raitimaci:

—Jerusalémo Jusiñamui jofomo dajerie Galileamona navui bitimaci. Ocainaiaina fatimaci, Jusiñamuina naimaci sedallena. Ie facaiseconi Pilato railla gobernadordi soldaduaina orede, naie cominina fallena.

<sup>2</sup> Jesús uai ote:

—¿Niese comeciaina facadomoi? “Bie comini iese duere sefuilla jira, jiaie Galilea comini baifemo jeacinona finodimaci” comeciaina facadomoi.

<sup>3</sup> Iese omoi comeciaina facañeno; ia omoi comeciai iuai meiduamo comeciaina faca. Omoi comeciai iuai omoi meidoñenia, omoidei jiai faifitomoi.

<sup>4</sup> Siloé railla tidacana navui ana goillamo, dieciocho digamie saitabidimaci. Iena fididomoi. ¿Niese naimacimo omoi comeciaina facadomoi? “Nana Jerusalémo ite comini baifemo jeacinona finodimaci” comeciaina facadomoi.

<sup>5</sup> Iese omoi comeciaina facañeno; ia omoi comeciai iuai meiduamo comeciaina faca. Omoi comeciai iuai omoi meidoñenia, omoidei jiai faifitomoi.

*Jesúdi ie Moo comini comeciai iuai meiduamo fecuise ocuirilla llua rafue*

<sup>6</sup> Iena comini raise uñollena, Jesús bie rafuena llote:

—Dámie ie illimo higuera railla riarana rite. Sicua mei, riarra ollena jibuisaide; iadedi nia llisiñede.

<sup>7</sup> Ie jira ie illina sedaraimamo llote: “Ero, daje amani años bisoidicue, riarana ollena. Nia llisiñede. Iena mai tie. Naie illanomo jiaie riarana coco rillesa”.

<sup>8</sup> Ie illina sedaraima uai ote: “Dama ite. Daje año nia seda. Riarra abina caigiitucue. Eniruena caimaretaitucue.

<sup>9</sup> Jiaie año llisia, mare. Llisiñenia, iena tieiticoco”. Ie isoide. Jusiñamui omoi comeciai iuai meiduamo are ocuirite; ia meidoñenia, omoína duere finoite.

*Jesúdi jicaidiñaiñona jillotaja rafue*

<sup>10</sup> Jiairuido sábadoruimo judiuai ofiracomo Jesús llofuede.

<sup>11</sup> Nainomo duidiñaiñodi ite. Janaba anamo naiñaiño illa jira, naiñaiño jicaide. Atona naidainide.

<sup>12</sup> Naiñaiñona Jesús ciuanona, naiñaiño lote:

—Ñoo, o duicomona jai jillodio.

<sup>13</sup> —Ie mei naiñaiñona jetade. Ieconí naiñaiño atona naidadate. Ie jira Jusiñamuimo iobillacinona fecade.

<sup>14</sup> Naie ofiraco sedaraima icirite, sábadoruimo Jesús naiñaiñona jillotaja jira. Nainomo itinomo llote:

—Seis digarui ite majillena. Nairuido omoi bi, omoi duicomona omoi jilloillena. Sábadoruimo biñeno. Sábadoruimo majijiñedicaí.

<sup>15</sup> Jesús uai ote:

—Maijiñedinona abi caitadinodomoí. Sábado iruimo majicabidomoí. Sábado iruimo omoi toinaia imaci illanomona suiñodomoí, jinui illanomo naimaci jiruaillena. Naie isoide majija omoimona mare.

<sup>16</sup> Ie isoide. Bie riñodi Abraham micori comini. Omoi nairai iñaiño. Dieciocho años Janaba anamo jai illamona, duere sefuede. Naiñaiñona canollena, sábado iruimo naiñaiñona Taife anamona cue jillotaia, cuemona mare.

<sup>17</sup> Iena Jesús lluaamona, nana naimie díbeimo iñedinodi meidaitimaci; iadedi jiaie comini iobidimaci, diga mare rafue naimie finua jira.

*Jesúdi mostaza ido llua rafue*

(Mt 13.31-32; Mr 4.30-32)

<sup>18</sup> Jesús jiaie rafuena llote:

—Jusiñamui díbeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci.

<sup>19</sup> Jiaie rafuedo iena omoimo lloiticue. Mostaza railla ido eo janorede. Ie illimo damie iena rillamona, eo aillue riaradi sicode. Ailluena jira, nainomo sillifiaia jicaicaina finodimaci.

*Jesús siritate rana llofuia rafue*  
(Mt 13.33)

<sup>20</sup> Jesús jiaie rafuena llote:

—Jusiñamui ðibeimo comini jailla rafuena lloiticue. Jiaie uaido iena omoimo lloiticue.

<sup>21</sup> Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

*Jesúdi Jusiñamui dine rille llua rafue*  
(Mt 7.13-14, 21-23)

<sup>22</sup> Jesús diga nairaimo llofuecana jaide. Jerusalén dine jaide.

<sup>23</sup> Jesús oni jaillanona, damie naimiemo jicanote:

—Nama, ¿niga comini o uaina ñnoitimaci? —Jesús uai ote:

<sup>24</sup> —Monamo cue Moo dine jaill nasedi janorede isoide. Naie nasedo lliicana o jai. Ailluena comini naiedo jaiacanitimaci; iadedi fo jainitimaci.

<sup>25</sup> Naie jofo nama nase ibaila mei, ¿niése fo jaitomoi? Jino naidailamona, nasena tutajanona, raitomoi: “Nama, o nase econo”. Naimie uai oite: “Omoina uifioñedicue”.

<sup>26</sup> Dane lloitomoi: “O diga navui guiticai. Cai illanomo llofuetio”;

<sup>27</sup> Iadedi naimie uai oite: “Omoina uifioñedicue. Cue cominifedomoi. Jecino omoi começimo nia illa jira, mai jai”.

<sup>28</sup> Jusiñamui illanomo Abraham micorina, Isaac micorina, Jacob micorina, nana Jusiñamui facaina lloraini micoriana cioitomoi; ia omoi jino illamona, duere sefuillamona, eitomoi.

<sup>29</sup> Diga comini Jusiñamui illanomo iitimaci. Ailluena juduifioñedino naga nairaiamona Jusiñamui illanomo biitimaci. Nainomo coninina caimare nabaitimaci.

<sup>30</sup> Naga nairaimona Jusiñamui cominina jillotarede. Cue rafuena cacadomoi; ia cue cominina omoi jaiacania, abi iedoñeno cuena ñnocana omoi jailla.

*Jesús Jerusalémo itinomo llua rafue*  
(Mt 23.37-39)

<sup>31</sup> Ie facaiseconi dajerie fariseuai comini Jesús dine billano raitimaci:

—Benomona mai o jai. Cai illaima Herodes ona meineiacade.

<sup>32</sup> Jesús uai ote:

—Herodedi eo jifueraima. Naimie dine jai. Naimiemo llono: “Janaba anamo ite cominimona Janabana oni oreçabidicue. Duidinona jillotacabiticue. Birui siño rafuena finocabidicue. Ico iese nia finoiticue. Iese cue maijille fuite.

<sup>33</sup> Nia oni jaiticue. Ailluena Jusiñamui facaina lloraini micoriana nainomo jai fiodailla isoi, Jerusalémo cue rafue jai raire fuite” llono.

<sup>34</sup> Jerusalémo itinomo começina facajano, Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoina cue sedallena, atava ie uruia sedaja isoi, diga icaiño cue anamo omoina uaidoia-cadicue; iadedi omoi dinena cuena jitaiñedomoi.

<sup>35</sup> Iemona Jusiñamuidi omoi illanona jai faionocaide. Cue Moo dine jaiticue. Cue jailla mei, cuena cioifneitomoi. Ico cue abido bla, comini cuena lloitimaci: “Jusiñamui oretagamie eo mare. Naimiedi cai Nama” lloitimaci.

## 14

*Jesúdi abina siridimiena jillotaja rafue*

<sup>1</sup> Jiairuido sábadoruimo Jesúdi fariseo imie jofomo guisaide. Naie fariseo imiedi illaicomini. Nainomo itino Jesúmo eo eruaidimaci.

<sup>2</sup> Guille facaise naie jofomo duidimie bite. Naimie abina siridimie.

<sup>3</sup> Nainomo itinomona damieriedi fariseuai comini. Moisés micori llogacinuaina llo-fueraini jai iitimaci. Naimacimo Jesús jicanote:

—Sábadoruimo comena cue jillotaia, ¿omoimona jecino finodicue? ¿Niése Moisés micori llogacinuai iena llote?

<sup>4</sup> Uaina oñedimaci. Ie jira Jesús duidimie onollina llinuamona, naimiena jillotate. Ie mei naimiena jino orede.

<sup>5</sup> Nainomo itinomo llote:

—Sábadoruimo maijicabidomoi. Sábadoruimo omoi jurareta pozomo uaidena, iena jillotal-lena, nairuimo iena ari otomoi. Omoimona naie isoide maijia mare. Bimiēna cue jillotaja jira, ¿niese cuena jeare ñaitomoi?

<sup>6</sup> Iena cacajanona, uainicaidimaci.

*Jesúdi guillena uaidoganona llua rafue*

<sup>7</sup> Jesúdi naimaci guisaibillana ciode. Jiaino baifemo illena, jofu nama abimo nana raiacadimaci. Iena ciuamona, naimacimo Jesús rafuena llofueite:

<sup>8</sup> —Rafue dine guillena omoína bu uaidoia, jofu nama abimo raifēno, omoi baifemo itimie bi raillano.

<sup>9</sup> Jofu nama abimo omoi raia, omoi baifemo itimie bia, jofu nama omoimo lloite: “Bimiemo omoi raillanona feca”. Meidaillanona, oni rainadaitomoi.

<sup>10</sup> Ie jira rafue dine omoína uaidoia, naie jofomo omoi ria, oni raí. Ie mei jofu nama jitaia, omoimo lloite: “Cue abimo raí”. Ie mei nana naie itino omoi iobillana cioitimaci.

<sup>11</sup> Ie isoide. Jusiñamuidi jiaimie afemo iacadimēna jiaimie afemo iñenana itataite. Jusiñamuidi jiaimie afemo iacaiñedimēna jiaimie afemo itataite.

<sup>12</sup> Naimēna uaidotimiemo Jesús lloite:

—Guille rafuena o finoia, naga icaiño o nabaiñiaina uaidoñeno. Naga icaiño o cominina uaidoñeno. Naga icaiño o ecimo itino ucuberedinona uaidoñeno. Naimacina o uaidotona, jiairuido guillena ona uaidoitimaci, naie iba o ollena;

<sup>13</sup> ia rafuena o finoia, dueredinona uaido. Ñuja-ñujacaida macaritinona uaido. Uisinidinona uaido.

<sup>14</sup> Naimacimona iba íco o oñenamona, Jusiñamui ona caimare itataite. Jiairuido fiodaillanona mareuidino jilloia, monamo Jusiñamui ona ibaite.

*Jesúdi ailluena guille finoca rafuena llua rafue*

<sup>15</sup> Jesús abimo itinomona Jesús lluaña damie cacajano, raite:

—Monamo Jusiñamui illanomo itimiedi marena iite.

<sup>16</sup> Jesús uai ote:

—Iena omoi raise uifollena bie rafuena lloiticue. Dame aillue rafuena finode. Ailluena cominina uaidote.

<sup>17</sup> Rafue illaruimo ie mullaímana orede, cominina dane uaidollena. Raite: “Mai bi. Nana guille finuadi jai fuite”;

<sup>18</sup> ia biacaiñedimaci. Dame lloite: “Eniruena como ibadicue. Iena jibuisaiadicue. O rafuemo jaiñeiticue. Ie jira cue joreñona iciñeitiosa”.

<sup>19</sup> Jiaimie lloite: “Diez diga juraretana como ibadicue. Naimacina jibuisaiadicue. O rafuemo jaiñeiticue. Ie jira cue joreñona iciñeitiosa”.

<sup>20</sup> Jiaimie lloite: “Riño como oticue. Ie jira o rafuemo jaiñeiticue”.

<sup>21</sup> Ie nama dine naie mullaíma abido jaide. Comini biacaiñenana lloite. Iena cacajano, rafue namadi icirite. Ie mullaímamo lloite: “Cai nairai naisona jai. Dueredinona uaido. Ñuja-ñujacaida jaidinona uaido. Uisinidinona uaido”.

<sup>22</sup> Ie mei naie mullaíma jaide. Abido naimie bia, ie namamo lloite: “O lluaña finodicue. Ailluena comini jai bitimaci. O jofomo illino nia íte”.

<sup>23</sup> Rafue namadi uai ote: “Naisomo itinona bene atillena, cue jofona oruitallena, cai nairaimona jino jai.

<sup>24</sup> Cue nano uaidogano cue guillena guiñeitimaci”. Ie isoide. Jusiñamui rafuena feiñotino monamo Jusiñamui illanomo íco iitimaci; ia naimie rafuena jitañedino nainomo íco iñeitimaci.

*Jesúdi naimie llofueganona jaiacadino rafue*

<sup>25</sup> Naie facaise ailluena comini Jesús diga jai jaisoidimaci. Naimacimo lloite:

<sup>26</sup> —Cue llofuegamēna jaiacadimie cuena íe moo baifemo isiruilla. Cuena íe ei baifemo isiruilla. Cuena íe ai baifemo isiruilla. Cuena íe uruiai baifemo isiruilla. Cuena íe amatai baifemo isiruilla. Cuena íe miriñotiai baifemo isiruilla. Cuena íe abi baifemo isiruilla. Iese cuena isiruiñenia, cue llofuegamēna raise jainide.

<sup>27</sup> Cue llofuegamēna bu jaillanona, duere sefuicana jaitē. Nibai naiemona fiodaite. Bu íese jaiacaiñenia, cue llofuegamēna naimie raise jainide.

<sup>28</sup> “Ero, jiaie rafuedo iena lloiticue. Jofona bu finoacania, íe ucubena bailla díese uifollena: “¿Niga raifite?” comecina nano facade.

<sup>29</sup> Iese naimie comecina facañenia, goguirai naidania mei, íe ucube riñenia, taiguanona, naimieri jaisitimaci.

<sup>30</sup> Raitimaci: “Íe jofu finua tainede; íadedi fuidonide”.

<sup>31</sup> 'Ero, jiaie rafuedo iena lloiticue. Illaïma jobaimena finoacania, nano comecina facade: "Cuemo ite diez mil soldaduai. Cue bacauaimo ite veinte mil soldaduai. ¿Niese emodofiticue?" Comecina facaja mei: "Emodofiticue" naimie comecina facajia,

<sup>32</sup> nia are naimie bacauai ia, daguelli uicodo orede, ie fairiconi diga ñaïllena. Raite: "Jobairiacaiñedicue; ia o diga bie rafuena raise finoacaducue".

<sup>33</sup> Bie mo comecina omoi faca. Ie raruiaimo bu comecina eo facaia, cue llofuegamiena jainide.

<sup>34</sup> 'Sal mare; iadedi ie caimano jai iñenia, ¿dane niese nibaïamona caimarenite?

<sup>35</sup> Jai maraiñede. Eniruemo jonegadena, jiaï maraiñede. Oni dotaca. Ie isoide. Cue llua isoi omoi iñenia, cue llofueganona jainidomoi. Omoi jeforena jira, raise fueollena, cue llamo cacarei. Iena iino.

## 15

*Jesúdi naimiena inotinomona damie faifillana jitaïñena rafue*  
(Mt 18.10-14)

<sup>1</sup> Naimaci bisoilla isoi ie rafuena cacaïllena, diga gobierno ucubena oraini Jesús dine ofidimaci. Jusiñamui llogacinona raise jaiñedino jiaï ofidimaci.

<sup>2</sup> Iena ciuano, fariseuai cominidi, Moisés micori llogacinuaina llofueraïni diga, Jesús joreñona ñaitimaci:

—Bimie maraiñedicinona finorainina feiñote. Naimaci diga jiaï guite.

<sup>3</sup> Naimaci ñaïana uiiñuana, Jesús naimacimo bie rafuena llote:

<sup>4</sup> —Omoimona damiemo cien toica llaudaiaï nibaï ite. Naimacimona daje feiraita. Ie noventa y nueve llaudaiaïna fainonocaida, iena jenuaite, ie baille dinori.

<sup>5</sup> Baïllanona, ie fecanicomo rocanocaida, iobicana biite.

<sup>6</sup> Jofomo naimie ria, ie nabaïñaïna uaidoite. Ie ecimo itinona jiaï uaiduana, raite: "Cue diga iobi. Cue feiraita llaudana jai baiticue".

<sup>7</sup> Ie isoide. Cue rafuena cue llamona, damie ie comeci jeacinona fainonocaïllamona, ie comeci iuai meiduamona, monamo itino eo iobitimaci; iadedi noventa y nueve comini marena illamona, janore iobitimaci.

*Jesúdi faifide ucubena bailla llua rafue*

<sup>8</sup> Jesús llote:

—Jiaïe rafuena omoïmo lloiticue. Dañaiñodemo diez diga ucube ite. Naiemona daje ucube nainaiño faïña, lamparín unianona, ie jofona gallaite. Eo jenoite, ucube ie baille dinori.

<sup>9</sup> Iena nainaiño baïa, ie nabaïñaïna uaidoite. Ie ecimo itinona jiaï uaiduana, raite: "Cue diga iobi. Cue faifide ucubena jai baiticue".

<sup>10</sup> Ie isoide. Cue rafuena cue llamona, damie ie comeci jeacinona fainonocaïllamona, ie comeci iuai meiduamona, Jusiñamui jaienisai eo iobidimaci.

*Jesúdi damie ie moo fainonocailla llua rafue*

<sup>11</sup> Jesús llote:

—Jiaïe rafuena omoïmo lloiticue. Damiemo mena jito ite.

<sup>12</sup> Ie moomo jamamie llote: "Moo, o fiodailla mei, o raruiaïmona janore feiñoiticue. O fiodaïllana sedaacaiñedicue. O raruiaïna cue facaina birui jitaïdicue. Cuemo ine". Ie jira ie moo naimiemo fecade.

<sup>13</sup> Ie mei nano nie dinori illamona, nana ie raruiaï iraiïanona, jiaïe eniruemo jaide. Nainomo ie ucube jamai buruemo faïaïde.

<sup>14</sup> Nana naimie ucube fuidua facaïse, naïe eniruemo guille iñede. Aime guitimaci. Naimie jiaï aime guite.

<sup>15</sup> Ie jira nainomo ite patrón dine maijiaïde. Naïe patrón ie chanchuaina sedallena naimiena orede.

<sup>16</sup> Naimiena jaca buna ecarainina jira, chanchuai guillemona guiacade.

<sup>17</sup> Iese naimie duere sefuilla jira, ja muidomo abina uiiñocaïllamona, comecina facade: "Cue moo jofomo nana naimie mullaiaï raise guitimaci. Guille fiebicabite; iadedi bene aimeri fiodaïticue.

<sup>18</sup> Cue moo dine abido ja jaiticue. Naimiemo lloiticue: Jusiñamuïmo jeacinona finodicue. Omo jeare jiaï finodicue.

<sup>19</sup> Odi: 'Cue jito' cuena raïñeno. O mullaiaï illa isoi, cuena abido feiño".

<sup>20</sup> Ie facaïse ie moo dine jai jaide. Nia aare naimie ia, ie moo naimiena ciode. Ie jitona duenaïllanona, naimie dine aiside. Naimiena caïmadote. Jiaï llibanote.

<sup>21</sup> Ie jito naimiemo llote: "Moo, Jusiñamuïmo jeacinona finodicue. Omo jeacino jiaï finodicue. Odi: 'Cue jito' cuena raïñeno".

<sup>22</sup> Ie moo iena cacajano, ie mullaiaimo llote: “Cue jítona naimie eruaillena, eo mare iníroina ati, naimie jítallena. Cue jítona naimie illa jira, iena jítallena, anillona ati. Naimie jítallena, zapatona jiaí ati.

<sup>23</sup> Janoreta farediretana fano. Iena raise finuanona, iena mai cai guilli. Iobillamona, caimare ebirede rafuena finoiticaí.

<sup>24</sup> Navui cuemona cue jito fiodaite isoide. Cajé cuemo dane abido rilla. Navui cuemona naimiedi faífide; iadedi birui naimiena dane ciodicue”. Naimie llua isoi, rafuena finodimaci.

<sup>25</sup> Naie facaise nano doforamie illimo ite. Jofomo abido naimie bia, comini iraisillana cacade.

<sup>26</sup> Daje mullaimana uaiduanona, naie rafuena jicanote.

<sup>27</sup> Naie mullaíma uai ote: “O ama abido jai bite. O ama ramo jiriñeno abido billa jira, o moo ie janoreta farediretana jai fatatate”.

<sup>28</sup> Iena cacajano, icirite. Fo jaiacaiñede. Ie jira ie moo jino bite. Naimiena fo uaidote.

<sup>29</sup> Ie moomo llote: “Ero, diga años o diga maijidicue. O uaina jaca inoticue; iadedi cue nabaiñiaí diga, rafuena cue finollena, chivo cuemo jaca fecañedio.

<sup>30</sup> O jito jamamie ie ucube callirediñaiñuaimo fuidode; iadedi abido naimie billano, naimie facaina janoreta farediretana fatatatio”.

<sup>31</sup> Ie moo uai ote: “Moo, nagarui cue diga itio. Nana cue radi oienite.

<sup>32</sup> Cuemona o ama navui fiodaite isoide; iadedi naimiena dane ciodicue. Naimie navui faífide raiticue; iadedi cajé cuemo dane abido rilla. Cue iobillanona rafuena finodicue”. Bie rafuemona omoi fueollena, iena jai lloticue —Jesús llote.

## 16

### *Jesúdi patrón ie mullaíma finoca rafuena llua rafue*

<sup>1</sup> Ie llofueoicaiganomo Jesús jiaíe rafuena llote:

—Ucuberede patrón ie mullaímana ie rana sedatate. Naie patrón eneno oni illanona, ie mullaíma ie rana raise sedañenana fidide.

<sup>2</sup> Naimiena uaiduanona, naimiemo jicanote: “¿Maraiñede o finoca rafuena niese fididicue? Omo ite cuentas cioacadicue. Cuemo ati. Cue diga jai maijiñeítio”.

<sup>3</sup> Iena cacajano, naie mullaíma comecina facade: “¿Niese nibaiíticue? Cue nama cuena jai dotaacade. Maijiana ocuinidicue. Jiaíe cominimona ucube jamai jicajana meiruiticue.

<sup>4</sup> Cue finuana jai uíñoticue. Naimaci jofomo comini cuena ico feiñollena cue dotaja mei, nana cue patrón debedinona uaidoiticue”.

<sup>5</sup> Ie jira naimacina uaidote. Damiemo jicanote: “¿Cue patrómo niga debedio?”

<sup>6</sup> Uai ote: “Cien bidones raífi aceitunamona oga aceítana debedicue”. Naie mullaíma raite: “O rabemo jarire ja cueno: cincuenta bidones”.

<sup>7</sup> Jiaimiemo jicanote: “¿Niga debedio?” Uai ote: “Cien digagai trigo raífi debedicue”. Naie mullaíma dinena raite: “O rabemo ochentana cueno”.

<sup>8</sup> Iena fidiano, naie mullaímamo ie patrón raite: “Jiaíruído marena o illemo o comecina raise facadio. Eo abina uíñotimiedio” raite. Ero, Jusiñamuina inoñedinodi naimiena inotio baífemo ra facajana baitadimaci.

<sup>9</sup> Naiemona omoi fueollena, omoímo lloiticue. Omoímo ite ra diga dueredinona cano. Iemona omoi nabaiñiaína jaitimaci. Omoí fiodaía, omoí ra bene fiebite; ia Jusiñamui illanomo naimaci diga omoi ia, naimacina birui omoi canuamona, nainomo omoína marena ñaitimaci.

<sup>10</sup> Janore ra omoímo illamona, Jusiñamui facaina birui omoi raise maijiaí, ailluena ra omoímo itedena, Jusiñamui facaina jiaí raise maijítomoi. Janore ra omoímo illamona, maraiñede rafuena birui omoi finoaí, ailluena ra omoímo itedena, maraiñede rafue nia jiaí finoitomoi.

<sup>11</sup> Omoímo birui ite ra diga Jusiñamui facaina omoi raise maijiñenia, naimiemona jiaíe rana feiñoñeitomoi.

<sup>12</sup> Omoi anamo ite ra diga Jusiñamui facaina omoi raise maijiñenia, Jusiñamui ie rafue omoímo itatañeite.

<sup>13</sup> Mena patrones diga daruido buna jaca maijinide. Mena diga bu maijiacania, damiena jiaímie baífemo gaite. Ie gaiámie ocuica rana finoite. Jiaímie ocuica rana raise finoñeite. Ie isoide. Raruiái ollemo comecina omoi eo facaía, Jusiñamui jitaillacinomo comecina raise facañeitomoi.

### *Jesúdi fariseuai comini diga dane ñaía rafue*

<sup>14</sup> Jesús llofuiana fariseuai comini cacajano, ucubena eo gaía jira, naimie uaina jaimaidimaci.

<sup>15</sup> Naimacimo Jesús llote:

—Omoí finoca rafuemona comini omoína: “Mare” raillana jitaídomoí; iadedi Jusiñamui omoí comeciaí marañenana uññote. Iese omoí illana Jusiñamui gaiñede.

<sup>16</sup> Jusiñamui facaina lloraini micoriai cuegafuiaímona Jusiñamui rafuena cacacabidomoí. Moisés micorí cuegafuiaímona iena jiaí cacacabidomoí. Juan Bautista micorímona naimie anamo omoí illana Jusiñamui jitaillana cacadomoí. Jusiñamui díbeimo omoí comeciaí iuaina meiduana cacadomoí. Iena jiaí llocabiticue. Iena ailluena ñnuamona, Jusiñamui díbeimo birui duere iacadimaci.

<sup>17</sup> Mona enirue diga nia ia, nana Jusiñamui llogacinuai suicana jaite.

*Jesús ñma ie aina dotaja rafuena llofua rafue*

*(Mt 19.1-12; Mr 10.1-12)*

<sup>18</sup> Jesús llote:

—Naga aina dotadimiedi, jiaññaño ollena, jeacinona jai finode. Dotacaññaño bu oia, jeacinona jai finode.

*Jesúdi ucuberedimie iaímaiaí Lázaro ie rafuena llua rafue*

<sup>19</sup> Jesús jiaie rafuena llote:

—Cue llogacinona omoí raise uññollena, bie rafue lloiticue. Ucuberedimie ite. Eo mare ñiroina jítade. Eo caimare raise guicabite.

<sup>20</sup> Naimie nasemo Lázaro raillamie jamai biide. Naimiedi dueredimie. Efonaitimie.

<sup>21</sup> Naimiedi ucuberedimie guiga allamona guiacade; ia guiñede. Jiconiaídi naimie efociaína mecabite.

<sup>22</sup> Ie mei naimie fiodaite. Jusiñamui comínina naimie illamona, Jusiñamui jaienisaí naimie joreño monamo Abraham micorí joreño illanomo uitimaci. Ucuberedimie jiaí fiodaite. Comini naimiena raítimaci.

<sup>23</sup> Jusiñamui comínina naimie ñenamona, naimie joreño iraimo jaide. Nainomo naimie duere sefuillamona, Abraham joreñoña aarena ciode. Naimie ecimo Lázaro micorí ie joreñoña jiaí ciode.

<sup>24</sup> Abraham joreñoña uaidote: “Cue moo Abraham, cuena duenai. Lázaron a cue dine oreta, ie onocai diga, jinuina cue fuemo llocatallsa, cue fuedo manare jaillena. Bie iraimona jai eo llegí cacadicue”.

<sup>25</sup> Abraham joreñodi uai ote: “Moo, o illa ñinori naga ra omo ite. Marena itio; iadedi Lázaro duere sefuide. Birui naimie marena ite; iadedi o duere sefuidio.

<sup>26</sup> O dine jainidicai. O enefebuetemo itio. Cai enefebuetemo jiaí iticai. Caimona omoí dine bu jaiñellena, omoímona cai ñine bu biñellena, iese ite”.

<sup>27</sup> Ucuberedimie micorí joreño ñinena uai ote: “Cue moo jofomo Lázaron a oreta.

<sup>28</sup> Cuemo cinco amatiaí ite. Naimacimo riire llollena, bie iraimo naimaci riñellena, naimiena oreta”.

<sup>29</sup> Abraham joreñodi uai ote: “Naimacimo Moisés micorí cuegafuiaí ite. Jusiñamui facaina jaie lloraini micoriai cuegafuiaí jiaí ite. Iemo naimaci comeciaína facallesa”.

<sup>30</sup> Uai ote: “Iese lloñeno. Iemo comeciaína facañeitimaci; iadedi fiodaillamona jilluanona, naimaci ñine bu jaia, naimiena ñnoítimaci. Naimaci comeciaí iuai meidoítimaci”.

<sup>31</sup> Abraham joreñodi uai ote: “Moisés micorí cuegafuiaí, Jusiñamui facaina jaie lloraini micoriai cuegafuiaí naimaci ñnoñenia, fiodaillamona bu jilloia, naimiena jiaí ñnoñeitimaci” —Jesús llote.

## 17

*Jesúdi jeacinona ñnoñenana llofua raufe*

*(Mt 18.6-7, 21-22; Mr 9.42)*

<sup>1</sup> Ie llofueoicaiganomo Jesús llote:

—Diga ramo omoí faicana uitinomo riitomoí. Omoí ramo faitimie duere sefuite. Jusiñamui omoí ramo faitimiena duere finoite.

<sup>2</sup> Como creyentena jaidimiena ramo bu faia, naimie cimaiomo aillue nofici maianona, joraimo corobaillena naimiena dotacadena, mare.

<sup>3</sup> Como creyentena jaidimiena ramo omoí fañellena, abina omoí rairui. O ecimo itimie ona jeare finoia, naimiemo iena llono. Ie comecina meidoiacania, naimie jearede finoca rafuena feita.

<sup>4</sup> Nagarui diga icaiño ona jeare naimie finoia, naga icaiño o diga naimie marena dane ñaiacania, naie rafuena feita.

*Jesúdi naimiena ñnuana llua rafue*

<sup>5</sup> Ie doce llofueoicaigano Jesúsno llote:

—Ona ñnotica; ia caina o uaina eo ñnota.

<sup>6</sup> Uai ote:

—Jusiñamuina eo janore ñnotomoidena, bene ite amenamo omoi lloia: “Benomona jai. Joraimo sico”, naie amena omoi uaina ñnote.

*Jesúdi ie facaina llofueoicaigano maijia llua rafue*

<sup>7</sup> Ie llofueoicaiganomo Jesús llote:

—Bie rafuemona omoi fueollena, iena lloiticue. Illimo ie mullaima maijiamona, ie toiniã sedajamona jofomo abido naimie ria, ie patrón naimiemo lloñeite: “Mai nano guisaibi”;

<sup>8</sup> Iadedi naimiemo lloite: “Cueiena guillena nano fino. Cuenã eca. Ie mei guitio”.

<sup>9</sup> Naie mullaima ocuica rana finua muidona, mullaimana naimie illa jira, ie mullaimamo patródi iobillacinona fecañeite.

<sup>10</sup> Ie isoide. Nana cue lluna omoi finodomoina, dani omoi maijiadi, cue cominina omoi illa jira, cuemona iobillacinona feiñoñeitomoi.

*Jesúdi diez efonaitinona jillotaja rafue*

<sup>11</sup> Jerusalémo ie llofueoicaigano diga Jesús jaidemo, naimie nabeimo Samaria enirue ite. Naimie jarifebeimo Galilea enirue ite.

<sup>12</sup> Nairai dine naimie riacania, diez efonaitinodi naimiemo dafaifidimaci. Eneno oni naidaidimaci.

<sup>13</sup> Naimiena ado uaidotimaci:

—Jesús, Maestro, caina duenai. Caina ja jillota.

<sup>14</sup> Naimacina Jesús ciuanona, naimacimo llote:

—Mai jai. Jusiñamui diga ñairainimo omoi abina acata. —Jaidimacimo, jillodimaci.

<sup>15</sup> Ie abi jilluana ciuano, naimacimona damie Jesús dine abido bite. Jusiñamuimo iobillacinona ado fecade.

<sup>16</sup> Naimiemo iobillacinona jiai fecallena, Jesús uicomo ana bitadate. Naimiedi judiñedimie. Samaritano imie.

<sup>17</sup> Jesús llote:

—Diez digamiedomoi. Omoina jai jillotaticue. ¿Ñinomo jainodi nueve digamie itimaci?

<sup>18</sup> ¿Niese Jusiñamuimo iobillacinona fecaacañedimaci? Dama bimie fecade. Naimiedi judio imieñedimie.

<sup>19</sup> Jesús naimiemo llote:

—A naidada. Mai jai. Cuenã o ñnua jira, jai jillodio.

*Jesúdi Jusiñamui ie cominina sedajana llofua rafue*

*(Mt 24.23-28, 36-41)*

<sup>20</sup> Naie facaise fariseuai comini Jesúmo jicanotimaci:

—¿Ñiruido Jusiñamui caina bene sedaite?

Jesús uai ote:

—Ñiño rafuena omoi ciuamona, Jusiñamui omoina sedallena uifñoñeitomoi.

<sup>21</sup> Buena ciuamona raifñoñeitomoi: “Jai, Jusiñamui bene caina jai sedade”. “Jai, batine caina jai sedade”; iadedi omoi motomo itinomona Jusiñamui díbeimo damierie illamona, Jusiñamui omoi motomo jai illana uifñoñeitomoi.

<sup>22</sup> Ie llofueoicaiganomo llote:

—Jairuido duere sefuillamona cue diga janore jisa iacanitomoi; iadedi iese nia ifñoñeitomoi.

<sup>23</sup> Damierie raia: “Ero, batine Cristo jai bairedé” nainomo jaiñeno. Naimaci raia: “Ero, bene Cristo jai bairedé” iena ññoñeno.

<sup>24</sup> Mona borillamona mona jillacidi usere ciode. Ie isoide. Cue abido bia, nana comini iena uifñoñeitomoi.

<sup>25</sup> Birui iese nia suiñeite. Nano duere sefuiticue. Birui ite comini cuena jiai feiñoñeitomoi.

<sup>26</sup> Abido cue billirui iairei ia, Noé micori facaiseconi itino isoi, comini iitimaci. Naimaci duere sefuillemo Noé micori facaise itinodi comeciaina facañedimaci.

<sup>27</sup> Naie facaiseconi nia eo noci deiñenia, Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori. Nia noci deiñenia, Noé micori lloga uaina ññoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue.

<sup>28</sup> Lot micori facaiseconi daje isoidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Rana ibauidimaci. Iena fecauidimaci. Illimo maijiuidimaci. Jofona finuidimaci. Naimaci isoilla isoi icana jaidimaci.

<sup>29</sup> Dani iemo comeciaina facadimaci. Jusiñamui mo comeciaina facañedimaci. Iese icana jaidimaci, Sodomamona Lot micori jalla dinori. Nairui monamona boode azufre ebena billanona, nana Sodomamo itino jobaide. Ebena nana faifidimaci.

<sup>30</sup> Te isoide. Abido cue billirui mo comini iitimaci. Cue bia, ebena biiticue.

<sup>31</sup> Naie facaise bu ie jofu emodomo ia, ie raruiaina ollena, naimie diga uillena, bu fo jaiñena. Illimo bu ia, ie raruiaina ollena, ie jofomo bu jaiñena.

<sup>32</sup> Iemona fueollena, Lot ai micori rafuemo comecina faca. Naiñaiño ie raruiaimo dañ comecina facajamona, na ie abi diga faifide.

<sup>33</sup> Dama ie raruiaimo ie comecina bu facaia, ja muidomo faifite. Cue diga jaca iñeite; iadedi cue jitaillacinona finuamo ie comecina bu facaia, monamo cue diga jaca iite.

<sup>34</sup> Cue bille facaise menamie daje cuartomo iniano iitaiamaia. Damie jaite. Jaiimie fiebite.

<sup>35</sup> Mena riño danomo doberillanona iitaiñuui. Dañaiño jaite. Jaiñaiño fiebite.

<sup>36</sup> Menamie illimo maijiano iitaiamaia. Damie jaite. Jaiimie fiebite.

<sup>37</sup> Ie llofueoicaigano jicanotimaci:

—¿Nine jaitimaci?

Uai ote:

—Urujaisai rifaide ramo ofillana uiñua isoi, nana cuena inotino cue abido billena uiñoitimaci. Cuemo duillamona, cue diga jaitimaci.

## 18

### *Jesúdi feciñona llua rafue*

<sup>1</sup> Ie llofueoicaiganomo Jesús rafuena dane llote:

—Jusiñamui mo jicabi, omoi jicaca rafue omoi feiñolle dinori. Raire feiñoñenia, abina jafueño.

<sup>2</sup> Iena omoi raise uiñollena, bie rafuena lloiticue. Jiaie nairaimo juez ite. Jusiñamuina jaciruiñede. Cominina jiai jaciruiñede.

<sup>3</sup> Nainomo naimie dine daje feciño jai-jaicabillanona, raite: “Cuenta duere finodimemona cuena cano”.

<sup>4</sup> Naimie dinena raite: “Dama iesede. Ona canoñeticue”. Ie mei ie comecina facade: “Jusiñamuina jaciruiñedicue. Cominina jiai isiruiñedicue;

<sup>5</sup> ia naiñaiño cuemo sefuire bi-bina jira, naiñaiño canoñeticue, cue rairaiñellena”.

<sup>6</sup> Jesús llote:

—Marañede juez llua cacadomoi. Ja muidomo naiñaiño canode.

<sup>7</sup> Ero, biemo omoi comeciaina faca. Jusiñamui naie juez isoñede. Nagarui Jusiñamui mo naimaci jicaia, ¿niese naimie ie fetocanona canoñeite? Jaca canoite.

<sup>8</sup> Raire fairuanona, naimacina raire canoite; iadedi abido cue bia, ¿niga cuena inotino iitimaci? Nibai ailluena cuena inoñeticue.

### *Jesúdi Jusiñamui mo menamie jia llua rafue*

<sup>9</sup> “Mareuidicai” dajerie railla jira, “Jiaie comini baifemo faiticai” dajerie railla jira naimacimo Jesús bie rafuena llote:

<sup>10</sup> —Jusiñamui jofomo, nainomo jillena, menamie jaidiamaia. Damie fariseo imie. Jaiimie gobierno ucubena oraima.

<sup>11</sup> Fariseo imie naidadacaida, dama anado jide: “Jusiñamui, jiaie comini isoñedicue. Fuidimaci. Marañedicue. Naimaci aiñede riño diga itimaci. Cue ecimo ite ucubena oraima isoi iñedicue.

<sup>12</sup> Naga semana menarui guicabiñedicue, ona raise cue sedajanona. Cue ramona omo fecacabidicue. Macaibaite” jide.

<sup>13</sup> Gobierno ucubena oraima eneno naidadacaida, jide. Monamo eruaiñede; iadedi jamai bue isoillanona, jogobena farode. Raite: “Jusiñamui, jeacinona finorañedicue. Cuenta duenai. Macaibaite” jide.

<sup>14</sup> Jusiñamuidi jaiimie afemo iacadimena jaiimie afemo iñenana itataite. Jusiñamuidi jaiimie afemo iacaiñedimena jaiimie afemo itataite. Ie jira gobierno ucubena oraima ie jofomo Jusiñamui mo jai marebicallanona jaide; ia fariseo imie iese jaiñede.

### *Jesúdi naimie dine uruiai billana jitailla rafue*

(Mt 19.13-15; Mr 10.13-16)

<sup>15</sup> Naie facaise Jesús dine comini naimaci eisaiaina atisite. Ie onollí naimacimo naimie joniana jitaidimaci. “Naimacina raise cano” ie Moomo lollena jitaidimaci. Iena ciuanona, ie llofueoicaigano cominina Jesús dine billana rairuidimaci;

<sup>16</sup> iadedi Jesúdi eisaiaina uaiduano raite:



–Uruiaí cue ðine billesa. Naimacina rairuifieno. Cuena bie isoi ðnotinodi Jusiñamui cominidimaci.

<sup>17</sup> Bie uruiaí abina iedoñeðimaci. Einamacimona jamai bue isoidimaci. Naimaci isoi bu iñenia, Jusiñamui cominina jaiñeite. Jusiñamui naimiena sedallena, Jusiñamui cominina naimie jaiñeite.

*Ucuberedimie Jesús diga ñaia rafue*

*(Mt 19.16-30; Mr 10.17-31)*

<sup>18</sup> Ie facaise illacomimona damie Jesúmo jicanote:

–Maestro, odi mareuidimiedio. Jusiñamui diga ico monamo cue jaca illena, ¿nie isoide rana finoiticue?

<sup>19</sup> Jesús uai ote:

–¿Bue ñellena cuena: “Mareuidimiedio” raitio? Dama damie mareuidimiena. Naimiedi Jusiñamui. Naimiemo jicano.

<sup>20</sup> Moisés micori llogacinuaina ðnocana jai. Jai e cuete: “O aiñede riño diga iñeno. Comena meineño. Rana fiñeno. Jiaimiena o llogidoia, tainona lloño. O moo uaina ðno. O ei uaina ðno”.

<sup>21</sup> Uai ote:

–Cue uruena illa facaisemona nana bie llogacinuaina ðnoticue.

<sup>22</sup> Iena cacajano, Jesús raite:

–Daje rana nia finoedio. O raise marebicaiaçania, omo ite raruiaina feca. Naie ucubena dueredinomo feca. Cuena o ðnuamona, monamo ico jaca iitio. Cue llofueoicaiganona o illena, mai cue diga bi.

<sup>23</sup> Jesús llua naimie cacajano, sunaicaide. Naimiemo eo ailluena ra illa jira, iena fecaacaiñede.

<sup>24</sup> Naimiemo eruaillano, Jesús raite:

–Ucuberedinodi Jusiñamui cominina jaillena eo sefuiruite.

<sup>25</sup> Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui cominina jiai raise jainide.

<sup>26</sup> Jesús llua naimie cacajano jicanote:

–¿Iemona buca jillobiti?

<sup>27</sup> Jesús uai ote:

–Nana comini dani jillobinidimaci; iadedi Jusiñamuidi naimacina jillobitarede.

<sup>28</sup> Pedro raite:

–Ero, o llua isoi cai jofuena fainonocaída, o diga jaisoidicai.

<sup>29</sup> Uai ote:

–Uanaicinona lloticue: Jusiñamui cominina naimie jaillamona, ie jofona bu fainonocaía, ie aina bu fainonocaía, ie amatiaina bu fainonocaía, ie moonu bu fainonocaía, ie eina bu fainonocaía, ie uruiaina bu fainonocaía,

<sup>30</sup> Jusiñamuimona ailluena ibana birui feiñoite. Monamo ico jiai jaca iite.

*Jesúdi ie fodaillena dane llua rafue*

*(Mt 20.17-19; Mr 10.32-34)*

<sup>31</sup> Ie doce llofueoicaigano eneno uillanona, dani naimacimo lloete:

–Ero, Jerusalémo jai jaidicai. Monamona billanona, ðmana jaidicue. Jusiñamui facaina lloraini cuena jai e cuetimaci. Nana naie rafue ja suite.

<sup>32</sup> Judíuaiñeðinomo judíuai illacomini cuena fecaitimaci. Cueri jifanoitimaci. Cuena jeare finoitimaci. Cuena tuallaitimaci.

<sup>33</sup> Cuena faitimaci. Cuena meineitimaci; ia darui amani illanona, cue fodaillamona jilloiticue.

<sup>34</sup> Naimie llua naimie raise cacaiñeðimaci. Naimacina iena Jesús nia raise llofueña jira, iena raise uiñoñeðimaci.

*Jesúdi uisidimiena jillotaja rafue*

*(Mt 20.29-34; Mr 10.46-52)*

<sup>35</sup> Jericó railla nairaimo ie llofueoicaigano diga Jesús riacademo, uisidimie naiso fuemo raillana ciode. Ucubena jamai jica-jicade.

<sup>36</sup> Ailluena comini Jesús diga jaillana naimie cacajano, naie cominimo nie isoide rafue illana jicanote.

<sup>37</sup> Uai otimaci:

–Nazaret ie Jesús como bene bite.

<sup>38</sup> Ie jira naimie cuiroide:

–David micori jítana o illamona, cuena duenai. Cuena cano.

<sup>39</sup> Uicodo jaidino naimiena lletade, naimiena lliicaitallena; iadedi naimie eo cuirioide:

—David micori Jitona o illamona, cuena duenai.

<sup>40</sup> Naimiena cacajano, Jesús naidadate.

—Cue dine naimiena ati —lote. Naimiena atianona, naimiemo Jesús jicanote:

<sup>41</sup> —¿Niese ona cue nibaiana jitaidio?

Uai ote:

—Maestro, cioacadicue.

<sup>42</sup> Jesús raite:

—Mai eroda. Cuena o inua jira, jai jillodio.

<sup>43</sup> Ieconí naimie uisidi ciode. Jusiñamuimo iobillacinona fecajano, Jesús diga jaidino diga naimie jaide. Naimie jilluana ciuamona, nana comini Jusiñamuimo iobillacinona jiai fecadimaci.

## 19

*Jesús Zaqueo diga illa rafue*

<sup>1</sup> Jericómo Jesús rillanona, nainomo macaritemo,

<sup>2</sup> naie facaise nainomo Zaqueo raillamie ite. Gobierno ucubena nanoca oraíma. Naimiedi eo ucuberede.

<sup>3</sup> Jesús bai macaritemo, Zaqueo naimiena cioacade; iadedi ailluena comini illamona, Zaqueo ianorina jira, Jesúna cionide.

<sup>4</sup> Ie jira uicodo aiscana jaide, amenamo a jaillena, naimiena cioillena.

<sup>5</sup> Naimie dine Jesús rillano, Zaqueomo a erodate. Naimiena uaidote:

—Zaqueo, raíre ana bi. O diga danomo illena, o jofó dine jaiticue.

<sup>6</sup> Ie jira raíre ana bite. Ie jofomo Jesúna iocire feiñote.

<sup>7</sup> Iena jiaie comini ciuanona, Jesús joreñona jeare ñaianona raitimaci:

—Mariñedinona finoraíma jofomo naimie jaide.

<sup>8</sup> Jesúna naimie feiñua mei, Zaqueo Jesús ecímo naidaita, naimiemo llote:

—Nama, atuedo cue raruaiña dueredinomo biruimona fecaiticue. Bumona navui cue fiíia, cuatro diga ra abido iiticue.

<sup>9</sup> Jesús uai ote:

—Iese o lua jira, o comini diga Jusiñamuina jai o inuana uifnoticai. —Jamai bitinomo llote:

—Zaqueodi Abraham micori jito; ia Jusiñamuina navui inoñede.

<sup>10</sup> Naimie isoidino jillobitallena, biticue. Monamona billanona, imana jaie jaidicue. Jusiñamuina inoñedinona jenuaibidicue, naimacina jillobitallena.

*Illaíma ie mullaíaimo ucubena fecaja rafue*

<sup>11</sup> Zaqueo jofomo itino Jesús lloufiana cacajano, comecina facadimaci: “Jerusalén ianori ite. Nainomo Jesús rilla mei, illaíma isoi nainomo Jusiñamui ie cominina raíre sedaite”.

<sup>12</sup> Iena naimaci raise uifñollena, Jesús bie rafue naimacimo llote:

—Illaíma jito ie nanoca illaíma dine jiaie nairaímo jaide. Ie cominina sedallena, nanoca illaimamona ie uaina feiñoiacade. Iemei abido biacade.

<sup>13</sup> Nia naimie jaiñenia, diez diga ie mullaíaina uaidote. Nagamierie daberie ucubena fecade. Naimacimo llote: “Bie ucube diga jiaie ucube ocana omoi jai”. Ie mei oni jaide.

<sup>14</sup> Ie comini naimiena enoidimaci. Jiaínona nanoca illaíma dine oretajano, raitimaci: “Bimie caina sedajana jitaiñedicai”; ia nanoca illaíma dinena naimaci lluana jaca cacaiñede. Ie jira naie nanoca illaíma naie illaíma jitomo ie uaina ite.

<sup>15</sup> Ie uaina feiñua mei, abido ie eniruemo jaide. Rilla mei, ie mullaíaina uaidote. Nie diese ucubena ocana naimaci jaillana uifñoiacade. Ie jira naimacina uaidote.

<sup>16</sup> Nano bitimie raite: “Nama, o cuemo dabe fecadio. Dabedemona jai cuemo ite diez digabe”.

<sup>17</sup> Naie illaíma naimiemo llote: “Eo marena maijidio. Mare mullaímadio. Janore ra raise o sedaja jira, ona diez nairaíaina sedataitcue”.

<sup>18</sup> Ie mei jiaie mullaíma billanona, raite: “Nama, o cuemo fecaca dabedemona jai cuemo ite cinco digabe”.

<sup>19</sup> Illaíma llote: “Ona cinco nairaíaina sedataitcue”.

<sup>20</sup> Ie mei jiaie mullaíma bite. Raite: “Nama, jadi, o cuemo iga o ucube. Iniroimo tilliano, iena eenoticue.

<sup>21</sup> Ona cue jaciruillano, odi eo riimiena jira, iena jamai eenoticue. Jiaie cominimona ie rana bairocabidio. O maijiñena ramona ocabitio”.

<sup>22</sup> Illaíma dinena raite: “Eo marañede mullaímadio. Cuena o lua isoi, ona duere finoiticue. Cue riimienana uifnotio. Jiaie comini ie rana cue bairuana uifnotio. Cue maijiñena motomo ra cue uana uifnotio; ia buena maijiñedio.”

<sup>23</sup> ¿Bue ñellena bancomo cue ucube joneñedio? Bancomo itena, jiaie ucubena ocana jaide. Ie mei abido cue bia, omo cue fecaja ucube baifemo feiñoticue”.

<sup>24</sup> Nainomo itinomo llote: “Naie ucube naimiemona bairuano, diez digabe itimiemo feca”.

<sup>25</sup> Uai otimaci: “Naimiemo ailluena ucube jai ite. ¿Bue ñellena dane jiaie fecaitio?”

<sup>26</sup> Illaima ñena uai ote: “Ailluena raredimie jiaie rana feiñoite; iadedi janore raredimie ie rana faifite.

<sup>27</sup> Cuen a enoidinona bene ati. Naimacina cue sedajana jitañedimaci. Naimacina meine”.

Jesús nia llote:

—Ie isoide. Iese omoimo suiñellana, Jusiñamui ie comini sedalliruina omo: uifñoena jira, cue jitaillacino finocana jai.

*Jesús Jerusalémo jailla rafue*

*(Mt 21.1-11; Mr 11.1-11; Jn 12.12-19)*

<sup>28</sup> Naie rafuena llofuia mei, Jerusalén ñene comini uicodo ie llofueoicaigano diga Jesús jaide.

<sup>29</sup> Jerusalén iaireicaidemo, mena nairaimo riacade. Betfagemo railla nairaimo ride. Betania nainomo jiaie ite. Olivos railla anedumo naga nairai iaiaiaie ite. Ie llofueoicaiganomona mena orede.

<sup>30</sup> Raite:

—Bie nairai illa uicomo mai omico jai. Nainomo cuinaca burritona baitomico. Naie burrito emodomo nia buna jaiñena. Iena suiñuano bene ati.

<sup>31</sup> Omicomo: “¿Bue ñellena iena suiñodomico?” bu jicanoia, llono: “Coco Nama iena jitaide”.

<sup>32</sup> Naimie llua isoi jaidiaiaiaia. Naimie llua isoi burritona baitiaiaiaia.

<sup>33</sup> Ie facaise ie nania iaiaiaimo jicanote:

—¿Bue ñellena cai burritona suiñodomico?

<sup>34</sup> Uai otiaiaiaia:

—Coco Nama iena jitaide.

<sup>35</sup> Ie mei Jesúmo iena atidiaiaiaia. Burrito emodomo ñiroina jobianona, ie emodomo Jesúdi rainadate.

<sup>36</sup> Jesús iese jaidemo, naimiema iobitallena, illaia isoi naimie jaillena, comini imaci ñiroi diga, naiso motomo jobedimaci.

<sup>37</sup> Jerusalémo joide naiso ite nafai muidomo naimie rillanona, naie ituemo ana jaillanona, nana Jesús diga jaidino caimare itimaci. Nana Jesús siño finoca rafuena naimaci jai ciua jira, iena naimaci uibifñuamona, Jusiñamuimo iobillacinona ado eo fecadimaci.

<sup>38</sup> Raitimaci:

—¡Cai Illaia billa! ¡Jusiñamui mamecido bitimiemo cai iobicabillasa! O muidona Jusiñamuidi comini diga uri ite. ¡O finoca rafue muidona Jusiñamuimo iobicabillasa!

<sup>39</sup> Naie cominimona dajerie fariseuai raitimaci:

—Maestro, o diga jaidinona lliicaillena, naimacina lleta.

<sup>40</sup> Uai ote:

—Naimaci lliicaia, biso fuemo ite noficidi cuena marena ñaite.

<sup>41</sup> Jerusalémo Jesús iaie ria, iena ciuano, eede.

<sup>42</sup> Raite:

—Jerusalén itino, Jusiñamui diga omo: uri illena jai biticue. Omoina naimie cominina itataiacadicue; iadedi iena jitañedomo. Iena jitañedomoidena, ico duere sefuñeitomo.

<sup>43</sup> Jiairuido omo: bacauai jobaimena finuanona, omoina cirinoitimaci. Omo: ecido llaitimaci.

<sup>44</sup> Omoina meineitimaci. Omo: uruina meineitimaci. Omo: illanona judaitimaci. Jusiñamui omo: motomo birui illana omo: uifñoena jira, iese omoimo suite.

*Jesúdi Jusiñamui jofomona damierena dotaja rafue*

*(Mt 21.12-17; Mr 11.15-19; Jn 2.13-22)*

<sup>45</sup> Jerusalémo Jesús rilla mei, Jusiñamui jofomo jaide. Jusiñamuimo ofomaiaia fecallena, naimiemo toica laudaiaia fecallena, nainomo comini jaisoidimaci. Naie cominina ibatajanona, ofomaiaia, toica laudaiaia diga, damierie fecaudimaci. Iena ciuanona, naimacina jino orede.

<sup>46</sup> Raite:

—Ie facaina lloraima micori Jusiñamui llogacino jaie cuega: “Cue jofo ite nainomo cuemo comini jaillena” cuega. Ero, ailluena omo: ibataja jira, naimie jofona firiruidino jofona omo: finoca.

<sup>47</sup> Jusiñamui jofomo nagarui Jesús llofue. Judúuai illaicominidi Jesúna meineiacadimaci;

48 iadedi niese nibaiñedimaci, nana comini naimie llofuiana eo jitailla jira.

## 20

*Jesúdi ie siño uaina llua rafue*  
(Mt 21.23-27; Mr 11.27-33)

1 Jusiñamui jofomo Jesúdi cominina llofujete. Jusiñamui rafuena llofujete. Judúuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraíni. Naimacidi einamaci. Diese billanona,

2 jicanotimaci:

—¿Nie isoide uaido o finoca rafuena finocabidio? ¿Bu omo iga uai diga o finoca rafuena finocabidio?

3 Jesús dinena uai ote:

—Omoimo nano jicanoitucue.

4 Juan Bautista micoridi cominina navui bautizade. ¿Bu naimie micorina cominina bautizatate? ¿Jusiñamui? ¿Comini? Cuemo llono.

5 Dani coniniri iena siaduanona raitimaci:

—“Jusiñamui” cai fairioia, caimo jicanoite: “¿Bue ñellena naimie micorina ñnoñedomoi? ¿Bue ñellena naimie micori llua isoi bautizañedomoi?”

6 “Comini” cai fairioia, bene itino caina meineitimaci, Juan micoridi Jusiñamui facaina lloraíma naimaci railla jira.

7 Ie jira Jesús uai otimaci:

—Uiñoñedicaí.

8 Jesús dinena raite:

—Ie muidona cuemo nie isoide uai illana omoimo lloñeiticue.

*Jesúdi marañede majiraini rafuena llua rafue*  
(Mt 21.33-44; Mr 12.1-11)

9 Nainomo itinomo Jesús llote:

—Jiaie rafue omoimo lloiticue. Iemo cacarei. Daje patrón uvas railla riaraiaina rite. Ie mei ibatajanona jiaínomo fecade, iena sedallena. Ie mei jiaie eniruemo are illena jaide.

10 Uvas jai einailla facaise riaraiaina sedaraini dine daje mullaímana orede, naimie facaise iedinona naimie feiñollena; iadedi naie sedaraini naie mullaímana fatimaci. Uvas naimiemo fecañeno abido oredimaci.

11 Ie mei patrón jiaie mullaímana orede. Naimiema fatimaci. Jeare finodimaci. Uvas naimiemo fecañeno abido oredimaci.

12 Naie patrón jiaimiena orede. Naimiema eo bofedaitajanona jino dotadimaci.

13 Iemei patrón comecina facade: “¿Niese nibaiñitucue? Cue isiruiga jítóna oretaitucue. Naimiema nibai jaciruitimaci. Naimie uaina ñnoitimaci”.

14 Riaraiaina sedaraini naimiema cuanona, coniniri ñaitimaci: “Bimiemo bie illi fiebiite, naimie moo fiodailla mei. Naimiema cai meinelli, bie illi caimo fiebillesa” ñaitimaci.

15 Naimiema jino dotajanona, naimiema meinetimaci. Iena fidia mei, ¿niese naie patrón nibaiite?

16 Naimie biite, naie sedarainina meinellena. Ie mei jiaínona ie illina sedataite.

Naie rafuena cacadino raitimaci:

—Bie isoide rafue suillana jitañedicaí.

17 Naimacimo Jesús eruailano, llote:

—Naie illi sedaraini isidomoi. Jusiñamui facaina lloraíma micori omoína jaie cuete. Ie cuezafuena raise facañedomoi. Naimie micori cueda:

Jofo finoraini jitañena nofici nana naie jofomo ite nofici baifemo jai uaide.

cueda. Jusiñamui cominina damierie jaillana naimie micori cuete. Jusiñamui oretagamiena damierie jitañenamona, naimie cominina jaiñeitimaci; iadedi Jusiñamui oretagamiena ailuena ñnuamona, naimie cominina jaitimaci. Ero, naimie micori caina cuete. Naie jofona finoraini isidomoi. Naie nofici isoidicue. Cue rafuena omoi jitañena jira, naimie cominina jaiñeitomoi.

18 Naie noficina nia ñaiticue. Noficimo bu eicaitaia, bofedaite; ia naie nofici bumo ana uai, naimiema saitaite. Ie isoide. Cue llua omoi jamaia, duere sefuitomoi. Iena omoi ñnoñenia, ja muidomo faifitomoi —llote.

*Jesúmo gobiernomo ucubena fecajana jicanua rafue*  
(Mt 21.45-46; 22.14-22; Mr 12.12-17)

19 Jesús como lloga rafuedo naimacina ñaiana uiñotimaci. Ie jira naie facaiseconi judúuai illaicomini naimiema gaitaacadimaci; iadedi cominina jaciruitimaci.

<sup>20</sup> Ie jira naimiēna uifnododimaci. Mare rafuedo abi caitadinona oredimaci. Naimie raise uai ofēnia, naimiēna duere finollena, naimiēna facaciacadimaci. Gobernadoro naimiēna llogidoiacadimaci.

<sup>21</sup> Jesús mo llotimaci:

—Maestro, uanaicinona marena llofuecabitio. Nana cominina dauaido llofuecabitio. Jusiñamui rafuedo cai marena jaillana raise llofuetio.

<sup>22</sup> Omo rafuena jicanoiacadica. Dama Jusiñamuiena sedadica; iadedi romanos railla nairai anamo birui cai illa jira, ¿naimaci illaima César mo ucubena cai fecajana rairuidio? Caimo llono —llotimaci.

<sup>23</sup> Naimiēna naimaci jifuiāna uifñuāna, Jesús dinena uai ote:

<sup>24</sup> —Ucube cuemo acata. ¿Bu ie joreño nainomo ite? ¿Bumo jainaiāide bie cuega radi?

Uai otimaci:

—César.

<sup>25</sup> Jesús raite:

—César iēna itedi, César mo ille. Jusiñamui iēna itedi, Jusiñamuimo ille —raite.

<sup>26</sup> Jesúsdi uai raise ua jira naimie llumona jeare rafuena uifñofedimaci, naimiēna llogidollena. Naimie lluari rajicaillamona, llicaidimaci.

*Jesús dīne saduceuai railla comīni billa rafue*

*(Mt 22.23-33; Mr 12.18-27)*

<sup>27</sup> Naie facaise dajerie saduceuai railla comini naimie dīne bitimaci. “Fiodaillamona jaca buna jilloñeite” raisodimaci.

<sup>28</sup> Jesús mo llotimaci:

—Maestro, cai facaina Moisés micori jaie cuega: “Ima fiodailla meinononi, naimie urue iñenia, ie ama naie feciño olle. Naimiedi uruiāna ie ama facaina comuitaite” cuega.

<sup>29</sup> Bie rafuena uifñoiacadica. Siete amatiai ite. Nano doforamie ie āina ote. Naimie nia uruiānide fiodailla.

<sup>30-31</sup> Ie emodo imie ie ama feciñona ote. Naimie uruiānide jiai fiodailla. Naie siete digamiedemona iese sefuide.

<sup>32</sup> Ja muidomo naie riño jiai fiodaite.

<sup>33</sup> Fiodaillamona, ico naimaci jilloiadedi, ¿bu naie riño iēnite? Naiñaiño siete digamiēna inirede —llotimaci.

<sup>34</sup> Jesús uai ote:

—Birui āina otomoi. Inina otomoi;

<sup>35</sup> iadedi fiodaillamona, Jusiñamui diga jaca itino jillua mei, ainitimaci. Ininitimaci;

<sup>36</sup> ia Jusiñamui jaiēnisi i soi illanona, dane fiodañeitimaci.

<sup>37</sup> Fiodaitino jilluana omoimo lloiticue. Moisés micori jofue iñenanomo illa facaise, amena boode motodo Moisés micorimo Jusiñamui ñaiā facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote.

<sup>38</sup> Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuiena jira, naimaci joreñuai naimie dīne itimaci. Ico naimaci abiaina jiai jillotaite. Naimiemo naimaci duillamona, naimaci abiai diga jilluanona, naimie diga jaca iitimaci —llote.

<sup>39</sup> Iēna cacajano, Moisés micori llogacinuāna llofuerainimona dajerie raite:

—Maestro, raise llotio.

<sup>40</sup> Ie facaise naimiemo nie isoide rafuena dane jicanuana jaciruitimaci.

*Jesús dīnena fariseuai comīnimo jīcanua rafue*

*(Mt 22.41-46; Mr 12.35-37)*

<sup>41</sup> Iemei naimie ecimo itinomo Jesús jicanote:

—¿Niese Moisés micori llogacinona llofueraini Cristona raitimaci? ¿Niese naimiedi David micori jitona raitimaci?

<sup>42</sup> Salmos railla cuegafuiaimo David micori jaie cuega:

Jusiñamuidi cue Namamo llote: “Illaimana o illamona, cue nabeimo ana rai.

<sup>43</sup> Ona inoñedino o anamo itataiticue”.

<sup>44</sup> “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi dama David micori jitoñede; ia jiai ie Nama.

*Jesúdi judiūai illaicomīnina ñaiā rafue*

*(Mt 23.1-36; Mr 12.38-40; Lc 11.37-54)*

<sup>45</sup> Nana comini cacajano, ie llofueganomo Jesús llote:

<sup>46</sup> —Moisés micori llogacinuaina llofueraimona abina rairui. Illaicomini naimaci itimaciden, naimacina comini cioillena, eo mare iniroina jitaacacabidimaci. Nine naimaci macaria, naimaci jamai bue isoifedinona itimaciden, comini naimacina uaiduana gaidimaci. Comini naimaciri acarillena, ofiracomo uicomo raiacadimaci. Rafue ia, naimaci jamai bue isoifedinona comecina facajanona, rafue nama ecimo raiacadimaci.

<sup>47</sup> Feciñuaimona rana ocabillanona, naiñaiñuaina duere finodimaci. Naimiena eo sedadimaciden, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

## 21

*Jesúdi Jusiñamui jofomo duerede feciño ucube fecajana ciua rafue*

*(Mr 12.41-44)*

<sup>1</sup> Jusiñamui jofomo Jesús nia ia, a erodatemo, nainomo ite eenoranomo ucuberedino ucubena joniana ciode.

<sup>2</sup> Eo duerede feciño menaruñu joniana jiaie ciode.

<sup>3</sup> Ie llofueoicaiganomo Jesús llote:

—Bie eo duerede feciño nana ucuberedino jonia baifemo jonete.

<sup>4</sup> Naimacimo ailluena ite; iadedi naie ucubemona janore jonetimaci. Naiñaiño eo duerede; iadedi nana naiñaiño ite ucubena jai jonete. Janore jonete; ia Jusiñamuimona naiñaiñodi jiaie baifemo jonete.

*Jesúdi Jerusalémo ite Jusiñamui jofu judaiana llua rafue*

*(Mt 24.1-28; Mr 13.1-23)*

<sup>5</sup> Naie facaise Jesús llofueoicaiganomona dajerie Jusiñamui jofona eruailanona, raite:

—Mare nofici diga finoca. Eo mare ra nainomo jiaie ite.

<sup>6</sup> Jesús llote:

—Birui bie rana ciodomoi; iadedi ico jairuido nana bie jofomo ite nofici ai oni judaite.

<sup>7</sup> Jicanotimaci:

—Jusiñamui jofu judaillana omo jicanoiacadica. ¿Niruido iena suite? Nana o lloga rafue suillena, ¿nie isoide rafue nano suite? Tena caimo llono.

<sup>8</sup> Uai ote:

—Omoina bie rafuena bu jifueñellena, omoi abina rairui. Ailluena comini cue mamecido billanona: “Cristodicue” raitimaci. “Cristo jai baireda” raitimaci. Naimaci dibeimo iño.

<sup>9</sup> Jobaimaie illena fidiitomoi; iadedi jaciruiño. Iese suite; iadedi abido nia biñeiticue.

<sup>10</sup> Daje nairai jiaie nairai diga jobairite. Daje gobierno jiaie gobierno diga jobairite.

<sup>11</sup> Eo aillena fuisañuaie suite. Diga illanomo cominidi aime guitimaci. Duicuai eo iite. Monamo comini diga jacireda rana cioitimaci.

<sup>12</sup> Naie isoide rafue nia suiñenia, cuena inoñedino omoina llogidoitimaci. Omoina gaitatajanona, omoina duere finoitimaci. Naimaci ofiracomo omoina uitimaci. Cárcelmo omoina jonetimaci. Cuemo omoi duilla jira, omoi duere sefuillena, illaicomini dine omoina uitimaci.

<sup>13</sup> Naie facaiseconi cue rafuena naimacimo lloitomoi.

<sup>14</sup> Omoi abina omoi riidoia, omoi llua uicodo jarire iño.

<sup>15</sup> Omoi raise lollena, omoina canoiticue. Uiforacinona omoimo iiticue. Iemona omoi dibeimo iñedino o uaina uaitanitimaci.

<sup>16</sup> Cuena inotomoi; ia ailluena cuena inoñeitimaci. Cuemo omoi duilla jira, omoina enoitimaci. Iemona dajerie mootiaie, dajerie eitiae, dajerie amatiaie, dajerie nabaiñiaie omoina llogidoitimaci. Omoimona dajeriema meineitimaci.

<sup>17</sup> Cue cominina omoi illamona, nana nairai omoina enoitimaci; iadedi cuena faimonocaiñedime ja muidomo monamo jaca iite. Naimiena jillotaiticue.

<sup>18</sup> Omoi ille dinori Jusiñamui omoina raise sedaite.

<sup>19</sup> Duere omoi sefua, cuena faimonocaiñeno jai. Ja muidomo monamo jaca iitomoi.

<sup>20</sup> Jerusalén fuedo ruicabene icaifona soldadaue ia, ie judaie facaiseconi iaie iite.

<sup>21</sup> Naiemona omoi jillobillena, duere omoi sefuiñellena, Judeamo omoi illamona, aneduaie dine aisi. Jerusalémo omoi ia, naiemona oni jino omoi jai. Jino omoi ia, Jerusalémo omoi jaiño.

<sup>22</sup> Ie facaina lloraini micoriaie cuegafuaie suillanona, naie facaiseconi naimiena inoñedinomona Jusiñamui ibana oite.

<sup>23</sup> Naie rafuemona jillobillena, naie facaise urueside riño duere sefuite. Uruena nia jirode riñodi jiaie duere sefuite. Naie facaise comini duere sefuitimaci. Llegi cacaitimaci.

<sup>24</sup> Lloebi diga meinecana uitimaci. Jiaie nairai dine naimacina jaiadoitimaci. Juduaieñedino sedalle facaise dinori, naimaci anamo Jerusalémo itino iitimaci.

*Jesús abido ie bille rafue*

*(Mt 24.29-35, 42-44; Mr 13.24-37)*

<sup>25</sup> Jesús nia llofujete:

—Jitoma nagarui illa isoi iñenamona, fivui nagarui illa isoi iñenamona, ucuai nagarui illa isoi iñenamona, comini jiaie rafue suillena uñoitimaci. Monailai eo baguamona, comini comeciai eo jarire iitimaci.

<sup>26</sup> Nana monamo ite radi jaidisite. Iena raise naimaci uññoñena jira, nie isoide rafue suillena naimaci uññoñena jira, jaciruillamona, comini fiodaitimaci isoi iitimaci.

<sup>27</sup> Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue.

<sup>28</sup> Bie isoide rafue suia, omoina cue jilloitajabillirui iaieiri illa jira, cue billirumo raise ocuiri.

<sup>29</sup> Iena omoi raise uññollena, bie rafuena omoimo lloiticue. Higuera railla riaramo omoi comeciaina faca. Nana amenamo comeciaina faca.

<sup>30</sup> Bie eniruemona amena firuillamona, fiemona raie illana uññotomoi.

<sup>31</sup> Ie isoide. Bie rafue ico suia, Jusiñamui ie cominina raie sedajana uññotomoi.

<sup>32</sup> Uanaicinona omoimo lloiticue. Nana bie rafue suille facaiseconi bie nairai nia iite.

<sup>33</sup> Mona fuite. Enirue jiaie fuite; iadedi cue lloga uai jaca suite.

<sup>34</sup> Jifaillacinona omoi eburui raillano, omoi ecimo ite rana eburui raillano, abina rairuicana jai. Cuena ññoñedinona duere finollena, ebena abido biiticue.

<sup>35</sup> Cue bia, illaimana cue illamona, nana cominimo juez isoi lloiticue.

<sup>36</sup> Ie jira nagarui abi rairuicana jai. Naie duere sefuelle facaise omoi jilloillena, Jusiñamui jii. Ja muidomo monamo cue diga jaca iitomoi —llote.

<sup>37</sup> Jusiñamui jofomo Jesús nagarui llofueuide. Naiona Olivos railla anedumo, nainomo inillena, jaisoide.

<sup>38</sup> Nagarui jitaramo naimiena cacareillena, Jusiñamui jofomo comini bisoidimaci.

## 22

*Judiuai illaicomini Jesúsna gaitallena siadua rafue*

*(Mt 26.1-5, 14-16; Mr 14.1-2, 10-11; Jn 11.45-53)*

<sup>1</sup> Naie facaise pascua railla rafue iaieiri ite. Naie facaise llomenico guille rafue jiaie ite. Naie rafue ia, siritate rana jaca guññedimaci. Egiptomona naimaci jaiagai jillobillana comecillena, naie rafue ite.

<sup>2</sup> Judiuai illaicomini Jesúsna meineiacadimaci; iadedi cominina jaciruillanona, naimiena nia meineñedimaci.

<sup>3</sup> Ie facaiseconi Taife ie anamo Judas Iscariote micorina itatate. Judadi Jesús ie doce llofueoicaigano imie.

<sup>4</sup> Jusiñamui diga nanoca ñairaini dine jaide. Jusiñamui jofona sedaraini dine jiaie jaide. Jesúsna gaitatallena, naimaci diga ñaiaide.

<sup>5</sup> Iobillanona, naimiemo ucubena feacaadimaci.

<sup>6</sup> Judas dinena:

—Jee —raite. Jesús diga ailluena comini iñena facaiseconi naimiena gaitatallena sedade.

*Jesúdi ie fiodaille rafuena llua rafue*

*(Mt 26.17-29; Mr 14.12-25; Jn 13.21-30; 1 Co 11.23-26)*

<sup>7</sup> Llomenico guille rafue illanona, judiuaie comini toica llauda fauillarui ride.

<sup>8</sup> Jesúdi Pedro iaiaiaie Juan diga oretajano, raite:

—Cai rafue guille uicodo finollesa omico jai.

<sup>9</sup> Naimiemo jicanotiiaiaiaie:

—¿Ninomo naiena coco finuana jitaideo?

<sup>10</sup> Uai ote:

—Ero, Jerusalémo omico ria, nogodo jinuina uitimiena cioitomico. Naimie jailla jofomo naimiena raca.

<sup>11</sup> Jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guitucue, cue llofueoicaigano diga?’ ” Iese llono.

<sup>12</sup> Ie mei omicomona afebebamo ite aillue cuartona acataite. Na raruiaie diga ite. Nainomo cai guille fino.

<sup>13</sup> Jaidiaiaiaie. Naimie llua isoi baitiaiaiaie. Pascua rafue guille finodiaiaiaie.

<sup>14</sup> Guille facaiseconi ia, Jesús ie llofueoicaigano diga nainomo guisaide.

<sup>15</sup> Mesamo guitimacimo, ie llofueoicaiganomo llote:

—Nia cue fodiañenia, omoi diga bie rafue guillena eo jitaidecua.

<sup>16</sup> Ie cominina cue Moo ico sedalle facaise ia, nana bie rafue fuite.

17 Jiroracomo jai totaca vino llinocaida, Jusiñamuimo iobillacinona fecaja mei, raite:

—Mai lino. Biemona nana dajena omoi jiro.

18 Omoina bene dane iese caimare nabaiñeiticue. Cue Moo sedajanomo omoi diga ico cue ia, nainomo omoina dane iese caimare marena nabaiticue. —Iena jirodimaci.

19 Llomenicono llinuanona, Jusiñamuimo iobillacinona fecaja mei, iena tairude. Naimacimo fecajano raite:

—Biedi cue abi facai ie. Omoi facaina fioidaiticue. Cue abimo omoi comecina facajano, iena guiño.

20 Naimaci guilla fuilla mei, jiroracomo vino diga dane oruitajanona, naimacina jirotaite. Raite:

—Cue fiodaillamona, dama cue diaillamona, jeacino anamona jilloitomoí. Jusiñamuidi omoimo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. —Iena jirodimaci.

21 Jesús llote:

—Ero, cuena gaitataitimie cai diga guite.

22 Monamona billanona imana jaidicue. Jusiñamui jitailla isoi jai jaiocaidicue; iadedi Jusiñamuimona cuena gaitataitimie eo duere sefuite.

23 Iemei: “¿Nimie Jesúsna gaitatalle?” dani coniniri siadoside.

*Naimaci moto imiēna bu ille rafue*

24 Te faicase coniniri siaduana raitimaci:

—¿Cai moto imiēna bu ille?

25 Iena cacajanona, Jesús raite:

—Naimaci jitailla ra finollena, judíuafiedino illaimaiaidi naimaci anamo itinona ocuicabide. “Cai anamo itinona canocabidicai” raitimaci;

26 iadedi omoimo iese iñede. Omoi moto itimie omoi moto imieñedimienajilla. Omoimona bu imiēna iacania, omoi mullaimana naimie jaicabillasa. Omoimona bu imiēna iacania, omoina naimie canocana jaicabillasa.

27 Ero, jiaie rafuedo iena lloiticue. Naimiēna ecallena, naimiēna canollena, patrón anamo ie mullaiaí itimaci. Naimaci baifemo patrón illamona, naimacina canollena, ie mullaiaí facaina maiñede. Cue anamo itomo; ia omoina canollena, omoi mullaíma isoi iticue.

28 Birui duere cue sefuidicue, cuena faínonocaiñedomoi.

29 Cue Moo cuena illaimana jai itatate. Omoina fetodicue,

30 jairuido cue illaíma illa faicaseconí cue ecimo omoi caimare marena iocire illena. Nainomo omoi judíuai doce nairaiaína sedaitomoí.

*Jesúdi Pedro naimiēna januana llua rafue*

*(Mt 26.31-35; Mr 14.27-31; Jn 13.36-38)*

31 Jesús llote:

—Simón Pedro, ero, Taifedi Jusiñamuimo ona jicanote, o ramo faillena;

32 iadedi ori jai jaidicue, cuena nia inocana o jaillena. Ico cuena raise o inoñena mei, cue dibeimo o comeci íuai dane o meidoia, iemona jiaie creyentiaí comeciaina ocuiñotaitio.

33 Pedro uai ote:

—Nama, cárcelmo o ia, nainomo jiaí iiticue. O fiodaia, jiaí fioidaiticue. Ona faínonocaiñeiticue.

34 Jesús uai ote:

—Pedro, jítiramo itava nia ñañenia, dacaiño amani cuena janoitio.

*Jesús fiodailla faicase íaireí illa rafue*

35 Ie llofueoicaiganomo Jesús llote:

—Omoimo ite rafuena uñoiacadicue. Cue rafue lloillena, navui omoina oredicue. “Ucubena uñeno, bolsa uñeno, meidolle zapatos uñeno” omoimo lloticue. Naie faicaseconí omoi, ¿bue rana jitaídomoi?

Uai otimaci:

—Cai buena jitaíñedicai.

36 Jesús raite:

—Biruímona omoi duere sefuitomoí. Ie jira abina rairuicana jai. Birui ucube omoimo ia, nine omoi jaia, iena uño. Bolsa bumoi ia, iena uño. Abina riidollena, omoimo lloebi iñenia, janore iniroina feca, lloebi ollena.

37 Cuena jaie ciegafuíaí ja suite. Isaías micorí cuena jaie cueda: “Maraiñede rafue finoraíma isoi naimie duere sefuite”.

38 Raitimaci:

—Ero, Nama, mena lloebi caimo birui ite.



Jesús uai ote:

—Mena ia, macaibaite.

*Jesúdi Getsemanímo Jusiñamuimo jüa rafue*

(Mt 26.36-46; Mr 14.32-42)

<sup>39</sup> Guille mei, ie llofueoicaigano diga, Jesús jino jaide. Olivos railla anedumo naimie jaisoilla isoi jaide.

<sup>40</sup> Nainomo ria, naimacimo llote:

—Taife omoína ramo fai raillano, iena omoi ñinoñellena, Jusiñamuimo jü —llote.

<sup>41</sup> Naimie janorede nofici bai faia uaila ñinori bai jaide. Caiñici ifodo ana raita, Jusiñamuimo jüide:

<sup>42</sup> —Ore Moo, o jitaia, cue duere sefuillamona cuena jillota. Cue jitailla isoi cuena ñinoñeno; iadedi o jitailla isoi cuena fino.

<sup>43</sup> Naimie comequina ocuiñotallena, ie facaiseconi monamona Jusiñamui jaienicí bite.

<sup>44</sup> Jesús comeci jarire illamona, naimie rioci faitemo, difai diruena eniruemo uaide.

<sup>45</sup> Jüa mei, ie llofueoicaigano ñine abido bite. Ocosinaillamona, jai inidimaci.

<sup>46</sup> Naimacimo jicanote:

—¿Bue ñellena inidomoi? Mai casi. Taife ramo omoína fai raillano, iena omoi ñinoñellena, Jusiñamuimo jü.

*Jesúna gaitalle rafue*

(Mt 26.47-56; Mr 14.43-50; Jn 18.2-11)

<sup>47</sup> Nia Jesús lloia, diga comíni naimie ñine bitimaci. Judas Iscariote micori naimacina ifode. Naimiedi Jesús llofueoicaigamie. Naimiena llibanollena. Jesús ñine iairei bite.

<sup>48</sup> Jesús raite:

—Judas, cuena llibanuanona, cuena gaitataiacadio.

<sup>49</sup> Ie llofueoicaigano ñaie rafuena jai ciodimaci. Jicanotimaci:

—Nama, ¿cai atica lloebi diga ona riidoiticaí?

<sup>50</sup> Ie facaise naimacimona ñaimiedi Jusiñamui diga nanoca ñairaima ie mullaíma ie nabei jefona jaíbonote.

<sup>51</sup> Jesús ñinena raite:

—Dama ite. —Ie jefona naimie jetajamona, naimiena jillotate.

<sup>52</sup> Diga illaicomíni Judas diga Jesús ñine bitimaci. Naimacimo Jesús llote:

—Ñiriraimadicueta cuena omoi gaitajaíbillá. Omoi lloebina atidomoi. Omoi butaralluna jiaí atidomoi.

<sup>53</sup> Nagarui Jusiñamui jofomo omoi motomo llofuecabiticue; iadedi cuena gaitañedomoi. Jusiñamui jitailla jira, cuena omoi gaitaja facaise jai ride. Taife anamo jai itomoi.

*Pedrodi Jesúna janua rafue*

(Mt 26.57-58, 69-75; Mr 14.53-54, 66-72; Jn 18.12-18, 25-27)

<sup>54</sup> Naimiena gaitaja mei, Jusiñamui diga nanoca ñairaima jofomo uitimaci. Pedro aarena naimaci jinafona racade.

<sup>55</sup> Ñairairibi motomo irai bonua mei, ana raidimaci. Pedro naimaci diga jiaí raide.

<sup>56</sup> Nainomo ite mullaíñodi irai bouamona, Pedromo eruaillano raite:

—Bimiedi Jesús diga jaisoidimie.

<sup>57</sup> Pedro abi janote:

—Naimiena uíñoñedicue.

<sup>58</sup> Dallu illanona, jiaimie Pedrona ciuanona llote:

—Jesús ie llofueoicaigano imiedio.

Pedro ñinena uai ote:

—Imieñedicue.

<sup>59</sup> Daje hora illanona, jiaimie raite:

—Bimie galileo imiëna jira, bimiedi Jesús diga ua jaisoidimie.

<sup>60</sup> Pedro ñinena raite:

—O lluana uíñoñedicue. —Ieconí naimie ñaitemo, iitava ñaite.

<sup>61</sup> Jesús dobaidacaida, Pedromo erodacaida. Iemei Pedro Jesús lluana uibifñote. Jesús naimiemo jaive llote: “Ítava ñia ñaíñenia, dacaíño amani cuena janoitio”.

<sup>62</sup> Pedro jino jaillanona, eo sunaillamona, eo eede.

*Jesúna jifanodua rafue*

(Mt 26.67-68; Mr 14.65)

<sup>63</sup> Ie facaise Jesúna gaitadino naimiena jifanododimaci. Naimiena jiaí fatimaci.

<sup>64</sup> Ie uisina maítimaci. Llotimaci:

—Siño jitudíosa, ¿bu o faja? caimo llono.

<sup>65</sup> Iese jifanodocana uitimaci.

*Jesúdi judíuái illaicomíni díne illa rafue*  
(Mt 26.59-66; Mr 14.55-64; Jn 18.19-24)

<sup>66</sup> Monaidemo judíuái illaicomíni ofidímaci. Jusiñamui díga nanoca ñairaini ofidímaci. Moisés micori llogacino llofueraini ofidímaci. Naimaci díne naimiena gaitadino Jesúsna uitimaci. Naie illaicomíni dinena raitimaci:

<sup>67</sup> —Ua Cristodiona, iena caímo llono.

Jesús uai ote:

—Omoímo iena cue lloía, iinoñeitomoi.

<sup>68</sup> Buena omoímo cue jicanoía, cue uaina ofñeitomoi.

<sup>69</sup> Monamona jaie billanona, iimana jaidicue. Cuen a omoi meiniamona, illaima isoi Jusiñamui ecimo raire iticue.

<sup>70</sup> Nana jicanotimaci:

—“¿Jusiñamui Jitodicue” raitio?

Uai ote:

—Raise cacadomoi. Imiedicue.

<sup>71</sup> Iena cacajano, raitimaci:

—Naimie lluaña jai cacadicaí. Jiaie comíni naimiena llogiduana jai jitaiñedicai. “Jusiñamui Jitona iticue” naimie llua jira, Jusiñamuina jai jeare ñaite. Naimie Jusiñamui Jitoñede.

## 23

*Pilato díne Jesús illa rafue*

(Mt 27.1-2, 11-14; Mr 15.1-5; Jn 18.28-38)

<sup>1</sup> Judíuái illaicomíni naidacaillanona, Pilato díne Jesúsna uitimaci.

<sup>2</sup> Naimiena llogidotimaci:

—Cai comínimo marañedifuen a llote. Gobiernomo ucubena cai fecajana rairuide. Naimie jiaí raite: “Cristodicue. Illaimadicue”.

<sup>3</sup> Pilato dínen a naimiemo jicanote:

—¿Judíuái comíni illaimadio?

Uai ote:

—Jii, judíuái illaimadicue.

<sup>4</sup> Jusiñamui díga nanoca ñairainimo Pilato llote. Nainomo bite comínimo jiaí llote:

—Nicinodi naimiemo iñede.

<sup>5</sup> Uai otimaci:

—Gobierno joreño comíni comeciaí jeare feidocana naimie uite. Nana Judeamo uite. Galileamona tainede. Bene jai caímo ride.

*Herodes díne Jesús illa rafue*

<sup>6</sup> Iena cacajano, naimie llogidotinomo Pilato jicanote:

—¿Naimiedi Galilea imie?

<sup>7</sup> —Jii —raitimaci. Galilea enirue illaima Herodes. Naie facaiseconí Jerusalémo naimie illa jira, naimie díne Pilatodi Jesúsna orede.

<sup>8</sup> Jesúsna Herodes ciuanona, iobide. Naimie finoca rafuena naimie fidia jira, naimiena cioacade. Siño rafuena naimie finuana jiaí cioacade.

<sup>9</sup> Jesúsno ie finoca rafuena are jicanote; iadedi Jesús dínen a uaina ofñede.

<sup>10</sup> Ie facaiseconí judíuái illaicomíni Jesúsna riire llogidotimaci.

<sup>11</sup> Herodes ie soldaduái díga naimiena eo jeare ñaitimaci. Illaima jitaugaí iniroina jitatatimaci. Ie mei Pilato díne naimiena abido orede.

<sup>12</sup> Iemona nairuido Herodes Pilato díga nabairite. Jaie conimana enoidiaímaiaí.

*Pilatodi Jesús fiodaillana llua rafue*

(Mt 27.15-26; Mr 15.6-15; Jn 18.39-19.16)

<sup>13</sup> Pilatodi judíuái illaicomínina, nainomo ite comíni díga, uaidote.

<sup>14</sup> Raite:

—Bimie cue díne atidomoi. Raitomoi: “Comíni comeciaí feidocana naimie uite”. Naimiemo jai jicanoticue; ia naimiemo nicinodi iñede.

<sup>15</sup> Herodes cue díne naimiena como abido orede. “Naimiemo nicinodi iñede” jiaí raite. Naimiena cue meinetallena, naimie jaca nicinona finoñede.

<sup>16</sup> Ie jira naimiena cue sechedotajanona, naimiena oní oretaiticue.

<sup>17</sup> Naie rafue facaiseconí naga año cárcelmona damiena jino jamai oretauide.

<sup>18</sup> Pilato lluaña cacajano, nana comíni ado cuiiriidimaci:

—¡Naimiena oní uifño, naimiena meinellena! ¡Barrabás cárcelmona jino oreta!

<sup>19</sup> Gobierno diga jobaimena naimie navui finua jira, naie facaise comena naimie meinia jira, Barrabás cárcelmo ite.

<sup>20</sup> Jesúna naimie jamai oretaiacana jira, comini diga Pilato dane ñaite;

<sup>21</sup> iadedi cuiiriidimaci:

—¡Naimiena corai! ¡Naimiena meine!

<sup>22</sup> Pilato dane jicanote:

—¿Nie isoide marañede rafuena finode? Naimiena cai meinellena, naimie jaca nicinona finoñede. Naimiena sechedotaiticue. Ie mei naimiena jamai oretaiticue.

<sup>23</sup> Eo riire cuiiriidimaci:

—¡Naimiena corai! —Ja muidomo Pilato dinena:

—Jee —raite.

<sup>24</sup> Naimaci jitailla isoi Pilato fairiote. Jesúna meinellena llote.

<sup>25</sup> Ie mei Barrabásna cárcelmona jino oretate, naimiena comini jicaja jira; iadedi Jesúna naimacimo fecade, naimiemo naimaci jitailla ra naimaci finollena.

*Jesúna coraia rafue*

(Mt 27.32-44; Mr 15.21-32; Jn 19.17-27)

<sup>26</sup> Jesúna soldaduai oni uitemo, Simón raillamie diga dafaifidimaci. Naimiedi Cirene railla enirue imie. Jerusalén onifemona bite. Jesús jinafona naimiena cruzna rocaicaida sonotate.

<sup>27</sup> Ailluena comini Jesúna racadimaci. Ailluena riñoniai eo eecana jaisite.

<sup>28</sup> Iena cacajano, Jesús naiñaiñuai dine dobaidacaida, naiñaiñuaimo llote:

—Jerusalén itañaiñuai, cue facaina eeñeno; iadedi omoi facaina mai omoi ee. Omoi uruiái facaina mai omoi ee.

<sup>29</sup> Ero, jairuido duere sefuillemona comini raitimaci: “Oiniñuai jiaie riñoniai baifemo duere sefuiñena jira, marena itimaci”.

<sup>30</sup> Jusiñamui riicaillafuemona jilloiacanamona, comini jiai raitimaci: “Aneduai caimo jaicorillana jitaídica”.

<sup>31</sup> Marañede rafuena finoñedicue; iadedi jai duere sefuidicue, Marañede rafuena finodimaci. Ie jira cue baifemo eo duere sefuitimaci.

<sup>32</sup> Naie iaimaiaina meinellena, mena marañede iimana jiai uitimaci. Gobierno llogacinona iñoñeíiaimaiaí.

<sup>33</sup> Hocoraina eruaila illanomo naimaci ria, Jesúna coraidimaci. Naie marañede iaimaiaina jiai coraidimaci. Damie Jesús nabeimo. Jiaimie Jesús jarifebeimo.

<sup>34</sup> Jesús ie Moomo llote:

—Ore Moo, naimaci finoca rafuena naimaci raise uiñoñena jira, bie soldaduai cuena duere finua rafuena feita —llote. Bu dajerie uille uiñollena, Jesús iniroina jifanoduanu soldaduai facasite.

<sup>35</sup> Ailluena comini eruaidimaci. Judúuai illaicominidi naimiena jifanoduanona, coniniri raitimaci:

—Naimiedi jiaie cominina duicomona jillotote. ¿Niese dama naimie abina birui jillotañede? Naimiedi Jusiñamui oretagamiedena, Jusiñamui fetocamiedena, fiodaillamona dama naimie abina jillotarede.

<sup>36</sup> Soldaduai naimiena jiai jifanododimaci. Ie abi isirena cacaiñellena, naimiemo vino fecajanona,

<sup>37</sup> raitimaci:

—Judúuai illaimadiodena, fiodaillamona dama o abina jillota. —Naie vino Jesús jiroñede.

<sup>38</sup> Jesús ifogi afeconi rabicimo Pilato cuetatate: “Bimiedi judúuai comini illaíma”.

<sup>39</sup> Jesús diga coraica iaimaiaimona damie naimiena taigode:

—Jusiñamuimona bitiodena, nia fiodaíñenamona dama o abina jillota. Cocona jiai jillota.

<sup>40</sup> Jiaimiedi naimiena lletade:

—¿Bue ñellena bimiena taigodio? ¿Niese jearede rafuena nia finoacadio? Ja fiodaítio. Iemei Jusiñamui uicomo ja iitio. ¿Niese Jusiñamui uicomo o illena jaciruiñedio?

<sup>41</sup> Marañede rafuena coco finua jira, duere sefuidicoco; iadedi bimie marañede rafuena finoñede.

<sup>42</sup> Iemei Jesúmo llote:

—Illaímana o illa facaise cuena comeci.

<sup>43</sup> Jesús uai ote:

—Uanaicino lloticue. Birui cue diga cue Moo illanomo iitio.

*Jesús fiodailla rafue*

(Mt 27.45-56; Mr 15.33-41; Jn 19.28-30)

<sup>44</sup> Jitoma naidai jai ítemo, daje amani horas mona jitibicaide.

<sup>45</sup> Jitoma raise lligaiñoñede. Jusiñamui jofo ie fetaca iniroife ana anaba jillacimo motodo menafe cuararide.

<sup>46</sup> Jesús ado llote:

—Ore Moo, cue joreña feiño. —Ie mei naimie jai fiodaite.

<sup>47</sup> Soldaduai imaci capitán bie rafuena ciuano, Jusiñamuina jaciruillamona, raite:

—Bimie maraiñede rafuena finoñede.

<sup>48</sup> Ailluena comini Jesús fiodaillana ciodimaci. Ie mei eo sunaillamona, jogobemo fairuanona, jofomo abido jaidimaci.

<sup>49</sup> Jesús nabaiñiai bie rafuena aarena ciodimaci. Galileamona bite riñoniai bie rafuena aarena jiai ciodimaci.

*Jesús raiafomo jonia rafue*

*(Mt 27.57-61; Mr 15.42-47; Jn 19.38-42)*

<sup>50-52</sup> Pilato dine José raillamie jaide, Jesús abina jicallena. Naimiedi illaicomini. Maremie. Finogamie. Jesúsna meiniana jitaiñede. Arimatea railla nairai imie. Judeamo naie nairai ite. Naimiedi Jusiñamui ie cominina ico sedajanomo illemo ocuriride.

<sup>53</sup> Pilato:

—Jee —railla mei, Jesús abina cruzmona ana uanona, iena useroi diga ferinote. Nofici ie raiafomo jonete. Nia bu raíñenafomo jonete.

<sup>54</sup> Nairui viernes. Sábadorui rille jai iairei illa jira, Jesús abina raiafomo raire jonete.

<sup>55</sup> Galileamona navui bite riñoniai racadimaci. Raiafona ciodimaci. Naimie abi finuana ciodimaci.

<sup>56</sup> Ie jira caimare soride rana finollena, naimie abimo jonellena, jofomo jaidimaci. Naie ra finua mei, ie abina raise finollena, raiafomo abido jaidimaci. Ie mei sáboruimo jafaici otimaci, Moisés micori jaie llua isoi.

## 24

*Jesús fiodaillamona jillua rafue*

*(Mt 28.1-10; Mr 16.1-8; Jn 20.1-10)*

<sup>1</sup> Domingo jitiramo monaidemo, naie riñoniai raiafomo jaidimaci, iñaiñuai finoca soride rana uillena.

<sup>2</sup> Raiafo ibailla nofici oni joillana ciodimaci.

<sup>3</sup> Fo jaidemo, Jesús abina cioñedimaci.

<sup>4</sup> Uainicaidimaci. Ieconí menamie naiñaiñuai ecimo bairediaimaiai. Iaimaiai iniroi eo quenirede.

<sup>5</sup> Iaimaiaina jacinaillamona, ifogi ana jitadacaidimaci. Naie iaimaiai dinena jicanote:

—¿Bue ñellena fiodaitimie illanomo cajedimiena jenodomoí?

<sup>6</sup> Galileamo navui naimie omoimo llogacinona comeciñedomoi.

<sup>7</sup> Naimie raite: “Monamona billanona, imana jaidicue. Jusiñamui jitailla jira, maraiñede rafue finoraini anamo iiticue. Cuená coraitimaci. Daruí amani illanona, fiodaillamona jilloiticue” raite.

<sup>8</sup> Iemona ie llogacinona jai comecitimaci.

<sup>9</sup> Raiafomona abido jaidimaci. Ie once llofueoicaiganomo naiñaiñuai ciua rafuena llotimaci. Naie llofueoicaigano diga itinomo jiai llotimaci.

<sup>10</sup> Naie riñoniaimona María Magdalena ite. Juana ite. María ite. Naiñaiñodi Jacobo ei.

<sup>11</sup> Naie riñoniaidi iena llotimaci; iadedi ie rafuena cacadinodi iena inoñedimaci.

—Jamaifuená ñaitomoi —raitimaci.

<sup>12</sup> Iena cacajano, Pedro aisicana raiafomo jaide. Nainomo ria, ana jitadacaida, fo erodate. Useroi joillana ciode. Iemo ie comecina facajano, jofomo abido jaide.

*Mena llofueoicaiganomo Jesús bairia rafue*

*(Mr 16.12-13)*

<sup>13</sup> Jesús jilluarui mena llofuega iaimaiai Emaús railla nairaimo jaidiaimaiai. Jerusalémona nibai once kilómetros ite.

<sup>14</sup> Nana Jesúsno suide rafuena ñaiano jaidiaimaiai.

<sup>15</sup> Iaimaiai ñaianona, Jesús iaimaiai diga dafaifillanona, iaimaiai diga jaide.

<sup>16</sup> Jusiñamuidi iaimaiaina naimiena uiñotañena jira, naimiena uiñoñediaimaiai.

<sup>17</sup> Iaimaiaimo Jesús jicanote:

—¿Buena ñaitomíco? —Ieconí naidadatiaimaiai. Sunaitiaimaiai.

<sup>18</sup> Naie iaimaiaimona damiedi Cleofas. Naimie uai ote:

—¿Niese Jerusalémo birui suide rafuena uiñoñedio? Nibai como ridio. Nana jiai comini iena uiñotimaci.

<sup>19</sup> Uai ote:

—¿Nie isoide rafue suide?

Uai otiaiaiaia:

—Nazaret ie Jesús rafue. Naimiedi Jusiñamui facaina lloraima. Diga siño rafuena finode. Cominina raise llofue. Jusiñamuimona naimiedi maremie. Cominimona naimie maremie;

<sup>20</sup> iadedi cai illaicomini naimiena gaitatimaci. Naimiena cruzmo coraitatimaci.

<sup>21</sup> Jusiñamui naimie cai dine orecamiemo comecina facadicoco. Naimie cai illaimana illemo ocuiriticoco; ia naimie jai fiodaite. Naimie fiodaillamona darui amani jai ite.

<sup>22</sup> Cai cominimona dajerie riñoniaibirui caina jacinaitadimaci. Jitiramo Jesús raiafomo jaidimaci;

<sup>23</sup> iadedi naimie abina cioñedimaci. Abido naimaci bia: “Jusiñamui jaienisaia ciodica!” raitimaci. Naie jaienisaia naimacimo llote: “Naimiedi caje”.

<sup>24</sup> Iemei caimona dajerie raiafomo jaidimaci. Riñoniaia llua isoi ciodimaci. Jesús abina cioñedimaci.

<sup>25</sup> Jesús dinena uai ote:

—Abi uiñoñedomico. Nana Jusiñamui facaina lloraini micoriai cuegafuiaina iñoiaicaiñedomico.

<sup>26</sup> Cristo duere sefuillena cuetimaci. Jusiñamui iena jitaillena cuetimaci. “Naimie nia illaimana jaiñenia, duere sefuite” cuetimaci.

<sup>27</sup> Iemei Jesús iaiaiaia llofue. Moisés micori cuegafuiaia llofue. Jusiñamui facaina lloraini micoriai cuegafuiaia jai llofue. Nana Cristona cuegafuiaia llofue.

<sup>28</sup> Emaús dine iaieiri naimaci ria, Jesús nia jaiacademo,

<sup>29</sup> naimiena caididiaiaiaia. Raitiaiaiaia:

—Coco diga fiebi. Jitoma jai ana ite. Jai abi juanide, nia o jaillena. —Ie muidona iaiaiaia diga fiebillena fo jaida.

<sup>30</sup> Nailli guitimacimo, llomenicono Jesús llinuano, Jusiñamuimo iobillacinona fecade. Iena tairuano, iaiaiaimo fecade.

<sup>31</sup> Jusiñamui jitailla jira, ieconi Jesúsna uiñotiaiaiaia. Iemei iaiaiaiaimona naimiena jai cioicaiñena.

<sup>32</sup> Daimaiaia ñaitiaiaiaiaia:

—Coco diga naimie ñaia, coco comeci caimare ite.

<sup>33</sup> Naie daciaño Jerusalémo abido jaidiaiaiaia. Jesús llofueoicaigano naimaci nabaiñiaia diga danomo illana baitiaiaiaiaia.

<sup>34</sup> Iaiaiaiaimo llotimaci:

—Cai Nama fiodaillamona jai jillode. Simón Pedromo jai bairede.

<sup>35</sup> Ie mei naisona iaiaiaiaia jaiilla rafuena llotiaiaiaiaia:

—Cai guiticaimo, naimiena uiñoticoco —llotiaiaiaiaia.

*Jesús ie llofueoicaiganomo bairia rafue*

*(Mt 28.16-20; Mr 16.14-18; Jn 20.19-23)*

<sup>36</sup> “Jesúsna ciodicoco” llotiaiaiaiaimo, ie llofueoicaigano motomo Jesús bairede. Llote:

—Jai biticue. Uri omoi i.

<sup>37</sup> Naimiena ciuamona, jacinaitimaci. “Joreña ciodicaia” comeciaina facajanona, jiai jaciruitimaci.

<sup>38</sup> Naimacimo Jesús jicanote:

—¿Bue ñellena jaciruitomoi? ¿Bue ñellena cue bene illana iñoñedomoi?

<sup>39</sup> Cue onollimo eruai. Cue eillimo eruai. Jesúsducue. Cueneta jeta, raise uiñollena. Cuemo llicisi ite. Cuemo illaici ite. Jamai joreño isoñeducue.

<sup>40</sup> Iena llua mei, coraiafona naimaci cioillena, ie onolli ie eilli diga acatate.

<sup>41</sup> Iobiacadimaci; iadedi nia raise iñoñedimaci. Iemo comeciaina nia facadimacimo, naimacimo jicanote:

—¿Bue illa, cue guillena?

<sup>42</sup> Naimiemo janorede jai ruica lliciaia fecadimaci.

<sup>43</sup> Iena feiñuanona, rite. Iena ciodimaci.

<sup>44</sup> Naimacimo llote:

—Navui omoi diga cue ia, diga rafue omoimo lloticue. Moisés micori cuena cuete. Jusiñamui facaina lloraini micoriai cuena cuetimaci. Jusiñamui jitailla jira, iena jai suide.

<sup>45</sup> Naie facaiseconi naimacina naie cuegafuiaiaia raise uiñotade.

<sup>46</sup> Naimacimo llote:

—Jusiñamui facaina lloraini micoriai cuena jaie cuetimaci: “Cristo duere sefuite. Fiodaillamona darui amani illanona, jilloite.

<sup>47</sup> Naimie muidona comecia: iuai meiduamona, Jusiñamui naimaci jeacinona oni dotaite. Naimie rafue nana nairaimo damierie lloitimaci". Omoimo biena lloiticue. Cue rafuena lollena, Jerusalémo taineitomo.

<sup>48</sup> Bie rafuena cidomoi. Iena lloitomoi.

<sup>49</sup> Ero, navui naimie llua isoi, cue Moo Joreño omoi dine oretaiticue. Jerusalémo fiebi, naimie Joreño omoi feiñolle dinori. Cue rafuena omoi lollena, naimie Joreño omoi comeciaina ocuiñotaite.

*Jesús monamo jailla rafue*

*(Mr 16.19-20)*

<sup>50</sup> Betania railla nairai dine Jesús naimacina ifode. Marecinona naimacimo llote.

—Jusiñamui omoina raise marena canoite —llote.

<sup>51</sup> Iena naimacimo lluanona, monamo jaide.

<sup>52</sup> Jerusalémo eo caimare abido jaidimaci.

<sup>53</sup> Jusiñamuimo iobillacino fecajano, Jusiñamui jofomo nagarui itimaci. Mai. Macaibaite. Lucadicue.

## JUAN JESUCRISTO EN RUEMO ILLA RAFUE CUIAFUE

### *Jesucristo rafue iese tainede*

<sup>1</sup> Jaca bue nia iñenia, Cristo jaca ite. Jusiñamui uai naimiemo illamona, naimie caina Jusiñamuina birui uiñotade. Jusiñamuimo jaca duide. Naimiedi Jusiñamui.

<sup>2</sup> Jusiñamui diga jaca nano ite.

<sup>3</sup> Naga ite rana finode. Naimie finoñega ra jaca iñede. Naga ite rana comuitaga. Naimie comuitañega ra jaca iñede.

<sup>4</sup> Naimie muidona iticai. Naimiena cai iñuamona, jaca iiticai. Lligaiñora diga rana cai ciua isoi, caina Jusiñamuina uiñotade.

<sup>5</sup> Naimiena iñoñedino jitre dinomo itimaci isoidimaci. Naimaci comeciai jitrede. Ie uaido naimaci comeciaina lligaiñote, naimaci comeciaino ite jeacino oni jaillena.

<sup>6-7</sup> Naimaci comeciaina lligaiñotimiena llollena, Juan micori llucacino Jusiñamuina nana comini iñollena, Jusiñamuidi Juan Bautista raillamie micorina oretate.

<sup>8</sup> Juan naie lligaiñoñedimie; iadedi Juan naimiena luai bite.

<sup>9</sup> Nanoca lligaiñotimiena llote. Nanoca lligaiñotimiedi en ruemo billanona, nana comini comeciaina lligaiñote.

<sup>10</sup> Naimie muidona comini comuidimaci; iadedi naimie bene billa meinoconi, comini dinena naimiena uiñoñedimaci.

<sup>11</sup> Ie nairai illanomo naimie ride; iadedi nana cai nairai naimiena feiñoñedimaci.

<sup>12</sup> Damierie naimiena feiñotimaci. Naimiena iñnotimaci. Ie uaido naimiedi naimacina Jusiñamui uruiaina itatate.

<sup>13</sup> Iena Jusiñamui jitailla jira, Jusiñamui uruiaina jaidicai. Comemona jeiciamona iena jaiñedicai. Comini jitaillamona iena jaiñedicai. Buena cai finuamona iena jaiñedicai.

<sup>14</sup> Iemo caina Jusiñamuina uiñotallena, Jusiñamui jito comena jaide. Naie facaise cai comini motomo naimie ite. Cai cominina eo duenaite. Uanaicinona llouide. Ie siño uaina uiñocana jaidicai. Jusiñamui dajede ie jitona ciodicai.

<sup>15</sup> Juan micori naimiena cominimo jaie llote:

—Birui omomo lloticue; iadedi jaiimie cue ifo meidoite. Cue baifemo faite. Cue nia jeiciñenia, naimiedi jaca ite —llote.

<sup>16</sup> Jesucristo caina eo duenaillamona, birui caina eo canocabide.

<sup>17</sup> Moisés micori Jusiñamui uaina jaie llote; iadedi iemona Jusiñamui caina duenaillana jaie raise uiñoñedicai. Jesucristo lluamona Jusiñamui caina duenaillana jai raise uiñoticaí. Naimiemona uanaicinona jai raise cacadicai.

<sup>18</sup> Jaca buna Jusiñamuina cioñede; iadedi dajede ie jito caina naimiena uiñotade. Ie Moo diga danomo illamona, Jesús naimiena uiñote.

### *Juan Bautista micoridi Jesúsna llua rafue*

*(Mt 3.11-12; Mr 1.7-8; Lc 3.15-17)*

<sup>19</sup> Jerusalémona Juan micori dine judiuaí illaicominidi Jusiñamui diga ñairainimona dajerie oredimaci. Jusiñamui diga ñairaini canorainimona dajerie jiai oredimaci. Naimiemo:

—¿Budío? —raillano jicanotadimaci. Juan dine rillanona, raitimaci:

—Cai jilloitaraima biite raillamiemo ocuridicai. Cristo raillamie billemo ocuridicai. ¿Odi naimiedio? —raillanona jicanotimaci.

<sup>20</sup> Naimie dinena janofede; ia:

—Imieñedicue —raite.

<sup>21</sup> Dane naimiemo jicanodosite:

—¿Budío? ¿Elías?

Juan micori dinena uai ote:

—Eliañedicue.

Raitimaci:

—Moisés micori Jusiñamui facaina lloraima ico billena jaie llote. ¿Odi naimiedio?

Juan dinena raite:

—Ieñedicue.

<sup>22</sup> Dane jicanotimaci:

—¿Budío? Caimo llono, cai oretatinomo cai llollena. ¿Ñiesio naimacimo ona lloiticai?

<sup>23</sup> Juan dinena raite:

—Jofue iñenanomo ado llotimiedicue. Isaías micori jaie llua isoi llocabiticue: “Cai Nama biite. Naimie naiso atona raise fino”. Iese lloticue; ia naimie uaina omoí feiñollena, omoí comeciái raise finollena ñaiticue.

<sup>24</sup> Juan dine bitinodi fariseuai comini.

<sup>25</sup> Nia jicanoiacadimaci:

—Odi cai Jilloitaraimañenia, o Elíañenia, o Moisés micori llotimieñenia, ¿bue ñellena cominina bautizadio? ¿Níe isoide uai omo ite? ¿Ninomona o uaina otio?

<sup>26</sup> Juan dinena uai ote:

—Cominina bautizadicue; iadedi omoi motomo omoi uifñoñegamie jai ite.

<sup>27</sup> Naimie cue ifo meidoite. Cue baiferno faite. Jamai bue cue isoilla jira, naimie illafomo cue riñena jira, naimiena canonicudie.

<sup>28</sup> Naie rafuedi Betábaramo suide. Jordán railla ille ruicafebeimo ite. Nainomo Juan bautizaude.

*Juan micori Jesúna dane llua rafue*

<sup>29</sup> Te areruido Juan micoridi Jesús naimie dine billana ciuano, naimiena raite:

—Ero, Jusiñamui Jito toica llauda mamecido jai bite. Cai jeacino facaina faga llauda ifomo Jusiñamui ie Jitona jai orede. Naimie fallemona comini jeacinona dotaite.

<sup>30</sup> Navui naimiena ñaiticue. Lloticue: “Cue ifo jiaimie meidoite. Jamai bue isoidicue; iadedi naimie jamai bue isoifñede. Cue nia jeicifñenia, naimiedi jaca ite”.

<sup>31</sup> Cue dine naimie nia biñenia, naimiedi cai Jilloitaraimana uifñoñedicue; iadedi cominina bautizallena bene iticue, cai cominimo naimiena lollena.

<sup>32</sup> Juan jiai llote:

—Monamona ucugi isoi Jusiñamui Joreño ana billana cidodicue. Jesúmo baite.

<sup>33</sup> Naimiedi cai Jilloitaraimana nia uifñoñedicue; iadedi cominina bautizallena, cuena oretagamiedi jaie cuemo llote: “Cue Joreño ana billana damiemo baillana ico cioitio. Cue Joreño baillamiedi cue Joreño omoimo fecaite”.

<sup>34</sup> Naie rafuena cidocue. Iemona naimiedi Jusiñamui Jitonana lloticue.

*Jesús ie fetocaga comini ie rafue*

<sup>35</sup> Te areruido Juan micori llofueoicaiganomona menamie Juan micori diga ia,

<sup>36</sup> Juan micori Jesús macarillana ciuano, raite:

—Ero, Jusiñamui Jito toica llauda mamecido jai bite.

<sup>37</sup> Juan micori diga itiaimaiaia naiena cacajano, Jesúna racadiaimaiaia.

<sup>38</sup> Jinafo dine erodajonona, Jesús iaimaiaina ciede. Iaimaiaimo jicanote:

—¿Buena jitaidomico?

Iaimaiaia dinena uai otiiaimaiaia:

—Rabbí, ¿ní o jofa? ¿Ninomo itio? —uai otiiaimaiaia. Rabbí oni dobaiñuamona: “Llofueraima raillamie”.

<sup>39</sup> Jesús nai iaimaiaia uaina ote:

—Mai. Cue diga bi, omico uifñollena. —Ie jira jaidiaimaiaia. Jesús illanona cidiaimaiaia. Jitoma nia a illa jira, nairuido naimie diga fiebidiaimaiaia. Jitirecaidemo oni jaidiaimaiaia.

<sup>40-41</sup> Naie iaimaiaimona damie Andréna mamecredimie. Jesús dinena naimie jaidemo, ie ama nano jenuaide. Naimie amadi Simón Pedro. Naimiena baillanona, llote:

—Jai cai cominina Jilloitaraimana baiticue. Cristo raillamiena baiticue.

<sup>42</sup> Ie mei Jesús dine naimiena uite. Jesús naimiena eo eruaillanona, raite:

—Birui o mamecidi Simón. Juan ie jitodio. Biruimona Cefana jiai mamecirenitio —raite. Oni dobaiñuacidi Pedro.

*Jesús menamie uaidua raufe*

<sup>43</sup> Te areruido Jesús Galileamo jaiacade. Felipena baillanona raite:

—Cue llofuegamiena o jaillena, cue diga coco jaillasa, mai cue diga bi.

<sup>44</sup> Felipedi Betsaida nairai imie. Andrés iaimaiaia Pedro diga daje nairai iaimaiaia.

<sup>45</sup> Jesús naimiemo llua mei, Felipedi Natanaelna oni jenuaide. Higuera railla riarana anamo naimiena baillanona, raite:

—Moisés micori jaie cuegamiena jai baiticue. Jusiñamui lloraini micoriaidi naimiena jaie jiai cuetimaci. Naimiedi Jesús. Nazaret imie. Ie moodi José.

<sup>46</sup> Natanael naie nairaina uaitajanona raite:

—Nainomo mare comedi ifñede.

Felipe dinena raite:

—Naie o uifñollena, cue diga mai bi.

<sup>47</sup> Jesúmona iaimaiaia iaire ia, Jesús dinena llote:

—Ero, buna jifueñegamie billa. Nanoca Israel imie bite.

<sup>48</sup> Natanael dinena uai ote:

—¿Bu cuena llogao? ¿Níese cuena uifñotio?

Jesús uai ote:



—Felipe ona ailli nia baiñenia, higuera railla riana anamo o illana jai uifnoticue.

<sup>49</sup> Jacinaillamona, Natanael dane uai ote:

—Maestro, odi Jusiñamui Jitodio. Cai comini illaimadio.

<sup>50</sup> Jesús dinena uai ote:

—Amena anamo o illana cue uifua jira, cuena inotio. Diga siño rafuena ciojtitio. Bie rafue baifemo finuana ciojtitio.

<sup>51</sup> Jusiñamuimona billanona, iimana jaidicue. Unaicino omo lloticue. Mona ecorillana o cioia, Jusiñamui jaienisaí cue dine billena cioitio. Cuemona abido jaillena jiaí cioitio.

## 2

### *Jinuimona Jesús vino finua rafue*

<sup>1</sup> Menarui illanona, Galileamo Canámo iima ie ai uarafue ite. Rafue nama uaidua jira, nainomo Jesús ei jaide.

<sup>2</sup> Jesús jiaí uaidoga. Ie llofueoicaiganodicai jiaí uaidogacai.

<sup>3</sup> Vino cueillamona, Jesús ei Jesús mo lloste:

—Vino jai ifñede.

<sup>4</sup> Jesús dinena uai ote:

—Quei, ¿bue ñellena iese cuemo llotio? Siño rafue cue finolle facaisedi nia riñede.

<sup>5</sup> Iemei ie eidi rafue nama mullaiaimo lloste:

—Naimie omoimo lluaña fino.

<sup>6</sup> Jinui nainomo eenollena, nainomo seis noficimona finoca llerodana raisoide. Naiemona jinuína ouidimaci. Marena illena, cai einamací llua isoi, jofomo naimací ria, naimací abiaína llereuidimaci. Naga lleroda nibaí cinco latas totaca.

<sup>7</sup> Mullaiaimo Jesús lloste:

—Naie llerodaiaína jinuí diga oruita. —Pozomona jinuí atiano, naie llerodamo toidimaci. Iena finua mei,

<sup>8</sup> Jesús naimacimo lloste:

—Llerodamona janore jisa uanona, rafue nama dine uifño.

<sup>9</sup> Naie facaiseconi naie jinuídi vinona jaide. Rafue nama naiena facade. Naimiedi ninomona naie vino uana uifñoñede. Dani nainomo ite mullaiaí uifnotimaci. Jirua mei, ai otimie uaiduano,

<sup>10</sup> raite:

—Rafue bu finoa, eo caimarede vino nano fecade. Comini ailluena jirua mei, janore caimarede vino fecade; iadedi iese fecañedio. Eo mare vino jinafona fecadio —raite.

<sup>11</sup> Galileamo Canámo Jesúsdi siño rafuena nano finode. Iemona caina ie uai siñona uifnotade. Ie muidona naimie siño Jitonana inoticaí.

<sup>12</sup> Rafue fuilla mei, Capernaumo Jesús ie ei diga, ie amatiaí diga, ie llofueoicaiganodicai diga jaide. Nano nigarui nainomo iticaí.

### *Jusiñamui jofomona Jesúsdi rana fecarainina dotaja rafue*

(Mt 21.12-13; Mr 11.15-18; Lc 19.45-46)

<sup>13</sup> Pascua railla rafue iaíre iacana jira, Jerusalémo Jesús cai diga jaide. Egiptomona cai jaiagai jillobillana começillena, naie rafue ite.

<sup>14</sup> Rillano, Jusiñamui jofomo diga rana fecarainina ciodi. Ucube ollena, nainomo juraretaiaí, toica lladaiaí, ucugiaí fecauidimaci. Ucubena meidorainidi jiaí itimaci.

<sup>15</sup> Naimací ocainaiaí diga naimací jino jiuillena, rao Jesús uanona, iena lleride. Naimací ucubena judaíde. Mesaiaína oni caítade.

<sup>16</sup> Ucugiaína fecarainimo lloste:

—Omoí ucugiaína jino uifño. Cue Moo jofomo ra feca-fecajana jitaiñedicue —lloste.

<sup>17</sup> Iemo Jusiñamuina lloraini micoriaí cuegafuina jai começiticaí. Iese jaie cuega: “O jofona cue riidumona, jiaíno cuena meinetaitimaci”.

<sup>18</sup> Nainomo ite juduaí illaicomini dinena raitimaci:

—¿Ñie isoide uaido naimacina jino oredio? Siño rafuena fino, siño uai omo illana cai uifñollena.

<sup>19</sup> Jesús uai ote:

—Bicono judaí. Darui amani maijiamona iena dane nillana fuidoiticue.

<sup>20</sup> Dane raitimaci:

—Cuarentiséis años bicomio maijidimaci, iena finollena. ¿Ñiese iena darui amani illanona, iena dane nillana fuidoitio?

<sup>21</sup> Iese raitimaci; ia Jesúsdi Jusiñamui jofona ñaiñede. Dama ie abina ñaite. Fiodaillamona ie jillobillena ñaite.

<sup>22</sup> Jesús fiodaillamona naimie jillua mei, ie llofueoicaiganodica; bie llucacina cometicica; ie jira naie cuegafuena inotica; Jesús llucacina jia; inotica;.

*Jesúdi comini comeciaino iticino lluaana jitañena rafue*

<sup>23</sup> Pascua railla rafue facaiseconi Jerusalémo Jesús ia, diga siño rafuena finode. Ie jira alluena comini naimie uaina inotimaci. Coniniri raitimaci:

—Naimiedi cai Jilloitaraima.

<sup>24</sup> —Naganomo comeciaina naimaci facaja jira, naie cominina naimie uifnuamona, Jesús naimaci motomo iacaiñede.

<sup>25</sup> Naimaci comeciaino iticinuaina naimie eo raise uifna jira, comini rafuena naimiemo bu lluaana jitañede.

### 3

*Nicodemo Jesús diga ñaia rafue*

<sup>1-2</sup> Judia; illaicominimona damiedi Nicodemo. Naimiedi fariseo imie. Naiona Jesús dine billanona, raite:

—Maestro, cai cominina llofuellena, Jusiñamui ona orede. Iena uifnoticue. Siño rafuena o finua jira, Jusiñamui uai omo illana uifnoticue.

<sup>3</sup> Jesús dinena uai ote:

—Raise llotio; ia daje rafue omo lloticue: Uanai omo lloticue. Dane abido comonori o jeicifenia, Jusiñamui ie cominina sedajanomo jaca initio.

<sup>4</sup> Nicodemo abido jicanote:

—¿Niese eimie ie ei jeraimo dane iite? ¿Niese dane comonori jeiciite?

<sup>5</sup> Jesús uai ote:

—Uanai omo lloticue. Jusiñamui ie comini sedajanomo o illena, dama o eimona jeicifellio. Jusiñamui Joreñodo bu dane comonori comuitañena, Jusiñamui ie cominina sedajanomo jaca iñeite.

<sup>6</sup> Comemona cai comuitaia, jaca comedica; iadedi Jusiñamui Joreñodo cai comuitaiadedi, Jusiñamui uruedica;.

<sup>7</sup> Omo dane lloticue: Comonori jeicia. Ieri rajjicaiñeno.

<sup>8</sup> Iena o raise cacaillena, jiaie rafuedo iena lloticue. Aifidi ie jitailla dine sairide. Iena cacadio; iadedi ninena billana uifnoñedio. Nine jaillana jia; uifnoñedio. Ie isoide. Niese Jusiñamui Joreño cominina comuitajana jia; uifnoñedio.

<sup>9</sup> Nicodemo dane jicanote:

—¿Niese biedi dane iite? Raise cacaiñedicue.

<sup>10</sup> Jesús uai ote:

—Jusiñamui rafuena omoi cominina llofuecabitio. Jusiñamui rafuena omo lloticue; ia iena raise cacaiñedio.

<sup>11</sup> Uanaicinsona omo lloticue. Abi uifnuamona omo lloticue. Cue cúa rafuena lloticue; iadedi cue lluaana inoñedio.

<sup>12</sup> Bene ite rafuena cue lloia, iena inoñediota, monamo ite rafuena cue lloia, iena jia; raise inoñeitio.

<sup>13</sup> Eniruemona monamo jaca buna jaiñena jira, monamo ite rafuena bu raise uifnoñede. Monamona cue billa jira, nainomo abido jaiticue. Ie muidona nainomo ite rafuena uifnoticue.

<sup>14</sup> Monamona biticue; ia amenamo fiodaiticue. Jofue iñenanomo Moisés micori jao joreño amenamo jaie cuinade. Jaionia; ainillamona comini fiodaiñellena iena cuinade. Comini ie iso; jilloillena, ie iso; cuena coraitimaci.

<sup>15</sup> Cue fiodaillamona bu cue uaina inoia, monamo jaca iite.

*Jusiñamuidi cominina eo isiruilla rafue*

<sup>16</sup> Jusiñamuidi cominina eo isiruilla jira, comini dine ie damiede Jitona orede. Ie Jitona naimaci inollena, naimiena orede. Naimiena inuamona, monamo jaca itimaci. Jia; faifñeitimaci.

<sup>17</sup> Naimacina duere finotallena ie Jitona oreñede; iadedi naimaci jeacinomona jilloillena, naimiena orede.

<sup>18</sup> Jusiñamuidi Jesús uaina inotinona jaca duere fñoñeite; iadedi ie dajede Jitona uaina naimaci inoñena jira, Jusiñamui duere finollicino anamo jai itimaci.

<sup>19</sup> Comini comeciaina lligaiñollena, Jusiñamui Jito bite. Jeacino comeciaino illana naimaci uifollena, naimaci comeciaina lligaiñuabite; iadedi naimaci comeciaino jitreñinomo iacana jira, jearede rafue naimaci finua muidona, naimiena jitañedimaci. Ie jira Jusiñamui naimacimo duere finollicinona anamo jai itimaci.

<sup>20</sup> Naimie finoca rafue bai raillano, naga jeacino finoraima ie comeci lligaiñuana jitañede;

<sup>21</sup> ia Jusiñamui jitaillacinona finodino naimaci finoca rafue baillena, lligaiñotimie dine marefodo bitimaci.

*Juan micoridi Jesúsna dane ñaia rafue*

<sup>22</sup> Digarui illanona, Jesús ie llofueoicaiganodicaí diga, Judea railla enirueo macaricana jaidicaí. Nainomo diga irui fiebidicaí. Llofuiamona inotinona bautizacana uiticaí.

<sup>23-24</sup> Ñia cárcelmo iñenia, ailluena jinui nainomo illa jira, Enón railla nairaimo bautizajonomo Juan micori jiaí ite. Salim railla nairai iaírei ite.

<sup>25</sup> Naie facaise Juan micori llofueoicaigano judíuaí imie diga bautizajana siadotimaci.

<sup>26</sup> Te muidona Juan micori dine billanona, raitimaci:

—Maestro, navui Jordán ruica dine damie billena llotio. Naimiena o bautizallena, o dine navui bite; iadedi birui naimiedi cominina bautizade. Ailluena comini naimie dine jaioidimaci. O dine jai raise biñedimaci.

<sup>27</sup> Juan uai ote:

—Jusiñamui ie uai fecañedena, Jusiñamui facaina buna jaca buena finonide.

<sup>28</sup> Cue lluana navui cacadomoi. Lloticue: “Cai comini jilloitaraimañedicue. Cristoñedicue. Naimie billena cue llollena, Jusiñamuidi naimie uicomo cuena orede”.

<sup>29</sup> Jiaie rafuedo iena lloticue. Damie ie aina ua mei, dama naimiemo duide. Ie aina ua rafue facaise, naimie nabai iena ciuano, ieri jiaí iobide. Ie isoide. Comini cue dine navui biñoidimaci. Birui Jesúsno jaioidimaci. Naimiemo jai duidimaci. Iena cue cacajamona, ieri iobidicue.

<sup>30</sup> Comini naimie uai siñona uiñuana jitaídicue. Comini cue jamai bue isoidimiena uiñuana jiaí jitaídicue.

<sup>31</sup> Jamai comedícue. Ie jira enirueo ite rafuena llocabiticue. Jusiñamuimona Jesús billa jira, cai baifemo faite.

<sup>32</sup> Te Moo illanomo ciua rafuena llote. Ie Moo illanomo cacaja rafue jiaí llote; iadedi eo janore comini naimiēna inotimaci.

<sup>33</sup> Naimiēna inotimiedi Jusiñamui uanaicinona lluana raise uiñote.

<sup>34</sup> Jusiñamuidi ie Joreño ie Jitomo caidíñeno fecaja jira, naimie Jusiñamui uaina llocabite.

<sup>35</sup> Jusiñamuidi ie Jitona isiruite. Ie jira naga rafue naimiemo fecade.

<sup>36</sup> Bu Jusiñamui Jitona inoia, Jusiñamui illanomo jaca iite; iadedi bu naimiēna inoñenia, Jusiñamui illanomo jaca iñeite. Jusiñamui riicallafue anamo jai ite.

## 4

*Galileamo Jesús jailla rafue*

<sup>1-2</sup> Naie facaise ailluena comini Jesúsmona fueotimaci. Iemei naimie dibeido bautizadimaci. Naimacina naimie bautizallena, janore comini Juan dine jaide. Jesúsdi bautizañede. Dani ie llofueoicaiganodicaí bautizadicaí. Fariseuaí bie rafuena fidiano, iena Jesús uiñua jira,

<sup>3</sup> Judeamona Galileamo Jesús cai diga dane abido jaide.

*Samaria iñaiño diga Jesús ñaia rafue*

<sup>4</sup> Galileamo jaillena, Jesúsdi Samaria railla enirue dibeido jaiacade.

<sup>5</sup> Samariamo cai ria, Sicar railla nairaimo iaírei rillano, daje pozomo ridicaí. Naie pozodi Jacob micori jaie finoca. Jacob micori naie pozo illano ie jito José micorimo jaie fecade.

<sup>6</sup> Jitoma naidai itemo, naie pozo fuemo cai rillano, Jesús ana raide. Are macarillanona, jafaici ote.

<sup>7-8</sup> Jesús pozomo fiebicaila meinona, Sicarmo jaidicaí, guille ollena. Cai jailla mei, Samaria iñaiñodi jinui ollena, pozomo bite. Jesús naiñaiño mo jicade:

—Jinuina cue ine, cue jirrollesa.

<sup>9</sup> Naiñaiñodi uai ote:

—Judío imiedio. Samaria iñaiñodicue. ¿Niese cuemo jinuina jicadio? —Naiñaiño iese raite, judíuaí Samaria comini diga ñairainina jira.

<sup>10</sup> Jesús dinena dane uai ote:

—Jusiñamui omo fecaacalle ra uiñotiodena, o diga ñaitimiena uiñotona, cuemo jaca itataite jinuina cuemo jicadio. Iemei omo iena fecadicue.

<sup>11</sup> Naiñaiño uai ote:

—¿Niese bie pozomona jinuina oitio? Eo ana ite. ¿Ninomona jaca itataite jinuina oitio?

<sup>12</sup> Cai usuma Jacob micori bie pozo caimo jaie iñonocaiga. Naiemona naimie micori jaie jirode. Ie uruaí micoriaí jiaí naiemona jirodimaci. Ie ocainaíai dajemona jiaí jirodimaci. Cai usuma micori baifemo fañedio —raite.

<sup>13</sup> Jesús uai ote:

—Nagamiíai bie jinui jirua mei, dane jiroacanite;

14 iadedi cue fecalle jinuina jirua mei, dane jiroacaiñenite. Cue fecalle jinui, torafo illa isoí, naimiemo jaca iite. Jusiñamui dine illena, naimiena jaca itataite.

15 Naiñaiño naimie uai ote:

—Ero, cue dane jiroacaiñellena, bene dane cue biñellena, o lloga jinui cuemo ine.

16 Jesús dinena uai ote:

—O jofomo mai jai. O ini diga abido bene bi.

17 Naiñaiño uai ote:

—ñinidicue.

Jesús dinena uai ote:

—Uanai llotio. Ua ñinidio.

18 Cinco diga inina jai faicaidío. Birui o diga itimiedi jiai o iniñede. Uanaicinona ua llotio.

19 Iemona abina uiñocaillamona, naiñaiño dinena uai ote:

—Odi Jusiñamui ie lloramadío. Iena uiñoticue.

20 Cai jaiagai bai bene ite anedumo Jusiñamuina sedauidimaci. Ie jira nainomo Jusiñamuina nia sedadicaí; iadedi omoi judíuái dinena raitomoi: “Jerusalémo Jusiñamuina cai sedauilla”.

21 Jesús dinena dane uai ote:

—Cuena ñino. Jiairuido bai bene ite anedumo cai Moona sedañeitomoi. Jerusalémo naimiena jai sedañeitomoi.

22 Raise uiñoñeno Jusiñamuina biruido sedadomoi; iadedi cai nairaimona cai Jilloitaraima illa jira, naimiena raise uiñuana sedadicaí.

23 Jiairuido, ua birui, cominidi: “¿Ninomo Jusiñamuina sedaiticaí?” raillamo comeciaina facañeitimaci. Naimaci comeciái jitaillamona, naimaci illanomo Jusiñamuina ua sedaitimaci. Naie isoide comini naimiena sedajana Jusiñamui jitaide.

24 Jusiñamui comeñede. Naimiedi jafaici. Omoi comeciái jitaillamona naimiena omoi sedajana jitaide.

25 Riño uai ote:

—Cai jilloitaraima billena uiñoticue. Naimiedi Cristo. Naimie bia, nana bie isoide rafuena caina raise uiñotaite.

26 Jesús raite:

—Naimiedicue.

27 Ieconí abido ridicaí. Riño diga Jesús ñaia jira, rajicaidicaí; iadedi: “¿Buena naiñaiño jitaide?” raillano jicanoñedicaí. “¿Buena ñaitomíco?” raillano jai jicanoñedicaí.

28 Ie lleroda pozo ecimo rainanocaida, Jesús llua isoí, naie facaise naiñaiño ie nairaimo abido jaide. Nainomo abido rillanona, naiñaiño cominimo llote:

29 —Ailli pozo fuemo cue jaca cioirainamie diga dafaifdicue. Nana cue finouiga rafue diese cuemo llote. Mai, cai jibuisailli. Naimiedi pozo fuemo ite. Nibai naimiedi cai Jilloitaraima. Naimiedi nibai Cristo.

30 Ie jira Jesús dine ailluena comini bitimaci.

31 Naie riño ie nairai dine jailla mei, abido cai dine nia riñenia, Jesúsna raiticaí:

—Maestro, mai guiño.

32 Naimie uai ote:

—Cuemo gulle illana uiñoñedomoi.

33 Coniniri siadoticaí:

—Jai nibai bu ecajaibiga.

34 Jesús uai ote:

—Jusiñamui cuena oretate. Naimie jitailla rafuena finocana jaidicue. Naimie rafuena cue llumona, jai guiticue isoidicue.

35 Comecina facadomoi: “Jusiñamui uaina nia lloñeiticaí. Ico iena lloticaí”. Ie isoide. Illimo riará nia llisñenia, comeciaina facadomoi: “Riara einallena, naga amaga fivui fiebite. Naie facaise majiiticaí”. Omoimo lloticue: Omoi ecimo eruai. Riara jai einate isoide. Naimacimo Jusiñamui rafue llollena, iena naimaci ñollena, ailluena comini jai itimaci.

36 Naie llisillamo majiitimiedi ie ucubena feiñoite. Ie isoide. Jusiñamui rafuena damierie llocabillamona, comini iena acadimaci. Jiaíno billamona, iena dane cacajamona, iena ñnotimaci. Naie mare rafue lloraini ibana feiñoitimaci. Jusiñamui dibeimo naimaci dajena majia jira, dajena lobitimaci.

37 Cai comini iena raicabitimaci: “Damie iduaina rite; ia jaiñmie llisillana ote”.

38 Ie isoide. Omoína oredicue, comini cue dibeimo itatallena. Naimacimo cue uaina nano lloñedomoi; iadedi nano jiaíno naimacimo cue uaina llotimaci. Ie jira nana omoi llofuiamona cue uaina ñnoitimaci.

<sup>39</sup> Samaria iñaiño lluamona, naiñaiño nairaimona ailluena comini Jesúna ñnotimaci. “Naimiedi nana cue finoca rafuena cuemo llote” naimacimo naiñaiño llote. “Naimiedi cai Jilloitaraima” raillanona Jesúna ñnotimaci.

<sup>40</sup> Jesús dine naimaci rillanona, naimaci diga naimie fiebillena, Jesúmo jicanotimaci. Ie jira Jesús menarui naimaci dinomo fiebide.

<sup>41</sup> Naimie llofuiamona, jiaie ailluena comini naimiena ñnotimaci.

<sup>42</sup> Riñomo llotimaci:

–Daño o lluamona, navui ñnoticai; iadedi naimie uaina cai cacajamona, birui raise ñnoticai. Naimiedi comini ua Jilloitaraima.

<sup>43</sup> Menarui illanona, nainomona Galileamo Jesús cai diga jaide.

<sup>44</sup> Caimo llote:

–Jusiñamuina lloraimadi ie nairai illanomo ia, naie comini naimie lluomo cacarefia-caiñedimaci;

<sup>45</sup> iadedi Galileamo cai rillanona, nainomo itino naimiena caimare feiñotimaci. Pascua railla rafue facaise Jerusalémo nana naimie finoca rafue navui naimaci cúa jira, naimiena caimare feiñotimaci.

*Jesúdi illaicomini jitona jillotaja rafue*

<sup>46</sup> Galileamo Jesús cai diga macaria, dane Canámo ridicai. Nainomo jinuimona vino navui finode. Nainomo cai ia, Capernaum railla nairaimo itimie jito duide. Duidimie moodi gobierno diga maijuide.

<sup>47</sup> Judeamona Galileamo Jesús illana naimie fidiano, Canámo bite. Jesús illanomo billena, ie jito jai fiodiaicana jira, ie jitona jillotallena Jesúmo duere jicanote.

<sup>48</sup> Jesús naimiemo llote:

–Siño rafuena omoi cioñenia, cuena ñnoñedomoi.

<sup>49</sup> Uai ote:

–Maestro, cue diga bi, cue jito fiodiañellesa.

<sup>50</sup> Jesús uai ote:

–Mai jai. O jito jai fiodiañeite –llote. Naie ñima Jesús uaina ñnuano, ie jofomo abido jaide.

<sup>51</sup> Naisona naimie jaidemo, ie mullaiaia diga afeedo beici dafafide. Llotimaci:

–O jito jai jillode.

<sup>52</sup> Ie jira naimie jicanote:

–¿Nino jitoma itemo, jillode?

Uai otimaci:

–Navui are jitoma oni lluaia caidemo, abi cuarilladi fañonocaide.

<sup>53</sup> Ie comecina facade: “Navui are naie facaise Jesús cuemo llote: ‘O jito jai jillode’”. Ie mullaiaia lluaia cacajamona, naimiedi Jesúdi cai Jilloitaraimana ñnote. Nana naimie jofomo itino jiaia ñnotimaci.

<sup>54</sup> Judeamona Galileamo Jesús abido billano, siño rafuena iese jai finode.

## 5

*Joraibimo tisitaitimie jillua rafue*

<sup>1</sup> Digarui illa mei, cai judíuai rafue iacana jira, Jerusalémo Jesús abido jaide.

<sup>2</sup> Jerusalémo toica llaudaiaia jaisoilla nase facaimo joraibi ite. Cai judíuai uaimona nai joraibi mamecidi Betesda. Naie jorai fuedo ite cinco jifocotiaia.

<sup>3</sup> Nainomo diga duidino biidimaci: uisñidimaci, ñuja-ñujacaidino, tisitaitino. Jinuina begollena sedadimaci.

<sup>4</sup> Feide isoidemona dacaiño Jusiñamui jaienicidi jinuina begotallena bite. Iemei nai jinuimo nano jaidimie ie duicomona jillode.

<sup>5</sup> Duidino motomo tisitaitimie ite. Treintiocho años duide.

<sup>6</sup> Naimiena ciuano, naimie are duillana uñuamona, Jesús naimiemo jicanote:

–¿Jilloiacadio?

<sup>7</sup> Duidimie uai ote:

–Jii; iadedi jinuina begoia, jaca buna iñede cue canoitená. Ie jira jiaimiedi cue uicodo jinuimo jaide. Ie jirari nia jilloñedicue.

<sup>8</sup> Jesús uai ote:

–Mai naidacai. O biira ferinocaida macari.

<sup>9</sup> Ieconí naimie jillode. Ie biira ferianona oni jai macarite.

*Sábadoruimo duidimie jilloitajana siadua rafue*

Sábadoruimo, judíuai jafaici oullaruimo, naimie jillode.

<sup>10</sup> Ie jira judíuai illaicominidi jillodimiemo llote:

—Birui sábado. O biira abinocaida o uilla jira, Moisés micori rairuica rana jai finodio. Sábado mo maijinidicai. Birui jafaici uaruimo jaca buena jetanidicai.

<sup>11</sup> Naimie uai ote:

—Cuenta jilloitaimie cuemo llote: “O biira mai ferinocaida macari”.

<sup>12</sup> Judíuai dinena jicante:

—¿Bu iena omo llote? —Naimie uifioñena jira, uai ofede.

<sup>13</sup> Jesúsdi comini motomo itabilla jira, ailluena comini illa jira, jai jillodimie ie jilloitaimiena uifioñede.

<sup>14</sup> Ie meinoconi dallu illanona, Jusiñamui jofomo Jesús dinena naimiena baite. Llote:

—Jai jillodio. Abido dane eo duere o sefuisa, dane jeacinona finoñeno.

<sup>15</sup> Ie mei judíuai illaicominimo jillodimie lluaide. Llote:

—Jesús raillamie cuenta jillotate.

<sup>16</sup> Sábadoruimo Jesús bie rafuena finua jira, judíuai illaicominidi naimiena duere finocasite.

<sup>17</sup> Jesúsdi abina riiduano llote:

—Cue Moodi ie jitailla rafue jaca finode. Ie isoi cue jitailla rafue finocana jaca jaidicue —llote.

<sup>18</sup> Sábadoruimo naimacimona Jesús maijia jira: “Jusiñamuidi cue Moo” naimie railla jira: “Jusiñamuidicue” naimie railla jira, judíuai illaicomini naimie meinellena eo jitaiddimaci.

*Jesús ie Moo isoi finua rafue*

<sup>19</sup> Naimacimo Jesús llote:

—Uanaicinona lloticue. Buena dama finonidicue. Cue Moo finua rafuena ciuano finocabicicue. Cue Moo finua isoi finodicue.

<sup>20</sup> Cue Moo cuenta isiruillanona, nana ie finoca rafuena cuenta jai uifiotade. Naimie Jitona cue illa jira, bie iimana cue jilloitaja baifemo jiaie siño rafuena finoiticue, omoi rajjicaillena.

<sup>21</sup> Fiodaitinona jilloitallena, cue Moomo ie uai ite. Naie uai cuemo jiai ite.

<sup>22</sup> Cue Moo juez isoi naimie inoñedinomo lloñeite; iadedi naimacimo juez isoi cue llollena, naimaci duere sefuillena, ie uai cuemo iga.

<sup>23</sup> Omoi dine naimie cuenta oretate. Naimiedi omoi cuenta iobitajana jitaide, naimiena omoi iobitaja isoi. Cuenta omoi iobitañenia, cue Moona jiai iobitañedomo.

<sup>24</sup> Uanaicinona lloticue. Cue uaina bu cacaia, cuenta oretatimiena bu inoia, monamo jaca ite. Jearede rafue naimie finua facaina duere sefuifite. Faifite; ia monamo Jusiñamui diga jaca ite.

<sup>25</sup> Uanaicino lloticue. Jusiñamui Jitodicue. Ua birui cuenta inoñedino cue uaina cacareitimaci. Cuenta cacajamona, cuenta inuamona, jaca iitimaci.

<sup>26</sup> Cominina jaca itatallena, cue Moomo uai ite. Comini jaca itatallena, cuemo ie uai jiai iga.

<sup>27</sup> Cuenta inoñedinomo juez isoi cue llollena, naimiemo cue duillamona, ie uai cuemo jiai iga.

<sup>28</sup> Ieri rajjicaifeno. Jiairuido nana jai fiodaitino diese cue lluaana cacaitimaci.

<sup>29</sup> Fiodaillamona naimaci abiai jilloitimaci. Ie mei cue jitaillacinona finodino jaca illena lloiticue. Cue jitaillacinona finoñedino diese duere sefuillena lloiticue.

<sup>30</sup> Naimacimo cuenta oretatimie jitailla isoi lloiticue. Dama cue comecimo ite rafuena cue lloñena jira, bie llucacinodi uanaicino.

*Jusiñamui ie Jito uaina comini inoñena rafue*

<sup>31-32</sup> Jesús nia llote:

—Dama cue abina cue lloidedi, bu cuenta jaca inoñede; iadedi Jusiñamui cue facaina jiai llote. Naimie llucacino uanaicino. Iena uifioticue.

<sup>33</sup> Naimiena cacareillena, Juan Bautista micori dine cominina navui oretatomo. Abido naimaci bia, naimaci cacaja rafuena omoimo llollena, naimacina oretatomo. Juan llucacinodi uanaicino.

<sup>34</sup> Naimie micori cue rafuena llouide; iadedi naimie micori llogacinomo omoi comeci eo facajana birui jitaifedicue. Cuenta omoi inollena, naimie mamecina jai lloticue.

<sup>35</sup> Lamparín raise lligaiña isoi, ie rafuedo Juan micori omoi comeciaino iticinona raise uifiotade. Dallu ieri iobidomo.

<sup>36</sup> Cue finoca rafue Juan micori finoca rafue baifemo faite. Cue siño finoca rafuena ñaiticue. Cuenta naimie oretajamona, cue Moo uaido iena finodicue. Ie jira naimena naimie dinena cue billana jai uifiotomo.

<sup>37</sup> Cue finoca rafue muidona cuenta uifiotomo; iadedi naimie lluaana jaca cacaiñedomo. Naimiena jiai jaca cioñedomo.

<sup>38</sup> Cuenta omoi inoñena jira, naimie uaina feiñoñedomo.

<sup>39</sup> Jusiñamui dine omoi rillena, Jusiñamui facaina lloraini micoriai cuegafuiaina facacabidomoi. Naifuiaidi cuena ñaite;

<sup>40</sup> iadedi Jusiñamui dine omoi rillena, cue uaina ñinoiacañedomoi.

<sup>41</sup> Cuemo iobillacinona omoi fecallena sedañedicue.

<sup>42</sup> Jusiñamuina isiruiñedomoi. Iena uifñoticue.

<sup>43</sup> Cue Moo mamecido cue billanona, cuena feiñoñedomoi; iadedi dama ie mamecido jiaimie bia, naimiena feiñoitomoi.

<sup>44</sup> Jaca ñinoiacañedomoi. Iobillacino coninimo fecadomoi; iadedi ua Jusiñamuidi omoina “Mare” raillana jitañedomoi.

<sup>45</sup> “Cue Moomo omoi marañede finoca rafuena lloticue” raillanomo comeciaina facañeno. Moisés micori cuegafuiaimo omoi llogiduafue jai ite. Moisés micori cuegafuiamuidona Jusiñamui dine omoi jaca illemo ocuiridomoi.

<sup>46</sup> Moisés micori cuegafuiaina ñnotomoina, cuena naimie micori cuia jira, cuena jiai ñnoitomoi.

<sup>47</sup> Naimie cuegafuiaina ñnoñedomoi. Ie jira cuena jiai ñnoñeitomoi –llote.

## 6

*Jesús cinco llomenicomona ailluena cominina ecaja rafue*

(Mt 14.13-21; Mr 6.30-44; Lc 9.10-17)

<sup>1</sup> Jiairuido Galilea railla jorai ie ruica ñibeimo Jesús ie llofueoicaiganodicai diga jaide. Naie joraidi jiai Tiberiana mameciredede.

<sup>2</sup> Duidinona naimie jillotauillana naimaci cuia jira, ailluena comini naimiena racadimaci.

<sup>3-4</sup> Naie facaiseconi pascua railla rafuedi jai iaie ite. Jesús cai diga anedumo a jaillanona, dinomo ana raide.

<sup>5</sup> Oni erodatemo, ailluena comini naimie dine billana cide. Felipemo jicanote:

–Naimaci guillena, ¿ninomona llomenicona oiticai?

<sup>6</sup> Naimiena facacillena, iena jicanote; iadedi Jesús ie finolle rana jai uifñote.

<sup>7</sup> Felipe uai ote:

–Janore naimaci guillena, doscientos digarui ie maijia ucube diese llomenico oticaina, baiñede.

<sup>8</sup> Naie facaise caimona damie iena cacade. Naimiedi Simón Pedro ama. Andréna mameciredede. Naimie raite:

<sup>9</sup> –Cinco cebadamona finoca jenide llomenico daje uruemo bene ite. Mena lliciai jiai naimiemo ite; ia ¿niiese ñibaiñiticaí? Baiñeite.

<sup>10</sup> Jesús caimo llote:

–Cominimo llono, ana imaci raillesa.

Ie jira raitire illanomo ana raidimaci. Cinco mil iññiai itimaci.

<sup>11</sup> Llomenicona Jesús ua meinomoni, Jusiñamuimo iobillacinona fecajano, Jusiñamuimo jüide. Iemei cominimo caina naie llomenicona fecatate. Comini jitailla dierise lliciai daje isoi fecatate.

<sup>12</sup> Naimaci monillamona, caimo Jesús llote:

–Buena jaca faifñellena, fiebide guille danomo irai.

<sup>13</sup> Ie jira iena iraidicai. Naie cinco llomenicomona, comini guigamona fiebidemona, doce cirigaiaimo oruitaticai.

<sup>14</sup> Jesús finoca rafuena naie cominidi cianona, llotimaci:

–Jusiñamui facaina lloraini micoriaidi cai jilloitaraíma ico billena jaie llotimaci. Bimiedi naimie.

<sup>15</sup> Naimaci illaímana naimie illena, naimiena gaitaacadimaci. Iena naimie uifñua jira, iena naimie jitañena jira, aneduaimo naimie oni jaide.

*Capernaumo Jesús abido jailla rafue*

(Mt 14.22-27; Mr 6.45-52)

<sup>16</sup> Jitoma ana itemo, jai navuidemo, ie llofueoicaiganodicai joraímo jaidicai.

<sup>17</sup> Cai botemo cai jaillano, ruica Capernaumo jaiacadicai; iadedi Jesús nia bifñede. Jesúsna sedadicaímo, naimie biñena jirari, jai jitiñena facaiseconi jai jaidicai.

<sup>18</sup> Riire aifi illa jira, jorai eo bagode.

<sup>19</sup> Nibai cinco, nibai seis kilómetros jaidicaímo, damie cai dine jinui emododo billana ciodicai. Bote dine naimie billana cianona, jacinaíticai.

<sup>20</sup> Jesús caimo llote:

–Jesúdicuesa. Jacinaíñeno.

<sup>21</sup> Iena cacajanona, botemo naimiena a billana jitaídicaí. Ieconí ruica ñine cai jaiacananomó ridicai.

*Comini Jesúna jenua rafue*

<sup>22-24</sup> Cai jailla mei, daje bote nairuido illa jira, jinafomo fiebidino Jesús cai diga jaiñenana uifnotimaci. Cai Nama ie Moomo iobillacinona fecajanomo, cominimo guille fecajanomo, Tiberiamona dajerie botes naie facaise iaire bite. Monaidemo, Jesúna naimaci cioifñena jira, cai jiai iñena jira, naie botiaido Capernaumo Jesúna jenollena, jaidimaci.

*Jesús: “Llomenicodicue” railla rafue*

<sup>25</sup> Ruica dine Jesúna comini baillanona, jicanotimaci:

—¿Niruido bene ridio?

<sup>26</sup> Jesús uai ote:

—Navui are omoína cue ecajamona, iemona omoi monillamona, cuena jenodomoí. Siño rafuena cue finuana ciodomoi; iadedi cuena nia inoñedomoi.

<sup>27</sup> Guille raire cuecibade. Cueiruide ramo comeciaina eo facañeno. Cueiruiñede ramo comeciaina eo faca. Jusiñamui diga omoi jaca illemo comeciaina eo faca. Cue Moo Jusiñamui, iimana cue jaillena, cuena oretate. Ie uai cuemo illanona, cue uaina omoi inuamona, Jusiñamui diga jaca iitomoí.

<sup>28</sup> Jicanotimaci:

—Nia Jusiñamui dibeimo iticaina, ¿nie isoidifue finodicaina mare?

<sup>29</sup> Jesús uai ote:

—Naimie oretagamie uaina omoi inuana jitaide.

<sup>30</sup> Naimaci dinena dane jicanotimaci:

—¿Nie isoide rafuena finoitio? iena cai ciuano, o uaina cai inollena.

<sup>31</sup> Cai jaagai jofue iñenanomo Jusiñamuimona bite guilla ra guisoidimaci. Moisés micori iena jaie cuela: “Jusiñamuimona bite guiga ra naimacimo nagarui fecauide”. Iemo jiai birui ocuiridicai. Naie isoide siño rafuena o finuana jiai cioacadicai —llotimaci.

<sup>32</sup> Jesús uai ote:

—Uanaí lloticue. Moisés micori naie guiga ra jaca fecañede. Cue Moo iena fecauide. Birui naimiedi monamona bite ua llomenicono omoimo jai fecaacade.

<sup>33</sup> Jusiñamui fecaacalle llomenico monamona jai bite. Comini iena guillamona, jaca iitimaci.

<sup>34</sup> Llotimaci:

—Nagarui caimo bie isoide llomenicono feca.

<sup>35</sup> Jesús uai ote:

—Llomenico guillamona iticai. Omoi llomenico isoidicue. Cuena inuamona, monamo jaca iitomoí. Cuena inotimie dane aimetañeite. Cuena isiruitimie jaca dane jiroacaiñenite. —Iese llote; ia naimaci comeciaina ñaite. Naimaci comeciai jitaillacino naimacimo jaca illena ñaite—.

<sup>36</sup> Cuena ciodomoi; iadedi cuena inoñedomoi.

<sup>37</sup> Nana cue dibeimo cue Moo itatallinodi cuena inoitimaci. Cuemona naimacina jaca oni dotañeiticue.

<sup>38</sup> Cuena oretatimie ie jitailla rafuena finollena, monamona jai biticue. Dama cue jitailla rafuena finoiticuena biñedicue.

<sup>39</sup> Cuena oretatimiedi cue dibeimo itatallinomona buna faifillana jitañede. Jusiñamui lluaruimo fodaillamona nana naimaci abiaína cue jilloitajana jiai jitaide.

<sup>40</sup> Jusiñamui Jitona cue illana bu inoia, cuena bu inoia, monamo jaca iite. Jusiñamui llliriuimo fodaillamona naimie abina jillotaiticue. Iese cue Moo jitaide.

<sup>41</sup> Jesúsdi: “Monamona bite llomenicodicue” railla jira, judíuai illacominidi naimie uaina jamaillano inosifñede.

<sup>42</sup> Raitimaci:

—Bimiedi Jesús. José jito. Ie moona uifnoticai. Ie eina jiai uifnoticai. ¿Niese naimiedi: “Monamona biticue” raite?

<sup>43</sup> Jesúsdi uai ote:

—Iese omoi naiñeno.

<sup>44</sup> Naimiena cue Moo inotañenia, bu cuena inonide. Cuena bu inoñenia, Jusiñamui llliriuimo fodaillamona naimie abina jillotaiticue.

<sup>45</sup> Jusiñamuina lloraini micoriai jaie iena cuetimaci: “Jusiñamuidi nana cominina ico llofueite” cuetimaci. Birui naie rafue jai suide. Naga cue Moomo cacarefidimie, naga cue Moomona fueotimie cuena jiai inoite.

<sup>46</sup> Buna cue Moona jaca cioñede. Naimiemona cue billamona, dama cue ciua.

<sup>47</sup> Uanaicinona lloticue. Cue uaina inotimie monamo jaca iite.

<sup>48</sup> Jesús dane llote:



—Llomenico guillamona iticai. Omoi llomenico isoidicue. Cuen a ñnuamona, monamo jaca iitomoi.

<sup>49</sup> Jofue iñenanomo omoi jaiagai Jusiñamuimona bite rana guisoidimaci; iadedi fioidaitimaci.

<sup>50</sup> Birui jiaie guille ra ite. Monamona ite. Iena bu guia, monamo jaca iite.

<sup>51</sup> Bie llomenicodi cue. Monamo cominina jaca itatallena, monamona biticue. Bu bie isoide llomenicono guia, jaca iite. Bie llomenicodi cue abi. Comini facaina fioidaiticue.

<sup>52</sup> Iena cacajano, judíuai illaicomini coniniri naiena siadotimaci. Raitimaci:

—¿Niese bimie abina raiticai?

<sup>53</sup> Te jira Jesús dinena raite:

—Unai lloticue. Cue abina omoi riñenia, cue diruena omoi riñenia, cue Moo diga jaca iñeitomoi.

<sup>54</sup> Bu cue abina riia, bu cue diruena riia, cue Moo diga jaca iite. Fioidaillamona naimie abi iirairuimo jillotaiticue.

<sup>55</sup> Cue abidi ua rille. Cue diruedi ua rille.

<sup>56</sup> Bu cue abina riia, bu cue diruena riia, cuena nabaide. Naimiena jiai nabaidicue.

<sup>57</sup> Cue Moo cuena orede. Naimiedi jaca ite. Cue Moo jaca illa jira, cue jaca iticue. Daje isoide. Bu cue abina riia, cue illamona, naimie jiai iite.

<sup>58</sup> Bie isoide guille ra monamona jai bite. Omoi jaiagai jaiie guiga ra isoifede. Jaiie fioidaitimaci; iadedi bie guille ra birui bu guia monamo jaca iite. —Iese llote; iadedi naimie fioidaillamona, naimiena comini ñnuamona, Jusiñamui diga naimaci jaca illena ñaite.

<sup>59</sup> Capernaumo judíuai ofiracomo Jesús buena llote.

*Jesús diga jaisoidino naimie lluaña siadua rafue*

<sup>60</sup> Jesús diga jaisoidino naimie lluaña cacajano, coniniri siadotimaci:

—Bie llua eo irirede. Bu iena cacaiñede.

<sup>61</sup> Jesúsdi naimaci iese siaduana uñote. Te jira llote:

—Cue lluaña raise ññoñedomoi.

<sup>62</sup> Jusiñamuimona ñmana jaillena jai biticue. Monamo abido íco cue jaillena cioitomoina, iena jiai nibai raise ññoñeitomoi.

<sup>63</sup> Cai joreño caimo illamona, iticai. Dani cai abi diga iñedicai. Te isoide. Cue llogacino Jusiñamuimo duide. Iena omoi ñnuamona, jaca iitomoi;

<sup>64</sup> Ia omoimona nana ññoñedomoi —llote. Nano dofoconimona Jesúsdi naimiena ññoñedinona uñote. Naimiena gaitataitimiena jiai uñote.

<sup>65</sup> Jesús dane llote:

—Te jira omoimo lloticue: Cue Moo jitaiñenia, cuena jaca bu ñnonide.

<sup>66</sup> Iena cacajano, Jesús diga jaisoidinomona, diga comini naimiena fañonocaidimaci.

<sup>67</sup> Te jira ie doce llofueoicaiganodicaimo Jesús jicanote:

—¿Jiai cuena fañonocaida, abido jaitomoi?

<sup>68</sup> Simón Pedro uai ote:

—Nama, o diga cai jaiñenia, ¿bu diga jaiticai? Jusiñamuimo cai rillena, o isoi Jillotaraima iñede. Jiaimemo jaca itatajaracinodi iñede.

<sup>69</sup> O lluaña jai ñnoticai. Jusiñamui mare Jitodio. Iena uñnoticai.

<sup>70</sup> Jesús dane uai ote:

—Doce digamie fetocaomoi; iadedi omoimona damie Taifemo jainaiaide —llote.

<sup>71</sup> Caïmona Judas Iscariote micorina ñaite. Judas micori Jesúsna gaitataiacadimie.

## 7

*Jesús amatiai naimiena ññoñena rafue*

<sup>1</sup> Jiairuido Galileamo ite nairaiaimo Jesús macarite. Judíuai illaicomini naimiena meinea-cana jira, Judeamo jaiñede.

<sup>2</sup> Jifocotiaiai railla rafue iaie ite. Judíuai ie rafue.

<sup>3</sup> Te jira Jesús amatiai naimiemo llote:

—O diga jaicabidino o finua rafuena raise cioillena, beno fañonocaida, Judeamo jai.

<sup>4</sup> Bu ie mameci are soriacania, bainino maijirainina. Te isoide. Siño rafuena o finoa, ailluena comini illa motomo iena fino.

<sup>5</sup> Jesús amatiai naimiena ññoñena jira, iese raite.

<sup>6</sup> Jesús dinena uai ote:

—Jerusalémo nia jaiñeiticue; iadedi nainomo omoi jaiacalliruido omoi jai.

<sup>7</sup> Comini omoína enoiñedimaci. Naimaci finoca jearede rafuena cue llua jira, cuena jaca enoidimaci.

<sup>8</sup> Jerusalémo rafuemo jai. Cue jaillirui nia riñena jira, nia jaiñeiticue.

<sup>9</sup> —Iese lluaño, Galileamo naimie fiebide.

<sup>10</sup> Naimie amatai rafuemo jailla mei, Jesúdi naimaci jinafona dama bainino jaide.

<sup>11</sup> Nai rafuemo judíuai illaicomini Jesúna jenuano baiñenano, cominimo jicanotimaci:  
—¿Ninomo naimie ite? —Uiñoñena jira, comini uai oñedimaci.

<sup>12</sup> Nainomo ailluena comini itimaci. Comini illa motomo naimiena anado siadoside. Jiaíno dinena: “Naimiedi mare” raitimaci. Jiaíno dinena: “Naimiedi cominina jifuate” raitimaci.

<sup>13</sup> Judíuai illaicominina iciana comini jaciruillanona, anado siadoside. Jesúna marefodo buna ñaíñede.

*Sábadoruimo Jesús majia rafue*

<sup>14</sup> Jifocotiaiai railla rafue atuedo fuitemo, Jesús Jusiñamui jofomo jaillano, llofuate.

<sup>15</sup> Illaicomini naimie llofuiamona rajicaidimaci:

—¿Niese naimie abi uiñoñe? Eo rafuena uiñotimie mona jaca fueoñede —raitimaci.

<sup>16</sup> Jesús uai ote:

—Dama cuemona oñega cue llofuacinodi. Cuen a oretatimie ie.

<sup>17</sup> Jusiñamui jitaillacinona finoiacadimiedi ninomona cue llofuacinona cue uana uiñoite. Jusiñamuimona cue uana uiñoite. Dama cue comecimona cue oñenana jiaí uiñoite.

<sup>18</sup> Bu dama ie comecimona ie llofuacinona uanona lloia, naimiedi comini naimie iobillacinona fecajana jitaide; iadedi bu ie oretatimiena iobitaia, uanai llote. Marañedicinona finoñede.

<sup>19</sup> Moisés micori Jusiñamui uaina jaie llote; iadedi birui naie llogacinuaina nia raise iñoñedomoi. Iena raise iñotomoidena, cuena niade meineiacañedomoi.

<sup>20</sup> Comini dinena uai ote:

—Ñibai uairitaidio. ¿Bu ona meineiacade?

<sup>21</sup> Jesús uai ote:

—Dacaíño sábadoruimo damiena jillotaticue. Ie jira cue uaina uaitatomi.

<sup>22</sup> Sábadoruimo jiaí majicabidomoi. Moisés micori isaiaí abiaí diana omoimo jaie llote; iadedi naimie micori naiena nano lloñede. Naimie micori usumatiaí naiena nano llotimaci. Sábadoruimo isana abi dellirui ia, detomoi.

<sup>23</sup> Moisés micori llogacinona iñollena, sábadoruimo isaiaína detomoi. Sábadoruimo imana raise jillotaticuemo, ¿bue ñellena cue diga iciritomoi?

<sup>24</sup> Cominimo jamái eruailanona, naimacina jeare ñaíñeno; ia naimaci finoca rafuena raise uiñuamona, naimacimo comecina faca. Cue finoca rafuemo comecina faca.

*Jesúna comini siadua rafue*

<sup>25</sup> Ie jira Jerusalémo itino coniniri siadotimaci:

—Illaicomini bimiena meineiacadimaci;

<sup>26</sup> iadedi beno marefodo naimie llofuate. Jaca buena lloñedimaci. Illaicominidi: “Bimiedi caí Jilloitaraíma” raillano nibai comeciána facadimaci.

<sup>27</sup> Bimie ie billanona caí uiñua jira, naimiedi caí Jilloitaraímañedimie. Caí Jilloitaraíma baíreia, jaca budi naimie billanona uiñoñeite —siadotimaci.

<sup>28</sup> Ie jira Jesús Jusiñamui jofomo naimie llofuiano llote:

—Cuen uiñotomoi. Ninena cue billana jiaí uiñotomoi. Cue jitailla jira biñedicue; iadedi jiaimie cuena oretate. Naimiedi uanai llote. Naimiena uiñoñedomoi.

<sup>29</sup> Naimie mona cue billa jira, naimiena uiñotícue. Cuen oretate —llote.

<sup>30</sup> Ie jira illaicomini Jesúna gaitaacadimaci; iadedi naimie fiódaille façaise nia riñena jira, buna naimiena gaitañede.

<sup>31</sup> Nairui ailluena comini naimie uaina iñotimaci. Raitimaci:

—Caí jilloitaraíma bia, ¿niese naimiedi bimie baífemo jiaíe rafuena finoite?

*Jesúna gaitaiacana rafue*

<sup>32</sup> Fariseuaídi comini iese ñaiana cacajano, Jesúna gaitallena, Jusiñamui diga nanoca ñairainidi ailluena policiana orede.

<sup>33</sup> Ie jira naimacina Jesús dinena raite:

—Dallu omoi diga nia iitícue. Ie mei cuena oretatimie dine abido jaitícue.

<sup>34</sup> Cuen jenoitomoi; iadedi cuena baiñeitomoi. Cue dine binitomoi.

<sup>35</sup> Ie jira nainomo ite illaicomini dani siadotimaci:

—¿Nine jaite? ¿Niese naimiena baiñeiticaí? Judíuaíñedinona llofuellena, jiaie eníruemo caí comini dine nibai jaite.

<sup>36</sup> ¿Niese naimie raite: “Cuen jenoitomoi; iadedi cuena baiñeitomoi”? ¿Niese raite: “Cue dine binitomoi”? —iese siadotimaci.

*Jesúdi Jusiñamui Joreña ñaia rafue*

<sup>37</sup> Jifocotiaia railla rafue fuillaruimo, ua rafue ie nairuimo, Jusiñamui jofomo itinomo Jesús ado lloste:

—Bu jiroacania, cue dine bi.

<sup>38</sup> Jusiñamui facaina lloraini micoriai jaie cuega: “Naimiena ñinotimie comecimo jaca itatate jinui isoi ite, torafomona jinui tonooilla isoi”.

<sup>39</sup> Jesúsdi iese lloste; ia Jusiñamui Joreñaña ñaite. Jusúna ñinotimomo Jusiñamuidi ie Joreñaña ico illena ñaite. Jesús nia fiodañena jira, iena nia ñeña.

*Comini Jesúsna dane siadua rafue*

<sup>40</sup> Jesús lluaana comini cacajano, raitimaci:

—Jsiñamui facaina lloraini micoriai Jusiñamui facaina lloraima ico billena jaie llotimaci. “Cristo nia baireñena, naimie biite” llotimaci. Bimiedi naimie.

<sup>41</sup> Jiaño raitimaci:

—Naimiedi cai Jilloitaraima. Naimiedi Cristo.

Jiaño raitimaci:

—Cai Jilloitaraima Galileamona biñeite.

<sup>42</sup> Jusiñamui facaina lloraima micori cuega: “Cai Jilloitaraímadi David micori jito. Belémo David micori illanomo jeicille”.

<sup>43</sup> Ie jira daje isoi naimiemo comeciaina facañedimaci.

<sup>44</sup> Jiaño naimiena gaitacadimaci; iadedi buna naimiena jetañede.

*Juduaia illaicomini Jesúsna ñinoñena rafue*

<sup>45</sup> Ie mei policías naimaci illaicomini dine abido jaidimaci. Fariseuai dinena jicannotimaci:

—¿Bue ñellena Jesúsna atañedomoi?

<sup>46</sup> Policías dinena uai ote:

—Naimie llofuia isoi jaca buna llofueñede. Iena jacinallanona, naimiena atañedicaí.

<sup>47</sup> Fariseuai dane llotimaci:

—Cominina jifuia isoi, omoina jiai jifueite.

<sup>48</sup> Cai illaicomini dinena naimiena jaca ñinoñedicaí. Moisés micori llogacinodo raise jaidicaí;

<sup>49</sup> ia Jesús llofuiana cacadino Moisés micori llogacinuaido jaca raise jaiñedimaci. Ie jira jaca faifitimacisa.

<sup>50</sup> Naie illaicomini mona Nicodemo raillamie ite. Naimie naiona Jesús dine navui jaide. Fariseo imie.

<sup>51</sup> Jesúsna riiduanona, naimie lloste:

—Cai einamaci llocabitimaci: “Bu duere cai finoacania, nano naimie lluaño cacarefiticaí. Jearede rafue naimie finuana cacareillano, naimiena duere finoiticaí”. Iena cai cacañena, naimiena duere finoñeíticaí.

<sup>52</sup> Nicodemomo llotimaci:

—Galileamona bitino isoi ñaitio. Naimie llofuegamiena nibai jai jaiacadio. Jaie cuega-fuina raise faca. Jusiñamui facaina lloraini micoriaidi cai nairaina Jilloitaraíma Galileamona billena jaie cueñedimaci. Bie Jesús raillamiedi cai nairaina Jilloitaraímañedimie.

<sup>53</sup> Ie meinocni damierie imaci jofomo jaidimaci.

## 8

*Ie iniñede iima diga riñodi rafuetaila ie rafue*

<sup>1</sup> Naie facaise Jesúsdi Olivos railla anedumo jaide.

<sup>2</sup> Ie areruido jítiramo Jusiñamui jofomo abido dane jaide. Ailluena comini naimie dine billa jira, naimie ana raíta, naimacina llofueite.

<sup>3</sup> Naie facaise Moisés micori llogacinona llofuerainimona dajerie bitimaci. Fariseuaimona dajerie jiai bitimaci. Daje riño atidimaci. Ie iniñede iima diga naiñaiñona jai eidatimaci. Comini illa uicomo atiano,

<sup>4</sup> Jesúsno llotimaci:

—Llofueraima, biñaiño ie iniñede iima diga eidaticaí.

<sup>5</sup> Moisés micori jaie cuega: “Bie isoidiñaiñodi nofici diga fairinoga, meinellena”. ¿Niese naiñaiñona o raitio?

<sup>6</sup> Naimiena facacillena, naimie raise uai oñena, naimiena llogidollena, iese jicannotimaci. Iena cacajano, Jesús ana jitadacaida, eniruemo ie onocai diga cuete.

<sup>7</sup> Naimiemo diga icaíño jica-jicanuano, naimie naidacaida, naimacimo lloste:

—Omoimona jeacino iñedimie naiñaiñoño nano noficina fairino.

<sup>8</sup> Dane ana jitadacaida, eniruemo dane cuete.

<sup>9</sup> Naimie lluana cacajano, dajerie jino jaidimaci. Nano eo einamacidi jino jaidimaci. Ie mei conirueni jino jaidimaci. Nana comini tuua mei, nainomo Jesús fiebide, naie riño diga ñaillena.

<sup>10</sup> Eruaillano naiñaifomo jicanote:

—¿Ni nai o llogidotino?

<sup>11</sup> Naiñaifño uai ote:

—Jaca iñedimaci. Cuena jai llogidoiacaiñedimaci.

Jesús uai ote:

—Jiai ona duere finoñeiticue. Mai jai. Jeacino dane finoñoeno.

*Jesúdi comini comeciai lligaiñua rafue*

<sup>12</sup> Jesúdi cominina dane llofuianova, raite:

—Jeacino oni jaillena, comini comeciaina lligaiñoticue. Cuena inotimie jitiredinomo jaca iñeite. Jeacino anamo jai iñedimie Jusiñamui diga ico jaca iite.

<sup>13</sup> Fariseuai dinena uai otimaci:

—Dama o abina ñaitio. Ie jirari uanaicinona lloñedio.

<sup>14</sup> Jesús uai ote:

—Dama cue abina lloticue; iadedi uanaicinona lloticue. Ninena cue billanona uiñoticue. Níne cue jaillinona jiai uiñoticue. Ninena cue billanona uiñoñedomoi. Níne cue jaillinona jiai uiñoñedomoi.

<sup>15</sup> Abi raise uiñoñoeno cuena jeare ñaitomoi. Iese omoína ñañedicue;

<sup>16</sup> iadedi omoína cue ñaia, uanaicinona lloticue. Dama cue uaina omoína lloñedicue. Cuena oretatimie omoína jiai llote.

<sup>17</sup> Moisés micori iena jiai jaie cueda: “Menamie daje isoi lloia, naie iaiaiaia llucinodi omoi inua” cueda.

<sup>18</sup> Cue facaina lollena, menamie jai ite. Cue facaina lloticue. Cue Moo cue facaina jiai llote.

<sup>19</sup> Fariseuai dinena jicanote:

—¿Ni o moo?

Jesúdi uai ote:

—Cuena uiñoñedomoi. Cue Moona jiai uiñoñedomoi. Cuena uiñotomoina, cue Moona jiai uiñotomoi.

<sup>20</sup> Jusiñamui jofomo ucube eenoracomo bicinona siadotimaci. Jesús fiódaille facaise nia riñena jira, jaca buna naimiena gaitañede.

*Jesúna comini inoñenia, naie jeacino diga fiódaiilla rafue*

<sup>21</sup> Naimacimo Jesús dane llote:

—Ico oni jaiticue. Cuena jenoitomoi; iadedi cuena baiñeitomoi. Na omoimo jeacino nia itemo, fiódaitomoi. Cue jaillinomo jainitomoi.

<sup>22</sup> Ie jira judíuai illaicomini dinena iena siadotimaci:

—Dama ie abina meineite.

“Cue jaillinomo jainitomoi” Jesús railla jira, iese siadotimaci.

<sup>23</sup> Jesúdi uai ote:

—Jusiñamuimo ite rafuemo duiñedomoi. Naimiemo ite rafuemo duidicue. Naimie dibeimo iñedomoi; ia naimie dibeimo iticue.

<sup>24</sup> Cue Jusiñamui Jitonana omoi inoñena jira, na omoi jeacino diga fiódaitomoi.

<sup>25</sup> Jicanoside:

—¿Budió?

Jesús uai ote:

—Nano omoi motomo cue illamona bumiedicuena omoína raicabiticue.

<sup>26</sup> Diga rafue omoimo lloiacadicue. Marañede rafuena omoi finuana omoimo nia lloiacadicue; iadedi omoimo cuena oretatimie uaina dama lloticue. Nai uaidi uanaicino —llote.

<sup>27</sup> Naimiedi ie Moo Jusiñamuina llote; iadedi cacaiñedimaci.

<sup>28</sup> Ie jira Jesús llote:

—Cuena omoi meinia mei, bumiedicuena uiñoitomoi. Cue uaido dama lloñedicue; iadedi cue Moo cue llofuiua uaido llocabiticue.

<sup>29</sup> Cuena oretatimie cue diga ite. Naimie jitaille rafuena cue finua jira, cuena fañonocañede.

<sup>30</sup> Iese Jesús llotemo, diga illaicomini naimie uaina como inoiacadimaci.

*Comini Taife anamo illa rafue*

<sup>31</sup> Jesúdi naimie uaina como inoiacadinomo llote:

—Cue llwana ñnocana omoi jaia, cue ua cominidomoi.

<sup>32</sup> Uanaicinona uññoitomoi. Ie mei jiaimie anamo dane iññeitomoi.

<sup>33</sup> Uai otimaci:

—Abraham micori ie uruiaidicai. Jiaimie anamo jaca iññedicaí. ¿Bue ñellena llotio: “Jiaimie anamo iññeitomoi”?

<sup>34</sup> Jesúsdi uai ote:

—Uanai lloticue. Jeacino finocabidomoi. Naga jeacino finoraíma ie jeacino anamo jai ite. Omoi jeacino anamo omoi illana ñaiticue.

<sup>35</sup> Jiaie rafuedo iena lloiticue. Ie patrón anamo itimiemo ie patrón rafuedi duiññede; iadedi naie patrón jitomo ie rafuedi duide.

<sup>36</sup> Ie isoide. Jusiñamui Jitona cue illamona, naimie rafuemo duidicue. Ie jira omoimo cue lloia, omoi jeacino anamo ua iññeitomoi.

<sup>37</sup> Abraham micori ie uruiaidomoi. Iena uññotícue; iadedi cue llwana omoi raise ñnoñena jira, cuena meineiacadomoi.

<sup>38</sup> Cue Moo diga jaie cue illamona, cue ciua rafuena llocabiticue. Omoi moomona cacaja rafuena finocabidomoi.

<sup>39</sup> Uai otimaci:

—Cai moodi Abraham micori.

Jesús dane uai ote:

—Abraham micori uruiaidomoidena, Abraham micori finoca rafue isoi finodomoi. Abraham micori uruiaññedomoi. Ie jira Abraham micori finoca rafue isoi finoñedomoi.

<sup>40</sup> Uanai cue llua jira, cuena meineiacadomoi; iadedi Abraham micori iese finoacaiñede. Cue llucino Jusiñamuimona otícue.

<sup>41</sup> Jusiñamui uruiaí finoca rafuena finoñedomoi; iadedi omoi moo finoca rafuena finocabidomoi.

Uai otimaci:

—Jamai nairai ie uruiaññedicaí. Cai Moodi Jusiñamui.

<sup>42</sup> Jesús dane llote:

—Jusiñamuidi omoi moodena, cuena isiruitomoi, naimiemona cue billa jira. Cue jitailla jira, biññedícue; iadedi cuena oretate.

<sup>43</sup> ¿Bue ñellena cue llwana cacaiñedomoi? Cacareirañidomoi.

<sup>44</sup> Omoi moodi Taifena jira, cue llwana ñnoñedomoi. Naimie jitailla rafuena finoacacabidomoi. Nano dofomona naimiedi comena meinteraíma. Naimie taino jaca llua jira, uanaicinona naimie jaca gaiñede. Naimie tainona lloia, ie comeci llua isoi llote. Naimiemona taino llucinodi comucabide. Naimie isoidomoi.

<sup>45</sup> Uanai cue llua jira, cuena ñnoñedomoi.

<sup>46</sup> ¿Ñie isoide jeacino finodicue? Cueno llono. Uanai cue llia, ¿bue ñellena cuena ñnoñedomoi?

<sup>47</sup> Jusiñamuina mooredimiedi Jusiñamui uaina cacade. Jusiñamui uruiaññedomoi. Ie jira cue llwana cacaiñedomoi.

<sup>48</sup> Naimiena jearuillanona, naie illaicomini dinena iese raitimaci:

—Samaritano nairai imiedio. Janaba illamiedio. Uairitaidio.

<sup>49</sup> Jesús uai ote:

—Janaba illamieñedicue. Cue finoca rafuemona cue Moona iobitadicue; iadedi iese cuena omoi ñaiamona cuena iobitañedomoi.

<sup>50</sup> Omoimona iobillacinona feiñollena, cue rafuena finoñedicue; ia cue Moo iena oiacade. Cuena omoi ñnoñena, cuemo iobillacinona omoi fecañena, cue Moo omoína duere finoite;

<sup>51</sup> ia bu cue llwana ua ñnoia, jaca ua fodañeite.

<sup>52</sup> Naie illaicomini dinena uai otimaci:

—Janaba illamiediona jai uññoticaí. Abraham micori jaie fodaite. Jusiñamuina lloraini micoriai jiaí jaie fodaítimaci; iadedi: “Bu cue llwana ñnoiadedi, fodañeite” raitio.

<sup>53</sup> Cai usuma Abraham micori baífemo faññedio. Jusiñamuina lloraini micoriai baífemo faññedio. ¿Bumiediota?

<sup>54</sup> Jesúsdi uai ote:

—Dama cue abina biriñedicue; ia cue Moo cuena marena ñaiamona, cuena iobitate. “Cai Moodi Jusiñamui” raicabitomoi;

<sup>55</sup> iadedi naimiena uññoñedomoi. Naimiena uññotícue. “Naimiena uññoñedicue” cue raia, omoi isoi taino lloticue. Naimiena uññotícue. Naimiena jiaí ñnotícue.

<sup>56</sup> Omoi usuma Abraham micori enruemo cue ico billena jaie uññote. Iena uññuamona, naimie iobide.

<sup>57</sup> Illaicomini dinena uai otimaci:

—Odi cincuenta años nia iññedio. ¿Ñiese Abraham micorina cidio?

<sup>58</sup> Jesús uai ote:

—Abraham micorí nia iñena facaiseconi jaca iticue.

<sup>59</sup> Iena cacajanona, naimie fairinollena, naie illaicomini noficina llinotimaci; iadedi Jesús reirillanona, Jusiñamui jofomona oni jaide.

## 9

*Jesús uisnidimiena jillotaja rafue*

<sup>1</sup> Jiáiruido ie llofueoicaiganodicai diga Jesús macaria, uisnidimiena cide. Iese nanomona jaca naimiedi jeiciga.

<sup>2</sup> Jesúmo jicanoticaí:

—Llofueraíma, ¿bue ñellena naimiedi iese jeiciga? ¿Nie isoide ra ie moo jetajamona, naimie iese jeiciga? ¿Nie isoide ra ie ei jetajamona, naimie iese jeiciga? Caimo llono.

<sup>3</sup> Jesús uai ote:

—Naimie jeacino finua muidonañede. Ie moo muidonañede. Ie ei muidonañede. Jaca bue jetajamona, iese comuñede. Jusiñamui uai siñonana comini uiñollena, iese jeiciga.

<sup>4</sup> Nia userena jira, cuena oretatimie ie jitailla rafuena finoacadicaí. Raire jitirenite. Ie mei bu jaca maijinite.

<sup>5</sup> Eniruemo cue nia ia, comini comeciaina lligaiñoticue. —Iese Jesús lloite; iadedi jiaie rafuena ñaite. Naimie nia fioldañenia, Jusiñamui rafuena llocana naimie jaillana ñaite. Ie fioldairui jai iaie iacanana ñaite. Comeciaina lligaiñuana lloite, jeacino oni jaillena.

<sup>6</sup> Iena lluanona eniruena tuajano, enirue idiaí finuanona, uisnidimie uisina naie enirue diga riginote.

<sup>7</sup> Raite:

—Siloé railla joraibimo mai noisai —raite. Siloé oni dobaiñuamona: “Oretarabi”.

Ie jira naimie noisai. Uisi jai ciodemo, abido bite.

<sup>8</sup> Billa mei, naimie ecimo itino, jai naimiena ciocabidino diga, naimie jilluana coniniri siadotimaci:

—¿Buuta naimiedi? Bene ucube jicallena raicabidimie isoide.

<sup>9</sup> Jiaino raitimaci:

—Jii, naimie.

Jiaino raitimaci:

—Ieñede. Naimiena eruaide isoide.

Naimie dinena raite:

—Uisnidimiedicue; iadedi jai ciodicue.

<sup>10</sup> Naimiemo jicanotimaci:

—¿Niese jai birui ciodio?

<sup>11</sup> Uai ote:

—Jesús raillamie enirue idiaí finuano, cue uisina riginote. Cuemo lloite: “Siloé railla joraibimo noisai”. Ie jira noisaidicue. Jai ciodicue.

<sup>12</sup> Jicanotimaci:

—¿Ninomo ite nai Jesús?

Naimie uai ote:

—Uiñoñedicue.

*Comini uisnidimie jai jilluana siadua rafue*

<sup>13</sup> Navui uisnidimie jai jillua mei, fariseuai dine comini naimiena uitimaci.

<sup>14</sup> Sábadoruimo Jesúsdi naimiena jillotaja jira,

<sup>15</sup> fariseuai naimiemo jicanotimaci:

—¿Niesenamona jai ciodio?

Uai ote:

—Jesús raillamie enirue idiaí finuano, cue uisina riginote. Ie mei Siloé railla joraibimo noidicue. Iemona jai ciodicue.

<sup>16</sup> Fariseuaimona jiaino raitimaci:

—Sábadoruimo bimiena Jesús jillotaja jira, caimona jai maijide isoide. Jesús maijia jira, Jusiñamuimona naimie biñede.

Jiaino raitimaci:

—¿Niese jearede ra finuidimiedi uisnidimiena jillotate? —Ie jira daje isoi comeciaina facañedimaci.

<sup>17</sup> Ie jira navui uisnidimiemmo dane jicanotimaci:

—Naimie ona jillotaja jira, ¿Niese odi Jesúsna raitio?

Uai ote:

—Naimiedi Jusiñamui uai lloraíma.

<sup>18</sup> Naimie moo, naimie ei iaimaiaimo nia jicanoñenia, judíuai illaicomini nai iima jaca cioñenano ñinosiñede. Ie jira iaimaiaina uaiduanona,

<sup>19</sup> jicanotimaci:

—¿Bimiedi omico jito? ¿Naimie jaca uisinino jeiciga?

<sup>20</sup> Uai otiaimaiaia:

—Jii, bimie coco jito. Jaca uisinino jeiciga. Iena uiñoticoco.

<sup>21</sup> Niese jai naimie uisina ciuana uiñoñedicoco. Bu naimiena jilloitajana jiai uiñoñedicoco. Naimiemo jicano. Naimiedi jai eimiesa. Dama ie facaina jai ñaite —uai otiaimaiaia.

<sup>22</sup> Bie rafue nia suiñenia, judíuai illaicomini navui llotimaci: “Jesúdi cai Jilloitarama bu lloia, cai ofiracomo naimiena fo billana rairuitica”. Iena jaciruillanona,

<sup>23</sup> llotiaimaiaia: “Naimie jai eimiesa. Naimiemo jicano”.

<sup>24</sup> Ie jira illaicomini dane naimiena uaiduano, llotimaci:

—Jusiñamui iobillacinona feca. Jesúmo fecañeno. Naimie jearede rafuena finouidimiena uiñoticai.

<sup>25</sup> Uai ote:

—Naimie jearede rafuena finouillana uiñoñedicue. Daje rafuena uiñoticue. Navuidi cioirainidicue. Birui jai ciodicue. Iena uiñoticue.

<sup>26</sup> jicanotimaci:

—¿Niesede ra diga finuamona odi uisina ciodio? ¿Niese ona jillotate?

<sup>27</sup> Uai ote:

—Omoimo jai lloticue; iadedi cacaiacaiñedomoi. ¿Bue ñellena omoimo dane lloiticue? ¿Ie llofueganona jaiacadomoi?

<sup>28</sup> Riire uai otimaci:

—Naimie ie llofuegamiedio. Cai di Moisés micori ie llofueganodica.

<sup>29</sup> Jusiñamui Moisés micorimo jai e lluaana uiñoticai; iadedi bimiena uiñoñedicai. Naimie ninena billana jiai uiñoñedicai.

<sup>30</sup> Nai iima uai ote:

—Jadi, naimie ninena billana uiñoñedomoi; iadedi cuena jillotate.

<sup>31</sup> Jusiñamuidi jearede rafuena finodino ñaia uaina cacareñede. Naie isoidino siño rafuena finoñenana uiñoticai; iadedi Jusiñamuidi naimiena sedadimie ñaia uaina cacade. Ie jitailla rafuena finodimie ñaia uaina cacade. Naie isoidino siño rafuena finuana uiñoticai.

<sup>32</sup> Enirue finua facaisezona jaca buna uisinino jeicigamienna jilloitañede.

<sup>33</sup> Jesúdi Jusiñamuimona biñedimiedena, jaca buena finonide.

<sup>34</sup> Uai otimaci:

—Jamai cai nairai imiedio. ¿Niese caina llofueitio?

Ie jira naimaci ofiracomona naimiena jino dotadimaci.

*Jesús uisinidimie diga ñaia rafue*

<sup>35</sup> Uisinidimiena jino dotajana fidianona, Jesús naimiena jenode. Baillano, jicanote:

—¿Omoi cominina Jilloitaramana ñnotio?

<sup>36</sup> Uai ote:

—¿Bumai naimie? Cuemo llono, naimiena cue ñnollesa.

<sup>37</sup> Jesús uai ote:

—Naimiena ciodio. O diga ñaite. Cue.

<sup>38</sup> Caiñici ifodo rainadajanona, iobillacinona fecallena, uai ote:

—Nama, jai o uaina ñnoticue.

<sup>39</sup> Jesús uai ote:

—Uisinidino cioitallena, eniruemo biticue. Jai uisina ciodino uisina cioitañellena biticue. —Iese Jesús raite; ia naimaci comeciaina ñaite. Jesús “Jai marañedica!” raitinona jillotajaibite. Jesús “Jai maredica!” raitinomo ite jeacino naimaci uiñollena bite.

<sup>40</sup> Naimie ecimo ite fariseuai iena cacajano, jicanotimaci:

—¿Uisinidomoi caina raitio?

<sup>41</sup> Jesús uai ote:

—Uisinidino isoi itomoina, omoimo ite jeacino omoi muidonañede; ia “Jai ciodica!” omoi railla jira, omoimo ite jeacino omoi muidona.

Iese raite; ia naimaci comeciaina ñaite. Jeacino naimacimo illana naimaci uiñoiaicaiñena jira, iese ñaite. Naimaci jeacino oni dotajana jitañedimaci.

## 10

*Toica llaudaia sedaraima rafue*

1-2 Jesús dane llofue:

—Cue rafuena omoi raise uifollena, toica llauadaiaina ñaiticue. Llauadaiai jino uicabilla isoi, llaigafomo nasedo fo jaidimiedi naie llauadaiai sedaraima; ia jinofebei dinena bitimiedi firiraima.

<sup>3</sup> Llaigafu llauadaiai sedaraima fo jaillena, nase sedaraimadi nase econote. Llauadaiai naimie uaina uifotimaci. Imaci mameciado uaiduamona, llaigafomona jino bitimaci.

<sup>4</sup> Nana ie llauadaiai jino bia, naimacina ifode. Naimie uaina uifuanona, naimiena racadimaci.

<sup>5</sup> Naimaci uifonegamienu racañedimaci; iadedi naimie uaina naimaci uifoneña jira, naimiemona oni aisidimaci.

<sup>6</sup> Bie isoidicinona Jesús llofuate; iadedi naie comini ienu cacañedimaci.

<sup>7</sup> Ie jira Jesús dane llofuate:

—Llaigafu ie nase isoidicue.

<sup>8</sup> Damierie firirainina bitimaci. Ie jira llauadaiai naimaci uaina cacañedimaci. —Iese Jesús llofuate; ia naimiena ñnotinona ñaite. Naimiena abi caitadinona ñaite. Naimie ñnotinon naimiena abi caitadino llogacinomo cacarefiñena ñaite.

<sup>9</sup> Nia llofuate:

—Llaigafu isoidicue. Bu cue nasedo fo bia, jilloite. Llauadaiai isoi fo biite. Jino jaite. Mare guille baite isoitue. —Iese llofuate; ia naimiena ñnotinon marena illana ñaite. Naimiemona naimaci jitailla rafuena uana ñaite.

<sup>10</sup> Nia llofuate:

—Llauadaiaina fillena, meinellena, faifillena, firiraima bite; iadedi cominina jaca raise itatallena, biticue.

<sup>11</sup> Llauadaiai marena sedaraimadicue. Mare sedaraimadi ie toinia facaina riiduanona ie abina faifite.

<sup>12</sup> Janallari bia, llauadaiai naimie ieñena jira, jamai maijidimiedi, llauadaiaina faimonocailano, ecimona aiside. Llauadaiaina janallari gaitaacanamona, llauadaiai tuudidimaci.

<sup>13</sup> Jamai ucube oiacanano, isiruiñenano, jamai maijidimie aiside.

<sup>14</sup> Iese iñedicue. Mare sedaraimadicue. Cue llauadaiaina uifoticue.

<sup>15</sup> Cue Moo diga conimana coco uifua isoi, naimaci uaina jiai uifotimaci. Cue llauadaiai facaina fiadaiticue. —Iese Jesús llofuate; ia naimiena ñnotinona ñaite. Jamai maijidimie isoi naimacina sedañede. Naimacina raise riidote. Naimaci facaina jiai fiadaicade.

<sup>16</sup> Nia llofuate:

—Jiaie llaigafomo jiaie llauadaiai cuemo ite. Naimacina jiai atiacadicue. Cue uaina cacaitimaci. Ie mei danomo nana cue llauadaiai iitimaci. Naimacina dama sedaiticue. —Iese Jesús llofuate; ia jiaie nairaiamo naimiena ñnotinona ñaite. Dajena naimacina sedajana ñaite.

### *Jesús fiadaille rafue*

<sup>17</sup> Jesús nia llofuate:

—Cue jai fiadaiacanamona, cue Moo cuena isiruite. Fiadaillamona dane jilloiticue.

<sup>18</sup> Cue jitañena, jaca buna cuena meineñeite. Cue jitailla jira, fiadaiticue. Siño uai cuemo illa jira, cue jitaillirumo fiadaiticue. Cuemo cue Moo siño uaidi jai illa jira, dane jilloiticue.

<sup>19</sup> Jesús iese llofuia jira, judiua illaicominidi daje isoi comeciaina facañedimaci.

<sup>20</sup> Jiaimodi:

—Naimiemo Janaba illamie —raitimaci—. Uairico. Naimiena cacareiacañedicai —raitimaci.

<sup>21</sup> Jiaino raitimaci:

—Bie isoidicinona Janaba illamie llofueñede. Janaba illamie uisindimiena jillotanide.

### *Jesús ie Moo diga daje isoi comeci lloilla rafue*

<sup>22</sup> Rollime facaise Jerusalémo Jesús ite. Naie facaiseconi Jusiñamui jofo ie finua comeci rafue ite.

<sup>23</sup> Salomón micori finotaga jofo abi ibirimo Jesús macarite.

<sup>24</sup> Naie facaise judiua illaicomini naimie dine bitimaci. Jicanotimaci:

—¿Ñiruido caimo ona lloitio? Odi cai jilloitaraimania, caimo marefodo llono.

<sup>25</sup> Jesús uai ote:

—Omoimo jai lloticue; iadedi ñnoñedomoi. Cue Moo mamecido cue finoca rafuemona cuena uifotomoi.

<sup>26</sup> Cue toica llauadaiamo omoi jainaiñena jira, cuena ñnoñedomoi.

<sup>27</sup> Cue toica llauadaiai cue uaina cacadimaci. Naimacina uifoticue. Cuena racadimaci.

<sup>28</sup> Naimaci jaca itataticue. Jaca abina faifñeitimaci. Cue anamona jaca budi naimacina bairoñeite.



<sup>29</sup> Cue Moo naimacina cuemo fecade. Naimacidi jiaino baifemo faitimaci. Naimiemona jaca budi naimacina baironide.

<sup>30</sup> Cue Moo diga daje isoi comecina lloidicoco. —Iese llote; ia naimiena inotinona ñaite. Naie illaicomini naimiemo jainaiña jira, naimiena inoñedimaci. Iena Jesús ñaite.

<sup>31</sup> Jesús llofuiana cacajano, naie illaicomini noficina llinotimaci, naimiena meinellena.

<sup>32</sup> Iena cjuanona, Jesús llote:

—Cue Moo uaido diga mare rafuena finodicue. ¿Nie isoide rafuena cue finua muidona, cuena meineiacadomo?

<sup>33</sup> Uai otimaci:

—Mare rafuena o finua muidona, ona meineñeiticai. Jamai iimadio. “Jusiñamuidicue” o railla jira, ona meineiticai. Jusiñamui Joreña jiai jeare ñaitio.

<sup>34-36</sup> Jesús dinena uai ote:

—Jaie cuegafuiaina jamainidicai. Nainomo Jusiñamuidi naimie uaina cacadinomo jaie llote: “Omoidi jusiñamuillaidomo?”. Jusiñamui ie uaina cacadinomo jaie iese lloide, ¿niese cuena jeare ñaitomo? Jusiñamui cuena fetuano, cuena bene oretate. “Jusiñamui Jitodicue” cue railla jira, “Jusiñamui Joreña jeare ñaitio” raitomoi.

<sup>37</sup> Cue Moo isoi cue finoñenia, cuena inoñeno;

<sup>38</sup> iadedi cuena omoi inoiacaiñenia, cue Moo isoi cue finoa, naie rafuena ino. Iemei cue Moomo cue jainaiñallana uiñoitomoi. Cuemo cue Moo jainaiñallana jiai uiñoitomoi.

<sup>39</sup> Iena cacajano, naimiena dane gaitaacadimaci; iadedi naimacimona jillode.

<sup>40</sup> Ie mei Jesús Jordán railla ille ruica dibeimo jaide. Nainomo Juan micori cominina nano bautizade. Nainomo rillanona, nainomo Jesús fiebide.

<sup>41</sup> Ailluena comini Jesús dine bitimaci. Coninina raitimaci:

—Juan micori siño rafuena finoñede; iadedi nana Juan micori Jesúsna llucacino di uanaicino.

<sup>42</sup> Nainomo ailluena cominidi Jesús naimaci jilloitaraimana inotimaci.

## 11

### *Betaniamo Jesús abido jailla rafue*

<sup>1</sup> Naie facaise Betaniamo Lázaro raillamedi duide. Naimie miriñodi Marta, María iaiñuui.

<sup>2</sup> Naie Mariadi jaiiruido Jesús eillimo caimare soride rana totade. Ie mei naiñaiño ie ifotie diga naimie eillina safenaillena dote.

<sup>3</sup> Naie iaiñuui Jesús dine uaina orediañuui, naimie billena. Naimie jibuisaibillena llotatatiñuui:

—Nama, o isirugamie duide —lлотatatiñuui.

<sup>4</sup> Jesús naie rafuena fidiano, llote:

—Jamai fiodaillena naimie duñede. Jusiñamui uaina siñonana comini uiñollena, naimie duide. Iemona comini dinena: “Ua Jusiñamui Jitodio” cuena raitimaci.

<sup>5</sup> Jesúsdi Lázaron isiruite. Ie miriño iaiñuaina jiai isiruite;

<sup>6</sup> iadedi Lázaro duillana Jesús fidiano, naimie dine jaiñede. Naimie illanomo menarui nia fiebide.

<sup>7</sup> Ie mei ie llofueoicaiganodicaimo llote:

—Judeamo abido dane mai cai jailli.

<sup>8</sup> Uai oticai:

—Llofueraima, judíuui illaicomini birui noficina ona fairinoiacadimaci. ¿Niese naimaci dine dane jaitio?

<sup>9</sup> Uai ote:

—Nagarui userede. Userenia bu macaria, raise ciua jira, eicaitañede;

<sup>10</sup> iadedi bu naiona macaria, raise cioñena jira, eicaitaide. —Iese llofuede; ia naimie rafuedo jaillena ñaite. Raitie:

—Cue rafue suicana jaite. Cue jitaille dinori nia llofueticue. Cue rafuedo omoi jaja, marena jaitomoi. Iedo omoi jaiñenia, duere sefuitomoi.

<sup>11</sup> Dane llote:

—Lázaro jai inide; iadedi naimiena casitallena, jaiticue.

<sup>12</sup> Uai oticai:

—Nama, naimie jamai iniia, nia dama casite.

<sup>13</sup> Naimie jafaici uanona iniamo comeciaina facadica; iadedi Jesús naiena lloñede. Lázaro fiodaillana ñaite.

<sup>14</sup> Ie jira Jesús caimo marefodo llote:

—Naimie jai fiodaite.

<sup>15</sup> Nainomo cue iñena jira, cue siño uai omoi inollena, omoi facaina iobidicue. Naimie dine mai cai jailli.

<sup>16</sup> Caïmona Tomás caïmo llote:

—Maiña. Naimie diga fiodaisaiticai —llote. Tomás mameci jiaicidi Dídimó. Naimiedi gorasa.

*Jesús Marta diga ñaia rafue*

<sup>17</sup> Betaniamo cai ria, Lázaro raiafomo jai nagaamagarui illana fididicai.

<sup>18</sup> Jerusalémóna Betaniamo tres kilómetro dinori illa jira,

<sup>19</sup> diga judíuai illaicomini eedollena, Marta iaifíuai María dine bitimaci.

<sup>20</sup> Jesús billana Marta fidiano, cai dine naisomo bite; iadedi jofomo María fiebide.

<sup>21</sup> Jesúsno Marta llote:

—Nama, o bene itiona, cue iio fiodaiñede;

<sup>22</sup> iadedi Jusiñamuiimo buena o jicaia, naimie iena finoite. Iena uiñoticue.

<sup>23</sup> Jesús dinena uai ote:

—O iio abido jilloite.

<sup>24</sup> Naiñaiño uai ote:

—Nana comini jilloilliruiimo naimie jiai jilloite. Iena uiñoticue.

<sup>25</sup> Jesús uai ote:

—Fiodaillamona comini abiaina jilloitaraimadicue. Jusiñamui diga jaca illena, cominina itataraimadicue. Bu cuena inuanona, fiodaiadedi, iemona ico jilloite.

<sup>26</sup> Cuen a inotimiena Jusiñamui illanomo jaca illena itataiticue. ¿Iena inotio?

<sup>27</sup> Naiñaiño uai ote:

—Jii, Nama; odi cai jilloitaraimadio. Odi Jusiñamui Jitodio. Jusiñamui dinena o billamo jai e ocuiridicai.

<sup>28</sup> Iese raillanona, jofomo Marta abido jaide. Ie euiñona uaiduano, anado llote:

—Llofueraima jai ride. Ona uaidote.

<sup>29</sup> Iena cacajano, raire cai dine María bite.

<sup>30</sup> Marta diga ie ñaianomo Betania ecimo Jesús nia ite.

<sup>31</sup> Jesús dine María nia jaiñenia, judíuai illaicominidi Mariana nia eedotimaci. María jino jaillana ciuano, racadimaci. “Raiafomo eellena naiñaiño jaide” raillanona comeciaina facadimaci.

<sup>32</sup> María Jesús dine rillano, naimiena duenaillano, caiñici ifodo rainadacaida, llote:

—Nama, bene itiona, niadedi cue iiodi fiodaiñede.

*Jesús Lázaron a jillotaja rafue*

<sup>33</sup> María eiana Jesús ciuano, naiñaiño diga bitino eiana ciuano, naimie comeci eo sunaite. Sunaillamona, jafaicina faite.

<sup>34</sup> Jicanote:

—¿Ninomo Lázaron a raitomoi?

Uai otimaci:

—Nama, mai jibuisaibi.

<sup>35</sup> Lázaron a duenaillanona, Jesús eede.

<sup>36</sup> Iena ciuanona, judíuai illaicomini dinena llotimaci:

—Ero. Naimiena eo isiruite.

<sup>37</sup> Jiaino raitimaci:

—Navui uisnidimiena jillotate. ¿Bue ñellena bimiena jilloitañede, naimie nia fiodaiñenia?

<sup>38</sup> Iena cacajanona, ie siño uai finuana naimaci nia raise inosifena jira, Jesús comeci dane sunaite. Oni jaillanona, raiafomo ridicai. Nofici motomo ite naie raiafo. Ifodi jiaie noficina ibaica.

<sup>39</sup> Jesús llote:

—Nofici oni ñuita.

Marta dinena naimie uai ote:

—Nama, naimie abi jai sorirede. Nagaamagarui raiafomo jai ite.

<sup>40</sup> Jesús uai ote:

—Cuen a inoia, Jusiñamui uai siñonana uiñoitio.

<sup>41</sup> Iemona cominidi noficina oni ñuitadimaci. Jesús monamo eruaillano, llote:

—Moo, cue uaina o cacaja jira, iobidicue.

<sup>42</sup> Jaca cuena cacadio. Iena uiñoticue; iadedi cue diga bene itino illa muidona, iese ado lloticue. Cuen a o oretajana naimaci inollena, o diga ado ñaiticue.

<sup>43</sup> Ie mei eo ado llote:

—Lázaro, jino bi.

<sup>44</sup> Nai fiodaitimie nia naimie abi nana ferinua ra diga jino bite. Jesúsdi cominimo llote:

—Naimie abi ferinua oni suiño. —Ie jira suiñodimaci.

<sup>45</sup> Ie muidona María diga bitinomona ailluena comini Jesúna inotimaci. Naimie finoca rafuena cianona, inotimaci.

*Jesúna meinellena, illaicomini comeciaina facaja rafue  
(Mt 26.1-5; Mr 14.1-2; Lc 22.1-2)*

<sup>46</sup> Jesúna inoñedinomona damierie Jesús finoca rafuena fariseuai dine lluidimaci.

<sup>47</sup> Ie jira Jusiñamui diga nanoca ñairaini, fariseuai diga, danomo ofidimaci. Jesús rafuena siadotimaci:

—¿Niese naimiena nibaiticai? Diga siño rafuena ua finocabide.

<sup>48</sup> Naimiena niese cai nibañenia, nana comini naimiena inoitimaci. Nana comini naimie dibeimo jaia, naimaci illaimana naimie jaillana jitaitimaci. Iemei romanos soldaduai biitimaci. Jusiñamui jofona judaiaibitimaci. Cai nairaiaina jiai fuidoitimaci. Iena jitaitiedicai.

<sup>49</sup> Naie facaise nanoca Jusiñamui diga ñairaimana Caifás illamona, naimacimo llote:

—Naimie rafuena raise uifioñedomoi.

<sup>50</sup> Iese cai nairaimo suiñellena, damie cai nairai facaina fioldaitena, mare. Iena nibai nia raise uifioñedomoi.

<sup>51</sup> Ie comeciina dama facajano, iese lloñede; ia Jusiñamui diga nanoca ñairaimana naimie illamona, Jusiñamui naimiena buena llotatate:

—Jesúdi cai comini facaina fiodaite.

<sup>52</sup> Cai comini facaina dama fioldañede; iadedi nana Jusiñamuina inoitinona facaina fiodaite. Diga nairaiaimo itimaci; iadedi naimiemo dajena nana naimaci duillena, naimie fiodaite.

<sup>53</sup> Caifás lluana naimaci cacajamona, judíuai illaicomini comeciaina nia facadimaci, naimiena meinellena.

<sup>54</sup> Ie jira Jesús judíuai illaicomini illa motodo marefodo macariñede. Jofue ifena dofodo jaidicai. Efraín railla nairai dine ridicai. Nainomo diga irui iticai.

<sup>55</sup> Pascua railla rafue iaire iacana jira, ailluena comini Jerusalémo naimaci nairaiaimona jaidimaci. Rafue nia taineñenia, naimacimo ite rafue oni jaillena, cai einamací llua isoi finodimaci.

<sup>56-57</sup> Jusiñamui diga nanoca ñairainidi fariseuai diga navui ñaitimaci:

—Bu Jesúna cioia, naimiena cai gaitallena, caimo llono.

Rafuemo bitino illamona, Jesúna jenodimaci. Jusiñamui jofomo naimaci ia, coninimo jicanododimaci:

—¿Niese comeciaina facadomo? ¿Jesús bene biite? Cai illaicomini llua jira, nibai jai biñeite. Illaicomini llua fidiano, naimie biñeite.

## 12

*Betaniamo Lázaro jofomo Jesús guilla rafue*

*(Mt 26.6-13; Mr 14.3-9)*

<sup>1</sup> Pascua railla rafue rilledi seis digarui fiebidemo, Jesús cai diga Betaniamo jaide. Betania Lázaro illano. Jesús Lázaronna fiodaillamona navui jillotate.

<sup>2</sup> Jesúri iobillano, Lázaro ie guille rafuena finode. Marta guille bai jonega. Jesús diga guitino motomo Lázaro ite. Jesús llofueoicaiganodicai; jiai motomo guiticai.

<sup>3</sup> Iemei Mariadi nardomona finoca caimare soride ra Jesús eillimo totade. Daje botella raifi totade. Safenaillena naiñaiño ifotie diga ie eillina dote. Nai caimare soride ra eo raifide. Daje botella ite. Iemona nana jofo jeraidi soride.

<sup>4</sup> Caimona Judas Iscariote micorina mameciredimie ite. Jesúna gaitataitimie. Llote:

<sup>5</sup> —¿Bue ñellena bie soride radi fecañede, ucubena ollena? Fecacadena, trescientos digarui maijia ucube diese raifide. Ie mei nai ucube dueredinomo fecadena, mare —llote.

<sup>6</sup> Dueredinona naimie duenañede; iadedi naimie cai ucubena sedade. Naimiedi firiraima. Naie ucubemona fiuilla jira, iese naimie llote.

<sup>7</sup> Jesús uai ote:

—Dama ite. Bie soride ra naiñaiño jai eenoga cue fiodaillirui iena.

<sup>8</sup> Dueredino omoi diga jaca iitimaci; iadedi omoi diga jaca iñeiticue.

*Ailluena comini Lázaronna ciua rafue*

<sup>9</sup> Lázaro jofomo Jesús illana ailluena cai illaicomini fidiano, bitimaci. Navui fiodaillamona Lázaronna Jesús jillotaja jira, Jesúna dama cioiacañedimaci; iadedi Lázaronna jiai cioiacadimaci.

<sup>10</sup> Ie jira Jusiñamui diga nanoca ñairainidi Lázaronna jiai meinellemo comeciaina facadimaci.

<sup>11</sup> Lázaro muidona ailluena judíuai illaicomini naimaci illa dibeí faionocaida, Jesúna inotimaci.

*Jerusalémo illaíma isoi, Jesús mareña jailla rafue*  
(Mt 21.1-11; Mr 11.1-11; Lc 19.28-40)

<sup>12</sup> Pascua railla rafue illa jira, ailluena comíni Jerusalémo itimaci. Egiptomona cai jaiagai jillobillana comecillena naie rafue ite. Jesús Lázaro diga guillarui ie areruido Jesús Jerusalémo billana naie comíni fididimaci. Fiodaillamona Lázaroná Jesús navui jilloitajana diga comíni ciodimaci. Iena llocana uitimaci. Ie jira ailluena comíni Jesús dine jaidimaci.

<sup>13</sup> Raforona uanona, naimiena feiñollena, naimie uicomo jaidimaci. Ado cuiirisite:  
—¡Cai Jilloitaraima billa! ¡Jusiñamui mamecido bitimie eo mare! ¡Cai Illaíma eo mare! — cuiirisite.

<sup>14</sup> Jesúsdi ailli baiga burrito emododo jaide. Jusiñamui facaina lloraima micori jaie llua isoi jaide. Jaie llote:

<sup>15</sup> “Jerusalén imaci, jacinaiñeno. O Illaíma burrito emododo biite”.

<sup>16</sup> Naie facaise bie rafuemo comeciaina facañedicaí; iadedi Jesús jillua mei, bie rafuena cometicai.

<sup>17-18</sup> Lázaroná Jesús jillotaja jira, ailluena comíni Jesús dine jaidimaci.

<sup>19</sup> Tena ciuano, fariseuai coniniri ñaitimaci:

—Jaca buena birui finoñedicaí. Ailluena comíni Jesús díbeimo jai jaidimaci.

*Judíuañedino Jesúsna cioiacana rafue*

<sup>20</sup> Judíuañedino Jusiñamuina sedallena, pascua railla rafuemo jiai bitimaci.

<sup>21</sup> Naie facaise cai dine bitimaci. Felipedi Galilea ie Betsaida nairai imiena jira, Felipe dine bitimaci. Felipemo llotimaci:

—Jesúna cioiacadicaí.

<sup>22</sup> Felipe iena Andrémo llote. Ie mei Jesúsno lluaídiaímaíai.

<sup>23</sup> Jesús uai ote:

—Monamona biticue; ia jai cue fiodaille facaise ride. Comíni cue uaidi siñonana uíñua facaise jai ride.

<sup>24</sup> Jiaie rafuedo iena lloiticue. Ido rilla mei, naie ido sicoñenia, buena íñede; iadedi sicuamona, ailluena llisilladi iite. Ie isoide. Cue fiodaiñenia, jaca bu jillobiñeite. Cue fiodaillamona ailluena comíni jillobitimaci.

<sup>25</sup> Ie abimo ite rafuemo comecina dama bu facaia, ja muidomo faifite; ia cuemo ite rafuemo comecina bu facaia, monamo jaca iite.

<sup>26</sup> Cuena bu raise sedaacania, cue rafuedo naimie jaite. Cue llofuegamiéna naimie jaillamona, cuemona fueoite. Iemona cue Moodi naimiena caimare itataite.

<sup>27</sup> Cue comeci jai rucaicuerite; iadedi, ¿ñiese raiticue? Raiñeíticue: “Moo, cue fiodaillamona cuena jillote”. Fiodaillena biticue. Ie jira raiticue:

<sup>28</sup> “Moo, comínina o uai siñonana uíñota”.

Ieconí monamona Jusiñamui llote:

—Jai iena finodicue. Dane iena finoíticue.

<sup>29</sup> Jusiñamui ñaiana nainomo ite comíni raise cacaiñenano, raitimaci:

—Mona gurude.

Jiaino raitimaci:

—Naimiemo Jusiñamui jaienicí llote.

<sup>30</sup> Jesús uai ote:

—Cue facaina naie lluaña cacaiñedomoi; iadedi omoi facaina iena cacadomoi.

<sup>31</sup> Cuena uíñoñedino duere sefuilla facaise ja taineite. Taife anamo comíni jai itimaci; ia Jusiñamui Taifena ja anafefitaite.

<sup>32</sup> Cruzmo cue fiodaía, naimacina jilloitallena, ailluena comínina cue díbeimo itataitacue.

<sup>33</sup> —Naimie fiodaillana naimaci uíñollena, íese llote.

<sup>34</sup> Naie comíni uai otimaci:

—Jusiñamui facaina llorainí micoriaí jaie cuela: “Cai Jilloitaraima jaca fiodaiñeite”. ¿Ñiese raitio: “Jusiñamuimona biticue; ia fiodaiticue”?

<sup>35</sup> Jesús dane uai ote:

—Cue llofuaí dínorí omoi comeciaina nia lligaiñoticue. Cue lluaño cacarei. Omoi diga cue nia ía, cue llofuaño cacarei. Jitiredemo bu macaria, nai illana raise uíñoñede. Ie isoide. Jeacino anamo itinodí jitiredinomo itimaci isoidimaci. Uanaicínona uíñoñedimaci.

<sup>36</sup> Jeacino anamona omoi jilloillena, cue llofuaí uaido omoi comeciaina birui lligaiñoticue. Cue uaina ñno, cue comínina omoi jaillena.

Bie llua mei, Jesús oni jaillano, naimacimona reirite.

*Comíni Jesús uaina ñnoñena rafue*

<sup>37</sup> Jesús diga siño rafuena finode; iadedi ailluena comíni: “Naimiedi cai Jilloitaraima” raillana nia ñnosíñede.

<sup>38</sup> Iemona Isaías micorí jaie cuegafuiai suide. Naimie jaie cuega: Jusiñamui, cai lluacinona cacadimaci.

O siño uaido o finoca rafuena jiai ciodimaci; iadedi ñinoñedimaci.

<sup>39-40</sup> Isaías micorí dane cuega:

Naimaci ctoi raillano, Jusiñamui naimacina uisnidino isoi itatate.

Naimaci comeciainona abina uiñoi raillano, naimaci comeciaina feitate.

Naimiena ñinoi raillano, iese naimacina jai itatate.

Ie jira jai ñnonidimaci.

<sup>41</sup> Jusiñamui ie ebirede rafuena naimie ciuamona, Isaías micorí iena llote. Isaías micorí Jesúna llote.

<sup>42</sup> Isaías micorí iese llote; iadedi ailluena judíuai illaicomini Jesús uaina ñnotimaci. Fariseuaina jaciruillanona, iena janotimaci. Naimaci ofracomona naimacina jino dotajana jaciruitimaci.

<sup>43</sup> Comini naimacina iobitajana naimaci eo jitailla jira, dotajana jitañnedimaci. Jusiñamuimo ite iobillacinona raise oiacañnedimaci.

### *Jesús ie Moona ñaia rafue*

<sup>44</sup> Naie facaise Jesús eo ado llote:

—Cuenta ñnotimie cuenta oretatimiena jiai jai ñnote.

<sup>45</sup> Cuenta ciodimie cuenta oretatimiena jiai ciode isoide.

<sup>46</sup> Comini comeciaina ligaiñollena biticue. Ie muidona naga cuenta ñnotimie jitiredinomo jai ññede. Jeacino anamo jai ññede.

<sup>47</sup> Cue uaina cacajano ñinoñedimie mo juez isoi birui lloñedicue. Cominina duere finollena, biñedicue; iadedi naimaci jeacinomona naimacina jilloitallena biticue;

<sup>48</sup> Ia cuenta bu ñinoñenia, cue uaina naimie ñinoñenia, ja muidona faifite. Cue uaina naimie ñinoñellemona, nana naimiena ñinoñedino janafefilliruimo Jusiñamui naimiena ico duere finoite. Cuenta jitañnedimie, cue uaina jitañnedimie comini janafefilliruimo janafefite.

<sup>49</sup> Dama cue comeci facaja uaido lloñedicue. Cue Moo cuenta oretaja muidona, cue Moo cuemo lloga uaido lloticue.

<sup>50</sup> Cue Moo lloga uaidi naimie dibeimo cominina jaca itatate. Iena uiñoticue. Ie jira cue Moo cuemo lloga uaina jaca lloticue.

## 13

### *Jesúdi ie llofueoicaigano eilliaina jocua rafue*

<sup>1</sup> Pascua railla rafue riacana areruido ia, Jesús ie Moo dine abido jaiacanana uiñote. Naimaci diga naimie ñia ia, ie cominina jaca eo isiruite.

<sup>2</sup> Jesúna gaitatallena, naie facaise Taifedi Judas Iscariote micorí comecina feidote. Judas micorí Simón jito.

<sup>3</sup> Jesúdi ie uai ie Moomona feiñuana uiñote. Ie Moo dinena billana uiñote. Ie Moo dine abido jaillena jiai uiñote.

<sup>4</sup> Nairuido Jesús cai diga guite. Guilla meinoconi, Jesús a naidacaida ie abimo ite ñiroina duiñode. Abi dora diga ie moillina ferinote.

<sup>5</sup> Janorede nogomo jinuina totaja mei, cai eilliaina jocode. Safenaillena, ie dora diga dote.

<sup>6</sup> Simón Pedro dine naimie ñia, Pedro jicanote:

—Nama, ¿cuenta eillina jiai jocoitio?

<sup>7</sup> Jesús uai ote:

—Cue finoca rafuena birui uiñoñedio; iadedi jiairuido uiñoitio.

<sup>8</sup> Pedro uai ote:

—Cue eillina jaca jocoñeitio.

Jesús uai ote:

—O eillina cue jocoñenia, cue facaina ññeitio.

<sup>9</sup> Pedro uai ote:

—Nama, dama cuenta eillina jocoñeno. O facaina raise cue illena, cue onolli, cue ifogí diga, jiai joco.

<sup>10</sup> Jesús uai ote:

—Nana o abina jocoñeiticue. Da o eillina jocoiticue. Jai noidimie mena icañño noññede. Ie abi jai jeanide. Dama ie eillina ñibaí dane jocoacade. Omoi comeciái jiai jai jeanide; iadedi omoi mona damie comeci ñia jearede.

<sup>11</sup> Naimiena gaitataicadimiena naimie uiñua jira, iese llote.

<sup>12</sup> Cai eilliaina jocua mei, ie ñiroi dane jitaja mei, dane ana rainadajanona, caimo jicanote:

—Omoimo ailli cuenta finoca rafuena ñibaí raise cacaiñedomoi.

<sup>13</sup> Cuena “Cai Nama” raicabitomoi. “Cai llofueraima” cuena jiai raicabitomoi. Iese cuena omoi raia, mare. Ie isoi iticue.

<sup>14</sup> Omoi Namadicue. Omoi llofueraimadicue; iadedi omoi mullaïma isoi iticuedena, omoi eilliaïna jai jocodicue. Omoi jamai bue isoidinomona, omoi eilliaïna danirie jocua.

<sup>15</sup> Cuemona fueo. Abi iedoñeno cue isoi omoi jai. Cue afemo iñedomoi.

<sup>16</sup> Uanai omoïmo lloticue. Mullaïma ie nama afemo iñede. Oretagamie ie oretatimie afemo iñede. Ie isoide. Cue afemo iñedomoi; ia omoi eilliaïna jocodicue. “Jaiimie afemo iticai” raillanomo começina omoi facañeno.

<sup>17</sup> Bicino omoi uifñuamona, iese omoi fiñoia, caimare iitomoi.

<sup>18</sup> Nana omoïna iese ñaiñedicue. Nana cue fetocanona uifñoticue. David micori jaielote: “Cue diga gutinomona damie cuena enoidimie ite”.

<sup>19</sup> Bie nia suiñenia, iena jai lloticue. Iena cuemo suilla mei, David micori llogacino raise iinoitomoi.

<sup>20</sup> Uanai lloticue. Cue oretagamiena bu feiñoia, cuena jiai feiñote. Bu cuena feiñoia, cuena oretatimiena jiai feiñote.

*Jesúdi ie gaitataitimienna llua rafue  
(Mt 26.20-25; Mr 14.17-21; Lc 22.21-23)*

<sup>21</sup> Jesús iese llua mei, ie comeci sunaite. Llote:

—Uanai lloticue. Omoimona damie cuena gaitataite.

<sup>22</sup> Caimona çnimie naimienna gaitataite? raillanona, começina facajano, coninimo eroridicai.

<sup>23</sup> Cuena Jesús eo gaia jira, Jesús abimo iticue.

<sup>24</sup> Cuena uaiduanona, Pedro cuemo llote:

—“¿Bu ona gaitataite?” Jesúmo jicano.

<sup>25</sup> Ie jira Jesúmo jicanoticue:

—Nama, ¿bu ona gaitataite?

<sup>26</sup> Jesús uai ote:

—Bie llomenicon mutajanona, naimiemo fecaiticue —raite. Mutaja mei, Judas micorimo fecade. Naimie micoridi Simón Iscariote jito.

<sup>27</sup> Llomenicon guilla meinononi, Taife anamo Judas micori illamona, Taife naimie começina feidote. Jesús naimiemo llote:

—O fiñoacaga rana raire fino.

<sup>28</sup> Jesús Judas micorimo llua raise uifñoñedicai.

<sup>29</sup> Judas micori ucubena sedaja jira, jiaïno começina facade: “ ‘Cai jitaïlle guille ibarisai’ Jesús naimiemo llote”. Iese lloñenia, “ ‘Janore ucube dueredinomo feca’ nibai naimiemo llote”.

<sup>30</sup> Guilla mei, Judas micori jino jaide. Naie facaise jai jitreñicaide.

*Jesús ie fiodaïllena ñaia rafue*

<sup>31</sup> Judas micori jailla mei, Jesús llote:

—Jusiñamui mona billanona, imana jaidicue; ia cue fiodaïlle facaise jai ride. Cue fiodaïllemona cominidi Jusiñamui uai siñonana uifñoitimaci.

<sup>32</sup> Temona Jusiñamui uai siñonana comini uifñoia, Jusiñamuidi cominina cue siño Jitona jiai uifñoitaite. Iese ja fiñoite.

<sup>33</sup> Cue comini, dallu omoi diga bene iticue. Jaiticue. Cue diga iacanitomoi. Judíuai illaicominimo navui cue llua isoi, omoïmo ja lloticue. Cue jaïllinomo nia jaiñeitomoi.

<sup>34</sup> Ie jira jiaie rafuena omoïmo ja lloticue. Omoïna cue isiruilla isoi, coninina omoi isirui.

<sup>35</sup> Coninina omoi isiruillamona, jiaie cominidi cue cominidomoina uifñoitimaci.

*Pedro Jesús diga ñaia rafue  
(Mt 26.31-35; Mr 14.27-31; Lc 22.31-34)*

<sup>36</sup> Naie facaise Pedro naimiemo jicanote:

—Nama, çnine jaitio?

Jesús uai ote:

—Cue jaïllinomo cue diga ja jaiñeitio. Jaiiruido jaitio.

<sup>37</sup> Pedro uai ote:

—Nama, ¿bue ñellena ja jaiñeticue? O jitaia, o facaina ja fiodaicue.

<sup>38</sup> Jesús dinena uai ote:

—Cue facaina fiodaicadio. Uanai omo lloticue. Nia monañenia, iitava nia ñañenia, dacaño amani cuena janoitiosa.

## 14

*Jesús ie Moo dinomo rille rafue*

- 1 Jesús ie llofueoicaiganodicaina nia llofue:
   
—Rucaicueriñeno uri i. Jusiñamuina iinocana jai. Cuena jiai iinocana jai.
   
2 Cue Moo illanomo diga comini illanuai ite. Iese iñedena, omoimo jai lloticue. Omoi illinuaina raise finollena, nainomo jaiticue.
   
3 Fuiduanona, dane abido biiticue. Omoína cue dine uillena, cue dine omoi illena, biiticue.
   
4 Cue jaillinona birui uiñotomoi. Nainomo omoi rillena jiai uiñotomoi.
   
5 Tomás uai ote:
   
—Nama, o jaillinona uiñoñedicaí. ¿Niése nainomo riiticaí?
   
6 Jesús uai ote:
   
—Omoi naiso isoidicue. Uanaicinona lloticue. Cue Moo dibeimo cominina jaca itataticue. Cue Moo dine joide naiso isoidicue. Jaca dasode cue Moomo duide naidi. Cue Moo dine o ria, cuena iino.
   
7 Cuena uiñotomoina, cue Moona jiai uiñotomoi. Biruidemona naimiena uiñotomoi. Naimiena jai ciodomoi.
   
8 Felipe uai ote:
   
—Nama, o Moona caimo acata. Iemo jai macaibaite.
   
9 Jesús uai ote:
   
—Felipe, are omoi diga iticue; iadedi cuena nia uiñoñedomoi. Cuena ciotimie cue Moona jiai jai ciode isoide. ¿Niése llotio: “O Moona caimo acata”? Cue Moona jai ciotio isoidio.
   
10 Cue Moo diga daajedicoco. Iena nia iinoñedio. Cue lluadi cue Moo uai. Cue lluadi cue comeci iuañede. Cue motodo naimie maijide.
   
11 Cue Moo diga daajedicocona iino. Cue uaina omoi iinoñenia, siño rafuena cue finua jira, cuena iino.

*Jesús ie Moo Joreña llua rafue*

- 12 Jesús nia llofue:
   
—Uanai lloticue. Cuena omoi iinoia, cue finoca rafuena jiai finoitomoi. Cue Moo dine cue jailla jira, cue Moo Joreña omoi dine cue oretaja mei, cue finua baiferno finoitomoi.
   
13 Cue Moo uai siñonana omoi uiñollena, buena cue dibeido cue Moomo omoi jicaia, nana iena finoiticue.
   
14 Cue dibeido omoi jicaia, iena finoiticue.
   
15 Cuena omoi isirua, cue llogacinuaina iinoitomoi.
   
16 Ie Joreño omoimo fecallena cue Moomo juiticue. Naie Joreñodi omoína canoite. Omoi diga jaca iite.
   
17 Uanaicinona llocabite. Naimiena naimaci uiñoñena jira, cuena iñoñedino naimiena feiñonidimaci; iadedi naimie omoi diga illa jira, naimiena uiñotomoi. Omoi diga jaca iite.
   
18 Omoína fainonocaiñeticue; ia dane biiticue.
   
19 Nano nigarui illanona, cuena iñoñedino cuena nia ciotimaci. Ie mei cuena ciotimaci; iadedi fiodaillamona cue jillua mei, cuena nia ciotomoi. Cue jaca illa jira, jiai jaca iitomoi.
   
20 Fiodaillamona cue jillua mei, cue Moomo cue duillana raise uiñotomoi. Cuemo omoi duillana jiai raise uiñotomoi. Omoimo cue duillana jiai raise uiñotomoi.
   
21 Cue llogacinuaina omoi isirua, cuena isiruitomoi. Ie jira cue Moodi omoína jiai isiruite. Omoína jiai isiruiticue. Omoína cuena uiñotaiticue.
   
22 Iscariotena mamecifeñede Judas naimiemo jicanote:
   
—Nama, ¿bue ñellena dani caina ona uiñotaitio; iadedi jiaie cominina ona uiñotañeitio?
   
23 Jesús uai ote:
   
—Cuena isiruitinona cue rafuena uiñotadicue. Bu cuena isirua, cue llogacinuaina iinoite. Cue Moo naimiena isiruite. Iemona naimiena nabaiticoco.
   
24 Bu cuena isiruiñenia, cue llogacinuaina iñoñede. Cue llogacinodi cuejeñede. Cue Moo ie. Naimie cuena oretate.
   
25 Omoi diga nia cue illamona, bie llogacinuai omoimo jai lloticue.
   
26 Cue Moodi omoína canollena, naga rafuena omoína llofuellena, cue facaina ie Joreña omoimo oretate. Omoína nana omoimo llogacinuaina comecitaite.
   
27 Cue Moo dine jaiticue; iadedi omoi comeciaina uri itataticue. Cuena iñoñedino omoi comeciaina iese itatanidimaci. Jarire iñeno. Jaciruiñeno.
   
28 Ailli cue lluaana cacadomoi: “Cue Moo dine jaiticue; iadedi dane biiticue”. Cue Moo dine cue jailla jira, cuena omoi isirua, cueri iobitomoi. Cue Moo cue afemo ite.

<sup>29</sup> Bie rafue cuemo nia suiñenia, uicodo omoimo iena jai lloticue. Naie suia, cuena faimonocaiñeno omoi jaillena jitaicue.

<sup>30</sup> Omoi diga are nia ñaiñeticue. Cuena ñinoñedino anamo itimie cuena jai duere finoacade. Taifena ñaiticue. Naimie anamo iñedicue;

<sup>31</sup> Iadedi cue Moona cue isiruillana cuena ñinoñedino uiñollena, cue Moo cuemo llua isoi, finoiticue. Mai cai jailli.

## 15

### *Uvas railla riarar ie rafue*

<sup>1</sup> Jesús nia llofuede:

—Cue dibeimo marena omoi illena omoi raise uiñollena, jiaie rafuedo iena llofueticue. Uvas railla ua riaradicue. Cue Moodi uvas railla riarar sedaraima.

<sup>2</sup> Cue amena igaillaïdomoi. Llisiñede igai cue Moo cugaica. Eo llisillena, naga lliside igaina janore muido jaigaica. Ie isoide.

<sup>3</sup> Cue llogacinuaido jaillamona, jai jaigaica isoidomoi. Iemona omoi comeciai jai jeanide.

<sup>4</sup> Cuena nabai. Ona jiai nabaiticue. Naie amenamo jai duiñena jira, daje dibegaise jaitaca igaidi jai llisiñede. Ie isoide. Cuena omoi nabaicabiñenia, llisiñede igai isoidomoi. Ie jira cuena nabai.

<sup>5</sup> Uvas railla riaradicue. Cue amena igaillaïdomoi. Cuemo omoi duiadedi, omoimo cue duiadedi, eo lliside isoidomoi; iadedi cuemo omoi duiñenia, jaca llisiñede isoidomoi. Cuemo omoi duiñenia, cue jitailla isoi mare rafuena jaca finoñeitomoi.

<sup>6</sup> Jai duide igaillaï safenailla mei, maraiñena jira, jobaillena, danomo ofitaticai. Cuemo duiñedimie jai duide igai isoide. Jusifiñamumona duere sefuite.

<sup>7</sup> Cuena omoi nabai, cue uaina omoi feitañenia, omoi jitailla rana jica. Ie mei feiñoitomoi.

<sup>8</sup> Eo lliside omoi isoia, cue Moo iobide. Iese omoi ia, ua cue cominidomoi. —Iese Jesús llofuede; ia naimie dibeimo naimaci raise illena ñaite. Mare rafuena naimaci finocana jaillena ñaite.

<sup>9</sup> Nia llofuede:

—Cuena cue Moo isiruilla isoi, omoina isiruiticue. Cuena nabaicabi.

<sup>10</sup> Cue Moo llogacinuaina cue ñnuamona, naimie isiruillacino anamo iticue. Cue Moo llogacinuaina omoi ñnuamona, cue isiruillacino anamo itomoi.

<sup>11</sup> Cue isoi omoi comeciai eo caimarellena, bicinuai omoimo lloticue.

<sup>12</sup> Dane bie rafuena lloiticue. Omoina cue isiruilla isoi, coninina omoi isirui.

<sup>13</sup> Naimaci o isiruillamona, o nabaiñiaï facaina o fiodaia, naimacina eo ua isiruitio.

<sup>14</sup> Cue llogacinuaina omoi ñnoia, cuena nabaidomoi.

<sup>15</sup> Omoina “Cue mullaiaïdomoi” jaca raiñedicue; iadedi omoina “Cue nabaiñiaïdomoi” birui raiticue. Mullaiaï imaci patrón finoca rafuena uiñoñedimaci. Ie jira nana cue Moomona cue cacaja rafuena omoimo jai lloticue. Ie jira nana cue rafuena jai uiñotomoi.

<sup>16</sup> Cuena fetoñedomoi; iadedi omoina fetodicue. Omoi lliside isocabillana omoimo jai lloticue. Ie mei buena cue mamecido cue Moomo omoi jicaia, omoimo fecaite.

<sup>17</sup> Coninina omoi isiruillena jai lloticue.

### *Comini Jesúna enoilla rafue*

<sup>18</sup> Jesús nia llofuede:

—Cuena ñinoñedino omoina enoia, nano cuena jai enoidimaci. Iena uiñotomoi. Omoina nia enoiñenia, cuena jai enoidimaci.

<sup>19</sup> Naimacimo jainaiaïdomoina, omoina isiruitimaci; iadedi naimacimo omoi jainaiañena jira, omoina cue fetua jira, omoina enoidimaci.

<sup>20</sup> Omoimo jai lloticue. Illaïma duere sefua, naimie anamo itino jiai duere sefuidimaci. Ie isoide. Cuena comini duere finua isoi, omoina jiai duere finoitimaci. Cue llofuiaçinona naimaci ñnu isoi, omoi llofuiaçino jiai ñnoitimaci.

<sup>21</sup> Cuena oretatimiena naimaci uiñoñena jira, cue muidona iese finoitimaci.

<sup>22</sup> Naimacimo ite jeacinona naimacimo lloñedicuena, naimacimo ite jeacinona uiñoñedimaci. Cue rafuena naimaci cacajamona, naimacimo ite jeacinona jai uiñotimaci. Naimacimo jeacino nia ia, naimaci muidona.

<sup>23</sup> Cuena enoidimiedi cue Moona jiai enoide.

<sup>24</sup> Eo siño rafuena naimaci motomo finodicue. Buna cue isoi jaca finoñede. Iena finoñedicuena, naimacimo ite jeacinona uiñoñedimaci. Cue siño finoca rafuena jai ciodimaci. Ie jira cuena enoidimaci. Cue Moona jiai enoidimaci.

<sup>25</sup> Naimacina David micori jaie llofe: “Naimacimo buena finoñedicue; ia cuena enoidimaci”. Naie cuelaiaï jai suide.



<sup>26</sup> Cue Moo ie Joreño omoimo oretaitae. Ie Joreño omoina canoite. Omoina uanaicínona uifñotaite.

<sup>27</sup> Cue nano lluaruimona cue diga omoi illa jira, cue facaisena jiaí raise lloitomoi.

## 16

*Judiuai illaicomini Jesús llofueoicaiganona duere finua rafue*

<sup>1</sup> Jesús nia llofueite:

—Danomo abido omoi jaiñellena, cue uaina omoi fainonocaiñellena, bicinuai omoimo ja lloiticue.

<sup>2</sup> Omoi ofracomona illaicomini omoina dotaitimaci. Jiairuido omoina meiniamona: “Jai Jusiñamuina marena sedadicaí”, comeciaina faacaitimaci.

<sup>3</sup> Cuena naimaci ñnoñena jira, cue Moona jiaí naimaci ñnoñena jira, iena finoitimaci.

<sup>4</sup> Bie rafue omoimo sua, naie facaise cue lluaana omoi comecillena, omoimo birui lloticue. Omoi diga cue illa jira, navui iena lloñedicue; iadedi omoimona birui oni jaiticue.

*Jesús Jusiñamui Joreña llua rafue*

<sup>5</sup> Jesús nia llofueite:

—Cuena oretatimie ñne ja jaiticue; iadedi omoimona buna: “¿Ñine jaitio?” cuemo jaca nia jicanoñede.

<sup>6</sup> Omoimo bie rafue cue llua jira, omoi comeciai eo sure ite. Ie jira cue jaillinona jicanoñedomoi.

<sup>7</sup> Uanaí lloticue. Cue jaia, mare. Cue jaiñenia, omoina canoraíma omoi ñne biñeite. Cue jaia, omoi ñne naimiena oretaiticue. Jusiñamui Joreñodi omoi canoraíma.

<sup>8</sup> Naimie bia, cuena ñnoñedinona naimacimo ite jeacinona uifñotaite. Naimiedi Jusiñamui marena naimaci illana jitaillana uifñotaite. Naimiedi Jusiñamui naimacina duere finollena jiaí uifñotaite.

<sup>9</sup> Cuena naimaci ñnoñenia, naimacina naimacimo jeacino nia illana uifñotaite.

<sup>10</sup> Cue Moo ñne abido cue jaillinona, cuena cioñeitimaci; ia iemona Jusiñamui Joreño cue uaina siñonana uifñotaite.

<sup>11</sup> Fiodailllemona jilloiticue. Iemona cuena ñnoñedinano anamo itimiedi cue Moo janafefillacino anamo iite. Taifena ñaiticue. Cue finoca rafue muidona, cue Moo Joreñodi cominina, cue Moo Joreñodi cominina naie janafefillemona jilluana uifñotaite.

<sup>12</sup> Diga rafue omoimo nia lloiacadicue; iadedi jai rairaífaidomoi.

<sup>13</sup> Jusiñamui Joreño bia, omoimo nana uanaicinuaina llofueite. Dama ie facaina llofueite; iadedi ie cacajacinodo llofueite. Jiairuido sulle rafuena llofueite.

<sup>14</sup> Omoina cue rafuena uifñotaite. Ie jira cuena iobitaite. Nana cue Moomo ite uaidi cueje.

<sup>15</sup> Ie jira bie rafuena lloticue. Jusiñamui Joreño omoina cue rafuena raise uifñotaite.

*Sunaillamona caimare illa rafue*

<sup>16</sup> Jesús nia llofueite:

—Dallu illanona cuena cioñeitomoi. Ie mei dallu illanona, cuena dane cioitomoi.

<sup>17</sup> Ie llofueoicaiganodicaimona damierie ñne coninimo jicanodosite:

—¿Ñiese caimo llote: “Dallu illanona, cuena cioñeitomoi. Ie mei dallu illanona, cuena dane cioitomoi. Cue Moo ñne jaiticue?”

<sup>18</sup> ¿Buena caimo llote? Raise cacaiñedicai.

<sup>19</sup> Cai jicanuana Jesús uifñuana, naimie jicanote:

—¿Cue lluaana raise uifñoiacadomoi?

<sup>20</sup> Cuemo sulle rafue sua, eo eeditomoi; iadedi cuena ñnoñedinano eo iobitimaci. Sunaitomoi; iadedi jiairuido caimare iitomoi.

<sup>21</sup> Jiaie uaido iena lloiticue. Riño jocoacania, naiñaiño jigico isirede. Jocua mei, naiñaiño urue jeicamona, isirenadi feibicaide. Iemona jai iobide.

<sup>22</sup> Ie isoide. Ja sunaitomoi; iadedi dane omoina cioiticue. Fiodaillamona cue jillua mei, dane cuena cioitomoi. Ie mei caimare iitomoi. Iemona omoina buna sure itatañeite.

<sup>23</sup> Nairuimo cuemo buena jicañeno; iadedi cue Moomo jica. Ie mei cue muidona naimie omoimo fecaite.

<sup>24</sup> Cue mamecido cue Moomo buena jaca nia jicañedomoi. Jica. Ie mei feiñoitomoi, omoi comeci eo caimare illena.

*Jiairuido Jesús marefodo llua rafue*

<sup>25</sup> Jesús nia llofueite:

—Jiaie uaido bicinona omoimo jai lloticue. Jiairuido iese lloñeiticue. Omoina cue Moona marefodo lloiticue.

<sup>26</sup> Nairuimo cue Moomo omoi facaina jicañeiticue. Cue mamecido cue Moomo omoi jitaillacinona dani jicaitomoi.

<sup>27</sup> Omoína naimie isiruillamona, omoimo fecajite. Cuena omoi isiruilla jira, cue Moomona cue billana omoi iinua jira, cue Moo omoína isiruite.

<sup>28</sup> Cue Moomona eniruemo biticue. Naimie dine abido jaiticue.

<sup>29</sup> Lloticai:

—Jai marefodo caimo llotio. O uaina meidocana jai uiñedio.

<sup>30</sup> Nana rafuena o uiñuana uiñoticai. Cai comeciaino iticinona o uiñuamona, caina raise uiñotio. Iemona Jusiñamuimona o billana jai iñoticai.

<sup>31</sup> Jesús uai ote:

—Cuena jai iñotomoi.

<sup>32</sup> Jiairuido, ua birui, oni tuuítomoi. Nagamiiai jofomo omoi jailla mei, dama ifoconi fiebiticue; iadedi dama iñeiticue. Cue Moo cue diga iite.

<sup>33</sup> Cuena omoi iinuano, omoi uri illena, omoimo bie lloticue. Eniruemo omoi ia, jaca duere sefuitomoi; iadedi omoi comeciaina ocuiño. Omoína duere finodinona jai cue emodofilla jira, omoi comeciaina ocuiño. Naimaci baifemo faiticue.

## 17

### *Jesús ie Moo diga ñaia rafue*

<sup>1</sup> Jesús bicinona llua mei, monamo eruailano, jide:

—Moo, cue fiodaicanarui jai ride. Cue uai siñonana uiñota. Iemei o uai siñonana jiai uiñotaiticue.

<sup>2</sup> Nana comini afemo cuena jai itatatio. Fimana cue jaillamona, nana comini afemo cuena jai itatatio. Comini comeciái uaina o meidotajamona, cue fiodaillacinona, ailluena comini o diga jaca iitimaci.

<sup>3</sup> Ona nanoca Jusiñamuina uiñoitimaci. Jai cuena o oretajana jiai uiñoitimaci.

<sup>4</sup> Ailluena siño rafuena jai finodicue. Nana o cuemo lloga rafuena cue finuamona, bene ona jai iobitadicue.

<sup>5</sup> Ore Moo, enirue nia iñena facaiseconi o diga iticue. Illaíma isoi o ecimo dane ebire iacadicue. Dane cuemo ine, daje isoi coco illesa.

<sup>6</sup> Comini comeciái uaina o meidotajamona, naimacina jai llofuecabiticue. O anamo naimaci illamona, omo ite rafuena llofuecabiticue. Iemona o rafuena iñocana jaidimaci.

<sup>7</sup> Nana cuemo ite rafue omona feiñoticue. Iena jai uiñotimaci.

<sup>8</sup> Nana cuemo o llogacinuaina naimacimo jai lloticue. Jai iñotimaci. Omona cue billana jiai jai iñotimaci. Cuena o oretajana jiai iñotimaci.

<sup>9</sup> Naimaci facaina birui jidicue. Naimacina cuena iñotadio. Ie jira omo jai duidimaci. Ona iñoñedinono facaina birui jiiñedicue.

<sup>10</sup> Nana o dibeimo itinodi cueje. Nana cue dibeimo itinodi oie. Nana naimaciri iobidicue.

<sup>11</sup> Bene eniruemo fiebitimaci. Eniruemona monamo jaiticue. O dine abido jaiticue. Ore Moo, jeacino naimaci finoí raillano, o anamo o uai diga naimacina seda. Coco comeci lloilla isoi, naimaci daje isoi comeciaina lloita.

<sup>12</sup> Naimaci diga nia cue ia, naimacina cue anamo sedadicue. Naimacina raise sedadicue, naimaci feirai raillano. Naimaci motomona dama Judas feirraite. Jusiñamui lloiraíma micori ciegafuiai suillena, naimie ua faifite.

<sup>13</sup> O dine ja jaiticue. Cue isoi naimaci comeciái eo caimare illena, naimacimo ailluena rafuena jai lloticue.

<sup>14</sup> O llogacinuaina jai lloticue. Ona iñoñedinomo naimaci jainaiñena jira, ona iñoñedinono naimacina enoidimaci. Ona iñoñedinomo jiai jainaiñedicue.

<sup>15</sup> Eniruemona birui o naimacina uana jicanofedicue; iadedi Taifemona naimacina o sedajana birui jicanoticue.

<sup>16</sup> Ona iñoñedinomo jainaiñedimaci. Ona iñoñedinomo jiai jainaiñedicue.

<sup>17</sup> O llogacinuaido naimacina marena itata. O llogacinuaidi uanaicino. O jitaillacinona naimaci finollena, o uai naimaci comeciaino raise itata.

<sup>18</sup> Bene cuena o oretaja isoi, ona iñoñedinono dine naimacina oretaticue.

<sup>19</sup> Uanaicinsona naimaci uiñuamona, naimaci comeciái marebicaillena, cuena iñotino facaina fiodaillacadicue.

<sup>20</sup> Bimacina birui dane jiiñedicue; iadedi bimaci cue rafuena íco lloia, jiaie comini cuena iñoitimaci. Cuena íco iñotino facaina birui jiai jidicue.

<sup>21</sup> Daajedicoco. Coco illa isoi, naimaci comeciaina daje isoi lloillena, nana naimaci facaina jidicue. Daje isoi comeciái lloillamona, cuena nia iñoñedinodi iñoitimaci. Iemona cuena o oretajana iñoitimaci.

<sup>22</sup> Cuemo o iga uaidi ebirede. Naimaci comeciai lloillena, naimacimo o uai jai cue iga.

<sup>23</sup> Naimaciri dajedicai. O diga daajedicoco. Naimaci comeciai daje isoi lloillana jitaicue. Iemona cuena inoñedino bene cuena o oretajana uifioitimaci. Cuena o isiruilla isoi, naimacina o isiruillana jiai uifioitimaci.

<sup>24</sup> Ore Moo, naimaci cue dine illena jitaicue. Enirue nia inenia, illaima isoi o ecimo ebire jaie iticue. Dane ie isoi ebire birui cue ia, naimaci cuena ciuana jitaicue.

<sup>25</sup> Ore Moo, mareuidimedio. Jiaie comini ona uifioñedimaci; iadedi ona uifioiticue. Cue llofueoicaiganodi o cuena oretajana jai uifioitimaci.

<sup>26</sup> Naimacimo ona jai lloticue. O cuena isiruilla isoi coninina naimaci isiruillena, naimacimo nia lloticue —jüide.

## 18

### *Jesúna gaitalle rafue*

(Mt 26.47-58; Mr 14.43-54; Lc 22.47-54)

<sup>1</sup> Jia mei, Jesús ie llofueoicaiganodicai diga, Cedrón railla iconi enefebeimo ruica aceituna railla riaraiailanomo naona jaide.

<sup>2</sup> Jesús cai diga nainomo jaisoilla jira, Judas micori naie illanona jiai uifioite. Jesúna gaitatallena nainomo Judas jaide.

<sup>3</sup> Soldaduai diga policías diga jaide. Naimacina ifode. Jusiñamui diga nanoca ñairaini naimacina oredimaci. Fariseuai naimacina jiai oredimaci. Soldaduaidi lamparínaiari bitimaci. Reinaiairi jiai bitimaci. Sidaniairi jiai bitimaci. Judas naimacina ifode.

<sup>4</sup> Jesúsdi nana naimiemo suille rafue uifioanona, naimaci dine billano, jicanote:

—¿Buna jenodomoí?

<sup>5-6</sup> Uai otimaci:

—Nazaret ie Jesús.

Jesús uai ote:

—Imiedicue.

Iena cacajano, jacinallamona, abido ñaijillamona, eniruemo uaidimaci. Jesúna gaitatallena, Judas micori naimaci diga ite.

<sup>7</sup> Jesús dane jicanote:

—¿Buna jenodomoí?

Uai otimaci:

—Nazaret ie Jesús.

<sup>8</sup> Jesús uai ote:

—Omoimo jai lloticue: “Imiedicue”. Cuena omoi jenoia, cue diga itino oni jaillena rairuiño.

<sup>9</sup> Naimie ie Moomo como lloga uai suillena, iese llotte. Iese ie Moomo como llotte: “Cuena o inotaganomona jaca buna faifioñedicue”.

<sup>10</sup> Ie daacaño Simón Pedrodi ie lloebi llinocaida, Jusiñamui diga nanoca ñairaima mullaima jefona jaibonote. Naie mullaima mamecidi Malco.

<sup>11</sup> Iena ciuanona, Jesús Pedromo llotte:

—O lloebina eeno. Cue Moo jitailla isoi, fioidaicue.

<sup>12</sup> Ie mei soldaduai, imaci capitán diga, judíuai imaci policías diga, Jesúna gaitajano, naimiena maitimaci.

<sup>13</sup> Anás dine nano uitimaci. Anásdi Caifás jifai. Caifásdi Jusiñamui diga nanoca ñairaima.

<sup>14</sup> Navui Caifás judíuai illaicominimo llotte: “Damie nana cai comini facaina fioidaitena, mare”.

### *Pedro Jesúna nano janua rafue*

(Mt 26.69, 70; Mr 14.66-68; Lc 22.55-57)

<sup>15</sup> Simón Pedro Jesús jinafo racade. Jiai racadicue. Cuena Jusiñamui diga nanoca ñairaima uifioa jira, ie nairairimo Jesús diga jaicue;

<sup>16</sup> iadedi Pedro nasemo fiebicade. Ie jira jino abido jaillano, Pedro fo atillena, nasena sedaraiño jicanoticue.

<sup>17</sup> Naiñaño Pedromo llotte:

—Jesús llofueoicaigano imedio.

Pedro uai ote:

—Ieñedicue.

<sup>18</sup> Rosirena jira, naie jofo mullaiai, policías diga, cooci diga irai bonodimaci. Agaillena irai ecimo naidaidimaci. Agaillena Pedro naimaci motomo jiai ite.

### *Jesús Anás dine illa rafue*

(Mt 26.59-66; Mr 14.55-64; Lc 22.66-71)

<sup>19</sup> Ie facaise Anás Jesúmo ie llofueoicaiganodicaina jicanote. Ie llofuiacinuaina jiai jicanote.

<sup>20</sup> Jesús dinena uai ote:

—Nana cominimo marefodo lloticue. Omoi ofiracuaimo jaca llofuecabiticue. Jusiñamui jofomo jiai jaca llofuecabiticue. Nainomo nana o comini oficabidomoi. Bainino buena jaca lloñedicue.

<sup>21</sup> ¿Bue ñellena birui cuemo jicanotio? Cuena cacadinomo iena jicano. Cue llofuiana uifnotimaci.

<sup>22</sup> Iese Jesús llua jira, daje policía naimie uiecona butade. Jesúmo jicanote:

—¿Bue ñellena iese uai otio?

<sup>23</sup> Jesús dinena naie uai ote:

—Naimie uai jeare oticuenta, cuemo llono. Jeare oñedicuemo, ¿bue ñellena cuena butadio?

<sup>24</sup> Jesús uai oñede. Iemei Anásdi Caifás jofomo Jesús maianona orede.

*Pedro Jesúsna dane janua rafue*

(Mt 26.71-75; Mr 14.69-72; Lc 22.58-62)

<sup>25</sup> Ie facaise Pedro irai ecimo nia agaide. Nainomo itino naimiemo llote:

—Jesús llofueoicaigano imiedio.

Pedro janote:

—Ieñedicue.

<sup>26</sup> Naie facaise daje mullaíma Pedromo llote:

—Aceitunas railla riaraiailanonomo ona ciodicue —llote. Jusúna soldaduai gaitaja facaisecóni Pedro naie mullaíma ie come jefona ailli jaíbonote, soldaduai Jesúsna gaitaja ie daacaiño.

<sup>27</sup> Pedro dane janote. Ieconí itava ñaite.

*Jesús Pilato dine illa rafue*

(Mt 27.1-2, 11-14; Mr 15.1-5; Lc 23.1-5)

<sup>28</sup> Ie mei Caifás jofomona gobernador jofomo Jesúsna jítiramo uitimaci. Naie facaise gobernadori Pilato. Naimiedi judíuaiñedimie. Naimaci einamaci rairuilla jira, judíuaiñedimie jofomo naie facaise fo jaiñedimaci. Fo jaiadedi, pascua railla rafue guilledí guiñega.

<sup>29</sup> Ie jira Pilato jino bite. Naimacimo jicanote:

—¿Ñie isoide rafue muidona llogidotomoi?

<sup>30</sup> Uai otimaci:

—Bimie marañede rafue finoñedena, o dine naimiena atañedícaí.

<sup>31</sup> Pilato llote:

—Naimiena uifño. Omoi einamaci llogacinuaido naimiena duere fino.

Uai otimaci:

—Come meinellena caimona rairuidomoi. Naimie coraiana jitaídícaí —llotimaci.

<sup>32</sup> Navui Jesúsdi: “Cuena cruzmo coraítimaci” llote. Naie llucacino jai suisaide.

<sup>33</sup> Pilato fo abido jaillano, Jesúsna uaiduano, naimiemo llote:

—Judíuai illaíma raillamiedio.

<sup>34</sup> Jesús dinena jicanote:

—¿O comequina dama iese facajano llotio? Iese comequina o facañenia, jiaimie omo lloga.

<sup>35</sup> Pilato uai ote:

—Judío imieñedicue. O rafue raise uifñoñedicue. Omoi comini cuemo ona fecadimaci. Jusiñamui diga nanoca ñairaini cuemo jiai fecadimaci. ¿Ñie isoide marañede rafuena finodio?

<sup>36</sup> Jesús uai ote:

—Eniruemo cominina sedañedicue. Judíuai illaicomini cuena gaitañellena, eniruemo cominina sedadicedena, cue comini cue facaina fuiridimaci.

<sup>37</sup> Pilato uai ote:

—Ie jira odi illaimadio.

Jesús uai ote:

—Jaca railla. Uanaicino lloñena, jeicigacue. Nana uanaicinona jitaídino cue lluañaca cadimaci.

<sup>38</sup> Pilatodi Jesús uaina uaitajamona, raite:

—¿Ñie uai naídí uaina?

Ie mei dane jino billano, cominimo llote:

—Jaca nicino naimiemo iñede.

*Jesúsna coraiacana rafue*

(Mt 27.15-31; Mr 15.6-20; Lc 23.13-25)

<sup>39</sup> Pilato nia llote:

—Naga año pascua railla rafue illa facaise, damie cárcelmona jino ollena, cuemo jicanuaibisoidomoi. Bie año omoi jitaia, omoi illaïma raillaïmena marena oretaiticue.

<sup>40</sup> Comini dinena cuiriidimaci:

—Dama ite. Bimiena jitaiñedicaï. Barrabásna cárcelmona marena jino oreta. —Iese cuiriidimaci. Barrabásdi firiraima.

## 19

<sup>1</sup> Ie mei Pilato Jesúna oni uillanona, naimiena sechedotade.

<sup>2</sup> Jifanodosillena, soldadauai eecuaïmona finoca nuiciraina naimie ifogïmo jitadimaci. Jiduirede iniroina jitatajano raitimaci:

<sup>3</sup> —Judíuai illaïmadïo. —Iemei ie uiecona bucoïdimaci.

<sup>4</sup> Pilato dane jino billano, raite:

—Naimie omoi dine jino ja biite. Naimiemo nicinodi iñede —raite.

<sup>5</sup> Ie facaise Jesús jino bite. Eecuaïmona finoca nuiciraina jitaca. Jiduirede iniroina jitaca. Pilato naimacïmo llote:

—Jadi, naimie.

<sup>6</sup> Jusiñamui diga nanoca ñairainidi, jiaie illaïcomini diga, naimiena ciuano, cuiriidimaci:

—Naimiena coraï.

Pilato llote:

—Naimiemo nicinodi iñede; ia oni uillanona, naimiena omoi coraï.

<sup>7</sup> Uai otimaci:

—Moisés micori jaie cuega: “Bu Jusiñamuina jeare ñaianona, fiodailla”. “Jusiñamui Jitodicue” naimie railla jira, naimie fiodailla. Naimie Jusiñamui Jitona abina caitadimie. Caimona naimiedi maraiñede rafue jai finode.

<sup>8</sup> “Naimiedi Jusiñamui Jito” comini raillana Pilato cacajano, eo jacinaite.

<sup>9</sup> Jesúna dane fo uite. Jesúdi Jusiñamui Jitona naimie raise uïñollena, Jesúmo jicanote:

—¿Ninena bitio?

Jesús uai oñede.

<sup>10</sup> Ie jira Pilato dane jicanote:

—¿Bue ñellena cue uaina oiacaïñedio? Uai cuemo ite, o marena oretallena. Uai cuemo ite, ona coraitallena.

<sup>11</sup> Jesús uai ote:

—O anamo Jusiñamui cuena itataja jira, o uai ite, cuemo llollena. Ie jira omo cuena fecadino o baïfemo jeacino finodimaci.

<sup>12</sup> Ie facaimona Pilato Jesús marena jino oretaiacade; iadedi judíuai illaïcomini dinena cuiriisite:

—Bimie o jino marena oretaiïa, cai nanoca illaïma ie nabaiñedio. “Illaïmadicue” Jesús lluamona, cai nanoca illaïma dibeïmo naimiedi iñede. Cai nanoca illaïmadi César.

<sup>13</sup> Comini lluana cacajano, Pilato Jesúna jino atide. Ie cominimo lloranomo raide. Naie illano nofinina mamecïrede. Judíuai uaido Gabatana mamecïrede.

<sup>14</sup> Pascua rafue guilla finoraruiïmo jitoma naidai illanona, Pilato dinena llote:

—Jadi, omoi illaïma.

<sup>15</sup> Iemona cominidi cuiriisite:

—¡Naimie oni uillanona, naimiena meine! ¡Naimiena coraï!

Pilato jicanote:

—¿Bue ñellena omoi illaïmana coraïiticue?

Jusiñamui diga nanoca ñairaini uai otimaci:

—Cai illaïmadi César. Jiaie illaïmadi caïmo iñede. Jaca dallaïmade cai illaïmadi.

<sup>16</sup> Ie mei Pilato naimacïmo naimiena fecade, coraïllena.

*Jesúna coraïacana rafue*

*(Mt 27.32-56; Mr 15.21-41; Lc 23.26-49)*

Pilato llua jira, Jesúna uitimaci coraïllena.

<sup>17</sup> Jesúdi ie cruzna rocaoicaïda sonode. Ifocoraïna eruaila mamecïrede illanomo jaidimaci. Judíuai uaido naie illano Gólgotana mamecïrede.

<sup>18</sup> Nainomo naimiena coraidimaci. Naimie abimo menamie coraïca. Damie Jesús nabeïmo. Jiaïmie jarifebeïmo.

<sup>19</sup> Cruzmo jonellena, Pilato rabicïmo cuetatate: “Nazaret ie Jesús. Judíuai Illaïma”.

<sup>20</sup> Judíuai uaido cuega. Romanos comini uaido jiaï cuega. Griego uaido jiaï cuega. Jesús coraïano Jerusalén ianori illa jira, ailluena comini iena cioidimaci.

<sup>21</sup> Iena ciuamona, naie rabicina meïdollena, Jusiñamui diga nanoca ñairaini Pilatomo llotimaci:

—“Judíuái Illaíma” raillano jai cuetatatio. Iena meiduana jítaidícaí. Bimie dinena raisoide: “Judíuái Illaímadícué” raillanona, o cuetatájana jítaidícaí

<sup>22</sup> Pilato uai ote:

—Jai cuetataticue. Jíaié rabcímó dane cuetatañéiticue.

<sup>23</sup> Jesúsna coraíai meí, soldaduái naimíe iníroi uanona, naga soldado dígamíe jonega iníroi. Nagaamaga soldaduái ite. Ie camisa fiebide. Naie daje jamái nigarói.

<sup>24</sup> Ie jira daní coníníri ñáitímáci:

—Bíe camisa cuaranóñéitícaí, daní caí fecallena. Maí. Coníma jabomáitícaí, íena ollena.

—Iese finuano Jusíñamuína lloraíma micorí cuegafuíai suíde. Jáie cuega: “Cue iníroi daní naimácimo fecáitímáci; íadedí cue camisa ollena, coníma jabomáitímáci”. Iese finodímáci.

<sup>25</sup> Cruz abímó Jesús eí, íe euíño díga íte. Cleofas aídí íte. Naiñáiño mamecí María. María Magdalena jíai íte.

<sup>26</sup> Jesús íe eína cíode. Cuena naiñáiño ecímó jíai cíode. Cuena eo gaíde. Ie jira íe eímó llote:

—Jadí, o jíto ísoí ítímíe anámó íitío.

<sup>27</sup> Cuemo llote:

—Jadí, o eí ísoídíñáiño anámó íitío.

Naie dacáiño naiñáiñoña cue jofomó uíllanona, naiñáiñoña sedadícue.

<sup>28</sup> Te meí Jesús nana rafue jai fuíllana uíñuano, llote:

—Jíroacadícue. —Iese lluanona, Jusíñamuína lloraíma micorí jáie cuegafuíai jai suíde.

<sup>29</sup> Nainómó llerójímó víno íte. Radosímó fibecode rana joníano, vínomó faíte. Iemeí Jesúmó fecade jaronollena.

<sup>30</sup> Tena jaronuano, Jesús llote:

—Cue maíjía jai fúite. Jai macáibaíte. —Ie ífogí ana jítradacáida, fíodaíte.

*Jesús sída díga ducia rafue*

<sup>31</sup> Pascua raílla rafue guílle finuaruí ílla jira, judíuái íllaícomíní Pilato díne jáidímáci. Raíre fíodáíllena, coraícáno ídaíaina uellullena naimíemó jícanuáidímáci. Sábado rafue íe nairuí nía íllanona, sábadoruí jai raíre táineacána jira, coraícáno cruzmó sábadoruímo íllana jítaíñédímáci.

<sup>32</sup> Soldaduái jaíllano, Jesús ecímó coraíca íaímaíai ídaíaina uellude.

<sup>33</sup> Jesús díne bíllano, naimíe jai fíodáíllana cíodímáci. Ie jira naimíe ídaíaina uellúñédímáci;

<sup>34</sup> íadedí daje soldado Jesús círaigíconí sída díga ducíde. Naífo díaíde. Naífomona jínuí jíai bíte.

<sup>35</sup> Nana íena cíodícue. Uanáí llotícue. Omóí ñnollena, íena llotícue.

<sup>36</sup> Soldaduái íese finuamóna, jáie cuegafuíai jai suíde. Jáie Jesúsna cuega: “Naimíe íllaícína táinoñéitímáci”.

<sup>37</sup> Jáí jáie cuega: “Judíuái dínena naimáci ducítagamíemó íco eruáítímáci”.

*Nofcí ífomó Jesús raía rafue*

*(Mt 27.57-61; Mr 15.42-47; Lc 23.50-56)*

<sup>38</sup> Naie facáise Pilato díne José raíllamíe jáide. Cruzmóna Jesús abí oní ollena, Pilatomó jícanuáide. Josédí Arímatea nairáí ímie. Pilato faíríote. Ie jira José Jesús abí ana uanona, íena oní úite. Judíuái íllaícomínína naimíe jacírúíllanona, Jesúsna báiníno ñnote.

<sup>39</sup> Nicodemo jíai bíte. Síorede rana atíde. Mirra áloe díga jai tamíano atíde. Níbái treinta kílos atíde. Naimíedí Jesús díne naíona navuí bíte.

<sup>40</sup> José, Nicodemo díga, Jesús abína useroína ferínótíaiamaíai. Naimáci comíní finouílla ísoí, náie síorede rádí íniróimó jonega.

<sup>41</sup> Amenaíai íaire íllanómó Jesúsdí coraíca. Nainómó nofcí íe raíafodí íte. Nía buna naífomó raíñenafo.

<sup>42</sup> Naífo íaire ílla jira, sábadoruí jai ríacána jira, jáíe raíafó jenollena abí juanína jira, nainómó naimíena jonetíaiamaíai. Nofcí díga raíafó raíse íbaílla meí, jofomó jáidíaiamaíai.

## 20

*Fíodáíllamóna, Jesús jíllua rafue*

*(Mt 28.1-10; Mr 16.1-8; Lc 24.1-12)*

<sup>1</sup> Domingo jítrámó nía monáíñena, raíafomó María Magdalena jáide. Raíafó íbaílla nofcí oní jóíllana cíode. Jesús abína cíoiñede.

<sup>2</sup> Ie jira aísicana Pedrona jenuáide. Cuena jíai jenuáide. Baíllano, llote:

—Cái íllaícomíní caí Nama abína raíafomóna otímáci. Naimíena joníanóna uíñoñédícue.

<sup>3</sup> Ie meí raíafomó jáidícoco.

<sup>4</sup> Aísicana jáidícoco; íadedí ríire cue aísicana jaílla jira, nano rídícue.

<sup>5</sup> Ana bítradacáida, fo erodáticuemo, useroí jóíllana cíodícue; íadedí fo jáíñédícue.

<sup>6</sup> Ie mei Simón Pedro rillano, fo jaide. Useroi joillana jiai ciode.

<sup>7</sup> Ie ifogimo ferinoga iniroi eneno illana ciode. Raise nacuana ciode.

<sup>8</sup> Iemei jiai fo jaidicue. Iniroina ciuamona, Jesús jai jilluana inoticue.

<sup>9</sup> Jaie cuegafuiai llote: “Fiodaillamona jilloite”. Naie cuegafuaina como raise inoticoco.

<sup>10</sup> Ie mei jofomo jaidicoco.

*María Magdalena Jesús bairia rafue*

(Mr 16.9-11)

<sup>11</sup> Raiafomo abido billano, coco jailla mei, nainomo María fiebide. Eede. Ana bitadacaida, fo erodatemo,

<sup>12</sup> Jusiñamuimona mena jaienici jai billana ciode. Userede iniroi jitadiaimaiai. Jesúsna navui jonianomo ana raidiaimaiai. Damie ifogi dibeimo raide. Jiaimie eilli dibeimo raide.

<sup>13</sup> Naiñaiñomo jicanotiaimaiai:

—¿Bue ñellena eedio?

Naiñaiño uai ote:

—Cue Namana bu oni uillanona, naimiena jonianona jai uñoñedicue.

<sup>14</sup> Naie facaise jinafo dine erocaillanona, Jesúsna ciode; iadedi naimiena uñoñede.

<sup>15</sup> Naiñaiño comequina facade; “Naimiedi bie illano sedaraima”. Jesús naiñaiño jicanote:

—¿Bue ñellena eedio? ¿Bu jenodio?

Naiñaiño uai ote:

—Jesúna o uia, naimie jonianona cuemo llono. Ie mei naimiena oni uiticue.

<sup>16</sup> Jesús dinena uai ote:

—¡María!

Naimie dine naiñaiño como raise dobaicaide. Judíuai uaido llote:

—¡Rabonil! —Naie uai oni dobañuamona: “Llofueraima”.

<sup>17</sup> Jesús uai ote:

—Cuenalinoño cuena faicai. Cue Moo dine nia a jaiñedicue. Cue amatiai dine mai jaillanona, cue rafuena lluai. Cue Moo dine jaiticue. Naimiedi cue Jusiñamui. Naimie jiai omoi Moo. Jiai omoi Jusiñamui.

<sup>18</sup> Ie jira María Magdalena Jesús llofueoicaiganodicaimo lluaibite:

—Cai Namana jai ciodicue. —Iemei caimo naimie naiñaiño lluaa llote.

*Jesús ie llofueoicaiganomo bairia rafue*

(Mt 28.16-20; Mr 16.14-18; Lc 24.36-49)

<sup>19</sup> Domingo naio Jesús llofueoicaiganodicai jofomo ofidicai. Judíuai illaicominina cai jaciruillamona, nasiai nana cai ibaica. Nase econoñoño ieconi Jesús cai motomo billanona, caina uaiduano, llote:

—Uri omoi i.

<sup>20</sup> Ie onollina acatate. Ie ciraigina jiai acatate. Cai Namana jai cai ciuari eo iobidicai.

<sup>21</sup> Jesús dane llote:

—Uri omoi i. Cue Moo cuena oretaja isoi cue rafuena llorella, omoína oretaiticue.

<sup>22</sup> Ie facaise caina firaiñuanona, raite:

—Jusiñamui Joreñoña omoi feiñuana jitaicue.

<sup>23</sup> “O jeacinona jai dotade” bumo omoi lloia, Jusiñamui jai dotaca. “O jeacinona nia dotañede” bumo omoi lloia, Jusiñamui nia dotañega.

<sup>24</sup> Naie naio Tomásna mameciredede llofueoicaigamie cai diga iñede. Dídimona jiai mameciredede. Naimiedi gorasa.

<sup>25</sup> Naimiemo lloticai:

—Cai Namana ailli ciodicai.

Tomás uai ote:

—Clavo ifona naimie onolli jeraimo cue cioñenia, naie ifona cue jetañenia, naimie ciraigi ifona cue jetañenia, inoñeiticue.

*Jesús ie llofueoicaiganomo dane bairia rafue*

<sup>26</sup> Ocho digarui illanona, Jesús llofueoicaiganodicai dane ofillano, Tomás cai diga ite. Nana nasiai ibaica; iadedi nase econoñoño ieconi Jesús cai motomo dane fo billano, uaiduano, llote:

—Uri omoi i.

<sup>27</sup> Iemei Tomásno llote:

—Eroda cue onollimo. Naifo jeta. Ciraigi ifona jiai jeta. Inoñoño jaiñoño. Mai ino.

<sup>28</sup> Tomás uai ote:

—Cue Namadio. Cue Jusiñamuidio.

<sup>29</sup> Jesús dane uai ote:

—Cuenta o cúa jira, cuenta inotio; iadedi cuenta cioñedino cuenta inoia, jiai caimare iitimaci.

<sup>30</sup> Jesús diga siño rafuena finode. Iena ciodicai. Nana naie rafuena bie rabenicomo cueñedicue;

<sup>31</sup> iadedi dajerie cueticue. Jesúsdi cai Jilloitaraimana omoi inollena, iena cueticue. Naimiedi Jusifamui Jitona omoi inollena, iena jiai cueticue. Naimiena omoi inuano, naimie diga jaca iitomoí.

## 21

*Jesús ie llofueoicaiganomo ane bairia rafue*

<sup>1</sup> Diga irui illanona, Tiberiana mameciredede jorai fuemo Jesús ie llofueoicaiganodicaimo dane bairede.

<sup>2</sup> Nainomo diese iticai: Simón Pedro, Tomás, Natanael, cue ama Jacobo, cue, jiaie iaiaiaí. Tomás mameci jiaicidi Dídimó. Natanael Galilea ie Caná nairai imie.

<sup>3</sup> Simón Pedro caimo llote:

—Lloiji faiaitícue.

Naimie uai oticai:

—O diga jaiticai. —Iese raillano, botemo jaidicai. Namona naio lloijina faiticai; ia jaca buena oñedicai.

<sup>4</sup> Monaiacademo, Jesús jorai fuemo bite; iadedi naimiena uiñoñedicai.

<sup>5</sup> Jesús caimo jicánote:

—Caimaci, ¿nie diese lliciaína jai otomoí?

Uai oticai:

—Jaca oñedicai.

<sup>6</sup> Naimie dane uai ote:

—Omoi bote nabei dine omoi lloijina faíno.

Ie jira faiticai. Ailluena lliciai naíemo jilla jira, a aiñoñedicai.

<sup>7</sup> Iena ciuamona, Pedromo llotícue:

—Cai motomo cai Namadi ite.

Pedro iena cacajano, naimie taímiena jira, ie iníroi jítade. Jesús dine naimie raíre rillena, jorano daíade;

<sup>8</sup> iadedi botedo biticai. Enírué iaíre illa jira, na lliciaímo sonocana, lloijina atidicai. Nibai cien metros oni ite.

<sup>9</sup> Jorai fuemo cai ría, coocimona bonoca iraina ciodicai. Lliciai iraimo ruica jai ite. Llomenico jiai ite.

<sup>10</sup> Jesús caimo llote:

—Omoi oga lliciaimona janore atí.

<sup>11</sup> Ie jira Simón Pedro botemo jaillano, lloijina llínuanona, eníruemo arí sonode. Ciento cincuenta y tres jemierie jítaticai. Ailluena ite; iadedi lloiji cuarariñede.

<sup>12</sup> Jesús llote:

—Mai guisaíbi. —Jesúna cai uiñua jira: “¿Budío?” jaca buna raíñena.

<sup>13</sup> Jesúsdi llomenico diga lliciaína caina ecade.

<sup>14</sup> Fiodaillamona jillua facaisemona dacaiño amani caimo Jesús jai abina baíretate.

*Jesús Pedro diga ñaia rafue*

<sup>15</sup> Guilla mei, Jesús Simón Pedromo llote:

—Simón, odí Juan jítodio. —Jiai jicánote— ¿Nana o nabaiñiaí baífemo cuenta isiruitio?

Simón uai ote:

—Jíi, Nama, ona cue isiruillana uiñoñotio.

Jesús uai ote:

—Toica llaudaíai uruaína omoi raise sedaja isoi, cuenta inotinona raise seda. Naimacina cue rafuena raise llofue.

<sup>16</sup> Dane llote:

—Simón, odí Juan jítodio. —Dane jicánote— ¿Cuenta isiruitio?

Simón uai ote:

—Jíi, Nama, ona cue isiruillana uiñoñotio.

Jesús dinena uai ote:

—Toica llaudaíai uruaína omoi raise sedaja isoi, cuenta inotinona seda.

<sup>17</sup> Dane jicánote:

—Simón, ¿cuenta isiruitio? —Jesús naimíemo dane jicanua jira, “Jesús cue uaina inoñede” raillanona, Pedro comeci sunaite.

Uai ote:



—Nama, naga rafuena uifnotio. Ona cue isiruillana uifnotio.

Jesús uai ote:

—Toica llaudaia: uruiaina omo: raise sedaja isoi, cuena inotinona seda.

<sup>18</sup> Daje rafue omo nia lloiticue. O nia conirue facai o iniroi dama jitadio. Ie mei o jitaillanomo jaidio. O uaciroma facaiseconi o onolli oni fuitaitio. Ie mei jiaimie o iniroi ona jitajano, o jitaiñenanomo ona uite. Cue lluaana inocana o jai.

<sup>19</sup> Fiodaillena Pedro uifollena, uicodo Jesús iese llote. Cristo llua isoi, Cristo rafue muidona, illaicomini Pedrona jairuido meinetimaci. Naimie fiodaillanona, Jusñamuina iobitade.

*Jesús ie gaia llofueoicaigamiemo llua rafue*

<sup>20</sup> Pedro diga Jesús nia ñaia facaise, Pedro dobaicaillanona, cuena ciode. Iaimaia: jinafona racadicue. Jesús gaiamedicue. Navui cai guia, Jesús nia fiodañenia, Jesús abimo cue ia, Jesúmo jicanoticue: “¿Bu gaitatallio?”

<sup>21</sup> “Cuena inotinona seda” Pedromo Jesús llua mei, Pedro dobaicaillanona, cuena ciuano, Jesúmo jicanote:

—Nama, ¿niese naimie fodaite?

<sup>22</sup> Jesús uai ote:

—Naimie nia itemo, cue abido bia, dama iesede. Naimie rafuedi omo duiñede; ia cue lluaana inocana o jai.

<sup>23</sup> Ie jira creyentia: naie lluaana fidiano cuena raitimaci:

—Naimie fiodañeite. —Iese raitimaci; iadedi Jesús iese raiñede. Jesús llote: “Naimie nia itemo, cue abido bia, dama iesede. Naimie rafuedi omo duiñede”.

<sup>24</sup> Nana rafuena ciuano lloticue. Iena cueticue. Uanaicinuaina cueticue.

<sup>25</sup> Jesús ailluena jiaie rafuena finode. Nana ie rafue cuedadena, enirue baiñede, naie libros eenollena. Mai. Juandicue.

## JESUCRISTO ORETAGANODI NAIMIE RAFUE LLOCANA UILLA RAFUE

*Jesús Jusiñamui Joreño billena llua rafue*

<sup>1</sup> Teofilo, o dine, ¿nigacino? ¿Nie isoidio? Omo jiaie rabe birui dane oretaiacadicue. Lucadicue. Navui jiaie cartana oretaticue. Ailluena Jesús finoca rafuena nainomo cueticue. Ailluena Jesús llofuiacinona jiaie cueticue.

<sup>2</sup> Monamo naimiena Jusiñamui nia uifñenia, Jesús ie llofueoicaiganona llofueuide. Ie llofueoicaiganona jaie naimie fetuamona, Jusiñamui Joreño uaido naimacina llofueuide. Naie llofuiacinona navui cueticue. Jesús monamo jailla mei, ie llofueoicaigano naimie oretaganona mameciredimaci.

<sup>3</sup> Naimie fodaillamona ie jillua mei, naimacimo bairede. Naimie ua jilluana naimaci raise uifñollena, diga icaifño cuarenta digarui naimacimo baireuide. Naimacina Jusiñamui dibeimo ie comini jai illa rafuena llofueuide. Naimiemo jai suide rafuena llofueuide. Naimiemo nia suifñede rafuena llofueuide.

<sup>4</sup> Naimaci diga Jesús guilla facaise, naimie Jerusalémona naimaci oni jaillana rairuide. Raite:

—Cue Moo ie Joreño omoimo fecallena, omoimo jai lloticue. Naiena omoi feifñollena, Jerusalémo nia fiebi.

<sup>5</sup> Naimie rafuena comini inuamona, Juan Bautista micori jinui diga bautizade; iadedi cue rafuena omoi inuamona, nano nigarui illanona, cue Moo ie Joreña feifñoitomoi —raite.

*Monamo Jesús jailla rafue*

<sup>6</sup> Ie llofueoicaigano diga Jesús dane ofillanona, naimiemo jicanotimaci:

—Nama, ¿birui cai judíuai cominina jai sedaitio, David micori cai usumatai micoriai jaie sedaja isoi?

<sup>7</sup> Naimie uai ote:

—Naie rafue suille facaiseconi jaca uifñoñeitomoi. Naimie siñona illamona, dama cue Moo naie rafue suilliruina uifñote;

<sup>8</sup> Iadedi cue Moo ie Joreña omoi feifñua mei, siño uai omoimo iite. Ie jira Jerusalémo cuena lloitomoi. Judeamo, Samariamo, ua nana enruemo ite nairaimo lloitomoi —raite.

<sup>9</sup> Naimie iena llua mei, Olivos railla anedumo jai jaidimaci. Nainomo itimacimo, naimaci eruaisitemo, monamo Jesús Jusiñamui uiga. Uillie illa jira, naimiena cioisifede.

<sup>10</sup> Monamo nia eruaidemo, ieconi naimaci dine Jusiñamui jaienici, mena iima bairia isoi, bairediaimaiai. Naie iaimaiai iniroi userede.

<sup>11</sup> Raitiaimaiai:

—Galileo imaci, ¿bue ñellena monamo eruaidomoi? Omoi motomona Jesús monamo jaillana jai ciodomoi. Naimie jai jailla isoi, dane abido ico biite —raitiaimaiai.

*Matiana fetua rafue*

<sup>12</sup> Naimacimo Jusiñamui jaienici llua mei, Olivos railla anedumona Jerusalémo naisodo abido jaidimaci. Olivos railla anedumona Jerusalémo ochocientos metros dinori illanona, sábadoruimo Moisés micori lloga dinori macaritimaci.

<sup>13</sup> Rillano imaci cuartomo jaidimaci. A dibebamo ite. Nainomo itimaci: Pedro, Jacobo, Juan, Andrés, Felipe, Tomás, Bartolomé, Mateo, jiaie Jacobo. Naimiedi Alfeo jito. Simón ite. Naimiedi cananista comini facaisemo duide. Judas ite. Naimie jiaie Jacobo jito. Dese nainomo itimaci.

<sup>14</sup> Naimaci jitaillamona, Jusiñamuimo jillena, nagarui danomo ofidimaci. Jillena, jaino naimaci diga jiaie ofisoidimaci. Diga riñoniai jiaie ofisoidimaci. Jesús ei, María, jiaie ofisoide. Jesús amatiai jiaie ofisoidimaci.

<sup>15</sup> Comini ofilla motomo Pedro naidaita, rafuena llote. Nibaie ciento veinte comini nainomo itimaci. Pedro llote:

<sup>16</sup> —Amatai, David micori jaie lloga rafue birui jai suide. Jusiñamui Joreño jaie David micorina Judas micorina ñaitatate. Salmos rabenicomo naie ñaiacinodi cuega. Iena uifñoticaí. Judas micorina uifñoticaí. Naimie Jesúsna gañadinona ifode.

<sup>17</sup> Naimiedi da cai llofueoicaigano imie. Cai diga maijuuide.

<sup>18</sup> Ie marañeno finoca rafuemona ucubena feifñua mei, ie comeci iuaina meiduanona, naie ucubena oni judaide. Judíuai illaicomini naie ucube diga enruena ibadimaci. Nainomo Judas micori ie cimaio cuinajanona, ie abina dama meinete. Rifailamona, ana uaillamona, ie jebegi boficaillamona, nana ie jebegi jino uaide.

<sup>19</sup> Nana Jerusalémo itino iena fididimaci. Ie jira cai uaido naie enirue mamecirede Acéldama. Oni dobaiñuamona dirue toillanie.

<sup>20</sup> Ero, Salmos rabenicomo Judas micorina iese David micori jaie cuega:

Naimie illano taino iite.

Buna jaca iemo iñeite.

Naimie majille jiaimiemo iite.

Iese cuega.

<sup>21-22</sup> Ie jira cai diga itinomona damiena fetoiticaí. Cai Nama Jesús cai diga illa facaiseconi, nagarui diga iñiaí cai diga jaisoidimaci. Juan Bautista micori Jesúsna bautizaja facaisemona, Jesús monamo caimona jaillarui facaiseconi, naimaci cai diga jiaí itimaci. Naimacimona damiena fetoiticaí, Jesús jilluana cai diga lollena. —Iese Pedro raite.

<sup>23</sup> Ie mei mena iimana fetodimaci. Damiedi José Barsabas. Jiaíci mameci Justo. Jiaimiedi Matías.

<sup>24</sup> Ie mei Jusiñamui jiidimaci:

—Nama, nana comini imaci comeciaina uiñotio. ¿Nie iimana jitaideo? Caina uiñota.

<sup>25</sup> Naimiedi Judas ifo meidoite. Jesús ie oretagamiena naimie jaillamona, cai diga majijite. Ie fiodaillamona Judas micori ie majiana jai faínonocai —jiidimaci.

<sup>26</sup> Ie jira conima jabomaside, uiñollena bu ille. Matiamo baite. Iemei jiaie once diga oretagano isoi naimie ite.

## 2

### *Cristo oretagano Jusiñamui Joreñoña feñua rafue*

<sup>1</sup> Pentecostés railla rafue irui ria, nana creyentiaí diese danomo itimaci. Pentecostés trigo ua ie rafue. Pascua rafue illa meinocni, cincuenta digarui illanona bie rafue ite.

<sup>2</sup> Danomo ia, ebena illacinomona monamona riire aifi billa isoi buena cacadimaci. Nana jofomo itino naiena jiaí cacadimaci.

<sup>3</sup> Iena naimacimo bairedede. Iena cioidimaci. Irai boua isoi eruaide. Nana naimacimo baite.

<sup>4</sup> Iese Jusiñamui Joreñoña feñotimaci. Nana naimaci comeciaina namatade. Iemei diga nairaí uaillaido ñaitimaci, Jusiñamui Joreño naimacina ñaitatajamona. Naimaci ñaia uaillaina uiñoñedimaci.

<sup>5</sup> Naie facaiseconi Jerusalémo Jusiñamui rafuedo eo jaide judíuaidi itimaci. Diga nairaiaimona bitimaci.

<sup>6</sup> Creyentiaí ñaiana naimaci fidiano, ailluena comini jino tainomo ofidimaci. Nagamiiaídi ie nairaí uaina cacade. Ie jira jacinaitimaci.

<sup>7</sup> Eo rajicadimaci. Coninimo jicanotimaci:

—¿Bua ñaite? Nana Galileos imaci.

<sup>8</sup> ¿Niese naimacina cacadicaí? Cai uaido dajerie ñaiana cacadicaí —raitimaci.

<sup>9</sup> Diga comini imiaí itimaci: Partos, Medos, Elamitas, Mesapotamia imaci, Judea imaci, Capadocia imaci, Ponto imaci, Asia imaci,

<sup>10</sup> Frigia imaci, Panfilia imaci, Egipto imaci, Libia imaci. Libia imaci enirue Cirenemo ruica eruaide. Romamona jamai macaritano jiaí itimaci.

<sup>11</sup> Judíuaidi itimaci. Judíuaidedino jiaí itimaci. Judíuaidi isoi Jusiñamuina jai sedadimaci. Cretenses itimaci. Arabes itimaci.

—Cai uaido Jusiñamui ie ebirede finoca rafuena cacadicaí —raitimaci.

<sup>12</sup> Nana eo rajicadimaci. Danirie jicanododimaci:

—¿Bue ite?

<sup>13</sup> Jiaie comini jifanoduano, raitimaci:

—Jifaidimaci. Ie jira iese ebena ñaitimaci.

<sup>14</sup> Ie facaise ie once nabaiñiaí naimie ecimo illanona, Pedro nainomo como ofidinomo ado llote:

—Caimaci, ua nana Jerusalén imaci, cue llamo cacarei. Naie rafuena lloiticue.

<sup>15</sup> Omoi comeciaina omoi facaja isoi, jifaiñedicaí. Jitoma nia fuiri daidemo, bu jaca jifairainina.

<sup>16</sup> Joel micori bie rafuena jaie llote. Joel micori Jusiñamui rafuena lloiraíma. Naimie jaie lloga rafue birui caimo jai suide.

<sup>17</sup> Llote:

Jusiñamui caimo llote: “Jiairuido bie rafue suite.

Cue Joreñoña diga cominimo fecajiticue.

Iedo omoi uruiaí cue lluaña lloitimaci.

Iemona omoi coniruaína nicairitaiticue.

Iemona omoi einamacina jiaí nicairitaiticue.

18 Ua nana cuena sedadinomo cue Joreñoa fecajiticue.

Naimaci cue lluana lloitimaci.

19 Monamo eo jacirede rafuena ico suiñotaiticue.

Eniruemo eo jacirede rafuena ico jiai suiñotaiticue.

Comini jobairillemona, eniruemo comini diruedi eo iite.

Naie facaise daje diese enirue boojite. Bouamona uillie eo iite.

20 Jitoma lligaiñoñeite. Fivui diruena eruaite.

Nana bie suite, Cristo billa facaise nia iñenia.

Naie facaise diga jacirede rafue suite;

21 iadedi birui cuemo bu jicaia, ie jeacinomona naimiena jillotaiticue” Jusiñamui llote.

Ie Joreño caimo birui illamona, Joel micori llogacino jai suide.

22 Caimaci, bie uaina omoi cacarei. Nazaret ie Jesúna ñaiticue. Jusiñamuidi omoi motomo naimiena siño rafuena jai finotate. Iena jai uiñotomoi.

23 Jusiñamui comeci jaie facaja isoi, Jusiñamui jitailla isoi, Jusiñamui naimiena omoimo fecade. Jesúna coraitatomo. Jusiñamuina iñoñedinona naimiena meinetadomo;

24 iadedi fiodaillamona naimiena Jusiñamui jillotajano, llegi ie cacajamona naimie jillobide. Naimie fiodaite; iadedi fiodaillamona nainomo iñoñede.

25 David micori naimiena jaie llote:

Jusiñamui cue diga jaca illana uiñoticue.

Cue ecimo naimie ite, cue comecina ocuiñotallena.

26 Ie jira cue comeci caimare ite. Eo iobidicue.

Cue marena illemo jai jiai ocuiridicue,

27 raiafomo cue joreñoa naimie fañonocaiñena jira,

ie mare Jito abi rifaillana naimie jitañena jira.

28 Naimie cuena jilloitallena uiñoticue.

Cue diga naimie illa jira, cue comeci caimare iite.

29 Caimaci, cai usuma David micorina marefodo ñaiticue. David micori ñaia, dama naimie facaina ñaiñede. Jesúna ñaite. David micori jaie fiodaite. Raiafomo jonega. Naifo bene nia illamona, naimiedi Jesúna ñaiana uiñoticaí.

30 Ie ia David micori Jusiñamui rafuena llote. Naimie micoridi Jusiñamui naimiemo uanaicónona lluana uiñote. Jaie Jusiñamui naimiemo llote: “O uruiaimona damie illaimana illanona, ie cominina sedajite” llote.

31 Cristona ñaite. David micori nia suiñede rafuena llote. Naimie micori Cristo jilloillena llote: “Raiafo Jusiñamui fiodaillanomo Cristo Joreño fañonocaiñeite. Cristo abi rifañeite” llote.

32 Jesúna ñaite. Jusiñamui Jesúna jai jillotate. Nana cai iena ciodicai. Ie jira iena lloticaí.

33 Ie ecimo Jesúna jai dane itatajanona, Jusiñamui naimiena iobitade. Ie Moo llua isoi, Jesús jai ie Moo Joreño caimo jai fecade, omoi birui ciua isoi, omoi birui cacaja isoi.

34 Naimie abi monamo jañena jira, David micori dama naimie facaina ñaiñede; ia Cristona ñaite. Ero, jaie David micori raite:

Jusiñamui Cristomo llote: “Cue ecimo ana rai.

35 Ona iñoñedinona o anamo itataiticue”

raite. David micori llua isoi, birui jai suide.

36 Pedro nia ñaite:

—Jesúna coraidomoi; iadedi Jusiñamui naimiena cai Namana itatate. Naimiena cai Jilloitaramana jai itatate. Nana judíuái comini naiena uiñuana jitaídícue.

37 Pedro lluana cacajano, naimaci comeciaino riire baite. Pedromo iena jicanotimaci. Ie nabaiñiamo jai jicanotimaci:

—Caimaci, o lluana jai cacadicaí. ¿Bue finoticaí?

38 Pedro uai ote:

—Omoi comeciái iuaina meido. Iemei Jusiñamui omoimo ite jeacinuaina dotajite. Jesu-cristo facaina omoi bautizallomoi. Jusiñamui Joreñoa jiai feiñoitomoi.

39 Omoimo ie Joreño fecallena navui llote. Omoi uruiaimo jiai fecaite. Jiaie nairaiaí itinomo jiai fecaite. Ua nana Jusiñamui fetocanomo jiai fecaite.

40 Diga uai naimacimo Pedro llote. Raite:

—Ailluena comini maraiñede rafuena birui finocana jaidimaci. Faifitimaci. Naimaci isoi jañeno; iadedi cue lluana omoi cacajamona, iena iño.

41 Diga comini ie lloga uaina feiñuano, bautizadimaci. Nairuido nibai tres mil comini creyentiaína jaidimaci.

42 Cristo oretagano llofuiana fueuidimaci. Cristo oretaganona eo nabaidimaci. Nagarui ofillanona, Jesús fiodaillana comeciuidimaci. Jusiñamuimo jiuuidimaci.

*Cristona #notino illa rafue*

<sup>43</sup> Cristo oretaganodi diga siño rafuena finuamona, nana comini jacinaitimaci.

<sup>44</sup> Nana creyentiai damacina itimaci. Naimaci raruia coninimo fecauidimaci.

<sup>45</sup> Dueredino ia, naimacina canollena, raruiairedino naimaci raruiaina vendedimaci. Iemei naie ucube dueredinomo fecadimaci.

<sup>46</sup> Jusiñamuiina sedallena, nagarui Jusiñamui jofomo ofisoidimaci. Danirie imaci jofuemo Jusiñamuiina jiai sedauidimaci. Nainomo danomo guillanona, Jesús fiodaillana comeciuidimaci. Caimare imaci comeciai illamona, caidiñeno guisoidimaci.

<sup>47</sup> Jusiñamuimo iobillacinona fecacana jaidimaci. Nana cominidi naimacina: “Mare” raitimaci. Naimacina Jusiñamui itataja isoi, nagarui comini creyentiaina jaidimaci.

**3***Jusiñamui jofomo Pedro lluacino*

<sup>1</sup> Jusiñamui jofomo jiaa facaise Pedro iaiaiaia Juan diga jaide. Jitoma ana ia, comini jiiuidimaci.

<sup>2</sup> Iaiaiaia jaillanomo jiaie comini tisitaitimiena atiana ciodiaiaiaia. Tisitaitimiena naimie jaca jeiciga. Naimiena nagarui atiano, Jusiñamui jofu ie ebiredena railla nase fuemo rainauidimaci. Nainomo naimiena rainauidimaci, fo jaidinomona ucube jica-jicallena.

<sup>3</sup> Iaiaiaia fo jaiacania, ucube jicallena, ie onolli ñuitade.

<sup>4</sup> Iaiaiaia naimiemo eruailano, Pedro raite:

—Cocomo eruai.

<sup>5</sup> Ie jira iaiaiaimo eruaide. Ra feiñoitena, ocianona sedade.

<sup>6</sup> Pedro raite:

—Ucube cuemo iñede; iadedi cuemo ite rana omo fecaiticue. Nazaret ie Jesucristo uai cuemo illa jira, ona macaritaicue.

<sup>7</sup> Pedro naimie onollido llinuano, a naidanete. Iecon naimie eillidi jillode. Ie taisicoñuai jiai jillode.

<sup>8</sup> Daiacaillanona naidacaide. Macarillanona, iaiaiaia diga fo jaide. Jusiñamuimo iobillacinona fecajano, daiacaillanona macarite.

<sup>9</sup> Nana comini naimie macarillana ciodimaci. Naimie iobillacinona fecajana jiai cacadimaci.

<sup>10</sup> Naimie nase fuemo ana raisoilla jira, naimiena uiñotimaci. Naimiemo jai suide rafuena eo rajjicaidimaci.

<sup>11</sup> Naimiedi Pedro iaiaiaia Juan diga nia llinuano, naimaci dine Salomón micori finotaga jofu abi ibirimo comini aisidimaci. Rajjicaidimaci.

<sup>12</sup> Iena ciuano, Pedro naimacina raite:

—Caimaci, ¿bue ñellena biemo rajjicaidomoi? ¿Bue ñellena caimo iesee eruaidomoi? “Daiiaiaia iaiaiaia uaido naimiena jilloitate” raillanona cocomo eruaidomoi.

<sup>13</sup> Iena finoñedococo; iadedi Jusiñamui iena finuano, ie Jito Jesúsna iobitade. Cai usumatia; micoriai, Abraham, Isaac, Jacob, ua nana cai usumatia; micoriai bie Jusiñamuina sedadimaci; iadedi Jesúsna birui fecadomoi, coraillena. Pilato naimiena jino marena oretaiacana jira, Pilato ecimo naimiena llogidotomoi.

<sup>14</sup> Mareuidimiena jitaiñedomoi; iadedi come fatimiena cárcelmona jino billana jitaedomoi. Barrabás raillamiena jitaedomoi.

<sup>15</sup> Jusiñamui dibeimo caina itatatimiena meinetomoi. Naimie fiodaite; ia Jusiñamui naimiena jillotate. Iena ciodicoco. Ie jira iena lloticoco.

<sup>16</sup> Tisitaitimie jilluana jai ciodomoi. Naimiena uiñotomoi. Jesúsna naimie ñnua jira, Jesús naimiena mairitate. Naimiena raise jillotate. Iena jai ciodomoi.

<sup>17</sup> Caimaci, ero, omoi finoca rafuena abina uiñoñeno finodomoi. Omoi illa; comini jiai daje isoi finodimaci.

<sup>18</sup> Jai Jusiñamuidi ie facaina llorainina jiairuido sulle rafuena llotatate. Naimacina Cristo llegi cacajana llotatate. Birui naie llogacino suide.

<sup>19</sup> Omoi comeciai iuaillai meido. Jusiñamui dibeimo omoi comeciaina meido. Iemei Jusiñamui omoi jeacinona dotaite. Iena jaca feitaite.

<sup>20</sup> Omoi uri illa facaise illena, Jusiñamui omoi diga illena, iena fino. Jusiñamui Jesucristona omoi dine dane oretallena, iena fino. Naimiedi omoi jilloitaraima.

<sup>21</sup> Jusiñamui facaina lloraini micoriai jai lloga rafue sulle dinori monamo naimie fiebiite. Jai Jusiñamuidi ie mare lloraini micoriai uaido buena llote.

<sup>22</sup> Moisés micori raite: “Omoi cominimona naimie rafue lloraimana jaillena, cai Nama Jusiñamui cue isoi damiena fetoite. Nana naimie omoimo lluaana cacarei.

<sup>23</sup> Bie lloraimana bu cacarefiñenia, Jusiñamui naimiena duere finoite. Iemona faifite”.

<sup>24</sup> Nana Jusiñamui ie lloraini micoriaidi birui suille rafuena llotimaci. Samuel micori illa facaisemona naimaci biena llotimaci.

<sup>25</sup> Jusiñamuidi cai usumatiai micoriaimo rafuena llote; ia bie rafue birui omoimo jiai duide. Jusiñamui Abraham micorimo jai llote: “Nana cominidi o urui ai muidona caimare iitimaci”.

<sup>26</sup> Ie rafue suiñollena, Jusiñamui ie Jitona omoi dine navui orede. Omoi caimare illena, nano omoi marañedicinona fañonocaitallena, omoi dine naimiena nano jai oretate.

## 4

### *Cristo oretagamaiai laicomini motomo illa rafue*

<sup>1</sup> Comini diga Pedro iaimaiai Juan diga ñaia facaise, Jusiñamui diga ñairainidi naie iaimaiai dine bitimaci. Jusiñamui jofona sedaraini illaia diga, saduceuai railla comini diga jiai bitimaci.

<sup>2</sup> Fiodaillamona Jesús jai jilluana llofuetiaimaiai. Cominina iaimaiai llofuia jira, naie iaimaiai diga iciritimaci.

<sup>3</sup> Iaimaiaina gaitajanona, jai navuilla jira, cárcelmo jonetimaci, ie jitiramo naie rafuena siadollena.

<sup>4</sup> Iese suide; ia Pedro llogacinona cacadinomona ailluena comini naieña inotimaci. Cinco mil digamie creyentiaina jai itimaci.

<sup>5</sup> Icoiti Jerusalémo nana judíuai illaicomini siadollena ofidimaci.

<sup>6</sup> Anás jiai bite. Naimiedi Jusiñamui diga nanoca ñairaima. Caifás bite. Juan bite. Alejandro jiai bite. Nana Jusiñamui diga nanoca ñairaima cominidi ofidimaci.

<sup>7</sup> Naimaci motomo Pedro iaimaiai Juan diga atianona, iaimaiaimo jicanotimaci:

—¿Bu uai diga biena finodomico?

<sup>8</sup> Jusiñamui Joreño nana Pedro comecimo namatajano, Pedro naimacimo llote:

—Illaicomini, bie rafuena omoimo lloiticue.

<sup>9</sup> Tisitaitimie jilluana birui cocomo jicanotomoi. “¿Buemona naimie jillode?” raillanona cocomo jicanotomoi.

<sup>10</sup> Jesucristo uai diga jillode. Omoi biena uiñuana, ua nana judíuai comini biena uiñuana jitaide. Jesucristodi Nazaret imie. Naimiena jai coraidomoi; ia Jusiñamui naimiena jai jillotate. Ie jira omoi uicommo Jesús muidona tsitaitimie jai benoconi naidaillana ciodomoi.

<sup>11</sup> Omoi jofo finoraini isidomoi. Omoi jitañede noficidi jiaie nofici baifemo jai jaide. Jesúdi naie nofici isoide. Naimie rafuena omoi jitañena jira, naimiena meinetomoi.

<sup>12</sup> Cai jeacinomona jiaimie caina jillotanide. Nana eniruemo ite cominimona jiaimie buna jaca jillotanide. Dama Jesús caina jillotarede —llote.

<sup>13</sup> Jaciruiñeno marefodo llofuetiaimaiai. Nainomo itino iena cacajano, comecina facadimaci: “Abina uiñofediamaiai. Jamai bue isodiaimaiai”. Ie jira rañicadimaci; iadedi Jesús llofueoicaigaiaimaiaina illana uiñotimaci.

<sup>14</sup> Jilloitagamie iaimaiai diga naidaillana ciodimaci. Ie jira naimaci uai iñede.

<sup>15</sup> Naie rafuena siadollena, naie illaicomini iaimaiaina bai oredimaci.

<sup>16</sup> Coninimo jicanotimaci:

—¿Niese naie iaimaiaina nibaiticai? Nana Jerusalémo itino iaimaiai siño rafuena finuana jai fididimaci. Iena janonidicai.

<sup>17</sup> Jiaie comini iena fidii raillano, Jesús rafuena iaimaiai llofuiana rairuiticai.

<sup>18</sup> Ie mei iaimaiaina naimaci dine dane uaidotimaci. Iaimaiaimo Jesús rafuena llofueñellena riire llotimaci.

<sup>19</sup> Pedro iaimaiai Juan diga naimaci uai ote:

—Ie rafuena coco llollena Jusiñamui jitaide. Omoi uaina coco inoia, Jusiñamui jitailla rafuena finoñeiticoco. Cocomo llono. ¿Bu uaina inoiticoco? ¿Jusiñamui? ¿Omoi? Cocomo iese llono.

<sup>20</sup> Daimaiai coco ciua rafuena lloticoco. Daimaiai coco cacaja rafuena lloticoco —raite.

<sup>21</sup> Iaimaiaina jacinaitajamona, iaimaiaina jino oretatimaci. Iaimaiaina duere finoñedimaci, nainomo ite comini icirinaiñellena. Jusiñamuimo nana nainomo itinodi iobillacinona fecadimaci, tsitaitimie jai jillua jira.

<sup>22</sup> Jai jillodimie mo cuarenta años baifemo ite. Siño uaido naimie jillua jira, comini iobidimaci.

### *Naimacina Jusiñamui canollena, naimiemo jiacino*

<sup>23</sup> Iaimaiai jino jailla mei, iaimaiai nabaiñiai dine jaidiaimaiai. Illaicomini iaimaiaimo llua llotiaimaiai.

<sup>24</sup> Naimaci iena cacajano, Jusiñamuimo damie llua isoi juidimaci:

—Ore Moo, mona finodio. Eniruenta finodio. Monailaina finodio. Nana naiemo ite rana jiai finodio.

<sup>25</sup> Cai usuma David micorina raise uifoticaí. Naimiedi ona sedadimie. Naimiena bie rafuena o Joreño jaié llotatajamona, naimie llote:

¿Bue ñellena Jusiñamui diga judíuafinedino iciritimaci?

¿Bue ñellena Jusiñamuimo comini tainomo comeciaina facadimaci?

<sup>26</sup> Illaicomini ofidimaci, Jusiñamui diga fuirillena.

Jusiñamui facaisena ifnedimaci.

Cristo facaisena jiai ifnedimaci

llote.

<sup>27</sup> Naie rafue birui bene suide. Bie nairaimo Herodedi, Poncio Pilato diga, judíuafinedino diga, judíuai comini diga, ofide. O mare Jito Jesús facaisena ifnedimaci. Naimacimo o oretagamie facaisena ifnedimaci.

<sup>28</sup> Naimaci ofillamona, nana o jitaille rafuedi, o jaié lloga rafue diga, jai suide.

<sup>29</sup> Nama naimaci jaciruitajacinona jai uifotio. Cai comeciaina ocuifota, o rafuena jacitaiñeno cai llolesa.

<sup>30</sup> Duidinona jilloita. O mare Jito Jesús uaido caina siño rafuena finota —jidimaci.

<sup>31</sup> Jusiñamuimo jiaacino fuilla meinoconi, naimaci ofiracodi jaidisite. Jusiñamui Joreño nagamiiai comecimo namatade. Iemona Jusiñamui uai jacitaiñeno llocana jaidimaci.

### *Creyentiai damacina illa rafue*

<sup>32</sup> Nana creyentiai damacina itimaci. Naimacimo raruiai ia, dajena naimacimo duide.

<sup>33</sup> Naie facaise siño uaido naimie oretagano cai Nama Jesús jilluana llofueuidimaci. Iemona cominidi naimacina: “Mare” raitimaci. Nagarui Jusiñamui naimacina eo canode.

<sup>34</sup> Naimaci dine buna buena jaca jitaiñedimaci. Ucube ollena, enirueredino imaci eniruenta fecadimaci. Ucube ollena, joforedino imaci jofona fecadimaci. Ucubene atianona,

<sup>35</sup> Cristo oretaganomo fecadimaci. Ie mei dueredinomo imaci jitailla isoi fecaudimaci.

<sup>36</sup> Naimaci motomo José mameciredimie ite. Cristo oretagano jitaca mamecidi Bernaba. Ie mameci oni dobañuamona firadotimie. Naimie nairaidi levita. Naimiedi Chipre railla uiasi imie.

<sup>37</sup> Jerusalémo naimie fecalle eniruedi ite. Iena fecajamona, ucube atiano, Cristo oretaganomo fecade.

## 5

### *Ananías micori ie ai micori diga Jusiñamuina jifuia rafue*

<sup>1</sup> Naie facaise Ananías ie ai diga iaimaiai eniruenta jiai fecade. Ie ai mamecidi Safira.

<sup>2</sup> Naie iba naimiemo dabeí fiebide. Ie ai iena uifote. Atuedo atianona, Cristo oretaganomo fecade, “Nana ucube atidicue” raillanona.

<sup>3</sup> Jusiñamui Joreño Pedrona naie rafuena uifotajamona, Ananíamo Pedro jicanote:

—¿Niese Taife o comecimo namatade? Jusiñamui Joreño taino llotio, dabeí ucube omo fiebilla jira.

<sup>4</sup> Enirue nia fecañenia, nia oie. Fecaja mei, naie ucubedi nia oie. ¿Bue ñellena o comeciaina marañeno facadio? Cominimo taino llotio. Jusiñamuimo tainona jiai llotio.

<sup>5</sup> Ananías bie uaina cacajano ieconi fiodaillamona oni caide. Nana iena ciodino eo jacinaitimaci.

<sup>6</sup> Iemei nainomo ite conirueniai naimiena feridimaci. Jino uillano, raiafomo jonetimaci.

<sup>7</sup> Naie rafue daje amani horas illanona, naimie ai ie inimo suide rafuena uifoteno bite.

<sup>8</sup> Pedro naiñaiño mo jicanote:

—¿Nie diese o fecaca o enirue? Cuemo llono.

Naiñaiño uai ote:

—Jii, ie diese coco fecaca.

<sup>9</sup> Pedro jicanote:

—¿Bue ñellena Jusiñamui Joreñoña jifuetomico? Ero, o ini raiafomo jonetino saisia jai nasemo cacade. Naimaci ona jiai jino ja uitimaci.

<sup>10</sup> Naimie ecimo ieconi naiñaiño fiodaillamona, oni caide. Conirueniai fo billano, naiñaiño fiodaillana ciodimaci. Jino uillano, ie ini abimo dafomo jonetimaci.

<sup>11</sup> Iena fidiamona, nana creyetiai eo jacinaitimaci. Nana bie rafuena fididimodi jiai eo jacinaitimaci.

### *Cristo oretagano ailluena siño rafuena finodimaci*

<sup>12</sup> Comini motomo Cristo oretaganodi ailluena siño rafuena finouidimaci. Naie facaise nana naimacidi Jusiñamui jofomo Salomón micori finotaga jofo abi ibirimo ofisoidimaci.

<sup>13</sup> Jaié cominidi jacirullanona, naimacina nabaiñedimaci; iadedi naimacina raite:

—Cristo oretagano fue eo mare.

<sup>14</sup> Jaciruitimaci; iadedi creyentiaina ailluena comini jaidimaci. Ailluena iñiaia, ailluena riñoniaia, diese creyentiaina jaidimaci.

<sup>15</sup> Imaci biiramo duidinona jonecaida, naisomo atidimaci. Pedro nainomo macarillano, o llotta naimie joreño naimacimo ibaillamona, “Jillobiticai” raillano, atidimaci.

<sup>16</sup> Jerusalémo ie fuemo ite nairaiaimona comini biadedi, duidinona jiai atidimaci. Janaba anamo ite cominina jiai atidimaci. Nana jillodimaci. Ie isoi Cristo oretagano siño rafuena finouidimaci.

*Cristo oretagano duere sefuilla rafue*

<sup>17</sup> Cristo oretagano finoca rafueri Jusiñamui diga nanoca ñairaima eo uradoide. Nana naimie dibeimo itino jiai eo uradoidimaci. Saduceuai railla cominimo duidimaci.

<sup>18</sup> Eo uradoillamona, Cristo oretaganona gaitajano, cárcelmo jonetimaci.

<sup>19</sup> Naiona Jusiñamui jaienicidi cárcel nasena econote. Cristo oretagano jino atiano, naimacina raite:

<sup>20</sup> —Jusiñamui jofomo mai abido jai. Cominimo Jusiñamui dine naimaci ille rafuena llono.

<sup>21</sup> Iena cacajano, monaidemo, Jusiñamui jofomo jaillano, llofuetimaci. Ie facaiseconi Jusiñamui diga nanoca ñairaima, ie comini diga billano, danamo ofillena illaicominina uaidote. Cárcelmo policiaiaina oretate, Cristo oretaganona atillena.

<sup>22</sup> Cárcelmo jaidemo, naimacina cioñedimaci. Abido billanona, llotimaci:

<sup>23</sup> —Cárcel ie nase jaca ibaicana cidicai. Raise llaveca. Nase fuemo jaca soldadaui itimaci; iadedi econoticaimo, jaca buna cioñedicai.

<sup>24</sup> Jusiñamui jofo nanoca sedaraima, Jusiñamui diga ñairaini diga, bie llua cacajano, uainicaidimaci. Comecina facadimaci: “¿Nie isoide rafue naimacimo jai suide?”

<sup>25</sup> Iemo damie billanona, naimacina raite:

—Cárcelmo jonega cominidi Jusiñamui jofomo jai itimaci. Cominina jai llofuetimaci.

<sup>26</sup> Iena cacajano, Jusiñamui jofo nanoca sedaraima ie policias diga jibuisaide. Cristo oretaganona atide. Fecuisse atide, comini dinena policiaiaina noficiado fairinoi raillano.

<sup>27</sup> Naimacina atiano, illaicomini motomo jonetimaci. Iemei Jusiñamui diga nanoca ñairaima naimacimo llotte:

<sup>28</sup> —Omoimo Jesús rafuena llofuiiana rairuidicai; iadedi nana Jerusalén cominina jai llofuetomoi. Iese omoi llofuecabilia, “Cai illaicomini Jesúna meinetimaci” llotomoi.

<sup>29</sup> Pedrodi jiaie oretagano diga uai ote:

—Jesús rafuena cai llofuiiana jai rairuidomoi; iadedi omoi llua baifemo Jusiñamuina iñoiacadicai.

<sup>30</sup> Cai usumatiaia micoriaia Jusiñamuina sedauidimaci. Naie Jusiñamuidi Jesúna jai jillotate. Jesúna meinellena, cruzmo coraidomoi; ia Jesúna omoi meinia mei,

<sup>31</sup> Jusiñamuidi ie ecimo naimiena jai itatate. Cai illaimana naimiena jai itatate. Cai jilloitaraimana naimiena jiai jai itatate. Cai judiaui comini comechiai uai meidollena, naimaci jecinuai dotallena, iese naimiena itatate.

<sup>32</sup> Bie rafuena llofuecabiticai. Jusiñamui Joreño uaido iena jiai llofueticai. Jusiñamuina iñnotinomo Jusiñamuidi ie Joreña jai fecade —raite.

<sup>33</sup> Tena cacajano, illaicomini eo iciritimaci. Cristo oretaganona meineiacadimaci;

<sup>34</sup> ia ieconi illaicomini motomo damie naidaide. Naimie mameci Gamaliel. Moisés micori llogacinona uiuicaide. Nana cominidi naimie uaina iñnotimaci. Cristo oretaganona dallu bai oni oretajanona, naimie llotte:

<sup>35</sup> —Caímaci, omoi bie cominimo omoi finolle rafuemo comechiaina raise faca.

<sup>36</sup> Jai Teudas micori illaimana jaiacade. “Jai uaina baitimedicue” raillano, naimie dibeimo cuatrocientos iñiaia jaidimaci. Iemei naimie fiodaite. Naimie micori dibeimo itinodi oni tuusite. Jai naie rafuedi jaca ieconi duide.

<sup>37</sup> Naimie micori illa mei, comini mameciaina cuiana gobernador llua facaise, Galileo ie Judas micoridi jobairiacade. Jiaie comini naimie dibeimo illena fuemo faite. Naimie jiai fiodaite. Naimie micori dibeimo itino oni tuusite.

<sup>38</sup> Ie jira ja omoimo lloiticue: Bie cominina faimonocai. Jamai cominimona naimaci llogacino iade, jamai cominimona naimaci finuacino iade, ieconi duite.

<sup>39</sup> Jusiñamuimona bie rafue ia, jaca niese nibaifeitomoi. Jusiñamuimona bie rafue ia, Jusiñamui diga omoi rafuedi iite.

Naimaci naimie lluaña feiñuano,

<sup>40</sup> Cristo oretagano fo atiano, naimacina fatimaci. Naimaci Jesús rafuena llofuiiana eo rairuide. Ie mei jino imacina oredimaci;



<sup>41</sup> Iadedi illaicomini illanomona Cristo oretagano caimare jaidimaci. “Jesús dibeimo cai illa jira, caina duere finodimaci” raillano, caimare jaidimaci. Jusiñamui naie facaise naimacina riidoñena jira, jiai caimare itimaci.

<sup>42</sup> Jusiñamui jofomo nagarui Jesucristo rafuena llofuetimaci. Comini jofuemo nagarui jiai llofuetimaci. “Jesúdi cai jilloitaraíma” llofueuidimaci.

## 6

### *Creyentiaína canollena, siete digamie diáconuaina illena, fetua rafue*

<sup>1</sup> Naie facaise ailluena comini creyentiaína jaidimaci. Uradoillamona griego uaido ñaite comini dinena, judíuai uaido ñaite cominina jeare ñaitimaci. Grieguai feciñuai judíuai feciñuai isoi nagarui rana feiñoñena jira, jeare ñaitimaci.

<sup>2</sup> Ie jira naie doce oretaganodi creyentiaí danomo ofillena, nana naimacina uaidotimaci. Naimacimo llotimaci:

—Jusiñamui uaina lllena, ra fecalle diga, abi juanide. Jusiñamui uaina llofuiana cai fainonocaiadedi, marañede. Ra jamai cai fecaiadedi, jiai marañede.

<sup>3</sup> Ie jira, amatai, omoimona siete digamiena fetu. Inoganona fetu. Jusiñamui Joreño nana comecimo namatadinona fetu. Eo abi uñotinona fetu. Ie isoide iñiaína fetu. Bie ra fecarainina majjitimaci.

<sup>4</sup> Ie mei cai abi juarenite, Jusiñamuimo cai jüllena, Jusiñamui uaina cai llofuellena.

<sup>5</sup> Nana cominidi:

—Jee —raitimaci. Esteban micorina fetodimaci. Naimie Jusiñamuina eo ñnote. Jusiñamui Joreño nana naimie comecimo namatade. Jiai fetodimaci: Felipe, Prócoro, Nicanor, Timón, Parmenas, Nicolás. Nicoládi Antioquía nairai imie. Judíuai comini isoi naimiedi Jusiñamuina ñnote.

<sup>6</sup> Fetua mei, oretagano dine atidimaci. Jusiñamuimo oretagano jia mei, fetocanomo imaci onolli jonetimaci, Jusiñamui naimacina marena itatallena.

<sup>7</sup> Naie facaise Jusiñamui uaidi cominido uñotacana jaide. Jerusalémo ailluena comini creyentiaína jaidimaci. Jusiñamui diga ñairainimona creyentiaína ailluena jiai jaisite.

### *Esteban micori ie rafue*

<sup>8</sup> Esteban micori fue eo mare. Jusiñamui Joreño naimiema namatajamona, naimie uai eo siño. Comini motomo ailluena siño rafuena finouide.

<sup>9</sup> Naie facaise daje judíuai comini ofiracomona damierie Esteban micori dine bitimaci. Patrón anamona jillobidinomo naie ofiraco jainaiaide. Naimaci diga damierie Cirene nairai imaci bitimaci. Damierie Alejandría nairai imaci danomo jiai bitimaci. Cilicia nairai imaci jiai bitimaci. Asia nairai imaci jiai bitimaci. Esteban comini uaina uaitatimaci;

<sup>10</sup> Iadedi naimaci uaitalle uaidi iñede. Naimacimo Esteban uai isoidiuidi iñede. Jusiñamuimona ie uaina ua jira, Esteban abina uñuano ñaite.

<sup>11</sup> Ie jira jiaie cominimo bainino ibajano, naimiema llogidotadimaci. Raitimaci:

—Esteban Moisés micori jinafomo jeare ñaiana cacadicai. Naimiedi Jusiñamui jinafomo jeare ñaiana jiai cacadicai.

<sup>12</sup> Iese lluamona, comini comeciaina feidocana jaidimaci. Ilaicomini comeciaina feidocana jiai jaidimaci. Esteban dine billanona, naimiema gaitadimaci. Naie rafuena siadollena, naimaci ofiracomono naimie micorina uitimaci.

<sup>13</sup> Tainona llogidotinona jiai atidimaci. Llotimaci:

—Bimiedi Jusiñamui jofona jeare ñaicabite. Bimiedi Moisés micori llogacino jinafomo jiai jeare ñaicabite.

<sup>14</sup> Naimiedi Jesús bie jofona judaillena llote. Moisés micori caimo llogafuiai fainonocaiillena jiai llote. Iena cacadicai.

<sup>15</sup> Temo nana illaicomini naimiemo eruaidimacimo, naimie uieco Jusiñamui jaienici isoi eruaide.

## 7

### *Esteban micori abi riidua rafue*

<sup>1</sup> Jusiñamui diga nanoca ñairaiima Esteban micorimo jicanote:

—¿Ua le isoi naimaci llucino ite?

<sup>2</sup> Naimie uai ote:

—Caimaci, cacarei. Cai jaigaimona cai fueollena, naimaci micoriaina lloiticue. Jusiñamui maremiena jira, naimiedi cai eirue jitomo jaie bairedede. Cai eirue jitodi Abraham micori. Mesopotamiamo naimie micori nia ia, Harámo naimie micori nia jaiñenia, Jusiñamuidi naimie micorimo bairiano

<sup>3</sup> Llote: “O eniruemona mai jai. O cominimona mai jai. Omo cue acatalle eniruemo jaitio”.

<sup>4</sup> Ie jira Caldea railla eniruemona naimie micori jaide. Harámo rillanona, diga iruillai nainomo ite. Naimie moo micori fiodailla mei, omoi birui illa eniruemo Jusiñamui naimie micorina oretate.

<sup>5</sup> Nainomo rillanona, Jusiñamuidi naie enirue naimie micorimo fecañede. Ua janore jisa fecañede; iadedi: “Omo iena ico fecajiticue” raite. “O uruiaimo fecajiticue” jiai llote; iadedi naie facaise Abraham micori uruenide.

<sup>6</sup> Jusiñamui jiai llote: “O uruiaí jiaie comini eniruemo jaianiitimaci. Egiptomo jaianiitimaci. Naimacina duere finoitimaci. Cuatrocientos años llegi cacajitimaci.

<sup>7</sup> Naimacina maijitaite nairaina duere finoiticue. Ie mei o uruiaí naie eniruemona biitimaci. Bie illanono cuemo iobillacinona fecajitimaci” llote.

<sup>8</sup> Ie cominina naimaci jaillena, Jusiñamui Abraham micorimo iisaiaí diese abina diana llote. Ie facaise Abraham micori Isaac micorina comuitate. Ie jeiciamona ocho digarui illamona, Abraham micori naimie micorina dete. Isaac micori Jacob micorina comuitate. Jacob micori doce uruiaina comuitate. Naimaci micoriaimona cai doce diga nairai comuidimaci.

<sup>9</sup> Caimaci, José micorina Jacob micori uruiaí micoriaí uradoillamona, Egipto cominimo naimiena fecadimaci;

<sup>10</sup> iadedi Jusiñamui naimiena eo sedade. Ie llegi ie cacajamona naimiena jillotate. Naimiemo uifloracinona fecade. Ie jira Faraón micori naimiena jiai gaide. Faraón micoridi Egipto illaima. Ie muidona Faraón Joséna fetode, nana Egiptomo itinona sedallena. Ie jofona jiai sedatate.

<sup>11</sup> Naie facaiseconi nana Egipto comini aime guitimaci. Canaámo Jacob micori illanona, nana nainomo itino diga aime jiai guite. Eo duere sefuidimaci. Cai usumatiaí micoriaí naimaci illanomo guillena baiñedimaci.

<sup>12</sup> Egiptomo guille illana Jacob micori fidiano, guille ollena, nano facaise ie uruiaí micorina nainomo oretate.

<sup>13</sup> Ie mei José ie amatiaina naimiena uifnotade. Faraóni José comini illana fidide.

<sup>14</sup> Ie jira Josédi ie moona uaidote. Nana ie cominina uaidote. Setenta y cinco digamie ite.

<sup>15</sup> Ie jira Egiptomo Jacob micori jaide. Nainomo fiodaite. Ie uruiaí micoriaí nainomo jiai fiodaitimaci.

<sup>16</sup> Siquem railla nairai illanomo naimaci comini naimaci micoriaina uillano, nifici ie raiafomo jonetimaci. Siquemmo Abraham micori naifona Emmor uruiaí micoriaimona jaie ibade.

<sup>17</sup> Caimaci, Jusiñamui Abraham micorimo lloga rafue suille iairei illa facaiseconi, Egiptomo cai cominidi eo jebuidimaci. Abraham micorimo: “Egiptomona o uruiaí biitimaci” Jusiñamui jaie llote.

<sup>18</sup> Naie facaise jiaie illaima Egiptona sedade. José micorina uifnoñede.

<sup>19</sup> Ie jira cai cominina jifuiiano maijitauide. Uruiaí fiodaillena, naimacina imaci uruiaina fañonocaitate.

<sup>20</sup> Ie facaiseconi Moisés micori jeiciga. Jusiñamuimona naimie micori eo ebire eruaide. Ie moo jofomo daje amani fivui ite.

<sup>21</sup> Ie mei naimiedi fañonocaiga. Faraón jisa micoridi naimie micorina uanona, naiñaiño jito isoi naimie micorina uiuicaide.

<sup>22</sup> Naimie micori nana Egipto comini uifnuacinona fueote. Illaima uai isoi naimie uaidi ite. Eo abina uifnotimie.

<sup>23</sup> Caimaci, naimie micori cuarenta años illa facai, ie comini dine ie jaillemo ie comechina facade. Naimie cominidi cai judiaí comini.

<sup>24</sup> Egipto imiemona damie llegi cacajana ciuano, naimiena riidote. Riiduanona, Moisés micoridi Egipto imiena meinete.

<sup>25</sup> Moisés micori comechina facade: “Cue muidona Egiptomona Jusiñamuidi cue cominina oretate”. “Cue comini biena uifnotimaci” raillanona comechina facade; ie iadedi iena uifnoñedimaci.

<sup>26</sup> Ie arediruido Moisés micoridi mena come iaimaiaí fuirillana ciode. Iaimaiaina marena itataiacade. Raite: “¿Bue ñellena conimana duere finoacadomico? ¿Bue ñellena o come diga fuiridomico?”

<sup>27</sup> Duere finoacadimie naimiena oni ñuitade. Jicanote: “¿Bu odi cai illaimana jonegao? ¿Bu caimo ona llotatate juez isoi?”

<sup>28</sup> ¿Na are Egipto imie o meinia isoi cuena jiai meineiacadio?”

<sup>29</sup> Iena cacajano, come fajana naimie llinua jira, jacinallanona, Moisés micori aisode. Madián railla eniruemo jamai ua illafuena ite. Dinomo ie aina ua mei, nainomo mena jitona comuitate.

<sup>30</sup> Caimaci, cuarenta años illa mei, jofue iñenanomo Moisés micori illanona, Jusiñamui jaienicí naimie micorimo bairedede. Sinaí railla anedu ianori ite. Amena boua isoi amenamo bairedede. Naie boode amenadí fuiñede.

<sup>31</sup> Iena cuano, Moisés micori rajicaide. Naie iaieise naimie micori jibuisaidemo, naimiemo Jusiñamui llote:

<sup>32</sup> “O usumatiai imaci Jusiñamuidicue. Abraham, Isaac, Jacob, imaci Jusiñamuidicue” llote. Jacinaillamona Moisés micori abi docaide. Jaciruillanona, erodañede.

<sup>33</sup> Jusiñamui naimiēna raite: “Jamai bue o isoilla jira, o zapatona duiño. Benomo cue illa jira, o naidaillanodi eo mareno.

<sup>34</sup> Egiptomo cue comini llegi cacajana raise cidicue. Naimaci duere sefuillana uiñoticue. Ie jira omo bairedicue, naimacina Egiptomona jilloitallena. Mai jai. Egiptomo ona oretaiticue” llote;

<sup>35</sup> iadedi comini dinena Moisés micorina jaie jitaiñenamona, naimiēna raitimaci: “¿Bu illaimana odi jonegao? ¿Bu o juezna jonegao?” Comini dinena naimiēna jitaiñedimaci; iadedi Jusiñamui naimiēna illaimana itatate. Naimiēna Egiptomona cominina jilloitaraimana jai itatate.

<sup>36</sup> Egiptomona Moisés naimacina atide. Egiptomo nia ia, diga siño rafuena finode. Jiaieide monaillai fuemo naimaci rillanona, siño rafuena jiai finode. Jofue iñenanomo cuarenta años siño rafuena finocana jaide.

<sup>37</sup> Caimaci, Moisés micoridi cai judiúi cominimo llote: “Omoimona Jusiñamuidi damiēna ie rafue lloraimana ico oretaitē, naimie cuena oretaja isoi”.

<sup>38</sup> Jofue iñenanomo naimaci ia, Moisés Jusiñamui jaienicí diga anedumo ñaite. Anedu mamecidi Sinaí. Iemei cai usumatiai micoriai diga naie jaienicí facaina Moisés ñaite. Caimo fecallena, naimiedi cominina itatate uaina feiñote;

<sup>39</sup> iadedi cai usumatiai micoriai naimiēna iñoiacaiñedimaci. Naimiēna jitaiñedimaci. Egiptomo abido jaillēmo naimaci comeciāi facadimaci.

<sup>40</sup> Ie jira comini dinena Aarón micorimo llotimaci: “Egipto eniruēmona Moisés caina atide; iadedi naimie cai diga illana ja uiñoñedicai. Cai facaina Jusiñamuina eruaide jiraraina fino, Egiptomo abido caina ifollena”.

<sup>41</sup> Iemo jurareta urue joreña finodimaci. Iena sedallena, faga toica ocainaiaina fecadimaci. Naimacina finoca rafueri eo caimataidimaci.

<sup>42</sup> Ie jira Jusiñamui naimacimona oni jaillanona, naimacina fañonocaide. Iemona jitomana sedauidimaci. Fivuina jiai sedauidimaci. Ucuaina jiai sedauidimaci. Jusiñamui rafue lloraima ie rabenicomo biena jaie iese cuela:

Jusiñamui llote: “Judíui imaci, cuarenta años jofue iñenanomo omoi ia, cuemo omoi faga toica ocainaiái fecañedomoi;

<sup>43</sup> iadedi cuemo omoi comeciaina facañeno Moloc railla jiraraina sedadomoi.

Refán railla ucuduna jiai sedadomoi.

Naimacina sedallena, jiraraina finodomoi.

Ie jira Babilonia nairai baifemo omoi na oretaiticue”

cuela. Naie facaise cai usumatiai micoriai Jusiñamuina jitaiñedimaci.

<sup>44</sup> Caimaci, bie rafuena cai fueollena, cai usumatiai micoriai motomo Jusiñamui illana lloiticue. Jofue iñenanomo cai usumatiai micoriai motomo daje jofo allocona nitimaci. Nainomo Jusiñamuina sedallena, Jusiñamui Moisés micorimo acataja isoi, iena nitimaci. Jusiñamui jaie cuela noficidi naicomo eenoga.

<sup>45</sup> Josué diga bie eniruēmo naimaci billa facaise, cai usumatiai micoriai naiconā atidimaci. Bie enirue jaie nairaiaino jainaiāide; iadedi Jusiñamui naie nairaiaina dotajano, cai usumatiai naie eniruēna bairodimaci. Naico nainomo ite David micori facaiseconā.

<sup>46</sup> Jusiñamui David micorina eo canode. Ie jira David micoridi cai usuma Jacob micori ie Jusiñamui jofona finollena jicanote:

<sup>47</sup> ia Salomón micoridi jofona Jusiñamui iena finode;

<sup>48</sup> iadedi Jusiñamuidi iima finoca jofomo i-iñede. Jusiñamui facaina lloraima micoridi Jusiñamuina iese cuete:

<sup>49-50</sup> Cai Nama raite: “Monamo cue illamona, nana comini cue anamo itimaci.

Jafaici oticuedena, naga rana cue finua jira, nainomo cuena omoi sedallena, nie isoide jofona omoi finuana jitaiñedicue” raite.

<sup>51</sup> Ero, omoi comeciāi jiaieide. Omoi comeci iñofede. Jefonidomoi isoidomoi. Ie jira Jusiñamui Joreño anamo iacaiñedomoi. Omoi usumatiai micoriai isoi itomoi.

<sup>52</sup> Omoi usumatiai micoriaidi nana Jusiñamui rafue lloraima micoriaina duere finodimaci. Mareuidimie billena llotinona meinētimaci. Mareuidimēna gaitatatomoi. Naimiēna jai meinētomoi. Jesúna ñaiticue.

<sup>53</sup> Jusiñamui jaieniciaimona Moisés micorí llogacínona feiñotomoi; iadedi iena iñoñedomoi.

*Judiuaí Esteban micorína meinia rafue*

<sup>54</sup> Esteban llofuiana naimaci cacajano, eo iciritimaci. Icirillamona, isiduai muru-muru raite.

<sup>55</sup> Jusiñamui Joreño nana Esteban micorí comecimo namatajamona, monamo eruaillano, naimiedi Jusiñamui ebirenana ciode. Naimiedi Jusiñamui nabeimo Jesús naidaillana ciode.

<sup>56</sup> Raite:

—Mona ecuaillana ciodicue. Jusiñamui Jito Jusiñamui nabeimo naidaillana ciodicue.

<sup>57</sup> Esteban lluaana cacajano, jefo oroisite. Eo cuirillano, naimie dne aisicaidimaci.

<sup>58</sup> Jerusalémona naimiena jino dotadimaci. Naimacimo ite emodomo itiroina duiñuanona, Saulo railla conirue ecimo niroina joneside. Iemei Estebana noficido fairinoside.

<sup>59</sup> Estebana nofici diga fairinuano, Estebadi Jusiñamuimo ado jüide:

—Cue Nama Jesús, cue joreño feiño.

<sup>60</sup> Teconi cañici ifodo rainadacaida ado jüide:

—Naimaci bie jeacino finua muidona, ibana oñeno.

Iese naimie jüia mei, fiodaite.

## 8

*Saulo creyentiána duere finua rafue*

<sup>1-2</sup> Saulo dinena Esteban meiniana jiaí jitaide. Cristo rafuena eo ñnotinomona damierie Esteban micorí raiafomo jonetimaci. Eiamona naimacimo uillinoci eo ite. Nairui Jerusalémo ite creyentiái duere sefuilla facaiseconi tainede. Nana comini tuficaida jaidimaci. Judea railla eniruemo jaidimaci. Jiaínodi Samaria railla eniruemo jaidimaci; iadedi Cristo oretagano nine jaiñedimaci.

<sup>3</sup> Ie facaiseconi Saulodi creyentiána eo duere finode. Diga jofomo jamai jaillano, iññaína gaitade, cárcelmo jonellena. Riñoniána jiaí gaitade.

*Felipe Samariamo illa rafue*

<sup>4</sup> Tuficaida jaidino naga illanomo Jesús rafuena llocana uitimaci.

<sup>5</sup> Samariamo Felipei daje nairaimo jaide. Nainomo Cristo rafuena llofueuide.

<sup>6</sup> Ailluena cominidi Felipe llofuiana eo raise feiñotimaci, naimie siño rafuena finua jira.

<sup>7</sup> Felipei diga jananiái anamo ite cominimona jananiána oretate. Riire cuirioillano, jaidimaci. Ailluena tsitaitinona jillotate. Ailluena ñuja-ñujacaidinona jiaí jillotate.

<sup>8</sup> Ie jira naie nairaimo ite comini eo iobidimaci.

<sup>9</sup> Naie nairaimo Simóna mameciredimie ite. Naimie siño rafuena finouide. Iemona Samaria cominina rajicaitade. Naimie raite:

—Siñomiedicue.

<sup>10</sup> Nana comini naimiena ñnotinimaci. Abina uiññoñedino ñnotinimaci. Abina uiñotino jiaí ñnotinimaci. Raitimaci:

—Naimie uaidi Jusiñamui ie. Naimiedi siño jito —raitimaci.

<sup>11</sup> Iese naimacina are jifue. Naimaci rajicailla jira, naimaci naimiena cacadimaci.

<sup>12</sup> Ie mei Felipe Cristo ie mare rafuena llote. Naimie anamo naimaci illana Jusiñamui jitailla jira, Jusiñamui dibeimo naimaci comeciai uaina meiduana llote. Naimaci Felipe llofuiana ñnotinimaci. Inuamona, Felipe naimacina bautizade. fiññaína bautizade. Riñoniána jiaí bautizade.

<sup>13</sup> —Jiaí ñnoticue —Simóni raite. Naimie bautizaja mei, Felipe diga jaoicaide. Felipei diga siño rafuena finua jira. Simón naiena ciuano, rajicaide.

<sup>14</sup> Jerusalémo ite Cristo oretaganodi, Samaria comini Jusiñamui uaina feiñuana cacajano, Pedro, iaímaiai Juan diga, batine oredimaci.

<sup>15</sup> Iaímaiai rillano, naimaci Jusiñamui Joreñoña feiñollena Jusiñamuimo jüdiaímaiai,

<sup>16</sup> naimacimo Jusiñamui Joreño ñia iñena jira. Cai Nama Jesús facaina jai bautizadimaci; ia Jusiñamui Joreñoña ñia feiññoñedimaci.

<sup>17</sup> Teconi iaímaiai onolli naimacimo joniano, Jusiñamui Joreñoña feiñotimaci.

<sup>18</sup> Naimaci Jusiñamui Joreño feiñuana Simóni ciuano, ucubena iaímaiaimo fecacade.

<sup>19</sup> Raite:

—Cuemo omico uaina ine, bummo cue onollina cue joniamona, naimie Jusiñamui Joreñoña feiñollena.

<sup>20</sup> Pedro dinena uai ote:

—O ucube diga o faifisa. Ucube diga Jusiñamui fecaca uaina ibaacadio; iadedi Jusiñamui naiena jamai fecade.

<sup>21</sup> Bie rafuedi omo duiñede. Jusiñamuimona o comeci ñia marañede.

<sup>22</sup> O comeci iuai meido. Naimie o comecimo ite marañede facajacinuaina oni dotallena, cai Namamo jica.

<sup>23</sup> Omo ailluena marañedicino illana uñoticue. O comeci eo uradoide. Marañedicinona o comecimo namaredio.

<sup>24</sup> Simón uai ote:

—O lua cuemo suiñellena, o Nama diga cue facaina ñaino.

<sup>25</sup> Cristo rafuena iaimaiaí llua mei, Jerusalémo abido bitiaímaiaí. Abido billano, Samariamo diga comini illanuaimo Jesús ie mare rafuena llocana bitiaímaiaí.

*Etiopía imie creyentena jailla rafue*

<sup>26</sup> Naie facaise Jusiñamui jaiensaímona damie Felipemo llote:

—Beicido joide naído mai jai. Jerusalémona Gazamo joide naisona jai —llote. Naie naiso jofue iñenanodo joide.

<sup>27</sup> Ie jira jaide. Jusiñamuina sedajamona, naie facaise Etiopía enirue imie Jerusalémona bite. Etiopía illañño diga maijuide. Naiñañño mamecidi Candace. Naimiedi nana naiñañño gobiernu ucubena sedade.

<sup>28</sup> Naimie jai abido jaillano, ie carretamo raita, Isaías micori cuega rabenicono ado facade.

<sup>29</sup> Jusiñamui Joreño Felipemo llote:

—Naimie dine iairei jai. Carreta dine jai.

<sup>30</sup> Naimie dine Felipedi aisicana jaillanona, rabe ado facajana cacade. Felipe dinena naimiemo jicanote:

—¿O facaca rabenicono uñotio?

<sup>31</sup> Naimie uai ote:

—¿Niese uñotitue, bu cuena canoñenia?

Felipemo jicanote, naimie diga a jaillano danomo raillena.

<sup>32</sup> Naimie facaca cuegafue iese raite:

Toica lauda fallena uilla isoi, naimiema uitimaci.

Toica lauda tirai garedino dine eñena isoi, naimie ñañede.

Ie abina riidollena, uaina oñede.

<sup>33</sup> Marañede rafuena naimie finoñede; ia naimiema duere finodimaci.

Naimie uruiaí iñededí, ¿bu naimie rafuena lloite?

Meinia meinoconi, naimie jai iñede.

<sup>34</sup> Etiopía imie Felipemo jicanote:

—¿Bie lloraima bu iena llote? ¿Dama naimie iena llote? ¿Jiaimiena iena llote? Cuemo llono.

<sup>35</sup> Iemei Felipedi bie cuegafuamona naimiemo Jesús ie mare rafuena llote.

<sup>36</sup> Naisona jaidiaímaiaímo, jinui illanomo ridiaímaiaí. Etiopía imie dinena raite:

—Ero, bie jinui itemo, ¿bue ñe cuedi bautizañellitue?

<sup>37</sup> Felipe uai ote:

—O comecimona o ñnoia, cuemona mare.

Naimie uai ote:

—Jesucristodi Jusiñamui Jitonana ñnotitue.

<sup>38</sup> Naimie ie carreta jorodate. Iemei jinui dine jaidiaímaiaí. Felipedi naimiema bautizade.

<sup>39</sup> Jinuimona iaimaiaí bia, Jusiñamui Joreño Felipena oni uite. Etiopía imie Felipena dane cioñede; iadedí Etiopía imie iobicana jaide.

<sup>40</sup> Jusiñamui Joreño Azotomo Felipena uite. Cesarea dine naimie jaillanona, naga nairaiaímo Jesús ie mare rafuena llocana uite. Ie mei Cesareamo ride.

## 9

*Saulo creyentena jailla rafue*

(Hch 22.6-16; 26.12-18)

<sup>1</sup> Naie facaise Saulo cai Nama Cristona ñnotinona eo duere finoacade. Icirillamona, naimacina meineiade. Ie jira Jusiñamui diga nanoca ñairaima dine jaide.

<sup>2</sup> Judiaí comini naie ñairaima anamo illamona, creyentiaína duere finollena, Saulo cartana naimiemo jicajaide. Damascómo ite judiaí ofracuaimo dajerie cartana uiacade. Naie ofracuaí sedaraini naimie canollena jitaide. Jesucristona ñnotinona naimie baia, naimacina gaitajano, Jerusalémo atillena, naimiema canollena, cartana jitaide. fiñiaí baia, riñoniaí baia, naimacina Jerusalémo atiacade.

<sup>3</sup> Cartana ua mei, naimie jaillano, Damascómo iaire ia, ieconi monamona damie naimie abina quetiñote.

<sup>4</sup> Eniruemo naimie ana uaillano, monamona damie naimiemo lluaña cacade:

—Saulo, Saulo, ¿bue ñellena cuena duere finodio?

<sup>5</sup> Naimie uai ote:

—¿Budío?

Monamona damie raite:

—Jesúdicue. Cuen a duere finodio. Iemona o abina duere finodio, riicaillamona raise maiga jurareta suiñoacana isoi. Ie isoidio. Riicaillamona, cuena duere finoacadio.

<sup>6</sup> Naidacai. Damascomo mai jai. Nainomo o finolle rafue omo lloiticue.

<sup>7</sup> Saulo diga jaidinodi ñaiñoeno naidaidimaci. Naie uaina cacadimaci; iadedi buna cioñedimaci.

<sup>8</sup> Iecon Saulo naidacaide. Ie uisi ecoricaillamona, erodatemo, jai buena cioñede. Ie onollina llinocaida, naimiena Damascomo uitimaci.

<sup>9</sup> Darui amani cioñede. Jusiñamui como começina facajamona, guiñede. Jiai jiroñede.

<sup>10</sup> Damascomo Ananíana mameciredimie ite. Naimiedi creyente. Iníñenamona, Ananías nicairilla isoi cacaillena, Cristodi naimiemo rafuena llote:

—Ananías.

Naimie uai ote:

—Jii, bene iticue.

<sup>11</sup> Cai Nama Cristo naimiemo llote:

—Naidacai. Atona joide railla naisona jai. Judas ie jofomo jai. Naicomo Tarso ie Saulona jicano. Naimie cuemo jai jüide.

<sup>12</sup> Naimie damiena jai nicairite isoide. Ananíana mameciredimiena nicairite isoide. Ona nicairite isoide. Naimie dine o jaillena ona nicairite isoide. Naimiemo o onolli joniamona, naimie dane ciuana nicairite isoide.

<sup>13</sup> Ananías uai ote:

—Nama, diga cominimona naimiena fididicai. Jerusalémo naimiedi maraiñede rafuena ona inotinomo finode.

<sup>14</sup> Jusiñamui diga nanoca ñairaima uai naimiemo ite, nana bene ite creyentiana gaitallena.

<sup>15</sup> Cai Nama naimiemo llote:

—Mai. Naimie jai cue fetoca, judíuaiñedinomo cue rafuena llollena, illaicominimo cuena llollena, judíuai cominimo cue rafuena jiai llollena.

<sup>16</sup> Cuen naimie jai inua muidona, naimie nie isoi llegi cacajite. Naimiemo iena lloiticue.

<sup>17</sup> Ie jira Ananías naie jofomo jaide. Ie onolli Saulomo joniano, raite:

—Saulo, jai cue amana jai itio. Naisomo cai Nama Jesús omo jai bairede. Naimie cuena o dine orede, dane o cioillena, Jusiñamui Joreño nana o começimo namatallena.

<sup>18</sup> Iecon Saulo uisimona lliciai ico isoide ra uaide. Dane ciuana, naidaide. Ie mei jai bautizaga.

<sup>19</sup> Ie mei jai guite. Dane mairide. Diga irui Damascomo ite creyentiai diga naimie ite.

#### *Damascomo Saulo illa rafue*

<sup>20</sup> Judíuai ofracomo naimie jaillanona, Jesús ie rafuena llofuete. “Jesúdi Jusiñamui Jito” raillanona llofuete.

<sup>21</sup> Nana naimiena cacadinodi rajicaide. Raitimaci:

—Bimie Jerusalémo Jesúna inotinona duere finouide. Naimacina gaitallena, Jusiñamui diga nanoca ñairainimo uillena, naimie bene bite; ia Jesús dibeimo jai ite.

<sup>22</sup> Saulo nagarui jacitaiñoeno llofuimo fibioicaide. Llofueuide:

—Jesúdi cai jilloitaraima. —Naimie raise llofua jira, judíuai dinena iena uaitanidimaci.

<sup>23</sup> Digarui illa mei, judíuai começiana facadimaci, naimiena meinellena.

<sup>24</sup> Naimie aisi raillano, aremona nairai nasiaina sedadimaci. Naiona nasiaina jiai sedadimaci, naimiena meinellena; iadedi Saulo iena fidiano,

<sup>25</sup> naiona creyentiai naimiena oni uitimaci. Naimie jillobillena, llaigafó jinofebeimo cirigaímo rainajanona, naimiena ana ñuitadimaci.

#### *Jerusalémo Saulo illa rafue*

<sup>26</sup> Jerusalémo naimie jaide. Naimie ria, creyentiana nabaiacade; ia naimiena jaciruitimaci. Creyentena naimie jaillana inoñedimaci.

<sup>27</sup> Ie jira Bernabé naimiena Cristo oretagano dine uillano, naimacimo naiso motomo Saulo cai Namana ciuana llote. Naiso motomo cai Nama Saulomo lluaana jiai llote. Damascomo naimie ia, Jesúna jacitaiñoeno llofuiana jiai llote.

<sup>28</sup> Ie jira Saulona nabaidimaci. Jerusalémo jaisoillanona, cai Nama ie rafuena jacitaiñoeno lloouide.

<sup>29</sup> Iena cacajanona, griego uaina ñaite judíuidi naimie llofuiana uaitatimaci. Naimiena meineiacadimaci.

<sup>30</sup> Creyentiai iena fidiano, Cesareamo Saulona uitimaci. Ie mei Tarsomo naimiena oredimaci.

<sup>31</sup> Judeamo, Galileamo, Samariamo nana creyentiaí uri itimaci. Cai Namana ñnocana jaidimaci. Cai Namana jaciruoicaida jaidimaci. Jusiñamui Joreño naimaci começiana eo ocuiñotade. Ailluena comini creyentiaína jaidimaci.

*Eneas jillua rafue*

<sup>32</sup> Naie facaise diga illanuaimo Pedro macarite. Lidamo ite creyentiaí dine ride.

<sup>33</sup> Nainomo damie biramo biidena ciode. Naimiedi Eneas. Ocho años tisitaillamona biide.

<sup>34</sup> Naimiena ciuano, Pedro naimiemo llote:

—Eneas, Jesucristo ona jai jillotate. Mai naidacai. O biira ferí. —Ieconí naimiedi naidadate.

<sup>35</sup> Nana Lidamo ite comini, nana Sarónmo ite comini diga, naimiena jilluana ciuanona, creyentiaína jaidimaci.

*Fiodaillamona Dorcas jillua rafue*

<sup>36</sup> Jopemo Tabitana mamecrediñaño ite. Griego uaimona oni dobañuamona naie mameci Dorcas. Naiñaño creyente. Ailluena mare rafuena finouide. Ailluena duerede cominina canouide.

<sup>37</sup> Naie facaise naiñaño duicotaide. Ie mei fiodaite. Naimaci einamací finua isoi, ie nabañiaí naiñaño abina jocodimaci. Iemei aneba ie cuartomo naiñaño na jonetimaci.

<sup>38</sup> Lidamona Jope iaire ite. Pedro Lidamo creyentiaí illana fidiano, menamie naimie dine oredimaci. Iaimaína llotatimaci:

—Buena sedaño cai dine raire bi.

<sup>39</sup> Ie jira Pedro naidacaida, naie iaimaíaí diga jaide. Naimie ria, aneba ie cuartomo naimiena uitimaci. Nana feciñuai Pedro ecimo eecana naidaidimaci. Dorcas finouiga iniroina naimiemo acatatimaci.

<sup>40</sup> Dorcas finouiga rafuena Pedro fidiano, Pedro nana naimacina jino orede. Caiñici ifodo naimie raita, Jusiñamuimo jide. Abido dobaicaida, naiñaño ero date. Raite:

—Tabita, mai rainaicaí.

Ieconí naiñaño uisi oni erodate. Pedrona ciuano, a rainadate.

<sup>41</sup> Naiñaño onollí lluanona, a naidanete. Ie mei Pedrodi feciñuaina, jiaie creyentiaí diga, uaidote, naiñaño jai cajenana naimaci cioillena.

<sup>42</sup> Nana Jopemo ite comini naie rafuena fididimaci. Ie jira ailluena comini cai Namana ñnotimaci.

<sup>43</sup> Jopemo Pedro diga irui Simón jofomo ite. Simón di ocaina igoína cuidoraíma.

## 10

*Cornelio começi iuai meidua rafue*

<sup>1</sup> Cornelio raillamiedi Cesareamo ite. Naimiedi capitán. Italiamona bite soldaduai naimie anamo itimaci.

<sup>2</sup> Naimiedi Jusiñamui llogacinodo jaide. Nana ie comini diga Jusiñamuina ñnote. Judíuai cominimo ailluena rana jamai fecauide. Jusiñamuimo jiuide.

<sup>3</sup> Jitoma ana ia, naimiemo jai nicairilla isoi ite. Naimiedi Jusiñamui jaienicina naimie dine billana ciode. Jaienicidi uaidote:

—Cornelio.

<sup>4</sup> Naimiena Cornelio jaciruoicaida eruaide. Jicanote:

—Nama, ¿buena jitaídió?

Naimie uai ote:

—Jusiñamui o jiacinuaina jai cacade. Jusiñamuidi duerede cominina o canuana jiaí feitañede.

<sup>5</sup> Mai, Jopemo damerie o mullaiaimona oreta, Simón raillamiena atillena. Naimie jiaie mamecidi Pedro.

<sup>6</sup> Naimiedi igoí cuidoraíma jofomo ite. Naie cuidoraíma mamecidi Simón. Monaillai fue mo naimie jofó ite.

<sup>7</sup> Jusiñamui jaienici jailla mei, Corneliodi ie mullaiaimona mena uaidote. Naimie anamo ite soldaduaimona damie jiaí uaidote. Naie soldadodi Jusiñamuina jiaí ñnote.

<sup>8</sup> Nana naimiemo Jusiñamui jaienici llua naimacimo llua mei, Jopemo oretate.

<sup>9</sup> Ie are naimaci jaillano, Jopemo ianori riacanano, jitoma naidai ia, jofó emodomo Pedro jaide, Jusiñamuimo jillena.

<sup>10</sup> Naimie aimetate. Guiacade. Guillena comini finodemo, naimiemo nicairilla isoi ite.

<sup>11</sup> Mona oni econuana ciode. Aillue sábana isoi, buena ana billana ciode. Eniruemo naga muiduedo maigado ana bite.

<sup>12</sup> Naiemo jiaiforie eruaide ocainaia ite. Diga eniruemo jorode raniai ite. Diga nuiciniaia jiaia ite. Nana Moisés micori fimaidoga rille radi ite.

<sup>13</sup> Naimiedi monamona damie lluana cacade:

—Pedro, naidacaida, fajano, buena rino.

<sup>14</sup> Pedro uai ote:

—Nama, dama ite. Moisés micori fimaidoga rille rana jaca riñedicue.

<sup>15</sup> Monamona damie lluana dane cacade:

—Jusiñamui jai fimaidoñede. Ie jira iese lloñoeno.

<sup>16</sup> Dacaiño amani iese suide. Ie mei naie radi monamo abido jaide.

<sup>17</sup> Pedro ie comecina facade: “¿Ñiese illana cioticue?” Ie daacaiño Cornelio oretagano bite. Simon illa jofo jicanuano, naie nasemo ride.

<sup>18</sup> Simón Pedrona naie jofomo illana jicanotimaci.

<sup>19</sup> Pedro ie nicairillana isoidemo comecina facajano, Jusiñamui Joreño naimiemo llote:

—Ero, daje amani iima ona jenode.

<sup>20</sup> Naidacaida, ana jai. Naimaci diga buena sedañoeno mai jai. O dine naimacina oredicue.

<sup>21</sup> Pedrodi comini dine ana jaide. Raite:

—Omoi jenocamiedicue. ¿Bue ñiaibitomoï billa?

<sup>22</sup> Uai otimaci:

—Cornelio raillamie anamo iticai. Cornelio Jusiñamui jaienici birui llote: “Pedro dine damierena oreta, naimiena o jofomo atillena. Jusiñamui rafuena raise cacaillena, naimiena ati” llote. Corneliodi capitán. Naimiedi mareuidimie. Jusiñamuina inotimie. Nana judíuiai comini dinena naimiedi mareuidimie.

<sup>23</sup> Tena Pedro cacajano, naimie jofomo inillena naimacina fo uaidote. Ie are naimaci diga jaide. Damierie Jopemo ite creyentiaia naimie diga jiaia jaidimaci.

<sup>24</sup> Ie are Cesareamo ridimaci. Cornelio naimaci billemo ocuride. Nana ie cominina jai uaidote. Ie nabaiñiaia jiaia jai uaidote.

<sup>25</sup> Pedro fo jaia, Cornelio dinena naimiena uaidote. Pedro anamo bitadate, Jusiñamuimo fecaja isoi Pedromo iobillacinona fecallena.

<sup>26</sup> Pedrodi naimiena a naidanete. Raite:

—Mai a naidada. Cue jiaia jamai imadacue.

<sup>27</sup> Naimie diga ñaiano fo jaidiaimaiaia. Ailluena comini ofillana ciode.

<sup>28</sup> Naimacimo llote:

—Moisés micori judío imie judíuñedimie nabairillana rairuide. Iena uiñotomoi. Judíuñedimie jofomo illana jiaia rairuide. Ie areruido Jusiñamui nicairilla isoidifuena cuemo acatate. Iemona jai fueoticue. Jiaie nairai diga cue nabairillena, Jusiñamuimona marenana jai uiñoticue. Jusiñamui omoina cue jearuillana jai jitañede.

<sup>29</sup> Ie jira buena sedañoeno biticue, cuena o uaidua jira. ¿Bue ñellena cuena uaidotomoi? Cuemo llono.

<sup>30</sup> Cornelio uai ote:

—Nairui nagaamagarui illa meinomo, bie hora cue jofomo Jusiñamuimo jiidicue. Ieconí Jusiñamui jaienici cuemo baireda. Naimie iniroi quenirede.

<sup>31</sup> Cuena raite: “Jusiñamui o jiaana cacade. Naimiedi duerede cominina o canuana feitañede.

<sup>32</sup> Ie jira Jopemo damierena oreta, Simón Pedrona uaidollena. Jiaie Simón jofomo ite. Simóndi igoï cuidoraima. Ie jofo monaillai fuemo ite”.

<sup>33</sup> Iemona ona uaidoticue. O comeci marena jira, bene bitio. Jai nana bene iticai. Jusiñamui cai diga jiaia ite. Cai Nama nana omo lluana cacareillena, bene iticai.

#### *Cornelio Pedro llua rafue*

<sup>34</sup> Pedro uai ote:

—Jusiñamui nana comini naimie inuana jitaillana jai uiñoticue.

<sup>35</sup> Naga nairaimona Jusiñamuidi cominina jai jitaide. Bu naimiena inoia, bu mare rafuedo jaia, Jusiñamui naimiena jai jitaide.

<sup>36</sup> Cai judíuiai cominimo Jesucristo lluamona, Jusiñamui dibeimo cai illena jai uiñoticai. Iemona Jusiñamui diga cai uri illana jai jiaia uiñoticai. Jesúdi nana cai Nama. Bie rafuena navui janore fididomoi.

<sup>37</sup> Nana Judeamo bie rafue llocana jai jaide. Juan micori bautizajana llua mei, Galileamo Jesús naimie llofuiana tainede.

<sup>38</sup> Jusiñamuidi ie Joreño J Jesúsno fecade. Jesúdi Nazaret imie. Naimiemo ie uaina jiaia fecade. Ie jira Jesús mare rafuena finocana uite. Jusiñamui naimie diga illa jira, diga Taife anamo itinona jillotata.



<sup>39</sup> Judúiai eniruemo nana naimie siño finoca rafuena ciodicai. Iena birui llocabiticai. Cruzmo jonianona, cai illaicomini naimiena meinetimaci;

<sup>40</sup> iadedi darui amani illa mei, Jusiñamui naimiena jillotote. Jusiñamui jitailla jira, Jesús jillua mei, ailluena comini naimiena ciodimaci. Cajedimiena ciodimaci. Jiai ciodicai.

<sup>41</sup> Nana comini naimiena cioifedimaci; iadedi Jusiñamui fetocano diese naimiena ciodimaci. Fiodaillamona naimie jillua mei, naimie diga guticai. Naimie diga jamai jirodicai. Naimiena cai raise uifua jira, Jusiñamui caina fetode, naie rafuena llolena.

<sup>42</sup> Cominimo bie rafuena lluaana caimo llote. Jusiñamui Jesúsna jai fetode, naimiena inoñedinona duere finollena. Nia fiodaiñedinona duere finoite. Jai fiodaitinona jiai duere finoite. Ie jira Jesús rafuena llocana jaidicai.

<sup>43</sup> Jesús muidona naga naimiena inotimie ie maraiñedicinodi Jusiñamui dotalle. Iena nana Jusiñamui facaina lloraini micoriai jaiel llotimaci.

*Judúaiñedino Jusiñamui Joreñoña feiñua rafue*

<sup>44</sup> Pedro buena nia llofueia, Jusiñamui Joreño nana bie rafuena cacadinomo bite.

<sup>45</sup> Tena cianona, Pedro diga bite creyentiai rajjicaidimaci. Naimacidi judúiai comini. Judúaiñede cominimo Jusiñamui ie Joreño jai fecaja jira, rajjicaidimaci.

<sup>46</sup> Jusiñamui Joreño naimacimo illamona, judúaiñedinodi jiaie nairai uailaido ñaitimaci. Naie ñaia uailaina uifnoñedimaci. Jusiñamuimo iobillacinona jai fecadimaci. Pedro diga bitino iena cacajano, rajjicaidimaci. Iemei Pedro raite:

<sup>47</sup> —Cai feiñua isoi, Jusiñamui Joreñoña jiai feiñotomoi. Omoi bautizallena jaca budi rairuifeite.

<sup>48</sup> Ie jira naimiedi naimaci Jesucristo facaina bautizallena llote. Bautizaja mei, naimaci diga fiebillana naimaci jitailla jira, diga irui nainomo fiebide.

## 11

*Jerusalémo Pedrodi naimiemo jai suide rafuena llote*

<sup>1</sup> Judeamo ite Cristo oretagano, jiaie creyentiai diga, judúaiñede comini Jusiñamui uaina feiñuana fididimaci.

<sup>2</sup> Pedro Jerusalémo abido ria, judúiai comini naimiena icidimaci.

<sup>3</sup> Jicanotimaci:

—¿Bue ñellena judúaiñedino jofomo jaidio? ¿Bue ñellena naimaci diga gutio?

<sup>4</sup> Pedro uai uanona, naimacimo naie rafuena nagacinuaina llote:

<sup>5</sup> —Jopemo navui cue ia, Jusiñamuimo cue jiaia, nicairilla isoi iticue. Aillue sábana isoi ana billana ciodicue. Monamona ana lloride, ie muiduai maiga diga. Cuemo ana ride.

<sup>6</sup> Nainomo eruaidicue, diga rana ciodicue: ocainaia, eniruemo jorocana jaidinona, nuiciniaina. Iena ciodicue.

<sup>7</sup> Monamona damie cuemo lluaana cacadicue. Raite: “Pedro, naidacaillanona, fajanona, rino”.

<sup>8</sup> Naie uai oticue: “Nama, dama ite. Moisés micori fimaidoga rille rana jaca riñedicue”.

<sup>9</sup> Monamona dane cuemo llote: “Jusiñamui iena jai fimaidoñede. Ie jira iese lloñeno”.

<sup>10</sup> Dacaiño amani iese suide. Ie mei monamo nana abido dane jaide.

<sup>11</sup> Ieconí daje amani iima cai illa jofomo ridimaci. Cesareamona cue dine damie naimacina orede.

<sup>12</sup> Jusiñamui Joreñodi naimaci diga buena sedañeno cue jaillena cuemo llote. Cue diga seis creyentiai jiai jaidimaci. Cuena uaidotimie jofomo jaidicai.

<sup>13</sup> Nainomo cai rilla mei, naimie ie jofomo Jusiñamui jaienicina navui ciuana caimo llote. Naie jaienici naimiemo llote: “Jopemo cominina oreta, Simón Pedrona atillena.

<sup>14</sup> O jitaillie rafuena omo lloite. Naie rafuena o cacajamona, jeacinomona jilloitio, nana o jofomo ite comini diga” llote. Ie jira naimie cuena uaidote.

<sup>15</sup> Nainomo cue llofuia facaiseconí, nano dofoconí caimo billa isoi, Jusiñamui Joreño naimacimo bite.

<sup>16</sup> Iena cue ciuamona, cai Nama Jesús lloga uaina comeciticue. Naimie navui llote: “Juan micori rafuena comini feiñuamona, Juan naimacina bautizade; iadedi cue rafuena omoi feiñuamona, cue Moo ie Joreñoña birui feiñoitomoi”.

<sup>17</sup> Cai Nama Jesucristona cai inuamona, Jusiñamuidi ie Joreñoña caimo navui fecade. Naimacimo daje isoi birui fecademo, ¿niese Jusiñamui dibeimo ifeiticue?

<sup>18</sup> Iena Cristo oretagano cacajano, jai naimaci uaina uaitallicino ifede. Jusiñamuimo iobillacinona fecadimaci. Raitimaci:

—Naimaci jaca illena, Jusiñamuidi judúaiñede comini comeciai iuai meiduana jai jitaide. Naimie dibeimo naimaci illana jai jitaide. Ie jira naimieri iobidicai.

*Antioquíamo ite creyentiai illa rafue*

<sup>19</sup> Esteban micorina duere finua facaise, creyentiai tuficaida jaidimaci. Feniciamo damierie jaidimaci. Chipremo damierie jiai jaidimaci. Antioquíamo damierie jiai jaidimaci. Dani judíuai cominimo naimaci rafuena llotimaci;

<sup>20</sup> iadedi tuficaidinomona jiaíno Chripremona billanona, Cirenemona billanona, Antioquíamo rillano, judíuaiñedinomo cai Nama Jesús rafuena llotimaci.

<sup>21</sup> Cristo uai naimacimo illamona, ailluena comini ñnotimaci. Cai Nama dibeimo jaidimaci.

<sup>22</sup> Jerusalémo ite creyentiai iena fidiano, Antioquíamo Bernabéna oretatimaci.

<sup>23</sup> Naimie ria, naimaci marena illamona, naimiedi Jusíñamui naimacina dueruillana uíñote. Ie jira iobide. Imaci comeciai ocuíñocana ñnocana jaillana naimacimo llote.

<sup>24</sup> Naimiedi maremie Jusíñamui Joreño nana naimie comecimo namatadímie. Jusíñamuina eo ñnotímie. Naie facaise ailluena comini creyentiaína jaidimaci.

<sup>25</sup> Ie mei Tarsomo Bernabé Saulona jenuaide. Naimiena baillanona, Antioquíamo naimiena uite.

<sup>26</sup> Daje año creyentiai diga nabairillanona, naimacina llofuetiaímaiaí. Antioquíamo creyentiaídi cristianona nano mameciredimaci.

<sup>27</sup> Iemei Jerusalémona Antioquíamo damierie Jusíñamui rafuena lloraini bitimaci.

<sup>28</sup> Naimacimona Agabo raillamie ite. Jusíñamui Joreñodi naimiena llotatate:

—Nana comini ico aime guitimaci. —Claudio illaímana illa facaiseconi iese jai suide.

<sup>29</sup> Ie jira Antioquíamo ite creyentiaídi, Judeamo ite creyentiaímo, ucubena oretaiacadamaci.

<sup>30</sup> Nagamíai imacimo illa dierise ucubena oredimaci. Creyentiaína llofuerainimo Bernabé diga, iaímaiaí Saulo diga, naie ucubena oredimaci.

## 12

### *Herodes Agripadi creyentiaína duere finua rafue*

<sup>1</sup> Naie facaise Herodes railla illaímadí creyentiaímona damieriena gaitatate, naimacina duere finollena.

<sup>2</sup> Lloebi diga Jacobo cimaíona jaitatate. Jacobodi Juan ama.

<sup>3</sup> Ieri judíuai illaícomini iobidimaci. Iena uíñuamona, Herodes Pedrona jiai gaitatate.

<sup>4</sup> Naie facaiseconi judíuai comini llomenico guilla rafue ite. Naimiena gaitatajanona, cárcelmo jonete. Soldaduaina orede, naimiena sedallena. Daje soldado Pedro nabeimo lloeo diga cuinaca. Daje soldado Pedro jarifebeimo lloeo diga cuinaca. Mena soldado naie cuarto ie nasena sedade. Ie isoi sedauidimaci. Naie llomenico guilla rafue fuilla mei, comini illa uicomona naimiena meineiacade.

<sup>5</sup> Ie jira Pedro cárcelmo fiebide; iadedi creyentiai naimie facaina eo juidimaci.

<sup>6</sup> Herodes naimiena meineiacanarui naio Pedro soldaduai motomo ñide. Mena lloeo diga maíga. Soldaduai cárcel nasena jiai sedadimaci.

<sup>7</sup> Ieconí cai Nama ie jaienici di cárcelmo bairede. Cárcelmo lligaiñote. Naimiena casitallena, jaienici Pedro ciraiquina jetade. Raite:

—Raire naidacai.

Ie mei naimie onollimo ite lloeodi oni uaide.

<sup>8</sup> Jaienici naimiena raite:

—O ñiroina jita. O zapatona jiai jita— Iena jitaja mei, naie jaienici dane raite—. O ñiroi o abimo ferino. Cue diga mai bi.

<sup>9</sup> Naie jaienici jinafona Pedro jino jaide. Pedrodi naie jaienici naimiemo finoca rafuena uíñone.

—Nicaírilla isoi comecina facadicue —raite.

<sup>10</sup> Naga nasena sedade soldadomona jaide. Jino jaillena, nanoca nasemo ride. Nai nasedi lloema ie; iadedi nase dama ecoride. Jino jaidíiaímaiaí. Daje calle jaillanona, jaienici naimiena fainonocaide.

<sup>11</sup> Iemona Pedro naimiemo suide rafuena jai uíñocaide. Raite:

—Cue Nama ie jaienicina uanaí oretate. Herodemona cuena jillobitade. Judíuai illaícomini cue meinellena cue sedajamona cuena jillobitade.

<sup>12</sup> Iena jai naimie uíñuano, María jofomo jaide. Mariadi Juan Marcos ei. Jusíñamuimo jillena, naícomo ailluena comini ofidimaci.

<sup>13</sup> Rillanona calle fuemo ite nasena tute. Daje mullaíño bite. Naiñaiño mamecidi Rode.

<sup>14</sup> Naimie uaiduamona, naiñaiño Pedro uaina uíñote. Iobilla jira, nase econoñede; iadedi abido fo aísde. Pedro nasemo illana llote.

<sup>15</sup> Raitimaci:

—Odi uairico isoidiosa.

Naiñaiñodi:

–Pedrodi jaca ieseuide –raite.

Uai uamona:

–Naimie joreño ite –raitimaci.

<sup>16</sup> Pedro nasena nia tua jira, nasena econuaibitimaci. Econuamona naimiena naimaci ciuamona, rajicaidimaci.

<sup>17</sup> Fo jaillano, Pedro ie onolli jaidide, naimaci llicaillena. Cárcelmona cai Nama naimiena jino ua rafuena llote. Raite:

–Jacobomo iena llono. Jiaie creyentiaimo iena jiai llono.

Ie mei Pedro jino jaillano, jiaimono jaide.

<sup>18</sup> Monaidemo, Pedro nainomo iñena jira, soldaduai rajicailanona, siadotimaci.

<sup>19</sup> Herodes iena fidiano, naimiena jenotate. Naimiena baiñena, soldaduaimo jicanote. Baiñena jira, naimacina meinellena llote. Iemei Judeamona Cesareamo Herodedi jaide.

### *Herodes micorí fodaila rafue*

<sup>20</sup> Naie facaise Herodedi Tiro railla nairai diga, Sidón railla nairai diga, eo icirite. Naimaci uri ille rafuena siadollena, naimie dine bitimaci. Herodes ecimo maijdimiedi Blasto. Blasto diga naie cominidi nabairite, naimaci dibeimo naimie illena. Herodes eniruemona naimaci guille billa jira, uri illena naimiemo jicanote.

<sup>21</sup> Naie cominina Herodes feiñollena, ie ebirede iniroina jítade. Naimacina feiñollena, ie rairabicimo raide. Iemona raita, rafuena are llote.

<sup>22</sup> Iena cacajano, comini ado cuiriidimaci:

–Jamai iimadi ñaiñena. ¡Jusiñamui ñaia!

<sup>23</sup> “Jusiñamuiñedicue” naimie raiñena jira, ieconi cai Nama jaienici naimiena iracotaitate. Jusiñamuimo iobillacino naimie fecañena jira, aiai naimiena aite. Iemona naimiedi fiodaite.

<sup>24</sup> Naie facaiseconi Jusiñamui uai llocana jaide. Ailluena comini iena inotimaci.

<sup>25</sup> Iaimaiai uiga ucube illanona, Bernabé, Saulo diga, Jerusalémona Antioquíamo abido bitiaimaiai. Juan Marcos jiai atidiaimaiai.

## 13

### *Bernabéna, iaimaiai Saulo diga, fetua rafue*

<sup>1</sup> Antioquíamo creyentiai motomo Jusiñamui facaina lloraini itimaci. Llofueraini jiai itimaci: Bernabé, Simón. Simón di jiaie mameci Negro. Lucio ite. Naimiedi Cirene imie. Manaén ite. Naimiedi Herodes ie amana mamede. Herodedi Galilea railla enirue gobernador. Saulo jiai ite.

<sup>2</sup> Naimaci Jusiñamuina sedajamona, guiñenaruillai ia, Jusiñamui Joreño naimacimo llote:

–Bernabé iaimaiai Saulo diga fetu, cuejena. Cue rafuena iaimaiai llollena, iaimaiaina jai fetodicue.

<sup>3</sup> Jusiñamuimo naimaci jia mei, Jusiñamui iaimaiaina fetuana naimaci uiñuamona, naimaci onolli iaimaiaimo jonía mei, iaimaiaina naimacimona oni oretatimaci.

### *Pablo, iaimaiai Bernabé diga, Chipremo illa rafue*

<sup>4</sup> Iaimaiaina Jusiñamui Joreño oretaja jira, Seleuciamo jaidiaimaiai. Nainomona botedo Chipremo jaidiaimaiai. Chipredi uiasi.

<sup>5</sup> Chipremo ria, Salaminamo juduai ofiracuaimo Jusiñamui uaina llofuetiaimaiai. Juan Marcos iaimaiai diga jiai jaide.

<sup>6</sup> Nana naie uiasimo jaillanona, Pafos railla nairaimo ridimaci. Nainomo Barjesúna mamecredimiena baitimaci. Naimie judío imie. Naimiedi aima. Naimiedi diga siño rafuena finoraima. “Jusiñamui rafuena lloticue” raite; iadedi taino lloraima.

<sup>7</sup> Gobernador diga maijuide. Gobernador di Sergio Paulo. Gobernador di abina uiñotimie. Jusiñamui uaina cacacana jira, naimie Bernabé iaimaiai Saulo diga uaidote.

<sup>8</sup> Barjesús ie jiaie mamecidi Elimas. Naie iaimaiai llofuiana uaitate. Gobernador inuana jitañede.

<sup>9</sup> Saulodi jiaie mameci Pablo. Pablo dinena naimiena eo eruaillano, Jusiñamui Joreño nana Pablo comecimo namatajamona,

<sup>10</sup> naimiemo llote:

–¡Eo jifueraimadio! ¡Eo marañedio! ¡Tafe dibeimo itio! Nana mare rafue dibeimo iñedio. Cai Nama ie mare uanaicinona dohairaidodio.

<sup>11</sup> Cai Nama ie uaido ona ja iracotaitaiticue. Nano nigarui useredinona cioiñeito.

Ieconí naimie cioñede. Cominina jenuaide, ie onollido llinocaida ie uillena.

<sup>12</sup> Iena ciuamona, gobernador creyentena jaide. Cai Nama Jesús rafue siñonana ciuamona, naimie jainaite.

*Jesús rafuena llocana jaidiamaia*

<sup>13</sup> Pafomona botedo Pablo ie nabaiñiai diga jaide. Perge railla nairaimo ride. Perge Panfilia railla eniruemo ite. Juan Marcos iaiaiaia fainonocaida, Jerusalémo abido jaide.

<sup>14</sup> Pergemona Antioquíamo jaidiamaia. Pisidia railla eniruemo Antioquía ite. Sábadoruimo judíuai ofiracomo jaillano, ana raidiamaia.

<sup>15</sup> Moisés micori cuegafuena facaja mei, Jusiñamui facaina lloraini micoriai cuegafuena facaja mei, judíuai ofiraco sedadino iaiaiaimo llotimaci:

—Caimaci, cominimo bue omico lloiacania, mai llono.

<sup>16</sup> Pablo naidadajano, ie onollina jaidide, comini lliacaillena. Raite:

—Jusiñamuina sedallena bene itomoi. Omoimona damierie judíuaidomoi. Jiaino judíuainedomoi; iadedi judíuai isoi Jusiñamuina sedadomoi. Cue lluomo mai cacarei.

<sup>17</sup> Temona omoi fueollena, cai jaiagai rafuena lloiticue. Cai judíuai comini Jusiñamuina birui sedadica. Naimiedi cai jaiagaina jaie fetode. Egiptomo naimaci ia, naimacina eo jebuitate. Nainomona ie siño uai diga naimacina atide.

<sup>18</sup> Jofue iñenanomo cuarenta años naimacina canode.

<sup>19</sup> Canaán eniruemo siete nairaina cuenode. Cai jaiagaimo, naimaci uruias diga, naie eniruena fecade, naimaci iena.

<sup>20</sup> Cuatrocientos cincuenta años cai jaiagaina fetuamona, naie eniruena naimacimo fecade. Naie facaise Jusiñamuidi jueces fetode, cai jaiagaina naimaci canollena. Naimie dibeimo naimacina itatallena, Jusiñamui naie jueces fetode; iadedi Samuel micori illa facaise juecesna jai jitaññedimaci. Samuel micoridi Jusiñamui facaina lloraima.

<sup>21</sup> Illaimana naimaci jitailla jara, Jusiñamui Saúl micorina fetode. Naimiedi Cis micori jito. Naimie micori nairaidi Benjamín. Cuarenta años Saúl micori cai usumatia micoriaina sedade.

<sup>22</sup> Naimie ifo meidollena, naimaci illaimana illena, Jusiñamui David micorina fetode. Naimiedi Isaí micori jito. Jusiñamui naimie micorina llote: “Bimie eo cue comecido jaidimie. Nana cue jitailla rafuena finoite”.

<sup>23</sup> Jusiñamui llua isoi, David micori uruiamona Jesúdi cai judíuai comini Jilloitaramana jaide.

<sup>24</sup> Jesús nia llofueñenia, Juan Bautista micori llofueuide. Juan micori cai cominimo llouide: “Omoi jeacinona fainonocaida, Jusiñamui dibeimo omoi comecia iuaila meido. Iena omoi meidoia, comini iena uiñotallena, mai omoi bautizallomo”.

<sup>25</sup> Juan micori ie llofua fuillamona, raite: “Omoi comeci facajamieñedicue. Cue ifomo jaiamena meidoite. Naimie isoñedicue. Jamai bue isoidicue. Jamai bue cue isoilla jira, naimiena cue canuana uiñedicue”.

<sup>26</sup> Caimaci, cai eirue jito Abraham micorimona comudica. Jusiñamuina birui sedadica. Ie jira cai jeacinomona naimie jilloitalle rafue caimo duide. Jesúna ñaiticue.

<sup>27</sup> Jerusalémo itinodi, cai illaicomini diga, Jesúna jaie meinetimaci. Naga sábado Jusiñamui facaina lloraini micoriai cuegafuina facadimaci; iadedi iena raise cacaiñedimaci. Jesúna naimaci meiniamona, Jusiñamui lloraini micoriai cuegafuina jai suitatimaci.

<sup>28</sup> Jesús marañede rafuena finoñede; iadedi naimiena meinetimaci. Pilatomo jicanotimaci, naimiena meinellena.

<sup>29</sup> Nana Jusiñamui facaina lloraini micoriai cuegafuina suilla mei, cruzmona naimie ana uano, nofici ie raiafomo naimiena jonetimaci;

<sup>30</sup> iadedi fiodaillamona Jusiñamui naimiena jillotate.

<sup>31</sup> Galileamona Jerusalémo naimie diga jaidino naimiena diga icaiño ciodimaci. Iemei cominimo naimie rafuena jai llocabitimaci.

<sup>32</sup> Jusiñamui cai jaiagaimo jaie lloga rafue jai suide. Iena omoimo ja lloiticoco.

<sup>33</sup> Jusiñamuidi cai jaiagaimo llogafue birui jai suide. Jesúna cai ñine jai orede. Naiena salmos dosmo cuega: “Jusiñamui llote: ‘Cue jitodio. Birui ona jilloitaramana itaticue’”.

<sup>34</sup> Fiodaillamona Jusiñamui naimiena jai jillotate. Ie abi jaca rifañede. Iena Jusiñamui jai raite: “Davidmo cue llogacinona omoi facaina jaca finojiticue”.

<sup>35</sup> David micori jiaie salmono iena cuete: “O mareuidimie jaca rifailana jitaññedio” raite.

<sup>36</sup> Jusiñamui David micorina ñaññede. Ie illa dinori David micoridi Jusiñamui jitailla rafuena finode. Ie mei naimie fiodaite. Ie raiafomo naimie comini naimiena jonetimaci. Ie mei David micori abi rifaide;

<sup>37</sup> iadedi Jusiñamui Jito abidi ie isoi rifañede.

<sup>38</sup> Caimaci, daje rafue omoimo lloiacadicue. Jesús fiodailla jira, Jusiñamui omoi jeacino oni dotaacade. Moisés micori llogacinodi omoi maraññedicinomona omoina jillotañede;

<sup>39</sup> iadedi Jesúna birui omoi ñnoia, omoi jeacino anamona jilloitomo.

<sup>40</sup> Abina omoi rairui, Jusiñamui facaina lloraini micoriai jaie cuegafuiai omoimo sui raillano. Jaie cuetimaci:

<sup>41</sup> Ero, Jusiñamui uaina jamaidomoi. Ieri rajjicaidomoi; iadedi faifidomoi.

Omoi motomo siño mare rafuena birui finodicue.

Bu omoimo iena iese lloia, bie rafuena ñnoñeitomoi.

Ie isoi omoimo suiñellena, Jesúna birui omoi mai ñno.

<sup>42</sup> Ie mei Pablo llücaide. Iaimaiaí jino jaidemo, comini iaimaiaimo jicanotimaci, jiaie sábadoruimo bie rafuena naimacimo dane lloiena.

<sup>43</sup> Comini jino jailla mei, ailluena comini Pablo, iaimaiaí Bernabé diga, ñaicana jaidimaci. Judíuai iese jaidimaci. Judíuaiñedino iese jiai jaidimaci. Naie judíuaiñedinodi judíuai isoi Jusiñamuina ñnotimaci. Pablo, iaimaiaí Bernabé diga, ñaicana jaillonona, naimacimo llotiaimaiaí:

—Jusiñamui omoína duenaillana omoi jai uñña jira, Jesús rafuena mai omoi ñno.

<sup>44</sup> Jiaie sábadoruimo ailluena comini ofidimaci, Jusiñamui uaina cacarellena.

<sup>45</sup> Ailluena cominina ciuano, judíuai comini dinena eo uradoidimaci. Pablo joreñoña ñaitimaci. Naimie llofuiacinuaina uaitatimaci;

<sup>46</sup> iadedi Pablo, iaimaiaí Bernabé diga, jacitaiñeno llofuetiaimaiaí:

—Omoimo Jusiñamui uaina nano lloiacadicoco. Iena jitaiñedomoi. Jusiñamui diga omoi jaca illena jitaiñedomoi. Ie jira judíuaiñedino dine jaiticoco.

<sup>47</sup> Iese Jusiñamui jai lote:

Judíuaiñedinomo ona oretaiticue, naimacimo cue rafue lloiena,

naga eniruemo ite cominimo jeacinomona jilluana lloiena.

<sup>48</sup> Iena cacajano, judíuaiñedino iobidimaci.

—Jusiñamui rafue mare —raitimaci. Jusiñamui jaca illena fetocano diese Jesúna ñnotimaci.

<sup>49</sup> Nana bie eniruemo cai Nama Jesús uaina llocana jaide;

<sup>50</sup> iadedi judíuai dinena diga cominina fuemo faicana uitimaci. Jusiñamuina sedade riñoniaína fuemo faicana uitimaci. Naie riñoniaí mameciaí are soride. Ilaicomini fuemo faicana uitimaci. Ie jira Pablo, iaimaiaí Bernabé diga, duere finodimaci. Naimaci illanomona iaimaiaína jino dotadimaci;

<sup>51</sup> iadedi jioracuai iaimaiaí eillimona jaidinotiaimaiaí, naimacimo ite jeacinuaina naimaci uñlloiena. Ie mei Iconio railla nairaimo jaidiaimaiaí;

<sup>52</sup> iadedi Antioquíamo ite creyentiaí eo iocire itimaci. Jusiñamui Joreño nana naimaci comecimo namatade.

## 14

*Iconiomo Pablo, iaimaiaí Bernabé diga, illa rafue*

<sup>1</sup> Iconiomo judíuai ofiracomo, iaimaiaí Antioquíamo jailla isoi, jaidiaimaiaí, Cristo rafuena duere llotiaimaiaí. Ie jira ailluena comini creyentiaína jaidimaci. Judíuai cominimona ailluena ñnotimaci. Judíuaiñede cominimona ailluena jiai ñnotimaci;

<sup>2</sup> iadedi ñnoñede judíuidi judíuaiñedinona fuemo faitimaci. Naimacimo creyentiaína tainona llotimaci;

<sup>3</sup> iadedi nainomo are fiebidiaimaiaí. Cai Nama facaisena jacitaiñeno llotiaimaiaí. Cai Nama Jesús iaimaiaína siño rafuena finotate. Ie jira cominidi cai Nama Jesús naimacina dueruillana fididimaci;

<sup>4</sup> iadedi nana comini naiena ñnoñedimaci. Comeciaína daje isoi lloisñede. Damierie judíuai facaisena itimaci. Damierie naie iaimaiaí facaisena itimaci.

<sup>5</sup> Judíuaiñedinodi, judíuai diga, naimaci illaicomini diga, naie iaimaiaína duere finoacadimaci. Noficina iaimaiaína fairigilacadimaci.

<sup>6</sup> Iena fidiano, Licaoniam ite nairaimo aisicano jaidiaimaiaí. Lистра railla nairaimo jaidiaimaiaí. Derbe railla nairaimo jiai jaidiaimaiaí. Naie nairai ecimo ite eniruemo jiai jaidiaimaiaí.

<sup>7</sup> Nainomo Jesús ie mare rafuena llofuetiaimaiaí.

*Listramo iaimaiaimo suilla rafue*

<sup>8</sup> Listramo damie tisaite. Nanomona naimie iese jeicia jira, jaca macariñede.

<sup>9</sup> Pablo llofuiana naimie raise cacajamona, “Jusiñamui cuena jillotarede” raillonona, tisitaitimie ñnote. Pablo dinena naimiemo eruailano, naimie ñnuana uñote.

<sup>10</sup> Naimiemo ado lote:

—A naidada.

Iemei daiacaida naimie macarite.

<sup>11</sup> Ailluena comini Pablo finoca rafuena ciodimaci. Naimaci uaido ado cuiridimaci:

—ññiai isoi Jusiñamui cai dine bite.

Naie cominidi Júpiter railla jusiñamuina sedauidimaci. Mercurio railla jusiñamuina jiai sedauidimaci.

<sup>12</sup> Ie jira Bernabé mamecidi jiaicina jonega Júpiter. Pablo mamecidi jiaicina jonega Mercurio, naimie ñairaimana illa jira.

<sup>13</sup> Naie nairai nanoca nase ruica facai Júpiterna sedauilla jofo ite. Iaimaiaina sedallena, safa diga juraretaiaina abina finoduanona, Júpiter facaina ñairaima naimacina atide. Ailluena comini diga bite. Juraretaiaina fallena, “Naie iaimaiaidi cai Jusiñamui” raillano, iaimaiamo feaacadimaci.

<sup>14</sup> Iaimaiai iena ciuanona, “Comini marañede rafuena finoacade” raillano, iaimaiai iniroina cuaranotiaimai. Comini motomo aisicana jaidiaimai. Ado llotiaimai:

<sup>15</sup> —Nabaiñiai, ¿bue ñellena cocomo iese finodomo? Jamai imadicoco. Omoi isoidicoco. Jusiñamuina omoi sedallena, jamai rana omoi sedañellena, mare rafuena omoimo jai lloticoco. Cajede Jusiñamuina sedadicoco. Naimiedi mona finode. Eniruena finode. Monailaina jai finode. Nana nainomo ite rana jai finode.

<sup>16</sup> Jai Jusiñamuidi nana omoi juduañedino omoi jitailla rafuena finuana rairuiñede;

<sup>17</sup> iadedi naimie finoca rafuena naimiena uñfiredomi. Omoi facaina mare rafue naimie finocabide. Noci deitate. Omoi riana sicotate. Omoimo guille itatate. Iemona omoi comeciaina caimare itatate. Iemona Jusiñamuina uñfiredomi.

<sup>18</sup> Iese Pablo lloti; iadedi iaimaiamo juraretaiaina fecajana jaca fainonocaiacañedimaci.

<sup>19</sup> Nana nigarui illamona, Pisidiamo ite Antioquiama juduaí comini bitimaci. Iconomona jai bitimaci. Juduaí dinena fuemo faimona, naimaci dibeimo comini jaidimaci. Iemona noficido Pablona fairigite. Naie nairaimona naimiena sonocana uitimaci, fioiditaimena naimie eruilla jira.

<sup>20</sup> Naimiena iese fainonocaila mei, creyentiaí naimie ecimo billamona, naimie a naida-date. Nai nairaimo abido jaide. Ie are Derbemo, Bernabé diga, jaide.

<sup>21</sup> Naie nairaimo Jesús ie mare rafuena llotiaimai. Diga comini creyentiaina jaidimaci. Ie mei Listramo abido jaidiaimai. Iconiomo abido jai jaidiaimai. Pisidiamo ite Antioquiama jai abido jaidiaimai.

<sup>22</sup> Creyentiaí comeciaina ocuiñotadiaimai. Cristona nia inuana llotiaimai. Raitiaimai:

—Jusiñamui dine cai nia riñenia, eo duere sefuiticaí.

<sup>23</sup> Naga creyentiaí illanomo creyentiaina sedarainina fetodiaimai. Guiñeno Jusiñamuimo jia mei, guiñena facaise mei, naimiena naimaci jai inua jira, cai Nama illa anamo naimacina fainonocaidiaimai.

*Siriamo ite Antioquiama abido jaidiaimai*

<sup>24</sup> Pisidiamo jaillanona, Panfiliamo ridiaimai.

<sup>25</sup> Pergemo Cristo uaina llua mei, Ataliamo jaidiaimai.

<sup>26</sup> Nainomona botedo Siriamo ite Antioquiama abido ridiaimai. Nano naie iaimaiai illanomo abido ridiaimai. Nainomona iaimaiai navui nia jaiñenia, creyentiaí dinena Jusiñamui iaimaiaina duenaillana uñuamona, iaimaiaina oredimaci. Jusiñamui rafuena iaimaiai lollena, iaimaiaina oredimaci. Naie maijia fuilla jira, jai abido bitiaimai.

<sup>27</sup> Iaimaiai rilla mei, creyentiaina ofitadiaimai. Nana Jusiñamui iaimaiamo finoca rafuena llotiaimai.

—Jusiñamuidi juduañedino naimiena inuana jai jitaide —llotiaimai.

<sup>28</sup> Dinomo creyentiaí diga are itiaimai.

## 15

*Jerusalémo Moisés micori llogacinona siadua rafue*

<sup>1</sup> Antioquiama Jerusalémona janore comini billano, creyentiaina iese llofuetimaci:

—Moisés micori caimo llua isoi, omoi abina omoi detañenia, jeacinomona jillobiñeitomi.

<sup>2</sup> Ie jira creyentiaí uri ñedimaci. Pablo, iaimaiai Bernabé diga, Jerusalémona bitino llofuiana eo uaitatiaimai. Ie muidona creyentiaí dinena iaimaiaina, jiaie creyentiaí diga, Jerusalémo jaillena fetodimaci. Cristo oretagano diga, Jerusalémo ite creyentiaina sedaraini diga, bie rafuena siadoiacasite.

<sup>3</sup> Creyentiaí naimacina oretaja mei, Fenicia railla enirue dibeido jaidimaci. Ie mei Samaria railla enirue dibeido jai jaidimaci. Creyentiaí illanuaimo llofuecana jaidimaci. Juduañedino creyentiaina jai jaillana naimacimo jai llotimaci. Ie jira naie creyentiaí caimare itimaci.

<sup>4</sup> Jerusalémo ria, creyentiaí naimacina feñotimaci. Cristo oretagano itimaci. Creyentiaina sedaraini jai itimaci. Naimacimo nana Jusiñamui iaimaiamo finoca rafuena llotiaimai. Cristo rafuena iaimaiai llofuamona, juduañedino Cristona inuana llotiaimai.

<sup>5</sup> Iena cacajano, fariseuai dibeimo ite creyentiaimona jiaimo naidaita raitimaci:

- Moisés micorí llogacínuaína ñnuamona, judíuáifñede creyentíai abina diana jítaiðicai.
- <sup>6</sup>Bie rafuena siadollena, Cristo oretaganodi, creyentíai sedarainí diga, danomo ofidímaci.
- <sup>7</sup>Iena are siadua mei, Pedro naidacaillano, raite:
- Amatíai, judíuáifñedinodi cuemona Jesús ie mare rafuena cacaillena, jaie omoimona Jusiñamui cuena fetode. Iena uifñotomoi. Cue llofuiamona ñnotímaci.
- <sup>8</sup>Nana cominí comeciaina naimie uifñuamona, judíuáifñedino naimiena ñnuana Jusiñamuidi uifñote. Caimo fecaja isoi, ie Joreño naimacimo fecaja jira, Jusiñamuidi judíuáifñedinona jitaillana jai uifñotícaí.
- <sup>9</sup>Jusiñamuidi naimacina cai isoi jai feifñote. Naimiena naimaci ñnuua jira, naimie naimaci comeciaina jecinona jai dotade.
- <sup>10</sup>¿Bue ñellena Jusiñamuina ñnoiacaifñedomoi? Jusiñamui jitaillacino omoi finoacaiñena jira, naimie omoina duere finuana jítaiðomoi. Cai jaiagai Moisés micorí llogacínodo jaidímaci; iadedi iena raise ñnoñedímaci. Nana ie llogacínona jaca finonidímaci. Iedo jaie jiaí jaidícaí; iadedi iena jiaí finonidícaí. ¿Bue ñellena iedo birui cai jaillana jítaiðomoi?
- <sup>11</sup>Jesucristo caina duenailla jira, cai jecinomona jilloitícaí. Judíuáifñedino cai isoi jilloitímaci.
- <sup>12</sup>Iena cacajano, nana ofidino uai llícaidímaci. Iemei Bernabé lluaana cacadímaci. Pablo lluaana jiaí cacadímaci.
- Jusiñamui judíuáifñedino motomo cocona siño rafuena finotate —lloitiamaiaí.
- <sup>13</sup>Iaimaiaí ñaia mei, Jacobo raite:
- <sup>14</sup>—Amatíai, cuemo cacarei. Judíuáifñedinomo Jesús rafue Simón Pedro nano llua rafuena jai cacadícaí. Creyentíaina naimaci jaillena, Jusiñamui naimacina jai fetode.
- <sup>15</sup>Jusiñamui facaina llorainí micoríai iena jaie cuetímaci:
- <sup>16-18</sup>Jusiñamui jaie llote: “David micorí illaíma isoi illaímana illena, cue Jítana ico oretaitícué.
- David jicorí jito illaímana birui ifñede; iadedi David micorí ifomo illaímana cue Jito iite. Iemona judíuáifñedino cuena ñnoitímaci. Naimaci cue cominina jaillena jiaí jítaiðicue. Iena cue llua jira, iena finoitícué” llote.
- <sup>19</sup>Ie muidona cue comeci raite: Judíuáifñedinomona creyentíaina jaidínona duere finoñeíticai.
- <sup>20</sup>Naimacimo rabena oreta, dama biena llollena: “Jiraraimo fecaca llicisina riñeno. O añede riño diga ifñeno. O ñifñede iima diga ifñeno. Llerinoga rana riñeno. Diruena jiaí riñeno”.
- <sup>21</sup>Jaiemona naga sábado naga judíuáí ofiracomo judíuáídi Moisés micorí cuegafuaimona naie isoide lletarafuena cacadímaci. Ie jira naie isoide rafuedo ñia jaitícaí: iadedi jiaie Moisés micorí lletarafuedo jaiñeíticai.
- <sup>22</sup>Ie mei Cristo oretaganodi, creyentíaina sedarainí diga, comeciaina facadímaci, naimacimona cominina fetollena, Antioquíamo oretallena. Nana creyentíai comeciaina facajano: “Jee” raitímaci. Pablo, iaimaiaí Bernabé diga, naimacina oretaiacadímaci. Judana fetodímaci. Naimie mameci jiaicídi Barsabás. Silana jiaí fetodímaci. Jiaie cominí baifemo rafuena baitadiamaiaí.
- <sup>23</sup>Rabena cuetímaci, iaimaiaí diga oretallena. Iese raillano, cuetímaci:
- “Antioquíamo itino, Siriamo itino, Ciliciamo itino, omoímo cuetícaí. Jerusalémo itícaí. Cristo oretaganodícaí. Creyentíaina sedarainídicai. Omoídi cai amatíai. Omoímo jai cuetícaí. Judíuáifñedíomoi; iadedi cai amatíaidomoi.
- <sup>24</sup>Cai motomona jiaie cominí naimaci llofuiado omoína uri itatañenana fidídícaí. Omoi jecinomona omoi jilloillena, Moisés micorí llogacínodo omoi jaillana jítaiðímaci. Ie jirari omoi comeciái rucaicuerite. Naimacina oretañedícaí.
- <sup>25</sup>Danomo cai ofilla mei, menamiéna fetodícaí, omoímo oretallena, Bernabé, iaimaiaí Pablo diga. Bernabéna isiruitícaí. Pablona jiaí isiruitícaí.
- <sup>26</sup>Iaimaiaí cai Nama Jesucristo muidona navui niadedi fiodaitíamaiaí.
- <sup>27</sup>Ie jira Judas, iaimaiaí Silas diga, oretaitícaí. Omoímo bie rabe cuia isoi lloitiamaiaí.
- <sup>28</sup>Jusiñamui Joreño caimo illamona, bie rafuena omoímo lloitícaí. Ailluena rafue omoi finuana lloñeíticai. Dani bie rafuena finojítomoi.
- <sup>29</sup>Jiraraimo fecaca rana riñeno. Diruena riñeno. Llerinoga rana riñeno. O añede riño diga ifñeno. O ñifñede iima diga ifñeno. Iese omoi ifñenia, marena iítomoi. Macaíbaite” cuetímaci.
- <sup>30</sup>Ie mei Antioquíamo jaidímaci. Ailluena cominina ofitaja mei, naimacimo cartana fecadímaci.
- <sup>31</sup>Iena facajano, naie lluaínorí iobidímaci.
- <sup>32</sup>Judas Jusiñamui facaina lloraíma. Silas daje isoide. Diga rafuena creyentíaimo llofuetíamaiaí. Naimaci comeciaina jiaí ocuifñotadiamaiaí.

<sup>33</sup> Diga irui nainomo illa mei, iaimaiaina oretatinomo creyentiaí iaimaiaina marena abido oretatimaci.

<sup>34</sup> Nainomo Silas comecina facajano, fiebide. Ie jira Judas dama abido jaide.

<sup>35</sup> Antioquíamo Pablo, iaimaiaí Bernabé diga, cai Nama Jesús rafuena llofuellena fiebidiaímaiaí. Diga comini jiaí lese llofuetimaci.

*Pablo jiaí eniruemo ite creyentiaí dine dane jailla rafue*

<sup>36</sup> Diga irui illa mei, Pablo Bernabémo llote: p—Naga navui coco llua nairaimo creyentiaí dine abido mai coco jai. Cai Nama ie mare rafuena dane lloiticoco. Nie isoi naimaci illana jibuiticoco.

<sup>37</sup> Bernabédi, naie iaimaiaí diga, Juan Marcos uiacade.

<sup>38</sup> Panfiliamo iaimaiaina navui Juan faínonocaide. Iaimaiaí diga llofuellena jaiñena jira, Pablo naimiena dane uiacaiñede.

<sup>39</sup> Riire ñaitiaímaiaí. Comecina daje isoi lloifñedíiaímaiaí. Ie jira dajena jaiñedíiaímaiaí. Bernabé Juan Marcona uillanona, Chipremo aillue botedo jaidíiaímaiaí.

<sup>40</sup> Ie mei Pablo Silana uite. “Jusiñamui omicono canoite” creyentiaí dinena raillanona, iaimaiaina oredimaci.

<sup>41</sup> Siria railla eniruemo Jesús rafuena llocana jaidíiaímaiaí. Cilicia railla eniruemo jiaí llocana jaidíiaímaiaí. Creyentiaí comeциаina ocuiñotacana jaidíiaímaiaí.

## 16

*Timoteo iaimaiaí diga jailla rafue*

<sup>1</sup> Nano Derbemo Pablo, iaimaiaí Silas diga, ridíiaímaiaí. Iemona Listramo ridíiaímaiaí. Nainomo Timoteo railla creyente ite. Naimie eidi judía iñaiño. Jiaí creyente. Ie moo micoridi griego imie.

<sup>2</sup> Listramo ite creyentiaí, Iconiomo ite creyentiaí diga, naimiena: “Mare” raitimaci.

<sup>3</sup> Pabloti Timoteona uiacade, naimie diga jaillana. Timoteo moo micori griego imiena jira, naimie abina nia detatañede; iadedi nainomo ite judiaí illa jira, Moisés micori llua isoi, Pablo Timoteo ie abina dete. Judíuñedimie naimaci motomo ia, naimaci motomo inide.

<sup>4</sup> Naga nairaimo naimaci jaillanona, Jerusalémo siadogacínona creyentiaímo llote. Jerusalémo Cristo oretagano, creyentiaína sedaraini diga, navui naicínona siadotimaci. Creyentiaí naie lluaña ñnollena, iena llocana jaidimaci.

<sup>5</sup> Ie jira creyentiaí ñnocana jaidimaci. Nagarui ailluena comini creyentiaína jaidimaci.

*Pablo ñicairilla ra isoidena ciua rafue*

<sup>6</sup> Jusiñamui Joreño Asia railla eniruemo ie uaina naimaci llofuiana rairuilla jira, Frigia railla eniruemo macaricana jaidimaci. Iemona Galaciamo jaidimaci.

<sup>7</sup> Misiamo naimaci rillano, Bitiniamo jaiacade; iadedi Jesús Joreño dane imaci jaillana rairuide.

<sup>8</sup> Ie jira Misiamona ecido jaillano, Troas railla nairaimo jaidimaci.

<sup>9</sup> Nainomo naie naiona Pablo ñicairilla ra isoidena ciode. Daje Macedonia imiedi uicomona naidaita naimiemo jica-jicanode. Raite: “Macedoniamo ruica o bi. Caina canuaibi”.

<sup>10</sup> Naiena Pablo ciua mei, naie facaisemona Pablo diga jaidicue. Lucadicue. Ie jira bie rafuena raise uiñoticue, iena omo cuellena. Macedoniamo ruica dine cai jaille botena jenodicaí. Comecina facadicaí: “Jusiñamuidi caina uaidote, nainomo ie mare rafuena cai llollena”.

*Filipomo illa rafue*

<sup>11</sup> Ie jira Troamana Samotraciamo monaillaido atona ie mamedo jaidicaí. Ie icoitidiruido Neápolis railla nairaimo ridicaí.

<sup>12</sup> Dinomona Filipomo duide naisodo jaidicaí. Macedoniamo ite. Naie enirue facaise ie nanoca nairai Filipos. Naie nairaidi Romamona bitino nairai. Diga irui nainomo iticaí.

<sup>13</sup> Sábadoruido naie nairaimona nasedo jino jaidicaí. Comecina facajamona: “Dinomo nibai comini oficabidimaci, Jusiñamui mo jaillena”, ille fue mo jaidicaí. Nainomo dañaiñorie riñoniaí billanona, dinomo ana raidicaí, naiñaiñuaimo Cristo rafuena llollena.

<sup>14</sup> Naimacimona dañaiño cai llofuiana eo cacade. Naiñaiño mamecidi Lidia. Tiatira railla nairai iñaiño. Naiñaiñodi jiduirede iniruena fecauide. Jusiñamuina jai sedade. Pablo llofuiana naiñaiño cacajano, cai Nama Jesús naiñaiño comeci naie lluaña feiñotade. Naie facaise creyentena jaide.

<sup>15</sup> Naiñaiño ie jofomo itino diga bautizaja mei, caimo llote:

—Cuedi cai Namana cue jai ñnuana omoi uiñuamona, cue jofomo mai bi, nainomo omoi fiebillesa. —Duere caina uai-uaidode.



<sup>16</sup> Jusiñamuimo jüranomo jiairuido jaidicaimo, daje jitaññomo dafaifidicai. Naiñaiñodi jiañomona ibacañaiño. Janaba anamo naiñaiño jiai ite. Iemona naiñaiño jiairuido sulle rafuena llouide. Naie rafuena lluaña ibatajano, naiñaiño namaiaidi ailluena ucubena feñouidimaci.

<sup>17</sup> Naiñaiñodi cai jinafona jaillanona, ado cuiri-cuiricaide:

—Naimaci nanoca Jusiñamui ie lloraini. Omo jilluana omoimo llocabitimaci.

<sup>18</sup> Diga irui naiñaiñodi iese cuiri-cuirisoide. Icirillamona, Pablo abido dobaidacaida, naiñaiñomo ite Janabamo llote:

—Cue Nama Jesucristo uaido naiñaiñomona oni jai. —Iemona oni jaide.

<sup>19</sup> Naiñaiño lluañomona ucubena jai oñenana naiñaiño namaia jai uifua jira, Pablo, iaimaia Silas diga, gaitadimaci. Iaimaiaña plazamo illaicomini illanomo sonocana uitimaci.

<sup>20</sup> Dinomo iaimaiaña illaicomini dine atidimaci. Iese iaimaiaña llogidotimaci:

—Naie iaimaiaidi cai nairaina uri itatañediiaimaia. Iaimaia judua comini.

<sup>21</sup> Romanuai cominina cai illa jira, iaimaia llogacinuaina cai ñnoia, iedo cai jaia, marañede.

<sup>22</sup> Iena cacajano, nana comini naie iaimaiaña fanaisitimaci. Illaicominidi naie iaimaiañiñiroina cuaranuanona duñode. Rasi diga, iaimaiaña diga icaño fatatatimaci.

<sup>23</sup> Iaimaiaña eo faja mei, cárcelmo jonetimaci. Cárcelna sedaraimamo iaimaiaña raise sedallena llotimaci.

<sup>24</sup> Iese llua jira, iaimaiaña llaveracomo fo iaimaiaña uite. Donoramona iaimaiañiñitajano, raise donode.

<sup>25</sup> Naiona daferui facai Pablo, iaimaiañiñitajano Silas diga, Jusiñamuimo ifuerillacinona rodiiaimaia. Jiai jiidiaimaia. Jiaie llavecana naiona cacadimaci.

<sup>26</sup> Jamai ebena illacinomona ñuisañodi suide. Cárcel illanodi jaidisite. Naie facaiseconi nana nasiadi ecocorinaite. Ie dacaño nana llavecana imaci donua radi oni ecoride.

<sup>27</sup> Cárcelna sedaraima casidemo, cárcel ie nasia ecocorinaillana cide. “Llavecana jai aisidimaci” raillamo naimie comecina facade. Ie jira ie lloesi añnoicaida, dama abi faitaacade. “Illaicomini bia, ¿bue lloiticue?” raillamona comecina facade;

<sup>28</sup> Iadedi Pablodi eo riire cuirioide:

—¡O abina dama meineño! Bene nana iticaia.

<sup>29</sup> Lamparina atillena cárcelna sedaraima jicajanona, jarire fo jaide, Pablo iaimaiañiñitajano Silas dine. Jacinaillano, naimie abidi docaillamona, iaimaiañiñitajano uicomo cañici ifodo ana rainadate.

<sup>30</sup> Iaimaiaña jino ua mei, nai iaimaiaimo jicanote:

—¿Buena finojiticue, cue jeacinomona cue jilloillena?

<sup>31</sup> Uai otiiaimaia:

—Coco Nama Jesúsna ñno. Iese na o jofomo ite comini diga o jilloillea.

<sup>32</sup> Iemei naimiena Jesús ie rafuena llofuetiaimaia, nana ie jofomo itino diga.

<sup>33</sup> Naie facaise iaimaiañiñitajano bofellañoña jocode. Iemei naimiedi, nana ie comini diga, bautizaga.

<sup>34</sup> Guillena, ie jofomo naie iaimaiaña uite. Jusiñamuina jai ñnua jira, na ie comini diga, naimie caimare ite.

<sup>35</sup> Ie oni monaidemo, illaicominidi dajerie policiana cárcelmo oretatimaci, nai iaimaiaña jino orellena.

<sup>36</sup> Cárcel sedaraimadi naie rafuena Pablomo llote. Raite:

—Omico jaillena, illaicominidi omicono oredimaci. Mai marena jai.

<sup>37</sup> Iadedi policiaño Pablodi llote:

—Cocodi romanuai cominidico; iadedi cocomo ite rafuena raise uifñoñoño cocona marefodo fatimaci. Cárcelmo cocona jonetimaci. Jai bainino cocona jino oretaiacadimaci. Iese jino jaiñeiticoco. Naimacimo llono: “Cocona jino ollena bi”.

<sup>38</sup> Illaicominimo policias naiona lluaibitemo, illaicominidi naiona cacajanona, eo jacinaita, romanuai cominina iaimaiaña jira. Cai nanoca illaicominidi romanuai nairai cominina jamai ebena duere finuana rairuidimaci.

<sup>39</sup> Ie jira naie iaimaiañiñitajano dine illaicominidi jaidimaci, iaimaiaña: “Dama dino iesede” raillena. Jino atia mei, nairaimona jino iaimaiañiñitajano jaillena oredimaci.

<sup>40</sup> Cárcelmona jino billano, Lidia jofomo fo jaidiaimaia. Creyentiaña ciuano, naimaci comecina ocutitallena, naimacina dane llofuetiaimaia. Ie mei oni jaidiaimaia.

## 17

*Pablo, iaimaiañiñitajano Silas diga, Tesalónicaño illa rafue*

<sup>1</sup> Anfipolis railla nairaimo macaritiaimaia. Apolonia railla nairaimo macaritiaimaia. Ie mei Tesalónica railla nairaimo ridiaimaia. Dinomo juduañiñitajano ofracodi ite.

<sup>2</sup> Pablo fibilla isoi, nainomo fo jaide. Daje amani sábadoruimo Jusiñamuina cuela-  
fuiamona naimacina llofuede.

<sup>3</sup> Iese naimacina llofuede:

—Cristo llegi cacaiete. Fiodaillamona naimie jilloite. Naimiedi Jesús.

<sup>4</sup> Naiena cacadinomona ailluena ñnotimaci. Pablo, Silas iaimaiaí díbeimo jaidimaci.  
Jusiñamuina ñnote grieguaimona ailluena comini creyentiaina jaidimaci. Ie emodoconi  
ailluena nanocañaiñuaidi creyentiaina jiai jaidimaci;

<sup>5</sup> iadedi judíuaidi uradoillano, jamai itinomona eo marañede iñiaina uaiduanona, ail-  
luena cominina ofitatimaci. Ie jira naie nairai uri iñedimaci. Iaimaiaina comini uicomo  
uillena, Jasón jofomo binasite.

<sup>6</sup> Iaimaiaina baiñenano, Jesúsna, jiaie creyentiaí diga, illaicomini illanomo aiñoicaida  
uitimaci. Cuirisite:

—Naga nairaimo cominina uri itañedíaimaiaí. Benomo jai bitiaíaimaiaí. Jai benomo  
billanona, Jasón ie jofomo iaimaiaina feñote.

<sup>7</sup> Cai nanoca illaíma ie llogacinona jai ñnoñedimaci. Ie anamo jai iacañedimaci.  
Raitimaci: “Jiaie illaíma anamo iticai. Jesús raillamie anamo iticai”.

<sup>8</sup> Judíuái iese lluamona, cominidi uri iñedimaci. Illaicominidi jiai uri iñedimaci.

<sup>9</sup> “Naie iaimaiaí dane biñetiñiaímaiaí” illaicominimo creyentiaí raillano, illaicominidi  
Jasón jiaie creyentiaí diga, jino oretatimaci.

*Bereamo Pablo, iaimaiaí Silas diga, illa rafue*

<sup>10</sup> Naie naio creyentiaídi Pablona, iaimaiaí Silas diga, Bereamo raire oretatimaci. Dinomo  
rillano, judíuái ofiracomo jaidiaíaimaiaí.

<sup>11</sup> Nainomo ite judíuái eo mare. Tesalónicamo ite judíuái isoñedimaci. Bereamo itinodi  
Cristo rafuena iocire feñotimaci. Niedi unacínoni raillanona, nagarui Jusiñamuina  
cuegafuiaina facadimaci.

<sup>12</sup> Ie jira naimacimona ailluena ñnotimaci. Judíuáiñedinomona ailluena nanocañaiñuái  
ñnotimaci. Ailluena iñiaí jiai ñnotimaci;

<sup>13</sup> iadedi Bereamo Pablo Jusiñamui ie uaina jai lluana Tesalónicamo ite judíuái di fidiano,  
dinomo jaidimaci. Cominina fuemo faillena, jaidimaci.

<sup>14</sup> Naie facaise creyentiaídi Pablona oni oretatimaci. Monailai fuemo duide naína  
oretatimaci. Silas, iaimaiaí Timoteo diga, fiebidiaíaimaiaí.

<sup>15</sup> Pablo uigamací naimie diga Atenamo jaidimaci. Dane abido Bereamo jaidimacimo,  
naimacimo Pablo llote:

—“Silas, iaimaiaí Timoteo diga, raire cue dine billesa” llono.

*Atenamo Pablo illa rafue*

<sup>16</sup> Atenamo iaimaiaí rillena Pablo sedademo, naie nairaimo ailluena jiraraína ciode.  
Iena ciuanona, Pablo comecidi jearefacaide.

<sup>17</sup> Naiena ciua mei, judíuái ofiracomo judíuái diga coniniri Jusiñamui rafuena siadote.  
Jusiñamuina jai ñnote judiaíñedino diga coniniri iena jiai siadote. Plazamo nagarui jamai  
itino diga coniniri iena jiai siadote.

<sup>18</sup> Jamai comecina facadinomona damerie naimie diga jiai ñaitimaci. Epicúreo railla  
rafuedo jaisoidimaci. Estoico railla rafuedo jiai jaisoidimaci. Damerie naimacimona  
raitimaci:

—¿Buena nai ñaillareuidimie caimo lloiacade?

Jiaíno raite:

—Jiaie nairai jusiñamuillaicaímo lloiacade isoide.

Jesús fiodaillamona jilluana Pabloti llouilla jira, iese raitimaci.

<sup>19</sup> Ie jira naimiena naimaci siadouillanomo uitimaci. Naie illano Areópagona  
mameciredede. Jicanotimaci:

—¿Ñie isoide o comocinuai? Caímo llono, caí uñollena.

<sup>20</sup> Eo feiredicinuaina cacadicaí. ¿Buena nai llofuacínodi llote? Iena uñoiacadicai.

<sup>21</sup> Nana Atenamo ite comini, jiaie illanomona bitino diga, jamai ailli como imaci fidia ra-  
fuena ñai-ñaidimaci. Jamai ailli fidia rafuena caca-cacadimaci. Jiaie rafuena finoñedimaci.

<sup>22</sup> Jicanua mei, Areópago railla illanomo Pablo naidacaida llote:

—Atenas imaci, omoímo rafuena lloiacadicue. Omoí jusiñamuillaína eo sedacabidomoi.

<sup>23</sup> Cue macarillamona, omoí jusiñamuillaína sedaja jiraraína ciodicue. Daje jiraraí abimo  
iese cuela: “Uiñoñega Jusiñamuina sedadicaí” cuela. Uiñoñoeno naimiena sedadomoi. Ja  
omoímo naimiena lloiticue.

<sup>24</sup> Jusiñamui biniéna jaie finode. Ie emodoconi Jusiñamuidi nana biniémo itinona jiai  
finode. Naimiedi mona ie Nama. Enirue ie Nama. Ie jira iima finoca jofomo naimie iñede.

<sup>25</sup> Naga jitaille rana naimiemo illa jira, naimiena canonicai. Naimie nana cominina comuitate. Jiai nagarui jafaici cai uadi caimo iga. Uanai nana nana caimo iga.

<sup>26</sup> Damiedemona nana cominina jebuitate, nana eniruemo naimaci illena. Naimaci illa dinori naimie jonega. Naimaci illanomo naimie jiai jonega.

<sup>27</sup> Iese jonega, naimaci naimiena jenollena. Jenuano, nibai naimiena baitimaci. Caimona naimie are ifede.

<sup>28</sup> Naimie jaca illa jira, cai jiai iticai. Jiai cajedica. Ie isoi omoi rafue lloraini jiai llotimaci: "Naimie ie uruiaidica".

<sup>29</sup> Naimie caina comuitaja jira, Jusiñamuidi jirarai isoifedena uiñotica. Jusiñamuidi oromona finoca ra isoifede. Platamona finoca ra isoifede. Noficimona finoca ra isoifede. Ima ie onolli diga finoca ra isoifede.

<sup>30</sup> Cominidi abi uiñoño jeacino jai finouidimaci. Jusiñamui naimacina nia janafeñede; iadedi jai birui Jusiñamuidi nana cominina naga illanomo naimaci comeciai iuai meidollena jitaide.

<sup>31</sup> Naimaci comeciai iuai naimaci meidoñenia, naimie jai lloga facaise, naimacina duere finoite. Naimacina duere finollena, ie Jitona jai fetode. Naimaci finoca rafuena naimie raise uiñuamona, naimacina duere finoite. Fiodaillamona Jesúna naimie jai jilloitaja jira, iena uiñotica.

<sup>32</sup> Fiodaillamona Jesús jilluana cacajano, damierie jaisitimaci. Iecon i jainodi raite:  
—Jairuido o lluauna dane cacajitica.

<sup>33</sup> Iemei naimaci motomona Pablo jino jaide.

<sup>34</sup> Naie cominimona damierie naimie dibeimo jaidimaci. Iñotimaci. Naimacimona damie Areópago sidadouidimie. Ie mamecidi Dionisio. Jiañaiño iñote. Naiñaiño mamecidi Dámaris. Daje facaiseconi jiaie cominidi iñotimaci.

## 18

### *Corintomo Pablo illa rafue*

<sup>1</sup> Atenamona Corinto railla nairaimo Pablodi jaide.

<sup>2</sup> Nainomo Aquila raillamiena baisaide. Naimiedi judío imie. Ponto railla eniruedi naimie comuillano. Ie ai mamecidi Priscila. Naiñaiño diga Romamona como bitiaimaiai. Romamona Claudio nana judúai cominina jai oretate. Ie jirari bitiaimaiai. Roma ie nanoca illaimadi Claudio.

<sup>3</sup> Pablo iaimaiai daje isoi maijia jira, Pablo iaimaiai jofomo fiebide. Iaimaiai conima diga maijide. Chivos itiraiai ie nilla iniroina tiforisoidimaci, naiemona jofona finollena.

<sup>4</sup> Naga sábadoruimo judúai ofiracomo llofuede, judúaina iñotallena, judúaiñedimona iena jiai iñotallena.

<sup>5</sup> Macedoniamona Silas, iaimaiai Timoteo diga, bitemo, Pablodi nagarui Jusiñamui uaina llofueuide. Judúaimo: "Jesúdi cai jilloitaraima" llouide;

<sup>6</sup> ia naimie uaina iñosiñedimaci. Jiai naimie jinafomo jeare ñaitimaci. Naimaci comeciai jeare cúa jira, Pablo ie iniroina jaidiñote, naimacina raillano:

—Dani omoi muidona Jusiñamui omoína duere finojite. Cue muidonañeite. Jai judúaiñedino dine jaiticue, naimacina cue llofuellena.

<sup>7</sup> Iese raillano, oni jaide. Justo jofomo jaide. Naimiedi Jusiñamuina iñouidimie. Ie jofu judúai ofiraco ecimo ite.

<sup>8</sup> Crispodi, nana ie jofomo itino diga, cai Nama Cristona iñote. Naimiedi judúai ofiraco ie sedaraima. Ailluena Corintomo ite comini creyentiaina jaidimaci. Ie mei naimacidi bautizaga.

<sup>9</sup> Daje naiona Pablo nicairilla isoidemona, Pablomo cai Nama Jesucristodi llote:

—Mai jaciruiñeno. Faicaiñeno cue rafuena llocana jai.

<sup>10</sup> O diga iiticue. Budi ona maraiñeno finoñeite. Bie nairaimo ailluena cominidi cue dibeimo jaitimaci.

<sup>11</sup> Ie jira daje año ie emodo seis fivui dinomo Pablodi fiebide, naimacimo Jusiñamui uaina llofuellena.

<sup>12</sup> Corinto railla nairaidi Acaya railla eniruemo jainaijaide. Naie facaise Acaya ie gobernadori Galión. Naie facaiseconi damierie judúai comini Pablona faicadimaci. Galión dine naimiena uitimaci.

<sup>13</sup> Raitimaci:

—Cai illaima llogacino isoi bimiedi cominina Jusiñamuina sedallena llofueñede.

<sup>14</sup> Pablo uai oiacademo, judúaimo Galióni llote:

—Judúai, cacarei. Naimie maraiñede rafuena finodena, naimie omoína jifuetena, omoi lluauna nia cacarefidicue;

<sup>15</sup> Iadedi jamai naimie uailla cuemo llotomoi. Omoi usumatiai micoriai mameciai cuemo jiai llotomoi. Omoi einamaci llogacinuaina cuemo jiai llotomoi. Iena omoi coniniri siadotomoi. Bie isoide rafuena siadoiacaiñedicue.

<sup>16</sup> Iemona naimiedi nainomona naimacina oni orede.

<sup>17</sup> Ie mei Sóstenena gaitadimaci. Sóstenes ofiraco ie sedaraima. Naimiena gobernador uicomo fanaisite; ia naifuena Galión niese nibañede.

*Antioquíamo Pablo abido jailla rafue*

<sup>18</sup> Naifue suilla mei, nainomo Pablo are fiebide. Ie mei creyentiaina facaduano, Priscila iaímaiai Aquila diga, Siria railla eniruemo botedo jaide. Ie uai raise finuana uiñollena, Moisés micori llua isoi, Cencreamo rillano, ie ifogina rijiruda garetate.

<sup>19</sup> Efesomo rillanona, iaímaiaina faínonocaide. Judíuai comíni Jusiñamui rafuena siadol-lena, Pablodi judíuai ofiracomo fo jaide.

<sup>20</sup> Are naimaci motomo fiebillena naimiemo jicanotimaci; iadedi Pablo dinena uai ote:

—Fiebiñeiticue—

<sup>21</sup> Naimacina facaduano, lloete—. Jerusalémo jaiticue; iadedi Jusiñamui jitaia, dane omoi dine abido riiticue. —Iemei Efesomona jaide.

<sup>22</sup> Cesareamo sijiano, Jerusalémo macarite. Creyentiai dine jaide. Ie mei Antioquíamo jiai macarite.

<sup>23</sup> Nainomo are fiebilla mei, Pablo dane jaide. Galaciamo macarite. Ie mei Frigiamo macarite. Nana creyentiai imaci comeциаina ocuiñotacana jaide.

*Apolos illa rafue*

<sup>24</sup> Ie facaise Efesomo Apolos raillamie Alejandría railla nairaimona ride. Judío imie. Naimie eo raise llofueuidimie. Naimiedi Jusiñamui facaina lloraini micoriai cuegafuiai raise uiñote.

<sup>25</sup> Naimiedi Jesús ie rafuena navui jai cacade. Ie comeциmona iena eo llote. Jesús rafuena raise llofueite; iadedi naimie dama Juan micori ie bautizajana uiñote. Nana Jesús finoca rafuena nia uiñofede. Jusiñamui Joreño feiñuana jiai uiñofede.

<sup>26</sup> Judíuai ofiracomo naimie llofuia, jacitaiñeno llofueite. Priscila, iaímaiai Aquila diga, naiena cacadiamaiai. Ie jira naimiena oni eneno uitiaímaiai. Ie uiñofega rafuena eo raise naimiena llofuetiaímaiai.

<sup>27</sup> Acayamo Apolodi jaiacana jira, creyentiaidi naimie comeциna ocuiñotajano, naimiena oresite. Acayamo ite creyentiaimo rabemo cuetimaci. Jusiñamui naimacina dueruilla jira, creyentiaina jai jaidimaci. Naimiena marena feiñollena iese cuetimaci. Nainomo naimie rillanona, creyentiaina eo canode.

<sup>28</sup> Judíuai diga marefodo jiai eo ñaite. Iemona naimaci uai ollinodi iñede. Naimiedi Jusiñamui cuegafuiaimona Jesúdi cai jilloitaramana llofueite.

## 19

*Efesomo Pablo illa rafue*

<sup>1</sup> Corintomo Apolo nia ítemo, nairaiiai onifedo joide naído jailla mei, Pablo Efesomo ride. Dinomo rillanona, creyentiaina baite.

<sup>2</sup> Naimacimo jicanote:

—¿Cristona omoi ínuaruimo Jusiñamui Joreña feiñotomoi?

Uai otimaci:

—Jusiñamui Joreña nia jaca cacaiñedicaí.

<sup>3</sup> Dane jicanote:

—¿Nie isoi omoi bautizagomoi?

Uai otimaci:

—Juan micori lloga rafue facaina bautizagacai.

<sup>4</sup> Pablo uai ote:

—Mare. Juan llote: “Omoi comeциai iuaina meido. Iemei bautizallomoi”. Ie ifo meidoitimiena comíni ínollena llote. Jesúna ínollena llote. Jesús rafuena omoimo raise lloiticue.

<sup>5</sup> Iena cacajano, cai Nama Jesús díbeido bautizadimaci.

<sup>6</sup> Naimacimo Pablo ie onollina joniamona, Jusiñamui Joreña feiñotimaci. Ie mei naimaci uiñofega nairai uaido ñaitimaci. Jusiñamui Joreño naimacimo llua rafuena jiai llotimaci.

<sup>7</sup> Nibai nana naimacidi doce íñiaí.

<sup>8</sup> Sábadoruimo judíuai ofiracomo fo jaillano, naimie anamo naimaci illana Jusiñamui jitailla jira, Jusiñamui díbeimo naimaci comeциai iuaina meiduana Pablodi jacitaiñeno eo llouide. Nainomo dajé amani fívuí fiebide.

<sup>9</sup> Naimacimona jianodi Pablo uaina uaitatimaci. Jiai inoiacaiñedimaci. Naimaci inoñena ira, ofracomo bitinomo: “Cristo rafuedi maraiñede” lloidimaci. Ie jira Pablodi creyentiai diga naimacimona eneno oni jaide. Tiranno ie lloracomo nagarui Pablodi llofueuide.

<sup>10</sup> Mena fiemona iese llofueuide. Ie jira diga Asia railla eniruemo ite cominidi cai Nama ie uaina cacadimaci. Judiuai cacadimaci. Judiuaiñedino jiai cacadimaci.

<sup>11</sup> Jusiñamuidi Pablona siño rafuena finotate.

<sup>12</sup> Duidinomo cominidi naimie jetaca pañueluaina uitimaci. Duidinomo naimie jetaca iniroina jiai uitimaci. Naiena jetajamona, duidinodi jillodimaci. Janaba anamo itinodi jiai jillodimaci.

<sup>13</sup> Naie facaise jamai macarisoidino ridimaci. Judiuai imaci. Naimacidi icoriraini. Jesús mameci llinuano, jananiai anamo itinomona jananiaina oni oretaiacadimaci. Jananiaimo raitimaci:

– Pablo llua isoi, Jesús muidona bimacimona oni jai.

<sup>14</sup> Esceva ie siete jitotiaidi iese finoacadimaci. Escevadi Jusiñamui diga ñairaima.

<sup>15</sup> Janabana oni oretaiacadimacimo, Janaba dinena uai ote:

– Jesúsna uifotocie. Pablona jiai uifotocie; iadedi omoina uifotociedue.

<sup>16</sup> Ieconí Janaba anamo itimie naimaci emodomo daiacaide. Riire nana naimacina emodoficaide. Ie jira naie jofomona taimiaina jino aisidimaci. Naimacidi bofellaiai diga jino aisidimaci.

<sup>17</sup> Nana Efesomo itino iena fididimaci. Judiuai, judiuaiñedino diga, naifuena fididimaci. Naifuena fidianona, eo jacinaitimaci. Iemona cai Nama Jesús mamecidi are soride. Comini dinena: “Jesús uai eo siño” raitimaci.

<sup>18</sup> Ie jira ailluena creyentiaidi billano, imaci navui maraiñede finoca rafuena Jusiñamuimo llotimaci. Icorilla rafuena finouidimaci. Iena marefodo llotimaci.

<sup>19</sup> Ailluena icorilla rafuiai illabiai atianona, marefodo jobaidimaci. Niga raifi rabiai jobaillana facadimaci. Cincuenta mil ucube diese facai rabiaina jobaidimaci.

<sup>20</sup> Cai Nama Jesús uaina eo llocana jaide. Cominidi naie uai siñonana uifotimaci.

<sup>21</sup> Naie rafue illa mei, Pablodi comecina facajano raite: “Macedoniamos cue macarillamona, Acayamos cue jiai macarillamona, Jerusalémo riacadicue”. Ie emodoconi naimiedi raite: “Nainomona Romamos jiai jaiacadicue”.

<sup>22</sup> Naimie nia Asiamos nano nigarui illanona, mena canoraimana Macedoniamos oretate. Timoteona, iaiaiai Erasto diga, oretate.

*Efesomos ite comini maraiñede rafue finoacadimaci*

<sup>23</sup> Naie facaiseconi Pablo nia oni jaiñenia, Jesucristo rafue muidona Efesomos ite cominidi maraiñede rafuena comuitatimaci.

<sup>24</sup> Demetrio raillamie platamona diga rana finouide. Naimiedi Diana ie jofu joreñuaina finouide. Naimie anamo ailluena majjuuidimaci. Dianadi naimaci jusiñamui.

<sup>25</sup> Naimie isoi majjuuidinona Demetrio uaidote, nana naimaci danomos ofillena. Ie mei raite:

– Jai danomos ofidicai. Bie majjiamona cai ucubena uana raise uifotomoi;

<sup>26</sup> Iadedi Pablo raillamiedi diga cominina jai llofuite: “Comini finoca raniaidi jusiñamuillañede”. Naie llofuiamona ailluena comini naimie dibeimo jaidimaci. Dama Efesomos iese suiñede; iadedi ua nana Asiamos iese suide.

<sup>27</sup> Ie jira abina rairuicadicai, cai majjille faifi raillano, comini Diana jofona jiai sofei raillanona. Cominidi naiñaiñona eburillana feitatimaci. Naiñaiñori rajicaiñeitimaci. Dianadi eo ebirede jusiñamui. Nana Asiamos ite comini naiñaiñona sedacabidimaci. Unai nana bie eniruemo ite nairaidi naiñaiñona sedacabidimaci. Ie jira abina rairuicadicai.

<sup>28</sup> Iena cacajano, eo iciritimaci. Riire cuiiriidimaci:

– ¡Efesos ie Diana eos ebirede!

<sup>29</sup> Danirie siadumona, nana comini eo failliñaidimaci. Iemo nana comini dajena naimaci ofracomos fo raire jaisite. Gayona, iaiaiai Aristarco diga, gaitajano uitimaci. Naie iaiaiaidi Pablo ie nabai iaiaiai. Iaiaiai comuillanodi Macedonia.

<sup>30</sup> Pablo ofracomos jiai fo jaiacade; iadedi creyentiaidi naimie fo jaillana rairuidimaci.

<sup>31</sup> Illaicominimona damerie nabaiñiai naimiemo fo jaillana jiai rairuidimaci.

<sup>32</sup> Fo itinomona damerie daje rafuena ebena cuiiriidimaci. Jiaino jiaifuena ebena cuiiriidimaci. Eo failliñaidimaci; ie iadedi bue ñellena naimaci ofillana raise uifotiedimaci.

<sup>33</sup> Comini motomona judiuai dinena damie uicomo oredimaci. Ie mamecidi Alejandro. Cominina llicaitallena, ie onolli jaidianona, cominimo lloiacade;

<sup>34</sup> Iadedi naimie judío imiēna naimaci uifuanona, nana daacaiño cuiiriidimaci. Mena horas raifi cuiiriidimaci:

– ¡Efesos ie Diana eos ebirede!

<sup>35</sup> Iemei naie nairai rabe cueraimadi cominina llucaitatate. Naimaci llucaila meinoconi, naimie llucacina cacadimaci. Raitte:

—¡Cacare! Cai nairaidi Dianana sedacabidica. Naiñaiño ebirediñaiño. Naiñaiño era uaide jiraraidi monamona jai uaide. Iena jiai sedacabidica. Nana bie eniruemo ite comini iena uiñotimaci. Bu naiena uiñoñedimienajaca iñede.

<sup>36</sup> Bu cue lluañajaca uaitañeite. Ie jira omoi llucaci. Comeciai facañeno buena finoñeno.

<sup>37</sup> ¿Bue ñellena Gayo iaimaiaia Aristarco diga, benomo atidomoi? Iaimaiaia cai jusiñamui joreñoña ñaiñediiaimaiaia. Naiñaiñoña jeare finoñediiaimaiaia.

<sup>38</sup> Demetrio, ie majiraini diga, iaimaiaia llogidoiacania, cominina llogidoraco ite. Diga jueces jiai ite. Coniniri nainomo iena siado;

<sup>39</sup> iadedi jiai nicino omoimo ia, cai illaicomini ofia, buena siaduano, caimo lloitimaci.

<sup>40</sup> Birui bie rafue cai finua jira, illaicomini nibai caina duere finoitimaci. ¿Ñiese cai nibaille? Illaicomini caimo buena jicanoia, ¿ñiese raiticai?

<sup>41</sup> Naie llua mei, ofidinona jino orede. Iemei jai jono tuudimaci.

## 20

### *Macedoniamo Pablo dane jailla rafue*

<sup>1</sup> Efesomo ite rafue suilla mei, Pablodi creyentiaia uaidote. Naimaci comeciaia ocuñotafuena llote. Iemei naimacina naimie facaduano, Macedonia railla eniruemo jaide.

<sup>2</sup> Nainomo ite nairaimo macarite. Comecina ocuñotallena, naimacina llofuecana jaide. Iese Macedoniamona Grecia railla eniruemo risaide.

<sup>3</sup> Nainomo daje amani fivui illa mei, Siriamo botedo abido jaiacade; iadedi judiaiaidi naimiena meineiacanana Pablo fidiano, Macedoniamo abido macarite.

<sup>4</sup> Jaino naimie diga jaidimaci. Sópater jaide. Naimiedi Berea nairai imie. Pirro jito. Aristarco, iaimaiaia Segundo diga, jaide. Tesalónica nairai imie iaimaiaia. Gayo naimie diga jiai jaide. Gayodi Derbe nairai imie. Timoteo naimie diga jiai jaide. Tiquico, iaimaiaia Trófimo diga, jiai jaidiaimaiaia. Asia imie iaimaiaia.

<sup>5</sup> Coco uicodo naimaci jaillano, Troamo cocona sedadimaci.

<sup>6</sup> Llomenico guillarullaia railla rafue fuilla mei, Filipomona jaidicoco. Monailaido dabecuirorui coco jailla mei, Troamo naimaci diga dane danomo dafaifidicoco. Nainomo sietedigarui fiebidicoco.

### *Troamo Pablo illa rafue*

<sup>7</sup> Domingoruimo Jesús fiodaillana começillena, danomo ofidicaimo, Pablodi caina llofue. Icoiti naimie jaiacana jira, Pablo are ñaite. Naiona jitoma daferui illa facai nia ñaite.

<sup>8</sup> Cai ofillanomo ailluena lampariniaia ite.

<sup>9</sup> Pablo are ñaia jira, daje coniruemo iniaicidi suide. Naie conirue mamecidi Eutico. Naimiedi ventanamo raide. Naimie eo inia jira, ventanamona ana uaide. Tercer pismo a iticai. Nainomona eniruemo naimiedi uaide. Ana jibuisaibidemo, naimiena meniñocaidemo, naimie jai fiodaillana ciodimaci.

<sup>10</sup> Ie jira Pablo ana jaide. Naimie emodomo jitadacaida, naimiena meniñote. Cominimo llote:

—Omoi rucaicueriño. Naimie cajede. Jafaicina nia faite.

<sup>11</sup> Abido a jaidimaci. Jesús fiodaillana começillena, llomenicono tairuano, cominimo Pablo fecade. Guilla meinomo, naimaci diga naimie are ñaite, monaiacademo. Ie mei oni jaide.

<sup>12</sup> Nainomona conirue jai cajede uitimaci. Ie jira nana naimaci naimieri eo iobidimaci.

### *Mileto railla nairaimo Pablo jailla rafue*

<sup>13</sup> Pablodi Troamona Asón railla nairaimo arido jaiacana jira, botedo jaidicai. Iese uicomo Asónmo jaidicai. Nainomona Pablona botedo uiacadicaia.

<sup>14</sup> Ie jira Asónmo naimiena cai baillanona, cai diga botemo bite. Ie mei Mitilene railla nairaimo jaidicai.

<sup>15</sup> Nainomona dane monailaido cai jaillano, ie areruideo Quío railla nairaimo ruicafebellemo jaidicai. Dane ie areruideo Samos railla nairai mamedo atona jaidicai. Ie areruideo dane cai jaillano, Miletomo sijidicai.

<sup>16</sup> Abi juarenia, Pentecostés railla rafue suilliruimo naimie Jerusalémo iacade. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite. Asia railla eniruemo naimie are icaiñaña jira, Pablo começina facade: “Efeso ecido monailaido jaiticai”.

### *Efesomo ite creyentiaia sedarainimo Pablo llua rafue*

<sup>17</sup> Creyentiaia sedarainina uaidollena, Miletomona Efesomo Pablo cartana orede.

- <sup>18</sup> Naimie ðine naimaci rillanona, Pablo naimacimo llote:  
 –Asiamo nano cue rillaruumona, niese omoi diga nagarui cue illana uiñotomoi.
- <sup>19</sup> Cai Nama diga abina iedoñeno maijuuidicue. Eecana sure maijidicue. Judíuai cuena duere uiñodosia jira, ie facaiseconi dueredicue.
- <sup>20</sup> Cuemo ite marecinona omoimo jaca janoñedicue. Nana Jusiñamui rafuena omoimo jai lloticue. Omoi ofillanomo omoína llofueuidicue. Omoi jofuemo omoína jai llofueuidicue.
- <sup>21</sup> Judíuaina llofueticue. Judíuaiñedinona daje isoi llofueticue. Jusiñamui ðibeimo omoi comeciai iuaina meiduana lloticue. Cai Nama Jesúsna omoi iñuana jiai lloticue.
- <sup>22</sup> Jusiñamui Joreñodi cuena jai jaicaitaja jira, Jerusalémo birui jaiticue. Nainomo ramo cue jirille rafuena uiñoñedicue;
- <sup>23</sup> Iadedi Jusiñamui Joreño naga nairaimo cuemo llote: “Llaveracomo ona gaitajano ona jonesiite. Duere sefuitio”.
- <sup>24</sup> Cue ille ðinori are illemo comecina facañedicue. Dama cue ille ðinori fuidoacadicue. Cai Nama Jesúsna cue feiñoa maijjana fuidoacadicue. Mare rafuena omoimo lloiacadicue. Jusiñamui omoína duenaillana jiai lloticue.
- <sup>25</sup> Jusiñamui anamo omoi illa rafuena omoimo jai lloticue. Jai dane cue uiecona cioñeitomoi. Iena uiñoticue.
- <sup>26-27</sup> Cue uaina jaca janoñedicue; ia nana Jusiñamui uai omoimo lloticue. Ie jira cuemona omoi diga cue comeci mare. Jusiñamui uaido omoi jaiñenia, cue muidonañeite.
- <sup>28</sup> Mai omoi abi rairui. Jusiñamui Joreñodi omoína creyentiaina sedatate. Naimacina raise seda. Jusiñamui ðibeimo itinona llofue. Naimie Jito fiodailla muidona, naimacina ote, naimie iena.
- <sup>29</sup> Naimacidi toica llauaiaia isoidimaci. Nia abina raise uiñoñedimaci. Cue jailla meinoconi, taino llorainidi, janallari isoi, omoimo biite. Naimaci nana omoi sedaca cominina ramo faite, danomo abido naimaci jaillena, jiconiaia llauaiaia gaitaja isoi.
- <sup>30</sup> Omoimona uanañedicinona llorainidi iite. Creyentiaina ramo faitimaci, omoi llucinona fainonocaillena, naimaci ðibeimo illena.
- <sup>31</sup> Ie jira abina rairui. Bie rafuena feitaño. Daje amani fiemona nana omoína jai llofueticue. Naiona omoína llofueticue. Aremona omoína jiai llofueticue. Omoína cue duenaillamona, eianona omoína llofueticue.
- <sup>32</sup> Mai. Cai Nama illa anamo omoína fainonocaiticue. Naimie uaimona naimie omoína duenaillana jai uiñotomoi. Naie uaidi omoína jiai ocuiñotaite. Iemona Cristona iñocana jaitomoi. Nana naimie fetocano diga naimie illanomo iico jaca iitomoi.
- <sup>33</sup> Jiaño ie ucubena jaca nicidoñedicue. Bu ie iñiroillaina jaca jiai oiacañedicue.
- <sup>34</sup> Cue jitaille rana dama cue maijjano oticue. Cue diga jaidino imaci jitaille rana jiai dama cue maijjano oticue. Iena nana omoidi uiñotomoi.
- <sup>35</sup> Iese cue illamona omoína llofueticue. Iese maijjano duerede cominina canocana jaiacadicai. Cai Nama Jesús ie llogacinona uiñoticaia. Naimie raite: “Raruaiaina cai feiñoa, iobidicai; iadedi cai eo iobiacania, jianomo raruaiaina fecadicai”.
- <sup>36</sup> Naie llua meino, naimaci diga cañici ifodo rainadajano, Jusiñamuimo jide.
- <sup>37</sup> Nana naimacidi eo eedimaci. Pablona caimaduanona, naimiena libanotimaci.
- <sup>38</sup> “Cuena dana cioñeitomoi” naimacimo llua jira, eo sunaitimaci. Ieconí naimie diga botemo jaidimaci.

## 21

### *Jerusalémo Pablo jailla rafue*

- <sup>1</sup> Naimacina cai facadua meinoconi, suiñodicai. Cos railla nairaimo atona jaidicai. Ie are Rodas railla uiasimo ridicai. Iemei Pátara railla nairaimo ridicai.
- <sup>2</sup> Nainomo Fenicia railla eniruemmo jaiacade botena baiticai. Nai botemo cai jailla mei, suiñodicai.
- <sup>3</sup> Chipre railla uiasina cai ciojia, cai nabei ðibeimo ite. Iemei Siria railla eniruemmo jaidicai. Tiro railla nairaimo sijidicai. Botedo uiga raruaiaina nainomo joneacadimaci.
- <sup>4</sup> Tiromo ite creyentiaia cai baillanona, siete digarui naimaci diga iticai. Jerusalémo naimiena judíuai meineñellena, nainomo naimie jaiñellena, Jusiñamui Joreño naimacina Pablomo llotatate.
- <sup>5</sup> Digarui illa meिनomo oni jaidicai. Naie nairaimona nana naimaci cai diga jaidimaci. Riñoniaia, naimaci uruai diga, jaidimaci. Caiñici ifodo monaillai fuemo ana rainadajano Jusiñamuimo jidicai.
- <sup>6</sup> Naimaci facadua meinoconi, botemo jaidicai. Naimaci imaci jofuemo abido jaidimaci.
- <sup>7</sup> Tiromona Tolemaida railla nairaimo jaidicai. Creyentiaina uaiduano, darui naimaci diga iticai.

<sup>8</sup> Ie are jaillano, Cesareamo cai ria, Felipe jofomo jaidicai. Felipei Jesucristo ie rafuena lloraima. Jerusalémo diáconuaina creyentiai jai fetua facaise, Felipena fetodimaci.

<sup>9</sup> Naimie dinomo fiebidicai. Naimiemo cuatro jisa ite. Naiñaiñuiai nia iima abina uifioñede. Jusiñamui naiñaiñuaimo llucacina llocabitimaci.

<sup>10</sup> Digarui nainomo cai illamo Judeamona damie bite. Naimie mameci Agabo. Jusiñamui facaina lloraima.

<sup>11</sup> Caimo ria, naimiedi Pablo cinturóna aiñode. Naie diga ie eillina maite. Ie onollina jiai maite raillano:

—Jusiñamui Joreño raite: “Jerusalémo judíuai illaicomini bie cinturón jainoide iimana daje isoi maitimaci. Judíuaiñedinomo naimiena fecajitimaci” raite.

<sup>12</sup> Naiena cai cacajano, naie comini diga, Pablona caididicai, naimie Jerusalémo jaiñellena.

<sup>13</sup> Pablo uai ote:

—¿Bue ñellena eedomoi? ¿Bue ñellena cue comecina ocuiñotañedomoi? Cue maiana jaca jitaidicue. Ua cue fiodaillana jaca jiai jitaidicue. Cue Nama Jesús muidona cue fiodaiededi, damamai fiodaicue.

<sup>14</sup> Cai lloga uai naimie iinoñena muidona, raiticai:

—Cai Nama jitaille rafuena finuana jitaidicai. —Iemei lliicaidicai.

<sup>15</sup> Nano nigarui illanona, cai raruiaina finuano, Jerusalémo jaidicai.

<sup>16</sup> Cesareamo ite creyentiaimona jaino cai diga jaidimaci. Mnasón jofomo caina uitimaci. Naimiedi Chipre railla uiasi imie. Naimiedi nano bie rafue tainiamona creyente.

*Jacobo diga Pablo ñaia rafue*

<sup>17</sup> Jerusalémo cai ria, creyentiaidi caina caimare uaidotimaci.

<sup>18</sup> Ie are Pablo, cai diga, Jacobo dine jaide. Nana creyentiaina sedaraini nainomo jai ofidimaci.

<sup>19</sup> Uaidua mei, Pablo nagacinuaido Jusiñamui judíuaiñedinomo finoca rafuena llote:

—Cue llofuiamona ailluena judíuaiñedino creyentiaina jaidimaci —llote.

<sup>20</sup> Naie rafuena cacajano, Jusiñamuimo iobillacinona fecadimaci. Iemei naimiemo llotimaci:

—Ama, ero, judíuaiimona ailluena comini jai creyentiaina jaidimaci; ia nana naimaci Moisés micori llogacinodo eo jaidimaci.

<sup>21</sup> O finoca rafuena jai fididimaci. Ona comini ñaiana jai fididicai. Jiaie nairai motomo ite judíuaina Moisés micori llogacinona fainonocaillana llofuetio. Naimaci uruiai abina deñenana llofuetio. Moisés micori llogacinuaido jaiñellena llofuetio.

<sup>22</sup> Ie jira ¿ñiese nibaiticai? O rillana jai fididimaci.

<sup>23</sup> Ie jira omo cai lluaana fino. Cai ecimo cuatro iima jai ite. Nie isoide rafuena Jusiñamuimo jai llotimaci.

<sup>24</sup> Jusiñamui jofomo naimacina uiño. Naimaci diga Moisés micori llua isoi, o abi fino. Naie rafuena raise fuidollena, Jusiñamuimo fecallena, toica ocainaiaina naimaci facaina iba. Naie rafue omoi fuiduanona, omoi ifogina rijiruda gareitomo. Ie mei nana comini mare rafuena o finocana jaillana uiñoitimaci. Moisés micori llogacinodo o nia jaillana uiñoitimaci. Iese omo lloiacadica.

<sup>25</sup> Judíuaiñedino Moisés micori llogacinodo jaillena lloñeiticai. Naimacimona creyentiaina jaidinomo navui cueticai: “Jiraraimo fecaca rana riño. Diruena riño. Llerinoga rana riño. O aiñede riño diga iño. O iniñede iima diga iño” cueticai.

<sup>26</sup> Pablo “Jee” raillanona, nai cuatro iima diga ie are Moisés micori llogacinona finuano, Jusiñamui jofomo jaide, naimie ie finoca rafue fuillarui lollena. Jusiñamuimo nagamiiai rana fecajaruina jai llote. Siete digarui illanona, Moisés micori llua isoi, naie rafuena fuidoiacadimaci.

*Pablona gaitaja rafue*

<sup>27</sup> Naie siete iruillai fuiacanuillaimo Asiamona damierie judíuaidi bitimaci. Jusiñamui jofomo Pablona ciuano, comini comeciana feidocana uitimaci. Pablona gaitajanona,

<sup>28</sup> cuiridimaci:

—Caimaci, caina cano. Bimie naga illanomo llofuiamona, cominina raise itañañede. Moisés micori llogacinuaido jaiñede. Bifona raise sedañede. Judíuaiñedino bifomo atiano, bie mare jofu naimie jai jeare finode.

<sup>29</sup> Iese ite: Jerusalémo Trófimo diga Pablona cioidimaci. Trófimodi Efeso nairai imie. Judíuñedimie. Pablo naimiena Jusiñamui jofomo uillamo comecina facadimaci; iadedi uiñede. Judíuai cominimona judíuñedimie Jusiñamui jofomo jaillana marañede.

<sup>30</sup> Asiamona bitino cuirillamona, nana Jerusalémo ite comini icirinaidimaci. Aisicana Jusiñamui jofomo jarire ofidimaci. Pablona gaitajanona, naifomona naimiena jino sonodimaci. Ie mei Jusiñamui jofona sedaraini nasena ibaidimaci.



- <sup>31</sup> Pablona meineiacania, soldaduai ie comandantedi nana comini ieillana fidade.
- <sup>32</sup> Teconi naimiedi, ie soldaduai diga, nana ie illaicomini diga, comini dine aisicana bitimaci. Ie jira cominidi naimacina ciuano, Pablona fajana fainonocaidimaci.
- <sup>33</sup> Comandante naimiemo iaireicaia, Pablona gaitade. Naimiena mena lloeo diga maillena lote. Jicanote:  
—¿Bu naimiedi? ¿Bue ñete?
- <sup>34</sup> Nana ieidinodi jiaiforie llotimaci. Ie jira naie rafuena naimie jaca uifioñede. Ie muidona cuatelmo naimiena uillena lote.
- <sup>35</sup> Cuartel tidabacuimo naimaci ria, comini jarire jailla jira, soldaduai Pablona uitimaci.
- <sup>36</sup> Ailluena comini racadimaci. Ocuioisite:  
—¡Naimiena meine!

*Pablo ie abi riidua llua rafue*

- <sup>37</sup> Cuartelmo jaiacania, Pablo comandantemo llote:  
—O diga ñaiacadicue.  
Raijicaillamona, naimie uai ote:  
—Griego uaido ñaitio—
- <sup>38</sup> Jiai llote—. Egipto imieñedio. Navui jobaime finodio. Jofue iñenanomo, cuatro mil cominina meinetinona uitio.
- <sup>39</sup> Pablo uai ote:  
—Naimieñedicue. Judío imieñedicue. Ciliciamo ite Tarso railla nairaimona biticue. Naie nairai mamecidi are soride. Cominimo cue llollena, omo jicanoiacadicue.
- <sup>40</sup> —Jee —raite. Pablo tidabacui muidomo naidaide. Cominina llucailallena, ie onollina jaidide. Comini llucailla mei, Pablo judiui uaido naimacimo llote:

## 22

- <sup>1</sup> —Caimaci, einamaci, cue abi riiduacinomo mai omoi cacarei.
- <sup>2</sup> Naimie judiui uaido lluaana naimaci cacajano, llucaidimaci. Ie jira Pablo llote:
- <sup>3</sup> —Judío imieñedicue. Ciliciamo ite Tarso railla nairaimo jeicigacue. Bene omoi nairaimo escuelamo jaidicue. Gamalielmona fueoticue. Moisés micori llogacinuaina eo raise facadicue. Jusiñamui rafuedo birui omoi isoi jaidicue.
- <sup>4</sup> Jesucristo inotinona jaie eo duere finodicue. Diga creyentiaina maianona, cárcelmo joneticue. Hiñiaina duere finodicue. Riñoniaina jiai duere finodicue.
- <sup>5</sup> Jusiñamui diga nanoca ñairaima cuena uifioñote. Nana omoi illaicomini cuena uifiotimaci. Creyentiaina duere finollena, naimacimona dajerie cartana jaie feiñoticue. Damascomo ite judiuiamo cuetimaci. Damascomo jaidicue, nainomo ite creyentiai maiano, Jerusalémo atianona, naimacina duere finollena.

*Pablodi Jesúna inuana llua rafue  
(Hch 9.1-19; 26.12-18)*

- <sup>6</sup> Omoimo bie rafuena lloiticue. Jerusalémona jaidicue; iadedi Damascomo cue iaireicaia, jitoma naidai iacania, ieconi monamona damie cue abina eo quetiñote.
- <sup>7</sup> Eniruemo ana uaidicue. Monamona damie cuemo lluaana cacadicue: “Saulo, Saulo, ¿bue ñellena cuena duere finodio?”
- <sup>8</sup> Jicanoticue: “¿Budío?” Monamona damie uai ote: “Nazaret ie Jesúsicue. Cuena duere finodio”.
- <sup>9</sup> Cue diga itinodi cue quetiñua rana cioidimaci; iadedi cue diga ñaitimiena cacaiñedimaci.
- <sup>10</sup> Raiticue: “Nama, ¿bue ñeticue?” Cai Nama cuena raite: “Naidadajanona, Damascomo jai. Nainomo o finolle rafuena omo lloiticue”.
- <sup>11</sup> ‘Cuena eo quetiñua jira, cioñedicue. Cue diga itino cue onollido llinocaida, Damascomo cuena uitimaci.
- <sup>12</sup> Nainomo Ananías raillamiedi ite. Jusiñamuina eo inote. Moisés micori llogacinuaido eo jaisoide. Nainomo ite judiuidi naimiena: “Mare” raitimaci.
- <sup>13</sup> Naimie cuemo bite. Cuemo llote: “Saulo, ama, mai oni eroda”. Ieconi dane erodajanona, naimiena ciodicue.
- <sup>14</sup> Naimie raite: “Cai usumatiai micoriai ie Jusiñamuidi ona fetode, naimie jitaille rafuena o uifioñellena, ie mare Jitona o cioillena, naimie uaina o cacareillena.
- <sup>15</sup> Nana cominimo naimiena lloitio. Nana o ciua rafuena lloitio. Nana o cacaja rafuena jiai lloitio.
- <sup>16</sup> Mai cue lluaana ino. Naidadajanona, o jeacino oni dotallena, Jusiñamuimo jica. Ie mei bautiza” raite.

*Judiuidiñedinomo Pablo jailla llua rafue*

<sup>17</sup> 'Te mei Jerusalémo abido cue billa mei, Jusiñamui jofomo Jusiñamuimo cue jüia, nicairiticue isoidicue.

<sup>18</sup> Cai Namana ciodicue. Cuemo llote: "Jerusalémona raire mai jai. Cominidi o cuena lluaña feiñofeitimaci".

<sup>19</sup> Uai oticue: "Nama, naga judíuai ofiracomo ona ñnotinona fauidicue. Cárcelmo naimacina joneuidicue. Nama, Jerusalémo itino iena uifotimaci.

<sup>20</sup> Esteban micori fiodailla facaiseconi nainomo iticue. Naimie o facaina lloraíma. Naimie fiodailla jira, iobidicue. Naimiena meinetino iniroina sedadicue";

<sup>21</sup> iadedi cue Nama cuemo llote: "Mai jai. Judíuaiñedinomo ona are oretaiacadicue".

*Comandante anamo Pablo illa rafue*

<sup>22</sup> Bie lloga dinori comini Pablo lluaña cacadimaci. Iemei cuiroidimaci:

—Bie isoide iima illana benomo jitañedicai. ¡Naimiena meine!

<sup>23</sup> Cuirillamona naimaci iniroina jaidisite. Icirisiano enruena jiai fadosite.

<sup>24</sup> Judíuai uaido cominimo Pablo llua jira, comandante iena cacaiñede; iadedi comini icirillana ciuanona, naimie llote:

—Naimiena cuartelmo uño. Naimiena fano. Naimiemo ite rafuena caimo naimie llollena, naimiena duere fino.

<sup>25</sup> Naimiena maiano naimiena fallena, Pablodi nainomo ite capitámo jicanote:

—¿Juez ñia lloñenia, romano ñairai imiema fajana mare? Romano ñairai imiedicue.

<sup>26</sup> Capitán iena cacajano, comandante dine jaide. Iena llote. Jicanote:

—¿Ñiese ñibaítica? Bimie romanuai ñairai imie.

<sup>27</sup> Iena cacajano, comandante bite. Pablomo jicanote:

—¿O Romano ñairai imiedio?

Pablo uai ote:

—Jii.

<sup>28</sup> Comandante dinena raite:

—Romanuai ñairai imiema cue jaillena, eo ibadicue.

Pablo uai ote:

—Romanuai ñairai imiema jeicigacue.

<sup>29</sup> Ieconí naimiema duere finoacadino naimiemona raire oni jaidimaci. Pablo romanuai ñairai imiema jira, naimiema jai ebena maia jira, comandante jiai jacinaita. Comecina ñibai facade: "Iese naimiemo cue finua jira, ie ibana ollena, cue illaímamo cuena jiai llogidoite".

*Illicomini motomo Pablo illa rafue*

<sup>30</sup> Comandantedi judíuai Pablona llogiduana ua raise uifoiacade. Ie jira ie are Pablona suiñollena llote. Jusiñamui diga nanoca ñairaini, nana judíuai illicomini diga, ofillena llote. Pablona atiano, naimaci motomo uillanona, naimiema naidanete.

## 23

<sup>1</sup> Ie abina riidollena, Pablo ñaie judíuai illicomini motomo ite. Naimacimo eruailano, Pablo raite:

—Caimaci, cuemona nana cue illa dinori Jusiñamui jitailla rafuena finocabidicue. Naimiemona cue comeci mare.

<sup>2</sup> Ananíadi Jusiñamui diga nanoca ñairaima. Pablo lluaña naimie gaiñenamona, Pablo ecimo itinona Pablo fuena farotate.

<sup>3</sup> Pablo dinena naimiemo llote:

—Jusiñamui o fueno faroite. Mareuidimiena abina caitadio. Moisés micori llogacinuai mudona benomo itio, cuemo llollena; iadedi cue finoca rafuena raise o uifoiñeno cue fue ebena farollena llotio.

<sup>4</sup> Nainomo itino raite:

—Jusiñamui diga nanoca ñairaimamo jeare ñaitio.

<sup>5</sup> Pablo uai ote:

—Moisés micori iena jaie cuiana uifotiticue. "Illicominina jeare ñaiñeno" cuete. Caimaci, naimie Jusiñamui diga nanoca ñairaima illana uifoiñedicue. Uifotituedena, naimiemo iena lloñedicue.

<sup>6</sup> Cominimo Pablo eruailamona, saduceuai railla comini nainomo illana ciode. Fariseuai railla comini nainomo illana jiai ciode. Ie jira naimacimo ado llote:

—Caimaci, fariseo imiedicue. Fariseo imie jitodicue. Fiodaillamona ico jilluacino mo ocuriticue. Ie jira bene cuena llogidoiacadomoí.

<sup>7</sup> Naimie iena lloia, naimaci comeci daje isoi lloñedicaci.

<sup>8</sup> Saduceuai cominidi fariseuai comini isoi inoñedimaci. “Fiodaillamona jilloñeiticai” saduceuai comini raillana inoside. “Jusiñamui jaienisaí ifede. Comini joreñuai ifede” raillana inoside; iadedi fariseuai comini dinena nana naie rafue illana inotimaci.

<sup>9</sup> Ie jira eo failliñaidimaci. Fariseuai motomona jiano naidadajanona, lote:

—Bimiemo jeacino ifede. Jusiñamui jaienici naimiemo nıbaı jaie llumona, bie rafue naimiemo ite.

<sup>10</sup> Naimaci iese riire failliñaidimaci. Naimaci Pablona llagui raillano, comandantedi soldaduaimo cuartelmo naimiema uillena llote.

<sup>11</sup> Ie are naiona cai Nama Pablomo bairedede. Raite:

—Comecina ocuiño. Jerusalémo cuena o llua isoi, Romamo cuena jiaı lloıtio —raite.

*Pablona meineiacana rafue*

<sup>12</sup> Monaidemo, judıuaimona jiano comeciaina facadimaci: “Pablona nia cai meineñenia guñeiticai. Jiroñeiticai”.

<sup>13</sup> Cuarenta baifemo ite comini iese comeciaina facadimaci.

<sup>14</sup> Naimaci judıuai illaicomini dine jaillano, raitimaci:

—Dani comeciaina facadicaı: Pablona nia cai meineñenia, jaca buena guñeiticai.

<sup>15</sup> Omoi dine Pablona atillena, naimiemo eo raise jicanua isoi, comandantemo jicano. Pablo lairei bia, naimiema cai meinellena, ocuidoticaı.

<sup>16</sup> Pablo enaise naie rafuena fidiano, cuartelmo jaide, Pablomo llollena.

<sup>17</sup> Iena cacajano, Pablodi capitána uaidote. Raite:

—Bie coniruenta comandante dine uıño. Naimie diga ñaiacade.

<sup>18</sup> Ie jira naimiema uite. Raite:

—Cuartelmona Pablo cuena uaidote. Bie conirue omo atillena cuemo jicanote. O diga ñaiacade.

<sup>19</sup> Naimie onollina comandante llinocaida, bai ie atianona, naimiemo jicanote:

—¿Bue cuemo lloiacadio?

<sup>20</sup> Naimie uai ote:

—İco are Pablona illaicomini dine uillena, naimiemo eo raise jicanua isoi, omo jicanollena, judıuai dani comeciaina facadimaci.

<sup>21</sup> Naimaci jitailla isoi finoñeno. Cuarenta digamie baifemo naimiema reiduanu sedadimaci. Lotimaci: “Guñeiticai, jiroñeiticai, Pablona nia cai meineñenia”. Naimacidi omo jicanolle rafuena o finollena sedadimaci.

<sup>22</sup> Comandante coniruenta facaduano raite:

—Jaca bumo cuemo o llua nolleno.

*Félix dine Pablo oretaja rafue*

<sup>23</sup> Comandante mena capitána uaidote. Llote:

—Doscientos soldaduaina uaido, imaci raruiı finollena, Cesareamo navuida baife imaci jaillena. Setenta caballuaido jaitino uaido. Doscientos ducirainina jiaı uaido.

<sup>24</sup> Jiaie caballona ati, naie emodomo rainadacaida Pablo jaillena. Félix railla gobernador dine naimiema raise uıño —llote.

<sup>25</sup> Cartana jiaı cuete. Iese cuete:

<sup>26</sup> “Félix, omo cueticue. Claudio Lisiasdicue. Cai mare gobernadorıo. ¿Nıgacino? Cue uai o dine oredicue.

<sup>27</sup> Damie o dine oredicue. Judıuai naimiema meineiacana jira, soldaduı digu naimiema gaitataticue. Naimiema gaitataja mei, naimiedi romanuai nairai imienana fididicue.

<sup>28</sup> Judıuai illaicomini dine naimiema uiticue, naimaci llogiduacınona raise cue uıñollena.

<sup>29</sup> Naimaci einamacı llogacınuai muidona naimiema llogidotimaci. Iena fididicue. Naimie jaca buena finoñede. Naimiema meinellena, naimie cárcelmo jonellena lloiacañedicue.

<sup>30</sup> Jiano naimiema dane meineiacanana fididicue. Ie jira o dine naimiema oretaticue. Ie llogidotino o dine jaillena jiaı lloıticue. Naimaci naimiema omo lloıtımaci” cuete.

<sup>31</sup> Comandante llua isoi, soldaduı naiona Pablona Antıpatrısmo uitimaci.

<sup>32</sup> İco are eillido jaide soldaduı cuartelmo abido bitımaci; ia Pablo caballuaido jaidino digu oni jaide.

<sup>33</sup> Cesareamo railla nairaimo rillanona, gobernadorıo cartana fecadimaci. Naimie dine Pablona jiaı uitimaci.

<sup>34</sup> Gobernador cartana facade. Ie mei Pablomo ie nairai illanona jicanote. Pablo uai ote:

—Cılicia.

<sup>35</sup> Gobernador dinena raite:

—O llogidotino bia, o rafuena cacajiticue.

Soldaduaimo jiaı llote:

—Omoi anamo Herodes railla illaima micori jofomo naimiema seda.

## 24

*Félix dine Pablo riidua rafue*

<sup>1</sup> Dabecuirorui illa mei, Ananías bite. Naimiedi Jusiñamui diga nanoca ñairaima. Jiaie illaicomini diga bite. Tértulo raillamie jiaie bite. Naimiedi llogidoraima. Gobernadormo Pablona llogiduaibitimaci.

<sup>2</sup> Pablona uaidua mei, gobernadormo Tértulo Pablo finoca rafuena llote:

—Félix, bie rafue omo lloiticue. Eo mareuidimiedio. O muidona eo uri iticai. Cai nairaina canollena, diga mare rafuena finodio.

<sup>3</sup> Iobillamona, nana cai iena feiñoticai.

<sup>4</sup> Ona iciaicaiñedicue; iadedi o fue maria jira, cue lluomo dallu cacarei.

<sup>5</sup> Bimiedi eo cai abina aruire finode. Nana eniruemo ite judiuaína uri itañede. Naimiedi Jesús raillamie rafuedo jaidino illaíma.

<sup>6</sup> Jusiñamui jofona jeare naimie finoiacana jira, naimiena gaitadicai. Moisés micori llogacinuaido naimiena duere finoacadícaí;

<sup>7</sup> iadedi comandante Lisias ride. Caimona naimiena riire bairode. Naimiena cai llogidollena, o dine cai billena caímo llote.

<sup>8</sup> Pablomo o jicanoiacania, naimiemona bie rafuena uíñoitio. Nana naimiena cai llogiduacinona uíñoitio.

<sup>9</sup> Judiuaí illaicomini, Tértulo llua isoi, dacinodo llotimaci.

<sup>10</sup> Iemei gobernador dinena Pablomo llote:

—Mai o facaina o ñaíno.

Ie jira Pablo ñaíte:

—Diga años cai nairai o anamo iticai. Ie jira cue abina riiduacinona omo marefodo lloiticue.

<sup>11</sup> Doce digarui illanona, Jerusalémo como birui ridicue. Iena uíñoiacadíaosa jiaie cominimo jicano. Jusiñamuina sedallena, Jerusalémo iticue.

<sup>12</sup> Bu diga conima uaina jaca uaitañedicue. Jusiñamui jofomo uaina uaitañedicue. Judiuaí ofiracuaimo uaina jiaí uaitañedicue. Naisomo uaina jiaí uaitañedicue. Cominina uri itañenana lloñedicue.

<sup>13</sup> Nie isoide rafuena cue finuana cioñedimaci. Ie jira cuena raise llogidonidimaci;

<sup>14</sup> iadedi jiaie rafuena lloiticue. Cai usumatiaí Jusiñamuina sedadimaci. Naimiena jiaí sedadicue. Nana Moisés llogacinuaina ñnoticue. Nana Jusiñamuina lloraini micriai cuegafuiaina ñnoticue. Bimacimona jiaie llogacinuaido jai jaidicue. Bimacimona uañañedicinodo jaidicue.

<sup>15</sup> Fiodaillamona comini íco jilloillena ñnoticue. Jusiñamuina ñnotino jilloitimaci. Jusiñamuina ñnoñedino jiaí jilloitimaci. Beno itino iena jiaí ñnotimaci.

<sup>16</sup> Ie jira marena íacadicue, “Maraiñede rafuena Pablo finode” comini lloñellena, “Maraiñede rafue Pablo finode” Jusiñamui lloñellena.

<sup>17</sup> Diga años Jerusalémo abido biñedicue. Jerusalémo ite dueredinona canollena, ucubena birui atidicue. Jusiñamuina jiaí sedajaibidicue.

<sup>18</sup> Moisés micori llua isoi, cue abi marena finuano, nairui Jusiñamui jofomo cuena baitimaci. Aillena comini cue diga íñede. Cominina iciritañedicue.

<sup>19</sup> Naie facaise Asiamona jiaie judiuaí bitimaci. Cuemo nicino ía, ¿bue ñellena naimaci bene biñedimaci, cuena llogidollena?

<sup>20</sup> Naimaci biacaiñenia, ¿bue ñellena bene itino bie rafuena raise lloiacaiñedimaci? Naimaci motomo Jerusalémo cue ía, maraiñede rafuena cue finuana lloñedimaci.

<sup>21</sup> Navui naimaci motomo cue lloticue: “Fiodaillamona comini íco jilloitimaci”. Iena birui ñaitimaci. Ie jira cuena llogidoiacadimaci.

<sup>22</sup> Félixdi Jesús dibeimo itino rafuena raise uíñua jira, Pablo rafuena nairuido siadoiacañede.

—Comandante Lisias bia, dane omoi rafuena siadoiticue —raíte.

<sup>23</sup> Félix capitámo Pablo cárcelmo sedajana llote. Naimiena maiñellena jiaí llote. Naimiena canollena, naimie nabaiñiaí naimie dine jaillena rairuiñede.

<sup>24</sup> Diga irui illa mei, Félix, íe aí diga, bite. Naiñaiño mameci Drusila. Naiñaiñodi judía íñaiño. Pablona uaidua mei, Pablo llofuiana cacadiamaiaí. Jesúsna ínuana cacadiamaiaí.

<sup>25</sup> Jeacino finoñellena, dama íe jitailla rafuena finoñellena, jairuido Jusiñamui riicaillafue anamo íñellena cacadiamaiaí. Pablo llofuiamona Félix jacináite. Ie jira raíte:

—Jai macaibaíte. Cue abi juarelliruido ona dane uaidoiticue.

<sup>26</sup> Pablo jino jaille íballe ucubemo ocuride. Ie jira diga ícaíño naimiena uaidote, naimie diga ñaillena.

<sup>27</sup> Mena años illa mei, Porcio Festodi Félix ifo meidote. Félixdi judíuaina iobitaacana jira, cárcelmo Pablona fainonocaide.

## 25

### *Festomo Pablo llua rafue*

<sup>1</sup> Naie provinciamo darui amani rilla mei, Cesareamona Jerusalémo Festo jaide.

<sup>2</sup> Nainomo Jusiñamui diga nanoca ñairainidi, jiaie judíuai illaicomini diga, Festomo Pablona llogidotimaci.

<sup>3</sup> Festomo daje rafuena jicanotimaci, naimaci iena. Pablona Jerusalémo atillena jicanotimaci. Naiso motomo naimiena meinellemo comeciaina facadimaci.

<sup>4</sup> Festo uai ote:

– Pablo Cesareamo fiebiite. Raire nainomo abido jaiticue.

<sup>5</sup> Omoi illaicominimona damerie cue diga jaitimaci, nicino naimiemo ia, naimiena llogidollena.

<sup>6</sup> Nibai ocho, nibai diez diga irui nainomo illa mei, Cesareamo naimie abido jaide. Ico are ie cominimo llouillanomo raide. Pablo atillena llote.

<sup>7</sup> Pablo billa mei, Jerusalémona bite judíuai naimie ecimo ofidimaci. Diga fododicinona naimiena llogidotimaci; iadedi tainuaido llogidotimaci.

<sup>8</sup> Pablo uai ote:

– Judíuai llogacinuaina jaca jeare finoñedicue. Jusiñamui jofona jeare finoñedicue. Cai nanoca illaimamo jearede rafuena jiai finoñedicue.

<sup>9</sup> Iena cacade; iadedi Festo judíuaina iobitaacana jira, Pablomo jicanote:

– ¿Jerusalémo cue diga jaiacadio? Nainomo nana bie rafuena siadoiticue.

<sup>10</sup> Pablo uai ote:

– Llogidoracomo jai iticue. Cai nanoca illaima facaina cominimo llotio, naimacina duere finollena. Benomo cue lolle. Judíuaimo jaca buena finoñedicue. Iena raise uifotio.

<sup>11</sup> Romanuai railla nairai illaicomini llogacinona cue inoñenia, damamei jearede rafuena cue finoa, cue fiodaillemo jaca ocuiridicue; iadedi cuemo nicino iñenia, cuena meinellena bu cuena judíuaimo fecañeite. Cue rafue naimie siadollena, Romamo cai nanoca illaima dine jaiacadicue.

<sup>12</sup> Ie ecimo ite canoraini diga Festo ñaia mei, Festo raite:

– Cai nanoca illaima dine o jaiacana jira, nainomo jaitio.

### *Agripamo Pablo llua rafue*

<sup>13</sup> Diga irui illa mei, Agripadi Festo dine, ie miriño Berenice diga, Cesareamo bitiaimaiai. Agripadi naie enirue illaima.

<sup>14</sup> Diga irui nainomo itiaimaiai. Naimiemo Festodi Pablo ie rafuena llote:

– Félix Pablona cárcelmo bene fainonocaide.

<sup>15</sup> Jerusalémo navui cue ia, Jusiñamui diga nanoca ñairaimadi, judíuai einamací diga, naimiena llogidote. Naimiena duere finollena cuemo jicanotimaci.

<sup>16</sup> Naimaci uai oticue: “Cai Romanos cominidi llogidogamiensa jamai tainomo duere finoñedicai; iadedi llogidogamiendi ie llogidotino uai nano cacareiticaí. Ie mei ie abi riidollicinomo jiai cacareiticaí”.

<sup>17</sup> Ie jira naimaci cue dine benomo navui bia, ie are cominimo cue llouillanomo raidicue. Pablona cue dine uaidoticue.

<sup>18</sup> Naimiena llogidotinodi lloia, naimiena marañede finoca rafue cue facaja isoi, llogidoñedimaci.

<sup>19</sup> Dani naimaci inuacinona llotimaci. Jesús raillamie rafuena llotimaci. “Jesús jai fiodaite” raitimaci; iadedi Pablodi: “Jesús jai cajede” raite.

<sup>20</sup> Bie rafuena raise cue uifotia, naimiemo navui jicanoticue: “¿Jerusalémo jaiacadio, nainomo bie rafuena siadollena?”;

<sup>21</sup> Iadedi Pablo nainomo jaiacañede. Cai nanoca illaima dine jaillena jicanote. Nainomo ie rafuena siadollena jitaide. Ie jira naimie sedajana lloticue, cai nanoca illaima dine naimiena cue nia oretañenia.

<sup>22</sup> Agripadi Festomo llote:

– Naimie ñaiana cacacadicue.

Festo uai ote:

– Ico are naimie ñaiana cacareitio.

<sup>23</sup> Ie jira ie are Agripa, iaimaiai Berenice diga, gobernador ofiracomo bitiaimaiai. Finobillano ebire bitiaimaiai. Soldaduai imaci illaicomini jiai bitimaci. Naie nairaimo ite nanoca comini jiai bitimaci. Ofilla mei, Festo Pablona atillena llote.

<sup>24</sup> Festo llote:

—Agripa, nana beno itino, bimiena ciodomoi. Jerusalémo ailluena judíuai naimiena llogidotimaci. Bene cue dine jiai bitimaci. Naimie meiniana eo jitaídímaci;

<sup>25</sup> iadedi naimiemo nicinodi ifnenana jai uifnoticue. Naimiena meinellena cue llollena, nicinodi naimiemo ifnede. Augusto dine naimie jaillena naimie jicanua jira, naimiena oretaiticue.

<sup>26</sup> Nicinodi nia ifnede, cai illaimamo cue cuellena. Ie muidona omoi dine naimiena jai atidicue. Agripa, naimie ñaiamo raise cacarei. Naimiemo cai jicanua mei, ñibai nicino naimiemo illana uifnoticai. Iemona Augustomo cueiticaí.

<sup>27</sup> Augusto dine llavecamié cue oretaia, naimiemo nicino ifnenia, cuemona marañede.

## 26

*Pablo ie abina dane riidua rafue*

<sup>1</sup> Naie facaise Agripa Pablomo llote:

—Mai llono. O abi riiduacinona cacaacadicue.

Pablo: “Ji” raillanona, ie onolli a ñuitade. Raite:

<sup>2</sup> —Agripa, bene o illa jira, cuemona mare. Cue fue baillafuedo o uicomo cue abina riidoitacue. Judíuai cominidi diga rafuena cuena llogidotimaci.

<sup>3</sup> Nana cai judíuai rafuena raise uifnotio. Nana cai einamaci rafuena jiai uifnotio. Cuemo raise cacarei.

<sup>4</sup> Jerusalémo naimaci motomo cue illa jira, diga judíuai cue coniruenamona cuena uifnotimaci.

<sup>5</sup> Cuena naimaci lloiacania, fariseo imiena cue illana are uifnotimaci. Jiaie comini baifemo fariseuaídi cai einamaci llogacinuaina ifnotimaci.

<sup>6</sup> Jusiñamuidi cai usumatiai micoriaimo fiodaillamona comini ico jilloillena jaie llote. Ie suillemo jai ocuridicue. Ie jira llogidoracomo birui jai iticue.

<sup>7</sup> Nagarui Jusiñamuina naimaci eo sedajamona, cai doce nairaidi naie llogacino suillemo jiai nia ocuridimaci. Ore illaíma, bie ocurillacino muidona judíuai illaicomini cuena llogidotimaci.

<sup>8</sup> ¿Bue ñellena Jusiñamuidi comini fiodaillamona jillotajana ifnoiacaíñedomoi?

<sup>9</sup> Jaie ie isoidicue. Nazaret ie Jesúsna ifnotinona diga jearede rafuena jaie finoacadicue.

<sup>10</sup> Jerusalémo iena finodicue. Cárcelmo ailluena Jesúsna ifnotinona joneticue. Jusiñamui diga nanoca ñairaini uaido iena finodicue. Naimacina meinelle cai illaicomini raia: “Jee” raisoidicue.

<sup>11</sup> Diga judíuai ofiracomo, diga icaíño, naimacina duere finodicue. Naimaci Jesúsna jeare ñaiana jitaídicue. Naimaci diga cue eo icirilla jira, jiaie eniruemo ite nairaimo jiai jaidicue, naimacina duere finollena.

*Pablodi Jesúsna ifnuana llua rafue*

*(Hch 9.1-19; 22.6-16)*

<sup>12</sup> Ie jira Damascómo jaidicue. Jusiñamui diga nanoca ñairaini uaido jaidicue.

<sup>13</sup> Ore illaíma, jitoma naidai ia, monamona quetiñotena cidicue. Naidi jitoma baifemo quetiñote. Cue abina quetiñote. Cue diga itino abina jiai quetiñote.

<sup>14</sup> Eniruemo cue ana uaia, damie lluaana cacadicue. Judíuai uaido cuemo llote: “Saulo, Saulo, ¿bue ñellena cuena duere finodio? Cue diga icirillana eo sefuiruitio. Iemona o abina duere finodio, ricaiillamona raise maíga jurareta suiñoacana isoi. Ie isoidio. Ricaiillamona, cuena duere finoacadio”.

<sup>15</sup> Uai oticue: “¿Budiota?” Cai Nama cuemo llote: “Jesúdicue. Cuena duere finodio.

<sup>16</sup> Mai a naidacai. Cue rafuena o llofuellena ona fetodicue. O birui ciua rafuena lloitto. Ona cue uifnotalle rafuena jiai lloitto.

<sup>17</sup> Naimaci ona duere finodia, omoi cominimona ona jillotaiticue. Judíuaiñedinomona ona jiai jillotaiticue; iadedi judíuaiñedinome dine ona oretaiticue,

<sup>18</sup> naimaci comeciai tainomo ifnellena. Taife anamona Jusiñamui anamo naimacina itataitio. Jeacino anamo naimaci birui illa jira, jitiñedinomo jai itimaci isoidimaci. Jusiñamuina uifnuamona, useredinomo itimaci isoidimaci. Iemei Jusiñamui naimaci jeacinona dotajite. Cuena naimaci ifnuamona, nana cuena ifnotino diga cue illano ico jaca itimaci”.

<sup>19</sup> Ore Agripa, monamona cue cacaja rafuena ifnoticue. Jesúdi Jusiñamui Jitona ifnoticue.

<sup>20</sup> Damascómo itinomo iena nano lloticue. Ie mei Jerusalémo itinomo iena jiai lloticue. Diga Judeamo itinomo iena jiai lloticue. Judíuaiñedinomo iena jiai lloticue. Lloticue: “Omoi comeciaino iticinona meido, Jusiñamui dibeimo omoi illena. Omoi comeciaino iticinona omoi meidua mei, mare rafuena finocana jai”.

<sup>21</sup> Ie jira judíuai illaicomini Jusiñamui jofomo cuena gaitadimaci. Cuena meineiacadimaci;

<sup>22</sup> Iadedi Jusifñamui cuena canode. Ie jira birui bene iticue. Illaicominimo beno nia lloticue. Illaicominifednomo jiai nia lloticue. Dama Jusifñamui facaina lloraini micoriai ico suille cuegafuena birui lloticue. Dama Moisés micori ico suite cuegafuena jiai birui lloticue. Jiaie rafuena lloñedicue.

<sup>23</sup> Jaiie cuetimaci: “Cristo llegi cacajite. Fiodaillamona jilloite. Naimiedi nano dofoconi jilloitimie. Iemona cai judiui comini jeacinomona jilloillena uiñoitimaci. Iemona judiuaifedno jeacinomona jilloillena uiñoitimaci”. Ie jira bie rafuena llocana jaidicue.

*Creyentena Agripa jaillena Pablo jitailla rafue*

<sup>24</sup> Iese Pablodi abi riiduano, Festo riire llote:

—Pablo, odi uairico isoidio, eo comecina o facaja jira.

<sup>25</sup> Pablo uai ote:

—Uairicoñedicue. Festo, odi cue illaimadio. Cue llucacnodi uanaicino. Ebena ñaiñaiacaiñedicue.

<sup>26</sup> Agripa cue lloga rafuena raise uiñote. Nana bie rafuena naimie jai uiñua jira, naimie diga marefodo ñaiticue. Bainino suiñede.

<sup>27</sup> Ore Agripa ¿Jusifñamui lloraini cuegafuina ñnotio? omo jicanoticue. Iena o ñnuana jai uiñoticue.

<sup>28</sup> Agripa dinena uai ote:

—Dallu o ñaiamona, cuena creyentena nibai itataiacadio.

<sup>29</sup> Pablo uai ote:

—Nibai dallu ñaiticue. Nibai are ñaiticue; iadedi cue isoi o jaillana jitaidicue. Ua nana cue ñaiana cacadino cue isoi jaillana jitaidicue; iadedi omoi bie lloeo diga maiana jitaifñedicue.

<sup>30</sup> Iemona Agripa naidacaide, Festo diga, Berenice diga. Nana raidino jiai naidacaidimaci.

<sup>31</sup> Jino jaillano, Pablo joreña siadotimaci:

—Bimie jaca buena finoñede, naimiena cai meiniana lllollena. Buena finoñede, cárcelmo illena.

<sup>32</sup> Agripa Festomo llote:

—Naimie cai nanoca illaima dine jaillana jicanoñedena, niadedi naimie jino marena oreca.

## 27

*Romamo Pablo jailla rafue*

<sup>1</sup> Italiomo Augusto dine Pablo oretajana Festo llua mei, Pablona jiaie llavecano diga capitámo fecade. Naie capitádi Julio. Augustona mameciredede batallómo jainaiaide.

<sup>2</sup> Adramitiomona bite botemo jaidicai. Naie bote Asia railla enirue igobiaimo sijicana jaiacade. Aristarco cai diga jaide. Macedonia enirue imie. Naimie nairaidi Tesalónica. Suiñodicai.

<sup>3</sup> Ie areruido Sidón railla nairaimo ridicai. Nainomo Juliodi Pablona marena sedade. Ie nabaiñai dine Pablo ari jaillana rairuiñede. Ie jira naimacimona ie jitaillena ote.

<sup>4</sup> Iemei nainomona suiñodicai. Aifidi abido caina ati-atina jira, aifi raise iñenanomo, Chipre railla uiasi cai jarifebeimo illa ecido jaidicai.

<sup>5</sup> Cilicia railla enirue ecido monaillaido jaidicai. Panfilia railla enirue ecido jiai jaidicai. Mira railla nairaimo ridicai. Naie provincia mameci Licia.

<sup>6</sup> Naie bote Roma dine jaiñena jira, capitádi jiaie botena jenode. Capitádi Alejandriamona bite botena baite. Naie bote Italiomo jaiacade. Ie jira naie botemo cai jonecaida, caina uite.

<sup>7</sup> Diga irui fecuise sefuire jaillano, Gnido railla nairai iaieise ridicai. Aifidi abido caina ati-atina jira, Creta railla uiasimo jaidicai. Aifi raise iñenanodo Salmón railla nairai dine jaidicai.

<sup>8</sup> Uiasi iaieise iese sefuicana jaillanona, Maregobe railla illanomo ridicai. Lasea railla nairai jiai ianori ite.

<sup>9</sup> Digarui cai faifilla jira, noci deisoilla facaise jai illa jira, jaillena eo jacirede. Ie jira botemo maijidinomo Pablo llote:

<sup>10</sup> —Nabaiñai, cai jaillena eo jacirenana uiñoticue. Eo maraiñeno caimo sefuiticai. Cai raruaiana nibai faifticai. Botena jiai nibai faifticai. Cai nibai jiai faifticai —llote.

<sup>11</sup> Iese llote; iadedi naie bote piloto oni jaiacade. Naie bote nama jiai oni jaiacade. Capitán iaimai luana Pablo llua baifemo ñnote.

<sup>12</sup> Igobe maraiñena jira, rollime facaise illa jira, ailluena comini nainomona jaiacadimaci. “Fenice railla nairaimo niedi riiticai” raillano jaiacadimaci. Nainomo rollime facaiseconi iacadimaci. Fenice Cretamo ite. Naie igobedi jitoma billa beici dine eruaide.

<sup>13</sup> Beici dinena aifidi bia, “cai jitailla aifidi bite” raillanona, suiñodicai. Creta iaieiri monaillai fuemo jaidicai.

<sup>14</sup> Ie mei raire cai dine eo riire aifi bite. Naie aifi noci deisoilla dinena bite.

<sup>15</sup> Botena oni uite. Botena atona eronenidicai. Ie muidona jamai ebena jaidicai. Aifidi caina iese uite.

<sup>16</sup> Janorede uiasi fuemo aifi raise ifienanomo jaidicai. Nai uiasi mameci Clauda. Faiññellena bote ie janorede nocae sefuire a aifñidicai.

<sup>17</sup> A aifñua mei, rao diga botena ruica maiticai. Sirte railla conillie illanomo cai joodai raillano, velaiaina duiñodicaí. Iemei aifi jamai uigacai.

<sup>18</sup> Ie areruido aifi riire illa jira, cargana oni dotadicaí.

<sup>19</sup> Dane ie are bote ie raruiaí, cai onolli diga, oni dotadicaí.

<sup>20</sup> Diga irui jitoma bainide. Diga irui ucuai jiaí bainide. Aifi eo riire nia ite. Cai jillobiññellemo jai ocuiriñedicaí.

<sup>21</sup> Diga irui cai guiñena mei, Pablo naimacimo llote:

—Nabaiñiaí, cue uaina navui ñnotiomoidena, niadedi bie isoi sefuiñedicaí. Cretamo cai fiebidicaina, bie isoi sefuiñedicaí.

<sup>22</sup> Omoi comeciaina ocuiño. Bie botedi faifite; iadedi caimona jaca buna faifñeite.

<sup>23</sup> Jaiue naiona Jusiñamui jaienicidi cuemo bairede. Jusiñamuimo jainaiaidicue. Naimiena sedadicue.

<sup>24</sup> Naie jaienicí cuemo llote: “Pablo, jaciruiñeno. Romamo o nanoca illaíma dine iitio. Jusiñamui ona duenailla jira, nana o diga jaidino jilloitimaci”.

<sup>25</sup> Ie jira omoi comeciaina ocuiño. Cuemo llua isoi, naimiedi bie rafuena suiteate. Jusiñamui iena finuana ñnoticue.

<sup>26</sup> Nibai uiasimo jutadaiticai.

<sup>27</sup> Catorce digarui naio illamona, Adria railla monaillaimo jamai cai jiaí, naiona daferui facai marineruaídi: “Enirue iaíre ite” raillanona comeciaina facadimaci.

<sup>28</sup> Ie jira ie aforedinona facadimaci. Veinte brazas aforede. Iemei nano nie dinori illamona, dane facadimaci. Quince brazas aforede.

<sup>29</sup> Nofici illanomo naimaci bai raillano, fairillaillena, ie jillacimona cuatro lloelluna faitimaci. Mona monaille sedadimaci.

<sup>30</sup> Naie facaise marineruaí botemona aisiacadimaci. Ie jira botemo ite nocaena ana monaillaimo dotadimaci, bote jillacimona lloelluna faia isoi.

<sup>31</sup> Iena ciuano, Pablo capitámo llote. Soldaduaimo jiaí llote:

—Botemo bimaci fiebiññeniadedi, jilloññeitomoi.

<sup>32</sup> Ie jira soldaduaídi nocae maia raona jaitadimaci. Jai dinomo nocaena faionocaidimaci.

<sup>33</sup> Nia monaiññenia, Pablo nana caimo llote:

—Guiño. Catorce digarui illanona, jai guiñedomoi.

<sup>34</sup> Ie jira guiño, omoi mairillesa. Ua faifññeitomoi.

<sup>35</sup> Iese naimie raillanona, Jusiñamuimo iobillacinona fecade, nana comini illa uicomo. Llomenicon tairuano, guite.

<sup>36</sup> Nana naimaci comeciái ocuiñocaida, jiaí guitimaci.

<sup>37</sup> Botemo doscientos setenta y seis diese iticai.

<sup>38</sup> Cai monillamona, fiebide trigona monaillaimo oni fadodicaí, bote meenaiññellena.

<sup>39</sup> Ie oni monaidemo, erodatemo, naie eniruena uiñoñedicaí. Igobemo conillici illana ciodicaí. Nainomo jamai ebena sjiacadicaí.

<sup>40</sup> Ie jira lloelluna nainomo oni faionocaidicaí. Datarabe maiana suiñodicaí. Vela aifimo sebiñnoticai. Monaillai fuemo enirue dine jai jaidicai.

<sup>41</sup> Iemei jaiciridifomo ridicai. Eniruemo jodate. Bote muido eniruemo jaiare jodate. Eo baguamona jillaci taicosite.

<sup>42</sup> Naimaci iamona jillobi raillano, soldaduaí llavecanona meineiacadimaci.

<sup>43</sup> Pablona jillotaiacana jira, capitán iena rairuide. Llote:

—Nano íana uiñotino diese monaillaimo ana daia. Eniruemo jai.

<sup>44</sup> Jiaíno bote ie rabicido juicaída ícana jai. Jiaíno bote ie raruiaído juicaída ícana jai. — Iese eniruemo nana marena ridicai.

## 28

### *Maltamo naimaci illa rafue*

<sup>1</sup> Jai cai jillua mei, Malta railla uiasimo cai illana uiñoticaí.

<sup>2</sup> Nainomo ite comini caina marena feiñotimaci. Iraina bonotatimaci. Noci deilla jira, rosirena jira, irai ecimo agaillena caina uaidotimaci.

<sup>3</sup> Pablo reiena ua mei, iraimo jonete. Joniamona, jaijo usirenamona, reigaimona jino bite. Naimiena ainide.

<sup>4</sup> Jaijo naimie onollido lliillana Malta comini ciuano, coniniri ñaitimaci:



—Níbai bimie comena meinetimie. Monailaimona jillobide; iadedi jai bu naimiemo ibadi oga.

<sup>5</sup> Jaiona ciuanona, Pablo iena iraimo dotade. Iemei naimiemo jaca bue isoide rafue suiñede.

<sup>6</sup> Comeciaina facadimaci: “Naimie onolli raire sirite. Iemei raire fiodaite”. Are sedaja mei, naimiedi jaca niese iñede. Ie jira dane comeciaina facajano raitimaci:

—Naimiedi níbai Jusiñamui.

<sup>7</sup> Naie illanomona uiasi illaíma enirue iaire ite. Naimie mamecidi Publio. Caina marena feiñote. Darui amani ie jofomo caina marena itatate.

<sup>8</sup> Publio moo duide biide. Abi cuaride. Jeraina feide. Ie jira naimie dine Pablo jaide. Jusiñamuimo jia mei, ie onolli naimiemo joniano, naimiena jillotate.

<sup>9</sup> Bie rafue suilla jira, naimie dine nana uiasimo ite duidino bi-bidimaci. Naimacina jillotate.

<sup>10</sup> Ie jira caimo iobillacinona eo fecadimaci. Cai oni jaiadedi, cai jitailla ra caimo fecadimaci.

#### *Romamo Pablo rilla rafue*

<sup>11</sup> Daje amani fivui illa mei, Alejandriamona bite botedo jaidicai. Naie uiasimo nana rollime facaiseconi naie bote ite. Mena jusiñamui iaimaijai joreño bote muidomo ite. Damie Cástorna mameciredo. Jiaimie Póluxna mameciredo.

<sup>12</sup> Naie botedo oni cai jaillanona, Siracusamo sijidicai. Darui amani nainomo iticai.

<sup>13</sup> Nainomona jaillano Regiomo sijidicai. Darui illa mei, aifi beici dinena billa jira, ie areruido Puteolimo ridicai.

<sup>14</sup> Sijia mei, nainomo creyentiaína baiticai. Naimaci diga siete digarui cai illana jitaidimaci. Ie mei Roma dine jaidicai.

<sup>15</sup> Romamo nia cai riñenia, nainomo ite creyentiaí cai billana fididimaci. Cai dine bitimaci. Foro de Apio railla nairaimo damierie bitimaci. Jiaíno Tres Tabernas railla nairaimo bitimaci. Naimacina cuano, Pablodi Jusiñamuimo iobillacino fecade. Ie comecina jiai ocuiñote. Cai diga Romamo jaidimaci.

<sup>16</sup> Romamo cai ria, capitán llavecanona ie illaimamo fecade. Cárcelmo Pablona naie illaíma oreñede; iadedi Pablo ie ibauiga jofomo eneno oni orede. Aisií raillano, daje soldado nainomo naimiena sedade.

#### *Romamo Pablo llofuia rafue*

<sup>17</sup> Darui amani illa mei, Pablo Romamo ite nanoca judiuaína uaidote. Danomo ofilla mei, naimacimo llote:

—Caimaci, jaca buena cai cominimo finoñedicue. Cai einamaci llogacinuaina jaca iñoticue;

<sup>18</sup> iadedi Jerusalémo cuena gaitajano, romanuai nairai cominimo cuena fecadimaci. Romanuai nairai comini cuemo jicanua mei, cuena marena oretaiacade, fiodaillafue cuemo iñena jira;

<sup>19</sup> iadedi judiuaí: “Dama ite” railla jira, cai nanoca illaíma dine jaillena jicanoticue; iadedi cue nairai diga jaca iciriñedicue.

<sup>20</sup> Omoi diga ñaillena, omoína cioacadicue. Fiodaillamona ico comini jillollena cue llofuecabilla jira, bie lloeo diga maigacue.

<sup>21</sup> Uai otimaci:

—Judeamona jiaíno ona cuega cartana jaca feiñoñedicai. Caimo o rafuena llollena, jaca buna biñede. Bene jaca bu ona jeare ñaiñede.

<sup>22</sup> Ie jira omona naie rafuena cacaacadicai. Naga illanomo comini o llofuiana uaitajana uiñoticai. Creyentiaína jeare ñaitimaci. Iena fididicai. Ie jira caimo iena raise llono.

<sup>23</sup> Naimie dine dane billiruina llotimaci. Ie mei ailluena comini naimie jofomo bitimaci. Naimie anamo naimaci illana Jusiñamui jitailla jira, Jusiñamui dibeimo naimaci comeCIAI iuaina meiduana llofue. Moisés micori llogacinuaimona, Jusiñamui facaina lloraíni micoriai cuegafuaimona, Jesúna llofue.

<sup>24</sup> Jiaíno naimie llofuiana iñoticue. Jiaíno iñofedimaci.

<sup>25</sup> Nana naimaci comeCIAINA daje isoi lloíñedimaci. Iemona oni jaidimaci. Nia jaiñenia, naimacimo Pablo llote:

—Jusiñamui Joreñodi Isaías micorína cai usumatiaímo raise llotatate. Omoi usumatiaí micoriaí illa isoi nia itomoi. Isaías micoridi omoína jai cuega rafue jai suide. Naimie micori cuete:

<sup>26</sup> Jusiñamui llote: “Bie comini dine mai jai.

Llono: ‘Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

<sup>27</sup> Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaiñedomoi.

Jai uisidomoi isoidomoi. Siño rafuena jai cioiacaiñedomoi. Iena jai uifioiacaiñedomoi.

Cue dibeimo iacaiñedomoi, omoina cue jilloitai raillanona' ”.

<sup>28</sup> Jusiñamui rafuena omoi iinoñena muidona, judíuaidiñedinodi Jusiñamui naimacina jilloitaiacanana jai fididimaci. Naimaci iena cacareitimaci.

<sup>29</sup> Iese naimie llua mei, judíuaidi coniniri siadocana abido jaidimaci.

<sup>30</sup> Mena años Pablo ie jofomo ite. Ie illa dinori naie jofona ibauide. Nainomo nana naimie dine bite cominina feiñote.

<sup>31</sup> Naimie anamo naimaci illana Jusiñamui jitailla jira, Jusiñamui dibeimo naimaci comeciai iuaina meiduana llofujete. Marefodo llofujete. Naimiedi cai Nama Jesucristo rafuena llofujete. Jaca budi naimie llofuiana rairuiñede. Teofilo, jaca digacino omo jai lloticue. Mai. Lucadicue.

## ROMAMO ITE CRISTONA HNOTINOMO PABLO ORETAGA RABE

### *Romamo ite creyentiaimo Pablo cartana orede*

<sup>1</sup> Romamo ite creyentiai, omoi dine cartana oredicue. Pablodícue. ¿Nigacino? Jesucristo dibeimo maijidicue. Jusiñamui fetocamiedicue. Ie mare rafuena cue lllollena, cuena orede.

<sup>2</sup> Jusiñamuidi naimie facaina llloraini micoriaido bie rafuena jaie llote. Naimaci micoriai iena jaie jiai cuega. Iemona birui facacabidicai.

<sup>3</sup> Bie rafuedi Jusiñamui Jitona llote. Naimie jaie ite usumadi cai illaïma David micori.

<sup>4</sup> Naimie Jusiñamui Jitonana uiñotícaï. Jusiñamui Joreñodi siño rafuedo caina iena uiñotade. Jusiñamui Jito fiodaïllamona, Jusiñamuidi ie Jitona jillotate. Jusiñamui Jitodi Jesucristo. Cai Nama.

<sup>5</sup> Caina duenaïllanona, caina oretate, naga nairaïaina naimïena ïnotallena, naimïena naimaci iobitallena.

<sup>6</sup> Naimacimona itomoi. Naimïemo omoi duïllena, Jesucristo omoïna jai fetode.

<sup>7</sup> Romamo ite creyentiai, Jusiñamui isiruiganodomoi. Naimie isoi mareuidinona omoi illena, fetocanodomoi. Cai Moo Jusiñamui, cai Nama Jesucristo diga, omoïna duenaite. Iena uiñocana mai omoi jai. Iaiïmaïaï omoïna uri jai itatatiïaïmaïaï. Iena omoi uiñocana mai omoi jai.

### *Roma dine Pablo jaiacade*

<sup>8</sup> Diga comini, diga illanuaimo, Jesucristona omoi ïnuana jai fididimaci. Ie jira nano dofoconi omoi facaina Jesucristomo iobillacinona fecaacadicue, Jusiñamuïmo iena naimie fecallena.

<sup>9</sup> Jusiñamuïmo cue jïïa, omoïri jïidicue. Jusiñamui iena uiñote. Naimie Jito rafuena cue lluanona, cue comecimona naimïena sedadicue.

<sup>10</sup> Jusiñamuïmo cue jïïa, naimïemo jicadicue, cuena canollena. Naimie jitaïa, omoi dine ja muidomo cue riitícue. Iena jicadicue.

<sup>11</sup> Omoïna eo cioacadicue. Jusiñamui Joreño uai cuemo illamona, omoi comeciaina ocuiñotaiacadicue.

<sup>12</sup> Jesucristona omoi ïnuamona, naimïena cue ïnuamona, coninina cai comeciaina ocuiñotaiticai.

<sup>13</sup> Cue amatiai, diga icaïño omoi dine jaiacadicue. Iena omoi uiñuana jitaïdicue. Jaiacadicue; iadedi nia jainidicue. Cuemona Jesucristo rafuena cacajamona, dajerie jiaïe nairaïaï jai ïnotimaci. Omoi dine Jesucristo rafuena lluaïacadicue, iena omoïmona dajerie ïnollena.

<sup>14</sup> Nana comini dine Jusiñamui oretagacue. Ie jira griego uaido ñaitinomo Jesucristo rafuena lloiacadicue. Griego uaido ñaïñedinomo iena jiai lloiacadicue. Abina uiñotinomo iena lloiacadicue. Abina uiñoñedinomo iena jiai lloiacadicue.

<sup>15</sup> Ie jira omoïmo Jesucristo rafuena eo lloiacadicue.

### *Jesucristo rafue siño*

<sup>16</sup> Jesucristo rafueri iobidicue. Naie rafuedi siño. Jusiñamuidi naga iena ïnotinona naimaci jeacinomona jillotate. Judíuaidino nano iena cacadimaci. Ie mei judíuaidinedino iena jai cacadimaci.

<sup>17</sup> Naie rafuemona Jusiñamui caina feiñuana uiñotícaï. Jusiñamui caina marebicaitjana uiñotícaï. Naimïena cai ïnuamona iena uiñotícaï. Jusiñamui facaina llloraïma micori jaie cuega: “Jusiñamuïna ïnuamona marebicaidimiedí Jusiñamui dibeimo ico jaca iite” cuega.

### *Comini jeacinona fnoïadedi, dani naimaci muidona*

<sup>18</sup> Nana Jusiñamuïna jitaïñedinodi naimie duere finollifue anamo jai itimaci. Iena uiñotícaï. Jusiñamui caina iena uiñotade. Maraiñede rafue naimaci finuanona, Jusiñamui ie uanaïcinona jamaïdimaci.

<sup>19</sup> Jusiñamui naimacina naimïena uiñotaja muidona, imaci comeciïmona Jusiñamui illana uiñotimaci.

<sup>20</sup> Enirue finua facaïsemona naimie finoca ramona naimie illana uiñotimaci. Naimïena cionidimaci; iadedi naimie finoca ramona naimïena uiñotimaci. “Naimïena uiñotimaci” omoi raia, naimiedí bu. Naimie uai jaca siñonana uiñotimaci. Ie jira: “Jusiñamuïna uiñoñedicaï” rainidimaci.

<sup>21</sup> Jusiñamui uiñotimaci; iadedi naimie uaina ñnoñedimaci. Naimiemo começiaina facañedimaci. Naimiemo iobillacinona fecañedimaci; iadedi ebena começiaina facacabidimaci. Naimaci começiiai jai tainomo ite isoide. Jai marebificañedimaci.

<sup>22</sup> “Abina uiñoticaï” raitimaci; iadedi abina uiñoñedimaci. Jamai ebe isoidimaci.

<sup>23</sup> Jusiñamui jaca ite. Naimie uai siño. Naimiëna sedaçañedimaci; iadedi jiaie rana sedaacadimaci. Fiodairuide ñmana eruaide jiraraina finodimaci. Ofomana eruaide jiraraina finodimaci. Ocainana eruaide jiraraina finodimaci. Jaona eruaide jiraraina finodimaci. Naie isoide jiraraina sedauidimaci.

<sup>24</sup> Ie jira Jusiñamui naimacina faïnocaide, naimaci jitailla jearede rafuena imaci finollena. Ie mei conini diga eo meirede rafuena finouidimaci.

<sup>25</sup> Jusiñamui ie uanaicinona jitañedimaci. Uanañedicinodo jaidimaci. Jusiñamui finoca rari iobidimaci; iadedi naie rana finodimieri iobiñedimaci. Ero, daní Jusiñamuimo iobillacinona jaca cai fecacabillasa. Uanaicinona lloticue.

<sup>26</sup> Iese naimaci illa jira, naimaci jitailla meirede rafuena finollena, Jusiñamui naimacina faïnocaide. Coniñona aifuedotimaci.

<sup>27</sup> Naimaci jitailla jira, conimana aifuedotimaci. Naimaci marañede finoca rafuëmona duere sefuillemona ibana feiñotimaci.

<sup>28</sup> Jusiñamuina naimaci uiñoiacañena jira, marañede rafuëmo naimaci começiiai facallena, Jusiñamui naimacina faïnocaide. Naimaci finorainiga rafuëina finocana jaidimaci.

<sup>29</sup> Naga isoide marañedicinona finouidimaci. Naga isoide jearedicinona finouidimaci. Jiaie comini rana nicidoudimaci. Jiaie cominina duere finouidimaci. Jiaima raconi uradoisoidimaci. Cominina jaca meinetimaci. Fuiriruidimaci. Jiferisoidimaci. Jiaie cominina jeare finouidimaci. Eo ñaillaredimaci.

<sup>30</sup> Jiaie comini joreña ñaoidimaci. Jusiñamuina jaca gañnedimaci. Cominina jeare ñaoidimaci. Abina iedoudimaci. Abina biruidimaci. Diga jearede rafuëmo começiaina facauidimaci. Naimaci moo uaina ñnorainidimaci. Naimaci ei uaina ñnorainidimaci.

<sup>31</sup> Ebena itimaci. Naimaci lloga uaina finorainidimaci. Jiaie cominina isiruirainidimaci. Naimacina jiai dueruirainidimaci. Iese jaisoidimaci. Iese ñia jaicabidimaci.

<sup>32</sup> Jusiñamuidi jaië lloite: “Bie isoide rafuena finodino iraimo jaca duere sefuitimaci. Cue illanomo jaca iñeitimaci” lloite. Jusiñamui lluaña uiñotimaci; iadedi naie rafuena finocana jaidimaci. Iena jiaie comini finoiadedi, iobillanona, “Macai mare iese imaci finua” raitimaci.

## 2

### *Jusiñamuidi marañede rafuena finodina duere finoite*

<sup>1</sup> Ero, omoi judúuaimona damie começiina ñibai facade: “Bie isoide marañede rafuena finoñedicue. Iena finuamona, jiaie comini Jusiñamuimona duere sefuitimaci. Cue duere sefuiñeiticue” raillamo naimie começiina facade; iadedi naie isoide marañede rafuena naimie finua jira, Jusiñamui naimiëna jiai duere finoite.

<sup>2</sup> Jusiñamuidi uanaicinona uiñuamona, marañede rafuena finodimëna duere finoite. Iena uiñoticaï.

<sup>3</sup> “Jusiñamui duere finollicino anamona jilloñeitimaci” começiina facade. Naimacimo o começiina o facaja isoi, naimaci isoi o finua jira, Jusiñamui ona jiai duere finoite.

<sup>4</sup> Ona naimie duenaillamona, ona naimie duere finoacañellemona, o começimo iticino marecinona meiduana naimie jitaide. Naimie dibeimo o illana naimie jitaide. Naiëna jamaiñeno.

<sup>5</sup> O começi jaiairena jira, o começi Jusiñamui dibeimo meidoiacañedio. Ie jira ico eo duere sefuitio. Ie ricaiñefuëmona Jusiñamuidi nana naimiëna ñnoñedinona duere finoite. Iena Jusiñamui finoa, Jusiñamuimona mare.

<sup>6</sup> Nagamiiai imaci finua ille ñinori Jusiñamui naimacina duere finoite.

<sup>7</sup> “Mare rafuena finocana jaidino cue illanomo jaca iitimaci” lloite. Naimaci naimie isoi ebire iacania, naimiëmona iobillacino naimaci jitaia, naimie illanomo naimaci jaca iacania, iese Jusiñamui lloite.

<sup>8</sup> Marañede rafuedo jaidino Jusiñamui duere finollicino anamo iitimaci. Dani imaci abina isiruitimaci. Uanaicinona ñnoñedimaci.

<sup>9</sup> Jusiñamui naga jeacinona finodimëna eo duere finoite. Judúuai comini ua duere finoite. Judúuaiñedinomo cominina jiai duere finoite;

<sup>10</sup> iadedi Jusiñamuidi naga mare rafuedo jaidimëna ebire itataite. Iobitaite. Uri itataite. Judúuaimo iese ua finoite. Judúuaiñedinomo iese jiai finoite,

<sup>11</sup> naga nairaina daje isoi naimie finua jira.

<sup>12</sup> Judíuafiñedinodi Moisés micori llogacino anamo iñedimaci; iadedi jeacinona naimaci finua jira, Jusiñamui naimacina duere finoite. Judíuafi Moisés micori llogacino anamo itimaci; iadedi iena naimaci ñnoñena jira, jiaí jaca daje isoi duere sefuitimaci.

<sup>13</sup> Moisés micori llogacinona cacajamona, Jusiñamuimona jaca buna marebicaiñede; iadedi iena ñnuamona marebicaide.

<sup>14</sup> Judíuafiñedinodi Moisés micori llogacino anamo iñedimaci; iadedi naimaci comeciái facajamona, marecinona finuana uiñotimaci. Marecinodo jaillana jiaí uiñotimaci.

<sup>15</sup> Moisés micori llogacino anamo naimaci illa isoi, naimaci comeciáimona marecinona naimaci finoiadedi, iena uiñotimaci. Ie jira maraiñedicinona naimaci finoiadedi, iena jiaí uiñotimaci.

<sup>16</sup> Biena llofuecabiticue. Ico Jusiñamui llua jira, Jesucristodi cominimo imaci comeciáimo iticinona juez isoi lloite. Maraiñedicinona finouidinomo duere finollicinona lloite. Marecinona finouidinomo duere finollicinona lloñeite.

*Moisés micori llogacinodo judíuafi comini raise jaiñedimaci*

<sup>17</sup> Abina iedeamona, omoimona damierie raitomoi: “Judíuafi imacidicai. Moisés micori llogacino anamo cai illa jira, duere finollicinomona jilloiticai. Jusiñamui cai diga ite” raitomoi. Iena omoi raillamona, abina iedotomoi.

<sup>18</sup> Naimie jitaiilla rafuena uiñotomoi. Moisés micori llogacinona omoi uiñuamona, marecinona finuana uiñotomoi.

<sup>19</sup> Jusiñamuina uiñofedinona llofueiacadomoi. Naimiēna naimaci uiñofēna jira, jitiñedinomo itimaci isoidimaci. Uanaicinona naimacimo omoi lluaamona, naimaci comeciaina llgaiñoiacadomoi. Naimacina uanaicinona uiñotaicadomoi.

<sup>20</sup> Jusiñamuina raise uiñofedinona llofueiacadomoi. Naimacina abina uiñotaicadomoi. Naimie rafuena nia raise uiñofedinona llofueiacadomoi. Moisés micori llogacinomo nana uiñuacino illa jira, naiemo uanaicino illa jira, iese iacadomoi.

<sup>21</sup> Jiaie cominina llofueiacadomoi; iadedi çniese omoi comeciáimo fueoiacaiñedomoi? “Rana fiñeno” llotomoi; iadedi fiñdomoi.

<sup>22</sup> Omoi aifiñede riño diga iñenana llotomoi; iadedi ie isoi finodomoi. Jusiñamuina eruaide jiraraina gaiñedomoi; iadedi naie ra illanuaimona naie jiraraina fiñdomoi.

<sup>23</sup> Moisés micori llogacinori abina iedotomoi; iadedi iena omoi ñnoñena jira, Jusiñamuina jeare finodomoi.

<sup>24</sup> Iena Isaías micori jiaie cuete: “Omoi muidona judíuafiñedinodi Jusiñamuina jeare ñaitimaci” cuete.

<sup>25</sup> Jusiñamui dibeimo jai omoi illana jiaie comini uiñollena, omoi abina detatatomoi. Moisés micori llogacinona omoi ñnoiadedi, omoi abina detatajadi mare; iadedi naicinona omoi ñnoñenia, abina detatañedino isoi jai itomoi. Jusiñamui dibeimo iñedomoi.

<sup>26</sup> Moisés micori llogacinona judíuafiñedino ñnoiadedi, naimaci abina detatañenia, Jusiñamuimona naimie dibeimo ite judíuafi isoidimaci; iadedi abina detatañedimaci.

<sup>27</sup> Moisés micori llogacinuaina uiñotomoi. Omoi abiaina detatatomoi; iadedi Moisés micori llogacinona judíuafiñedinodi ñnua jira, Moisés micori llogacinuai omoi ñnoñena jira, Jusiñamuimona omoi baifemo uaidimaci.

<sup>28</sup> Omoi jeiciamona Jusiñamui ua cominiñedomoi. Omoi abiaina detatajamona, Jusiñamui ua cominiñedomoi;

<sup>29</sup> iadedi omoi comeciái marena illamona, Jusiñamui ua cominidomoi. Abi detataja jira, Jusiñamui cominiñedomoi; iadedi omoi comeciái marena illa jira, Jusiñamui cominidomoi. Raise naimiēna ñnotinodi cominimona iobillacinona feiñuana jitaiñedimaci; iadedi Jusiñamuimona iobillacinona jitaidimaci.

### 3

<sup>1</sup> Bie cartana omoi feiñuana, iena facallemona, damierie comecina facaite: “Judíuafidicai; ia naiemona, çniese jiaie comini baifemo faiticai? Cai abiaina detataticai; ia naiemona jaca buena ofēdicai”.

<sup>2</sup> Ie jira omoimo lloiacadicue: “Judíuaina cai illana eo mare”. Jusiñamuidi dani caimo ie rafuena llote. Jiaie cominimo lloñede.

<sup>3</sup> Cai cominimona dajerie Jusiñamui rafuena ñnoñedimaci; iadedi Jusiñamuidi ie lloga rafuena jaca finode.

<sup>4</sup> Comini tainona llotimaci; iadedi Jusiñamuidi uanaicinona jaca llote. David micori iena jiaie llote:

O lloga uaimona uanaicinona o llouillana uiñoticiái.

O finoca rafuena jiaie comini uaitaía, o dinena jaca anafenodio.

Iena uiñoticiái.

<sup>5</sup> Dane damierie comecina facaite: “Jusiñamuidi mareuidimie. Cai baifemo uaide. Cai marañediciona cai finuamona caina Jusiñamui jitaia, jiaie cominidi Jusiñamui jaca mareuillana uifnotimaci. Cai illa muidona Jusiñamuina iese uifnotimaci. Ie muidona naimiedi cai jeacino facaina caina duere finoñena, jiaie cominina naimiena cai uifnotaja jira”. Omoimona iese dajerie comeciaina facadimaci;

<sup>6</sup> iadedi iese ifede. Cai jeacino facaina caina duere finoñeniadedi, Jusiñamuidi jiaie cominina jiai duere finonite.

<sup>7</sup> Taino cue lloia, iena naimie oni dotaia, naimiedi mare rafuena finuana cominidi uifnotimaci. Ie mei naimiemo iobillacinona fecadimaci. Ie muidona Jusiñamui cue jeacino facaina cuena duere finoñena.

<sup>8</sup> Omoimona dajerie cuena ñaitimaci: “Bimie raite: ‘Jusiñamui marecinona finuana raise cai uifnollena, marañediciona finocana cai jailla’”. Iese cue lloñena jira, Jusiñamui naimacina duere finoia, cuemona mare.

*Jeacinona nana cai finodicaí*

<sup>9</sup> Judíuaidicaí; iadedi jeacinona nana comini finua jira, jiaie nairai baifemo faifedicaí. Judíuaidicaí; iadedi jeacinona finodicaí. Judíuafinedinodi jeacinona jiai finodimaci.

<sup>10</sup> Jusiñamui facaina lloraini micoriai iena jaie cuete:

Marebicaidino jaca ifede. Nana comini marañedimaci.

<sup>11</sup> Jaca buna Jusiñamuina raise uifnoñedimaci. Naimiena raise uifnoiacaifedimaci.

<sup>12</sup> Mare rafuedo nana jaiñedimaci. Marañediciona finooidimaci.

Jaca buna marecinona finoñedimaci.

<sup>13</sup> Jeare ñaicabitimaci. Tainona llocabitimaci.

Naimaci ñaiamona diga jearede rafue comuicabide.

<sup>14</sup> Naimaci fuiai eo borede.

<sup>15</sup> Icirillamona jiaie cominina raire meinetimaci.

<sup>16</sup> Níne naimaci jaia, diga marañede rafuena comuitatimaci.

<sup>17</sup> Uri illana uifnoñedimaci.

<sup>18</sup> Jusiñamuina jacirufinedimaci

jaie iese cuete.

<sup>19</sup> Jusiñamui facaina lloraini micoriai lloga uaidi naie lloga uai anamo itinomo duide. Naie lloga uai naimaci uifnuamona, dani abi imaci riidolle uai ifede. Nana comini Jusiñamui duere finollicino anamo itimaci. Iena uifnoticaí.

<sup>20</sup> Moisés micori lloga uaina inuamona, Jusiñamui jitailla isoi, jaca buna marebicaiñeite; iadedi naie lloga uaina cai uifnuamona, jeacinona cai finuana uifnoticaí.

*Jesucristona cai inuamona jillobidicaí*

<sup>21</sup> Jusiñamuidi birui caina marebitatajana jai uifnotade. Moisés micori lloga rafuedo iena birui uifnoñedicaí; iadedi Moisés micori iena jaie llote. Jusiñamui facaina lloraini micoriai iena jiai llotimaci.

<sup>22</sup> Jesucristona cai inuamona, Jusiñamuidi caina marebicaitate. Nana Jesucristona inotinona marebicaitate. Nie isoide cominina cai ia, caina marebicaitallena, caina daje isoi feifnoite.

<sup>23</sup> Nana caidi jeacinona finodicaí. Jusiñamui caina jitailla isoi, marena ifedicaí.

<sup>24</sup> Caina naimie duenailamona, naimie jitailla jira, Cristo Jesúsna cai inuamona, caina marebicaitate.

<sup>25</sup> Jesucristo nia biñena facaise ite cominimo jeacino facaina Jusiñamuidi ibana ofede. Naimaci jeacino facaina Cristo Jesús fiodaillena, cai facaina naimie fiodaillena, Jusiñamui naimiena oretate. Naimiena birui cai inoia, caina duere finoñeite. Jusiñamuina mareuidimiena uifnoticaí.

<sup>26</sup> Naimiena iese oretajamona, Jesúsna inotimiena Jusiñamuidi marebicaitaja jira, Jusiñamuina mareuidimiena uifnoticaí.

<sup>27</sup> Cai jeacinomona marena cai illena, buena finoñedicaí. Ie jira cai finuamona abi iedoñedicaí. Buena finoñedicaí; iadedi Jesucristona cai inuamona, jillobidicaí. Ie jira cai finoca rafueri abina iedoñedicaí.

<sup>28</sup> Moisés micori lloga uaina cai inuamona, marebicaiñedicaí; iadedi Jesucristona cai inuamona marebicaidicaí.

<sup>29</sup> Jusiñamuidi dani judíuái imaci Mooñede; iadedi naimiedi nana comini imaci Moo.

<sup>30</sup> Cai Moodi jaca damiena jira, naimiena naimaci inua jira, judíuaina marebicaitate. Naimiena naimaci inua jira, judíuafinedinona jiai marebicaitate.

<sup>31</sup> Cai inuamona cai marebicaiilla jira, Jusiñamui facaina lloraini micoriai jaie lloga uaina caitañedicaí; iadedi iena ua inocana jaidicaí.

## 4

*Abraham micorimona fueoticaí*

<sup>1</sup> Abraham micorí rafuena ja ñaiacaducue. Naimie marebicailafuena omoimo lloiacadicue.

<sup>2</sup> Ie finoca rafuemona naimie micorí marebicaidena, naimie micorí abina iedote; iadedi ie finoca rafuemona naimie micorí marebicaiñede. Ie jira Jusiñamuimona naimie micorí abina iedoicaiñede.

<sup>3</sup> Iena Moisés micorí jaie cueda: “Jusiñamuina Abraham micorí ñnua jira, Jusiñamuidi naimie micorína jeacinona jaca finoñedimiena isoitate. Naimie micorína marebicaitate” cueda.

<sup>4</sup> Maijillena buna damie ocuiadedi, ibajana jamai fecañeite; iadedi maijia facaina fecate.

<sup>5</sup> Ero, ie maijiamona jaca bu jeacinona jaca finoñedimiena isoicaiñede. Jusiñamuina naimaci ñnua jira, Jusiñamuidi marañedinona marebicaitate.

<sup>6</sup> Bie rafuena David micorí jiai jaie cueda:

Ie maijiamona bu marebicaiñena jira, Jusiñamui marebicaitagamiedi iocire iite.

<sup>7</sup> Naimaci marañedinona Jusiñamui dotajamona, iocire iitimaci.

Jusiñamui naimaci jeacinona dane abido ietañeite.

<sup>8</sup> Naie jeacinomo Jusiñamuidi comecina dane facañeite.

Naimiedi jai feitaite.

Ie jira iocire iitimaci.

<sup>9</sup> Dani abina detatatinó iocire illena lloñede; ia abina detatañedinomo iena jiai llote. Jusiñamuina Abraham micorí ñnua jira, Jusiñamui naimiena marebicaitate.

<sup>10</sup> Naimie micorí abina ña detatañena, naimie micorí marebicai.

<sup>11</sup> Naimie micorí marebicaila mei, Jusiñamui dinena Abraham micorímo abi detatajana llote. Abraham micorí ie abina detatajamona, Jusiñamuina naimie micorí ñnuana uifoticaí. Ie abina detatajamona, judío imiena jai jaide; iadedi Jusiñamuina ñnuamona, naimie micorí marebicai. Ie jira Abraham micorí nana Jusiñamuina ñnotino moo. Nana comini abiana detatañedinaci; iadedi naimaci ñnua jira, Jusiñamui naimacina marebicaitate.

<sup>12</sup> Cai comini abiana detatitimaci; iadedi cai moo Abraham micorí isoi naimaci ñnua jira, Abraham micorí isoi marebicaidimaci. Ie jira Abraham micorí nana naimaci moo.

*Abraham micorí ñnuamona, Jusiñamui lloga uaidi suide*

<sup>13</sup> Abraham micorímo Jusiñamuidi: “Nana enirue omo iiticue” llote. “O uruaímo iena jiai iiticue” llote. Moisés micorí llogacinona Abraham micorí ñnua jira, iese Jusiñamui lloñede; iadedi Jusiñamui lloga uaina Abraham micorí ñnua jira, iese Jusiñamui llote. Abraham micorí ñnua jira, Jusiñamuidi naimiena marebicaitate.

<sup>14</sup> Moisés micorí lloga uaina ñnotinomo: “Nana eniruena omoimo iiticue” Jusiñamuidi llotena, Jusiñamuina ñnotino tainona ñnotimaci. Jusiñamui lloga uai jiai jai saide; iadedi iese iñede. Dani naimiena ñnotinomo: “Nana eniruena omoimo iiticue” llote.

<sup>15</sup> Moisés micorí lloga uaina naimaci raise ñnoñena, Moisés micorí lloga uaido jaidino Jusiñamui ricaiillifue anamo itimaci; iadedi Moisés micorí lloga uai iñedena, Jusiñamuimona buna duere sefuiñeite.

<sup>16</sup> “Eniruena omoimo iiticue” naimiena ñnotinomo Jusiñamuidi llote. Duenaillamona llote. Nana Abraham uruai micoriaímo iena llote. Dani Moisés micorí lloga uaido jaidinomo lloñede; iadedi Abraham isoi ñnotinomo jiai llote. Abraham micorí isoi cai jailla jira, naimiedi cai moo.

<sup>17</sup> Jusiñamui iena jaie llote: “Ona diga nairai imaci moona jai itataiticue” llote. Jusiñamui fiódaitinona jilloitarede. Ña iñede rana ie uaido jai comutate. Ie jira Jusiñamui Abraham micorímo llua isoi, suide. Jai fiódaitino illa isoi Abraham micorí abi illa jira, Jusiñamui naimie abina mairitate. Ie ai onifíomo urue comuillena llote.

<sup>18</sup> Jusiñamui Abraham micorímo jiai llote: “Ailluena uruai omo iite. Diga nairai omona jebuite” llote. Abraham micorí naie ñnorainiga rafuena ñnote.

<sup>19</sup> Jaca ñnote; iadedi cien años naimie micorímo illamona, naimie jai eeiroma. Naimie micorí aidi, Sara micorí, onifíona jira, nairaiño uruedi comuiñede.

<sup>20</sup> Abraham micorí Jusiñamui llua ñnote. ñnocana jaillano, iobillacinona Jusiñamuimo fecade.

<sup>21</sup> Abraham micorí Jusiñamui lloga uaina ñnuana eo ñnote.

<sup>22</sup> Ie jira Jusiñamui naimiena marebicaitate.

<sup>23</sup> Naie rafue jaie cueda; iadedi dama Abraham micorímo duiñede;

<sup>24-25</sup> iadedi caimo jiai duide. Jusiñamuina ñnotinona marebicaitate. Cai Nama Jesús fiódaillamona, Jusiñamuidi naimiena jillotate. Cai jeacino facaina fiodaite. Caina marebicaitallena, naimiena jai jillotate.

## 5

*Jai cai marebicaidicai*

<sup>1</sup> Jusiñamuina cai ñnuamona cai marebicaila jira, Jusiñamui diga uri iticai. Cai Nama Jesucristo finoca rafue muidona, Jusiñamui diga uri iticai.

<sup>2</sup> Jesucristo muidona Jusiñamui caina duenailamona, caina marebicaitate. Naimie ebirena isoi cai illemo caimare ocuridicai;

<sup>3</sup> iadedi duere cai sefuialedi, jai iobidicai. Duere sefuillamona, cai comeciai ocuiñocana cai jaillana uifotocai.

<sup>4</sup> Cai comeciai ocuiñuamona facacifidicai. Facacifillamona, Jusiñamuimo ocuridicai.

<sup>5</sup> Jusiñamui caina isiruilla jira, tainomo ocuriñeiticai. Ie Joreño caimo fecade. Ie Joreño cai comeciaino illa jira, ie Joreño Jusiñamuidi caina naimie caina isiruillana uifotade.

<sup>6</sup> Cai jeacinomona dani jillonidicaino, Cristo cairi fiodaite. Maraiñedicai; iadedi naie facaiseconi cairi fiodaite.

<sup>7</sup> Maraiñedimie facaina caimona jaca buna fiodaiacaiñede. Caimona nibai damie maremie facaina fiodaite; iadedi nana comini iese fiodaiacaiñedimaci. Maraiñedimie facaina jaca buna fiodaiacaiñede;

<sup>8</sup> iadedi nia maraiñedicaino, Jusiñamui caina isiruillamona, Cristo cairi fiodaite.

<sup>9</sup> Cristo cairi fiodaillamona, jai marebicaidicai. Ie muidona Jusiñamui caina duere finuacinomona Cristodi caina jillotaite.

<sup>10</sup> Cai dinena Jusiñamuina cai enolla facaiseconi naimie Jito cairi fiodailla muidona, ie Jito jillua muidona, Jusiñamui caina jai nabaide. Naimie caina nabailla jira, cai ico jilloillena raise uifotocai.

<sup>11</sup> Cai Nama Jesucristo muidona, Jusiñamui iobidicai. Cristo muidona Jusiñamui diga uri iticai.

*Adán micori finoca rafue*

<sup>12</sup> Bie rafue jai suide. Adán micori jeacinona finuamona, nana caino jeacinodi jai comuide. Jeacino caino illa muidona, cai jeacino ite diga nana fiodaicana jaidicai.

<sup>13</sup> Moisés micori llogacino nia iñenia, jeacinona finodimaci; iadedi Moisés micori llogacino nia iñenia, Jusiñamuidi jeacino facaina ibana oñede.

<sup>14</sup> Moisés micori llogacino nia iñenia, Adán micori facaiseomona Moisés micori facaiseomona naimaci jeacino ite diga nana comini fiodaicana jaidimaci. Adán micori isoi jeacinona finodimaci; iadedi fiodaicana jaidimaci. Adán micoridi Cristo isoiñede. Adán micori finoca rafuemona jeacino comuide. Cristo finoca rafuemona Jusiñamui cai jeacinona oni dotade.

<sup>15</sup> Adán micori finoca rafuedi Jusiñamui finoca rafue isoiñede. Adán finoca rafuemona cai jeacino ite diga nana cai fiodaicana jaidicai; iadedi Jusiñamui finoca rafue Adán micori finoca rafue baifemo faite. Jusiñamui jitailla jira, caina naimie duenailamona, cai dine Jesucristona orede, nana cai jilloillena.

<sup>16</sup> Dama Adán micori jeacinona finuamona, Jusiñamuidi nana caina duere finollicino anamo itatate; iadedi Jesucristo fiodaillamona, Jusiñamui jitailla jira, caina marebicaitate. Ailluena jeacinona finodicai; iadedi marebicaidicai.

<sup>17</sup> Dama Adán micori jeacinona finuamona, cai jeacino ite diga nana cai fiodaicana jaidicai. Jusiñamui caina eo duenailamona, Jusiñamui caina marebicailamona, dama Jesucristo muidona, Jusiñamui diga jaca iiticai.

<sup>18</sup> Dama Adán micori muidona, nana comini duere finollicino anamo itimaci; iadedi dama Jesucristo finoca mare rafuemona Jusiñamui diga naimaci jaca illena, nana comini marebicairedimaci.

<sup>19</sup> Adán micori Jusiñamuina ñnoñenamona, nana comini jeacinona finodimaci. Jesucristo Jusiñamuina ñnuamona, ailluena comini marebicaitimaci.

<sup>20</sup> Jusiñamui Moisés micorimo rafuena lloite. Iena comini ñnoñenamona, diga jeacinona naimaci finuana uifotimaci. Jeacinona finocana jaidimaci; iadedi Jusiñamuidi naimacina eo duenaite.

<sup>21</sup> Jeacino anamo jaie nana cai illa jira, cai jeacino ite diga fiodaicana jaidicai; iadedi Jusiñamui duenailacino anamo birui iticai. Ie jira cai marebicailamona, cai Nama Jesucristo muidona, Jusiñamui diga jaca iiticai.

## 6

*Jesucristomo cai duillamona, jeacino anamo jai iñedicai*

<sup>1</sup> Jeacino anamo jai iñedicai; iadedi omoimona damierie comecina facaite: “Naga icaiño jeacino cai finoia, caina Jusiñamui duenailamona, cai jeacinona oni dotade. Naimie caina



duenaicabillana raise cai uifollena, jeacino eo finocana jaiticai. Iemona cai jeacinona oni dotajamona, naimie caina duenaillana eo raise uifotitcai”.

<sup>2</sup> Iese comecina facañeno. Jeacino anamo jai cai ifiena jira, jeacinona finocana cai jaiifena.

<sup>3</sup> Biena uifotomoi. Cristo Jesús dibeimo cai illamona, nana caidi bautizagacai. Cristo fiodailla jira, cai comeциаimo ite jearedicino anamo jai ifedicai.

<sup>4</sup> Cristo fiodailla jira, raiafomo naimiena jonetimaci. Cristo fiodaillamona ie Moo uaido jillode. Naimie dibeimo cai illamona, cai jeacino anamona jillodici. Cai comeциаimo jiaie rafue birui illa jira, jiaie rafuedo jai jaidicai.

<sup>5</sup> Cristo fiodaite; iadedi naiemona jillode. Naimie dibeimo cai illanona, cai comeциаimo ite jearedicino anamona cai jillua jira, Cristo ie mare rafue anamo birui iticai.

<sup>6</sup> Cristo fiodailla jira, cai comeциаimo ite jearedicino anamo jai ifedicai. Caímo jai jainaiaifena jira, jeacino finocana cai jaiifena.

<sup>7</sup> Jeacino anamo jai cai ifena jira, jeacinona finocana cai jaiifena.

<sup>8</sup> Cristo fiodaite; iadedi jillode. Naimie fiodailla jira, cai jearedicino anamo jai ifedicai. Naimie jillua jira, jiaie rafuedo birui jaidicai.

<sup>9</sup> Fiodaillamona Cristo jillua jira, naimiedi dane fiodaifeite. Naimie fiodaitemo, cai jeacino facaina naimiedi jai fiodaite. Jai dane fiodaifeite.

<sup>10</sup> Jeacino facaina jeacinona oni dotallena, naimie daciaño fiodaite; iadedi ie Moona jaca iobitajanona, naimie ie Moo dibeimo jaca iite.

<sup>11</sup> Ie jira jeacino anamo ifenanomo omoi comeciaina faca. Cristo Jesús dibeimo jai omoi illanona, Jusiñamui jitailla rafuena finollemo omoi comeciaina faca.

<sup>12</sup> Jeacinona finocana jaiifeno. Omoi comeciái jeacinona finoancia, iena ifinoñeno.

<sup>13</sup> Jeacinona omoi finoñellena, omoi comeciaina ocuiño. Mare naimie jitaillacinona omoi finollena, Jusiñamuina ifino. Jeacino anamo jaiie omoi illa jira, naimiemo omoi nia duiifena jira, Jusiñamuimona fiodaitino isoidomoi; iadedi jeacino anamo birui omoi ifena jira, naimiemo omoi jai duilla jira, Jusiñamuimona fiodaillamona jai jillodino isoidomoi. Jaiie naimiemo duiñedomoi; ia birui naimiemo jai duidomoi.

<sup>14</sup> Moisés llogacinuai anamo omoi jai ifena jira, jeacino anamo jai ifedomoi. Jeacinona finocana omoi jaiifellena, Moisés micori llogacinodo jaiñedomoi; iadedi jeacino omoi finoñellena, omoína Jusiñamui duenaillamona, naimie omoína birui canocabide.

#### *Patrón anamo itinomona cai fueolle*

<sup>15</sup> Moisés micori llogacino anamo jai ifedicai; iadedi omoiimona damierie comecina facade: “Moisés micori llogacino anamo cai ifenamona, jeacino cai finoia, Jusiñamui caina duere finoifeite”. Iese comecina facañeno. Jeacinona finocana cai jaiifena.

<sup>16</sup> Biena uifotitcai. Patrón anamo bu ia, ie patrón comeci jitailla rana finode. Ie ocuica rana ifinote. Ie isoide. Jeacino anamo omoi ia, jeacinona finocana jaidomoi. Jeacino omoi finuamona omoi jeacino ite diga fiodaicana jaidomoi. Ie jira Jusiñamui illanomo ico ifeitomoi. Jusiñamui anamo omoi ia, Jusiñamui jitailla rafuena finocana jaidomoi. Naimie illanomo ico itomoi.

<sup>17</sup> Jeacino anamo jaiie itomoi. Iemei omoiimo jiaie comini Jesucristo rafuena jai llotimaci. Iena cacajanona, iena raise ifinotomoi. Ie jira Jusiñamuimo iobillacinona fecadicue.

<sup>18</sup> Jeacino anamona jai jillobillamona, marecinona finocana jai jaidomoi.

<sup>19</sup> Cue llwana omoi raise cacaillena, bie isoide rafuena lloticue. Omoi comeciái railla jira, jeacinona navui finodomoi. Maraiñedicinona finocana navui jaidomoi. Cristo dibeimo omoi jai illa muidona, marecinona omoi finocana birui mai omoi jai. Iese omoi jaillamona, omoi comeciái Jusiñamui jitailla isoi marena itomoi.

<sup>20</sup> Jeacino anamo navui omoi ia, Jusiñamui jitailla isoi, marecinona finoñedomoi.

<sup>21</sup> Jeacinona navui omoi finuamona mare rafuena ofedomoi. Ie jira iena birui meiruitomoi. Jeacinona finocabidino fiodaillamona, Jusiñamui illanomo ico ifeitimaci.

<sup>22</sup> Jeacino anamona jai jillobidomoi. Jusiñamui anamo omoi jai illa jira, naimie ocuica rafuena finodomoi. Iena omoi finuamona, Jusiñamui jitailla isoi, marecinona finocana jaitomoi. Ja muidomo naimie diga itomoi.

<sup>23</sup> Jeacinona finocana omoi jaiie, omoi jeacino ite diga fiodaitomoi. Jusiñamui illanomo ico ifeitomoi; iadedi cai Nama Jesucristona omoi ifinuamona, Jusiñamuidi omoína jaca itataite. Naimie illanomo ico itomoi.

## 7

#### *Inireda riñomona cai fueolle*

<sup>1</sup> Cue amatiai, Moisés micori llogacinuaina uifotomoi; iadedi iena nia raise cacaiñedomoi. Ie fiodailla mei, jaca buna Moisés micori llogacinuai anamo ifede. Ie fiodailla mei, jai ifena jira, nainomo duiñede.

<sup>2</sup> Ie isoide. Nana naimie ille ðinori, inirede riño ie inimo duide. Iese Moisés micori jaie llote. Ie ini fiodailla mei, ie inimo jai duiñede. Naimie anamo naiñaiño jai iñena jira, jaiamiena naiñaiño oia, ie inina illena, Jusiñamui mona mare.

<sup>3</sup> Ie ini nia fiodaiñenia, jaiamie diga naiñaiño ia, ie ini abimo jeacinona jai finode, Moisés micori lloga uai naiñaiño inoñena jira. Ie ini fiodailla mei, naimie anamo naiñaiño jai iñena jira, jaiamiena ie inino naiñaiño oia, jeacinona jai finoñede.

<sup>4</sup> Ie isoide. Cristo fiodailla jira, Moisés micori llogacinuai anamo jai iñedicaí. Iemo jai duiñedicaí. Ie jira Cristomo jai duidicaí. Jusiñamui jitailla rafuena finocana cai jaillena, fiodaillamona Cristo jai jillode.

<sup>5</sup> Jusiñamuina nia cai inoñenia, cai jitailla rafuena finocana jaidicaí. Moisés micori llogacinona uiñoticaí; ia cai maraiñede jitailla rafuena finocana jaidicaí. Cai jeacino ite diga fiodaicana jaidicaí;

<sup>6</sup> ia Moisés micori llogacino jai saide. Caimo jai duiñede. Navui ie anamo iticaí; iadedi birui ie anamo jai iñedicaí. Jusiñamuina cai sedajamona, Jusiñamui Joreño rafuedo jai jaidicaí. Moisés micori cuegafuiaido jai jaiñedicaí.

*Cue comecimo ite maraiñedicino*

<sup>7</sup> “Moisés micori llogacino maraiñede” lloñeíticaí; iadedi naie llogacino iñedena, jeacinona uiñoñedicue. Jaiamiemo ite rana cue niciduana maraiñenana jaie uiñoñedicue. Moisés micori jaie llote: “Jaiamiemo ite rana nicidoñeno” llote. Ie jira naiemona niciduanana maraiñenana uiñoticaí.

<sup>8</sup> Naie llogacino muidona cue comeci jeacinona finoacade. Ie muidona rana nicidoticaí. Naie llogacino iñedena, jeacino finuana uiñoacaiñedicaí. Naie llogacino iñedena, jeacino anamo iñedicaí.

<sup>9</sup> Moisés micori llogacinona nia cue uiñoñenia, caimare uri iticaí. Naiena cue uiñuamona, jeacino cue finuana uiñoticaí. Ico Jusiñamui diga cue iñenana uiñoticaí.

<sup>10</sup> Nano cue comecina facadicaí: “Naiedo cue jaillamona, Jusiñamui diga ico jaca iiticaí”. Iese cue comecina facadicaí; iadedi naie llogacinona cue uiñuamona, Jusiñamui dibeimo cuena jaca itatañede.

<sup>11</sup> Naie llogacino muidona cue comeci jeacinona finoacana jira, cue jitailla rafuena oñedicue. Ico Jusiñamui diga jaca cue illena oñedicue; iadedi duere cue sefuillicinona oticaí. Naimie dibeimo Moisés micori llogacino cuena itatañede; ia naimie dibeimona cuena itatate.

<sup>12</sup> Iese ite; iadedi Moisés micori llogacinodi mare. Jusiñamui mona ite.

<sup>13</sup> Naie llogacino mare. Naie rafue muidona fiodaiñeíticaí; ia jeacino muidona fiodoticaí. Jeacinona cue finua jira, Jusiñamui illanomo ico jaca iñeíticaí. Naie mare llogacinomona jeacino cue finuana eo maraiñenana uiñoticaí.

<sup>14</sup> Jusiñamui Joreño Moisés micorina naie llogacinona cuetatate. Ie jira naicino mare; iadedi cue jitailla rafuena cue finua jira, cuemo jeacino illa jira, jeacino finoramona iticaí.

<sup>15</sup> Cue finua rafuena raise uiñoñedicue, cue mare jitailla rafuena cue finoñena jira. Cue gaiñena maraiñede rafuena finocabidicaí.

<sup>16</sup> Cue maraiñede finoacaiñega rafuena cue finoiaide, Moisés micori llogacino marenana uiñoticaí.

<sup>17</sup> Cue comeci iena dama finoñede; iadedi cue comecimo ite jeacino cuena finotate.

<sup>18</sup> Cue comecimo marecino iñede. Mare rafuena finoacadicaí; iadedi iena finonidicaí.

<sup>19</sup> Cue mare finoacaga rafuena finoñedicue; iadedi cue maraiñede finoacaiñega rafuena finodicaí.

<sup>20</sup> Cue finoacaiñega rafue cue finoiaide, cue comeci iena dama finoñede; iadedi cue comecimo ite jeacino cuena iena finotate.

<sup>21</sup> Biese cuemo suicabide. Mare rafuena cue finoacaniadedi, jeacinona finocabidicaí.

<sup>22</sup> Cue comeci Jusiñamui lloga uaina gaide;

<sup>23</sup> iadedi cue comecimo maraiñede rafuena illana uiñoticaí. Cue comecina namataacade. Cuena jeacinona finotaicade.

<sup>24-25</sup> Eo dueredicaí. Jusiñamui lloga uaina cue comecimona finoacadicaí; iadedi cue comecimo ite maraiñede rafue cuena jeacinona finotaicade. Jeacino finocana cue jaia, duere sefuiticaí. Jusiñamui illanomo ico jaca iñeíticaí. Naiemona jaca buna cuena jillobitañede. Dama Jusiñamui cuena jillotaite, cai Nama Jesucristo muidona. Ie jira Jusiñamuimo cue iobicabillasa.

## 8

*Jusiñamui Joreño cai comeciaina namatacana cai jailla*

<sup>1</sup> Cristo Jesús mo duidinodicaí. Ie jira Jusiñamuidi caina duere finoñeíte.

<sup>2</sup> Jeacino anamo jai cai iñena jira, caina duere finoñeite. Jeacinona cai finuamona, Jusiñamui illanomo ico jaca iñeiticai. Duere sefuiticai; iadedi naiemona Jusiñamui Joreño caina jai jillotate. Jesucirstomo cai duillanona, caina jaca itataite.

<sup>3</sup> Moisés micori llogacinona cai raise iñoñena jira, jeacinomona dan jillonidicai. Ie jira Jusiñamuidi ie Jitona orede, iimana naimie jaillena. Cai isoi naimie jaide; iadedi naimiedi jeacinona finoñede. Jeacinona finorainidicai. Cai jeacino facaina fiodaillena, naimiena orede. Naimie uaidi cai jeacinona anafefitate. Ie jira jeacino anamona jai caina jillotate.

<sup>4</sup> Iese finode, cai marena illena, Moisés micori llogacino llua isoi. Ie jira cai comecimo ite maraiñede jitailla rafuedo jai jaiñedicai; iadedi Jusiñamui Joreño jitailla rafuedo jai jaidicai.

<sup>5</sup> Cai comecimo ite maraiñede jitaillacinodo cai jaiadedi, naiemo cai comeciaina facadicai. Iena finodicai; iadedi Jusiñamui Joreño jitailla rafuedo cai jaiadedi, iemo cai comeciaina facadicai. Naimie jitailla rafuena finodicai.

<sup>6</sup> Maraiñede jitaillicinomo comeciaina facacabidino Jusiñamui diga ico jaca iñeitimaci; iadedi Jusiñamui Joreño jitailla rafuedo jaidino Jusiñamui diga jaca iitimaci. Jiai jaca uri iitimaci.

<sup>7</sup> Jaiino Jusiñamuina enoidimaci. Jusiñamui lloga uaina jitañedimaci. Iena inonidimaci.

<sup>8</sup> Iese itino Jusiñamuina iobitanidimaci.

<sup>9</sup> Iese iñedomoi; iadedi Jusiñamui Joreño jai duidomoi. Naimie omoimo ite. Bumo Jusiñamui Joreño iñenia, Cristomo nia duñede.

<sup>10</sup> Jeacinona omoi finua jira, fiodaítomoi; iadedi Cristo omoimo illa jira, omoi joreñuai Jusiñamui illanomo jaca iitimaci, Jusiñamui omoina marebicaitaja jira.

<sup>11</sup> Cristo Jesús fiodaillamona, Jusiñamuidi naimiena jillotate. Omoimo ie Joreño illa jira, omoi fiodaíade, Jusiñamuidi ie Joreño uaido omoi abiaina jiai jillotaite.

<sup>12</sup> Cue amatai, iese caimo suite. Ie jira cai comeciaino ite maraiñedicinodo cai jaiñelli.

<sup>13</sup> Naicnodo cai jaia, Jusiñamui illanomo ico jaca iñeiticai; iadedi Jusiñamui Joreñodi caina canuamona, naicno anamona cai jilluanona, Jusiñamui illanomo ico jaca iiticaí.

<sup>14</sup> Nana Jusiñamui Joreño namatadinodi Jusiñamui uruiai.

<sup>15</sup> Jusiñamui Joreñoña feiñoñedomoi, naimiena omoi jaciruillena; iadedi Jusiñamui uruiaiña omoi jaillena, naimiena feiñotomoi. Duere sefuillacinona navui jaciruitomoi; iadedi birui: “Cai Moo” raillanona, Jusiñamuina uaidotomoi. Ie jira naimiena jai jaciruñedomoi.

<sup>16</sup> Cai comeciaina Jusiñamui Joreño uiñotajamona, cai comeciainona Jusiñamui uruiaiñedicaina jai uiñoticai.

<sup>17</sup> Naimie uruiaiñedicaina jira, ie uruiaiño fecaacalle ra caimo jai duide, Cristomo jai duilla isoi. Naimie dibeimo cai illanona, Cristo isoi cai duere sefuilla jira, naimie isoi ie Moo illanomo ico iiticaí.

<sup>18</sup> Biena uiñoticue. Bene birui duere sefuidicai; iadedi iemo cai comeciaina cai facañena, monamo ico eo marena jaca cai illena jira.

<sup>19</sup> Iese cai illemo nana Jusiñamui finoca radi iocire birui ocuridimaci.

<sup>20</sup> Nana eniruemo ite Jusiñamui finoca radi mare; iadedi Adán micori jeacino finua jira, Jusiñamui llua jira, naimaci faidobidimaci. Iese suide; iadedi ico dane marena naimaci illemo ocuridimaci,

<sup>21</sup> naimaci rifaillamona ico naimaci jillua jira. Ie mei Jusiñamui uruiaiñedicaina isoi marena iitimaci. Dane fiodaíñeitimaci.

<sup>22</sup> Biena uiñoticai. Nana Jusiñamui finoca radi danomo eo duere sefuicana nia jaidimaci. Marena illemo nia ocuridimaci.

<sup>23</sup> Dani naimaci duere sefuicana jaidimaci; iadedi jiai duere sefuidicai. Jusiñamuidi ie Joreño caimo fecaja jira, ico cai marena illena uiñoticai. Monamo Jusiñamui uruiaiña ico cai illemo ocuridicai. Cai fiodaia, fiodaillamona cai abiaina jillotaite. Jiaífo eruaite cai abiaímo meidollemo ocuridicai. Ie mei cai abiaí dane fiodaíñeitimaci.

<sup>24</sup> Naiemo cai ocurillamona, cai jeacinomona navui jillobidicai. Bumo ie jitaillie ra ia, iemo naimie ocuriñede. Ie feiñoñega ramo ocuride. Ie isoidemo ocuridicai.

<sup>25</sup> Caimo suiñede rafuemo cai ocurilla jira, iemo fecuise ocuridicai.

<sup>26</sup> Birui duere cai sefuia, ico marena cai illemo ocuridicai. Jusiñamui Joreño caina jiai canode. Jusiñamuimo cai jiiia, naimiemo cai jicanua rafuena cai raise uiñoñenia, ie Joreño cai facaina ñaite. Naimiedi cai jino botanide uaina Jusiñamuimo llote.

<sup>27</sup> Jusiñamui cai comeciaina uiñote. Naimie jitaillacinona ie Joreño jia jira, iena uiñote. Jusiñamui cominidicai. Ie Joreño cai facaina ñaiana cacade.

*Jusiñamui caina isiruite*

<sup>28</sup> Jusiñamuina isiruitinodicai. Naimie jitailla jira, naimie caina fetode. Jusiñamuidi caimo suide rafuena marena suicana jaitate. Iena uiñoticai.

<sup>29</sup> Caina isiruillanona, caina fetode. Nano dofoconimona caina naimie Jito isoi cai illena itatate. Naimie Jitodi cai ama doforamiena.

<sup>30</sup> Caina iese jaie itatajamona, birui caina uaidote. Caina uaiduanona, caina jeacinona jaca finoñedino jai isoitate. Caina jeacinona jaca finoñedino jai isoitajamona, naimie illanomo ico cai ia, ebire iitica.

<sup>31</sup> Iese caina itataja jira, Jusiñamuidi cai facaina illa jira, bu cai facaina iñellena, damamai iesedica.

<sup>32</sup> Jusiñamuidi ie Jitona duere sefuillamona jillotañede; iadedi naimie jitailla jira, cai facaina ie Jitona orede, cairi fiodaillena. Ie muidona naimie ðibeimo marena cai ille rafuena caimo jiai iite.

<sup>33</sup> Jeacinona navui finodica; iadedi Jusiñamuidi caina jeacinona jaca finoñedino jai isoitaja jira, Jusiñamui fetocanodicaina jira, jaca buna cai jeacino facaina naimiemo llogidoñeite.

<sup>34</sup> Ie jira cai jeacino facaina jaca buna caina duere finotañeite. Cristo Jesús jaie fiodaite; iadedi fiodaillamona naimie jillode. Jusiñamui beicimo naimiedi birui ite. Cai facaina naimie ñaite.

<sup>35</sup> Cristo caina isiruite. Jaca buna Cristo caina isiruillacinona baironide. Jiaie comini duere caina finoia, caina jeare finoia, aime cai guia, cai iniroinia, jaciredo rafue caimo ia, jiaie comini caina meinea, Cristo caina nia isiruite.

<sup>36</sup> Tena Jusiñamui facaina lloraima micori jaie cuela; Jusiñamui muidona caina jaca meinetimaci, mercadomo toica llaudaia; fallena illa isoi cuela.

<sup>37</sup> Cristo caina isiruilla jira, caina naimie canuamona, naga bie isoide rafue caimo sua, cai comeciai ocuiñocana cai jailla.

<sup>38</sup> Jusiñamui caina isiruite. Naimiemona jaca budi caina baironide. Cai fiodaia, cai nia ia, Jusiñamui caina nia isiruite. Jusiñamui jaienisaide, Taifedi, Janabadi Jusiñamui isiruillacinomona caina baironidimaci. Birui diga isoide rafue caimo suide; iadedi Jusiñamui caina nia isiruite. Ico diga isoide rafue caimo sua, Jusiñamui caina nia jaca isiruite. Jaca buna ie uaido Jusiñamui isiruillacinomona caina baironide.

<sup>39</sup> Monamo ite radi Jusiñamui isiruillacinomona caina baironide. Eniruemo ite radi Jusiñamui isiruillacinomona caina baironide. Nana Jusiñamui finoca radi Jusiñamui isiruillacinomona caina baironide. Cai Nama Cristo Jesús mo cai duilla jira, Jusiñamui caina isiruillana uñotica.

## 9

### *Jusiñamuidi judiua; railla cominina fetode*

<sup>1-2</sup> Jiaie rafuena nia lloiticue. Cue comecidi eo sunaite. Cristomo cue duilla jira, tainona lloñedicue. Jusiñamui Joreño cue comecina uñotajamona, iena uñotiticue. Cue cominiri sunaiticue.

<sup>3</sup> Cue comini Cristo rafuena inoiacaiñedimaci. Ie muidona Jusiñamui raicailfue anamo birui itimaci. Naimemona naimaci jilloillena, naimaci duere sefuillacino ifomo cue iticuedena, cuemona mare. Naimacidi cue amatiai.

<sup>4</sup> Israel railla cominidimaci. Jiaicidi judiua; railla cominidimaci. Jusiñamuidi naimacina fetode, ie uruiaina. Jusiñamui siño finoca rafuena cioidimaci. Iena naimaci inollena, Moisés micorimo Jusiñamuidi rafuena jiai llote. Naimiena sedallena jiai llote. Naimaci dine naimaci jilloitaraimana oretallena jiai llote.

<sup>5</sup> Naimaci jaiaga;di Abraham micori, Isaac micori, Jacob micori. Naimacimona comuide nairaimona Cristodi comuide. Naimiedi Jusiñamui. Nana rana naimie anamo ite. Naimieri jaca cai iobicabillasa. Iena jitaidicue.

<sup>6</sup> Cai cominimo Jusiñamuidi ie uaina llote; iadedi nana cai comini iena inoñena jira: "Jusiñamui ie lloga uaina finoñede" raiñeiticai. Jusiñamuina naimaci raise inoñena muidona, nana Israel micorimona comuide cominidi Jusiñamui mo duiñedimaci.

<sup>7</sup> Nana Abraham micorimona comuidinodi naimiemo duiñedimaci. Jusiñamui iena jaie llote: "Dama Isaacmona comuidinodi ua Abraham uruiai".

<sup>8</sup> Naie lluamona nana Abraham micorimona comuidinona ie uruiainenana uñotica. Jusiñamui lloga uaina inotinodi naimie ua uruiai.

<sup>9</sup> Jusiñamuidi Abraham micorimo jaie llote: "Jiaie año bie facaiseconi o dine abido biiticue. Naie facaiseconi o ai Saradi jitona jocoite" llote. Ie mei iese suide.

<sup>10</sup> Ie mei Isaac micoridi Rebeca micorina ote, naimie aina. Ie mei naiñaiño micoridi gorasana iaimai micorina jocode. Nano doforamiedi Esaú micori. Jiamiedi Jacob micori.

<sup>11-13</sup> Naiñaiño micori nia jocoñenia, Jusiñamuidi naiñaiño micorimo llote: "Nano doforamie ie ama anamo jaca iite" llote. Jusiñamui facaina lloraima micori Jusiñamui lluana jiai

cuete: “Jusiñamui llote: ‘Jacobna eo isiruiticue; iadedi Esaúna janore isiruiticue’ llote”. Naie iaimaiaí micorí nia jeiciñenia, iaimaiaí micorí marecinona nia finoñenia, iaimaiaí micorí marañedicinona nia finoñenia, Jusiñamuidi iaimaiaí micorína iese llote. Ie finoca rafuemona Jacob micorína fetoñede; iadedi Jusiñamui jitailla jira, Jacob micorína fetode.

<sup>14</sup> “Jusiñamuidi dama Jacob micorína fetuana marañede” rañfeiticaí. Jusiñamuidi marañedicinona jaca finoñede.

<sup>15</sup> Jusiñamui bie isoide rafuena Moisés micorímo llote: “Cue dinena cue jitaillanona duenaiticue; ia cue dinena cue jitañenanona duenaiñeiticue” llote.

<sup>16</sup> Comini naimiëna jitaillamona, Jusiñamui naimacina duenaiñede. Naimaci rafue finuamona, naimacina duenaiñede; iadedi naimie jitailla jira, naimacina duenaite.

<sup>17</sup> Jusiñamuidi bie isoide rafuena Faraón micorímo llote. Moisés micorí illa facaise Egipto railla enirue illaimadi Faraón micorí. Naimiemo llote: “Ona illaimana jai itataticue. O uicomó siño rafuena finodicue, cue uai siñonana jiaie comini uiñollena, nana cominido cue mameci sorillena”.

<sup>18</sup> Jusiñamui iese ite. Naimie dinena ie jitaillanona duenaite. Naimie jitailla jira, jiaie cominina naimiëna iñotañede.

<sup>19</sup> Nibaí comeciaina facadomoi: “Cominina iese Jusiñamui itataia, ¿bue ñellena naimacina duere finoacade?”

<sup>20-21</sup> Iese comeciaina facañeno. ¿Niese nainona naimiemo ducañitomoi? Ero, jiñoramona nogona finodiñaiñodi ie jitailla dierise nogona finode. Dajerie ebirede nogona finode. Dajerie jamai nogona finode.

<sup>22</sup> Ie isoide. Nana comini dajena eruaiñedicai. Ie jitailla isoi, jiaíforie Jusiñamui caina comuitate. Jusiñamui ie jitailla rafuena finode. Jeacinona comini finua jira, Jusiñamuidi naimacina duere finoacade. Naimacina ie uai siñonana jiaí uiñotaacade; iadedi naimacina nia duere finoñede.

<sup>23</sup> Cominina Jusiñamuidi jiaí duenailla jira, naimacina ie siño uai ebirenana uiñotaacade. Naimie illanomo nanomona naimaci marena iitimaci. Iese naimie naimacina itatate.

<sup>24</sup> Jusiñamui caina iese itatate. Da judiuaína iese itatañede; ie iadedi judiuañedinona jiaí iese itatate.

<sup>25</sup> Jusiñamui iena jiaie lluaña Oseas micorí jiaie cuete: Cue cominiñedinodi cue cominina jaitimaci. Isiruiñeganona isiruiticue.

<sup>26</sup> Dane jiaí cuete:

Navui cue cominiñedomoi; iadedi jiaie comini omoina ico lloitimaci: “Naimacidi jaca cajede cai Jusiñamui ie uruaídimaci” lloitimaci cuete.

<sup>27</sup> Isaías micorí railla lloraíma jiaie cuete: “Monailai fuemo conillie eo ite. Ie isoi Israel micorí uruaí eo jebuitimaci; iadedi Jusiñamuidi nana naimacina jillobitañeite. Dajeriena jillotajanona,

<sup>28</sup> jiaínomo ie lloga uaina raire finoite. Naimacina duere finoite” cuete.

<sup>29</sup> Isaías micorí jiaí cuete:

Jusiñamuidi anamo nana ra ite.

Jusiñamuidi Sodómamo ite comini micoriaina jiaie cuenode.

Gomórramo ite comini micoriaina jiaí jiaie cuenode.

Naimaci micoriái isoi iñedicai, nana cai cominina naimiedi duere finoñena jira.

*Judiuaídi Cristo rafuena jitañedimaci*

<sup>30</sup> Biemo comeciaina faca. Judiuañedinodi Jusiñamui jitailla isoi, marena illana navui uiñoiacañedimaci; iadedi iena jai uiñotimaci. Jesucristona naimaci iñnuamona, marena illana jai uiñotimaci.

<sup>31</sup> Jusiñamui jitailla isoi marena naimaci illena, judiuaídi Moisés micorí llogacinodo jaidimaci; iadedi Moisés micorí llogacinona naimaci raise iñoñena jira, marena illana jaca uiñofedimaci.

<sup>32</sup> Naimaci finoca rafuemona marena iacadimaci. Marena naimaci illena, Jesucristona iñoiacañedimaci. Naimie muidona marena iñeitimaci.

<sup>33</sup> Isaías micorí iena jiaie cuete:

Jusiñamui llote: “Ero, Jerusalémo cue Jitona oretaiticue.

Naimie muidona cominidi jilloñeitimaci.

Naimiëna naimaci iñoñenia, faifitimaci;

iadedi naimiëna iñotinodi tainona iñoñeitimaci.

Suubicañeitimaci” llote.

## 10

<sup>1</sup> Cue amatiaí, judiuaí comini jilluana eo jitaídicue. Jusiñamui diga cue ñaia, iena jicadicue.

<sup>2</sup> Jusiñamui jitaillacinona eo finoacadimaci. Iena uifnoticue. Iena finoacadimaci; iadedi iena finuana raise uifnoñedimaci.

<sup>3</sup> Jusiñamui naimacina marena itatallena uifnoñedimaci. Naimaci finoca rafuemonana marena iacadimaci. Jusiñamui llua isoi jaiacaiñedimaci.

<sup>4</sup> Nana Cristona inotimiedi Moisés micori llogacínodo naimie marena illena jai jaiñede. Cristona inuamona, Jusiñamui jitailla isoi, naimie marena jai ite.

<sup>5</sup> Moisés micori jai e cuete: “Naimie marena illena, cue lluado jaidimiedi jaca iite, cue lluana naimie raise inoia” cuete.

<sup>6</sup> Iese jai e cuete; iadedi jaca buna iese inoñede. Cristona inuamona, marena Jusiñamui jitailla isoi, birui iticai. Jusiñamui uai llote: “Omoi comeciaina facañeno: ‘Cristona cai baillena, naimiena bene cai atillena, monamo jaiticai.

<sup>7</sup> Fiodaitino dine jaiticai, Cristona cai jillotallena’. Iese comeciaina facañeno” llote. Cristodi eniruemo jai e bite. Fiodaite; ia naiemona jai jillode.

<sup>8</sup> Jusiñamui uai llote: “Naie rafue cai dine jai ite. Iena jai uifnoticai”. Cai jilloillena Cristona cai inuana birui lloticai.

<sup>9</sup> Jai e cominimo: “Cristodi cai Nama” omoi lloia, Cristo fiodaillamona Jusiñamui naimie jillotajana omoi inoia, jilloitomo.

<sup>10</sup> Cai comecimona cai inua jira, Jusiñamui caina marena illana itataite. “Cristodi cai Nama” cai lloia, Jusiñamui caina jillotaite.

<sup>11</sup> Isaías micori iena jai e cuete: “Cristona inotinodi tainona inoñeitimaci. Suubi-caiñeitimaci” cuega.

<sup>12</sup> Naie rafuedi nana cominina ñaite. Judíuaina ñaite. Judíuainedina jai ñaite. Jusiñamui anamo nana cominidi itimaci. Nana naimiemo jicanotinona jaca duenaite.

<sup>13</sup> Cristodi naga naimiemo jicanotimiena jillotaite;

<sup>14</sup> iadedi Cristona naimaci nia inoñenia, naimiemo jicanonidimaci. Cristo naimaci facaina fiodailla rafuena naimaci nia cacaiñenia, naimiena inonidimaci. Naimacimo naie rafuena jai e comini lloñenia, iena cacaiñeitimaci.

<sup>15</sup> Jusiñamui ie rafue llorainina jai orede. Isaías micori iena jai e cuete: “Mare rafuena llotino cai dine billano, eo iobidicai” cuete.

<sup>16</sup> Iese cuete; iadedi ailluena comini naie rafuena nia jitañedimaci. Isaías micori iena jai e cuete: “Jusiñamui, ailluena comini cai llua inoiacaiñedimaci” cuete.

<sup>17</sup> Cai llua mona Cristo rafuena cacadimaci. Cristo rafuena cacajamona, damierie naimiena inotimaci.

<sup>18</sup> Judíuai comini naie rafuena jai cacadimaci. Jusiñamui facaina lloraima micori iena jai e cuete:

Naga eniruemo ite cominimo Jusiñamui lloraini micoriaidi naie rafuena jai llotimaci cuete.

<sup>19</sup> Judíuai comini naie rafuena cacadimaci; iadedi iena inoñedimaci. Moisés micori iena jai e cuete:

Jusiñamuidi llote: “Cue rafuena naimaci feiñua jira, judíuainedino diga uradotomoi.

‘Naimaci abina uifnoñedimaci’ raitomoi;

iadedi cue rafuena naimaci feiñua jira, naimaci diga iciritomoi” llote.

<sup>20</sup> Isaías micori marefodo jai e cuete:

Jusiñamui llote: “Cuena jenoñedino cuena jai baitimaci.

Naimacina cue jilloitallena cuena janoñedinomo jai bairedicue” llote.

<sup>21</sup> Jusiñamui judíuai cominina jai e llote: “Naimacina cue dine jaca uaidotocue; iadedi inoiacaiñedimaci. Cuena jitañedimaci” llote.

## 11

### *Judíuai cominimona dajerie inoitimaci*

<sup>1</sup> Jusiñamuidi judíuaina fainonocaillamo omoi comeciaina facañeno. Judío imiedicue. Abraham uruai micoriaimona comuidicue. Benjamín railla nairai imiedicue.

<sup>2</sup> Naimacina jai e naimie fetua jira, Jusiñamui judíuaina fainonocaiñede. Elíamo jai e ite rafuena uifnotomoi. Jusiñamuimo naimiedi judíuaina llote:

<sup>3</sup> “Cue Nama, o facaina lloraini micoriaina meinetimaci. Ona cai sedajanona judaidimaci. Dama cue fiebidicue. Cuena jai e meineiacadimaci”.

<sup>4</sup> Jusiñamui dinena uai ote: “Dama inedio. Siete mil iníai e cue dibeimo nia eenotocue. Baal railla jiraraina jaca sedañedimaci. Cuena nia sedadimaci” llote.

<sup>5</sup> Birui ie isoide. Naimacina duenaillamona, naimacina Jusiñamui fetua jira, dajerie Jusiñamui dibeimo itimaci.

<sup>6</sup> Naimacina duenaillamona, naimacina fetode. Naimaci finoca rafue muidona naimacina fetoñede. Naimaci finoca rafue muidona naimacina fetodena, naimacina duenaillamona naimacina fetoñede.

<sup>7</sup> Ie jira iena iese lloiticue. Ailluena judúuaidi marena Jusiñamui jitailla isoi illana oñedimaci; iadedi Jusiñamui fetocano iena otimaci. Ailluena comini iena ñinoiacaiñedimaci.

<sup>8</sup> Jusiñamui facaina lloraini micoriai iena jaie cuela: “Jusiñamuidi naimacina abina uñotañede. Jusiñamui finoca rana naimaci cioia, iena uñofedimaci. Jusiñamui rafuena naimaci cacajia, iena cacaiñedimaci. Birui iese nia itimaci” cuela.

<sup>9</sup> David micori iena jai lloite:

Naimacimo aillue ra illamona, Jusiñamui naimacina duere finoite.

<sup>10</sup> Naimaci comeciari Jusiñamui rafuena uñofeitimaci.

Naimaci finoca rafue anamo duere sefuicana jaca jaitimaci.

### *Judúuainedimona dajerie ñinoitimaci*

<sup>11</sup> Naimie rafuena judúuai comini jitañena jira, Jusiñamui naimacina duere finode; iadedi naimacina sofeñede. Jusiñamuina judúuai ñinoñena jira, Jusiñamuidi judúuainedinona jai jillotate. Naimacina jai jillotate, judúuai dinena judúuainedinona uradoillena. Uradoillamona Jusiñamuidi naimaci naimiena ñnollena jitaide.

<sup>12</sup> Cristona judúuai jitañena jira, Jusiñamuimona judúuainedinodi diga marecinona birui feñotimaci. Cristo dibeimo ico judúuai ia, Jusiñamuimona judúuainedino ailluena feñotimaci.

<sup>13</sup> Judúuainedino, omoimo rafuena lloiacadicue. Omoi dine Jusiñamuidi cuena orede. Cue maijiri eo marena ñaiticue,

<sup>14</sup> cue comini cuena uradoillena, Cristona dajerie ñnotallena.

<sup>15</sup> Cristona naimaci nia ñinoñena jira, judúuainedino jai ñnotimaci. Cristona ico judúuai ñnoia, Jusiñamui diga jaca iitimaci.

<sup>16</sup> Janore jisa juillirufu marenia, nana juilliruidi mare. Riara ie jainuai marenia, nana ie igailai mare. Judúuaidi ie isoidimaci. Naimaci jaiagai micoriai jainuai isoidimaci. Naimaci jaiagai marenia, naimacidi jai mare. Birui ite judúuaidi igailai isoidimaci.

<sup>17</sup> Taide igailaidi ie amenamo jai duiñede. Ie isoidimaci. Naimacimona Cristona jaino ñnoñena jira, Cristomo jai duiñedimaci. Sotaca riara isoi, naimaci ifomo itomoi. Ie jira Jusiñamuimona rafuena jai feñocabitomoi.

<sup>18</sup> Naimaci ifomo omoi illa jira, abina uradoñeno. Igailaimona jainao cajellena, ie ijina oñede; iadedi iemo duilla jira, jainaomona igailai cajellena, ie ijina ote. Ie isoide. Naimiemo omoi duilla jira, Jusiñamuimona rafuena jai feñocabitomoi.

<sup>19</sup> Comeciaina facadomoi: “Taide igailai ifomo iticai isoidicai. Jusiñamui judúuaina oni dotade, caina fetollena”.

<sup>20</sup> Uanaicinona comeciaina facadomoi. Naimaci ñnoñena jira, Jusiñamuidi naimacina oni dotade. Omoi ñnua jira, naimaci ifomo itomoi. Ie jira abina uradoñeno; iadedi Jusiñamuina omoi jacirui.

<sup>21</sup> Naimiena naimaci ñnoñena jira, judúuaina duere finode. Naimiena omoi ñnoñenia, daje isoi omoina duere finoite.

<sup>22</sup> Biemo comeciaina faca. Naimiena ñnoñedinona jai duere finode; iadedi omoina duenaite. Naimiena ñnocano omoi jaia, naimie omoina nia duenaite. Iese omoi jaiñena, naimie omoina dotaite.

<sup>23</sup> Judúuai Cristona ñnoñeno navui jaidimaci: iadedi Cristona naimaci birui ñnoia, naimie dibeimo Jusiñamui naimacina itatarede, igai riaramo sotaja isoi.

<sup>24</sup> Ailli riarana cueticue. Naie amenamo nano duiñedomoi. Judúuai nainomo nano duidimaci. Jusiñamui jitailla jira, sotaca igai isoi, naimaci ifomo omoina jai itatate. Ie jira Jusiñamui jitaia, nainomo nano naimaci duilla jira, naimiedi judúuaina abido oite.

### *Eo ailluena judúuai jilloitimaci*

<sup>25</sup> Bie rafuena omoi uñuana jitaicicue. Iena navui uñofedicai. “Judúuai baifemo faiticai” omoi raiñellena, biena omoimo lloticue. Diga judúuai Cristona birui ñinoiacaiñedimaci. Jusiñamui jitailla diese judúuainedino jillua facaisena, iese iitimaci.

<sup>26</sup> Ie mei eo ailluena judúuai jilloitimaci. Jusiñamui facaina lloraini micoriai iena cuetimaci: Jerusalémoma cai jilloitaraima biite.

Jacob micori uruaimona jeacinona dotaite.

<sup>27</sup> Naimaci jeacinona oni dotajanona, Jusiñamui jaie lloga uai suite.

<sup>28</sup> Cristona birui ñinoiacaiñedimaci. Jusiñamuina enoidimaci. Jusiñamuina naimaci jitañena jira, naimie omoina fetode. Ie jira jillodomoi; iadedi Jusiñamuidi judúuaina nano jaie fetode. Naimaci jaiagai micoriaimo ie lloga uaina jira, naimacina nia isiruite.

<sup>29</sup> Jusiñamui ie lloga uaina saiñede. Naimacina fetua jira, naimacina fainonocaiñeite.

<sup>30</sup> Jusiñamuina navui ñnoñedomoi; iadedi Jusiñamuina naimaci ñnoñena jira, Jusiñamui omoïna jai duenaite.

<sup>31</sup> Jusiñamuina jai ñnoñedimaci; iadedi omoïna naimie duenailla isoi, Jusiñamuidi naimacina ñco jiai duenaite.

<sup>32</sup> Jusiñamui nana cominina naimiena ñnoñenana uiñotade, naimacina naimie duenailena.

<sup>33</sup> Jusiñamui caina eo duenaite. Eo abina uiñote. Naga rana uiñote; ie iadedi naimie lloga uaina raise cacaiñedicaï. Naimie finoca rafuena raise jiai uiñofedicaï.

<sup>34</sup> Jusiñamui facaina lloraima micori iena jai e cuete: “Jaca buna cai Nama Jusiñamui comeci facajacinona uiñofede. Jaca buna naimiemo ie finoca rafuena lloñede.

<sup>35</sup> Jiaïruïdo ibana feiñollena, jaca buna naimiemo rana fecañede” cuete.

<sup>36</sup> Naga ra naimiemo illa jira, naga ra naimiemon bite. Naga rana finode. Naimiemo iobillacinona cai fecacabillasa. Iena jitaïdicue.

## 12

### *Jusiñamui anamo raise omoï*

<sup>1</sup> Cue amatiai, omoïmo bie rafuena lloiticue. Jusiñamui caina duenailla jira, omoï jeanide comeciïmona, naimie jitaïlle rafuena omoï finuamona naimie anamo raise omoï i. Naimie jitaïlla isoi omoï i. Naimiedi omoï iese illana gaiïde. Omoï comeciïmona naimiena raise omoï seda.

<sup>2</sup> Cristona uiñofedino isoi omoï iñeno; iadedi omoï comeciïaï uaina meïduanona, jiaïe rafuedo mai omoï jai. Ie mei Jusiñamui jitaïlla rafuena finuana uiñoitomoi. Mare rafuena finuana uiñoitomoi. Naimiena iobitajacinona jiai uiñoitomoi. Eo mare rafuedo jaïllana uiñoitomoi.

<sup>3</sup> Jusiñamui cuena duenaïllamona, bie rafuena omoïmo cue llollena, naimie uai cuemo ite. “Jiaïe comini baïfemo faïticue” raïllamo o comecina facañeno; iadedi: “Ñie isoidimiedicue” o raïllamo o comecina raise faca. Jusiñamuïmona o feiñoga diese ñnuacinomo o comecina faca.

<sup>4</sup> Nagamie ie abimo diga ra ite. Ie onolli ite. Ie uisï ite. Ie jebe ite. Diga jiaïe ra ite. Rana cai finollena, naga ra cai abimo ite. Cai abimo jainaïaide.

<sup>5</sup> Ie isoïde. Cristona jai ñnoticaï. Aillosiedicaï; iadedi daajena naimiemo jainaïaidicaï. Dani caïmo jai jainaïaidicaï.

<sup>6</sup> Jusiñamuidi daje isoïde uaina naimie dibeïmo cai maijïllena, caïmo fecañede. Ie jitaïlla diese caïmo fecade. Ie jira omoï feiñoga uaido naimie facaina maijï. Rafuena omoïmo Jusiñamui lloïa, iena raise llono. Roracomo omoï maijïllena Jusiñamui lloïa, nainomo raise maijï. Omoï llofuellena Jusiñamui lloïa, naimie rafuena raise llofue.

<sup>7</sup> Roracomo maijïacinona uiñotimiedi: nainomo raise maijïa. Llofuiacinona uiñotimiedi raise llofua.

<sup>8</sup> Comeci ocuiñotajacinona uiñotimiedi comini comeciïana ocuiñotacana jaïlla. Rana feca-jacinona uiñotimiedi rana caïdiñeno fecaja. Cominina sedajacinona uiñotimiedi cominina raise sedaja. Dueredinona canodimiedi dueredinona iocire canua. Cristomona daajena cai jainaïaïllamona, iese coninina canocana jaiticaï.

### *Cristo rafuedo cai jaïlla*

<sup>9</sup> Omoï comeciïmona nana cominina isirui. Maraiñedicinona gaiñeno; iadedi mare rafuedo omoï jai.

<sup>10</sup> Coninina isirui, omoï cominina omoï isiruïlla isoi. Omoïna jiaïmie nia iobitañenia, naimiena raise omoï iobita.

<sup>11</sup> Cristo rafuena sefuiruiñeno finocana omoï jai. Cai Namana iocire seda.

<sup>12</sup> Naimie dne omoï illemo iocire omoï ocuiri. Duere omoï sefua, omoï comeciïana ocuiño. Jusiñamui diga ñaicabïllanona omoï jai.

<sup>13</sup> Jiaïe creyentiaï rania, naimacina cano. Omoï jofuemo creyentiaï ria, naimacina nafue.

<sup>14</sup> Jusiñamui dibeïmo naimaci marena illena, omoïna duere finodinona Jusiñamuïmo jï. Naimaciri marena ñaino. Naimacina faïdoñeno.

<sup>15</sup> Iobidino diga omoï nabairïllena, omoï iobi. Sunaitino diga omoï nabairïllena jiai omoï sunai.

<sup>16</sup> Daje isoi omoï comeciïaï lloïllamona uri omoï i. Abina birioicaïñeno. Jamai bue isoidino diga nabairi. “Jiaïe comini baïfemo uiñoticaï” raïñeno.

<sup>17</sup> Jiaïe comini omoïna jeare finoiïa, naimacina daje isoi jeare finofeno. Ibana ofeno. Omoï marena illana jiaïe comini uiñollena, marena omoï i.

<sup>18</sup> Omoïmona rafuena suiñofeno. Nana comini diga uri omoï i.



<sup>19</sup> Cue isiruigano, bu omoına jeare finoia, ibana oñeno. Jusiñamui naimacina duere finoite. Moisés micori iena jaie cuete: “Cai Nama lloste: ‘Cominina duere finodicue. Ibana oiticue’ ” cuete.

<sup>20</sup> Ibana oñeno. Jusiñamui facaina lloraıma iena jaie jai cueda: “Omoi enoigamie aimetai, naimiena eca. Naimie jiroiacania, naimiena jirote”. Ie mei naimie meire omoımo eruaita.

<sup>21</sup> Jiaie comini omoına jeare finoia, icirñeno; iadedi naimacimo mare rafuena fino. Iese omoi finoia, naimacina omoi dibeımo itataıtomoi.

## 13

<sup>1</sup> Nana illaicominina naimaci ifomo Jusiñamuidi itataja jira, illaicomini lloga uaina nana cai inua.

<sup>2</sup> Illaicomini uaina bu inoñenia, Jusiñamuina jai inoñede. Ie mei Jusiñamui naimiena duere finoite.

<sup>3</sup> Mare rafuena finodinodi illaicominina jaciruiñedimaci; iadedi marañede rafuena finodino naimacina jaciruitimaci. Omoına duere finoñellena, mare rafuena finocana omoi jai. Iese omoi jai, omoına marena ñaitimaci.

<sup>4</sup> Jusiñamui facaina omoına canodimaci. Marañede rafuena omoi finoia, naimacina jacirui. Omoına duere finollena, naimacimo uai ite. Marañede rafuena finodimiena Jusiñamui facaina duere finoitimaci.

<sup>5</sup> Ie jira naimaci uaina ino, Jusiñamuımona omoi duere sefuiñellena. Omoına: “Mare” jai raitimaci.

<sup>6</sup> Gobierno omoına ibataia, Jusiñamui facaina naimaci maijia jira, iena iba. Naimaci raise maijillena, iena iba.

<sup>7</sup> Gobierno omoına ibataia, iena iba. Illaicominimo iobillacinona feca.

<sup>8</sup> Ra omoi oia, ibaño jaiñeno; iadedi coninina omoi isirui. Jiaie cominina isiruitimiedi nana Jusiñamui lloga uaina jai finode.

<sup>9</sup> Moisés micori diga lletarafuena jaie cuete: “O añede riño diga iño. O iniñede ima diga iño. Jiamiena meineño. Rana fiño. Jaiımeımo ite rana nicidoño” cuete. Jai lletarafue ite: “Dani omoi abiaına omoi isiruilla isoi, jiaie cominina omoi isiruilla”. Bie lletarafuena omoi inoia, nana lletarafuena jai inotomoi.

<sup>10</sup> Jiaie cominina omoi isirua, naimacina jeare jai finoñedomoi. Jiaie cominina omoi isirua, nana Jusiñamui lloga uaina jai inotomoi.

<sup>11</sup> Iena birui cai finua. Jesucristo billiruidi iairei jai ite. Naimiena cai nano inua facaiseconı, naimie billiruiımo cai comeciaina facadicaı; iadedi nagaruı naimie billirui iairei iñoicaide.

<sup>12</sup> Jesucristo nia dane biñena jira, enıruemo cai illa jira, jitiredinomo iticaı isoidicaı. Naimie bia, naimie diga cai illemona, useredinomo raire ja iiticaı isoiticaı. Ie jira jeacinona finocana cai jaillana mai cai faınonocailı. Jesucristo rafue anamo raise cai illesa.

<sup>13</sup> Cai marena illana nana comini uıñollena, mare rafuena finocana cai jailla. Jearede rafuena cai finoñena. Cai jifaiñena. Cai añede riño diga cai iñena. Cai fuiñena. Cai abına uradoiñena.

<sup>14</sup> Iese cai iñena; iadedi naimie caina namatallena, cai Nama Jesucristona raise cai nabaıllı. Cai jearede navui jitaillacinona finoacanamo cai comeciaina facañena.

## 14

*Jiaie creyentena jeare ñaiñeno*

<sup>1</sup> Cristona inotimiena omoi dine biade, naimiena raise feıño. Naimie Cristona nia raise inoñenia, naimiena nafue; iadedi omoi isoi naimie inoñenia, conima uına caitaño.

<sup>2</sup> Dajerie naga rana guıtımaci; iadedi jiamie difai guıga rana guite. Naimie rife. Ie comecina facade: “Cue riıa, jeacinona jai finoiticue”.

<sup>3</sup> Naga rana guıñedimiena miñeno. Naga rana guıtımiena miñeno. Jusiñamuidi naimacina jai feınote. Ie jira miñeno.

<sup>4</sup> Omoi facaina maijıñedimaci. Jusiñamui facaina maijıdimaci. Jeacinona naimaci finoia, Jusiñamui naimacina duere finoite. Jeacinona finoi raıllanona, Jusiñamuidi naimacina canoite.

<sup>5</sup> Dajerie creyentiaı comeciaina facadımaci: “Judıuaı rafue finuaruıllaı Jesuñamuına sedajıticaı, nairuıllaı jairuıllaı baıfemo uaılla jira”. Jıano raitımaci: “Nagaruı daje isoide” raitımaci. Nagamie ie comecina raise facajamona,

<sup>6</sup> cai Namana iobıtallena, nagamie ie jitaıllaruımo cai Namana sedaite. Naga rana guıtımie iobillacinona Jusiñamuımo fecajano, cai Namana iobıtate. Naga rana guıñedimie iobillacinona Jusiñamuımo fecajano, cai Namana jai iobıtate.

<sup>7</sup> Cristomo cai duilla jira, dani cai jitailla rafuena finonidica. Cai fiodailliruina jia i lonidica.

<sup>8</sup> Naimiedi cai finolle rafuena ocuide. Cai fiodailliruina jia i lloite. Naimiemo cai duilla jira, iese iticai.

<sup>9</sup> Cristodi fiodaite. Ie mei jillode. Ie jira naimie anamo iticai. Cai cajenia, naimie anamo iticai. Cai fiodaia, naimie anamo jia i iticai.

<sup>10</sup> Naimie baifemo omoi iñena jira, jiaie creyentena miñeno. Naimie uaina caitañeno. Naimiedi Cristo dibeimo ite. Jusiñamui uicomo nana ico iitica. Jusiñamuidi marañedina duere finoite. Maredinona duere finoñeite.

<sup>11</sup> Isaías micori jaie iena cuete:

Jusiñamuidi llote:

“Cue jaca illa jira, nana comini cue uicomo cuena sedajanona, cuemo iobillacinona fecaitimaci” llote.

<sup>12</sup> Nainomo Jusiñamuimo nana cai finouiga rafuena lloiticai. Ie jira jiaie creyentia digamarena omoi i.

*Jiaie creyentena jeacino fino i raillano, mare rafuedo cai jailla*

<sup>13</sup> Ie jira jiaie cominina cai miñena; iadedi mare rafuedo cai jailla. Jiaimiena jeacinona cai finotai raillano, mare rafuedo cai jailla.

<sup>14</sup> Cai Nama Jesúmo cue duilla jira, naga riga radi cuemona mare. Iena raise uiñoticue. Iena cue ría, jeacinona finoñedicue. Iena uiñoticue; iadedi jiaimie comecina facade: “Biena cue ría, jeacinona jai finodicue”. Naimie comecina iese facajamona, iena naimie ría, naimiemona jeacinona jai finode.

<sup>15</sup> O riga ra muidona jiaie creyente comeci marañeno jaia, naimiena jai isiruiñedio. Cristo naimieri fiodaite. Ie jira naie isoide rana riñeno, naimiena Jusiñamuina fainonocaitañena.

<sup>16</sup> Ie jira o jitailla rana finoñeno. Jiaie comini ona miñellena, naie rana riñeno.

<sup>17</sup> Jusiñamui cominina cai illamona, cai guille ramo cai comeciaina cai eo facañena; iadedi marena cai illamo cai comeciaina cai facaja. Uri cai illamo cai comeciaina jia i cai facaja. Iocire cai illamo cai comeciaina jia i cai facaja. Jusiñamui Joreño caimo illa jira, iese caina itataite.

<sup>18</sup> Iese cai jaia, Cristona raise sedadica. Jusiñamuina iobitadica. Jiaie comini caina marena jia i ñaitimaci.

<sup>19</sup> Ie jira uri icana cai jailla. Dani cai comeciaina ocuiñocana cai jailla.

<sup>20</sup> Omoi riicaga ra muidona, jiaie cominina Jusiñamuina fainonocaitañeno. Naga radi mare, rillena; iadedi bue isoide omoi ría muidona, jiaimie Jusiñamuina fainonocai, jeacinona jai finodomo.

<sup>21</sup> Bue isoide omoi ría muidona, jiaimie jeacino fino i raillanona, iena riñeno. Bue isoide omoi jirua muidona, jiaimie jeacino fino i raillanona, iena jiroñeno. Bue isoide omoi finua muidona, jiaimie jeacino fino i raillanona, ie isoide omoi finoñeno. Naimiedi Cristomo jai duide.

<sup>22</sup> Mare ra omoi finoia, omoi comeciainona iena uiñotomoi. Jusiñamuidi omoi comeciaina uiñua jira, iena marefodo lloñeno. Omoi comeciainona jeacinona omoi finoñenana uiñotomoi. Ie jira iocire itomoi.

<sup>23</sup> “Nie isoide ra cue ría, jeacinona finodicue” raillanomo bu iese comecina facaia, iena naimie riñena. Iena naimie ría, Cristona naimie raise iñoñena jira, jeacinona jai finode. Jiaimiena jeacinona cai finotai raillano, mare rafuedo cai jailla.

## 15

*Jiaie creyentena cai canua*

<sup>1</sup> Cristo rafuedo raise jaicai; iadedi jiaimo Cristo rafuedo cai isoi nia jañedimaci. Naimacina cai canua. Ie jira dani cai jitailla rafuena finoñeticai;

<sup>2</sup> iadedi Cristo rafuedo naimaci raise jaillena, jiaie cominimo cai comeciaina cai facaja, naimacina cai canollena.

<sup>3</sup> Eniruemo navui naimie ia, Cristo ie jitailla rafuena jia i finoñede; iadedi Jusiñamui jitailla rafuena finode. Naimiedi duere sefuide. Jusiñamui facaina lloira micori Cristo ñaiana jia i cuete: “Jusiñamuina jeare ñaiacadimacimo, cuena jia i jeare ñaitimaci” cuete.

<sup>4</sup> Naiemona cai fueollena, naiemona cai comeciain ocuiñotallena, Jusiñamuina jiaie cuega-fuaidi caimo ite. Naiemona Jusiñamui illanomo cai illemo ocuidicai.

<sup>5</sup> Jusiñamui cai comeciaina ocuiñotade. Naimie coniniri omoina uri itatajana jitaidicue. Cristo Jesús luua isoi, omoi uri illana jitaidicue,

<sup>6</sup> daje isoi omoi comeciain lloillamona, Jusiñamuina omoi iobitallena. Cai Nama Jesucristo Moona Jusiñamui illamona, Jusiñamuina omoi iobitajana jitaidicue.

*Judúuaiñedinodi Cristo rafuena jiai cacadimaci*

<sup>7</sup> Jiaie illanomona creyente omoi roracomu bia, Cristo caina feiñua isoi, Jusiñamuina iobitallena, naimiena raise omoi feiño.

<sup>8</sup> Iena nia lloiticue. Judúuaina canollena, Jusiñamui lloga uaina fuidollena, Cristodi bite. Jusiñamui tainona lloñede. Jusiñamui naimaci jaiagai micoraiamo ioco suille rafuena jaielote. Eniruemobillanona, Cristo iena fuiduaiibite.

<sup>9</sup> Judúuaiñedino Jusiñamuina iobitallena, Jusiñamui naimacina duenaila jira, Cristodi bite. David micori Cristo lluana jaiete:

Judúuaiñedino motomo cue llamona ona iobitaitimaci.

Ruamona cue muidona ona jiai iobitaitimaci.

<sup>10</sup> Moisés micori jiai cuete:

Judúuaiñedino, Jusiñamuimo duide comini diga iobi.

<sup>11</sup> David micori jiai cuete:

Nana judúuaiñedino, Jusiñamuimo iobillacinona feca.

Nana comini naimiemo iobillacinona fecacabillasa.

<sup>12</sup> Isaías micori cuete:

Isaí micori uruaiamona damie comuitajamona, naimiedi judúuaiñedinona sedaite.

Naimie naimacina jillobitallena, naimiemo ocurritimaci.

<sup>13</sup> Jusiñamui iemo omoína ocuritate. Naimiena omoi ñnuanona, naimie omoína caimare itatajana jitaidicue. Uri itatajana jiai jitaidicue. Iemei Jusiñamui Joreño naimie siño uai diga omoi jilluamo omoína ocuritaite.

<sup>14</sup> Cue amatiai, omoína uiñoticue. Eo maredomoi. Cue lloga rafuena eo uiñotomoi. Coninina llofueredomoi.

<sup>15</sup> Iena omoi começillena, dafuerie rafuena omoimo marefodo cueticue. Jusiñamui cuena fetuanona, ie rafuena cue lloñena, cuena orede.

<sup>16</sup> Judúuaiñedinomo Jusiñamui ie mare rafuena cue lloñena, Cristo Jesús facaina maijidicue. Jusiñamui dibeimo naimacina cue itatajanona, Jusiñamui naimacina feiñollena, naimacimo lloticue. Jusiñamui Joreñodi naimacina jiai maretaiete.

<sup>17</sup> Jusiñamui dibeimo cue maijia jira, Cristo Jesús muidona cue maijari iobidicue.

<sup>18</sup> Cue maijiana marefodo lloiticue. Judúuaiñedinona Jusiñamuina ñnotallena, Cristodi cuena canode. Cue lluana cacadimaci. Cue illana cioidimaci.

<sup>19</sup> Cristodi cuena siño rafuena ñnotate. Jusiñamui Joreño uaido cuena finotate. Iemei Cristona jai ñnotimaci. Jerusalémona Ilirico railla enirue ñnomo Cristo ie mare rafuena ailluena cominimo raise jai lloticue.

<sup>20</sup> Nainomo Cristona nia uiñofedino ñne navui cue jaiacana jira, nainomo Cristo rafuena lluidicue. Jai cacadino illanomo cue jaiacaiñena jira, nainomo lluaiñedicue.

<sup>21</sup> Isaías micori biena jaiete:

Cristo rafuena nia cacaiñedinodi iena cacaitimaci.

Naimiena uiñoitimaci

cuete.

*Romamo Pablo jaiacade*

<sup>22</sup> Nainomo cue maijiacana jira, Romamo omoi ñne nia jaiñedicue.

<sup>23</sup> Diga nairaimo Cristo rafuena bene jai cue llua jira, cue maijille bene jai ññede. Diga años omoi ñne cue jaiacana jira.

<sup>24</sup> Españamo cue jai, omoi ñne jaiticue. Omoi diga nano nigarui caimare ññaiticue. Ie mei Españamo cue jaillena, cuena canoitomoi.

<sup>25</sup> Omoi ñne jaiticue; iadedi Jerusalémo ite creyentiaina cue canollena, nainomo nano jaiticue.

<sup>26</sup> Macedoniamoi ite creyentiaidi ucubena ofitaitimaci. Acayamo ite creyentiaidi ucubena jiai ofitaitimaci. Jerusalémo ite duerde creyentiaina canoacadimaci. Jerusalémo ite creyentiaina canollena, iena birui uiticue.

<sup>27</sup> Tena fecacadimaci. Judúuaiñedinomoi; iadedi judúuaina canoacadimaci, naimacimo Cristo rafuena navui judúuai llua jira. Ie jira naimacina birui canodimaci.

<sup>28</sup> Naimacimo bie ucubena raise cue fecaja mei, Españamo cue jaillemona, omoi ñne nano jaiticue.

<sup>29</sup> Omoi ñne cue ria, naimie rafuena cue lloñena, Cristo cuena raise canoite.

<sup>30</sup> Cue amatiai, cai Nama Jesucristomoi omoi duilla muidona, Jusiñamui Joreño coniniña omoína isiruitaja muidona, Jusiñamuimo omoi jiaia, cue facaina jiai omoi jii.

<sup>31</sup> Judeamo ite creyentiaina mona cue jillobillena, Jerusalémo ite creyentiamoi cue fecacalle ucubena naimaci raise feiñollena, cue facaina omoi jii.

<sup>32</sup> Jusñamui jitailla isoi dine iocire cue rillena, iese omoi jii. Iemei omoi diga cue illemona, jafaicina oiticue.

<sup>33</sup> Jusñamui omoína uri itatajana jitaídícue.

## 16

### *Romamo itinomo Pablodi ie uaina orede*

<sup>1</sup> Febe raillañaiño omoi dine jaite. Naiñaiñoña omoi uñuana jitaídícue. Naiñaiñodi creyente. Cencrea railla nairai ñaiño. Cristo dibeimo maijiano, nainomo ite creyentiaina canocabide.

<sup>2</sup> Cristomo omoi duilla muidona, jiaie creyentiaina cai feiñoiacacabilla isoi, naiñaiñoña raise feiño. Diga comínina naiñaiño canua jira, naiñaiño jitaillé diese cano. Curna jiaí canode.

<sup>3</sup> Priscila dine cue uaina oredícue. Naiñaiño ñini Aquila dine cue uaina jiaí oredícue. Cristo Jesús facaina cue diga maijidiñaimai.

<sup>4</sup> Cue facaina niadedi fiodaitiañaimai. Ie jira iañaimaiñiri iobidícue. Diga nairaimo judíuainede creyentiaí itimaci. Cuemona Cristo rafuena cacadimaci. Cue facaina iañaimai niadedi fiodailla jira, iañaimaiñiri jiaí iobidimaci.

<sup>5</sup> Iaimaiñi jofomo rollena bitino dine cue uaina oredícue. Epeneto dine cue uaina jiaí oredícue. Cue isiruigamie. Asia railla eniruemo itinomona naimiedi Cristona nano ñinotimie.

<sup>6</sup> María dine cue uaina oredícue. Omoína canollena, omoi motomo maijide.

<sup>7</sup> Andrónico dine cue uaina oredícue. Junias dine cue uaina oredícue. Naie iañaimaiñidi cue comini. Cárcelmo danomo navui iticai. Jesucristo oretaganodi iañaimaiña marena ñaitimaci. Naimiema nia cue ñinoñena faicase Cristona ñinotiañaimai.

<sup>8</sup> Amplias dine cue uaina oredícue. Cristomo naimie duilla jira, naimiedi cue isiruigamie.

<sup>9</sup> Urbano dine cue uaina oredícue. Cristo facaina cai diga maijicabide. Estaquis dine cue uaina oredícue. Cue isiruigamie.

<sup>10</sup> Apeles dine cue uaina oredícue. Cristomona naimiedi mare rafuedo jaicabide. Aristóbulo jofomo itino dine cue uaina oredícue.

<sup>11</sup> Herodión dine cue uaina oredícue. Naimiedi cue comini. Narciso cominimona dajerie ñinotimaci. Naimaci dine cue uaina oredícue.

<sup>12</sup> Trifena dine cue uaina oredícue. Trifosa dine cue uaina oredícue. Cai Nama facaina maijidiñaiñuai. Pérsida dine cue uaina oredícue. Cue isiruigañaiño. Cai Nama facaina eo maijide.

<sup>13</sup> Rufo dine cue uaina oredícue. Cai Namana eo raise ñinote. Naimie ei dine cue uaina jiaí oredícue. Naiñaiñodi cue ei isoide.

<sup>14</sup> Asíncrito dine cue uaina oredícue. Flegonte dine cue uaina oredícue. Hermas dine cue uaina oredícue. Patrobas dine cue uaina oredícue. Hermes dine cue uaina oredícue. Naimaci illanomo ite creyentiaí dine cue uaina oredícue.

<sup>15</sup> Filólogo dine cue uaina oredícue. Julia dine cue uaina oredícue. Nereo dine cue uaina oredícue. Naimie miriño dine cue uaina oredícue. Olimpás dine cue uaina oredícue. Nana naimaci illanomo ite creyentiaí dine cue uaina oredícue.

<sup>16</sup> Conini caimare omoi uaido. Diga nairaimo creyentiaí itimaci. Nana naimacidi omoi dine naimaci uaina oredimaci.

<sup>17</sup> Cue amataí, daje rafuena nia lloiticue. Omoi comeciaí daje isoi lloitañedino diga nabairiño. Uai uaitacabidino diga nabairiño. Omoi jai cacaja rafuena lloñedimaci; iadedi jiaie rafuena lotimaci. Naimaci diga nabairiño.

<sup>18</sup> Cai Nama Jesucristo facaina maijifedimaci; iadedi dani naimaci jitailla rana maijicabidimaci. Mare isoide llumona abina raise uññoñedinona jifuetimaci.

<sup>19</sup> Ailluena cominidi Cristona omoi ñnuana uñnotimaci. Ieri iobidícue. Marecinona finuana raise omoi uñuana jitaídícue. Marañedícinona omoi finuana jitaíñedícue.

<sup>20</sup> Jusñamuidi omoína uri itatate. Naimie omoína canoite, Taifena anafetitallena. Cai Nama Jesucristo omoína duenaillesa.

<sup>21</sup> Omoi dine Timoteo ie uaina orede. Cue diga jiaí maijicabide. Lucio ie uaina jiaí orede. Jasón ie uaina jiaí orede. Sosípater ie uaina jiaí orede. Naimacidi cue comini.

<sup>22</sup> Tercidícue. Pablo facaina bie cartana omoímo cueticue. Cai Namamo cue duilla jira, omoímo cue uaina oredícue.

<sup>23</sup> Gayodi ie uaina jiaí orede. Naimie jofomo ricabidícue. Creyentiaídi naimie jofomo rocabitimaci.

<sup>24</sup> Erasto ie uaina orede. Naimiedi bie nairai ie ucube eenoraíma. Cuarto ie uaina orede. Naimiedi jiaí creyente.

*Jusiñamui iobillacinona jaca cai fecajasa*

<sup>25</sup> Cue mare rafue llua isoi, Jusiñamui omoi comeciaina ocuiñotarede. Jesucristo rafuena llocabiticue. Jusiñamuidi cominimo naie rafuena jaie uiñotañede;

<sup>26</sup> iadedi Jusiñamui caina iena birui jai uiñotade. Nana comini iena uiñollena, Jusiñamui facaina lloraini micoriai iena jaie cuetimaci. Jusiñamui llua jira, Cristona comini ñnollena, nana cominido bie rafuena llocana birui jaide. Jusiñamuidi jaca ite.

<sup>27</sup> Jusiñamuidi naga rana uiñote. Naimiemo Jesucristo mamecido iobillacinona jaca cai fecajasa. Mai. Macaibaite. Pablocicue.

## CORINTOMO ITE CRISTONA HNOTINOMO PABLO NANO ORETAGA RABE

*Corintomo ite creyentiaimo Pablo cartana orede*

<sup>1-2</sup> Corinto railla nairaimo ite creyentiai, ¿nie isoidomoi? Pablodicue. Carta omoimo oredicue. Jusiñamui jitailla jira, Jesucristo rafuena cue lollena, cuena fetode. Sóstenes cue diga illa jira, omoi dine coco uaina oredicoco. Jesucristo dibeimona naimiedi cai ama. Jai Jusiñamui cominidomoi. Jesucristomo omoi duilla jira, Jusiñamui omoína jai marebicaitate. Jusiñamui omoína fetode, naimie iena. Ua nana cai Nama Jesucristona sedadinodicaidi Jusiñamui iena.

<sup>3</sup> Cai Moo Jusiñamui, cai Nama Jesucristo diga, omoína jai duenaite. Iena uiñocana mai omoi jai. Iaimaia omoína uri jai itatatiamaia. Iena omoi uiñocana mai omoi jai.

*Cristo muidona Jusiñamuimona ailluena feñoticaí*

<sup>4</sup> Jusiñamui diga cue ñaia, omoi facaina iobillacinona jaca fecadicue. Jesucristomo omoi duillamona, Jusiñamui omoína jai duenaite. Ie jira naimiemo omoi facaina iobillacinona jaca fecadicue.

<sup>5</sup> Jusiñamui omoína duenaillamona, ie rafuena omoi lollena, naimiemona ailluena uaina feñotomoi. Cristomo omoi duillamona, naga icaño Cristo rafuena omoi jino lloia, omoína eo canode. Omoína naimiemo ite rafuena raise uiñotade.

<sup>6</sup> Ie muidona Cristo rafuena raise ñnotomoi. Cristo rafuena cai jino llumona, naimiemo raise ñnofidomoi.

<sup>7</sup> Ie muidona Jusiñamuimona omoimo jaca buena fiebiñede, naimie dibeimo omoi raise maijillena. Naimie dibeimo omoi raise maijamona, naimie dibeimo jiaie creyentiaina raise itatacana jaidomoi. Cai Nama Jesucristo abido billemo iocire omoi ocurillanona, Jusiñamuimona ailluena rafuena feñotomoi.

<sup>8</sup> Jeacinona omoi finocabi raillano, naimie nia abido biñelle dinori Jesucristo omoi comeciaina raise sedaite. Cai Nama Jesucristo abido bia, nicino omoimo iñena muidona, omoína duere finoñeite. Naimie bia, naimacimo jeacino nia illa jira, naimiena ñnoñedinona duere finoite.

<sup>9</sup> Jusiñamui ie lloga uaina jaca finoite. Naimie ñnogamie. Naimie Jitona omoi nabaillena omoína fetode. Naimie Jitodi cai Nama Jesucristo.

*Naimaci comeciai daje isoi lloñedimaci*

<sup>10</sup> Cue amatiai, omoimo rafuena lloiticue. Cai Nama Jesucristomo omoi duilla jira, iena lloiticue. Omoi comeciai daje isoi lloillana jitaidicue. Daje isoi omoi comeciai facajana jitaidicue.

<sup>11</sup> Cloé raillamie cominimona bie rafuena cue fidia jira, iese omoimo lloticue. “Omoi comeciai daje isoi ññedomoi” naimie llote.

<sup>12</sup> Omoimona damierie raitomoi: “Dani Pablo llofuia dibecinodo jai jaidicai”. Damierie raitomoi: “Dani Apolos raillamie llofuia dibecinodo jai jaidicai”. Damierie raitomoi: “Dani Pedro llofuia dibecinodo jai jaidicai”. Damierie raitomoi: “Dani Cristo llofuia dibecinodo jai jaidicai” raitomoi. Nana iese itomoi. Iemona omoi comeciai daje isoi ññedomoi. Cloé cominimona iese fididicue.

<sup>13</sup> Ero, diga omoi Jilloitaraini ññede. Omoi jeacinomona omoi jillobillena, dama Cristo illa. Omoi facaina cruzmo cuedi fiodiañedidicue. Cue dibeimo omoi illena cue bautizañegaomoi.

<sup>14</sup> Omoína cue bautizañena jira, omoimo ite rafue cuemona comuiñena jira, iobidicue. Dama Crispona bautizadicue. Gayona jiaie bautizadicue.

<sup>15-16</sup> Estéfnas jofomo ite cominina bautizadicue. Jiaie cominina cue bautizajana comeciñedicue. Ie muidona: “Pablo facaina bautizadicaí” llonidomoi. Daje isoi omoi comeciai lloññena, cue muidonañede.

<sup>17</sup> Ailluena cominina cue bautizallena, Cristodi cuena oretañede; iadedi naimie rafuena cue llofuellena, cuena oretate. Eo abina uiñoraima isoi omoimo cue llofueticuedena, cue lloga rafuemo omoi comeciaina facañedomoi. Ie jira eo abina uiñoraima isoi omoimo llofueñedicue. Cristo fiodaillamona, omoi jeacinomona naimie omoína jillotade. Iena omoi feitañenana jitaidicue.

*Cristo finoca rafuemonna Jusiñamui uai siñonana uiñoticaí*

<sup>18</sup> Cristona ñnoñedinomona cruzmo Cristo fiodailla rafuedi jamaifue. Naimacidi faificana jai jaidimaci. Jusiñamuimona naie rafue illa jira, caimona naie rafuedi siño. Naie uaidi diga comini comeciai meidorede. Caidi naie rafuena ñnotinodicaí.

<sup>19</sup> Ero, Jusiñamui facaina lloraima micori Cristona ñnoñedinona jaie cuete:

Jusiñamui llote: “Abina uiñoraini imaci uiñuacinona saitaiticue.

Abina baitadino imaci baitajacinona saitaiticue” llote.

Ie muidona naie isoide comini jilloñenana jai uiñotícaí.

<sup>20</sup> Naie isoide comini uiñuacinomona jaca jillonidícaí. Abi uiñoraima uiñuacinodi Cristo fiodailla rafue baifemo faíñede. Moisés micori cuegafuena uiñoraima uiñuacinodi Cristo fiodailla rafue baifemo faíñede. Uaina uaitatímie birui ite uiñuacinodi Cristo fiodailla rafue baifemo faíñede. Jusiñamuidi naimiena uiñoñedino imaci abi uiñuacinona jai jamaitate. Iena naimie jamaitajamona, naimaci uiñuacinodo naimaci jilloñenana jai uiñotícaí.

<sup>21</sup> Ie jitaillacino diese Jusiñamui finua jira, naimaci abi uiñuacinomona naimiena ñnoñedimaci. Ie jira naimie mare jitaillacinomona, naimiena ñnotinona jai jillotate. Naimaci jeacinomona naimacina jai jillotate. Cristo rafuena cai lluumona ñnotimaci. Jusiñamuina ñnoñedinodi naie rafuena: “Jamaifue” raitimaci.

<sup>22</sup> Siño rafuena naimaci cioacana jira, judíuai railla cominidi iese raitimaci: “Siño rafuena Jusiñamui finoa, omoi lloga rafuena ñnoitícaí” raitimaci. Grieguái railla comini ñnena raitimaci: “Omoi lloga rafuena cai abina uiñuacino ie isoi itena, iena ñnoitícaí” raitimaci;

<sup>23</sup> Iadedi Cristo rafuena llocana jaidícaí. Cruzmo naimie jai fiodaillana llotícaí. Ie jira judíuaidi cai lloga rafue muidona iciritímaci. Naiena oiacaiñenano iciritímaci. Damie naimaci illaimana jaillemo ocuridímaci. Naimaci ocurillamie fiodaillamo naimaci comeciaina facañedimaci. Cristo fiodailla jira, raitimaci: “Naimiedi cai ocuriñenamie” raitimaci. Judíuaiñedino ñnena raitimaci: “Omoi lloga rafuedi jamaifue” raitimaci. Ailluena comini cai lloga rafuena jitaíñedimaci;

<sup>24</sup> Iadedi Jusiñamui damierie judíuaina jai fetode. Dajerie judíuaiñedinona jai jai fetode. Cruzmo Cristo fiodaillamona, jeacino anamona naimaci jillua jira, naie fetocano ñnena Jusiñamui uai siñonana uiñotímaci. Cristo finoca rafuedo naimaci jilluumona, Jusiñamui abina uiñuana jai uiñotímaci.

<sup>25</sup> Jusiñamui Cristona orede, cai jeacino facaina naimie fiodaillena. Jusiñamuina ñnoñedinomona Cristo finoca rafuedi jamaifue. Ebinidífue. Caimona Cristo finoca rafuedi Jusiñamui ñnoñedino uiñuacino baifemo faíte.

<sup>26</sup> Cue amatíai, Jusiñamui omoína navui fetode; iadedi ¿ñie isoidomoi? Jamai bue isoidomoi. Omoi comeciaina iemo faca. Jusiñamuina ñnoñedinomona abina uiñoñedomoi. Omoi creyentíai ñibeimo eo abi uiñotino raise íñedimaci. Omoi creyentíai ñibeimo illaicomini raise íñedimaci. Omoi creyentíai ñibeimo ucuberedino raise íñedimaci. Jusiñamui ie isoidinona eo fetoñede;

<sup>27</sup> Iadedi abina uiñoñedino raillanodomoina fetode, eo abina uiñotino ñnena meidaillena. Illaicominiñedinona jai fetode, illaicomini ñnena meidaillena.

<sup>28</sup> Jamai bue isoidinona fetode, jamai bue isoiñedino baifemo faillena. Jusiñamuimona jamai bue isoiñedinodi jamai comini.

<sup>29</sup> Ie muidona jaca buna Jusiñamui uicomo abina íedoñena.

<sup>30</sup> Caina ie cominina Jusiñamui jaitaja jira, Jesucristomo duidícaí. Cristomona Jusiñamuina uiñotícaí. Cristo fiodailla jira, Jusiñamui cai jeacinona feitete. Iemona jeacino cai finoñellena, caina canocabide. Jusiñamuidi jeacino anamona caina jai jai jillotate.

<sup>31</sup> Jusiñamui facaina lloraima micori iena jaie cuete: “Bu abina íedoiacania, nana Cristo finoca rafue diga naimie abina íedua” cuete.

## 2

### *Pablodi cruzmo Cristo fiodailla rafuena llocabite*

<sup>1</sup> Cue amatíai, omoi ñne navui cue rillamona, Jusiñamuimona cue feiñoga rafuena llofueticue. Omoi baifemo eo abina uiñotícuedena, iese ñiade llofueñedicue.

<sup>2</sup> Daje rafuemo cue comeciaina facacabidícaí. Ie jira omoimo dama Jesucristo rafuena llofueiacadícaí. Cruzmo naimie fiodailla rafuena llofueiacadícaí.

<sup>3</sup> Omoi motomo navui cue ia, meiruioicaillamona jacinaioidícaí. Jusiñamui facaina cue raise jino lloñeni raillano jaciruioidícaí.

<sup>4</sup> Comini abi uiñuacinodo omoimo llofueñedicue; iadedi omoi jeacinomona omoi jilluumona, Jusiñamui Joreñodi omoína cue lloga rafue siñonana uiñotade.

<sup>5</sup> Jusiñamuidi cue iese llofuiana jitaide. Comini abina uiñuacinona omoi cacajamona, Cristona ñnoñedomoi; iadedi Jusiñamui omoína jillotaja jira, jai ñnotomoi.

### *Jusiñamui Joreñodo bie rafuena uiñotícaí*

<sup>6</sup> Comini abi uiñuacinodo llofuecabiñedícaí; iadedi Jusiñamuimona ite abi uiñuacinodo llofueticue. Cristona raise ñnofidinomona abi uiñuacinodo llofueticue. Cristo facaina llorainidi cue isoi jai llofuecabitímaci. Cominimo jai ite uiñuacinodo llofueñedicai.

Illai comini uifogacinodo llofueñedicaí. Ico faifitímaci. Ico jiaí uainicaitímaci. Ie jira naimaci uifogacinodo llofueñedicaí;

<sup>7</sup> Iadedi Jusifñamui mona abi uifñuacinona cai feifñuamona, iedo llofuetícaí. Nano dofoconi, enirue nia finofñenia, naimie comeci iena uifñote. Monamo naimie ebirede illanomo íco cai illena jitaide. Iena jaie cai uifñofñedicaí. Jusifñamui jaca buna iena jaie uifñofañede.

<sup>8</sup> Birui ite illaicominidi Jusifñamuimo ite rafuena nia uifñofñedimaci. Iena uifñofñedimacídena, cruzmo cai ebirede Namana meinefñedimaci. Naimie uai ebirede. Nana ra naimie jai finua jira, naimie uai siño. Jusifñamui rafuena raise uifñofñedimaci; iadedi Jusifñamui caina iena uifñofñede.

<sup>9</sup> Jusifñamui facaina lloraima micori iena jaie cuega:

Jaca buna naimiena ñnotino facaina Jusifñamui finoca rafuena cioifñede.

Jaca buna iena cacaiñede.

Jaca buna iemo comecina facañede

cuega. Jusifñamui rafuena uifñofñedino naie rafuena jaca uifñofñeitímaci; iadedi naimiena isiruitino naie rafuena uifñofñimaci.

<sup>10</sup> Birui Jusifñamui caina iena uifñofñede. Ie Joreñodo caina uifñofñede. Ie Joreño naga rafuena uifñofñede. Nana Jusifñamui comecimo iticinona jiaí uifñofñede.

<sup>11</sup> Jaca budi jiaimie comecimo iticinona uifñofñede. Dama naimie iena uifñofñede. Ie isoide. Jaca budi Jusifñamui comecimo iticinona uifñofñede. Dama naimie Joreño iena uifñofñede.

<sup>12</sup> Jusifñamuimona ie Joreñoña jai feifñofñotícaí. Jiaie cominimona naie Joreñoña feifñofñedicaí. Jusifñamui Joreñodi caina Jusifñamui caimo caidifñeno fecaca rafuena uifñofñede.

<sup>13</sup> Omoimo naie rafuena llofuecabitícaí. Cominimona fueoga uaido llofueñedicaí; iadedi Jusifñamui Joreño caimo llofuaia uaido llofuetícaí. Ie jira Jusifñamui Joreño ite cominimo naie rafuena llofuecabitícaí.

<sup>14</sup> Jusifñamuina ñnofñedinodi Jusifñamui Joreño mona iticinona feifñofñedimaci. Naimacimona naie rafue jamaifue. Iena cacaiñedimaci. Iena jiaí uifñofñedimaci. Dani Jusifñamui Joreño illa cominidi naiemo cacarefñidimaci.

<sup>15</sup> Nana Jusifñamui jitailla rafue diese cacadimaci. Jusifñamuina ñnofñedinodi Jusifñamui Joreño illa comini illa rafuena jiaí raise uifñofñedimaci.

<sup>16</sup> Jusifñamui facaina lloraima micori iena jaie cuega: “Jaca buna Jusifñamui comecimo iticinona uifñofñede. Budi naimiena jiaí llofuenide” cuega. Ero Cristo comecimo iticinona cai uifñua jira, Jusifñamuina ñnofñedinodi caina raise uifñofñedimaci. Caina jiaí llofuenidimaci.

### 3

#### *Danomo Jusifñamui díbeimo maijidimaci*

<sup>1</sup> Cue amatiaí, Jusifñamui Joreño anamo itinona omoi raise itomoidena, omoína llofueñedicue. Omoi jitaillacinodo nia omoi jailla jira, omoína llofuetícaí. Cristo rafuedo janore jai jaidomoi. Jusifñamui uruiaína jai jaidomoi; iadedi monoi ijina jirode urue isoidomoi. Jusifñamuimona nia moonañedomoi isoidomoi. Creyentiaína omoi jailla mei, Cristo rafuedo eo jañedomoi.

<sup>2</sup> Feinde rafuena navui llofuetícaí. Eo feirede rafuena omoimo llofueñedicue. Omoína iena nia llofueñedicue. Omoi uruiaí janore moonaila mei, guitímaci. Ie isoide. Cristona cai ñnua mei, naimie rafuena ñnocana cai jailla; iadedi omoi raise jañfñena jira, Jusifñamuimona nia moonañedino isoidomoi.

<sup>3</sup> Nia omoi jitaillacinodo jaidomoi. Jusifñamui Joreño anamo nia raise ifñedomoi. Coninina abina uradoidomoi. Omoi comeciaí daje isoi lloifñedomoi. Jusifñamuina ñnofñedino isoi nia itomoi. Jamai ebe isoi nia itomoi.

<sup>4</sup> Omoimona damierie: “Pablo llofuaia díbecinodo jaidicaí” raitomoi. Jiaíno: “Apolos raillamie llofuaia díbecinodo jaidicaí” raitomoi. Iese omoi raia, Jusifñamuina ñnofñedino isoi itomoi. Ie jira iese raiñeno.

<sup>5</sup> Jamai bue isoidicue. Apolos jiaí jamai bue isoide; iadedi Jusifñamui díbeimo coco maijiamona, Cristo rafue coco llofuiamona, iena ñnotomoi. Jusifñamui cocomo lua isoi, ie rafuena lloticoco.

<sup>6</sup> Naie rafuena cue llofuiamona nano ñnotomoi. Ie mei Apolos iena dane llofueite. Iese llofueuidicoco; iadedi dama Jusifñamui omoína naie rafuena ñnotacana jaide.

<sup>7</sup> Ie muidona naiemona cai fueua. Jamai bue isoidicoco. Jusifñamui coco baifemo faite. Ie jira naimie omoína ñnocana jaitate.

<sup>8</sup> Daje uaina Apolos diga maijidicue. Coco maijia diese Jusifñamuimona coco íbana feifñofñotícaí.

<sup>9</sup> Jusifñamui facaina maijidicoco; iadedi naimiedi omoína ñnocana jaitate. Naimiedi omoi comeciána marena itatacana jaitate.



<sup>10</sup> Jusiñamui cuemo llua isoi, naimie cuena canua diese, Cristo rafuena llofueticue. Cristo rafuena eo cue uiñuamona, Cristo rafuena omoimo navui llofueticue. Cue llua mona Cristona ñnotomoi. Birui jiaimie omoina naie rafuena jai llofueete. Omoi comeciaino naie rafue raise itabillena, omoina llofueete. Bu omoina llofueia, omoi comeci marena illacinomo naimie comecina facajanona, omoina naimie llofuecabilla.

<sup>11</sup> Omoi jeacinomona omoi jilloillena, jaca daje rafue ite. Jiaie rafuedi ññede. Iena omoimo jai llofueticue. Naie rafuedi Jesucristona ññate.

<sup>12</sup> Iena raise atona bu llofueia, uanaicinona jaca llofuiamona, cominina Cristona ñnocana jaitate. Naie rafuedi naimaci comeciaino raise itabide. Iena raise atona bu llofueñenia, uanaicinona jaca llofueñenia, cominina Cristona ñnocana jaitañede. Naie rafuedi naimaci comecimo raise itabiñede.

<sup>13</sup> Jusiñamuidi nagamie ie llofuiacinona ico lloite. Jesucristo abido bia, Jusiñamui nie isoidicinodo naga naimie facaina maijidino llua nalloite. Naimaci llogacinona eo facaciite.

<sup>14</sup> Ie mei Cristo rafuena raise atona llotinodi Jusiñamuimona ibana feiñoñetimaci.

<sup>15</sup> Cristo rafuena raise atona lloñedinodi Jusiñamuimona ibana feiñoñetimaci. Naimaci niade jiai faifitimaci; iadedi faifñeitimaci. Jusiñamui diga jaca iitimaci; iadedi tainomo maijidimaci.

<sup>16</sup> Jusiñamui ie illano omoi comeciaino illana uiñotomoi. Naimie Joreño omoimo illa jira, Jusiñamui ie illanodi omoi creyentiai.

<sup>17</sup> Cristo dibeimona omoi creyentiaina bu abido danomo itataia, Jusiñamui naimiena duere finoite. Jusiñamui omoimo jai illa jira, naimiemo jai duidomoi. Ie jira naimie dibeimona omoina itatatimiena duere finoite.

<sup>18</sup> Bie rafuedo omoi raise jaillena, dani omoi abiaina jifueñeno. Creyenteñedinu uiñuacinodo jaiñeno. Omoimona bu iedo jaacania, naimiemo llono: "Naie isoide rafuedo o jaiñeno". Iedo naimie jiaia, creyenteñedinomona abina uiñote; ia Jusiñamuimona abina uiñoteite. Jusiñamuimona abina uiñotinona omoi jaillena, creyenteñedinu uiñuacinodo omoi jaiñeno.

<sup>19</sup> Jusiñamuimona naimiena ñnoñedinu uiñuacinodi jamaifue. Jusiñamui facaina lloraia micori jiaie cuela: "Jusiñamuidi comini abi uiñuacinona uiñuanona, naimacina jai emodofide. Naimacina jai duere finode".

<sup>20</sup> Jiai cuela: "Jusiñamuidi abi uiñotino railla comini imaci comeci facajacino jamaifueña uiñote".

<sup>21</sup> Ie jira omoi llofuerañiri abi iedoñeno. Jusiñamuimona nana rafue omoimo jai illa jira, naimaci abi uiñuacinodo abina iedoñeno.

<sup>22</sup> Marena omoi comeciailacino jitai raillano, Cristo omoi dine caina oretate. Cuena oretate. Apolona oretate. Pedrona oretate. Naiemona omoi ra ollena, omoi jitai raillano, eniruedi ite. Omoi jitai raillano, birui nana omoimo ite rafuedi suide. Omoi jitai raillano, jaiñuido nana omoimo ite rafuedi suite. Nia omoi fiodañenia, Cristo omoina canoite. Omoi fiodaia, naimie dine jaitomoi. Naiemona marena omoi comeciailacino jitai raillano, ua nana rafue omoimo jai ite.

<sup>23</sup> Cristomo omoi jainaiailla jira, naimie anamo itomoi. Jusiñamuimo Cristo jainaiailla jira, naimie Jusiñamui jitailla rafuena jaca finocabide. Ie jira naimie jitaillacinona finocana omoi jai.

## 4

### *Cristo fetocano naimie dibeimo maijide*

<sup>1</sup> Caimo omoi comeciaina faca. Cristo dibeimo maijidicai. Jusiñamui rafuena llocana jaidicai. Iena jaiie uiñoñedicai; iadedi naimie caina uiñotaga rafuena birui llofueticai.

<sup>2</sup> Ero, naga patródi naimie dibeimo maijidino naimie lloga uaina ñnuana jitaide. Ie isoide. Jusiñamuidi ie facaina llorañi naimiena naimaci ñnuamona naimie rafuena raise llua naja itaide.

<sup>3</sup> Cue uaina omoi uaitañenia, iena omoi uaitaia, jiaño iena uaitaia, iemo comecina facañedicue.

<sup>4</sup> Cuemo nicino ia, iena uiñoñedicue; iadedi Cristomona cue comecimo jeacino nibai ite. Ia, naimie cuemo lloite. Iemona cuena duere finoite.

<sup>5</sup> Ie jira: "O llucino mare" cuemo lloñeno. "O llucino marañede" cuemo jiai lloñeno. Cai Nama nia abido biñenia, iena cuemo omoi lloñeno. Naimie bia, nana comini comeciaino ite rafuena uiñoteite. Naimaci comeciaino ite jitaillacinona uiñoteite. Iemona naimaci maijia dinori Jusiñamuimona iobillacinona feiñoñetimaci. Naie facaise cuemo ite rafuena lloite. Ie jira nia cuemo lloñeno.

<sup>6</sup> Cue amatai, naie rafuena omoi raise uifollena, Apolona ja ñaiticue. Cocomona omoi fueollena, cuena jiai ja ñaiticue. Omoi facaina ñaiticue. Jusiñamuina cuegafue llua isoi, omoi illana jitaidicue. Omoi llorainiri tainomo iobiñeno. Omoi Cristo facaina llorainimona damie jiaie lloraima baifemo faiamo omoi comeciaina facañeno.

<sup>7</sup> Nana omoi llofuerañidí daje isoidimaci. Jusiñamuimona nana naimacimo ite uaina feiñotimaci. Dani naimaci comeciainona iena naimaci ofena jira, ie diga abina iedofeno.

<sup>8</sup> “Nana Jusiñamuimona iticinona jai feiñoticaí. Jusiñamuimona nana cai jitaillacinona caimo jai ite. Jusiñamui sedajanomo illainina isoi jai iticaí” omoi comeciaina facadomoi; iadedi nia iese iñedomoi. Nainomo itomoidena, nainomo coco jiai illa jira, cuemona eo mare. Nainomo iticocodena, cuemona eo mare; iadedi jiaie rafuemo cue comecina jai facadicue.

<sup>9</sup> Jusiñamuidi nana omoína cue baifemo faitatate raillanomo cue comecina facadicue. Cristo rafuena llorainidicaí; iadedi cue baifemo omoi faiamo cue comecina facadicue. Omoimona jamai bue isoidicaí. Nana comini duere cai illamo raise eruaidimaci. Jusiñamui jaienisaídi duere cai illamo jai eruaidimaci.

<sup>10</sup> Cristo rafuena cai llua muidona, omoimona ebe isoidicaí. “Cristo rafuena raise inuanona, iedo raise jaidicaí” raillanomo omoi comeciaina facadomoi; iadedi Jusiñamuimona iese iñedomoi. Omoimona cai uaidi raise baiñede. “Cai uaidi caimo raise baite” raillanomo omoi comeciaina facadomoi; iadedi Jusiñamuimona iese iñedomoi. Omoimona jamai bue cai isoilla jira, cairi jaisitomoi. “Jiaie comini cairi iobidimaci” raillanomo omoi comecina facadomoi; iadedi Jusiñamuimona iese iñedomoi.

<sup>11</sup> Cai guille buedi jaca iñede. Iniroinidicaí. Jiaie comini caina duere finodimaci. Jofonidicaí.

<sup>12</sup> Cai ra ollena, cai onolli diga duere majidicaí. Comini caina jeare ñaitimaci; iadedi ibana oñedicaí. Naimaci diga marena ñaiticaí. Caina duere finodimaci; iadedi uai ofeno ibana oñedicaí.

<sup>13</sup> Cai joreña jeare ñaitimaci; iadedi cai dinena naimaci diga marena ñaiticaí. Naimacimona jamai bue isoidicaí. Iese caimo naimaci comeciai nia facadimaci; ia Cristo díbeimo ie rafuena nia llocana jaiacadicaí.

<sup>14</sup> Bie carta cue cuiamona, omoína meiruitaícaíñedicue; ia omoína nia llofueiacadicue. Isiruiga uruaidomoi isoidomoi. Ie jira bie rafuena omoi raise uifluana jitaidicue.

<sup>15</sup> Omoína Cristo rafuena llofuellena, diga lloraini omoimo ite; iadedi cuemona Cristo rafuena omoi nano cacaja jira, omoi moo isoidicue. Cue uruíaína jai jaidomoi isoidomoi.

<sup>16</sup> Ie jira omoimo cue llogacinodo mai omoi jai.

<sup>17</sup> Iedo omoi jaillena, omoína canollena, omoi dine Timoteona jai oredicue. Naimiēna isiruiticue. Naimiedi Cristo ie inogamie. Cuemona Cristo rafuena naimie cacajanona, iena inote. Ie jira naimiedi cue jito isoide. Creyentiaí illanomo cue ia, Cristo rafuena jaca llofueticue. Naie rafuedo cue jitailla isoi, iedo omoi raise jaillena, naimiedi omoína llofueite.

<sup>18</sup> “Pablo caina jacruilla jira, naimie cai dine biñeite” raillanomo omoi comeciaina facajamona, omoimona damierie jai abina biridomoi.

<sup>19</sup> Iese comeciaina facadomoi; iadedi Jusiñamui jitaía, omoi dine raire jaiticue. Ie mei nie isoide uai naie abina biridinomo illana uifñoiticue. Naimaci ñaiacinodo iena uifñoiticue; iadedi naimaci finoca rafuemonona iena uifñoiticue.

<sup>20</sup> Ero, jamai ñaiamona, Jusiñamui anamo naimie jitailla isoi iñedicaí; iadedi naimie finoca rafuedo cai jaillamona, naimie jitailla isoi iticaí.

<sup>21</sup> Omoi dine ico cue ria, ¿ñiese omoi diga ñaiticue? Cuemo llono. Cue llua omoi inoñenia, omoimo riire lloiticue. Cue llua omoi inoía, omoína cue isiruillamona, omoimo fecuise lloiticue. Ie jira cuemo llono.

## 5

### *Pablo eo jearede rafuena finodimiena riire lloite*

<sup>1</sup> Jiaie rafuena omoimo lloiticue. Eo jearede rafue omoi motomo jai illana jai fididicue. Jusiñamuina inoñedino naie isoide rafuena finoñedimaci; iadedi omoimona damie ie eicaña ote, ie aina.

<sup>2</sup> Jearede rafue omoi motomo ite; iadedi nia abina iedotomoi. Naie isoide rafue omoi motomo navui suilla jira, ¿bue ñellena sunañedomoi? Omoi rocabillacomo naimie bia, naimie fo billana rairui.

<sup>3</sup> Omoi dine iticuedena, bie rafue dani omoi siadollena, omoi danomo ofillena lloticue. Omoi dine cue iñena jira, cue comecidi omoi dine ite. Bie rafuemo cue comecina facaoidicue. Bie rafue omoi diga are siadoñeiticue; iadedi naie rafuena finodimiena cue ñaiana jai uifñoiticue.

<sup>4</sup> Cai Nama Jesús facaina cue ñaiamona, naimiena ñaiticue. Ofillanona bie rafue omoi siadollena, omoi diga cue iacanana omoi comeci. Omoína canollena, cai Nama Jesucristo omoi diga ite.

<sup>5</sup> Taifemo jearede rafuena finodimiena sofe. Taife anamo naimie jai illa jira, duere sefuite; iadedi naiemona fueoite. Duere sefuillamona, Cristo dibeimo dane iite. Cristo ico abido bia, naimiedi Cristo dibeimo dane raise illa jira, Cristo naimiena duere finoite.

<sup>6</sup> Jearede rafue omoi motomo illa jira, ¿buena abina iedotomoi? Janorede siritate ra juilliruaiamo faiamona, nana naie juilliruai siricana jaitate. Iena uiñotomoi. Ie isoide. Janorede jearede rafuemona, eo ailluena jearede rafuena oni jaide. Omoimo ite jearede rafuemona oni omoi i, naiemona jearede rafuedo omoi jaisa.

<sup>7</sup> Juduiai railla cominidi pascua railla rafuena finoacania, nana siritate ra naimaci jofuemona oni dotadimaci. Ie isoide. Cristo jitailla isoi omoi illena, omoi comeciaino ite jeacinona fainonocai. Jeacino anamo omoi jai illa jira, iena fainonocai. Pascua rafue facaiseoni juduiai cominidi toica llaudaiai fajamona, naimaci jeacino facaina Jusiñamui ibana oñede. Cai facaina Cristo jai fiodailla jira, cai jeacino facaina Jusiñamui ibana oñeite; iadedi iemona naimiena nabaidicai. Ie jira jeacinona finocana cai jaiñeno.

<sup>8</sup> Cai facaina Cristo fiodailla jira, cai jeacinona fainonocaillanona, Jusiñamui jitailla isoi mai cai i. Jeacinona finocana cai jaiñelli. Uanaicinodo mai cai jailli.

<sup>9</sup> Jiaie cartana omoimo navui oredicue. Imaci aiñede riñoniai diga itino diga nabairiñellena lloticue. Naiñaiñuiai iniñede iñiaia diga itañaiñuiai diga nabairiñellena lloticue.

<sup>10</sup> Nibai iena raise cacaiñedomoi. Ie jira iena dane lloiticue. Cristona iñoñedinona ñaiñedicue. Naimaci aiñede riñoniai diga ia, naiñaiñuiai iniñede iñiaia diga ia, naimaci rana nicidoia, rana naimaci fiia, jiraraina naimaci sedajia, naimaci diga omoi nabairiñenana ñaiñedicue. Iena rairuiñedicue. Iena cue rairuidicuedena, naganomo Jusiñamuina uiñoñedino illa jira, ¿inomo niadedi iticai?

<sup>11</sup> “Cristona iñoticaí” raitinona ñaiticue. Naimaci aiñede riñoniai diga naimaci ia, naiñaiñuiai iniñede iñiaia diga naiñaiñuiai ia, rana naimaci nicidoia, jiraraina naimaci sedajia, jiaie cominina naimaci jeare ñaia, naimaci jifaicabia, rana naimaci ficabia, naimaci diga nabairiñeno. Naie isoidino omoi jofuemo feiñoño.

<sup>12-13</sup> Cristona iñoñedinona ñaiñedicue. Naimaci rafue cuemo duiñede; iadedi maraiñedicinona naimaci finoia, Jusiñamui naimacina duere finoite; iadedi Cristona iñotino maraiñedicinona finoia, naimacimo riire llono. Omoi motomo ite jearede rafuena finodimiena omoi rocabillacomo bia, naimie fo billana rairui.

## 6

### *Cristona iñoñede juezmo jiaie creyentena llogidoño*

<sup>1</sup> Jiaie omoi finoca rafuena fididicue. Jiaie creyentedimie diga omoi nicino ia, ¿bue ñellena jiaie creyentiaia dine jaiñedomoi, naicinona siadollena? ¿Bue ñellena Cristona iñoñede juez dine naimiena meiruiñoño llogidotomoi?

<sup>2-3</sup> Jesucristo abido bille mei, Cristona iñotinodicaidi Cristona iñoñedinona duere sefuillena lloticaia. Taife comini duere sefuillicinona ico jiai lloticaia. Iena uiñotomoi. Naimacimo omoi ico llua jira, ¿bue ñellena birui omoimo ite rafuena dani omoi raise finonidomoi?

<sup>4</sup> Nicino omoimo ia, ¿bue ñellena Cristona iñoñedino dine jaidomoi? Omoimona naimaci jamai bue isoidimaci. Naie isoide jueces omoimo ite rafuena raise uiñoñedimaci.

<sup>5</sup> Omoi meidaillena, iena omoimo jai lloticue. Naie nicinona raise omoi siadollena, iena raise finollena, omoimona nibai damie ite, iena raise finollena.

<sup>6</sup> Iese finocabiñedomoi; iadedi nicino omoi creyentiaimo ia, Cristona iñoñedimie omoi jiaie creyentena llogidocabitomoi.

<sup>7</sup> Jiaie creyentena omoi llogidoia, Cristo dibeimo raise iñedomoi. Naicino raise omoi finoñenia, uai oñoño anamo ee. Naimiemona omoi duere sefua, dama ite.

<sup>8</sup> Iese iñedomoi; iadedi dani conini jiaie creyentiaina duere finocabidomoi. Naimaci rana fiidomoi. Omoi amana duere finodomoi.

<sup>9</sup> Jusiñamui sedajanomo naimiena iñoñedino duiñeitimaci. Naimaci isoi nia iacadomoi; iadedi Cristo dibeimo omoi illa jira, naimaci isoi inidomoi. Ie jira naimaci illamo omoi abina rairui. Bie isoidino Jusiñamui ie cominina sedajanomo jaca duiñeitimaci: imaci aiñede riño diga itino, imaci iniñede iima diga itino, jiraraina sedacabidino, daje isoide iima diga conima aifiedotino, daje isoide riño diga conioño aifiedotino,

<sup>10</sup> rana bainino ficabidino, rana nicidocabidino, jifaicabidino, jiaie cominina jeare ñaicabidino, cominimona rana bairodino. Nana naie isoidino Jusiñamui ie cominina sedajanomo duiñeitimaci.

<sup>11</sup> Omoimona dajerie iese jaie itomoi; iadedi jiaie rafuedo birui jaidomoi. Cai Nama Jesucristo fiodailla jira, Jusiñamuidi omoi jeacinona jai oni dotade. Iena jai feitate. Ie Joreño uaido omoina ie cominina jai jaitate. Ie muidona naimiemona jai marebicaidomoi.

*Jearede rafuemona abina rairui*

<sup>12</sup> Cristo ðibeimo omoi illa jira, ¿ñiese dani omoi jitaillacinodo jaiacadomoi? Diga Jusiñamui rairuiñega rafue ite. Creyentiai iena finorede; iadedi dajerie Jusiñamui rairuiñega rafuena cai finoñelli, naiemona bue cai ofena jira. Dajerie rafuena cai finocabiñelli, naie rafue anamo cai i raillano. Dani Cristo rafue anamo cai illi.

<sup>13</sup> Raitomoi: “Ñie isoide guille cai guiacania, ñie isoide rafue cai finoacania, caimona mare” raitomoi. Ero, diga rafuena finoredicai. Naiemona jeacino cai ofena jira, aimetaia, guiredicai. Jusiñamuidi cai aimetaillafue ico saitaite. Dajerie rafuena cai finoñena, naiemona jeacino cai ua jira. Jearede rafuena cai finoñellena, Jusiñamui caina finode. Cai aiñede riño diga cai illena, caina finoñede. Cai iniñede iima diga cai illena, caina finoñede. Cristona cai iobitallena, caina finode. Naimie jitaillacinona cai finollena, Cristo caina canoite.

<sup>14</sup> Cristo fiodaite; iadedi fiodaillamona, Jusiñamui na ie abi diga naimiena jillotate. Cai fiodaia, ie uaido na cai abiai diga caina ico jillotaite. Cai abi jaca illa jira, jearede rafuena birui cai finoñena.

<sup>15</sup> Cristomo jainaiaidicai. Iena uiñotomoi. Omoi ainiañede riño diga omoi ia, naiñaiñuaimo jai duidomoi. Cristo naie isoide riñomo jaca duiñena jira, naiñaiño diga iñeno.

<sup>16</sup> Ie aiñede riño diga bu ia, ie ai illa isoi, jai dajena jaidiaimaia. Ie jira Jusiñamui jaie llote: “Riño diga iima illa jira, jai dajena jaidiaimaia” llote.

<sup>17</sup> Cai Nama Cristomo bu duia, dajena jai jaidiaimaia. Jusiñamui Joreño iaimaiaimo illa jira, iaimaiaia comeci daje isoi jai lloide.

<sup>18</sup> Ie jirari naie jearede rafuemona abina rairui. Iesede bu finoia, jearede rafue ie abimo jai finode. Caimanide rafue ie abi diga finode. Jiaie marañede rafue bu finoia, naimie abimo jearede rafue finoñede.

<sup>19</sup> Naimiemo omoi duillanona, Jusiñamui Joreño omoimo illana uiñotomoi. Ie illanodi omoi creyentiai. Jusiñamui jai jainaiaidomoi. Ie muidona omoi jitaillacinodo jaiñeno.

<sup>20</sup> Omoi jeacino facaina Cristo fiodailla jira, Jusiñamui cominina jai jaidomoi. Ie jira omoi finoca rafuemona Jusiñamuina eo iobita.

## 7

*Pablodi iima ie aina ua rafuena ñaite*

<sup>1</sup> Dajerie rafue cuemo jicanollena, carta cuemo navui oredomoi. Iena ja ñaiticue. Iima ie aina uana jicanotomoi. Faidaima jaca dama iacania, cuemona mare. Faidaiño jaca daño iacania, cuemona jiai mare;

<sup>2</sup> iadedi jeacino omoi fino i raillano, nagamie ie aina otene, jiai mare. Nagañaiño ie inina otene, jiai mare.

<sup>3</sup> Naga ini ie ai diga iniacania, naimiemona naiñaiño ie abina caidiñena. Naga ai ie ini diga iniacania, naiñaiñomona naimie ie abina caidiñena.

<sup>4</sup> Naiñaiño abi dañeñede; iadedi dañe ie ini abimo jiai duide. Naimie abi damañede; iadedi dama ie ai abimo jiai duide.

<sup>5</sup> Ie jira: “Danomo iniñeiticoco” lloñeno. Jusiñamui diga o raise ñaillena, naimiemo o comecina raise o facallena, iemo omico comeci daje isoi lloillamona, diga irui illamona danomo omico iniacaiñena, jiai mare. Naie facaise fulla meinomo riño diga o iacanamona, dane danomo ini, Taife omicomo ramo fai raillano.

<sup>6</sup> Dane lloiticue. Jeacinona omoi fino i raillano, nagamie ie aina otene, mare. Nagañaiño ie inina otene, jiai mare. Iese omoimo lloticue; iadedi iese ocuiñedicue.

<sup>7</sup> Ainidicue. Cue illa isoi omoi illana jitaidicue; iadedi daje isoñedicai. Jusiñamui caina itataja diese iese iticai. Dajerie ainidimaci. Dajerie airedimaci. Dajerie inidimaci. Dajerie iniredimaci.

<sup>8</sup> Nia ainidinomo lloiticue. Nia inidinomo lloiticue. Feciñuaimo jiai lloiticue. Ainidicue. Cue illa isoi omoi iacania, cuemona mare;

<sup>9</sup> iadedi omoi ocuiñeniadedi, aina ono. Jiaie riño diga illemo o comecina facañellena, daje riñona ono, o aina. Jiaie iimamo o comecina facañellena, daje iimana ono, o inina.

<sup>10</sup> Creyentiaimo nia lloiticue. Airedinomo lloiticue. Iniredinomo jiai lloiticue. Cue uaido lloñedicue; iadedi cai Nama jaie llote: “Riño ie inina sofeño.

<sup>11</sup> Iima ie aina sofeño” llote. Iese llote; iadedi ñie riño ie inina sofeia, jiaie iimana naiñaiño ofena. Iimana naiñaiño oiacania, ie ini diga dane abido illasa.

<sup>12</sup> Nia lloiticue. Cai Nama buena jaie lloñede; iadedi iena birui cue lloiticue. Omoi nairaimona creyentena damie jaide; ia naimie ai creyentena nia jaiñede. Naimie creyentena illa jira, naimie diga naiñaiño nia iacania: “Naiñaiñoña dotaño” naimiemo llono.

<sup>13</sup> Omoi nairaimona creyentena dañaiño jaide; ia naiñaiño ini creyentena nia jaiñede. Naiñaiño creyentena illa jira, naiñaiño diga naimie nia iacania: “Naimiema dotaño” naiñaiño llono.

<sup>14</sup> Ie ini nia creyentena jaiñenia, ie ai creyentena illamona, naimie diga naiñaiño nia iacania, jeacinona finoñede. Ie ai nia creyentena jaiñenia, ie ini creyentena illamona, naiñaiño diga naimie nia iacania, jeacinona finoñede. Naie creyente muidona, naie iaimaiái uruiaina, jiaie creyente iaimaiái uruiái isoi, omoi roracomo feiño.

<sup>15</sup> Ie inina creyenteñede ai sofeiacania: “Naiñaiñoña dotaño” naimiemo llono. “Naiñaiño jaillena rairuiño” naimiemo llono. Ie aina creyenteñede ini sofeiacania: “Naimiema dotaño” naiñaiño llono. “Naimie jaillena rairuiño” naiñaiño llono. Sofeia mei, jai dajemo duiñediaimaiái. Jusiñamui naga creyente uri illana jitaide;

<sup>16</sup> iadedi ie ini diga ie ai fiebia, ie ini creyentenamona, naiñaiño nibaí creyentena jaite. Ie ai diga ie ini fiebia, ie ai creyentenamona, naimie nibaí creyentena jaite.

<sup>17</sup> Iena lloticue; iadedi Jusiñamui iema ie feiñoña uaido nagamie jailla. Creyentiaina omoi jailla facaiseconi, omoi maijiuilla ramo nia raise omoi maiji. Naga creyentiaí illanomo buena llofuecabiticue.

<sup>18</sup> Nia creyentiaina omoi jaiñenia, judíuai isoi omoi mona dajerie omoi abiaína detatamotoi. Naie detatafue omoi comeciaina birui facaño. Omoi mona dajerie omoi abiaína nia detatañedomoi. Iemo omoi comeciaina birui facaño;

<sup>19</sup> iadedi Jusiñamui uaina omoi inuamo omoi comeciaina birui faca. Jiaie rafue baifemo faite.

<sup>20</sup> Creyentiaina omoi jailla facaiseconi, omoi maijiuilla ramo nia raise omoi maiji.

<sup>21</sup> Creyentiaina omoi jailla facaise omoi mona dajerie patrón anamo itinodomoí. Nia patrón anamo itino isoi omoi jai. Iemo omoi comeciaina jarire facaño. Jiairuido omoi patrón: “Cue anamo iñedomoi” raia, naimie anamona oni omoi jai; iadedi Cristo rafuedo jaca omoi jai.

<sup>22</sup> Cristona omoi inua facaise, patrón anamo omoi mona damierie navui itomoi; iadedi Jusiñamui omoi ina fetode. Naimiema omoi inuamona, omoi jeacino anamo jai iñedomoi. Patrón anamo omoi mona damierie navui iñedomoi; iadedi Jusiñamui omoi ina fetode. Ie jira naimie anamo jai itomoi.

<sup>23</sup> Omoi jeacino facaina Jesucristo fodailla jira, Jusiñamui omoi jeacinona oni dotade. Iena jai feitate. Naimie cominina jai jaidomoi. Ie jira comini jitaillacino anamo iño; iadedi Jusiñamui jitaillacino anamo i.

<sup>24</sup> Cue amatiaí, creyentiaina omoi jailla facaiseconi omoi maijiuilla ramo nia raise omoi maiji. Jusiñamui omoi ina canuanona, jearede rana omoi maijiñenia, nie isoide rana omoi maijia, Jusiñamui ina mare.

<sup>25</sup> Navui cuemo cartana oredomoi. Faidaiñuai illa rafuena uiñoiacadomoi. Cai Nama naie rafuena jaie lloña jira, iena birui lloiticue. Naimie cuena duenailla jira, naimie uaina inoticue. Ie muidona comini inogamiedicue.

<sup>26</sup> Birui duere omoi sefuilla facaise illa jira, omoi illa isoi omoi i.

<sup>27</sup> Omoi mona bu aienia, naiñaiñoña dotaña. Bu ainia, dama ainide. Riñoña oña;

<sup>28</sup> iadedi o aina illena ininide riñoña o otiodena, jeacinona finoñedio. Omoi mona o inina illena ainide imana o otiodena, jeacinona finoñedio; iadedi aina bu ua mei, inina bu ua mei, eo duere maijite. Iese omoi duere sefuiñellena, omoi iena lloticue.

<sup>29</sup> Cue amatiaí, biemo omoi comeciaina faca. Jesucristo abido dane billirui iaírei ite. Naimie jitailla rafuena omoi raise finollena, omoi ainiaimo ite rafuemo omoi comeciaina facaja; iadedi Cristo rafuemo omoi comeciái eo facaja.

<sup>30</sup> Omoi mona damierie sunaia, damierie caimare ia, iemo omoi comeciaina eo facaño. Damierie raruaina ibaia, naieri eo iobierie.

<sup>31</sup> Omoi mona damierie bene ite rana eburitimaci; iadedi iemo omoi comeciaina eo facaño. Iemo omoi comeciaina eo facaia, abi juanide, Cristo rafuena omoi finollena. Cristo rafue nano finuamo omoi comeciaina eo faca.

<sup>32</sup> Omoi comeciái jarire iñenana jitaidicue. Nia ainidimie abi juarede, dama Cristo rafuena maijillena. Naimiema iobitaicade;

<sup>33</sup> iadedi airedimie bene ite rafuemo ie comeciaina facade. Ie aina iobitaicade. Naiñaiño ite rafuemo naimie comeciaina facade. Cristo rafuemo ie comeciaina jai facade;

<sup>34</sup> iadedi mena rafuemo ie comeciaina eo facallemo abi juanide. Inididaiño abi juarede, daño Cristo rafuena maijillena. Nana naiñaiño comeciaina naimiema iobitaicade; iadedi

inirediñaiño bene ite rafuemo comecina facade. Ie inina iobitaiacade. Naimiemo ite rafuemo naiñaiño comecina facade.

<sup>35</sup> Aina uana rairuifedidue. Inina uana jiai rairuifedidue; iadedi omoi raise illena, naie rafuena lloticue. Cristo rafuedo omoi raise marena jaillana jitaicue. Dani Cristo rafuemo omoi comeciaina facajana jitaicue.

<sup>36</sup> Ero, omoimona naiñaiño oiacaga iimamo ie moo, ie jisa caidiñeno fecaca. Naiñaiño jai moonaiilla jira, naiñaiño jitailla jira, naiñaiñona feca. Fecaia, ie moo jeacinona finoñede;

<sup>37</sup> Iadedi inina naiñaiño oiacañenia, naimie comeci llumona, ie comecina eo facajamona, ie jisa feacaaiñenia, jiai mare.

<sup>38</sup> Ie jisana fecaia, mare. Cristo rafuena naiñaiño eo maijillena, ie jisa fecañenia, jiai mare.

<sup>39</sup> Jiaie rafuena lloticue. Riño ie ini nia fioidañenia, naiñaiño naimiemo jaca duide. Ie ini fioidaille mei, jiaie iimano ie ini ifomo naiñaiño oiacania, mare; iadedi creyentedimiena naiñaiño ua.

<sup>40</sup> Naie feciñodi iimano ie inina oñenia, naiñaiño abi juarenite, Cristo rafuena eo maijillena. Ie muidona inirediñaiño baifemo caimare iite.

## 8

### *Jusiñamuina eruaide jiraraimo llicisi fecaja rafue*

<sup>1</sup> Cuemo cartana navui oredomoi. Jusiñamuina eruaide jiraraimo fecaca llicisina jicanotomoi. Naie isoide llicisidi omoi riana uiñoiacadomoi. Iena ja ñaiticue. Naie jiraraina naimaci navui sedaja jira, omoimona damierie naie isoide llicisi riana: “Maraiñede” raitimaci. Creyentiaimona Jusiñamuina eruaide jirarai jamai rana illa jira, damierie naie llicisi riana: “Mare” raitimaci. Bu ieso uiñoia, mare; iadedi iena uiñuamona naimie abiiedoia, naimie comecina raise facañede. Iena naimie riia, jiaie creyentiaimo comecina facañede. Jiaie creyentiaina bu isirui, naimacimo ie comecina facade. Cristo rafuedo jiaie creyentiai raise jaillana jitaide.

<sup>2</sup> “Eo abina uiñoticue” ie comecina bu facaia, nia eo raise abina uiñoñede;

<sup>3</sup> Iadedi Jusiñamuina ua cai isiruillamona, jiaie creyentiaina cai isirui, jai abina uiñoticai. Jusiñamui dinena caina jiai uiñotaacade.

<sup>4</sup> ¿Niese Jusiñamuina eruaide jiraraimo fecaca llicisina ñaiticai? “Jusiñamuina eruaide jirarai jaca cajeñenana uiñoticai” raitomoi. “Jusiñamui jaca dajede. Iena uiñoticai” raitomoi;

<sup>5</sup> Iadedi “Monamo diga sedalle ra ite” dajerie comini raitimaci. Jitomana sedacabidimaci. Fivuina sedacabidimaci. “Eniruemo diga sedalle ra ite” dajerie comini raitimaci. Taifena sedacabidimaci. Janabana sedacabidimaci.

<sup>6</sup> Iena sedacabidimaci; iadedi cai dani Jusiñamuina sedacabidicai. Naimiedi cai Moo. Naimiedi nana rana finode. Nana cominina comuitate. Cai Nama Jesucristo uaido iena finode. Jesucristo caina jillotate. Naimiena cai sedallena, Jusiñamui caina finode.

<sup>7</sup> Jusiñamuina eruaide jiraraidi jamai rana nana creyentiai uiñoñedimaci. Jusiñamuina eruaide jirarai naimaci sedauilla jira, naie jiraraimo birui fecaca llicisi naimaci riia: “Naie jirarai sedadica!” naimaci comeciaina facadimaci. Naie rafue naimaci raise uiñoñena jira: “Jeacinona finodicai” raitimaci.

<sup>8</sup> Ero, nie isoide llicisi cai riamona, llicisi cai riñenamona, Jusiñamui caina feiñoñede. Naimiena cai iinuamona caina feiñote. Buena cai riñenia, buena cai riia, jeacinona finoñedicai. Naiemona marecinona jiai finoñedicai.

<sup>9</sup> Naie llicisina riredomoi; iadedi omoi ama nibai Cristo dibeimo raise iñede. Naie llicisi omoi riia, naimiemona jeacinona jai finodomoi. “Jusiñamuina eruaide jiraraina omoi nia sedadomoi” raillanomo naimie comecina facaite. Iena naimie comecina facajanona, Cristo dibeimo raise jaiñeite. Abido danomo naimie dane jaito.

<sup>10</sup> Nibai abina uiñotomoi; iadedi Jusiñamuina eruaide jirarai illanomo omoi guillena omoi jailla jira, omoina nia Cristo dibeimo raise iñedimie cioia, nainomo jiai guisaite, comecina facajano: “Cue ama Jusiñamuina eruaide jiraraina nia sedaja jira, naiena jiai nia sedaiticue”.

<sup>11</sup> Omoi ama abido danomo jai, omoi muidona. Cristo naimie facaina fioidaite; iadedi omoi finoca rafue muidona, omoi ama abido danomo jaito.

<sup>12</sup> Iese omoi finoia, omoi amana jeacinona finotatomoi. Naimie comecina ocuiñoñedomoi. Ie muidona Cristomo jeacinona jiai finodomoi.

<sup>13</sup> Cristomo jeacino cue finoi raillano, Jusiñamuina eruaide jiraraimo fecaca llicisina riñeticue. Cue ama abido danomo dane jai raillano, naie llicisina jaca riñeticue.

## 9

*Cristo facaina llorainidi naimaci jitailla rana jamai feiñua*

<sup>1</sup> Cue jitaillacinona finoredicue; iadedi Jesucristo jai oretagamiena cue illa jira, naimie jitaillacinona finoacadicue. Cuen a jaie fetua facaise cai Nama Jesúna ciodicue. Creyentiana omoi jailla jira, cai Nama facaina cue maijiana uñotomoi.

<sup>2</sup> Jaie comini Jesucristo oretagamiedicue nibaí uñofedimaci; iadedi omoi iena uñotomoi. Cristona omoi iinua jira, Jesucristo cuena oretajana uñotomoi.

<sup>3</sup> Cue llofuaiacinona bu uaitaia, iese cue llofuaiacinona riidotucue.

<sup>4</sup> Jesucristo rafue lloraimana cue illa jira, omoi dine cue macaria, cue jitailla rana cuemo jamai omoi illa. Jaie rafuena cue maijiñena motomona cuemo jamai omoi illa.

<sup>5</sup> Cue ai cuemo itena, omoi dine naiñaiño cue diga macaria, coco jitailla rana cocomo jamai omoi illa. Omoi dine jaie Jesucristo oretagano naimaci ainiairi macaria, omoi dine Jesucristo amatai macaria, omoi dine Pedro macaria, naimaci jitailla rana naimacimo jamai fecauidomoi. Ie jira, ¿niese cue jitailla rana cuemo jamai fecañeitomoi?

<sup>6</sup> Jaie llorainimo naimaci jitailla rana jamai fecacabidomoi; iadedi cue onolli diga cue maijiana nibaí nia jitaidomoi. Bernabé ie onolli diga naimie maijiana nibaí nia jitaidomoi.

<sup>7</sup> Ero, soldadodi ie guille ibañede. Iena jamaí feñote. Naga illamo maijuidimie ie illimo maijide, naiemona naimie guillena. Naga toiniaina sedauidimiedí naimacina sedade, naimacimona ucube ie ollena. Omoi motomo cue maijia jira, cuena omoi nafuia, omoimo Cristo rafuena llocabitucue.

<sup>8</sup> Jamaí comini uaido naiena llofueñedicue; iadedi Moisés micori cuegafuiaimona iena fueoticue.

<sup>9</sup> Naimie micori jaie cuega: “Jusiñamui llote: ‘Jurareta trigo oni juillena saisia, iemona ie guillesa, ie fuena maiñeno. Maiñenia, ie maijia fuemona guite’ llote”. Ie isoide. Omoi motomo cue maijia fuemona cue jitaill rana cuemo jamai omoi illa. Iena Jusiñamui lloia, dama juraretamo ie comecina facañede; iadedi caimo ie comecina ua facade.

<sup>10</sup> Cristo rafuena cue llofuecabilla jira, cue llua fuemona cue jitaill rana jamai cue feñua. Iemo ocuridicue. Ie isoide. Ie illimo bu maijia, naiemona riana ollena, nainomo maijide. Iemo ocuride.

<sup>11</sup> Omoi motomo Cristo rafuedo omoi raise jaillena, navui llofuetucue. Ie jira cue jitailla raruiaí omoimona jamai cue ua.

<sup>12</sup> Omoimona raruiaina jaie lloraini feñocabilla jira, cuemona Cristo rafuena nano omoi cacaia jira, cue jamaí jai feñua; iadedi omoimona raruiaina jicañedicue.

Cue jitailla raruiaí cue ollena, cue onolli diga duere maijidicue. Ie jira nana cue jitailla raruiaina oñedicue. Cristo rafuena omoi cacaiacañeni raillano, omoimona raruiaina jicañedicue. Raruiaina cue jicaia, omoi comeciaina nibaí facaitomoi: “Raruiaí oiacanano Cristo rafuena naimie llocana uite”. Ie mei Cristo rafuena cacaiacañeitomoi. Ie jira omoimona raruiaina jicañedicue.

<sup>13</sup> Ero, Jerusalémo judíuai comini Jusiñamuina sedauilla jofo ite. Nainomo naie comini toiniaina atuuidimaci, Jusiñamui fecallena. Moisés micori jaie llua isoi, naimaci jeacino facaina toiniaina fajanona fecadimaci. Nainomo maijuidimio comini atica toiniaimona naimaci rillena, ibajanona ocatimiaci. Iena uñotomoi.

<sup>14</sup> Ie isoide. Cristo rafuena llorainidi naimaci rafuena inotinomona naimaci jitailla rana imaci ua. Cristo iena jai llote.

<sup>15</sup> Omoimona raruiaina jaca jicañedicue. Raruiaí birui cue ollena, bie cartana jai cueñedicue. Dama cuemo ite ra diga iiticue. Omoimona iena feñoticuedena, meiruioicaida feñoticue. Omoimona cue feñofena jira, omoi facaina Cristo rafue cue llumona, abina iedoticue. Raruiaí cuemo jamai omoi fecai, ¿niese abina iedoitucue?

<sup>16</sup> Jaie lloraini rana feñua isoi cue feñoia, Cristo rafuena cue llumona abina iedofeiticue. Jusiñamui cuena oretaja jira, naie rafuena llotucue. Iena cue lloñenia, Jusiñamui cuena duere finoite.

<sup>17</sup> Dama cue comeci jitaillamona Cristo rafuena cue lloiacania, Jusiñamui ibana feñoitucue. Dama cue comeci jitaillamona lloñedicue; iadedi Jusiñamui cuena oretaja jira, iena llocana jaidicue.

<sup>18</sup> Ie jira, ¿niese ibana feñoitucue? Ibana nibaí feñoitucue; iadedi omoimo Cristo rafue cue lloia, cuemona mare. Omoimona cue jitailla rana cue oñenia, cuemona mare.

<sup>19</sup> Omoimona raruiaina cue feñofena jira, omoi anamo iñedicue; iadedi dama cue jitaillacinodo jaiñedicue. Creyentenedino diga cue nabairillena, Cristo rafuena naimaci raise cacailena, nana naimaci mare finocana uiga rafuedo jaidicue. Iese jaidicue, ailluena cominina Cristo dibeimo cue itatallena. Iese jaiñedicuedena, eo janore comini Cristo dibeimo nibaí jai itataticue.

<sup>20</sup> Judíuai comini diga cue ia, naimaci diga cue nabairillena, naimaci mare finocana uiga rafuedo jaidicue. Cristo dibeimo naimacina cue itatallena, naimaci diga nabairiacadicue.

Moisés micorí llogacino anamo naimaci illa jira, naie llogacinodo jaidicue; iadedi naie llogacinodo cue jilloitañena jira, naie llogacino anamo ifenedicue.

<sup>21</sup> Judíuafiedino diga cue ia, naimaci diga cue nabairillena, Moisés micorí llogacinodo naimaci jaiñena jira, naiedo jiai jaiñedicue. Naimaci mare finocana uiga rafuedo jaidicue; iadedi Jusiñamui lloga uaido jiai jaidicue. Cristo lloga uaido jiai jaidicue. Naimacina Cristo dibeimo itataiacadicue.

<sup>22</sup> Naimaci diga cue nabairillena, Cristo rafuena nia raise ifnoñedino diga cue ia: “Omoi baifemo Cristo rafuena uifnoticue” raiñedicue. Naimacina iciaicaiñedicue, naimacimo jeacinona cue finoí raillano. Naimacina cue isiruillamona, naimacina canoacadicue. Naimacina Cristo rafuena raise ifnuana itataiacadicue. Nana cominina cue canoacana jira, naimaci mare finocana uiga rafuedo jaidicue. Cue comecina facadicue: “Cue muidona damierie Cristona nibai ifnoitimaci”.

<sup>23</sup> Cristo rafuena ailluena comini ifnollena, iese jaidicue. Iena llocana jaidicue. Naimaci ifnuua jira, iobidicue.

<sup>24</sup> Ero, dani cai jitaillacinodo cai jaiñena. Iemona omoi fueollena, jiaie uaido lloiticue. Riire aisía rafuena omoi comini jifanoia, raire uicodo ridimie rana ote. Ailluena comini aisidimacimona, damie naie rana ote. Ie isoide. Cristo rafuena ifnocana mai cai jaiilli, ico Jusiñamui illanomo monamo ibana nana cai feifollena.

<sup>25</sup> Naga aisidimie riire aisillena, ie abina mairitallena, ie abina eenote. Mairillena, ie abina nagarui jiai facatacabite. Ibana feifollena, iese finode. Ibana bu oia, dallu iobide. Ero, jeacinona cai finoí raillano, cai abiaina cai eenua. Naimie jitailla isoi cai illena, Cristo rafuemo jiai cai facacabilla. Monamo cai rillanona, ibana cai feifollemo, jaca iobiticaí.

<sup>26</sup> Riire aisiacadimie ebena aisifede. Onolli diga mena iaimaiaí jamai jifanoia, jafaicina jamai ducoifediaimaiaí; iadedi conimana ducoidiaimaiaí. Ie isoide. Cristo rafuedo raise cue jaicania, jamai ebena jaiñedicue; iadedi nana cue comecimona iedo jaidicue.

<sup>27</sup> Cue comecina raise sedadicue. Dama Cristo rafue anamo icadicue. Dama iena ifnoiacadicue. Ja muidomo ibana cue feifollena, iese finodicue. Jiaie cominimo Cristo rafuena llofuecabiticue; iadedi monamo ibana cue feifollena, cue comecina raise sedadicue. Iemona omoi fueua.

## 10

### *Jiraraina sedañena rafue*

<sup>1</sup> Cue amataiaí, bie rafuena feitañeno. Cai jaiagai micoriaí finoca rafuemonona fueoiticaí. Egipto railla eniruemonona naimaci billa mei, jofue ifñenanomo naimaci macaria, naie diga naimacina ifollena, Jusiñamuidi monamo uillie itatate. Naie uillie anado nana jaisoidimaci. Jiairede railla monaillaí ruica naimaci jaicania, Jusiñamuidi naie monaillaí oni ifaijitate, safefodo nana naimaci ruica jaillena.

<sup>2</sup> Naie isoide rafue nana naimacimo suillanona, Moisés micorí dibeimo raise duidimaci. Naimie anamo itabidimaci.

<sup>3</sup> Jofue ifñenanomo naimaci illa jira, Jusiñamui nana naimacina ecade. Nainomo guille ifñena jira, monamona bite guille rana nana guisoidimaci.

<sup>4</sup> Nainomo jinui jiai ifñena jira, Jusiñamui llua jira, Moisés micorí noficina butajamona, toide jinuína nana jirodimaci. Naimaci nine macaria, Cristona cioifñedimaci; iadedi naimaci diga naimie jaca ite. Naimaci diga naimie illa jira, nana naimaci facaina, diga siño rafuena finocabide;

<sup>5</sup> iadedi Jusiñamuina naimaci ifnoñena jira, naimiedi naimaci diga icirite. Naimaci diga naimie icirilla jira, jofue ifñenanomo Jusiñamui ailluena naimaci micoriaina fioidaitade.

<sup>6</sup> Cai jaiagai finoca rafuemonona cai fueua. Marañede jearede rafuena naimaci finua isoi eburifñeno. Abimo omoi ofñeno.

<sup>7</sup> Jusiñamuiñedimiena sedañeno. Cai jaiagaimona damierie juraretana eruaide rana jaie sedajano raitimaci: “Bie radi cai Jusiñamui”. Rafuena finodimaci, naie rana sedallena. Eo guitimaci. Ie mei iraisitimaci. Ie jira Jusiñamui naimacina duere finode. Naimaci finoca rafue isoi abimo omoi ofñeno. Jusiñamuiñedimiena omoi sedañeno.

<sup>8</sup> Naimaci jearede rafuena finodimaci. Naimacimona damierie naimaci aiñede riñoniaí diga itimaci. Ie jira naimacimona daruidemo veintitrés mil comini fioidaitimaci. Jusiñamui naimacina fioidaitade. Naimaci finoca rafue isoi abimo cai ofñeno.

<sup>9</sup> Cai jaiagaimona damierie Jusiñamui Joreñona ifaitimaci. Naimaci guisoiga radi Jusiñamuimona bite. Naiena ifñamona, Egiptomona ite guillemo comeciaina facadimaci. Ie muidona naimiena riicaitadimaci. Ie jira Jusiñamuidi jaioniaina naimacina ainitate. Iemona ailluena fioidaitimaci. Naimaci finoca rafue isoi abimo cai ofñeno. Jusiñamuina riicaitañeno. Cristona cai nia ifnoñena facai finoca rafuemo cai comeciaina facañeno.



<sup>10</sup> Cai jaigaimona damierie Jusiñamui facaina lloraini joreñuaina ñaitimaci. Ie jira Jusiñamuidi ie jaenicina oretate, naimacina meinetasillena. Naimaci finoca rafue isoi abimo cai ofeno. Jusiñamui facaina lloraini joreñuaina cai ñaifeno.

<sup>11</sup> Nana naie rafue naimacimo suide. Cai facaina Moisés micori iena jaie cuete. Iemona birui cai fueua, naimaci isoi cai finoi raillanona.

<sup>12</sup> Naie isoidé rafue omoimo suiñellena, omoi abiaina rairui. Omoi comeciaina nibai facadomoi: “Cristona cai eo raise iñua jira, iena finoñeitaci!” comeciaina facadomoi; iadedi omoi abiaina omoi rairuiñenia, jeacinona finoitomoi.

<sup>13</sup> Taife ramo omoimo faicabilla isoi, nana jaie creyentiaimo ie isoi ramo faicabite. Iena feitañeno. Jusiñamuidi inogamie. Ie muidona omoi comeciái ocuillacino baifemo Jusiñamuidi Taife omoimo ramo faiana rairuite. Naiemona omoi jilloillena, Taife uai omoi inoñellena, Jusiñamuidi omoína canoite.

<sup>14</sup> Cue amatiaí, Jusiñamui omoína canuamona, Jusiñamuiñedimie facaina finoca rafue-mona oni i.

<sup>15</sup> Abina uiñotomoi. Ie jira omoimo cue lluacinona omoi cacaja mei, iemo omoi comeciaina omoi faca.

<sup>16</sup> Ero, Cristona cai sedallena, roracomo danomo oficabidicai. Naimie fiodailla rafuena cai comecillena, janore vino jiruana, janore llomenicono guiticai. Jusiñamuimo iobillacinona nano fecadicaí. Ie mei janore vino jirodicaí. Iena cai jiruamona, Cristona cai nabaillana uiñoticaí. Cruzmo Cristo fiodailla jira, naimiena nabaidicaí. Naie facaise llomenicono cai tairuñuamona, naimiena cai nabaillana uiñoticaí. Cristo fiodailla jira, iese iticai.

<sup>17</sup> Diga creyentiaidicaí; iadedi daje llomenicomona jaca guiticai. Daje llomenicomona cai guilla jira, dajena Cristomo cai duillana uiñoticaí.

<sup>18</sup> Ero, judiuaí railla cominimona cai fueua. Naimaci jeacino facaina iba ofellena, toiniaina faja mei, Jusiñamuimo fecacabidimaci. Ie mei iena ritimaci. Iena naimaci riamona, Jusiñamuina nabaidimaci. Jusiñamuina iobitadimaci.

<sup>19</sup> Omoi illanomo Jusiñamuina inoñedinodi Jusiñamuina eruaide jiraraimo guillena fecacabidimaci. Cai creyentiaidicaímona naie guilledí jamai guille. Naie jiraraidí jamai ra. Cajefede;

<sup>20</sup> Iadedi Jusiñamuina inoñedinomona jamai rañede. Naimacimona nanoca ra. “Iemo rille cai fecajia, cai moona sedadicaí” raitimaci; iadedi naie ramo naimaci comeciaina fa-cañedimaci; iadedi imaci moomo comecina facadimaci. Ero, Jusiñamuiñedimie comecina fecadimaci. Taifemo naie guille fecacabidimaci. Taifena iobitadimaci. Jusiñamuimo fecañedimaci. Naimaci diga omoi jaia, Taife diga jai nabairitomoi. Taife diga omoi nabairillana jitaiñedicue. Taifemo omoi duillana jitaiñedicue.

<sup>21</sup> Rollena omoi ofia, Cristo fiodaillana omoi comecillena, nainomo omoi jiruamona, nainomo omoi guillamona, Cristona nabaidomoi. Comini rafue dine omoi jaillamona, Taifena nabaidomoi. Cristo diga, Taife diga, daje facaina nabairinidomoi. Iese omoi finoia, marañede.

<sup>22</sup> Iese omoi finoia, Jusiñamuina jai iciritaitomoi. Naimiena omoi icia, ¿niese naimie riicaillafuemona jilloitomoi? Jaca jilloñeitomoi.

### *Jaie creyentiaína canocana cai jailla*

<sup>23</sup> Ero, Jusiñamui dibeimo omoi illa jira, ¿niese dani omoi jitaillacinodo jaicadomoi? Diga Jusiñamui rairuiñega rafue ite. Creyentiaí iena finorede; iadedi dajerie Jusiñamui rairuiñega rafuena cai finoñelli, naiemona bue cai ofena jira. Iena cai finoia, cai amana Cristo dibeimo itañedicai. Iena cai finoia, cai amana Cristo rafuena inotacana jañeiticaí. Naimiena ramo faicana uitataticaí.

<sup>24</sup> Omoimona nagamie dama naimie mo ite rafuemo comecina facañena; iadedi naga jiaie creyentemo ite rafuemo ie comecina jiaí facaja.

<sup>25</sup> Ero, ninena o llicisina omoi ibaia, Jusiñamuiñedimie mo naie llicisina fecajana jicanoño; iadedi jicanoño iena jaricitañeno rino.

<sup>26</sup> Iena David micori jaie cuela: “Jusiñamui bie enruena finode. Nana rana finode. Cai guillena, cai guille rana nana comuitaga” cuela. Ie jira ¿niese fimaiticaí? Naimie mare finoca rana cai riia, jeacinona finoñedicai.

<sup>27</sup> Ero, naimie diga o guillena Cristona inoñedimiedi ona uaidoia, naimie dine o jaicania, naimie dine guisai. Nana omo eaja guillena guiño. Jamai uainino guiño. “¿Ninena ibadio bie llicisina?” jicanoño. O comeci jarire finoño;

<sup>28</sup> Iadedi Cristona raise inoñedimie nainomo jiaí guitemo, omo lloia: “Bie llicisidi Jusiñamuiñedimie jai fecaca llicisi”, iena o riño. Iena o riia, Cristona raise inoñedimie comecina facaite: “Jecinona finodio. Taifemo fecaca llicisina rito. Creyentemie iena

riñede” comecina facaite. O isoi naie llicisimo naimie comecina facañede. O raitio: “Naie llicisidi jamai llicisi” raitio; iadedi naimie raite: “Naie llicisi Taife ie” raite. Ie jira naie creyentena o canollena, naiena riñeno.

<sup>29</sup> Naimie comecina facajacinodo cai jaiñenamona, nana Jusiñamui comuitaga guillena guiredicai; iadedi Cristona nia raise iñoñediñiemona nana guinidicai; iadedi naimie comecina facajacinodo jaiñedicai.

<sup>30</sup> Cai guia, Jusiñamuimona naie guille comuitaja jira, Jusiñamuimo iobillacinona fecadicai; iadedi cai guillamona damierie cai joreñaona ñaiamona, iena guñieiticai.

<sup>31</sup> Omoimo iena nia lloiticue. Nie isoide rana omoi guia, nie isoide rana omoi ría, nie isoide rana omoi jiroia, nie isoide rafuena omoi finoia, naieri Jusiñamuina iobita.

<sup>32</sup> Jusiñamuina nia iñoñedino canocabi, naimie uaina naimaci cacaillena. Jusiñamuina jai iñnotinona jiai canocabi, naimaci abido danomo uaiñellena.

<sup>33</sup> Buena cue finoia, nana cominimo cue comecina facadicue. Ie jira nagarui cue jitaillacinodo jaiñedicue; iadedi Cristo rafuena naimaci iñnollena, nana cominina canocana jaidicue.

## 11

<sup>1</sup> Cristo lloga rafuedo jai jaidicue. Cue isoi omoi jai.

*Roracomo riñoniai illa rafue*

<sup>2</sup> Cuen a nia feitañedomoi. Cristo oretagano jai llogacinona omoina llofueticue. Cue llofueuillacinodo nia jaidomoi. Ie jira omoi iobidicue;

<sup>3</sup> iadedi jiaie rafuena nia lloiacadicue. Cristo ie Moo anamo ite. Naga iima Cristo anamo jai ite. Nagamie ai ie ini anamo ite. Omoi afemo itino uaina omoi iñoñenia, marañede.

<sup>4</sup> Roracomo omoi comini oficabia, ie ini anamo ie ai illa jira, omoi comini finocabilla isoi, naga riño ie ifogimo iniroina bicuano jailla. Iese naiñaiño bicoñenia, ie ini anamo naiñaiño iñede isoi eruaid. Jusiñamui diga nie iima ñaia, Jusiñamui uaina nie iima jino lloia, naimie ie ifogi icona jitañeno, Cristo anamo naimie illa jira. Naie facaiseconi ie ifogi icona jitajia, Cristo afemo itena eruaid.

<sup>5</sup> Nie riño Jusiñamui diga ñaia, Jusiñamui uaina nie riño jino lloia, ie ifogimo iniroina bicoñeno jaia, iima isoi naiñaiño iacana jira, ie ini afemo illana eruaid. Ie ini anamo iacaiñena jira, ie ino meidaitade.

<sup>6</sup> Nie riño ie ifogimo iniroi bicoñeno jaiacania, iima isoi eruaillena, ie ifogidi rijiruda gareca. Iemona naiñaiño meidailamona, ie ini anamo illamona, ie ifogimo iniroina bicuano naiñaiño jaite.

<sup>7</sup> Jusiñamui diga naimie ñaia, Jusiñamui anamo naimie illa jira, iima ie ifogi icona jitañena. Jusiñamui naga iimana comuitate. Iimana naimie finuamona, naimiena cai iobitajamona, Jusiñamui cai afemo illana uiñoticai. Ie inina iobitajamona, naiñaiño afemo ie ini illa jira, riño ie ifogimo iniroina bicuana jailla.

<sup>8</sup> Ero, Eva micorimona Adán micori comuiñede; iadedi ie ini micorimona ie ciraiofemona naiñaiño micori comuide.

<sup>9</sup> Naiñaiño anamo illena naimie comuiñede; iadedi naimie anamo illena naiñaiño comuide. Naimie uai iñnollena, naimiena canollena, naiñaiño comuide.

<sup>10</sup> Ie ini anamo naiñaiño illa jira, riño ie ifogimo iniroina bicuano jailla. Naiñaiño iese ia, naiñaiño naimaci cianona, Jusiñamui jaienisaimona jai mare.

<sup>11</sup> Naga riño ie ini anamo ite; iadedi Cristona cai iñnua jira, riño baifemo iimadi faiñede. Ima baifemo riño jiai faiñede; iadedi daimaia conimana iaimaia canua. Cristo naga iimana, naga riño naja dajie isoi feiñote.

<sup>12</sup> Naga comini Jusiñamui comuitaga. Nano facaiseconi Adán micorimona Eva micorina jai comuitate; iadedi birui naga iima riñomona comuide.

<sup>13</sup> Biemo omoi comeciaina omoi faca: Omoi roracomo Jusiñamui diga nie riño ñaia, omoi einamaci finocabilla isoi, ie ifogina bicoñeno jaia, ¿niese omoi comeciaina raite? Cue comeci: “Marañede” raite. Ie ini anamo naiñaiño iñedena eruaid.

<sup>14</sup> Nana omoi biesedena raicabitomoi: “Nie iima ie ifotirai eo arenia dede, cai cominimona marañeno cide;

<sup>15</sup> iadedi nie riño ifotie eo arenia, mare” raicabitomoi. Naiñaiñuai ieri iobidimaci. Jusiñamui iena sicotajamona, naiñaiño ifotie ie ifogina raise ibaide.

<sup>16</sup> Iena jaca llofuecabiticue. Jiaie creyentia illanomo cue isoi comeciaina lloidimaci. Omoimona bu cue llogacinona uaitaicania, damamei ite.

*Cristo fiodailla rafuena raise comeciñedimaci*

<sup>17</sup> Jiaie rafuena lloiticue. Omoi marañede finocabilla rafuena jai fididicue. Cristona sedallena omoi oficabia, Cristo rafuena inocana jaiñedomoi; iadedi naiemona marañede rafue comuide.

<sup>18</sup> Rollena omoi oficabia, omoi comeciaina daje isoi lloihenana jai fididicue. ¿Bue ñellena omoi comeciaina daje isoi lloiacañedomoi? Naie rafuena omoi diga ja ñaiacaducue. Omoi oficabia, nagamiai guillena aticabidomoi. Mare; iadedi danomo guñedomoi. Omoimona damierie ucuberena jira, dueredino diga guiacañedomoi. Omoi guille caididomoi.

<sup>19</sup> Omoi iese illana jitañedicue; iadedi daje isoi omoi comeciaina lloihenamona, Jusiñamui ðibeimo raise itinodi uifoga. Omoimona damierie danomo omoi guillamona, Jusiñamuina omoi isiruillana uifotocai.

<sup>20</sup> Cristona sedallena omoi oficabia, guitomoi; iadedi vino jiruanona, llomenicono guillanona, cai Nama fodailla rafuena raise comeciñedomoi. Marañede rafuena omoi finua jira, iena nia lloiticue.

<sup>21</sup> Nagamiai guillena aticabidomoi. Dani coniniri raise guñedomoi. Danirie omoi atica guillena guitomoi. Jiaisona guillena iñedomoi. Damierie omoimo ailluena guille ite. Damierie omoimo guille raise iñede. Jiaisona guillena omoi iñena jira, damierie jaca aimetaimaci; iadedi jiaino monidimaci. Damierie guilla motomo jiai jifaidimaci. Conini nabaiñedomoi. Ie jirari Cristo fodailla rafuena raise comecinidomoi.

<sup>22</sup> Ero, omoi jofue ite, jamai guillena. Omoi oficabia, ¿bue ñe guñaredomoi? ¿Bue ñe jiaionomo guille feacaicañedomoi? Jiaie creyentiaina omoi isiruiñenamona, Jusiñamuina jiai isiruiñedomoi. Janore guille itinona duere finodomoi, naimacina omoi eacaicañena jira. Iese omoi illa jira, omoiri iobiñedicue.

#### *Cristo fodailla rafuena llofuiacino*

<sup>23</sup> Navui omoina biena llofueticue; iadedi omoi raise inoñena jira, iena dane llofueticue. Cai Nama iena cuemo jaiie llote. Cai Nama Jesús ie gaitatarjarui facaiseconi, ie llfoeicaigano diga ia, naimaci guia, llomenicono llinote.

<sup>24</sup> Iena llinuanona, Jusiñamuimo iobillacinona fecade. Ie mei iena tairuanona raite: “Mai, biena guiño. Bie llomenicodi omoi guillamona, cue fodaillana omoi comeci. Cue fodaillamona omoi jeacinomona jilloitomoi. Biena omoi guillamona cuena comeci. Bie llomenicodi cue abi facai ie. Cue llua isoi iena omoi finocabi” raite. Ie mei iena guitimaci.

<sup>25</sup> Ie mei jiroracomo jai totaca vino Jesús llinuanona, Jusiñamuimo iobillacinona fecade. Ie comecina facade: “Adán micori facaiseмона cominina imaci jeacino facaina Jusiñamui duere finoñellena, toiniaina atuidimaci, naimiemo fecallena”. Iemo ie comecina facajano, raite: “Cue fodaillamona, dama cue diaillamona, Jusiñamuidi omoimo jiaie rafuena birui llote. Omoi jeacinona oni dotajana llote. Bie vinodi naie rafue facai ie. Cue llua isoi, bie vinona omoi jiruamona, cuena comeci. Mai, iena jiro” raite. Ie mei jirodimaci.

<sup>26</sup> Naga icaiño Cristo facaina llomenicono omoi guia, Cristo facaina vinona omoi jiroia, omoi jeacino facaina cai Nama fodaillana uifotomoi. Naimie nia abido dane bille dinori naiena comeci.

#### *Cristo fodailla rafuena raise comeciacadica*

<sup>27</sup> Cristo fodailla rafuena raise comeci. Naie llomenicono Cristo rafuedo raise jaiacañedimie ebena guia, Cristo rafuedo raise jaiacañedimie naie vino ebena jiroia, iena jamaide. Naimie jeacinomona Cristo naimie jilluana naimie inoñena jira, Cristomo jeacinona finode.

<sup>28</sup> Jeacino omoi comeciaino illamo omoi comeciaina faca. Jeacino omoi comeciaino ia, iena guiño. Iena jiroño. Jeacino omoi comeciaino iñenia, iena guiño. Iena jiro. Jeacino ia, Jusiñamuimo iena llono. Jiaimie diga nicino ia, iena raise fino. Ie mei iena guiño. Iena jiro.

<sup>29</sup> Jeacino naimie comecimo nia illamona, iena guia, iena jiroia, marañede. Naimie jeacino facaina Cristo fodailla jira, Cristo fodaillana naimie jai jamaide. Ie muidona Jusiñamui naimiema duere finoite.

<sup>30</sup> Ie muidona omoimona ailluena irareside. Ie jira omoimona damierie fodaite.

<sup>31</sup> Cai comeciaina raise cai facajamona, jeacinona cai faimonocaia, Jusiñamui caina duere finoñeite.

<sup>32</sup> Jusiñamui caina birui duere finoia, caina naimie ðibeimo raise illena itataiacade. Jesucristo abido bia, naimiema inoñedinona duere finoite. Naimaci diga cai duere sefuiñellena, birui caina duere finode.

<sup>33</sup> Cue amatiai, Cristo fodailla rafuena omoi comecillena omoi ofia, daacaiño omoi guillesa, jiaino rifedinona seda.

<sup>34</sup> Bu eo aimetaia, jofomo nano guilla. Guillanona omoi ofillinomo bi. Dani coniniri raise omoi guiacaiñenia, Jusiñamui omoina duere finoi raillano, jofomo guiño. Nana naie rafuena nia lloñedicue; iadedi omoi dine dane cue ia, iena lloiticue.

## 12

*Cristo facaina raise maijillena, Jusiñamui Joreño naga creyentena canode*

<sup>1</sup> Cue amataia, jiaie rafuena cuemo jai jicanotomoi. Iena ja ñaiticue. Jusiñamui mona diga uaina feiñoticaia. Naimiemona naimie facaina maijia uaina feiñoticaia. Naimie facaina cai maijillena, jiaie creyentiaina cai canollena, naimiemona cai oga uaina ñaiticue. Iena omoi raise uñuana jitaidicue.

<sup>2</sup> Ero, Cristona nia omoi iñoñenia, Jusiñamuiñedimiede jiraraina sedaudomoi. Iedo jiaie tainodo jai-jaisoidomoi. Taife iedo omoina jifueite.

<sup>3</sup> Ie jira buena omoi raise uñuana jitaidicue. Jusiñamui Joreño uaido nie creyente ñaia, Jesús Joreñoña jeare ñaifeite. “Jesúdi Jusiñamui Jitoñede” raiñeite; iadedi Jusiñamui Joreño uaido nie creyente ñaia: “Jesúdi Jusiñamui Jito” raite. “Jesús cue Nama” raite. Naie isoide creyentedi Jusiñamui ie. Naimiemo cacarei; iadedi iese raiñedinona cacareiño.

<sup>4</sup> Jusiñamui Joreño caimo jai illa jira, Jusiñamui Joreñomona cai maijia uaina oticaia. Naga creyente daje isoi oñedicaia.

<sup>5</sup> Naga creyente Cristo facaina daje isoide uai diga maijiñedicaia; iadedi Cristo facaina nana maijidicaia.

<sup>6</sup> Jusiñamuidi diga uai llua motomo naga creyentena maijitate, naimie jitailla rafuena naimaci finollena.

<sup>7</sup> Jusiñamui Joreño naga creyentemo jai illanona, naga creyentemo ie uaina itatate. Conini naga creyentena naimaci canollena, ie uaina itatate. Iemona Jusiñamui Joreño caimo jai illana uñoticaia.

<sup>8</sup> Damierie creyentemo Cristo rafue jino llole uaina itatate. Damierie creyentemo Cristo rafue llofuelle uaina itatate.

<sup>9</sup> Damierie creyentemo Jusiñamui siño rafue finuana iñotaja uaina itatate. Damierie creyentemo duidinona jillotaja uaina itatate.

<sup>10</sup> Damierie creyentemo siño rafuena finua uaina itatate. Damierie creyentemo jino llole uaina itatate. Naimacimo Jusiñamuidi ie rafuena llocabite, jianomo jino llole. Dajerie creyentemo uaina itatate, nie isoide uaido Cristo rafuena railla lloraima llua uñollena. Jusiñamui Joreño uaido nie lloraima lloia, iena uñote. Taife uaido nie lloraima lloia, iena jiaie uñote. Damierie creyentemo naimaci uñoñega uaido ñaia uaina itatate. Damierie creyentemo naie uñoñega uai oni dobañolle uaina itatate, comini iena raise uñollena. Iena naimaci nia dobañoñenia, iena jiaie raise uñoñedimaci.

<sup>11</sup> Naga creyentemo itatate uaina Jusiñamui Joreñomona bite. Naimie jitailla isoi, naga creyentena ie uaina itatate.

*Cristomo dajena duidicaia*

<sup>12</sup> Cai abimo diga ra ite. Cai jefo ite. Cai uisi ite. Cai onolli ite. Cai eilli ite. Diga ra ite; iadedi cai abidi jaca dajede. Dajemo duide. Ie isoide. Diga creyentiaidicaia; iadedi dajena Cristomo duidicaia.

<sup>13</sup> Dama Jusiñamui Joreñodi dajena Cristomo nana creyentiaidicaia; duidicaia. Dajerie judiuidicaia; dajerie judiuidicaia; dajerie patrón anamo iticaia; dajerie patrón anamo iñedicaia. Diga nairaiidicaia; iadedi dajena Jusiñamui Joreñoña nana feiñoticaia.

<sup>14</sup> Cai raise maijillena, cai raise illena, cai abimo diga ra ite. Naga ra dama oni eneno inide. Ie isoide. Cristomo dajena cai duillanona, diga creyentiaidicaia; iadedi Cristo facaina dajena maijidicaia.

<sup>15</sup> Ero, cai abimona cai eilli nibai facaite: “Onolli isoñedicue. Onolli cue baifemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Onolli eilli baifemo fañede. Dafaconi ite.

<sup>16</sup> Ero, cai jefo nibai facaite: “Uisi isoñedicue. Uisi cue baifemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Uisi jefo baifemo fañede. Ie isoide. Dajena Cristomo omoi duilla jira: “Jiaimie baifemo iticue” raiñeno. Jiaie creyentena abina uradoiño.

<sup>17</sup> Ero, dama uisi cai abimo itena, cai jefo iñedena, jiaie ra cai abimo iñedena, ¿niese rana cacaiticaia? ¿Niese niadedi ra sorillana cacadicaia? Ie isoide. Dajena Cristomo omoi duilla jira, naga creyentena jitaidomoi, Cristomo dajena iñocana omoi jaillena. Jiaie creyentena uaitaño.

<sup>18</sup> Jusiñamui cai abimo diga rana comuitate. Naimie jitailla isoi, cai abimo naga rana comuitate.

<sup>19</sup> Cai abimo diga ra iñedena, ¿buedo cajeniticaí?

<sup>20</sup> Diga ra cai abimo ite; iadedi jaca dajede cai abi.

<sup>21</sup> Rana cai cioillena, cai uisi ite; iadedi cai onolli iñedena, cai ciua rana llinonidicaí. Ra feitañellena, cai comeci ite; iadedi cai eilli iñedena, macarinidicaí. Ie isoide. Cristomo dajemo cai duilla jira, naga creyentena dajena inocana jaillana jitaidicaí. Jiaie creyentemona abina iedoñeno.

<sup>22</sup> Naga cai abimo ite rana jitaidicaí, raise cai illena. Naga cai abimo ite ra jiaie ra baifemo iñede. Nana daje isoi itena, mare;

<sup>23</sup> iadedi dajerie ra ebire eruaillena, cai abi jifollena, iniroina jitadicaí. Meiruiñellena, cai abi bainillena, iniroina jiaí jitadicaí.

<sup>24</sup> Cai uiecomo meiredino iñena jira, iena jifoñedicaí. Ero, Jusiñamui cai abina finode. Dajerie ra jiaie ra baifemo iñede.

<sup>25</sup> Jusiñamuidi naga cai abimo ite ra dajena maijiana itatate. Dajena maijicana jaide.

<sup>26</sup> Cai abimona daje ra isireniadedi, nana cai abi daacaiño isirede; iadedi cai abi caimare marena ia, nana iobidicaí. Ie isoide. Cristomo dajena duidicaí. Jiaie creyente duere sefua, naimiena cai canoia, Cristo dibeimo caimare marena iticaí. Naimiena cai canoñena, caimare marena iñedicaí.

<sup>27</sup> Ero, caidi naimie cominina jira, Cristomo dajena nagasaíai duidicaí.

<sup>28</sup> Ie jira Jusiñamuidi naimiena inotinomona damieriena nano fetuanona, Cristo naimacina oretate, ie rafuena llollena. Ie mei jiaínona fetode, naimacimo ie rafuena llua mei, jiaínono ie rafuena jino llollena. Jiaínona fetode, ie rafuena llofuellena, cominina ie rafuena raise uiñotallena. Jiaíno ie uaina itatate, naimie facaina naimaci maijillena, jiaie creyentiaina naimaci canollena. Damierie creyentemo siño rafuena finua uaina itatate. Damieriemo duidinona jilloitaja uaina itatate. Damieriemo jiaie cominina canua uaina itatate. Damieriemo jiaie cominina sedaja uaina itatate. Ja muidomo damieriemo naimaci uiñoñega uaido ñaia uaina itatate. Iese omoina fetode, naimie facaina dajena nana omoi maijillena.

<sup>29</sup> Ero, Jusiñamui nana omoina fetoñede, ie rafuena jino llollena. Damieriena fetode. Nana omoina fetoñede, ie rafuena llofuellena. Damieriena fetode. Nana omoina fetoñede, siño rafuena finollena. Damieriena fetode.

<sup>30</sup> Nana omoina fetoñede, duidinona jilloitallena. Damieriena fetode. Nana omoina fetoñede, omoi uiñoñega uaido ñaillena. Damieriena fetode. Nana omoina fetoñede, naie uiñoñega uai jino dobaiñollena. Damieriena fetode.

<sup>31</sup> Naga creyentemo Jusiñamuidi ie maijia uaina itatate; iadedi damierie uai jiaie uai baifemo ite. Iena omoi illena, Jusiñamuimo jica; iadedi jiaie rafuena omoi ollena, omoi mo lloiticue. Nana jiaie rafue baifemo ite. Jiaie cominina omoi isiruillena lloiticue.

## 13

### *Nana jiaie cominina cai isiruillafue*

<sup>1</sup> Cai uiñoñega uaido ñaia uaina cai ñaia, Jusiñamui jaienisaí isoi cai ñaia, cominina cai isiruiñenia, jamai ñaiafuenta ñaiticaí.

<sup>2</sup> Jusiñamui rafue jino lolle uaina caimo ia, nana Jusiñamui caina uiñotaga rafuena cai uiñoia, nana Jusiñamuimo ite rafuena cai uiñoia, Jusiñamui siño rafuena finuana cai eo inoia, cominina cai isiruiñenia, Jusiñamuimona jamai bue isoidicaí.

<sup>3</sup> Jiaie cominina cai canollena nana caimo ite rana cai fecaia, Cristo rafuena cai llollena cai niadi fodiacaia, cominina cai isiruiñenia, jaca buena oñedicaí. Jusiñamuina jaca iobitañedicaí.

<sup>4</sup> Cominina cai isirua, naimaci diga raire iciriñedicaí. Naimacina canocabidicaí. Naimaciri abina uradoñedicaí. Abina birioicaiñedicaí.

<sup>5</sup> Cominina cai isirua, abina iedoñedicaí. Naimacimo cai comeciaina facacabidicaí. Cai rana caidicabiñedicaí. Naimaci diga iciricabiñedicaí. Naimaci caina jeare finoia, ibana ocabiñedicaí.

<sup>6</sup> Cominina cai isirua, naimaci jeare finoca rari iobicabiñedicaí. Naimaci uanai mare finoca rari iobicabidicaí.

<sup>7</sup> Cominina cai isirua, naimaci caina duere finoia, ibana ocabiñedicaí. Cai joreñoa bu ñaia, caina taino lloia, iena inocabiñedicaí. Cai marena illamo ocuiridicaí. Cai comeciaina ocuiñocana jaidicaí.

<sup>8</sup> Jusiñamuidi cominina jaca cai isiruillana jitaide; iadedi caimo ie rafuena jino lolle uaina jaca itatañeite. Naie uaidi ico saite. Caimo cai uiñoñega uaido ñaia uaina jaca itatañeite; iadedi naie uai ico saite. Caimo ie llofuelle uaina jaca itatañeite; iadedi nai uai ico saite.

<sup>9</sup> Nana Jusiñamui caina uiñotagacinona nia raise cacaiñedicaí. Nana Jusiñamui rafuena nia raise jino lloñedicaí;

<sup>10</sup> Iadedi Jesucristo dane abido bia, Jusiñamui Joreño caimo itataja uaidi saite. Naimie diga cai illemona naimiena raise uiñoiticaí. Naimiemo ite rafuena jiai raise uiñoiticaí.

<sup>11</sup> Jiaie rafuedo iena llofueticue. Jiaie nia cue uruenia, urue isoi ñaiticue. Urue isoi comecina facadicue; iadedi eimièna cue jaillamona, urue isoi jaiñedicaí. Cue uruenamona ite rafuena fainonocaidicue. Eimie comecina facajacinodo birui jaicicue. Urue isoi Jusiñamui rafuena birui janore uiñoticaí; iadedi monamo cai ia, eimie isoi iena raise uiñoiticaí.

<sup>12</sup> Ero, jacaie acaranimona cai joreñodi raise bainide. Ie isoide. Jusiñamuimo ite rafuena nia raise uiñoñedicaí. Iena raise cacaiñedicaí; iadedi Cristona ico cioiticaí. Naimiemo ite rafuena birui janore cacadicue; iadedi naimie dine cue ria, Jusiñamui cuena jai uiñua isoi, jiai raise uiñoiticaí.

<sup>13</sup> Ja muidomo lloiticue. Jesucristo billanona, Jusiñamui Joreñomona caimo ite uaidi saite; iadedi Jusiñamui llogacínodo jai abina iñoticaí. Naimie llogacino süllemo jai ocuridicaí. Jusiñamuina cai isiruillamona, jiaie cominina jiai isiruiticaí. Naie isiruillacino jiaicino baifemo faite. Ie jira coninina isiruicana omoi jai.

## 14

### *Omoi uiñoñega uaido omoi ñaia rafue*

<sup>1</sup> Nana cominina isiruicana mai omoi jai. Jusiñamui Joreñomona bite maijia uaina uana omoi nicido. Jusiñamui rafuena jino lolle uaina ua nicido.

<sup>2</sup> Ero, omoi uiñoñega uaido ñaia uaina omoi ñaicabia, jaca buna omoína cacaiñena jira, cominina canollena ñaiñedomoi; iadedi Jusiñamuina iobitallena ñaitomoi. Omoi uiñoñega rafuena omoi comeciainomona ñaitomoi.

<sup>3</sup> Jusiñamui rafuena jino omoi lloia, cominina canodomoi. Naimacina Jusiñamuina iñotodomoi. Naimie dibeimo raise itatatomoi. Naimaci comeciaina ocuiñotodomoi.

<sup>4</sup> Nana creyentiana canodomoi; iadedi naie uiñoñega uaido omoi ñaia, daní omoi comeciaina canodomoi.

<sup>5</sup> Rollena omoi oficabia, naie uiñoñega uaido omoi ñaia, cuemona mare; iadedi Jusiñamui rafuena jino omoi lloia, cuemona ua eo mare. Naie jino llua uaidi naie uiñoñega uai baifemo faite. Naie uiñoñega uaido omoi ñaia, nana creyentiana iena raise cacareillena, iena omoi oni dobaññaia, cuemona jiai mare. Ie mei naie ñaiana, Jusiñamui rafuena naimaci cacajamona, creyentiana canodomoi.

<sup>6</sup> Cue amataí omoi dine cue jaicanana uiñotomoi. Omoi dine cue ria, cue uiñoñega uaido cue ñaiticuedena, omoína canoñedicaí; iadedi Jusiñamui cuemo jai lloga rafuena omoimo cue lloticuedena, omoína canodicue. Jusiñamui rafuena raise cue jai uiñua jira, omoína cue llofueticuedena, omoína jiai canodicue.

<sup>7</sup> Ero, quena jamai tainuaido bu fia, ie figana uiñoñedicaí. Guitarra bu jamai tainuaido taia, ie taillana uiñoñedicaí.

<sup>8</sup> Ejércitomo trompetana jamai tainuaido fia, soldadaui maijillena raise uiñoñedimaci.

<sup>9</sup> Ie isoide. Cai cacaiñena uaido omoi ñaia, omoi ñaiana uiñoñedicaí. Iese omoi ñaia, jamai tainona ñaite isoi cacadicaí.

<sup>10</sup> Eo ailluena nairaiái ite. Naga nairai ie uai ite daní naimaci ñaillena;

<sup>11</sup> Iadedi nie nairai ie uaina cue uiñoñena, naimacimona jiaie nairai imièna eruaidicue. Cuemona naimaci jiaie nairaina eruaidimaci. Conini diga ñaiana cacaiñedicaí.

<sup>12</sup> Ie isoide. Jusiñamui Joreñomona bite ñaia uaina omoi eo jitaillanona, diga uaina Jusiñamuimo jica, daní conini Cristo rafuena iñocana omoi jaillena. Jusiñamui Joreñomona daní daje uaina nicidoñeno; iadedi nana nicido.

<sup>13</sup> Ie jira ie uiñoñega uaido bu ñaia, ie oni dobaññaia uaina naimiemo illena, jiaie creyentiana iena cacaillena, Jusiñamuimo jicaja.

<sup>14</sup> Jusiñamui diga cue uiñoñega uaido cue ñaia, Jusiñamui Joreño cuena ñaitatate; iadedi iena cacaiñedicaí. Iena uiñoñedicaí.

<sup>15</sup> Ie jira, ¿niese cue nibaille? Jusiñamui diga cue ñaia, cue uiñoñega uaido ñaiticue; iadedi comini cue ñaiana raise uiñollena, Jusiñamui diga jamai cue uaido jiai ñaiticue. Jusiñamuimo cue roia, cue uiñoñega uaido roiticue; iadedi comini cue ruana raise uiñollena, Jusiñamuimo jamai cue uaido jiai roiticue.

<sup>16</sup> Iobillacinona Jusiñamuimo omoi fecajano, omoi uiñoñega uaido omoi ñaiana, ¿niese omoína cacaiñedino: "Jee" raitimaci?

<sup>17</sup> Iobillacinona Jusiñamuimo raise fecadomo; iadedi omoína cacaiñedinona Jusiñamuina uifotañedomoi. Ie jira omoi uifñoega ñaia uaina oni dobaiñotimie omoi roracomo iñenia, naie uaido ñaiñeno.

<sup>18</sup> Cue uifñoega uaido cue ñacabilla jira, Jusiñamuimo iobillacinona fecadicue. Omoi baifemo naie uaido cue ñaiana uifñoticue;

<sup>19</sup> Iadedi roracomo cue ia, cominina raise cue llofuellena, janore cue ñaiadi, mare; iadedi eo are cue uifñoega uaido cue ñaia, cominina Jusiñamui rafuena cue llofueñenia, cuemona marañede.

<sup>20</sup> Cue amatai, omoi uifñoega ñaia uaido dani jai jaidomo; iadedi jiaie Jusiñamui Joreño itataja uaimo omoi comeciaina facañedomoi. Omoi abina jai uifñuamona, jiaie uaimo omoi comeciaina faca.

<sup>21</sup> Jusiñamui facaina lloraima micori jiaie cuela: “Jusiñamui llote: ‘Cue comini dine jiaie nairaina cue oretajamona, cue cominina cuena inotallena, naie jiaie nairai uaido cue cominimo lloiticue; iadedi iena jitaiñetimaci. Cuena jaca uifñoitimaci’ llote”.

<sup>22</sup> Ie isoide. Uifñoega uaido omoi ñaiamona, Cristona inoñedinona iena raise cacaiñedimaci; iadedi Cristona inotino iena cacadimaci. Iemona fueotimaci. Jusiñamui rafuena omoi llofuamona, Cristona inoñedinona iena cacajamona, Cristona inoñedimaci; iadedi Cristona inotinona canodomo.

<sup>23</sup> Danomo nana omoi ofia, omoi uifñoega uaido nana omoi ñaia, Cristona inoñedinona iena cacajanona, omoína; “Uairico” raitimaci;

<sup>24</sup> Iadedi omoi ofia, Jusiñamui rafuena omoi jino lloia, iena Cristona inoñedimie cacajamona, naimiedi jeacino naimie comecimo illana uifñoite. Naie rafue naimiemo riire baite.

<sup>25</sup> Naimie comecimo ite jearede rafue naimie uifñuamona, Jusiñamuimo ie jeacinona lluanona, Jusiñamuina inoite. Ie muidona raite: “Uanaí, Jusiñamui omoi motomo ite”.

*Roracomo omoi ia, raise marena omoi i*

<sup>26</sup> Cue amatai, rollena omoi ofiacabia, ¿niese omoi nibaille? Iena ja ñaiticue. Omoi ofia, omoimona damierie nibai roite. Jiaimie Cristo rafuena llofueite. Jiaimie naimiemo Jusiñamui como lloga rafuena jino lloite. Jiaimie ie uifñoega uaido ñaite. Jiaimie naie uaina oni dobaiñote. Cristo díbeimo creyentiaína raise itatallena, nana omoi finua rafuena raise fino.

<sup>27</sup> Uifñoega uaido bu ñaia, damie amani naiedo ñaite. Damierie ñaite. Jiaimie ñaille ifomo jiaimie ñaite. Ie mei damie naie ñaiana oni dobaiñote.

<sup>28</sup> Naie ñaiana oni dobaiñotimie iñenia, naie uifñoega uaido ñaitimie roracomo ñaiñena; iadedi naimie ñaiacania, Jusiñamuimo dama ie jofomo ñaia.

<sup>29</sup> Jusiñamuimona ite rafuena bu jino lloiacania, damie amani iena lloite. Damierie lloite. Jiaino llorainidi Jusiñamuimona naie llucacino billana uifñuamona llua.

<sup>30</sup> Jusiñamui rafuena bu nia lloia, naimie ecimo jiaimienona rafuena Jusiñamui Joreño llotataia, nano llotimie raire llucacilla. Iemei jiaimie lloite.

<sup>31</sup> Iese damierie nana llotomoi, naie lluanona Jusiñamui rafuena raise omoi uifñollena, omoi comeciái jiaí ocuifñollena.

<sup>32</sup> Naga llotimiedi ie uifñua diese lluanona uifñote. Ie jira jiaimie nia lloia, iena cacarei. Iemei jiaimie llua.

<sup>33</sup> Iese iñenia, daacaiño omoi lloia, buna Jusiñamui rafuena raise cacaiñeite. Omoi raise illena Jusiñamui jitaila jira, omoi uri illena Jusiñamui jitaila jira, cue llucacino omoi jai.

<sup>34-35</sup> Jiaie creyentiaí illanuaimo isoi omoi roracomo riñoniaídi uaina uaitañena. Nainomo lloga rafuena nainomo naiñaiñuai siadoñena; iadedi naiñaiñuai jofomo rillanona, naiena ie inimo jicanoitimaci. Roracomo naiñaiñuai ia, Moisés micori jiaie llua isoi, naiñaiñuai iní anamo naiñaiñuai illa jira, nainomo ite lloraima uaina naiñaiñuai uaitañena. Roracomo naiñaiñuai uaina uaitaia, marañede, nainomo ite jino lloraima uaina naiñaiñuai raise cacaiñena jira.

<sup>36</sup> ¿Niese cue llucacino jaiacañedomoi? Jusiñamui rafue omoimona comuñede. Dani omoimo naie rafue duiñede; iadedi nana creyentiaímo duide. Dani omoimo Jusiñamui ie rafuena lloñede. Nana creyentiaímo iena llote.

<sup>37</sup> “Rafuena Jusiñamui cuemo llote” omoimona ie comecina bu facaia, “Jusiñamui Joreño ie ñaia uaina cuemo itatate” ie comecina bu facaia, “Cai Namamona ite uaina omoimo cueticue” naimiedi uifñote;

<sup>38</sup> Iadedi naimie iese uifñoñenia, Jusiñamui Joreñomona naimie uai iñenana uifñoticaí.

<sup>39</sup> Cue amatai, Jusiñamui omoimo ie rafuena llua uaina naimiemo jica; iadedi naimaci uifñoega uaido jiaie creyentiaí ñaia, iena rairuiñeno.

<sup>40</sup> Omoi ofia, cue llua isoi, Jusiñamuina raise marena seda.

## 15

*Fiodaillamona Cristo jai jillode*

<sup>1</sup> Cue amatai, iena omoi feitañellena, bie rafuena dane lloiticue. Cristo ie mare rafuena omoina navui llofueticue. Fiodaillamona Cristo jilluana llofueticue. Cue llofuiacinona feiñotomoi. Iena ñnocana jaidomoi.

<sup>2</sup> Naiena omoi ñnuamona, Jusiñamui omoi jeacinomona omoina jillotate. Naiedo nia omoi jai, iena raise omoi ñnoia, jai jillobidomoi.

<sup>3</sup> Nanoca rafuena omoina llofueticue. Jiaie creyentiaimona buena jai cacadicue. Jusiñamui facaina lloraini micoriai jai euegafuiaí isoi cai jeacino facaina Cristodi fiodaite.

<sup>4</sup> Raiafomo naimiedi jonega. Darui amani illanona naiemona Jusiñamuidi naimiëna jillotate, Jusiñamui facaina lloraini micoriai jai llua isoi.

<sup>5</sup> Te mei Pedro naimiëna ciode. Te mei ie once llofueoicaigano naimiëna cioidimaci.

<sup>6</sup> Te mei quinientos naimiëna ñnotino naimiëna daruido cioidimaci. Naimacimona damierie jai fiodaitimaci; iadedi ailluena nia fiodaiñedimaci. Cristo jilluana uifñotimaci.

<sup>7</sup> Te mei Jacobo naimiëna ciode. Te mei nana ie oretagano naimiëna cioidimaci.

<sup>8</sup> Te mei naimiëna jai ciodicue. Te jira fiodaillamona naimie jilluana uifñoticaí. Te doce llofueoicaigano fetua mei, diga años illanona, naimiëna nia cue uifñoneña facaise cuena fetode. Te mei ie rafuena cue lloñena, cuena oretate.

<sup>9</sup> Ailluena creyentiaina jai eue duere finua jira, nana jiaie Cristo oretagano cue baifemo faitimaci. Jamaí bue isoidicue; iadedi Cristo cuena fetode.

<sup>10</sup> Jusiñamui cuena duenaillamona, Cristo oretagamienai jaidicue. Jusiñamui cuena jamaí tainomo duenañede. Nana jiaie Cristo oretagano baifemo Cristo rafuena llofuecabiticue. Dama eue comecimona llofuecabiñedicue; iadedi Jusiñamui cuena canuamona, iese llofuecabiticue.

<sup>11</sup> Jiaie oretagano Cristo rafuena llofueia, iena cue llofueia, daje isoide rafuena llocana jaidicaí. Naie rafuena omoi cacajamona, iena ñnotomoi.

*Fiodaillamona nana creyentiaí ico jilloitimaci*

<sup>12</sup> Fiodaillamona Jusiñamui Cristona jillotajana llofuecabiticaí; iadedi omoiimona dajerie raitomoi: “Fiodaillamona, nana comini imaci abiaí diga ico jilloñeitimaci”.

<sup>13</sup> Ero, omoi llua isoi fiodaillamona comini ico jilloñedena, ie isoi Cristo jiaí nia raiafomo ite. Niade jilloñede.

<sup>14</sup> Cristo jilloñenia, Cristo rafuena jai tainona lloticaí. Naie rafuena jiaí tainona ñnotomoi.

<sup>15</sup> Cristo fiodaillamona Jusiñamuidi naimiëna jillotajana llofuecabiticaí. Fiodaillamona creyentiaina ico Jusiñamui jillotañenia, Cristona jiaí niade jillotañede. Jusiñamui rafuena tainona jai llofueticaí.

<sup>16</sup> Fiodaillamona nana creyentiaí ico jilloñenia, Cristo jiaí jai jilloñede.

<sup>17</sup> Cristo nia jilloñenia, naimiëna tainona ñnotomoi. Jusiñamui omoi jeacinona niadedi oni dotañede.

<sup>18</sup> Cristona ñnuanona jai fiodaitinodi jiaí jai faifidimaci. Jusiñamui illanomo jaca iñeitimaci; iadedi iraimo jaca iitimaci.

<sup>19</sup> Nana cai ille dinori dani Cristo caina jilloitallemo cai ocuiria; iadedi naimie jilloñenia, jai duere iticaí. Jai tainomo ocuiridicaí.

<sup>20</sup> Ero, tainomo ocuiridicai; iadedi fiodaillamona Jusiñamui Cristona jai jillotate. Naimie jillua mei, naimiëna ciodicai. Ailluena fiodaitino jai itimaci; iadedi Cristo jai jillode. Te jira nana jai fiodaite creyentiaí jiaí jilloitimaci.

<sup>21</sup> Adán micori jeacinona finua jira, fiodaite. Fiodaillamona jilloñede. Jeacino naimie finua jira, fiodaicana jiaí jaidicaí; iadedi fiodaillamona Cristo jai jillua jira, fiodaillamona ico jiaí jilloiticaí.

<sup>22</sup> Adán micorimona cai comuilla jira, nana fiodaicana jaidicaí; iadedi Cristomo cai duilla jira, jilloiticaí, naimie diga jaca cai illena.

<sup>23</sup> Cristo jai jillode. Cai fiodailla mei, naimiemo cai duilla jira, ico dane abido naimie bille facaise jilloiticaí.

<sup>24-25</sup> Te mei naimie dinena nana naimie dibeimo iñedinona anafetaitaite. Nana naimie dibeimo iñede joreñuaina jiaí anafetaitaite. Illaimana Cristo illamona, nana naimie dibeimo iñedinona anafetaitaite. “O uai cuemo o illamona, nana o jitailla rafuena jai fuidodicue” ie Moomo loite.

<sup>26</sup> Nana naimie dibeimo iñedino naimie anamo jai illa mei, Cristo muidona naimie comini jai jilluamona dane fiodaiñeitimaci.

<sup>27</sup> Jusiñamuidi nana cominina Cristo anamo itataite. Te muidona creyentiaidicaí dane fiodaiñeiticaí; iadedi Cristo anamo Jusiñamui iñeite. Cristona oretaja jira, Cristo anamo Jusiñamui iñede.



<sup>28</sup> Naga ra Cristo anamo illa mei, ie maijia fuilla mei, Jusiñamui ie Moona jira, Jusiñamui anamo Cristo jiai iite. Jusiñamui nanocamiëna jira, nana naimie finoca ra naimie anamo iite. Nana comini naimie anamo iitimaci.

<sup>29</sup> Cristo jilloñedena, fiodaillamona jilloñeitomoidena, ¿niese bautizagaomoi? Fiodaillamona omoi jilloñenia, ¿bue ñellena bautizagaomoi? Tainomo jai bautizagaomoi; iadedi iese ñnoñedomoi. Dajerie creyentiai marena illamona, omoi mona dajerie creyentiaina jaidomoi. Naimaci jai fiodaitimaci; iadedi fiodaillamona ico jilluana ñnotimaci. Iena omoi ñnuanona, bautizagaomoi.

<sup>30</sup> Cristo jilloñenia, cue jilloñedicuedena, ¿bue ñellena nagarui Cristo rafuena cue llofuiamona, eo jacirede ramona niadedi fiodaicabiticue?

<sup>31</sup> Cue amatiai, cai Nama Jesucristomo omoi duilla jira, omoi ri iobidicue; iadedi nagarui niadedi fiodaicabiticue. Cristo rafuena omoi mo cue llocabilla jira, jiaie comini iciritimaci. Icirillamona, cuena meineiacadimaci.

<sup>32</sup> Efeso railla nairaimo birui cue illamona, diga comini cue lloga uaina eo uaitaside. Duere sefuidicue. Cristo jilloñenia, cue llamona jaca buena oñeiticue. Ie muidona fiodaillamona cai jaca jilloñeiticaidena, Cristo rafuena fañonocaida, ico raire jamai cai fiodailla jira, jamai ua jai jaicaillafuena cai jaiaicaiticai. Ie ia iese ñede. Cristo jai jillode.

<sup>33</sup> Ie jira omoi abiaina jifueñeno. “Jilloñeitica!” railla comini diga omoi nabairia, naimaci llogacinodo jiai jaitomoi. Ie muidona naimaci diga nabairiñeno.

<sup>34</sup> Ie jira raise abina uñuanona, mai jai. Jeacinona finocana jaiñeno. Omoi mona dajerie Jusiñamuina raise uññoñena jira: “Jusiñamuidi cominina jillotañeite” raitimaci. Omoi meidallena, omoi mo iese lloticue. Jusiñamui rafuedo raise mai omoi jai.

### *¿Niese creyentiai jilloitimaci?*

<sup>35</sup> Omoi mona damie nibai jicanoite: “¿Niese fiodaillamona creyentiaidicai jilloiticai? Naimaci abiai nibai jai rifaïdimaci. ¿Nie isoide abiai diga dane iiticai?”

<sup>36</sup> Iese bu jicanoia, raise começina facañede. O illimo buena o ria, janore sicua meinocoi, o riga radi jai abidi rifaïde.

<sup>37</sup> Nie isoide icoñona o ria, nie isoide ijina o ria, nie isoide idona o ria, naie ra sicua mei, jai jiaïfo eruaiïde. O riga rana eruaiñede.

<sup>38</sup> Naga riarra daje isoi eruaiñede. Jusiñamui jitailla isoi, jiaïforie eruaiïde. Ie isoide. Naga fiodaitimie jillua mei, Jusiñamui jitailla isoi, ie abina jiaïforie itataite.

<sup>39</sup> Diga isoide cai abiaina Jusiñamui jai comuitate. Naga abi isoide ite. Cai maijillena, comini abi ite. Eniruedo macarillena, ocaina abi ite. Fellen, silli abi ite. Jinuimo illena, lliciai abi ite. Ua diga isoide abi ite. Jusiñamuidi cai jiaïforie eruaiïde abiaina finorede.

<sup>40</sup> Jusiñamui dine ico cai ia, cai abiai iite, nainomo cai illena. Bene cai abiai jiai ite, bene cai illena. Monamo cai ia, ebirenitica. Bene cai ia, jiai ebire iticai; iadedi daje isoi ebire ññedicai.

<sup>41</sup> Jusiñamuidi monamo ite rana finode; iadedi daje isoi lligaiññoñede. Jitoma fivui isoi lligaiññoñede. Fivui ucuai isoi lligaiññoñede. Naga ucuai daje isoi lligaiññoñede. Monamo cai ico illena, naimie jitailla diese cai abiai caimo iite.

<sup>42</sup> Ie isoide. Fiodaillamona cai jillua mei, cai abiai jiaïfo eruaiïde. Cai fiodaillamona cai abiai rifaïde; iadedi cai jilluamona, cai abiai dane jai rifaïñeite.

<sup>43</sup> Cai fiodaillamona cai abiai jai ebinide; iadedi cai jilluamona, cai abiai ebirenite. Fiodaicana cai jailla jira, cai abiai birui raise mairiñede; iadedi ico cai jilluamona, cai abiai mairite. Nana Jusiñamui jitailla rafuena finorenitica.

<sup>44</sup> Cai fiodaia, come abiai isoi caimo birui ite; iadedi cai jilluamona monamo ico caimo cai abiai jiai iite. Enirue iena cai abiai birui caimo ite. Ie jira monamo cai jiaïfo eruaiïde abiai caimo iite.

<sup>45</sup> Adán micori comuilla rafuena Moisés micori jaiie cuega: “Jusiñamuidi nano comuidimie dofomo jafaicua firaiñuamona, naimie micori comena jaide” cuega. Naimiemona cai comuilla jira, fiodaiticai. Fiodaillamona Cristo jillua jira, ico cai jiai jilloille jira, caina jiaïfo eruaiïde abiaina ico itataite.

<sup>46</sup> Eniruemmo birui cai illa jira, caimo birui ite abiai diga iticai. Fiodaillamona ico cai jillua mei, monamo cai ia, jiaïfo eruaiïde abiai diga iiticai.

<sup>47</sup> Adán micoridi enirue ie. Imuicimona Jusiñamuidi naimienaa finode. Cristodi eniruemmo billanona, iimana jaide; iadedi Jusiñamui ñnena monamona naimie bite.

<sup>48</sup> Imuicimona Adán micori finua jira, naimie fiodailla mei, dane imuicina jaide. Naimiemona cai comuilla jira, cai fiodaia, jiai imuicina jaiticai; iadedi Cristomo jiai ññidicai. Cai jillua mei, naimie isoi ico iiticai.

<sup>49</sup> Adán micorimona cai comuilla jira, naimiena eruaidicai. Eniruemo Cristo jaie ia, naimie abi ite. Fiodaillamona naimie jillua mei, naimiemo jiaifo eruaite abi naimiemo ite. Cai jillua mei, Cristona eruaiticai.

<sup>50</sup> Cue amatiai, biena lloticue. Caimo jai ite abiai diga monamo Jusifamui ie cominina sedajanamo ifeiticai. Cai abiai rifailla jira, cai fiodailla facaise naie isoide abiai diga nainomo jaca ifeiticai.

<sup>51</sup> Ero, Jusifamui cuena uifnotaga rafuena omoimo ja lloticue. Iena navui jaca uifnotedicai. Nana creyentiaidicai fiodaifeiticai; iadedi Jusifamui cai abiaina jiaifo meidotaite.

<sup>52</sup> Omoi uisi jarire cuirorilla isoi, iena ua raire meidotaite. Ie trompeta fillanona, jai fiodaite creyentiaina Jusifamuidi jillotajanona, naimaci abiaina meidotaite. Nia fiodaifedindodicai cai abiaina jiai meidotaite. Dane fiodaifeiticai.

<sup>53</sup> Cai abiai birui rifaicade. Ie jira birui fiodaicana jaidicai. Jusifamuidi cai abiaina ico meidoite. Ico monamo jiaifo abiai caimo ia, cai abiai rifaifeite. Fiodaifeiticai.

<sup>54</sup> Iese caimo suia, Jusifamui facaina lloraima micori jaie cuega uai jiai suite. Cuega: "Nairuimona creyentia jaca fiodaifeitimaci".

<sup>55</sup> Cai jaca illa jira, fiodaicana jaiifeiticai. Fiodaillana jaciruiifeiticai, dane cai fiodaifeiticaina jira.

<sup>56</sup> Jeacino illa jira, birui fiodaicana jaidicai. Moisés micori jaie llogacino illa jira, iena cai raise finonina jira, jeacino caimo illana uifnoticai;

<sup>57</sup> iadedi cai jeacino facaina cai Nama Jesucristo fiodailla jira, jeacino anamo jai ifedicai. Cai fiodailla mei, dane fiodaifeiticai. Jusifamui caina iemona jai jillotate. Ie muidona naimieri cai iobillasa.

<sup>58</sup> Cue amatiai, fiodaillamona nana creyentia ico jillua jira, Cristo rafuena inocana jai. Naganomo ifeno; iadedi Cristo rafuena llocana omoi jai. Naimie jitailla rafuena finocana omoi jai. Naimie facaina omoi majiia, tainona majiifedomoi. Naiemona diga mare rafue comuete. Iena jai uifnotomoi.

## 16

### *Jerusalémo itinomo ucubena oredimaci*

<sup>1</sup> Jiaie rafuena cuemo jicanotomoi. Jerusalémo ite creyentiaimo ucubena oretaiacadomoi. Galaciamo ite creyentiaimo cue lua isoi, omoimo lloticue.

<sup>2</sup> Naga domingo omoi ucubemona daje diese eneno oni eeno. Omoi majiia bailla diese ucubemona cue bille dinori iena eeno. Iese naga domingo omoi eenofenia, ico cue bia, zñiese daciaño ofrendamo ailluena ucubena joneitomoi?

<sup>3</sup> Omoi dine cue rilla mei, omoi eenoga ucubena uillena, Jerusalémo ite creyentiaimo omoi fetocanona oretaiticue. Cartana jiai oretaiticue, omoi fetocano mareuidinona Jerusalémo itino uifollena.

<sup>4</sup> Jerusalémo cue comeci jiai jaiacania, cue diga jaitimaci.

### *Pablo jai macariacade*

<sup>5</sup> Macedonia railla eniruemo nano jaiticue. Creyentiaina cioillena, dajerie nairaimo jaiticue. Ie mei omoi dine jaiticue.

<sup>6</sup> Diga irui omoi diga nibai iiticue. Nana rollime facaise omoi diga nibai iiticue. Nibai daje amani fivui iiticue. Ie mei cuena omoi canollemona oni jaiticue. Omoi dinomona cue jaia, cue jaillinona nia uifnotedicue.

<sup>7</sup> Omoi dine birui nia jaiifeiticue. Omoi dine birui cue jaia, dallu omoi diga iiticue; iadedi jairuido omoi dine cue jaia, cai Nama jitaia, omoi diga are iiticue.

<sup>8</sup> Beno Efesomo nia iiticue.

<sup>9</sup> Beno diga comini Cristo rafuena cacaacadimaci. Naimacimo iena llofueiacadicue. Diga comini cue llwana uaitatimaci. Cue llwana jitaiñedimaci Ie jira bene nia lloiacadicue. Pentecostés railla rafue fuille mei, jaiticue.

<sup>10</sup> Omoi dine Timoteo ria, naimiena raise marena nafue. Cue isoi cai Nama facaina naimie majicabide.

<sup>11</sup> Ie muidona naimie llucinona jamaiñeno. Omoimona naimie jaiacania, cue dine abido naimie raise rillena, naimiena raise cano. Naimie jaiacania, naimie caimare caimaduano oreta. Jiaie creyentia diga naimie billemo ocuridicue.

<sup>12</sup> Apolona jicanotomoi. Jiaie creyentia diga omoi dine naimie jaillana naimiemo lloticue; iadedi naimie comeci nia jaiacaiñede. Jaiiruido abi juarenia, omoi dine jaite.

### *Fuiduacino*

<sup>13</sup> Jeacinomona abina rairui. Cristo rafuena inocana omoi jai. Eimie isoi omoi comeciaina ocuiño.

<sup>14</sup> Jiaie cominina omoi isiruillamona, nana omoi finoacalle rafuena fino.

<sup>15</sup> Cue amatiaí, Acaya railla eniruemo Estéfanadí, ie comini diga, nano creyentiaídimaci. Iena uifnotomoi. Naimaci jitailla jira, jiaie creyentiaína canocabidimaci.

<sup>16</sup> Naie isoidino lloga uaina cacarei. Naga Cristo dibeimo maijidino uaina cacarei. Iedo omoi jai.

<sup>17</sup> Omoimona cue dine Estéfanas bite. Fortunato diga, Acaico diga naimie billa jira, iobidicue. Cue dine ifedomoi; iadedi naimaci billa jira, omoi isoi cuena canodimaci.

<sup>18</sup> Naimaci billamona cue comeci caimataide. Omoi comeciaí jiaí caimataide. Naie isoidinomo: "Marena maijidomoi" omoi railla.

<sup>19</sup> Diga creyentiaí Asia railla eniruemo itimaci. Imaci uaina oredimaci. Aquila, ie ai Priscila diga, ie uaina jiaí orediaímaiaí. Iaimaiaí jofomo dajerie creyentiaí rocabitimaci. Cristomo naimaci duilla jira, omoína isiruillanona, nana naie creyentiaí imaci uaina jiaí oredimaci.

<sup>20</sup> Nana bene ite creyentiaí imaci uaina oredimaci. Nana creyentiaína eo caimare uaido.

<sup>21</sup> Omoimo cue uaina jiaí oredicue. Cuena canollena, naimiemo cue llua isoi, jiaimie bie carta cuega; iadedi cue mameci bene dama cueticue. Nana iena ifino. Pablidicue.

<sup>22</sup> Omoimona Cristona bu isiruifienia, Jusifiamui naimiena duere finollesa. Cai Nama abido dane billesa.

<sup>23</sup> Cai Nama Jesús omoína duenaillasa.

<sup>24</sup> Jesucristomo cai duilla jira, omoína cue isiruillana omoi uifnuana jitaidicue. Mai. Macaibaite.

## **CORINTOMO ITE CRISTONA HNOTINOMO IE EMODOMO PABLO ORETAGA RABE**

*Corintomo ite creyentiaimo Pablo cartana orede*

<sup>1</sup> ¿Ñigacino? ¿Nie isoidomoi? Pablodícue. Corintomo ite creyentia, omoi dine bie carta oredícue. Nana Acaya railla eniruemo ite creyentiaimo bie carta jai oredícue. Jusiñamui jitailla jira, ie rafuena cue jino llovena, Jesucristo oretagamíedícue. Cue diga Timoteo illa jira, naimie ie uaina omoi dine jai orede.

<sup>2</sup> Cai Moo Jusiñamui, cai Nama Jesucristo diga, omoína duenaite. Iena uifocana mai omoi jai. Iaimaia omoína uri jai itatate. Iena omoi uifocana mai omoi jai.

*Pablo ie duere sefuilla rafuena cuete*

<sup>3</sup> Cai Moo Jusiñamui iobillacinona cai fecacabillasa, naimiedi cai Nama Jesucristo ie Moo illanona. Jusiñamui cai Moo illanona, caina jaca duenaite. Cai comeciaina jaca ocuifotade.

<sup>4</sup> Nie isoide rafuemonona cue duere sefuia, nie isoide ramo cue jiria, naimie cue comeciaina jaca ocuifotade. Ie jira jianona canoredícue. Nie isoide rafuemonona naimaci duere sefuia, nie isoide ramo naimaci jiria, Jusiñamui caina ocuifotaja isoi, naimaci comeciaina ocuifotaredícue.

<sup>5</sup> Cristomo jai cue duilla jira, naimie isoi cue duere sefuia, naimie cue comeciaina ocuifotade. Iemona jaino comeciaina ocuifotajana raise uifotícue.

<sup>6</sup> Duere cue sefuillamona, omoína canoredícue. Jusiñamui jitaillacino omoi finocana jaillana jitaídícue. Cuen naimie ocuifotajamona, Cristona omoi fainonocaiñellena, cue isoi omoi duere sefuia, omoína ocuifotaredícue.

<sup>7</sup> Cue isoi omoi duere sefuia, cue isoi Cristo omoi comeciaina ocuifotaita. Iena raise uifotícue.

<sup>8</sup> Cristomo cai duillamona, cue amatai isoi itomoi. Asia railla eniruemo jai e duere sefuídícue. Iena omoi raise uifocana, ie rafuena dane omoimo lloiacadícue. Eo duere cue sefuilla jira, cue comeciainedí ocuifotaredícue. Niadedí fioidaitícue.

<sup>9</sup> “Naie facaise fioidaitícue” raillanomo cue comeciaina facadícue. Cue finoca rafuemonona dama jillonidícue; ia Jusiñamui uai siñona jira, naimie cuena jillotate. Fioidaitinona naimie jillotarede. Niadedí fioidaitinona jai jillotarede. Naimiedi naimie cuena jillotajana cue inuana jitaide.

<sup>10</sup> Naie facaise e duere sefuillamona cuena jillotate. Ico cue duere sefuia, iemona dane cue jilloillena inotícue.

<sup>11</sup> Iena cue facaina omoi jicabi. Jusiñamui fairiua meinomo, ailluena comini cue facaina Jusiñamui iobillacinona fecaitimaci. Cuen Jusiñamui canua jira, iobillacinona fecaitimaci.

*Pablo Corintomo navui jaiñede*

<sup>12</sup> Cuen gaiñedino cuena nibai jeare ñaitimaci; ia daje rafueri abina iedotícue. Cue comeciaina iena uifotícue. Cristona inoñedinona marena finodícue. Omoína marena finodícue. Jusiñamui jitaillacino finocana jaidícue. Jusiñamui jeacinona finoñecana jaidícue. Cue comeciaina facajacinomona iese jaiñedícue; ia Jusiñamui cuena canuamona, iese jaidícue.

<sup>13</sup> “Iese cuetio; iadedí o comecimo jiaie rafue ite diga caimo cuetio” raitomoi. Omoína jifueiacaiñedícue. Cue cuenga cartaiaina jai facadomoi. Cue cuenga rafue omoi raise cacajana jitaídícue.

<sup>14</sup> Cuen nia e raise uifocanedomoi; ia cuena uifocana omoi jaillanona, cueri omoi iobillana jitaídícue. Cai Nama Jesús abido bia, omoi cue iobilla isoi, cueri omoi iobillana jitaídícue.

<sup>15</sup> Omoimo iese cue comeciaina facajamona, omoi dine navui jaiacadícue. Macedoniamona cue jaiacadícuemo, raise omoína cue iobitallena, omoi dine nano navui jaiacadícue.

<sup>16</sup> Macedoniamona cue abido bia, omoi dine navui dane jaiacadícue. Judeamo cue diga jaillena, omoimona damieriena omoi oretajana jitaídícue. Iese cue jaillamo navui comeciaina facadícue.

<sup>17</sup> Omoi dine cue jaiñena jira, cue comeci naganomo illa isoi, comeciaina facadomoi. Damierie ie lloga uaina jaca finoñedimaci. Dani naimaci rafuemo comeciaina facadimaci. “Jii” raitimaci; ia: “Dama ite” comeciaina facadimaci.

<sup>18</sup> Iese inedícue. Jusiñamui uanaicinona jaca llua isoi, cue comeci naganomo inede. Omoimo cue lloga uai finodícue.

<sup>19</sup> Jusiñamui Jito Jesucristo rafuena omoimo navui lloticue. Cristo ie llogacinona jaca meidoñede. Silvano iena jai llofuede. Timoteo iena jai llofuede. Nagarui daje isoide rafuena llofueticai. Jiairuido jiaie Cristo rafuena llofueñedicai.

<sup>20</sup> Nana Jusiñamui jai lloga uai Cristo finoca rafuemonu suicabide. Jusiñamuina cai sedaia: “Cristo ie rafuena raise finode” cai lloia, Jusiñamuina iobitadicai.

<sup>21</sup> Jusiñamui Cristo dibeimo caina jai itatate. Ie rafuena cai lloiena, caina jai fetode.

<sup>22</sup> Ie cominina caina itatate. Iena cai uifollena, ie Joreño caimo jai itatate.

<sup>23</sup> Jusiñamuidi cue uanaicinona lluaña uifote. Uanaicinona cue lloñenia, Jusiñamui cuena duere finuana jitaicue. Omoi finoca rafue jai cue uifuañona, omoimo cue riire lloi raillano, omoi dine navui dane jaiñedicue.

<sup>24</sup> Cristona jai omoi ñnuana uifoticue. Cristona ñnocana omoi jailla jira, omoi finolle rafuena lloñedicue; ia omoi iocire illana jitaicue.

## 2

<sup>1</sup> Omoi dine nia cue jaiñellemo comecina facadicue. Omoi dine navui cue ia, iocire coniniri iñedicai.

<sup>2</sup> Omoina jai icidicue. Cueri omoi iobillana jitaicue; ia omoina cue dane icia, coniniri iocire iñeticai.

<sup>3</sup> Omoimo cartana navui oredicue. Omoi dine ite rafuena raise finollena, iena oredicue. Cuena iobitajana uifotomoi. Omoi dine ite rafuena omoi raise finoa, coniniri iocire iitici. “Cuena iobitaitomoi” raillanomo cue comecina facadicue.

<sup>4</sup> Cue comeci eo sunaillamona, cue comeci eo eiamona, carta navui oredicue. Omoina icicaiñedicue; ia omoina cue eo isiruillana omoi uifuaña jitaicue. Ie jira omoi dine ite rafuena raise fino.

### *Maraiñede rafuena finodimie rafuena feita*

<sup>5</sup> Maraiñede rafue navui damie finua jira, sunaiticai. Naimie muidona cue comecido duere jaide; ia daje iso omoi comeciai jai duere jaide.

<sup>6</sup> Omoi nabei dine ite cominimona naimie jai duere sefuilla jira, dama iesede. Naimiena dane duere finoñeno;

<sup>7</sup> Ia naimie finoca rafuena mai feita. Iena dane llinoñeno. Naimie comecina ocuifota. Naimiena iese omoi canoñenia, omoimona duere sefuillamona, abido danomo jaite.

<sup>8</sup> Ie jira: “Ona nia isiruiticai” naimiemo llono. Iena eo jitaicue.

<sup>9</sup> Nana cue lluaña omoi ñnuana cue facacillena, carta omoi dine navui cueticue.

<sup>10</sup> Naimie finoca rafuena omoi feitaia, iena cue jai faitaiticue. Cristo rafuena omoi ñnocana jaillana cue jitailla jira, naimie rafuena faitaiticue. Cristo cuena uifuañona, iena faitaiticue.

<sup>11</sup> Taife ramo cai faiana uifoticai. Cristo rafuedo cai raise jaiñellena, naimie jitaillana uifoticai. Cristo dibeimona caina Taife itatañenia, omoi motomo itimie finoca rafuena faitaiticai.

### *Troamo navui Pablo ia, uri iñede*

<sup>12</sup> Troamo navui jaidicue. Cristo rafuena cue lloiena jaidicue. Cai Nama comini comeciaina jetajamona, naimie dibeimo cue maijamona, ie rafuena lloticue.

<sup>13</sup> Tito nainomo cue cioñena jira, uri iñedicue. Naimiedi cue ama isoide. Ie jira nainomo ite creyentiaina facaduanona, Macedoniamoi jaidicue.

### *Jusiñamuidi Cristo dibeimo iñedinona anafetaita*

<sup>14</sup> Jusiñamui fue eo mare. Cristo dibeimo iñedinona naimie anafetitajamona, Cristo cominina cai illamona, naimie rafuena uicana jaidicai. Ie rafuena cai lloia, iena comini ñnoia, Jusiñamui naimicina jai caimare itatate.

<sup>15</sup> Cristomo cai duillamona, ie rafuena cai lloia, Jusiñamuina iobitadicai. Cai lluañona, damierie jillodimaci. Iena jitañenamona, damierie faifidimaci.

<sup>16</sup> Iena cacajamona, damierie faifcana jaidimaci. Jusiñamui illanomo jaca iñetimaci. Iena cacajamona, jaino Jusiñamui illanomo jaca iitimaci. Jamai bue isoidicue; ia bie rafue llocana jaidicue.

<sup>17</sup> Damierie Jusiñamui rafuena lluañona, ucubena oiacadimaci. Omoimo comecina facañedicue; ia iese llofueñedicue. Omoimo cue comecina facajanona, bie rafue cue lluañona, buena oñedicue. Jusiñamuimona cue llogacinona oticue. Jusiñamui cuena ciua jira, Cristomo cue duilla jira, uanaicinona jaca lloticue.

## 3

*Cristo caimo lloga rafuedo birui jaidicai*

<sup>1</sup> Omoi dine damierie llofuerañi jaia, cartaiaina uicabitimaci. Naimaci cartaiaina jiañodi: “Bie llofuerañi mare” raillanona cuetimaci. Omoimona jiaño cuela cartaiaina: “Bie comini mare” raillana jitañedicue. Cuemona jiaño cuela cartaiaina: “Pablo mare” raillana jai jitañedomoi.

<sup>2</sup> Omoi marenana jai uñoticue. Cue mareñenana jai uñotomoi. Carta isoidomoi. Jusiñamui dibeimo omoi comeciai meiduamona, cue comecimona omoina raise uñoticue. Omoi birui illamona, omoina fidiamona, nana comini omoina raise uñoticimaci. Ie jira jiañodi: “Bie comini mare” raillana omoimona jitañedicue.

<sup>3</sup> Cristo rafuena omoimo lloticue; ia Cristo omoi comeciaina jai meidotaja jira: “Omoi mare” raillanona naimie jai cuedadena, nana comini uñoticimaci. Tinta diga naimie cuedede. Jusiñamui Moisés micorimo jaie lloga rafue jamai noficimo cuela. Cai cajede Jusiñamui birui iese cuedede; ia naimie Joreño uaido omoi comeciaina birui meidote.

<sup>4</sup> Cristomo cue jai duilla jira, Jusiñamuina cue ñnuamona, omoina iese lloticue.

<sup>5</sup> Cue finoca rafuemona iese lloñedicue; ia Jusiñamui uai cuemo illamona, iese omoimo lloticue.

<sup>6</sup> Jaie rafuedo birui cue jaillena, Jusiñamui cuena fetode. Ie uai cuemo illamona, cuemo lloga rafuena llocabiticue. Moisés micorimo lloga rafuena birui lloñedicue. Moisés micorimo lloga rafue ñnuamona, Jusiñamui illanomo jaca buna itatañede. Jusiñamui Joreño llotataga rafuena birui llocabiticue. Iena cai ñnuamona, Jusiñamui Joreño Jusiñamui illanomo caina jaca itatate.

<sup>7</sup> Moisés micorimo lloga rafuedo jaillamona, Jusiñamui dine buna jaca ññena. Noficimo Jusiñamui cuela. Moisés micorimo Jusiñamui llua mei, Jusiñamui uai ebirena jira, Moisés micori uieco eo quenirecaide. Jusiñamuimona naimie abido bia, Israel comini Moisés micori uiecomo eruainidimaci. Nagarui Jusiñamui diga naimie ññañena, naimie micori uieco ja muidomo queninide.

<sup>8</sup> Jusiñamui Moisés micorimo jaie lloga uai ebirede; ia Jusiñamui Joreño birui caimo lloga uai baifemo ebirede.

<sup>9</sup> Moisés micori rafuedo bu jaia, faifcana jaide; ia naie rafue ebirede. Birui ite rafuedo bu jaia, Jusiñamuimona marebicaide. Ie muidona birui ite rafue jaie ite rafue baifemo ua eo faite.

<sup>10</sup> Moisés micori rafue jaie ebirede; ia jaie rafue birui illa jira, Moisés micori rafue jai birui ebinide.

<sup>11</sup> Birui ite rafue jaca saññena jira, ua eo ebirede.

<sup>12</sup> Iena cai uñnuamona, bie rafuena marefodo jaciruiñeno lloticue.

<sup>13</sup> Ññiroi diga, Moisés micori isoi cue uiecona ññañedicue. Naimie micori ie uieco ñbaide, ja muidomo ie uieco quenirena feioicaillana comini cioññellena; ia cue lloga rafuena marefodo llocabiticue.

<sup>14</sup> Moisés micori comini Jusiñamui rafuena jaca ññoñedicue. Naimaci comeciai jitaññena jira, ññoñedicue. Moisés micori rafuena birui juduañ comini facaia, iena ñia raise cacaññedicue. Dani Cristona ñnuamona, naimaci comeciai raise cacaññedicue.

<sup>15</sup> Cristo rafuena birui naimaci ññoñena muidona, Moisés micori rafuedo ñia jaidimaci.

<sup>16</sup> Cai Nama dibeimo bu jaia, naimie comeci raise cacade. Moisés micori rafuedo naimiedi cai jaiññenana raise uñote.

<sup>17</sup> Cai Nama Joreñoña lloticue. Cristo dibeimo cai jaia, naimie Joreño caimo jai ite. Cristona cai nabaillamona, jeacino anamo jai ññedicai. Moisés micori rafue anamo jai ññedicai.

<sup>18</sup> Cristomo jai cai duilla jira, naimienana cai comeciainamona raise uññua jira, ie ebirede uaina uññoticai. Acaranimo cai eruailamona, cai abina ciodicai. Ie isoide. Cai illamona jaie comini Cristona uññoticimaci. Cai Nama Joreño caina canuamona, naimie ebirena isoi cai illena, icana jaidicai.

## 4

<sup>1</sup> Jusiñamui cuena duenaillamona, cue comecina ocuiñocaida, Cristo rafuena llocana jaidicue.

<sup>2</sup> Meirede rafuena llofueñedicue. Iena bainino llofueñedicue. Jifuianona omoina llofueñedicue. Omoiri iobitallena, Jusiñamui rafuena meidoñedicue. Jusiñamui cuena cuana cue uñnuamona, naimie rafuena uanaicimona llofuecabiticue. Cue llofuiana bu raise cacaña, uanaicino cue llofuecabilana uññoite.

<sup>3</sup> Faifcana jaidinodi: cue mare lloga rafuena raise cacaññedicue.

<sup>4</sup> Taife anamo naimaci illamona, naimie naimacina cacareññedicue. Cristo uai ebirede. Jusiñamui isoi naimie ite. Taifedi Cristo rafuena naimaci raise uññuana jitaññede.

<sup>5</sup> Cue finoca rafuena llofueñedicue; ia Jesucristodi cai Namanana llofuecabiticue. Naimie dibeimo cue maijiamona, omoína canollena, naimie rafuena llofuecabiticue.

<sup>6</sup> Enirue finua facaise Jusiñamui lloste: “Jitiredino nana enirue mo iñellena, useredino mai iite”. Naimiena cue nia uññoñenia, jeacino anamo cue illamona, cue comeci jitiredinomo ite isoide. Naimiena cuena naimie jai uññotaja jira, cue comeci useredinomo jai ite isoide. Jesucristo monamo illanona jaie cue cuanona, Jusiñamui uai ebirede siñonana llofueticue.

*Cai comeciai ocuiñocaida ñnocana jaidicai*

<sup>7</sup> Enirue ie muicimona comuidicue; ia Cristo ie mare ebirede rafue cuemo jai ite. Iemona cue lloga rafue cuemona iñenana uññotomoi; ia ie uai siñonana illamona, Jusiñamui illana uññotomoi.

<sup>8</sup> Bie mare rafue cue llofuiamona, navui duere sefuidicue; ia nia llofuecana jaidicue. Iena sefuiruiñedicue. Naga cuemo suide rafuemo raise cacarefiñeno comecina ocuiñocana jaidicue.

<sup>9</sup> Damierie cuena duere finodimaci; ia Jusiñamui cuena fañonocaiñeno cuena canode.

<sup>10</sup> Enirue mo jaie Jesús ia, duere sefuillamona, ja muidomo fodaite. Jesús isoí duere sefuicana cue jaia, naiemona niadedi nagarui fodaiciticue. Iemona cuena naimie jillotaja muidona, Jesús siño uaina uññocana jaidicue.

<sup>11</sup> Jesús rafuena cue llua muidona, nagarui damierie cuena meineiacade. Iemona cue jillocabilla jira, Jesús siño uaina uññotomoi.

<sup>12</sup> Naimie rafue cue llua muidona, cuena meineiacadimaci; ia bie rafuena omoi ñnuamona, Jusiñamui illanomo jaca iitomoi.

<sup>13</sup> Jusiñamui facaina lloraima jaie cuga: “Cue ñnua jira, iena llofueticue”. Naimie isoí cue ñnua jira, bie rafuena jiai llofuecabiticue.

<sup>14</sup> Jesús fodaillamona Jusiñamui naimie jaie jillotate. Iena cue uñnuamona, cai fiodaille mei, caina jiai jillotaite. Jesumo cai duilla jira, naimie illanomo danomo caina ico itataite.

<sup>15</sup> Omoi facaina nana cue rafue finodicue. Cristo rafuena comini uññollena, duere sefuidicue. Iemona Jusiñamui naimacina duenaillana uññoitimaci. Jusiñamui dibeimo naimiaci illamona, naimiemo iobillacinona fecacabitimaci. Ieri naimiena iobitaitimaci.

<sup>16</sup> Ie jira iena sefuiruiñedicue. Cue mairici fuicana nagarui jaid; ia cue comeci nagarui ñnocana ocuiricana jaidicue.

<sup>17</sup> Birui duere sefuidicue; ia iemo cue comecina eo facañedicue. Cristo rafue muidona birui duere cue sefuia, Jusiñamui illanomo ico cue ia, nainomo ebire marena iiticue. Iemo cue comecina eo facadicue.

<sup>18</sup> Cuemo birui suide rafuemo comecina eo facañedicue. Jusiñamui illanomo cue nia cioñena rafuemo comecina eo facadicue. Bene ite rafue fuite; ia monamo ite rafue jaca fuiñeite. Bene cue duere sefuillacino fuite; ia nainomo cue Nama diga icore jaca iiticue.

## 5

<sup>1</sup> Caimo ite abi rifaillemona, Jusiñamui illanomo cai illemona, Jusiñamui jiaie isoide abi caimo itataite. Nainomo cai abi jaca rifaiñeite.

<sup>2</sup> Birui cue duere sefuillamona, Jusiñamui cuemo ico itatalle abina eo oiacadicue.

<sup>3</sup> Cue fiodailla mei, Jusiñamui cue joreñomo jiaie isoide abina itataite.

<sup>4</sup> Cue jiaie isoide abi cuemo illena, cue jamai fiodaiacañedicue; ia iena eo oiacadicue. Jusiñamui cuemo jiaie isoide itataiacade abina eo oiacadicue. Cue fiodaille abi ifomo jaca ille abina cuemo iite.

<sup>5</sup> Jusiñamuidi ie joreño caimo itatajamona, cai abiaina iese jiai itatajana uññoticaí.

<sup>6</sup> Iena cue uñnuamona, nie isoide rafue ia, ñnocana jaca jaidicue. Nia cue fiodaiñenia, cai Nama illa ecimo nia iñedicue.

<sup>7</sup> Naimiena birui cioñedicue; ia naimiena ñnocana jaidicue.

<sup>8</sup> Iese jaidicue. Cue Nama diga cue illena, fiodaiacaducue;

<sup>9</sup> iadedi nia cue fiodaiñenia, naimiena jaca iobitaiacaducue. Cue fiodaia, naimiena jiai jaca iobitaiacaducue.

<sup>10</sup> Naimie llua jira, Cristo uicomo ico nana iiticaí. Cai bene finoca rafuena uññotaite. Marañede rafuena cai bene finua diese, naimiemona ibana feiñoñeíticaí. Mare rafuena cai bene finua diese, naimiemona ibana feiñoñeíticaí. Ie muidona naimie jitaillacinona jaca finoacaducue.

*Jusiñamui diga cai uri illafue*

<sup>11</sup> Cue Nama uicomo ico cue illemona, iena cue jaciruillamona, naimie dibeimo cominina jai itatacana jaidicue. Jusiñamui cue illana raise uññote. Cue illana raise omoi uñnuana jitaidicue.

12 “Cuedi maremieducue” lloñedicue; ia cue abi facaina omoi riidollena, bie rafuena llotucue. Omoi motomo damierie llofuerañi naimaci llofuiacino diga abina iedotimaci; ia naimaci comeciaino iticino diga abina iedoñedimaci.

13 “Naimiedi uairico” cuena raitimaci. Iese cue iticuedena, Jusiñamui facaina iese itucue; ie iadedi uairicoñedicue. Omoina llofuellena, omoi facaina maijedicue.

14 Nie isoidicuenta, Cristo cuena isiruillana cue uñuamona, jaca llofueiacadicue. Nana comini facaina damie fiodaillana jai ñnotucue. Naimaci jeacino ifomo naimie jai fiodaite.

15 Nana cai facaina naimie fiodaite. Fiodaillamona Jusiñamui naimiena jai jilloitate. Naimiena nia cai ñnoñenia, dani cai comeciaino ite rafue diga iobidicai; ia naimiena jai cai ñnua mei, dani cai comeciaino naimiena cai iobitajana naimie jitaide. Ie jira cue illana jai uñotomoi.

16 Damierie llofuerañidi jianomo eruailamona, naimaci comeciaina facajamona: “Naimaci mare” raitimaci. Jiaicaiño: “Naimaci marañede” raitimaci; iadedi Cristona cue ñnua facaisezona iese cominimo eruañedicue. Naimiena nia cue ñnoñenia, Cristona jaie raise uñoñedicue. “Naimiedi jamai iima” raillamo comecina facadicue; ia iese naimiemo birui comecina facañedicue.

17 Cristona cai ñnua mei, naimiemo jai cai duillamona, cai comeciainuaina meidoticai. Jai jiaie isoidicai. Jiaie rafuedo jai jaidicai. Jaie caino ite rafuedo jai jaiñedicai.

18 Jusiñamui cai comeciainuaina meidotade. Cristo fiodaillamona, Jusiñamui dibeimo caina itatate. Iemona naimiena jai nabairedicai. Naimacimo ie rafuena llollena, cuena fetode, jiaie cominina ie dibeimo itatallena.

19 Cristo finoca rafue muidona, Jusiñamui dinena cominina nabaiacade. Naimaci jeacino facaina ibana jai oiacañede. Bie rafuena llollena, cuena jai fetode.

20 Cristo cuena oretajamona, naimie facaina llofuecabitucue. Cue llogacinomona Jusiñamui uñotomoi. Omoimona naimiena bu nia ñnoñenia, Cristo facaina cue illa jira, Jusiñamuina omoi nabaiillana, naimie diga uri i.

21 Cristo jeacino jaca finoñede; ia cai jeacino facaina, Jusiñamui jitailla jira, jeacino finodimie isoi jaide. Naimiemo cai duillamona, Jusiñamui jitailla isoi, jai marebicaidicai.

## 6

1 Bie rafuena nia lliacadicue. Jusiñamui facaina cai maijiamona, naimie dibeimo cominina itataticai. Naimie caina duenaillana uñotucue. Iena omoi ñnocana jaillana jitaidicue.

2 Jaie Jusiñamui cuetatate:

Cue jitailla facaise omoi jitaillacinona jai cacadicue.

Omoi jilloillena, omoina jai canodicue.

Ero, Jusiñamui birui omoina cacaacade. Birui omoina canuanona, omoina jillotaicade. Ie muidona naimiena ñnocana jai.

3 Bie rafuena omoi ñnoñellena, cue llofuiacinona omoi jamaiñellena, bu diga rafuena comuitaicañedicue.

4 Jusiñamui dibeimo cue maijiamona, nie isoide rafuemona ramo cue jiria, cue illamona naimiedi: “Mare” cuena raillana jitaidicue. Eo duere sefuidicue. Diga icaiño damierie cuena duere finodimaci. Diga icaiño ramo jiridicue.

5 Damierie cuena fatimaci. Cárcelmo cuena jonetimaci. Naimaci illanuaimona cuena riire dotadimaci. Eo cue maijia jira, diga icaiño eo raise ññedicue. Aime guisoidicue.

6 Jearede rafuena ebiruñedicue. Cristo rafuena uñocana jaidicue. Iciridicue. Jianona canocabidicue. Jusiñamui Joreño anamo itucue. Cominina raise isiruitucue.

7 Uanaicinona llocabitucue. Jusiñamui uai cuemo illamona, llofuecabitucue. Cue comecina riidollena, Taijena emodofillena, Jusiñamui jitailla isoi, marecinona finocana jaidicue.

8 Damierie cuena marena jai ñaitimaci. Jiaño cuena jeare nia ñaitimaci. Damierie cueri jai iobidimaci. Jiaño cue joreña jai ñaitimaci. Damierie: “Caina jifuetio” cuena raitimaci; ia nia uanaicinona llocabitucue.

9 Damierie: “Jamai bue isoidico” cuena raitimaci; ia jiaño cuena raise uñuamona, naimaci dinena jamai bue isoidicue. Nagarui niadedi fiodaicabitucue; ia nia itucue. Duere sefucana jaidicue; ia Jusiñamui cue comecina oculiñotacana nia jaidicue.

10 Sunaitucue; ia iocire jaca itucue. Dueredicue; ia ailluena comini comeciaina eo caimaretadicue. Buenidicue; ia Jusiñamuimona ailluena marecinona feñnotucue. Iese jaca jaidicue. Cue illamona: “Naimiedi mare” cuena omoi raillana jitaidicue.

11 Corintomo itino, cue nabaiñia, cue comecimo ite rafuena marefodo jai llotucue. Cue comecimona omoi diga marena iacadicue.

12 Cuemona omoina raise isiruitucue; ia omoi dinena nia cuena eo isiruñedomoi.



<sup>13</sup> Cue uruiái omoi isoilla jira, omoi diga ñaiticue. Omoína cue isiruilla isoi, cuena omoi isirui.

*Jusiñamui cai comeciáimo illanodicaí*

<sup>14</sup> Creyentedimie mo jearede ramo faitataí raillano, daje isoide rafuedo iaimaíai jaiñena jira, daje isoi rafuena iaimaíai comeci lloñena jira, creyente creyenteñedimie diga daje rana namatañena. Aina illena, creyentena iñediñaiñona creyentedimie oñena. Inina illena, creyentena iñedimiena creyentediñaiño oñena. Marecinodo jaiacadimiedí maraiñedicinodo jaiacadimie daje isoi diga nabairinide. Jusiñamuina uanaicinona uñotimiedí useredinomo jai ite isoide. Jeacino anamo nia itimie jítiredinomo nia ite isoide. Cristo rafuena naimie uñofede; ía Cristo rafuena omoi uñuamona, useredinomo jai itomoi isoidomoi.

<sup>15</sup> Cristodí Taife diga jaca nabairinide. Creyentemiedí creyenteñedimie diga daje isoi inide. Daje isoi comecina facañede.

<sup>16</sup> Creyenteñedimiedí Jusiñamuina sedañede; ía jiraraina sedade. Creyente comecimo Jusiñamui illamona, Jusiñamuina sedade. Nana creyentiaí comeciáimo Jusiñamui ite. Iena jaie Jusiñamui llote:

Comíni motomo iíticue.

Naimacina nabaiticue.

Naimací Jusiñamuiniticue. Cue comínitímaci.

<sup>17</sup> Íe muidona cuena iñoñedino diga daje rana namatañeno.

Naimací jearede jetaca rafuena abímo oñeno.

Iemona omoína raise feiñoíticue.

<sup>18</sup> Omoi Moona iíticue. Cue uruiaina jaitomoi.

Siño jítodicue.

## 7

<sup>1</sup> Cue isiruiganodomoi. Bie llogacino Jusiñamui caímo jai llua jira, naga maraiñede rafuena fainonocaida, caí jailla. Naga caí comeciaina jearetade rafuena fainonocaida, maí caí jailla. Jusiñamuina caí jaciruillamona, nana naimie jitaillacinona finocana maí caí jailla.

*Pablo cartamo ciegacino diese ñnodímaci*

<sup>2</sup> Omoi comeciáimona cuena raise feiño. Buna jeare ñofedícue. Buna jífueñedícue.

<sup>3</sup> Maraiñede rafuena jai omoi ñnuana lloñedícue. Omoímo cue comecina nagarui facadícue. Iena aillí llotícue. Nia cue ía, raire cue fiodaía, omoína jaca uibiñocabiticue.

<sup>4</sup> Cue lluacinona omoi iñuana raise uñotícue. Omoíri iobidícue. Omoi diga jai urí iticue. Duere sefuidícue; ía íocíre íticue.

<sup>5</sup> Macedoniamoi navuí cue jaidicue mo, cue comeci urí iñede. Cue díbeimo iñedinomona nagarui duere sefuillamona, cue comeci jaríre íte. Cristo díbeimona creyentiaína naimací ítatallero cue comeci jaríre íte.

<sup>6</sup> Comeciaina ocuiñedinona Jusiñamui ocuiñotacabilla isoi, Tito billamona, Jusiñamui cue comecina ocuiñotade.

<sup>7</sup> Cue díne naimie ría, íocíre íticue. Omoímo íte rafue cue cacajamona, jjaí íocíre íticue. Cuena omoi cioacanana llote. Cue comeci jaríre íllarí sunaitomoi. Cuena ríidoíacadomoi. Iena cue cacajanona, íocíre íticue.

<sup>8</sup> Carta omoi díne navuí oredícue. Iena omoi feiñua meí, sunaitomoi; ía íena cue oretajari biruí sunaiñedícue. Navuí íerí sunaiticue; ía íena omoi feiñua meí, íemona dallu omoi sunailla jira, jai íocíre íticue.

<sup>9</sup> Omoi sunaillana jítaiñedícue; ía íemona Jusiñamui díbeimo omoi comeci íuai omoi meídua jira, íocíre íticue. Cue cüega carta muidona ícíríñedomoi; ía Jusiñamui jítaiilla isoi sunaitomoi.

<sup>10</sup> Jusiñamui jítaiilla isoi, íe jeacino facaina bu sunaillamona íe comeci íuai Jusiñamui díbeimo meídoía, sunaiñede; ía bu jamai sunaillamona íe comeci íuai Jusiñamui díbeimo meídoñena, faííte. Jusiñamui diga jaca íñeíte.

<sup>11</sup> Jusiñamui jítaiilla isoi omoi sunaillamona, omoi comeciaina raise ñnodomoi. Maraiñede rafue díbeimo íacaiñedomoi. Iena eo jítaiñedomoi. Jusiñamui duere sefuitallicino anamo íacaiñedomoi. Cuena dane cioacadomoi. Jusiñamui jitaillacinona eo ñnoacadomoi. Jusiñamui díbeimo naimie illena, maraiñede rafuena ñnodimiena duere ñnodomoi. Nana díe rafuena raise fuidodomoi.

<sup>12</sup> Carta navuí omoi díne cue oretaiía, maraiñede rafuena ñnodimie mo cue comecina eo facañedícue. Naimiemona duere sefuidimie mo cue comecina eo facañedícue. Cuemo omoi comeciaina facajana omoi uñollena, navuí cüetícue. Jusiñamui íena uñíote.

<sup>13</sup> Íe jira cue comecina ocuiñotícue. Tito jjaí íocíre ílla jira, dane íobidícue. Naimie comecina caimare omoi ítataja jira, íobidícue.

<sup>14</sup> Omoï dine Tito nia jaiñenia, naimiemo omoïna lloticue. “Naimaci ona feiñotimaci. Naimaciri iobidicue” naimiemo navui lloticue. Iese naimiena omoï feiñua jira, ieri meidaiñedicue. Omoïmo uanaicinsona jaca lloticue. Naimiemo cue llua isoi jiai suide.

<sup>15</sup> Naimie llofuiacino omoï ñnoiicana jira, naimie omoïna birui raise isiruite. Meiruiocaida, comeciai jarire illamona, naimiena feiñotomoi.

<sup>16</sup> Omoïna raise uiñoticue. Cristo ñnocana omoï jaillana raise ñnoticue. Omoïri iocire iticue.

## 8

### *Creyentiaï Jusiñamuimo ucubena fecaja rafue*

<sup>1</sup> Cue amataï, omoïmo jiaie rafuena lloiacadicue. Jusiñamui naimacina canuamona Macedoniamio ite creyentiaïna omoï uiñuana jitaïdicue.

<sup>2</sup> Eo duere sefuidimaci. Jiai eo dueredimaci; ia iocire illamona, jiaie creyentiaïmo ucubena caidiñeno fecacabidimaci.

<sup>3</sup> Naimacimo ite ucube diese fecadimaci. Iena uiñoticue. Naimaci jitailla jira, naie baifemo fecadimaci. Naimacimo iese fecajana jaca lloñedicue.

<sup>4</sup> Naimacimo iese lloñedicue; ia iena naimaci eo fecaacana jira, jiaie creyentiaïna canollena, cuemo iena eo jicanotimaci. Ucube diga jiaïno creyentiaïna naimaci canuana cue llua eo jitaïdimaci.

<sup>5</sup> Cue comecina facaja isoi, fecañedicaci. Ucubena fecadimaci; ia: “Cai Nama ñibeimo maijicadicaci” jiai llotimaci. Nie isoide rafuena naimaci finuana cue ocuïllena, Jusiñamui jitailla isoi, jitaïdimaci.

<sup>6</sup> Omoï dine Tito dane jaillena jitaïdicue. Omoï dine naimie navui ia, ucube omoï uana naimie canode. Iemona janore tainedomoi. Jiaie creyentiaïna omoï canuana raise fuiduana jitaïdicue.

<sup>7</sup> Cristona ñnocana jaidomoi. Iena jiaïnomo llocabitomoi. Cristo rafuena raise uiñotomoi. Cristo jitaïllacinona e finocana jaidomoi. Cuen a jiai isiruitomoi. Ie muidona omoï ucube diga, jiaie creyentiaïna omoï raise canuana jiai jitaïdicue.

<sup>8</sup> Omoïna iese riire lloñedicue. Macedoniamio ite creyentiaïna eo canuana omoï uiñuamona, jiai creyentiaïna omoï canoia, Cristona omoï isiruïllana uiñoticaï.

<sup>9</sup> Cai Nama Jesucristomona cai fueua. Naimie caina duenaïllana uiñotomoi. Ie Moo ecimo naimie nano illamona, naga ra naimiemo ite; ia eniruemio ie billamona, caina canollena, ñmana jaïllanona, duere ite. Iemona Jusiñamui rafuena cai cacaja jira, duere iñedicaci.

<sup>10</sup> Ie jira omoïmo bie rafuena lloiacadicue. Navuidi año ucube eenuana tainedomoi. Iena finoacadomoi. Ie fuiduana jai jitaïdicue.

<sup>11</sup> Omoï jitaïllamona bie rafuena fuido. Omoïmo ite ucube diese feca.

<sup>12</sup> Aïlluena ucubena omoïmo iñenia, dama iesede. Omoï jitailla jira, omoïmo ite ucube diese omoï fecaïa, Jusiñamuimona mare;

<sup>13</sup> ia omoï jitailla rana omoï ollena, omoï ucube iñeni raïllano, omoï jitailla baifemo omoï fecajana lloñedicue.

<sup>14</sup> Jiaie creyentiaïmo ra birui raise iñena jira, naimacina omoï canuana jitaïdicue. Omoï ra ico iñenia, naimaci dinena omoïna canuana jitaïdicue, nana omoïmo daje isoi omoï ra illena.

<sup>15</sup> Moisés micori illa facaise ite cominimona cai fueua. Naimacina jaiie iese cuela: “Jusiñamui oretaga guiga ramona aïlluena guïllena, nagarui damierie iraiuidimaci. Jiaïno janore guïllena, iraiuidimaci; ia coniniri fecajamona, imaci jitailla diese nagarui nana guïtimaci”. Ie muidona omoïmo ite ucubemona naimaci jitailla ra illena, jiaie creyentiaïmo omoï fecajana jitaïdicue.

### *Pablo Titona ñaite*

<sup>16</sup> Omoï dine Tito dane oretaiacadicue. Cue isoi naimie omoïmo comecina facade. Omoïna canoacade. Naimie comecina Jusiñamui iese itataja jira, Jusiñamui iobidicue.

<sup>17</sup> Omoï dine jaïllena naimiemo lloticuemo, naimie dinena: “Jee” raite. Naimiemo nia iese cue lloñenia, omoïna naimie eo canoïacana jira, naimie omoï dine jaïllemio ie comecina facade. Omoï dine raire jaite.

<sup>18</sup> Naimie diga jiaimie oretaiticue. Naga naïraïmo ite creyentiaïdi: “Cristo rafuena eo raise llofuecabite” naimiena raitimaci.

<sup>19</sup> Cue diga jaïllena, naimiena fetodimaci. Dueredinomo omoï ucubena cue uïllena, cue diga naimie jaite. Iemona cai Namana iobitaiticaï. Iemona nana creyentiaïdi naimacina cue canuana uiñotimaci.

<sup>20</sup> Omoï ucubena raise cue sedajana jitaïdicue. Iemona: “Pablo cai ucube fide” omoï llua jitaïñedicue. “Iena Pablo raise fecañede” omoï llua jitaïñedicue.

<sup>21</sup> Iena raise marena sedaacadícue. Jusiñamui iena uññote. Nana creyentiaí iena uññuana jiaí jitaídícue.

<sup>22</sup> Iaimaiaí diga jiaimiena jiaí oretaitícue. Naimie Cristona eo ñnocana jaillana raise uññotícue. Omoí rafuena naimie fidiano, jiaie creyentiaína omoí canuana naimie ñnuanona, omoí ñne naimie eo jaiacade.

<sup>23</sup> Omoimo Titona bu jicanoía, naimacimo naimiena raise llono. Danomo Cristo dibeimo maijídíco. Cue diga omoína canode. Jiaie iaimaiaína bu jicanoía: “Jiaie creyentiaí iaimaiaína fetuamona bitiaímaiaí” llono. Cristona iobitaíacadiaímaiaí.

<sup>24</sup> Cueno omoí isiruillamona: “Omoí mare” omoína cue llumona, naimacína raise nafue. Nana cue jitailla rafuena omoí ñnuana naimaci uññuana jitaídícue. Omoí ucubena eenuana raise fuiduana jitaídícue. Iena omoí ñnuamona, abido naimaci bia, naimacína oretaga creyentiaímo iena lloítimaci.

## 9

*Jiaie creyentiaína canollena, omoí ucube olle rafue*

<sup>1</sup> Bie rafuena omoí jai uññua jira, iena dane lloñeítícue.

<sup>2</sup> Ucubena omoí jai feaacana uññotícue. “Benomo Macedoniamó ite creyentiaímo omoí iobidícue” llocabitícue. “Navuidi añomona feaacadomó” llocabitícue. “Acaya railla provinciamó ite creyentiaí feaacadímaci” llocabitícue. Iese omoí illamona, bene ite creyentiaí jiaíno creyentiaína jiaí canoacadímaci.

<sup>3</sup> Iese uññotícue; ia omoína cue canollena Titona oretaitícue, cue jitaillacino omoí raise fuidollena. Ucubena dajena uana raíre jitaídícue.

<sup>4</sup> Omoí ñne Macedoniamó ite creyentiaí diga cue rillanona, omoí ucube dajena nia íñenia, íese omoína cue lluaconi meidaitícue. Omoídi jiaí meidaitomó.

<sup>5</sup> Ie muidona Tito idai jaillana jitaídícue. Ucube dajena uana omoí llua isoi, omoína canoite. Omoí ucube dajena uana lloiacañedícue; ia omoí comeciamona jiaíno creyentiaína canuana omoí jitailla jira, iena jitaídícue.

<sup>6</sup> Jiaie rafuedo iena lloítícue. Janore iduaina bu ria, janore llisillana oite. Ailluena iduaina bu ria, ailluena llisillana oite. Cue llua jira, omoí ucube dajena oia, eo caimare íñeítomó; ia omoí comeciaí jitaillamona omoí ucubena dajena oia, eo caimataítomó.

<sup>7</sup> Ucube dajena omoí oia, nagamie íe comecína facajamona fecaja. Naimie jitaíñenia fecañena. Naimie jitailla jira, naimie fecaja. Jiaimie omoína ñai raillano, “Cai ucubena fecaitícaí” raíñeno; ia o jitaillamona iena feca. Comeciaí íocire illamona omoí fecaja, Jusiñamuína iobitadomó. Iena Jusiñamui jitaide.

<sup>8</sup> Jusiñamui omoí jitailla baífemo omoímo fecarede. Nana omoí jitailla ra omoímo naimie illamona, jiaíno omoí fecaia, naimacína canorenitomó.

<sup>9</sup> Jusiñamui facaina lloraíma micorí iena jaie cuela: “Jusiñamuína ñnotímie dueredínona canocabide. Mare rafuena ñnocana jaide”. Ie omoí ñnollemo, Jusiñamui omoína canoite.

<sup>10-11</sup> Ero, illímo maijiraíndí naíemona guicabite. Ie ísoide. Omoímo Jusiñamui nana omoí jitailla rana jaca itataite. Iemona jiaie creyentiaína raise canorenitomó. Omoí ucubena cai uia, iena jiaí creyentiaí feíñoia, Jusiñamuímo iobillacínona eo fecaitímaci.

<sup>12</sup> Ucubena omoí oretai, duerede creyentiaína canodomó. Omoí muidona naimaci Jusiñamuímo iobillacínona jiaí fecadímaci.

<sup>13</sup> Iemona Cristona omoí raise ñnuana uññotímaci. Ieri Jusiñamuímo iobillacínona fecaitímaci. Omoí iga ucube facaina iobillacínona Jusiñamuímo fecaitímaci. Naimacína canoitomó. Iemona nana jiaie creyentiaína canoitomó.

<sup>14</sup> Omoí facaina Jusiñamuímo jiaítímaci. Omoína naimaci isiruillamona, Jusiñamui omoína eo canuana naimaci uññuamona, omoí facaina jiaítímaci.

<sup>15</sup> Jusiñamui caína eo canua jira, iobillacínona naimímo cai fecallena, cai uai raise íñede. Uainicaídícaí. Naimie eo mare. Naimiena cai iobillasa.

## 10

*Cai Nama Pablona fetua jira, íe uai Pablomo íte*

<sup>1</sup> Jiaie rafuena lloiacadícue. Omoímona damíerie llotímaci: “Cai ñne Pablo ía, naimíedi caína jacíruite. Ríire caímo naimie rafuena lloñede; ía cai ñne naimie íñenia, ríire caímo naimie rafuena llote” llotímaci. Ero, Cristo ícricabíñena ísoí íacadícue. Naimie ísoí omoímo lloiacadícue.

<sup>2</sup> Ríire omoímo lloiacañedícue. Omoímona damíerie cuena raitímaci: “Pablodí Cristona ñnoñedímie ísoí ícabite”. Naimaci íese nia lloía, omoí ñne cue ía, naimacímó jacíruíñeno ríire lloítícue.

<sup>3</sup> Comena iticue; ia comini diga cue rafue iñede.

<sup>4</sup> Taife dibeimo itino diga cue rafue illa jira, jamai cue uai diga naimacina llicaitañeiticue; ia Jusiñamui uai diga naimacina llicaitaiticue.

<sup>5</sup> Cristo uai diga Jusiñamui dibeimo iñedino llucinoconi uainicaitaticue. Abina iedotimaci; ia Jusiñamuina uiñoiacañedinona uainicaitaticue. Naimaci comeciaina faca-jacinona uainicaitaticue, naimacina Cristo rafuena cue inotallena.

<sup>6</sup> Cristo anamo omoi raise ia, cue lloga uaina omoi raise inocana jaia, omoimona raise inoñedinona duere finoiticue.

<sup>7</sup> Cominimo jamai eruailamona: “Naimaci mare” raitomoi. Jiaicaño: “Naimaci marañedimaci” raitomoi; ia naimaci comeciaina uiñoñedomoi. Omoimona damie nibai comecina facade: “Cristomona cue uai illamona, Pablo baifemo faiticue”. Cue dinena raiticue: “Cristomona cue uai illamona, daje isoidicoco. Cue baifemo naimie fañede”.

<sup>8</sup> Abina iedoñedicue; ia cue abi iedoia, ieri meidañedicue. Cristomona cue uai illa jira, cue uai ite, naimie dibeimo omoi raise itatallena. Omoina cue canollena cue uai ite. Cristo dibeimona omoina itataiacañedicue.

<sup>9</sup> Omoimo riire llollena cue uai ite; ia cue carta diga omoina jacinaitaicañedicue. Omoina canoicadicue.

<sup>10</sup> Omoimona damierie cuena raitimaci: “Cartana Pablo cueia, eo riire caimo llore; ia cai motomo naimie ia, ie uai riinide. Cristo rafue raise lluana raise uiñoñede”.

<sup>11</sup> Iese iñedicue. Omoi motomo cue ia, cartana cue cueia, daje isoi llofuecabiticue.

<sup>12</sup> Omoimona damierie coniniri raitimaci: “Maredicai”. Iese coniniri naimaci comeciaina facaia, abina uiñoñedimaci. Naimaci isoi cue illemo cue comecina facañedicue.

<sup>13</sup> Jusiñamui cue majiana cuemo llore. Naimie llua baifemo jaiñeiticue. Omoi dine ie rafue cue llofuellena, naimie jitaillanona, omoi dine navui jaidicue.

<sup>14</sup> Jusiñamui jitailla rafue baifemo jaiñedicue. Cristo rafuena omoi motomo nano llofueraimadicue.

<sup>15</sup> Jiaie llofueraimi llofuiamona buena oiacañedicue. Cristo rafuena omoi inocana jaillamona, omoi motomo cue illamona, Jusiñamui jitailla diese omoina canoicadicue.

<sup>16</sup> Jiaie nairaia illanuaimo Cristo rafuena nia lloicadicue; ia nainomo jaie llofueraima llofuiamona buena oiacañedicue.

<sup>17</sup> Bu abina iedoiacania, cai Nama finua rafueri naimie abina iedua.

<sup>18</sup> Ie llofua diga bu abina iedoia, Jusiñamui naimie llofuiacinona: “Mare” raiñeite; ia Jusiñamui finoca rafueri bu abina iedoia, Jusiñamui naimiena: “Mare” raite.

## 11

### *Pablosi Cristo oretaganona abi caitadinona llore*

<sup>1</sup> Abina cue raise uiñoñena, cue diga iciriñeno. Cue llamo nia cacarei.

<sup>2</sup> Omoimo Jusiñamui comecina facaja isoi, omoimo comecina facadicue. Cue muidona Cristo rafuena omoi cacaja jira, Cristona uiñotomoi. fima diga nia iñediñaiño, ie inina illena, ie jitaillamiemo ie moo fecaja isoi, Cristomo omoina fecaacadicue. Omoimo jeacino iñena isoilla jira, omoina Cristomo fecaacadicue.

<sup>3</sup> Jiaie rafuemo omoi comeciaina facacana omoi jaillamo jacinaiticue. Jiaie jaiona eruailamona, Taife Eva micorina jifue. Jiaie llofueraimi Cristo rafuedo omoi raise jaiñenana itatajamo jacinaiticue.

<sup>4</sup> Diga llofueraimina feñotomoi. Jesús rafuena jiaiforiedo llofuecabitimaci. Cristo rafuena cue isoi llofuecabiñedimaci. Jusiñamui Joreño omoimo illana cue isoi llofuecabiñedimaci. Cue mare lloga rafue isoi llofuecabiñedimaci; ia naimacina jaca feñotomoi. Ie jira Cristo dibeimona omoi jaillemo jacinaiticue.

<sup>5</sup> “Cristo oretaganodicai” raitimaci; ia naimaci cue baifemo faimo cue comecina facañedicue.

<sup>6</sup> Naimaci isoi rafuena jino lluana eo uiñoñedicue; ia Cristo rafuena eo raise uiñoticue. Nana cue finoca rafuemonona omoina iena diga icaño uiñotadicue. Uanaicinona omoina jaca llofuecabiticue.

<sup>7</sup> Omoimo Jusiñamui rafuena navui cue lloia, omoina ibatañedicue. Omoimona ucubena jicañedicue. Cue ucube ollena, dama jiaie rana majidicue. Iese cue illa jira, damierimona marañede rafuena finodicue; ia cuemonona eo mare rafuena jai uiñotomoi. Iemona abina jai uiñotomoi.

<sup>8</sup> Omoina cue canollena, jiaie creyentiamona ucubena feñoticue. Omoi facaina naimacimona feñoticue.

<sup>9</sup> Rana cue jitailla facaise omoimona ucubena jicañedicue; ia Macedoniamona bite creyentia cuena canodimaci. Omoimona navui ucubena cue ofena jira, birui cue ofena jira, cuemona ibana ofeitomoi.

<sup>10</sup> Cristo cue illana uñuamona, naimie uanaicínodo cue jaillamona, nana Acaya railla provinciamo iena jaca lloiticue.

<sup>11</sup> Omoína cue isiruilla jira, ucubena omoína jicañeticue. Jusiñamui cue comecina raise uñote.

<sup>12</sup> Abina ieduardamona omoi motomo damierie: “Pablo isoi llofueticai” raitimaci. Ucubena omoimona feiñotimaci. Naimaci isoi iacaiñedicue. “Daje isoi maijidicai” naimaci raiñellena, ucubena omoimo jaca jicañeticue.

<sup>13</sup> Cristo oretaganona abi caitadinodimaci. Cristo dibeimo raise maijiñedimaci. “Cristo caina oretate” raicabitimaci; ia Cristo naimacina oretañede. Jifuecana jaidimaci. Cristo oretajanona itimacina jaidimaci.

<sup>14</sup> Teri rajicaiñedicue. Cominina jifuellena, Taifedi Jusiñamui jaienicina abi caitadimiena jaicabide.

<sup>15</sup> Taife dibeimo itinodi Jusiñamui ie mare rafuena llofuerainina jaicabidimaci. “Cai lloga rafuedo omoi jaia, Jusiñamuimona marebicaitomoi” llofuecabitimaci. Naimaci finolle rafue diese Jusiñamuimona duere sefuitimaci.

*Cristo oretagamiena naimie illa jira, Pablo duere sefuide*

<sup>16</sup> “Pablo abina uñofedimie” raillamo omoi comeciaina facañeno; ia iese cuena omoi comeciaina facaia, cue lluomo nia cacarei. Omoi motomo ite llofueraini abina iedua isoi, iacaiñedicue; ia janore cuemo iticino diga abina iedoticue.

<sup>17</sup> Abina ieduardamona cue lloia, cai Nama Cristo isoi lloñeticue. Naimie cuemo llua jira, iena llofeticue; ia abina uñofedimie isoi lloiticue.

<sup>18</sup> Omoi dine damierie llofueraini naimaci illa diga abina iedua isoi lloiticue.

<sup>19</sup> Abina uñofedimaci; ia: “Abina eo raise uñoticaí” omoi lluamona, naimaci llofuacinona cacacabidomoi.

<sup>20</sup> Naimaci anamo omoína itataiacadimaci. Omoimo ucubena jicacabidimaci. Omoína ocuicabidimaci. Icirillamona, omoi uiecuaina bofedimaci. Iese omoína finocabidimaci; iadedi buena naimacimo finoñedomoi. Ibana ofedomoi.

<sup>21</sup> Iese omoimo finoñedicue, omoína cue jaciruilla jira.

Cue illana omoimo ja lloiticue. Nibai abina raise uñofedimie; ia naie llofueraini isoi cue illa diga abina iedoticue.

<sup>22</sup> Omoi motomo ite damierie llofuerainina ja lloiticue. Judíuai uaido ñaitimaci. Iena jiaí ñaiticue. Judíuai nairai imaci. Daje isoidicue. Judíuai nairai imedicue. Abraham micori uruaídimaci. Jiaí naimie micori uruedicue.

<sup>23</sup> “Cristo dibeimo maijidicai” raitimaci. Abina uñofedimie isoi lloticue; ia naimaci baífemo Cristo dibeimo maijidicue. Naimaci baífemo duere sefuidicue. Diga icaíño cárcelmo iticue. Diga icaíño fajamona duere sefuidicue. Diga icaíño niadedi fiodaicabiticue.

<sup>24</sup> Judíuai comini cinco digacaíño cuena fatimaci. Naga icaíño treinta y nueve digacaíño rao diga cuena jicuidimaci.

<sup>25</sup> Dacaíño amani radosi diga cuena fatimaci. Nofici diga cuena dacaiño fairinotimaci. Dacaíño amani bote diga namo anabaiticue. Darui naio monaillaimo botedo jamai fuiri baiticue.

<sup>26</sup> Eo jacirede illedo jaicabidicue. Firiruidino eo illa jira, jaciruioicaida jaicabidicue. Cue judíuai cominimona duere sefuicabidicue. Judíuaiñedinomona duere sefuicabidicue. Naimaci illanuaimo cue ia, diga icaíño duere sefuidicue. Naisodo cue macaria, duere sefuicabidicue. Monaillaido cue jaia, duere sefuicabidicue. Cristo rafuena llorainina abi caitadinomona jiaí duere sefuicabidicue.

<sup>27</sup> Cue ucube ollena, duere maijicabidicue. Diga icaíño raise iniñedicue. Diga icaíño aime guiticue. Rollimemona duere sefuicabidicue. Iniroinamona jiaí duere sefuidicue.

<sup>28</sup> Diga jiaie rafuemona duere sefuicabidicue. Duenailamona naga creyentiaí illanuaimo cue comecina nagarui eo facadicue. Iemo nagarui cue comecina cue facaia, duere sefuicabidicue.

<sup>29</sup> Nie creyente Cristo rafuedo nia raise inoñenia, naimiemo cue comecina eo facadicue. Nie creyentena jiaimie jeacino finotaia, naimiemo cue comecina facadicue.

<sup>30</sup> Cue abina iedoacania, jamai bue isoidimiedicuena lloiacadicue.

<sup>31</sup> Cai Nama Jesús Moona Jusiñamui illanona, Jusiñamuimo jaca cai iobillasa. Naimiedi uanaicinona cue llua uñote.

<sup>32</sup> Cue illana nia lloiacadicue. Damascomo jiae creyentena cue jailla facaise cuena gaitatallena, Aretas railla illaima anamo ite gobernadori nairai llaiga nasena sedatate;

<sup>33</sup> iadedi llaigafu ecimo ite jofu a ite ventanamona cirigai isoide diga ana jaillanona, naiemona jillodicue.

## 12

### *Pablo nicairilla isoide rafuena ciode*

<sup>1</sup> Abina iedoiacaiñedicue; ia cue illana janore nia lloiticue. Iemona bue oñeiticue; ia cue illa abina riidoiacadicue. Cristo cuemo acataga rafuena lloiacadicue. Cristo cuemo jai llua rafuena jiai lloiacadicue.

<sup>2-3</sup> Cristomo cue duillamona, catorce años jaiie illanona, monamo naimie illamona, naimie dine Cristo cuena uite. Nicairilla isoi cue joreño, cue abi diga, uillana raise uifioñedicue. Nibai dama cue joreña uite. Dama Jusifiamui iena uifote. Naimie mare llanomo iticue.

<sup>4</sup> Nainomo cue ñainina rafuena cacadicue.

<sup>5</sup> Ie diga abina iedoñeiticue. Cue jamai bue isoidimie diga abina iedoiticue.

<sup>6</sup> Uanaicinona cue lluamona cue abina iedoiacania, tainona abina iedoñeiticue. Omoi cuena ciuamona, cue lloga rafuena omoi cacajamona, cuena uifotomoi. Ie baifemo cuena omoi comeciaina facajana jitaiñedicue.

<sup>7</sup> Naimie rafuena cuemo acataja jira, bie rafuena cue cacaja jira, ie diga eo abina cue iedoñellena, tagairede ra cuemo illa isoi Jusifiamui cuemo illamona, duere sefuidicue. Taiife jaienici cuena duere finua isoi, duere sefucabidicue.

<sup>8</sup> Cuemona iena naimie oni oretallena, cai Namamo dacaiño amani jidicue;

<sup>9</sup> ia cuemo llote: “Ona jillotañeiticue; ia cue ona duenailacinodo jaca ocuifioitio. O abi eo mairifenia, ona cue canuana raise uifioitio” llote. Cue abi eo mairifenia, ieri iocire iobiticue. Naimie uaido cue jaillamona, cuena naimie canuana raise uifioiticue.

<sup>10</sup> Cristo muidona duere cue sefuia, cue comecina ocuifioiticue. Cue jamai bue isoia, cuena bu jeare ñaia, bumona duere cue sefuia, cuena bu duere finoa, cue comecina ocuifioiticue. Cue duere sefuia, cue Nama cuena eo canode.

### *Pablo Corintomo ite creyentiaimo comecina eo facade*

<sup>11</sup> Abina uifioñedimie isoi iticue. Cue illana cue cuia jira, abina uifioñedimie isoi iticue; ia iese cuena itatatomoi. Cuena riidoñedomoi; ia jiaino eo mare railla llofuerañina raise feifotomoi. Jamai bue isoidicue; ia naimaci cue baifemo faiñedimaci.

<sup>12</sup> Omoi motomo siño rafuena cue finua jira, Jusifiamui cuena oretajana uifotomoi. Cristo rafuena sefuiruiñeno omoi motomo iticue.

<sup>13</sup> Cuemona duere sefuiñedomoi. Jiaie creyentiai omoi baifemo faiamo cue comecina faañedicue. Nibai iese omoi comeciaina facadomoi. Omoimo ucubena cue jicañena jira, jiaie creyentiai isoifedomoi. Iena omoi gaiñenia, iena feita. Cue diga iciriñeno.

<sup>14</sup> Menacaiño navui omoi dine jaidicue. Omoi dine dane jaiacadicue. Omoimo ucubena jicañeiticue. Omoi rana jitaiñedicue; ia Cristo dibeimo omoi illana, naimiena omoi raise ñuana jitaidicue. Cue uruia; isoidomoi. Rana eenoñedomoi, omoi mootiai iena; ia omoi mootiai rana eenotimaci, omoiena. Ie isoide. Cue uruia; isoi omoi illamona, omoimona rana jitaiñedicue; ia omoimo rafuena iacadicue.

<sup>15</sup> Nana cuemo ite ra omoimo feacaacadicue. Nana cue comecimo iticinona omoimo jiai iacadicue. Omoïna eo isiruiticue; ia cuena janore isiruitomoi.

<sup>16</sup> “Caimona ucubena jicañedio; ia jifuecana caimona otio” raicabitomoi.

<sup>17</sup> Ero, omoi dine menamiëna cue oretajamona, omoimona ¿nie isoide rana otiaimaia? ¿Niese omoïna jifuetiaimaia?

<sup>18</sup> Omoi dine Titona oretaticue. Jiaisie creyente imiëna Tito diga oretaticue. ¿Niese Tito omoïna jifue? Omoïmo coco comecina daje isoi facadicoco. Daje rafuedo jaca jaidicoco. Omoïna jaca jifueñedicoco. ¿Niese omoi comeciaina raitomoi?

<sup>19</sup> “Caimona ie abina riidote” cuemo nibai comecina facacabidomoi. Jusifiamui cuena uifiuamona, Cristomo cue duillamona, bie rafuena lloiticue. Cue isiruiganodomoi. Cristo dibeimo omoi raise illena, naimiëna raise omoi ñollena, bie rafuena llocabiticue.

<sup>20</sup> Omoi dine cue ria, cue jitailla isoi omoi iñenamo jacinaiticue. Iese omoi ia, omoi diga cue illana jiai nibai gaiñeitomoi. Ieri cue comeci jarire ite. Nibai nia uaina uaitatomoi. Nibai nia abina iedotomoi. Nibai nia iciricabitomoi. Nibai nia omoi rana caidicabidomoi. Nibai nia jiaïnona jeare ñaicabitomoi. Nibai nia jiaïno joreña ñaicabitomoi. Nibai nia abina uradoidomoi. Nibai daje isoi comeciaina nia lloifedomoi. Omoi iese illari cue comecidi jarire ite.

<sup>21</sup> Omoi dine dane cue ria, omoi muidona Jusifiamui cuena meidaitajamo jacinaiticue. Cristo dibeimo omoi raise iñenia, sunaiticue. Jearede rafuena omoi nia fainonocaiñenia,

omoi aiñede riño diga illana omoi fainonocaiñenia, omoi iniñede iima diga illana omoi fainonocaiñenia, sunaiticue.

## 13

### *Iraicaiño Pablo naimacina llofuete*

<sup>1</sup> Menacaiño omoi dine navui jaidicue. Omoi dine dane jaiticue. Coninimo omoi rafue ia, iena raise fino. Moisés micori jaie llote: “Mena iaiaiaia daje isoi lloillamona, daje amani daje isoi lloillamona, maraiñedicinona finodimiena duere finua”.

<sup>2</sup> Maraiñede rafue finodinomo navui riire lloticue. Nana omoimo riire lloticue. Omoi dine navui cue illa isoi, iena dane riire lloiacadicue. Omoi dine cue ria, naimaci comecia iuai nia meidoñenia, naimacina duere finoiticue.

<sup>3</sup> Iemona Cristo uai cuemo illana uiñoitomo. Naimiena omoi inuamona, naimie uai siñonana uiñotomo. Jamai uaido naimie omoina jillotañede; ia ie siño uaido omoina jai jillote.

<sup>4</sup> Jamai bue isoidimie isoi cruzmo naimie fiodaite; ia fiodaillamona Jusiñamui uaido jillode. Cristomo cue duillamona, jamai bue isoidimiena iticue; ia Jusiñamui uai cuemo illamona, omoimo ite rafuena raise finoiticue.

<sup>5</sup> Cristona inocana omoi raise jaillemono omoi comeciaina faca. Cristo jitaillacino omoi finollemono comeciaina faca. Cristomo omoi duillamona, Cristo omoi diga illana uiñoitomo. Cristomo omoi duiñenia, naimie omoi diga nia iñede.

<sup>6</sup> Cristo omoi diga illana omoi uiñuamona, Cristo uai cuemo illana jiai uiñoitomo.

<sup>7</sup> Maraiñedicino omoi finocana jaillana jitañedicue. Jusiñamuimo iena jaiticue. Omoi comecia iuai omoi meidoñenia, Cristo uai diga omoina duere finoacaiñedicue. Omoi comecia iuai meiduana jitañedicue; ia Cristo uai diga omoina cue duere finoñenia, Cristo uai cuemo illana nibai uiñoñeitomo.

<sup>8</sup> Cristomona cue uai illana omoi uiñollena, maraiñedicino omoi finuana jitañedicue. Mare rafuena omoi finocana jaillana jitañedicue. Iena finocana jiai jaiacaducue.

<sup>9</sup> Cristo rafuena inocana omoi raise jai, iobidicue. Omoimo cue riire lloñenia, iobidicue. Cristo jitaillacino eo raise finocana omoi jaillena jicabidicue.

<sup>10</sup> Birui bie rafuena cueticue. Omoi dine iñedicue; ia bie cartana omoi feiñua mei, omoi comeciaina raise finuana jitañedicue. Cai Namamona cue uaina feiñoticue. Iedo omoimo riire lloiacaiñedicue; iadedi iedo naimie dibeimo omoi raise itataiacadicue.

<sup>11</sup> Cue amatia, bie carta cuiana jai fuidoacaducue. Marena omoi i. Omoi comeciaina raise fino. Cue lloga rafuemo raise cacarei. Nana omoi creyentia comecia daje isoi lloicana jai. Coniniri uri omoi i. Iemona Jusiñamui omoina isiruillana uiñoitomo. Jusiñamui omoina uri itatajana uiñoitomo.

<sup>12</sup> Nana creyentiaina eo caimare uaido.

<sup>13</sup> Nana cue diga ite creyentia imaci uaina oredimaci.

<sup>14</sup> Cai Nama Jesucristo omoina jaca duenaite. Jusiñamui omoina jaca isiruillamona, coninina omoi isirui. Naimie Joreño omoimo illamona, coninina omoi nabai. Iese jitañedicue. Mai. Macaibaite. Pablocicue.

## GALACIAMO ITE CRISTONA HNOTINOMO PABLO ORETAGA RABE

### *Uaiduacino*

<sup>1-2</sup> Galaciamo ite creyentiai, omoi dine bie carta oredicue. Pablodicue. ¿Nigacino? ¿Nie isoidomoi? Omoimo cue uai oredicue. Nana cue diga ite creyentiaidi imaci uaina jiai oredimaci. Jesucristo fetocamedicue. Cai Moo Jusiñamui jiai fetocacue. Jesucristo fiodailamona, Jusiñamuidi naimiena jillotate. Mare rafuena cue lllollena, cuena orediaimaiai. Comini cuena oreñedimaci. Cue lloga uaina cominimona jiai oñedicue.

<sup>3</sup> Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Omoina uri jai itatatiimaiai. Iena omoi uiñocana mai omoi jai.

<sup>4</sup> Cai Moo Jusiñamui jitailla isoi, birui ite marañedicinomona cai jilloillena, cai jeacino facaina Cristo fiodaite.

<sup>5</sup> Cai Moona jaca cai iobillasa. Iena jitaidicue.

### *Pablo lloga rafuedi jaca dajede*

<sup>6</sup> Jusiñamuina raire omoi fainonocallari rajicaidicue. Cristo ðibeimo omoi illena, omoina Cristo duenaillamona, Jusiñamui omoina jai uaidote; iadedi omoi jeacinomona omoi jilloillena, jiaie rafuedo jai jaidomoi.

<sup>7</sup> Jiaie mare rafue jaca iñede; iadedi Cristo rafuena jiaiforiedo llofuimona dajerie omoi comeciaina uri itañedimaci.

<sup>8</sup> Jesucristo rafuena omoimo jaie lloticai. Jiaie rafuena lloticaidena, Jusiñamui riicallafue anamo nia cai illasa. Jusiñamui jaienici jiaie rafuena llotena, Jusiñamui riicallafue anamo jiai naimie illasa.

<sup>9</sup> Omoimo jaie iese lloticue. Dane ja lloiticue. Cai llua isoi Cristo rafuena omoimo bu lloñenia, Jusiñamui riicallafue anamo naimie illasa.

<sup>10</sup> Comini cueri iobillana jitañedicue; iadedi Jusiñamui cueri iobillana jitaidicue. Cominina iobitaiacadicuena, Cristo ðibeimo nia maijñedicue.

### *Ie oretagamiena jaillena, Cristo Pablona fetua rafue*

<sup>11</sup> Cue amatiai, cue lloga rafuena omoi raise uiñuana jitaidicue. Omoi jeacinomona omoi jilluana jaie lloticue. Bie rafuena comini comeciari facajacinomona oñedicue.

<sup>12</sup> Cominimona oñedicue. Bu jaca cuena iena llofueñede; iadedi Jesucristo cuena uiñotade.

<sup>13</sup> Jesucristona nia cue iñoñenia, cue judiui einamaci lloga rafuedo cue jaillana jai fididomoi. Cristona iñotinona jaie eo duere finodicue. Naimacina fuidoacaducue.

<sup>14</sup> Cue einamaci jaie llua isoi, Jusiñamuina raise iñoticue. Naimaci llogacinuaido eo duere cue jailla jira, daje facai cue diga itino baifemo iñoticue;

<sup>15</sup> iadedi nia cue jeiciñenia, Jusiñamui cuena fetode, naimie iena. Cuena duenaillanona, cuena uaidote.

<sup>16</sup> Omoi judiañedomoimo naie Jito rafuena cue lllollena, cuemo ie Jitona jaie bairetate. Naie facaise cuemo jai suide rafuena bu diga ñañedicue;

<sup>17</sup> ia Arabia railla eniruemo jaidicue. Nainomo comini iñena jira, cuemo jai suide rafuemo comecina facadicue. Jerusalémo Jesucristo nano oretagano dine jañedicue. Cuena Jesucristo nia oretañenia, naimacina orede, ie uai lllollena. Arabia railla eniruemo cue illa mei, Damasco railla nairaimo abido jaidicue.

<sup>18</sup> Cristo cuemo bairia facaise tres años illamona, naimiena cue uiñollena, Jerusalémo Pedro dine jaidicue. Naimie dinomo quince digarui iticue.

<sup>19</sup> Naie facaiseconi nana Jesucristo oretaganona cioñedicue. Pedrona ciodicue. Jacobona jiai ciodicue. Naimiedi cai Nama ie ama Jiañona cioñedicue.

<sup>20</sup> Omoimo nana cue cuegacínodi uanaicino. Tainona cueñedicue. Tainona cue cueia, Jusiñamui cuena duere finuana uiñoticue.

<sup>21</sup> Jerusalémo cue illa mei, Siria railla eniruemo jai jaidicue. Cilicia railla eniruemo jai jaidicue.

<sup>22</sup> Judeamo ite Cristona iñotinodi cuena nia cioñedimaci.

<sup>23</sup> Cuena iese fididimaci: "Navui caina duere finocabidimiedi Jesucristo rafuena jai llote. Jesucristona cai iñuana navui jitañede. Caina fuidoacade". Jiaie cue finoca rafuena fidiñedimaci.

<sup>24</sup> Te fidiamona, cueri Jusiñamuimo iobillacinona jai fecadimaci.



<sup>1</sup> Catorce años illanona, Jerusalémo dane jaidicue. Bernabé cue diga jaide. Titona uiticue.

<sup>2</sup> Jusiñamui cuemo lua jira, nainomo ite creyentiamu jaidicue. Judúuaiñedino Cristo rafuena jai ñnuana cue lollena, jaidicue. Cue llofuiana naimaci raise uifollena, creyentiai illaicominu anado nano lloticue. Cue llofuiana: “Mare” naimaci raillana uifoiacadicue. Tainona Cristo rafuena cue lloi raillanona uifoiacadicue. Naimaci diga cue ñaia mei, cue llofuiana: “Mare” raitimaci.

<sup>3</sup> Tito cue diga ite. Naimiedi judío nairai imieñede; iadedi naimaci abina detacabilla isoi, creyentiai illaicomini dinena naimie abi detatajana lloñedimaci.

<sup>4</sup> Creyentiaina abi caitadino billa jira, Tito abina detatajana siadotica. Naimacina cai uaidoñeno bitimaci. Moisés micori llogacinuai anamo cai ifenana naimaci uifollena, bitimaci. Cristo Jesús cai ñnua jira, Moisés micori llogacinuaído jai jaiñedicai. Moisés micori llogacinuai anamo caina dane itatallena, iena uifoiacadimaci.

<sup>5</sup> Cai mare rafuena jiaena jaca meidoñellena, naimaci ñaiana dallu cacareiñedicai. Uanaicinona omoi uifuaana jitaídica. Uanaicinona omoi uifuaana jitaídica.

<sup>6</sup> Naie creyentiai illaicomini omoimo lollena, cuemo jiaie rafuena lloñedimaci. Illaicominina raillanodimaci; iadedi cuemona jamai bue isoidimaci. Jusiñamui nana comini daje isoi feiñua jira, naimaci uai cue uai baifemo faiñede.

<sup>7-9</sup> Cue llofuiana rairuiñedimaci; iadedi creyentiai illaicomini cuena Bernabé diga marena feiñotimaci. “Daje isoi comeciaina facadica” raillamona, cue llofuiana: “Jai mare” raitimaci. Creyentiai illaicominidi Jacobo, Pedro, Juan digamie. Judúuai dine Pedrona Jusiñamui oretaja isoi, cue luamona judúuaiñedino dine Jusiñamui cuena oretajana uifotimaci. Pedro luamona Jusiñamuidi ailluena judúuaina creyentiaina itatate. Cue luamona, Jusiñamuidi ailluena judúuaiñedinona creyentiaina jiaititate. Iemona Jusiñamui uai cuemo illana jai uifotimaci. Judúuaiñedinomo Jesucristo rafuena llocana nia coco jaillana jitaídica; iadedi judúuaimo Jesucristo rafue llocana nia jaidimaci.

<sup>10</sup> Daje rafue cocomo llotimaci. “Duerede creyentiaina canocabi” llotimaci. Iena iocire finoacadicue.

### *Antioquíamo suide rafue*

<sup>11</sup> Antioquíamo cue jailla mei, Pedro nainomo jia jaide. Nainomo Pedro bia, maraiñedifue naimie finua jira, naimie uiecomo naimiemo riire lloticue.

<sup>12</sup> Nainomo Pedro nano rilla mei, nana creyentiai diga nainomo naimie guisoide. Judúuai creyentiai diga, judúuaiñede creyentiai diga, danomo guisoide. Iemei Jacobo dinena damierie bitimaci. Moisés micori llogacinodo jaisoidimaci. Moisés micori llogacinodo Pedro jai jaiñede; iadedi naimaci billa mei, naimacina naimie jaciruilla jira, judúuaiñede creyentiai diga Pedro jai guifede. Ie ñnoga rafuedo naimie jai jaiñede.

<sup>13</sup> Naimie iese illamona, judúuai creyentiaidi judúuaiñede creyentiai diga jai jia guifedimaci. Pedro illa isoi, Bernabé iedo jia jaide.

<sup>14</sup> Naimaci iese illa jira, Jesucristo rafuedo raise jaiñedimaci. Uanaicinodo jaiñedimaci. Iena cue uifua jira, nana comini uiecomo Pedromo lloticue: “Judío nairai imiedio; iadedi o jecinomona o jilloillena, cai einamaci llucacinodo birui jaiñedio. Ie jira, ¿bue ñellena judúuaiñedino cai einamaci llucacinodo jaillana jai jitaídio?”

### *Judúuaidi creyentiaina jailla mei, Moisés micori llogacinuaído jai jaiñedimaci*

<sup>15</sup> Nia lloticue: Judúuaiñedinodi Moisés micori lloga uaina jaie uifoiñedimaci. Caidi judúuaina jeicigacai. Ie muidona Moisés micori llogacinuai anamo jaie jeicigacai.

<sup>16</sup> Iese iticai; iadedi Moisés micori llogacinuaído jaillamona, Jusiñamui jitailla isoi, jaca bu marebicañede. Jusiñamui jitailla isoi, Jesucristona ñnuamona marebicaídica. Iena uifotica. Ie jira Cristo Jesúsna ñnotica, cai marebicaillena. Cai marebicaillena, Moisés micori llogacinuaina ñnoñedicai. Moisés micori llogacinuaina ñnuamona, jaca buna marebificainide.

<sup>17</sup> Jusiñamuimona cai marebicaiacallena, Cristona cai ñnuamona jeacino finorainiedica. “Cuena ñnuamona, marebicaíto?” Cristo iese llofueuide. Naimie llua isoi cai marebicaíñena, cai jeacinomona nia cai jilloñena, Cristo muidona; iadedi iese ifedicai.

<sup>18</sup> Moisés micori llogacinuai jai jamaiñocaidicue. Ie jira naicinuai dane abido cue oia, iena birui cue ñnoñena jira, jai jeacino finorainiedicue.

<sup>19</sup> Iemona cue marebicaíñena jira, Moisés micori llogacinuai cuemo jai duiñede. Ie anamo jai ifedicue. Ie muidona Jusiñamui llogacinuaído jai jaidicue. Cristo anamo jai iticue.

<sup>20</sup> Naimie díbeimo jai iticue. Cristo cuemo ite. Cristo cuena namatade. Jusiñamui Jitona cue ñnocana jai jaidicue. Cuena isiruillamona, naimie jitaillamona, cueri fiodaite.

<sup>21</sup> Jusiñamui caina duenaillana jamaiñedicue. Jusiñamui jitailla isoi, Moisés micori llogacinuaina cai ñnuamona marebicaídica, Cristo tainomo niade fiodaite.

## 3

*Jesucristona #nuamona judíuaidi Jusiñamui Joreñoña feiñotimaci*

<sup>1</sup> Gálatas imaci, abina jai uifioñedomoi. Jiaino omoina birui jifujete. Omoimo Jesucristo cruzmo fiodailla rafuena jaie marefodo lloticue. Iena raise cacadomoi.

<sup>2</sup> Ie jira omoimo buena jicanoiacadicue: ¿Ñiese Jusiñamui Joreñoña jaie feiñotomoi? Moisés micori llogacinuaido jaillamona iena feiñofedomoi. Jesucristo rafuena omoi cacajamona, #notomoi. Ie mei Jusiñamui Joreñoña feiñotomoi. ¿Ñiese birui abina uifioñedomoi?

<sup>3</sup> Omoi marebicaillena, Jusiñamui Joreñoño omoimo jai ite; iadedi Moisés micori rafuena dane omoi jaiacanamona, omoi jaie finolle rafuemona jai marebicaicadomoi.

<sup>4</sup> Jusiñamui Joreñoñomona diga marecinuaina feiñotomoi; iadedi iena jai jitaiñedomoi. Iese omoi illana #noñedicue.

<sup>5</sup> Dane jicanoiticue: ¿Ñiese Jusiñamuidi ie Joreñoño omoimo fecade? ¿Ñiese siño rafuena omoiri finode? Moisés micori llogacinuaido omoi jaillamona ie Joreñoño omoimo fecañede. Moisés micori llogacinodo omoi jaillamona, siño rafuena omoiri finoñede; iadedi Jesucristo rafue omoi cacajamona, iena omoi #nua jira, ie Joreñoña fecade. Iemona siño rafuena omoiri jai finode.

*Abraham micori Jusiñamuina #nua muidona marebicaide*

<sup>6</sup> Abraham micori ie rafuena lloiticue. Naimie micorimona fueoiticai. Moisés micori naimiena cuete: “Abraham micori Jusiñamuina #nua jira, Jusiñamuimona naimiedi marebicaide”.

<sup>7</sup> Iena cai cacajamona, Abraham micori isoi cai #nuamona, naimie ua cominina cai illana uifioticai.

<sup>8</sup> Jusiñamuidi judíuainedino ico marebicaillena jaie uifote. Naimiena ico naimaci #nollena jaie jai uifote. Iena uifnuamona, Jusiñamuidi ico suille rafuena Abraham micorimo jaie llote. Mare rafue naimiemo llote: “Nana cuena o isoi #notinona marebicaitaiticue” llote.

<sup>9</sup> Abraham micoridi #note. Jusiñamui naimiena marebicaitate. Ie isoide. Nana Jusiñamuina #notinona marebicaitate;

<sup>10</sup> iadedi nana Moisés micori llogacinuaido jaidino jai faidobidimaci. Moisés micori iena jaie cuela: “Nana cue lloga uaido jaiñedino jai faidobide”. Buna nana naie lloga uaido jaiñena jira, nana faidobidicai.

<sup>11</sup> Buena uifioticai. Moisés micori llogacinuaido jaillamona, Jusiñamuimona jaca buna marebicaiñede. Jusiñamui facaina lloraima iena jaie cuete: “Jusiñamuina #nuamona marebicaidimaci. Ie mei jaca iitimaci”.

<sup>12</sup> Moisés micori llogacinuai daje isoñede. Nana Moisés micori llogacinuaina finuamona comini marebicaide. Moisés micori iena jaie cuela: “Cue lloga uai finuamona, marebicaidimaci. Iemei jaca iitimaci”. Jusiñamuina #nuana lloñede: ia ie lloga uai finollena cominimo llote. Nana ie lloga rafuena finuamona, cominidi marebicaidimaci.

<sup>13</sup> Moisés micori llogacinuai anamo jaie cai illa jira, faidobidicai; iadedi cai facaina naimie fiodailla jira, Cristodi iemona caina jillotate. Cruzmo Cristo cuinaja jira, cai facaina naimie jai faidobide. Moisés micori iena jaie cuela: “Cruzmo cuinacaimie Jusiñamuimona jai faidobide”.

<sup>14</sup> Jusiñamuina naimie #nua jira, Abraham micori jaie marebicaide. Jesucristo fiodailla muidona, naimiena judíuainedino #nuamona, Abraham micori isoi marebicaidimaci. Jusiñamuidi ie Joreñoña caimo fecallena jaie llote. Ie muidona Jesucristona #nuamona, Jusiñamui Joreñoña birui feiñoticai.

*Jusiñamui lloga rafue*

<sup>15</sup> Cue amatiai, bie rafuemo comeciaina faca. Nie isoide rafuena menaimie finoacania, naie rafuena feitañellena, rabemo cuetiainaimiai. Iaimiai mamecina nainomo cuia mei, jairuido damie naie rafuena jiaifo dama meidonide.

<sup>16</sup> Ie isoide. Jusiñamuidi Abraham micorimo ico suille rafuena jaie llote. Iena naimie llua jira, iena meidonide. Ie uruaimo ico suille rafuena lloñede; ia daje uruemo ico suille rafuena llote. Cristona ñaite.

<sup>17</sup> Buena lloiacadicue. Naimie jilloillena, Jusiñamuina naimie #nuamona, Jusiñamui Abraham micorimo rafuena llote. Cuatrocientos treinta años illanona, Moisés micorimo Jusiñamuidi jaie rafuena llote; iadedi Abraham micorimo jaie lloga rafuena meidoñede.

<sup>18</sup> Jusiñamui llua jira, Abraham micori jillode; iadedi Moisés micori llogacinuaido cai jaillamona, cai jilloiadedi, Abraham micori isoi jilloñedicai.

<sup>19</sup> Iese itena, ¿bue ñellena Jusiñamui Moisés micorimo jaie rafuena llote? Naiemona jeacinona cai uifollena, iena llote. Naie rafue ite, Cristo eniruemo nia biñenia. Jusiñamuidi Abraham micorimo lloga rafue Cristomodo duide. Naimie billamona Moisés micorimo lloga

rafuena oñedicaí. Jusiñamuidi ie jaienisaímo naie rafuena llote, Moisés micorímo iena llollena. Ie mei Moisés naie rafuena comínimo llote;

<sup>20</sup> iadedi Jusiñamuidi Abraham micorímo ie rafuena atona llote. Jiaímiemo iese lloñede, Abraham micorímo iena llollena.

<sup>21</sup> Moisés micorímo Jusiñamui rafuena llote; ia naiemona Abraham micorímo llogacino nia saíñede. Cai jilloillena, cai jaca illena, Moisés micorímo Jusiñamuidi rafue finuana llotena, naie rafuena cai finuamona marebicaídicaí;

<sup>22</sup> iadedi Moisés micorí cuegafuíaídi nana comini jeacino anamo illana llote. Moisés micorí llogacinuaido jaillamona, jeacino anamona jilloñedicaí. Jesucristona cai inuamona Jusiñamui llua isoi, jeacino anamona jilloídicaí.

<sup>23</sup> Jesucristona inuana nia cai uññoñenia, Moisés micorí llogacinuai anamo iticaí. Jesucristo billamona, naimiema inuana uññoticaí.

<sup>24</sup> Moisés micorí llogacinuaidi cai lletarafue. Cristo díbeimo cai illena caina lletade. Cristona cai uññuamona, naimiema cai inuamona, marebicaídicaí.

<sup>25</sup> Naimiema inuana jai cai uññuamona, naie lletarafuena jai oñedicaí.

*Abraham micorí ua uruíaí*

<sup>26</sup> Cristo Jesúna inuamona, nana omoi Jusiñamui comínidomoi.

<sup>27</sup> Cristo díbeimo omoi illamona, bautizagaomoi. Iemona naimie Moodi jai omoi Moo.

<sup>28</sup> Jusiñamuimona dejena itomoi. Naimiedi nana comínina feiñote. Judíuaina omoi illamona, omoína feiñote. Judíuainedinona omoi illamona, omoína feiñote. Mullaíaina omoi illamona, omoína feiñote. Mullaíaiñedinodomoidena, omoína feiñote. Fiñíaina omoi illamona, omoína feiñote. Riñóniaina omoi illamona, omoína feiñote. Jesucristona omoi inua jira, jaca damacídicoi.

<sup>29</sup> Cristomo omoi jai duíadedi, Abraham micorí comínidomoi. Ie jira Jusiñamui Abraham micorímo lloga rafuemo jai jainaíaidomoi.

## 4

*Jusiñamui uruíaína jaidicaí*

<sup>1</sup> Moisés micorí llogacinona dane lloiticue. Jiaie rafuedo iena lloiticue. Riaí uruíaí moo fiodailla mei, ie moo raruíaídi nano doforamiemo fiebide. Naie nano doforamie uruena, naimie mamecido naimiemo jíde. Naimiemo nia raise jíñede. Naimiedi nia jamai ite isoide. Naimie ie jofomo mullaíai isoi ite.

<sup>2</sup> Naimie moo llua dinorí jaiño anamo naimie ite. Ie moo raruíaí jaiño anamo jai ite. Naimie jai eimiema illemona naimie moo raruíaídi naimiemo raise jai duite.

<sup>3</sup> Jaié dajé isoídicaí. Uruíaí isoídicaí. Cai jaiagai llogacinuai anamo iticaí;

<sup>4-5</sup> iadedi ie jitailliruímo Jusiñamuidi ie Jitona orede, naicinomona caina jilloitallena. Jusiñamui uruíaína cai jaillena, ie Jitodi naicino anamo riñomona jeiciga.

<sup>6</sup> Naimie uruíaídicaína jira, Jusiñamuidi ie Jito Joreño cai comeciaino orede. Naimiema cai feiñuanona, naimiedi caina Jusiñamuina: “Cai Moo” raitatate.

<sup>7</sup> Ie jirari jaiño anamo jai iñedomoi; iadedi Jusiñamui uruíaídomoi. Jusiñamui uruíaídomoína jira, nana naimie lloga rafue omoímo jai duide.

*Moisés micorí llogacinuai anamo omoi jaiá, danomo abido jaidomoi*

<sup>8</sup> Jaié Jusiñamuina nia omoi uññoñenia, ua jusiñamuillaíñede ra anamo itomoi. Naie isoide rana sedauídicoi.

<sup>9</sup> Jusiñamuina jai uññotomoi. Naimie omoína jai uññote. ¿Bue ñellena omoína marebicaítañede rafuedo dane jaiacadomoi? Omoína jilloitañede rafue anamo dane iacadomoi.

<sup>10</sup> Judíuai comini rafuena finocabillaruímo jai finocabidomoi. Iemona: “Marebicaítaí” raillanona iese finocabidomoi.

<sup>11</sup> Cue lloga uai omoi fiñoñena jira, omoímo tainona jai lloticue. Nibai jai tainomo maijídicoe.

*Pablo naimaci díga illana uibiñote*

<sup>12</sup> Cue amatiaí, omoi díne nano cue jaiá, Moisés micorí llogacino anamo iñedomoi. Naie llogacino anamo jaié iticue; ia biruí ie anamo iñedicue. Biruí cue illa isoi omoi illana jai jítaídicoe. Omoi díne cue nano ia, cuena raise feiñotomoi.

<sup>13</sup> Cristo rafuena omoímo nano cue llua facaiseconí duídicoe. Iena uññotomoi.

<sup>14</sup> Cue duico omoímona jacire eruáide; iadedi cuena jearuññedomoi. Jusiñamui jaienici omoi díne billa isoi, cuena feiñotomoi. Jesucristo omoi díne billa isoi, cuena jai feiñotomoi.

<sup>15</sup> Jaié caímare iticaí. ¿Niese biruí cue díga caímare iñedomoi? Cuena omoi canoítana, cuemo fecallena, omoi uisi jaié jino juiconoíacadomoi.

<sup>16</sup> Omoimo jicanoiacaducue: ¿Uanaicinuai omoimo cue llua jira, omoi enoillamiena jai jaidicue?

<sup>17</sup> Moisés micori llogacinuaido jaidino omoina eo nabairitimaci; iadedi mare rafuena finoacaiñedimaci. Naimaci diga omoi nabairillena, cue diga omoi nabairillana jai jitañedimaci.

<sup>18</sup> Mare comeciaymona cuena omoi jaca jitaia, eo mare. Omoi dine cue ia, iese omoi jitaia, mare. Omoi dine cue iñenia, iese omoi jitaia, jiai mare.

<sup>19</sup> Cue uruai, Cristo omoi comeciaina raise namataja dinori, omoi cue comeci eo duere dane llicidaite.

<sup>20</sup> Omoi diga ja iacaducue, omoi diga atona raise ñaillena. Omoimona are cue illa jira, dane raise cai nabairillena, omoimo cue llua raise uifioñeducue.

*Jesucristo rafue Moisés micori llogacinuai baifemo faite*

<sup>21</sup> Moisés micori llogacinuai anamo iacadino, omoimo daje rafuena jicanoiacaducue: ¿Moisés micori ciegafuaina raise cacadomoi?

<sup>22</sup> Moisés micori jaie cueba: “Abraham micorimo mena jito ite. Daje jito ie mullaiñomona comuide. Jaie jito ie mullaiñedifñaiñomona comuide. Naiñaiñodi ie nanoca ai.

<sup>23</sup> Abraham micori jitailla jira, ie mullaiño jitona comuitate; iadedi ie mullaiñedifñaiñodi jito comuide, Jusiñamui llua jira”.

<sup>24-25</sup> Naie rafuemona cai fueolle. Ie iaifñuaidi mena jai lloga rafue isoidiaifñuai. Abraham micori mullaiño mameci Agar micori. Naiñaiñodi Sinai railla anedumona lloga rafue isoide. Arabia railla eniruemona Sinaiñomona Jusiñamuidi Moisés micorimo rafuena llote. Naiñaiño mullaiñona jira, ie urue mullaimana jeiciga. Ie nama anamo jaca ite. Ie isoide. Moisés micorimo llogacinuaido jaidinodi naie rafue anamo itimaci. Jerusalémo itino Moisés micori llogacinuai anamo jai nia illa jira, Agar micori Jerusalén railla nairai isoide.

<sup>26</sup> Jaiñaiñodi jaie lloga rafue isoide. Naiñaiño Abraham micori ai. Naiñaiñodi Sara micori. Naiñaiñodi monamo ite Jerusalén isoide, naiñaiño mullaiñoñena jira. Nainomo jainaiñidicai, Moisés micori llogacinuai anamo jai cai iñena jira.

<sup>27</sup> Isaías micori iena jaie cuete:

Oiniño, mai iobi.

Urue nia jocoñedifñaiño, ado iobi.

Fniredifñaiño baifemo eo uruaiñenitio.

Iemona Moisés micori llogacino anamo iñedinomona Cristona ñnotinona ailluena jaillana uifioticai.

<sup>28</sup> Cue amatiai, bie rafue omoimo duide. Jusiñamui llua jira, Abraham micori jito Isaac micori comuide. Ie isoide. Jusiñamui llua jira, caidi ie uruaiñena jaidicai.

<sup>29</sup> Ero, mullaiño jitodi mullaiaifñedifñaiño jitona jaie duere finouide. Daje isoi Moisés micori llogacinuai anamo itinodi Jusiñamui Joreño anamo itinona birui duere finocabidimaci.

<sup>30</sup> ¿Niese cai nibaille? Moisés micori Sara micori llua jaie cuete: “Mullaiñona, naiñaiño jito diga, oni dota. Ie moo fiodailla mei, mullaiño jito ie moo raruaiñena feiñoñeite. Dama mullaiaifñaiñoñede jito ie moo raruaiñena feiñoñeite”.

<sup>31</sup> Ie jira mullaiño urue isoifñedicai Moisés micori llogacinuai anamo jai cai iñena jira, mullaiaifñedifñaiño urue isoidicai.

## 5

*¿Nie isoide rafuedo jaitomoi?*

<sup>1</sup> Moisés micori llogacinuai anamona Cristodi caina jai jillotate. Ie jira omoi comeciaina ocuiño. Jaie omoi illa isoi, dane jaiñeno. Omoi marebicaifñede rafue anamo jaie itomoi. Ie jira Moisés micori llogacinuai anamo iñeno. Iemona marebicaifñeitomoi.

<sup>2</sup> Jeacinomona omoi jillobillena, Moisés micori llogacinodo omoi jaiacanamona, omoi abiana omoi detataia, Cristo rafuena jai jitañedomoi.

<sup>3</sup> Dane lloiticue: Jeacinomona omoi jillobillena, naga abina detatagamie nana Moisés micori llogacinuaina ñnua. Nana iena ñnoñenia, naimie jilloñeite.

<sup>4</sup> Moisés micori llogacinuaina ñnuamona omoi marebicaiaçania, Cristo rafuena jai duifñedomoi. Jusiñamui caina duenaillamona, Cristona jaie cai dine orede. Moisés micori llogacinodo omoi jaiacania, Cristo rafuena jai jitañedomoi.

<sup>5</sup> Moisés llogacinuaina ñnuamona marebicaifñedicai; iadedi Jesucristona cai ñnuamona, Jusiñamui Joreño caina canuamona, cai marebicaillamo iocire ocuiridicai.

<sup>6</sup> Abina detatajamona, cai jeacinomona jilloñedicai. Abina cai detatañenamona, jai jilloñedicai. Dama Cristona cai ñnuamona jillobidicai. Naimiena cai ñnua jira, nana cominina isiruicana jaidicai.

<sup>7</sup> Cristo rafuedo navui marena jaidomoi; ia damierie uanaicinona omoi ñnuana jai jitañedimaci.

<sup>8</sup> Jusiñamuimona naimaci uaina oñedimaci. Jusiñamui omoína navui uaidote, naimie dibeimo omoi illena.

<sup>9</sup> Jiai rafuedo iena lloiticue: Janore jisa siritate ra ifecimo joneia, jai nana siritate. Ie isoide. Dame jiaie rafuedo jai, diga cominina jifuerede, naimie jailla dibeido jaillena.

<sup>10</sup> Jiaie rafuedo omoi jaiñellemo cue comecina jai facadicue. Cai Nama cue ñnua jira, cue lloga uaido omoi jaillemo cue comecina jai facadicue. Omoi comeciaina naganomo itatatimiena uñoñedicue; iadedi Jusiñamui naimiena duere finoite.

<sup>11</sup> Cue amatiai: “Abina detataja” omoimo cue lloiadedi, cuena jai duere finoñedomoi, omoi jilloillena Jesucristo fiodailla rafuena jai cue lloñena jira.

<sup>12</sup> Omoi comeciai naganomo itatatinodi raitimaci: “Janore jisa abina detatajama, cai jeacinomona jillobidicai”. Iese itena, Jusiñamuina uñoñedino finua isoi, namiena naimaci abiai diana jiai jitaidicue.

<sup>13</sup> Moisés llogacinuai anamona Jusiñamui omoína jai jillobitade; iadedi marañede rafuena omoi finollena jillobiñedomoi. Omoi jillobilla jira, naimacina omoi isiruilla jira, jiaie cominina cano.

<sup>14</sup> Moisés micori iena jai lote: “O abi o isiruilla isoi, o ecimo itinona isirui”. Iena omoi finoia, nana Moisés micori llogacinuaina jai finodomoi.

<sup>15</sup> Iese omoi finoñenia, conima diga omoi riire iciria, jaca danomo iñeitomoi.

### *Jiaie cominina omoi isiruilla rafue*

<sup>16</sup> Omoimo nia lloiticue. Jusiñamui Joreño omoi comeciaino namatajano omoi i. Omoi comeciaino ite marañedicinodo omoi jaiñeno.

<sup>17</sup> Cai comeciaino ite marañedicinodi Jusiñamui Joreño jitaillacinodo daacinodo jaiñede. Conima abido jai, cai jitailla ra cai finoñellena;

<sup>18</sup> iadedi Jusiñamui Joreño anamo omoi raise ia, naimie lluaña omoi raise ñnoia, Moisés micori llogacinona jai jitañedomoi.

<sup>19</sup> Ero, marañede comeciaino iticinodo omoi jai, bie isoidicinona finocabidomoi: aiñede riño diga illacina, iniñede iima diga illacino, jeare ñaiacino, diga eo jearede rafuena finuacino,

<sup>20</sup> jiraraina sedajacino, aima ra finuacino, comena enoillacino, uaina uaitajacino, abina uradoillacino, icirillacino, dama ie abi ramo comecina facajacino, nana cominina uaitaillacino, damacina iñenacino,

<sup>21</sup> dama abina uradoillano, rana bairuacino, comena meiniacino, jifaillacino, aifuerillacino, ie isoidicino. Omoimo jai lloticue. Dane lloiticue: Bie isoide rafuena bu finocabia, naimie cominina naimaci iñena jira, Jusiñamui ie cominina sedajanomo jainaiñeite.

<sup>22</sup> Jusiñamui Joreño omoi comeciaino namataia, bie isoidicinona finocabidomoi: nana comini isiruillacino, comeci caimare illacino, uri illacino, raire icirirainiacino, duenaillacino, jiaie cominina canuacino, ie lloga uaina finuacino,

<sup>23</sup> uai oñenacino, abina eenuacino. Moisés micori llogacinuai bie isoidicinona ñaiñede.

<sup>24</sup> Cristo Jesúmo jainaiñidinodi naimaci marañede comeciai jitaillacino anamo iñedimaci.

<sup>25</sup> Jusiñamui Joreño caino illa jira, naimie cai comeciaina namatajacinodo cai jaillena.

<sup>26</sup> Iemona abina cai birinñellesa. Abina jiai cai iedoñellesa.

## 6

### *Jiaie llofuiacino*

<sup>1</sup> Cue amatiai, omoimona damie ebena jamai jeacinona finoia, dane Jusiñamui dibeimo naimie raise illena, naimiemo fecuise icineno llono. Omoi cominimona Jusiñamui Joreño comeciaino raise namatadinodi iese naimiemo llofuellesa. Jeacino finoi raillano, nagamiiai abi rairuillesa.

<sup>2</sup> Bu duere sefua, bu Taife ramo faia, coninina cano. Iese omoi canoia, Cristo llogacinuaina jai ñnotomoi.

<sup>3</sup> “Cuemo iese suiñeite. Dama abina sedadicue. Jamai bue isoñedicue” comecina facadimie dama abina jifue. Naimie jamai bue isoide.

<sup>4</sup> Marañeni raillano, ie finoca rafueconi iobillena, nagamiiai ie finoca rafuena abido facaja. Dama ie maijia rafueconi iobilla. Dama ie maijia rafuedi naimiemo duide. Jaimiemo ite maijia rafuedi naimiemo duñede.

<sup>5</sup> Naimie finoca rafuemona nagamie jeacinona finoia, dama naimie muidona.

<sup>6</sup> Naga Jesucristo rafuena fuetimiedi ie llofuegamiemo mare ra fecalle.

<sup>7</sup> Dama o abina jifueñeno. Budi Jusiñamuina jifuenide. Jeacina bu finoia, Jusiñamui ibana jaca oite. Marecina bu finoia, Jusiñamuimona iba feiñoite.

<sup>8</sup> Ie comecimo ite marañede jitaillacino finodimiedi ie abina faifite. Fiodaite; iadedi Jusiñamui Joreño jitaillacinona finodimiedi monamo jaca iite. Faifñeite.

<sup>9</sup> Jusiñamui Joreño jitaillacinona finuana sefuiruiñeno. Cai comeciai cai ocuiñoia, Jusiñamui jitailla facaiseconi ibana feiñoiticaí.

<sup>10</sup> Ie jira nana cominina canocabi. Nana creyentiaina ua eo canocabi.

#### *Facaduacino*

<sup>11</sup> Ero, jerie cuiano omoimo bie facaimo cueticue.

<sup>12</sup> Jiaie cominimona iobillacinona omoi abiaina detatajana jitaicino feiñoiacana jira, omoi abiaina detatajana jitaicimaci. Cristo rafue lloticainadedi: "Cristo rafuena uiñoñedinodi niade duere caina finodimaci" raillanomo comeciaina facajamona, iese jitaicimaci.

<sup>13</sup> Omoi abiaina detatajana jitaicimodi Moisés micori llogacinodo raise jaiñedimaci. Nana iena inoñedimaci. Omoi abina iedoiacana jira, omoi abiaina detatajana jitaicimaci;

<sup>14</sup> iadedi Jusiñamuidi jiaie rafueri abina cue ieduanana jitañede. Dama Cristo cueri fiodailla rafueri abina iedotiecue. Ie jira Jusiñamuiñede rafuemo jainaiañedicue. Naie rafue anamo jai iñedicue.

<sup>15</sup> Abina diamona cai jeacinomona jilloñedicaí. Abina deñenanomona jaca jilloñedicaí; iadedi Jusiñamui Joreño caina comonori comuitajamona jillobidicaí.

<sup>16</sup> Jusiñamuidi nana bie llucacimodo jaidino uri itatatesa. Naimie naimacina duenaillasa. Jusiñamui cominidi ua jaca iese illasa.

<sup>17</sup> Bie isoide rafue illamona, cuena duere finoñeno. Jesucristo rafuena cue llua jira, diga icaiño cue abimo bofellaña jai otiecue.

<sup>18</sup> Cue amatiai, cai Nama Jesucristo omoina duenaillasa. Mai. Pablocicue.

## EFESOMO ITE CRISTONA HNOTINOMO PABLO ORETAGA RABE

*Efesomo ite creyentiaimo Pablo cartana orede*

<sup>1</sup> Efeso railla nairaimo ite creyentia, Pablocue. Bie carta omoi dine oredicue. Ie rafue llollena, Jusiñamui jitailla jira, Jesucristo oretagamiedicue. Naimiemo omoi jai jainaiaila jira, Jesucristona hnocana jai jaidomoi.

<sup>2</sup> Cai Moo Jusiñamui, cai Nama Jesucristo diga, omoina duenaicabillana uñocana mai omoi jai. Iaimai omoi comeciaina uri itatajacabillana uñocana mai omoi jai.

*Cristomo jai cai jainaiaila jira, Jusiñamui marena itatajacinona feiñotica*

<sup>3</sup> Cristomo cai jainaiaila jira, Jusiñamui caina eo marena itatate. Ie jira cai Moo Jusiñamuimo iobillacinona cai fecacabillasa, naimiedi Cai Nama Jesucristo ie Moo illanona. Cristomo cai jainaiaila jira, cai comeciaina marena itatajacinona Jusiñamuimona jai feiñotica.

<sup>4</sup> Iena ja lloiticue. Enirue nia ifenia, Jusiñamui nana naimiena hnotinona jai fetode. Cai facaina Cristo ico fiodaillena naimie uñuamona, caina jai fetode. Naimiemona cai marebicailena, jeacinona cai finoñellena, caina fetode.

<sup>5</sup> Caina isiruillamona caina fetode. Naimie eo jitailla jira, naimie uruiaina cai jaillena, caina fetode. Jesucristo fiodaillamona Jusiñamui uruiaina jaidicai.

<sup>6</sup> Naimie caina fetuamona, naimie caina duenaillana jai uñotica. Iemona naimiedi eo mareuidimiena jai jai uñotica. Ie isiruiga Jitomo cai jainaiailamona iena uñotica. Naimiemo buena cai finoñena, caina duenaite. Naimiena cai iobitallena, caina fetode.

<sup>7-8</sup> Caina eo duenaillanona, ie Jito fiodailla jira, Jusiñamuidi jeacino anamona caina jai jillotate. Cai jeacino oni dotajamona, ibana jai ofeite.

<sup>9</sup> Naimiena cai raise hñollena, caina abina jai uñotade. Jusiñamui caina naimie nana caina birui jilloitaicanana jai uñotade. Cai cominidi iena jai uñoñedimaci; iadedi Jusiñamui jitailla diese Cristo finoca rafuedo caina iena jai uñotade.

<sup>10</sup> Naimie jitailla facaiseconi, nana caimo ie finoacalle rafue fuiduanona, Cristo anamo naimie nagamiena raise itataite. "Cristo cai Nama" raitimaci.

<sup>11</sup> Ie jira naga suide rafue suicana jai, Jusiñamui jitaillacinona fuidollena. Nana naimie jitailla diese, naimie comeci jitailla jira, nana iena finode. Nano facaiseconi naimie cominina cai jaillana naimie uñuamona, caina jai fetode. Ie muidona naimie cominina jai jaidicai.

<sup>12</sup> Naimie caina fetuanona Cristona jai hnotica. Naimie diga ico jaca cai illemono birui occuridicai. Naimiena cai iobitallena caina fetode. "Naimie fue eo mare" cai raillena caina fetode.

<sup>13</sup> Cristona jai birui hnotomoi. Uanaicino rafue omoi jai cacajamona, naie mare rafue omoi cacajamona, omoi jeacinomona jai jillobidomoi. Jusiñamui Joreño omoi illano, navui Cristo llua isoi, naimie dibeimo omoi illana uñotomoi.

<sup>14</sup> Jusiñamui Joreño caimo jaca illa jira, Jusiñamui diga ico cai jaca illena uñotica. Jusiñamuidi caina ie cominina jai jaitate, naimiena cai iobitallena. "Naimie fue eo mare" cai raillamona, naimiena iobitaitica. Naimiemo cai jainaiaila jira, naimiemona nana cai comeciaina marena itatajacinona feiñotica.

*Naimaci facaina Pablo jide*

<sup>15</sup> Cai Nama Jesúna omoi hñuana jai fididicue. Nana jai creyentiaina omoi isiruillana jai fididicue.

<sup>16</sup> Ie jirari Jusiñamuimo cue jia, omoina feitañedicue. Omoi facaina naimiemo iobillacinona jaca fecadicue.

<sup>17</sup> Cai Nama Jesucristo Jusiñamuimo duilla jira, cai Moo Jusiñamui uai siñonana jira, naimiemo cue jianona, omoi facaina jcanoticue. Naimie Joreño uaido naimie rafue raise uñocana omoi jaillena jcanoticue. Naimiena raise uñocana omoi jaillena jcanoticue. Iese omoi facaina jcanocabiticue.

<sup>18</sup> Naimie dibeimo omoina naimie jai uaidua jira, naimie diga ico jaca omoi illemona, iena omoi raise uñuana jitaidicue. Naimie cominina omoi jai jailla jira, naimie illanomo ico eo marena iocire iitomoi. Iena omoi raise uñuana jitaidicue.

<sup>19</sup> Naimie uai ua eo siñonana omoi uñuana jitaidicue. Naimiena cai hñuana muidona, ie uaido naimie caina canorede. Iena omoi raise uñuana jitaidicue.

<sup>20</sup> Fiodaillamona Cristona ie uaido Jusiñamui jai jillotaja jira, naimie uai siñonana uñotomoi. Fiodaillamona Cristo jillua mei, monamo Cristo abido jailla mei, ie ecimo Jusiñamuidi Cristona illaimana dane itatate.

<sup>21</sup> Ie jira Cristo nana Jusiñamui jaienisai afemo ite. Ua nana comini afemo naimie ite. Taife afemo naimie ite. Janaba afemo naimie ite. Naie iaimai isoide joreñuai afemo naimie ite. Birui iese ite. Ico iese nia iite.

<sup>22</sup> Jusiñamuidi naga ra Cristo anamo ua jai itatate. Cristona nana creyentiai imaci illaimana jiai ua jai itatate.

<sup>23</sup> Cristomo daajena nana cai creyentiaidicaidi duidicai. Naimie anamo cai illanona, naimie nana caina ocuicabide. Ie jira marena cai illena naimie jitailla isoi, naimie nana caina birui canocabide.

## 2

*Jusiñamui caina isiruilla jira, cai jeacinomona jai jillobidicai*

<sup>1</sup> Jusiñamuina jai e omoi nia ñnoñenia, naimiemo omoi duifñena jira, naimiemonona fioidaitino isoidomoi. Jeacino anamo omoi illa jira, naimiemonona fioidaitino isoidomoi. Jeacino finocana jaidomoi. Maraññedincinona finocana jaidomoi.

<sup>2</sup> Jeacinona eburuitomoi Jusiñamui dibeimo iñedino rafuedo jaidomoi. Taife dibeido jai jaisoidomoi. Jusiñamuina oiacaññedino Taife jitailla rafuedo jaisoidimaci.

<sup>3</sup> Naimaci isoi jai e nana iticai. Cai comeciaino ite jearede jitaillacinona finodicai. Iedo jai jaisoidicai. Ie jira Jusiñamui raicailafue anamo jai e iticai. Iese jai e nana iticai.

<sup>4-5</sup> Jeacinona jai e cai finua jira, jeacino anamo iticai. Jusiñamuina ñnoñedicai; iadedi Jusiñamui caina eo duenaillanona, caina eo isiruillanona, naimie diga ico jaca cai illena, naimie dibeimo caina itatate. Fioidaillanona Cristona Jusiñamui jillotaja jira, jeacino anamona caina jai jillotate. Ie muidona monamo ico iiticai.

<sup>6</sup> Cristona jillotaja mei, Jusiñamui ie ecimo naimiema dane itatate. Cristomo cai jai jainaiilla jira, Jusiñamui nainomo caina jai jainaiitate.

<sup>7</sup> Cristo finoca rafuemona caina iese jai itatate. Caina iese jai itatajamona, nana cominidi Jusiñamui caina eo duenaillana uññoitimaci.

<sup>8</sup> Naimie caina duenaillanona, caina jai jillotate. Jaca buena cai finuamona jillobiñedicai; iadedi naimie jitailla jira, naimie caina jai jillotate.

<sup>9</sup> Cai jilloillena jaca buena cai finoñena jira, abina iedoñedicai.

<sup>10</sup> Jesucristomo cai jainaiillanona, ie cominina cai jaillanona, cai illa isoi naimie caina itatate. Iese cai illamo Jusiñamui comeci jai e facajano, mare rafuena finocana cai jaillena, naimiedi cai comeciaina marena itatate.

*Cristomo jai cai duilla jira, jai e nairai e diga birui uri iticai*

<sup>11</sup> Omoi jai e isoillana uññotomoi. Iena comecitomoi. Jusiñamuina jai e uññoñedomoi. Judñuaiñedincinona omoi jeicñena jira, cai judñuai comini isoi abiaina detatañedomoi. Ie jira cai cominimona maraññedomoi.

<sup>12</sup> Omoi jeacinomona Cristo omoina jilloitaiacanana naie facaiseconi uññoñedomoi. Cai judñuai nairaimo jainaiñedomoi. Ie muidona Jusiñamui cai judñuai cominimo jai e lloga rafuena uññoñedomoi. Jusiñamuina nabaiillana uññoñedomoi. Jusiñamui diga omoi ico jaca illena uññoñedomoi. Jusiñamuina omoi uññoñena jira, naimiema sedañedomoi.

<sup>13</sup> Naimie dibeimo jai e jaiñedomoi; iadedi Jesucristomo birui duidomoi. Jusiñamui jai e ñnoñedomoi; iadedi Cristo jai fioidailla jira, naimiema birui ñnotomoi. Naimiema omoi jai ñnuamona, cai diga naimie dibeimo jai itomoi.

<sup>14</sup> Naimie omoi comeci jai e uri itatate. Cai comeci jai e jai e uri itatate. Cai judñuaimona omoina jai e jearuiticai. Iese jai e iticai; iadedi Cristo muidona dan cominina nana birui nabaidicai.

<sup>15</sup> Cristo fioidaillanona Moisés micori jai e llogacino anamo jai iñedicai. Naie llogacino dan cai judñuaimo duilla jira, Jusiñamui dibeimo jai e iñedomoi; iadedi Cristo finoca rafue muidona, birui daajena jaidicai. Omoina jai e cai gaiñena jira, omoina jai e nabaiñedicai; iadedi Cristomo daajena cai duilla jira, birui nabairedicai.

<sup>16</sup> Cruzmo Cristo fioidailla jira, Jusiñamui dibeimo cai illanona, mena nairaimona caina daje nairaina jai itatate. Ie jira daje nairaina uri iticai.

<sup>17</sup> Cristo jai e billanona, mare rafuena llote. Omoi judñuaiñedinomo, cai judñuaimo, comeci jai e illana llote. Nana caina jilloitaiacanana llote.

<sup>18</sup> Naimie muidona Jusiñamuina jai nabairedicai. Jusiñamui joreño caina canuamona, naimie diga birui nabairedicai.

<sup>19</sup> Jusiñamui cominina omoi jai illa jira, nana naimiema ñnotino diga Jusiñamui mo daajena duidomoi. Caimona birui jai e cominiñedomoi.

<sup>20-22</sup> Jofo isoidicai. Jofona cai finoacania, naie ibiri nano finodicai. Ie mei diga rana cai atiamona, iena niticai. Ie isoide. Diga jai e isoide cominiaina iticai; iadedi Cristomo daajena jai duidicai. Naimiedi birui nana cai Nama. Cristo facaina llorainimona naimie



rafuena jai cacadicai. Jusiñamui Joreño caina canuanona iena ñnoticai. Iena cai ñnuamona, naimie jitailla isoi, mare rafuena finocana jaidicai. Cai diga Cristomo omoi jai duillamona, Jusiñamui Joreño nana cai comeciaino jai ite.

### 3

*Judiuaifñedinomo Pablo Cristo rafuena llofue*

<sup>1</sup> Jesucristo rafuena omoi judiuaifñedinomo cue llofueuilla jira, cárcelmo iticue.  
<sup>2</sup> Omoína naimie duenailanona, omoína llofuellena, Jusiñamui cuena oretate. Iena jai uñotomoi.

<sup>3</sup> Jusiñamui cuemo jaie uññoega rafuena jai llote. Naie rafuena janore como jai cueticue.  
<sup>4</sup> Bie carta omoi facaia, Cristona jaie uññoega rafuena cue jai uñuana uñnotomoi.  
<sup>5</sup> Jusiñamuidi cominimo iena jaie raise uñnotañede; iadedi ie Joreñodo Cristo facaina llorainina iena birui jai uñnotade.

<sup>6</sup> Iena lloiticue. Judiuaifñedomoi; iadedi Jusiñamui cuemo jaie llote: “Judiuaifñedino Cristona ñnuanona, omoi judiuaia isoi jilloitimaci” llote. Omoi facaina Cristodi fiodaite. Naimiema omoi ñnoia, omoína ie uruina cai isoi jai itatate. Naimiedi nana cai Moo. Jai daje nairaidicai. Cristomo daajena duidicai. Cristo rafuena omoi ñnuamona, naimie jai llua isoi, Jusiñamui diga ico jaca itomoi. Jusiñamui cuena iena jaie uñnotade.

<sup>7</sup> Jusiñamui jitailla jira, cuena naimie duenailanona, naimie uai cuemo illamona, naie mare rafuena llofuecabiticue.

<sup>8</sup> Creyentena nia cue jaiñena facaiseconi, creyentaina jaie cue duere finouilla jira, jamai bue isoidicue. Nana jiaie creyentia; cue baifemo faitimaci; iadedi Jusiñamui cuena duenailanona, ie rafuena cue llollena, cuena oretate. Cristo caina eo raise marena canocabillana llofuecabiticue.

<sup>9</sup> Naie jaie uññoega rafuena nana comini birui uñollena, cuena oretate. Jusiñamui naga rana finode; iadedi naimie jitailla jira, naie jaie uññoega rafuena jaca buna jaie raise uñnotañede. Nana comini iena birui raise uñollena, cuena oretate.

<sup>10</sup> Judiuaifñedino judiuaia diga creyentaina jaillamona, Jusiñamui jaienisa; naimie uai siñonana uñnotimaci. “Naimie fue eo mare” raitimaci.

<sup>11</sup> Jusiñamui jaca jitailla isoi, naie rafue suicana jaide. Cai Nama Jesucristona naimie oretajanona, cai facaina Cristo fiodaite. Iemona Jusiñamui jitailla rafuedi suide.

<sup>12</sup> Cristona cai ñnua jira, Jusiñamui diga jaciruiñeno birui jai ñairedicai. Naimie caina cacajana jia; uñnoticai.

<sup>13</sup> Cristo rafuena omoimo cue llua jira, birui duere sefuidicue. Cárcelmo cue duere sefuilla jira, Cristo rafuedo jaillena omoi comeci; sefuiruisiñeno; iadedi Cristo rafue omoimo cue lluanona cue duere sefuia, iobicana omoi jai.

*Cristo caina eo isiruite*

<sup>14</sup> Cai Moo Jusiñamui caina eo canocabillanomo cue comecina facaia, naimiemo jiidicue.

<sup>15</sup> Naimiedi nana creyentia; imaci Moona jira, naimiemo jiidicue.

<sup>16</sup> Naimiemo cue jianona, omoi facaina jiidicue. Naimiemo eo ebirede siño iticino illamona, ie Joreñodo naimie omoi comeciaina raise ocuñnotallena jicanoticue.

<sup>17</sup> Cristona omoi ñnuamona, naimie omoi comeciaina raise namatallena jicanoticue. Jusiñamuina omoi isiruicana jaillana jiidicue. Jiaie cominina omoi isiruicana jaillana jia; jiidicue.

<sup>18-19</sup> Cristo caina jaca eo isiruillana, nana jiaie creyentia; diga jaca eo isiruillana, omoi eo raise uñuana jiidicue. Naimie caina eo isiruillacino cai comeci; facajacino baifemo uailla jira, naimie caina eo isiruisoillacinona jaca raise uññoedica; iadedi iena janore cai uñnuamona, Jusiñamui omoi comeciaina namatallena jiidicue. Iese omoi facaina jicabidicue.

<sup>20</sup> Ie jira Jusiñamui iobillacino cai fecajasa. Ie uaido cai comeci; marena icana jaitate. Naimiemo cai jicajacino baifemo naimie fecarede. Cai comeci; facajacino baifemo naimie jia; finorede.

<sup>21</sup> Ie muidona naimiemo iobillacinona nana cai creyentia; idica; id; fecacabillasa. Jesucristo finoca rafue muidona iobillacinona jia; cai fecacabillasa. Mai.

### 4

*Jusiñamui Joreño jai caimo illa jira, cai comeci daje isoi lloide*

<sup>1</sup> Cárcelmo nia cue illamona, omoimo rafuena nia lloiticue. Cristo rafuena cue llofua jira, cárcelmo iticue. Creyentaina omoi jai jailla jira, Cristo jitailla isoi omoi i. Jusiñamui omoína jai fetode naimie jitailla rafuena omoi finollena.

<sup>2</sup> Ie muidona abina jaca iedoñeno. Raire iciriñeno. Jiaimie ona duere finoia, ibana oñeno; iadedi uai oñeno naimiema jaca isirui.

<sup>3</sup> Jusiñamui Joreño omoimo illamona, omoi comeciai daje isoi lloicana jai. Daje isoi omoi comeciai lloillamona, omoi jitaillamona daní uri omoi i.

<sup>4</sup> Iena nia lloiticue. Cristona cai ñnuamona, daajena naimiemo jainaiaidicai. Jusiñamui Joreño nana caimo illamona, daní omoi comeciai lloicana omoi jai. Jusiñamui caina jai fetode. Ie muidona naimie diga jaca cai illena, naimie isoi cai illemo ocuiridicai.

<sup>5</sup> Jaca dajede Nama sedacabidicai. Caina jilloitallena, da naimiena ñnoticai. Dama naimie facaina bautizaganodicai.

<sup>6</sup> Cai Moo Jusiñamui jaca dajede. Jaca dajede Jusiñamuina nana cai creyentiaidicaidi sedadicaí. Naimie anamo nana iticai. Naimie jitaillacinona cai finollena, caina canocabide. Caina canollena, naimie Joreño caimo jaca ite.

<sup>7</sup> Naimie jitailla diese, caina fetuanona, naimie facaina cai maijillena, ie uai caimo fecade. Jiaie creyentiaina naimiemo ñnotacana jaillena, ie uai caimo fecade.

<sup>8</sup> Iena cai raise uiñollena, David micori jaiie cuegafueмона fueoiticai. Naimie cuela: "Monamo abido naimie jaillanona, illaimana naimie illamona, ie cominina naimie ifuanona, naimacimo rana fecade". Cristona ñaite. Iemona Cristo cai maijiacino caimo illana uiñoticaí.

<sup>9</sup> Biemo omoi comeciaina faca. Monamo abido naimie jailla jira, monamona eniruomo Cristo nano billana uiñoticaí.

<sup>10</sup> Eniruomo bite; iadedi monamo abido jaide. Nana cominina birui sedade. Naimie baifemo jaca buna iñede.

<sup>11</sup> Ie jira caimo ie uai jai fecajanona, caimona ie llofueoicaiganona fetuanona, ie rafue raise llofuellena, naimacina oretate. Damieriemo ie facaina ie rafuena jino llollena, ie uaina fecade. Ie rafuena nia ñnoñedinomo llollena, damieriemo ie uaina fecade. Creyentiaina ie rafuena llofuellena, damieriemo ie uaina fecade.

<sup>12</sup> Iese ie uaina fecade, naimie facaina raise cai maijillena, nana jiaie creyentiaina cai canollena, Ie mei Cristo rafuena daajena ñnocana jaiticai.

<sup>13</sup> Iena cai ñnuamona, Jusiñamui Jitona raise uiñocana jaiticai. Cai comecidi daje isoi lloicana jaiticai. Naimie jitaillacinodo raise jaiticai. Naimie marena icana illa isoi jaiticai.

<sup>14</sup> Cai uruiacai facaise cai comeciai naganomo ite. Naie facaise nie isoide rafuena cai cacajia, iena raire ñnoticai. Cristo ñnocana cai jaillamona, urulai isoi cai iacaiñena. Damierie naga llofueraima uaido jaidimaci. Damierie llofuerañidi Cristo rafuena raise llofueñedimaci; iadedi jifuetimaci. Tainona llotimaci. Iedo cai jaiñena;

<sup>15</sup> Iadedi jiaie cominina cai isiruillamona, uanaicinodo cai jailla. Cristo isoi icana cai jaillamona, abina uiñoticaí. Cristodi cai illaimana jira, caina ocuide.

<sup>16</sup> Naga creyente naimiemo jainaiaide. Aillosiedicai; iadedi daajena naimiemo jainaiaidicai. Daajena naimiemo cai jainaiailamona, naimie jitaillacino cai finoia, naimiena ñnocana jaiticai. Iemona daní coninina isiruicana jaiticai. Daajena naimiemo cai jainaiaila jira, cai comeciai daje isoi lloicana cai jailla.

*Cristomo jai cai duilla jira, naimie rafuedo birui jaidicai*

<sup>17</sup> Omoimo nia lloiticue. Cai Namamo cue duilla jira, biena lloiticue. Jusiñamuina ñnoñedino isoi dane omoi iñeno. Jaiie naimaci isoi itomoi. Naimaci comeciaidi tainomo jai jaide isoide. Cacarefiacaiñedimaci.

<sup>18</sup> Jusiñamui rafuena uiñoñedimaci. Iena cacaiñedimaci. Abina naimaci uiñoñena jira, Jusiñamui ñibeimo illana jaca uiñoñedimaci. Uanaicinona uiñoiacaiñedimaci.

<sup>19</sup> Jearede rafuena naimaci finoia, meiruñedimaci. Naimaci comeciai oiicana rafuedo jai jaidimaci. Naga jearede isoide rafuena eo finocana jaidimaci;

<sup>20</sup> Iadedi Cristo rafuena omoi cacajamona, naimiena omoi raise uiñuamona, naimaci isoi omoi illena fueoñedomoi. Cristo rafuena omoi cacajamona, jiaiena illena jai fueotomoi.

<sup>21</sup> Naimiena cacajanona iena ñnotomoi. Naimiena cue llofuamona, naimiena Cristo facaina lloraini llofuamona, danomo omoi roracomo omoi ofia, Cristo uanaicinona cadomoi.

<sup>22</sup> Biena omoina llofuecabiticue. Cristona jaiie nia omoi ñnoñena isoi, omoi jaiñeno. Omoi comeciaino jaiie iticinodo jaiñeno. Naga jearede rafue omoi comeciai oiicanamona faificana jaiie jaidomoi. Iedo birui jaiñeno;

<sup>23</sup> Iadedi Cristo ñibeimo omoi jai illanona, naimiemo omoi comeciai facajano, Jusiñamui omoina canuamona, omoi comeciai iuaillaina meidocana jai.

<sup>24</sup> Cristo rafuena birui ñnotomoi. Naimie jitaillacinodo omoi mai jai. Jusiñamuidi jeacino finocana omoi jaiñenana jitaide. Naimie marena isoi, marena icana omoi jaillana jitaide.

<sup>25</sup> Ie jira tainona lloñeno. Cristomo daajena jai jainaiaila jira, coninimo uanaicinona jaca omoi lono. Jiaionona omoi jifueñeno.

<sup>26</sup> Maraiñedicinona bu finoia, naimiemo riire lloño; iadedi iese o lloia, naimiena jeare ñaiño. Jiaimie ona iciia, naimiena jeare ñaiño. Naimie diga o rafue ia, naie rafue nairuido marena fino,

<sup>27</sup> Taife ramo o fai raillano. Bu diga o nicino ia, iena raire marena o finoñenia, ibana oiacanitio. Naie raire o feitaña jira, Taife ona jeacinona finotaite. Iese suiñellena, naicino raire marena fino. Iena feita. Iena dane abido lliñoño.

<sup>28</sup> Naimiemo ra illena, ñiamona omoimona navui bu ia, creyentena naimie jai jailla jira, naimie dane ñiña; iadedi ra naimie jitaia, naimie maijite. Ie maijiamona ie ra ollena, ucubena feiñoite. Ie mei dueredinona naimie jiai canoite.

<sup>29</sup> Jeare ñaiño; iadedi nie isoid rafue ia, marecinona ñaino. Ie mei naiemona jiaie cominina canoitomoi, Jusiñamui dibeimo naimaci raise illena.

<sup>30</sup> Jusiñamui omoi jai jainaiilla jira, jeacinona finoño. Jeacino omoi finoia, Jusiñamui Joreñodi sunaite. Naimiena sunaitaño. Naimie caimo illamona, caina jillotajana uiñotica. Cristo dane abido billemona, naimie dine cai jaca illena, caina jai jillote.

<sup>31</sup> Jiaie cominina iciño. Iciñoño. Uaina uaitaño. Jiaie cominina jeare ñaiño. Naimacina duere jeare finoño;

<sup>32</sup> iadedi cominina canua. Jiaie cominina duenai. Jiaimie diga omoi nicino ia, naimie finoca rafuena feitajanona, naimie diga marena ñaino. Naie rafuena dane abido lliñoño. Cristo finoca rafue muidona, Jusiñamui omoi jeacinona jai feitaja isoi, jiaimie diga omoi rafue ia, naifuena omoi feita.

## 5

### *Jusiñamui cominina jai cai illamona, naimie jitaillacinona finoitica*

<sup>1</sup> Jusiñamui isiruiga uruiadomoi. Naimie marecinona finua isoi, omoi fino.

<sup>2</sup> Cristo caina isiruilla isoi, cominina isiruicana omoi jai. Naimie jitailla jira, caina isiruillamona, cai facaina naimie fiodaite. Cai jeacino oni dotallena naimiedi fiodaite. Naimie iese fiodailla jira, Jusiñamuina eo iobitade.

<sup>3</sup> Jusiñamui cominidomoi. Omoi aiñede riño diga iño. Omoi iniñede iima diga iño. Rana nicidoño. Jearede rafue finuamo omoi comeciaina facaño.

<sup>4</sup> Jearede rafuedo jaiño. Jamai ebena ñaiño. Meiredinona ñaicana jaiño. Naie isoid rafuedo creyentedi jaiña; iadedi Jusiñamui iobillacinona fecacana omoi jai.

<sup>5</sup> Ie aiñede riño diga icabitimiedi Jusiñamui illanomo duiñede. Cristo ie cominina sedajanomo duiñede. Ie iniñede iima diga icabitiñaiñodi Cristo ie cominina sedajanomo jai duiñede. Ie rana Jusiñamui ifomo naimie sedaja jira, rana nicidocabitimiedi Cristo ie cominina sedajanomo duiñede. Cue lloga rafuena jai raise cacadomoi.

<sup>6</sup> “Creyente naie isoid rafuena finorede” bu lloia, naimie omoia jifueiacade. Naimie iese lluaña ñnoño. Jusiñamui naie jeacinona finocana jaidinona duere finoite.

<sup>7</sup> Ie jira naimaci jearede finoca rafuedo jaiño. Naimacina nabaiño.

<sup>8</sup> Jusiñamuina jai omoi uiñoña jira, jitiredinomo itomoi isoidomoi; iadedi cai Namamo omoi duillamona, uanaicinona ñnocana omoi jai.

<sup>9</sup> Jusiñamuina omoi jai uiñoia, jeacinona omoi fainonocaia, Jusiñamui jitaillacinona finocana jaitomoi. Uanaicinona llocana jaitomoi.

<sup>10</sup> Buena o finoacania, Jusiñamui jitaillacinona o finuacinomo o comecina nano faca. Cai Nama jai lloga uaido omoi jaicabillamona, naimie jitaillacinodo jaca jai.

<sup>11</sup> Jitiredinomo nia itino finoca rafuedo omoi jaiño. Naimaci finoca rafuemona marecinodi jaca comuiñede. Naimacimo: “Maraiñede” lloño.

<sup>12</sup> Iena cue meidailla jira, naimaci jearede bainino finoca rafuena ñaiacaiñedicue.

<sup>13</sup> Marecinona omoi jaca finuamona, jiaie comini naimaci finoca rafue eo maraiñenana raise uiñotimaci.

<sup>14</sup> Cai ofia, naiena rocabitica:

Mai casi. ñiño.

Jai fiodaitino isoidomoi;

iadedi omoi comeciaina Cristo jai lligaiñoite.

<sup>15</sup> Ie jirari omoi marena illena, abina rairuicana omoi jai. Jusiñamuina ñnoñedino ebena jaicabidimaci. Naimaci isoi jaiño.

<sup>16</sup> Diga maraiñede rafue birui comuicabilla jira, cominina Cristo dibeimo raise omoi itatajallena, nagarui Cristo jitaillacinona finocana omoi jai.

<sup>17</sup> Ie jira ebe isoi jaiño; iadedi Cristo jitaillacinona uiñocana omoi jai.

<sup>18</sup> Iocire omoi iacania, naiemona diga maraiñede rafue comuilla jira, jifaiño; iadedi omoi comeciaina naimie namatallena, Jusiñamui Joreño anamo raise omoi mai i. Iemei naiemona diga mare rafue comuite. Iocire jai itomoi.

<sup>19</sup> Danomo omoi ofia, nana omoi comeciainona diga isoide ruana iocire ro-rona. Omoi ruamona jiaie creyentiaie comeciaina ocuifota. Cai Namamo omoi ruamona, omoi fillamona, omoi taillamona, naimiena iobitaitomoi.

<sup>20</sup> Cai Nama Jesucristomo omoi duillamona, nie isoide rafue omoimo ia, cai Moo Jusifamuimo iobillacinona jaca fecu.

*Cristomo jai cai duilla jira, cai comini diga marena iacadica*

<sup>21</sup> Cristo anamo omoi illa jira, jiaie creyente baifemo omoi faiacinomo omoi comeciaina facaño; iadedi coninina nagamiaina cano.

<sup>22-23</sup> Iniredifiaifiaui, omoimo rafuena lloiacadicue. Cai Nama Cristomo omoi jainaiaila jira, naimie jitailla jira, omoi inifiaie anamo raise omoi i. Naimaci uaina raise ino. Cristo nana creyentiaie afemo illamona, naimacina naimie sedaja isoi, naga ini ie ai afemo illamona naifiaifona sedaja. Cristodi nana creyentiaie imaci jeacinomona jillotajamona, naimie anamo itimaci.

<sup>24</sup> Cristo anamo nana creyentiaie illa isoi, naifiaifiaui inifiaie uaina jaca inua.

<sup>25</sup> Airedino, omoimo jiaie lloiticue. Nana creyentiaina Cristo isiruilla isoi, omoi ainiaina isirui. Nana caina naimie isiruillamona, naimie jitailla jira, cai facaina naimie fiodaite. Ie isoi omoi ainiaina omoi isirui.

<sup>26</sup> Nana creyentiaie marena illena naimie fiodaite. Jusifamui jitailla isoi, caina marebi-caitate. Cristo fiodailla jira, Cristo jai lloga rafuena cai inuamona, cai jeacinomona jai jillobidica.

<sup>27</sup> Fiodaite, nana cai creyentiaie comeciainena marena illena. Cai comeciainena jeaninana jitaide. Cristo abido bille facaisemo, Jusifamui jitailla isoi cai marenana jitaide.

<sup>28</sup> Naimie abi naimie isiruilla isoi, naga ini ie aina isiruilla. Iaimaiaie daajena jira, ie aina isiruitimiedi ie abina jiaie isiruute.

<sup>29</sup> Jaca bu ie abina enoifede; iadedi ie abina sedade.

<sup>30</sup> Naimiemo nana cai creyentiaie duilla jira, Cristo caina isiruillamona, caina sedade. Ie isoi nagamie ie aina isiruilla.

<sup>31</sup> Bie jiaie lloga uaimona iena uifotica. Moisés micori Jusifamui lluaia jiaie cuela: “Ie aina ollena, iima ie moona, ie ei diga faionocaite. Iemei dajena iitiaimaiaie”.

<sup>32</sup> Naie llofiacinomona jiaie rafuena fueotica. Cristona fiaiticue. Creyentiaina fiaiticue. Naimiemo cai duillamona, daajena itica.

<sup>33</sup> Dane lloiticue: Ie abina isiruilla isoi nagamie ie aina isiruilla. Nagaifiaie ini uai uaitaifeno inua.

## 6

<sup>1</sup> Uruiaie, omoimo rafuena lloiacadicue. Cai Nama jitailla jira, omoi eifiaie uaina ino. Omoi mootiaie uaina jiaie ino. Jusifamuimona marenana jira, iaimaiaie uaina ino.

<sup>2-3</sup> Moisés micori Jusifamui lloga uaina jiaie cuela: “O moo uai ino. O ei uai ino. Marena o illena, raire o fodiainellena, iaimaiaina o isiruillamona, iaimaiaie uaina ino” cuela. Jusifamui diga lletarafuena lloite; iadedi bie nanoca rafuena lloite.

<sup>4</sup> Mootiaie, omoimo lloiticue. Omoi uruiaina jamai icifeno; iadedi naimacina cai Namana naimaci uifollena llofue. Naimaci inoiacaifenia, abina naimaci uifollena, naimacina isiruillamona, naimacina duere fino.

<sup>5</sup> Patrón anamo itino, omoimo lloiticue. Omoi patrones ocuica uaina ino. Omoi maijiana naimaci ocuica, naimacina iobitallena, jaciruoicaida raise maiji. Omoi comeciainona naimaci jitailla rana maiji. Cristo iedena, naimaci ocuica uaina ino.

<sup>6</sup> Omoimo naimaci eruaiia, naimacina iobitallena, marena maiji; iadedi omoimo naimaci eruaiifenia, naimacina iobitallena, nia marena maiji. Naimacina iobitallena maiji; iadedi Cristomo omoi duilla jira, Jusifamui jitailla jira, omoi comeciainena maiji raillamona, marena omoi maiji.

<sup>7</sup> Patrón facaina maijiacinomo dani comecina facaño; iadedi iocire maiji, cai Nama facaina omoi maijiodomoidena.

<sup>8</sup> Biena uifoticaie: Marena bu maijia, cai Nama Cristomona ibana ico feifote. Patrón anamo itino iena feifotimaci. Patrón anamo ifedino iena jiaie feifotimaci.

<sup>9</sup> Patrones, omoimo lloiticue. Omoi Nama Cristo monamona omoimo eruaila jira, Cristo monamona naimacimo jiaie eruaila jira, omoi anamo itinona marena fino. Naimacina riire ocuifeno. Naimacina jeare fino. Cristo nana naimie cominimo daje isoi comecina lloide. Ie jira omoi anamo itinona marena fino.

*Cristomo jai cai duilla jira, naimie cai comeciaina ocuifotaite*

<sup>10</sup> Ie mudona nia lloiticue. Cai Namamo omoi duilla jira, naimiedi omoi canocabillamona, omoi comeciaina ocuifotacana omoi jai.

<sup>11-12</sup> Ero, Taife caina ramo jifueoicaida faite. Caina anafetitaiacade. Naimie isoidino caina jiai anafetitaiacadimaci. Naimacidi aillosie. Naimaci anamo nana Jusiñamuiña inofedino jai itimaci. Jitiredinomo naimaci illanona, Jusiñamui dibeimo ifiedimaci. Beno eniruemo itimaci. Jusiñamui illanomo duifedimaci. Cominina ñañedicue. Taifena, Janabana, Dofina, jananiaina, Dusisiñona ñaiticue. Naimaci isoide joreñaaina ñaiticue. Cai dibeimo ifiedimaci. Naimacimona abina omoi rairui.

<sup>13</sup> Jobaime illa facaiseconi, soldaduai imaci ra diga imaci abiaina riidotimaci. Cinturón jitadimaci. Lloemamona finoca ra jogobemo jitadimaci. Zapatona jitadimaci. Uico riidollena, naimaci uico riidua rana llinotimaci. Ifogi icona jitadimaci. Lloebina llinotimaci. Ie isoide.

<sup>14</sup> Cristomo omoi comeciai facajanona, uanaicinona jaca llono. Jusiñamui jitailla isoi, marecinona finocana omoi jai.

<sup>15</sup> Cristo rafuemona omoi comeciai uri itatajamona, iena meiruiño llocana uiño.

<sup>16</sup> Taifemona nana jearede rafuedi comuide. Naimiedi ramo faiacana jai jaide. Cristona omoi inuamona, Taife ramo faiacinona jamai.

<sup>17</sup> Jusiñamui caina jai jilloitajana jai uiñotomoi. Iena omoi uiñuamona, Taife ramo faiacinona inoñoeno. Taifena anafenollena, Jusiñamui Joreñodo Jusiñamui uaimona fueo.

<sup>18</sup> Jusiñamui Joreño omoína canuamona, Jusiñamui diga ñaicabi. Taife ramo omoimo faia, iena omoi inoñellena, Jusiñamui omoína canoite. Iese abina omoi rairuia, Taifena anafetitaitomoi. Taife ramo faiacino naimaci inoñellena, nana jiaie creyentiai facaina jiai jiacabi.

<sup>19</sup> Cue facaina jiai omoi jii. Marefodo nana Cristo ie rafuena cue lluaña omoi jii. Cristo nana cominina jilloitaiacanana ña lloiacadicue.

<sup>20</sup> Naie rafue cue lloñena, Cristo cuena oretate. Naie rafuena cue llua muidona, cárcelmo iticue. Cue jitailla diese iena marefodo cue lluaña mai omoi jii.

<sup>21-22</sup> Tiquico omoi dine oretaiticue. Naimiedi cue isiruiga ama. Naimiedi inogamie. Cristo rafue facaina cuena canocabide. Omoimo cue illana lloite. Cue finoca rafuena lloite. Naimiemona cue rafuena fidiitomoi. Iena cacajamona omoi comeciai ocuiñoitomoi.

<sup>23</sup> Cai Moo Jusiñamui, cai Nama Jesucristo diga, omoína uri itatajamona, Cristona jai omoi inuamona, coniniri uri icana jaillana jitaidicue. Iaimaiai omoína isiruillamona, iaimaiaína omoi inuamona, nana jiaie creyentiaína isiruicana omoi jai.

<sup>24</sup> Cai Nama Jesucristona omoi eo isiruilla jira, Jusiñamuidi omoína duenailasa. Mai. Pablodicue.

## FILIPOMO ITE CRISTONA HNOTINOMO PABLO ORETAGA RABE

### *Uaiduacino*

<sup>1-2</sup> Filipomo ite creyentiaí, Jesucristomo jai omoi duillamona, bie carta omoi dine oredicue. Pablodicue. Timoteo cue diga ite. Naimie cominina coco illamona, Jesucristo dibeymo majicabicodicoco. Omoimo coco uaina oredicoco. Omoi creyentiaí illaicominimo coco uaina ua oredicoco. ¿Nigacino? ¿Nie isoidomo? Cai Moo Jusifamui, cai Nama Jesucristo diga, omoína jai duenaite. Iena uifocana mai omoi jai. Iaimaiaí omoína uri jai itatate. Iena omoi uifocana mai omoi jai.

### *Jusifamuimo iobillacino fecade*

<sup>3</sup> Naga icaiño omoína cue comecia, Cristo rafuedo omoi jailla jira, Jusifamuimo iobillacinona fecadicue.

<sup>4</sup> Naga icaiño Jusifamui diga cue ñaia, omoi facaina caimare jidicue,

<sup>5</sup> Jesucristo rafuena cue llwana cuena omoi canua jira. Nano bie rafuena omoi cacajamona, cuena canodomoí. Cuena nia canodomoí.

<sup>6</sup> Jusifamuidi omoi comeciaina jaié marena itataja facaiseconi mare rafuena tainede. Omoi comeciaino mare rafue illicinona tainede. Cristo Jesús dane billiruimo Jusifamui bie rafuena fuidoite. Iese fuidollemo ocuridicue.

<sup>7</sup> Omoimo iese cue comecina cue facajia, omoína cue isiruilla jira, cuemona mare. Cárcelmo cue illamona, Jesucristo rafuena cue riidano, Jesucristo rafuedi uanaicino cue llvano, Jusifamui cuena canocabide. Iemona naimie caina duenaillana jai uifoticaí.

<sup>8</sup> Cuena omoína Cristo Jesús isiruitajamona, nana omoína isiruiticue. Jusifamuidi uanaicinona cue llwana uifote.

<sup>9</sup> Jaié cominina eo isi-isiruicana omoi jaillena, Jusifamuina raise omoi uifollena, nie isoide rafue omoimo ia, abina raise omoi uifollena, Jusifamuimo jicabicidicue.

<sup>10</sup> Iese omoína jitaídicue. Mare rafuedo omoi jaiacanana jitaídicue. Jairuido Cristo abido biite. Ie jira omoi comeciaí jeanillena jitaídicue, Jusifamui jitailla isoi omoi comeciaí marena illena.

<sup>11</sup> Jusifamui jitailla isoi omoi illamona, mare rafuena jaca omoi finuana jitaídicue. Jesucristona omoi inuamona, naimie omoína iena finotarede. Iese omoi finocana omoi jaia, Jusifamuina eo iobitaitomoí.

### *Cárcelmo Pablo illamona, diga comini Jesucristo rafuena cacadimaci*

<sup>12</sup> Cue amatiaí, bie rafuena omoi uifuaana jitaídicue. Cárcelmo cue illamona, diga comini Jesucristo rafuena cacadimaci.

<sup>13</sup> Cai illaíma jofomo itino cacadimaci. Nana bene itino jiaí cacadimaci. Jesucristo rafuena cue llua jira, cárcelmo iticue. Iena jai uifotimaci.

<sup>14</sup> Cárcelmo iticue; ia jaciruiñeno Cristo rafuena nia lloticue. Iemona diga creyentiaí naimaci comeciaina ocuifuanona, Jusifamui uaina jaciruiñeno marefodo birui cue isoi llotimaci. Navui jaciruitimaci.

<sup>15</sup> Cuena uradoillamona, cue afemo iacanamona, damierie Cristo rafuena llofuetimaci. Jiaie llofueraini marecinona finuacanamona llofuetimaci.

<sup>16</sup> Cuena naimaci isiruilla jira, llofuetimaci. Cristo rafuena cue riidamona, cárcelmo cue illana uifotimaci.

<sup>17</sup> Cue afemo iacadino mare comeciainona llofueñedimaci. Iemona cuena duere finocadimaci.

<sup>18</sup> Iese itimaci; iadedi uradoillamona naimaci llofuia, marecinona finuacanamona naimaci llofuia, cuemona damamei iesede. Cristo rafuena llocana jaidimaci. Iena jai iobidicue. Nia iobiticue.

<sup>19</sup> Cueri Jusifamuimo omoi jiano, Jesucristo Joreño cuena canuano, nana cuemo ite rafuemona jilloiticue. Iena cue uifuanona, nia iobiticue. Jesucristo Joreño ie Moo diga daje.

<sup>20</sup> Cue finolle rafuemona cue meiruiñellena eo jitaídicue. Jaié cue finocabilla isoi, Cristona marefodo birui iobitaiacadicue. Cue nia fiodaíñenia, naimiema iobitaiacadicue. Cue fiodaíllemona naimiema jiaí iobitaiacadicue. Iemona jiaie creyentiaídi Jusifamuimo iobillacinona fecaitimaci.

<sup>21</sup> Nia cue fiodaíñenia, Cristo rafuena nia lloiticue. Mare; iadedi cue fiodaia, naimie dine cue illana jiaí eo mare.

<sup>22</sup> Nia cue fiodaíñenia, diga cominimo Cristo rafuena nia lloiticue. Ie jira nie isoide cue illana cue comeci niese rainide.

<sup>23</sup> Nia raise uifioñedicue. Jiaicaiño fiodaicaiñedicue. Jiaicaiño fiodaicadicue. Cue comeci Cristo dine jaiacade. Nainomo cue illena cuemona eo mare;

<sup>24</sup> iadedi omoina cue canollena, nia fiodaicaiñedicue. Cue nia fiodaiñenia, omoina nia canoacadicue.

<sup>25</sup> Cue comecina jai facajano, raite: “Nia fiodaiñeiticue. Omoi diga nia cue illana uifoticue”. Cristona omoi inotacana omoi jaillana jitaidicue. Omoi inuamona, caimare omoi illana jiai jitaidicue.

<sup>26</sup> Temei omoi dine dane cue illa jira, cueri Cristomo iobillacinona eo fecaitomoi.

<sup>27</sup> Cue fiodaia, cue fiodaiñenia, Cristo ie mare rafuedo omoi jai. Omoina cue cioia, omoina cue cioñenia, mare rafuena omoi finuana fidiacadicue. Cristo rafuena inocana omoi jaillana, omoi comeciai daje isoi lloillana, Cristo rafuena omoi riiduana fidiacadicue.

<sup>28</sup> Omoi dibeimo ifedinona omoi jaciruiñenana fidiacadicue. Iese omoi ia, Jusiñamuidi omoi dibeimo ifedino faifillana uifotaite; iadedi naimiedi omoina omoi jilluana uifotaite. Naimie diga omoi jaca illena, omoina jai jillotate.

<sup>29</sup> Jusiñamui Cristona omoi inollena omoina fetode; iadedi Cristori omoi duere sefuillena omoina jiai fetode.

<sup>30</sup> Omoi nairaimo cue nano illa facaise Cristona inoñedinomona duere sefuidicue. Iena ciodomoi. Cárcelmo birui cue illamona, naimacimona iese nia birui duere sefuidicue. Iena birui fididomoi. Naimacimona cue isoi birui jiai duere sefuidomoi.

## 2

### *Jiaie creyentiai diga raise omoi illacino*

<sup>1</sup> Jiaie creyentiai diga omoi marena illena, dajerie rafuena lloiacadicue. Cristomo omoi duilla jira, coninina omoi comeciai ocuiñotajamona, Cristo omoina isiruillana omoi uifnuamona, Jusiñamui Joreño nana omoina nabaitajamona, coninina omoi comeciai eo duenaillacino illamona,

<sup>2</sup> cue comecina caimare itata. Omoi comeciai daje isoi lloillamona, coninina omoi isiruillamona, daje uaido omoi comeciai lloillamona, cue comecina caimare itata.

<sup>3</sup> Jaca buena finoño, jiaimie afemo jamai omoi illena. Abina iedumona buena finoño. Abina iedoño jiaimacimo comeciaina faca: “Naimaci cue baifemo faite”.

<sup>4</sup> Omoi abimo ite rafuemo omoi comeciaina faca; iadedi jiaimaci abimo ite rafuemo comeciaina jiai faca.

<sup>5</sup> Cristo Jesús illa isoi omoi illa. Ie rafuemo comecina janore facade; iadedi naimacina canollena, jiaie cominimo ite rafuemo naimie comecina eo facade.

<sup>6</sup> Naimiedi jaca Jusiñamui; iadedi naimiedi Jusiñamui diga danomo jaca illana jitaifede. Naimie comecina iemo faifeñede;

<sup>7</sup> iadedi iena fañonocaida, ie Moo ocuica rafuena finollena, iimana naimie jaide.

<sup>8</sup> Jamai bue isoidimiena jaide; iadedi ie Moo uaina inote. Ie Moo jitailla jira, fiodaite. Maraiñede rafue finodimie isoi, cruzmo fiodaite.

<sup>9</sup> Ie jira, naimiena iobitallena, Jusiñamui naimie ecimo naimiena abido ote. Nana jiaie mameci baifemo faite mamecina jitate.

<sup>10</sup> Jesuna nana comini sedallena, naimiemo iobillacinona naimaci fecallena, Jusiñamui naimiena iese iobitate. Jusiñamui jaienisa naimiemo iobillacinona fecaitimaci. Nana comini naimiemo iena fecaitimaci. Fiodaifino jillobillamona, naimiemo jiai fecaitimaci.

<sup>11</sup> Nana lloitimaci: “Jesucristodi cai Nama”. Iese naimaci lua jira, cai Moo Jusiñamuina iobitaitimaci.

### *Maraiñedino comeciaina lligaiñotomoi*

<sup>12</sup> Cue isiruiga amataidomoi. Ie Moona Jesucristo inua jira, cue llua nia inocana omoi jai. Jiae omoi diga cue ia, Cristo rafuena raise inotomoi. Birui omoi diga ifedicue; iadedi Jusiñamuina omoi inua jira, naimie jitailla rafuena jaciruiocaida, finocana omoi jai.

<sup>13</sup> Ie jitailla rafuena omoi finollena, Jusiñamui omoi comeciaina birui marena itatate. Naimie omoina iena finotaicade. Naimie mare jitaillacinomona, omoina iena finotaite.

<sup>14</sup> Nana omoi finolle rafuemo abi jafueoicaiñeno fino. Uai uaitaño fino,

<sup>15</sup> jiaie comini omoiri ñai raillanona, Jusiñamui uruiaina omoi illa jira, omoi comeciai jeanidemona marena omoi i. Maraiñede comini motomo itomoi. Naimaci comeciai jearede. Naimaci comeciaina lligaiñotomoi, naimacimo ite jeacinona uifotallena.

<sup>16</sup> Jesucristo rafuena llocana uitomoi. Iena naimaci inuamona, bie rafue Jusiñamui dine cominina jaca itatate. Cristo dane billirui omoiri cue iobiacana jira, omoi dine: “Tainona jiae lloticue” cue raillano, Jesucristo rafuena llocana nia omoi jai.

<sup>17</sup> Jusiñamuina omoi inua jira, naimiemo ailluena ucubena caidiño fecadomoi. Ie baifemona cue fiodaillana Jusiñamui jiai jitaia, iobiticue. Omoi diga jiai caimataiticue.

<sup>18</sup> Ie muidona caimare iitomoi. Cue diga caimataitomoi.

*Pablo Timoteona orede*

<sup>19</sup> Cai Nama Jesús jitaia, omoi dine Timoteona raire oretaiacadícue. Cue dine abido naimie bia, omoi rafuena cue fidiano jiai iobiticue.

<sup>20</sup> Cue dine jiaino naimie isoi iñede. Dama naimie omoi ite rafuemo comecina facade.

<sup>21</sup> Jiaino dani naimacimo ite rafuemo comeциаina facadimaci. Jesucristo rafuemo comeциаina facañedimaci.

<sup>22</sup> Timoteodi mareuidimiena uiñotomoi. Cue jito isoi de diga, Cristo rafuena lloticoco.

<sup>23</sup> Cárcelmo cue illa rafuedi nia fuiñede. Iena cue uiñollemona, naimie omoi dine raire oretaiacadícue.

<sup>24</sup> Cárcelmona cue jino jaillena cai Nama jitaia, omoi dine jiai raire jaiacadícue.

*Pablo Epafroditona abido orede*

<sup>25</sup> Epafroditodi cue ama isoi de. Danomo Cristo rafuena lloticoco. Danomo Cristo rafuena riidotico. Naimiena oredomoi, cuena canollena. Naimiena omoi dine abido oretaiacadícue,

<sup>26</sup> omoi dine naimie illemo naimie comecina facaja jira. Naimie navui duillana omoi fidia jira, naimie uri iñede.

<sup>27</sup> Navui niadedi fodiacanamonu jillode, Jusiñamui naimiena duenailla jira. Naimie fiodaillamonu, eo cue duere sefuiñellena, Jusiñamui cuena jiai duenaite.

<sup>28</sup> Ie jira Epafroditona eo raire oretaiacadícue, naimiena omoi ciuanona omoi iobillena. Iemei jiai uri iiticue.

<sup>29</sup> Cai Nama mamecido naimiena eo caimare feiño. Jiaie naimie isoidinona omoi dine ia, naimacina iobita.

<sup>30</sup> Cristo facaina navui naimie llofuiamonu, omoi facaina cuena canollena, niadedi fiodaite. Omoi facaina naimie cuena canuano, cue dine omoi iñena jira, cue muidona niadedi naimie abina faifitate.

### 3

*Moisés micori llogacinuaido jaidinomona abina rairui*

<sup>1</sup> Cue amatiai, omoimo nia lloiticue. Cai Namamo omoi duilla muidona, iobi. Omoi bie rafuena dane cue cueia, cuemonu sefuiñede. Iena dane omoi cacajamonu, omoina canoite.

<sup>2</sup> Jearede rafue finode cominimona abina rairui. Jiconiai isoidimaci. Jillobillena abi diana llofuetimaci; iadedi cuemonadedi jamai ebena tuquica isoidimaci. Naimaci abiaina detatatimaci; iadedi naimaci comeциаi nia raise finoñedimaci.

<sup>3</sup> Cai abiaina detatajamona, cai comeциаi raise finoñede. Cai comeциаi raise finuamonu, Jusiñamui Joreñodi caina Jusiñamuina raise sedatate. Cristo Jesús i iobidicai. Cai jillobillena, cai abiaina detatañedica.

<sup>4</sup> Buena cai finuamonu cai illamonu jillobidicaidena, cue jilluana raise uiñoticue. Cue cominimona jamai bue isoiñedicue.

<sup>5</sup> Iena ja ñaiticue. Cue jeiciamonu ocho digarui illamonu, cue abina degacue. Cue eirue jitodi Israel micori. Benjamín isie imiedicue. Cue cominidi judíuai imacina jira, cue uruemonu judíuai uaido ñaiticue. Fariseo cue imiena jira, Moisés micori llogacinuaido fainonocaiñeno iedo eo jaidicue.

<sup>6</sup> Iena eo cue jitailla jira, Cristonu ñnotinonu duere finodicue. Nana Moisés micori llogacinuaido eo raise jaidicue. Iena raise finodicue.

<sup>7</sup> Iese jaie iticue. Cue começi iena: “Mare” raite; iadedi Cristonu jai cue ñnuu jira, birui nana bie rafuedi cuemonu ieñedicuinu. Naie isoi de rafue cuemo illamonu, cue jeacinomona jilloñedicue.

<sup>8</sup> Dane lloticue: Cue Nama Cristo Jesúsna cue uiñoiacana jira, jiaie rafue cuemonu ieñedicino. Naimiena cue uiñuacinodi nana jiaie rafue baifemo faite. Jeacuai isoi jai marañena jira, naimie muidona cue jaie illacinona jai sofecaidicue. Iena sofeticue, Cristo dibemo raise cue illena,

<sup>9</sup> naimiemo raise cue duillena. Moisés micori llogacinuaido cue jillamonu marebicaidicue; iadedi Cristonu cue ñnuamonu marebicaidicue. Cristonu cue ñnuu muidona, Jusiñamui cuena jai marebicaitate.

<sup>10</sup> Cristonu raise uiñoiacadícue. Naimie fiodaite; ia iemonu jillode. Naiemonu cue começi marena illena, naimiena jillotate uaina uiñoiacadícue. Naimie rafuena cue llumonu, naimie isoi duere sefuiticue. Iemonu ñibai fiodaite.

<sup>11</sup> Cue fiodaile mei, fiodaillamonu naimie isoi cue jilloillemo ocuridicue. Ie jira naimiena uiñocana jaiacadícue.



*Pablo jitaillacino*

<sup>12</sup> Jusiñamui jitailla isoi, nia raise marebicaiñedicue. Nia fiebidicue; iadedi nia jai jaicaidicue, iena illena. Iena cue illena, Cristo Jesús cuena jaie uaidote.

<sup>13</sup> Cue amatai, iena nia iñedicue; iadedi jaie cue finoca rafuemo comecina facañedicue; iadedi cuemo nia suiñede rafuemo birui eo ocuridicue.

<sup>14</sup> Cue risaillinomo iocire jaidicue, ibana cue feiñollena. Ieri Cristo Jesúsdo Jusiñamui cuena uaidote, monamo cue illena.

<sup>15</sup> Caimona Cristo rafuena raise abina uiñocaidino, bie rafue diga cai comecai lloicana mai cai jailli. Dajerie jiaiforie comecina lloia, Jusiñamui naimacina uanaicinona raise uiñotaite;

<sup>16</sup> iadedi caimo jai ite uiñuacinodo mai cai jailli.

*Pablo illa isoi cai illa*

<sup>17</sup> Cue amatai, Cristona cue inua isoi, naimie rafuedo cue jailla isoi, nana omoi jiai jai. Cai illa isoidinomo omoi eruai, naimaci isoi omoi illena.

<sup>18</sup> Jaie omoimo lloidicue. Cue sunaillamona dane lloiticue. Ailluena comini Cristo fiodailla rafuena birui jitañedimaci.

<sup>19</sup> Ja muidomo faifitimaci. Naimaci Jusiñamuidi imaci guille, dani guille ramo naimaci comecai facaja jira. Jearede rafue finuamona, meiruñeno naie rafueri iobidimaci. Naimaci ecimo ite ramo comecaiina facadimaci. Naimaci isoi cai iñena.

<sup>20</sup> Monamo ite Jusiñamuimo cai jainaiilla jira, monamona cai Jilloitaraima abido dane billemo ocuridicai. Cai Nama Jesucristodi cai Jilloitaraima.

<sup>21</sup> Naimie bia, cai fiodailla abina meidoite, naimie ebirede abi isoi cai illena. Nana ra naimie anamo itatate uaido caina iese meidoite.

**4**

<sup>1</sup> Ie jira Cristo rafuena inocana nia omoi jai. Cue amatai, omoina isiruiticue. Omoina cioacadicue. Omoiri iobidicue. Cue lluamona Cristona jaie inotomoi. Ie rafuedo omoi jailla jira, iobidicue.

<sup>2</sup> Evodia raillañaiño mo rafuena lloiacadicue. Síntique raillañaiño mo jai lloiacadicue. Cai Namamo iaiñuai duilla jira, iaiñuai comei daje isoi lloillana jitaidicue. Coniño diga icirillana jitañedicue.

<sup>3</sup> Cue mare nabai, omo jicanoticue, iaiñuaina canollena, coniño diga iaiñuai dane marena ñaillena. Cristo rafuena cue diga llotiañuui. Clemente diga llotiañuui. Cue diga llofueuidino diga llotiañuui. Monamo ite rabenicomo nana naimaci mamecai jai cuela. Jusiñamui diga monamo jaca iite comini mamecai diese cuela.

*Iobillacino, uri illacino diga*

<sup>4</sup> Cai Namamo omoi duilla jira, jaca iobi. Dane lloiticue: Iobi.

<sup>5</sup> Omoi rininana nana comini uiñuana jitaidicue. Cai Nama dane abido billirui iairei ite.

<sup>6</sup> Ie jira buemo omoi comecaiina facajanona, jaca llicidaiñeno. Naga omoi jitaillacino Jusiñamuimo llono. Naimiemo jica. Naimiemo omoi jiaa, naimiemo iobillacinona jiai feca.

<sup>7</sup> Iemei Jusiñamui omoi comecaiina uri itataite. Omoi comecai facajacino baifemo omoina uri itataite. Cristo Jesúsna omoi inuano, omoi comecaiina eenoite.

<sup>8</sup> Cue amatai, ie muidomo daje rafuena nia lloiticue. Uanaicinomo comecaiina faca. Inogafuemo comecaiina faca. Mare rafuemo comecaiina faca. Ebirede jeanide rafuemo comecaiina faca. Iobillafuemo comecaiina faca. Bie isoide mare rafue ia, iemo comecaiina faca. Nana bie isoide rafuemo comecaiina faca.

<sup>9</sup> Nana cuemona omoi fueoga rafuedo omoi jai. Nana cuemona omoi feiño ga rafuedo omoi jai. Nana cuemona omoi cacaja rafuedo omoi jai. Nana cue finoca rafuena omoi ciua rafuedo omoi jai. Iemei omoi comecaiina uri itatajanona, Jusiñamui omoi diga iite.

*Filipomo ite comini Pablona eo canodimaci*

<sup>10</sup> Cai Namari iobidicue, diga irui illamona dane cuena omoi comecai jira.

<sup>11</sup> Cuemo comecaiina facadomoi; iadedi bu jaca binide, ucubena cue dine atillena. Bumo cue jitaillacinona lloñedicue. Janore ra cuemo ia, ailluena ra cuemo ia, caimare jai iticue. Cuemo ite ra diga caimare illana jai uiñoticue.

<sup>12</sup> Duere cue illana uiñoticue. Duenino cue illana jiai uiñoticue. Nie isoi cue ia, uri cue illana jai uiñoticue. Cue monia, cue aimetaia, janore ra cuemo ia, ailluena ra cuemo ia, jaca uri iticue.

<sup>13</sup> Nie isoide rafue cuemo ia, Cristo cue comecina ocuiñotaja jira, naga rafuena finocana jaiticue.

<sup>14</sup> Cue duere sefuillamo cuena omoi duenaillamona, cuena omoi canua jira, cuemona mare.

<sup>15</sup> Omoimo Cristo rafuena nano cue llumona, cuena canodomo. Macedoniamona cue jailla mei, jiaie creyentiai cuena canoñedimaci. Dani omoi cuena canodomo. Iena uifnotomoi.

<sup>16</sup> Tesalónicamo nia cue ia, diga icaño ucube cuemo oredomo;

<sup>17</sup> iadedi omoi ucubena nicidoñedicue; iadedi cuena omoi canuamona, Jusiñamuimona ibana omoi feiñuana jitaidicue.

<sup>18</sup> Nana cue jitaille rana jai feiñoticue. Ailluena cuemo ite. Epafroditomona cuemo omoi oretaga rana feiñoticue. Jusiñamuimo fecadomo; isoide. Jusiñamui dibeimo cue maijia jira, mare rana finodomo. Ie jira Jusiñamui iena gaide, caimare soride rana cai gaia isoi. Naimie iena jiai feiñote.

<sup>19</sup> Naimiemo ailluena ite ramona cue Jusiñamui nana omoi jitaille rana fecaite, Cristo Jesúmo cai duilla jira.

<sup>20</sup> Cai Moo Jusiñamuimo iobillacino jaca cai fecacabillasa. Iena jitaidicue.

#### *Fuiduacino*

<sup>21</sup> Cristo Jesús mamecido cue facaina nana creyentiaimo cue uaina llono. Cue diga amatiai imaci uaina jiai oredimaci.

<sup>22</sup> Nana benomo ite creyentiai imaci uaina oredimaci. Cai illaíma César jofomo maijidino imaci uaina ua oredimaci.

<sup>23</sup> Cai Nama Jesucristo omoi comeaiaina jaca caimare itatajana jitaidicue. Mai. Pablodice.

## COLOSAMO ITE CRISTONA HNOTINOMO PABLO ORETAGA RABE

*Colosamo ite creyentiaimo Pablo carta orede*

<sup>1-2</sup> Colosas railla nairaimo ite creyentiai, Pablodicue. ¿Nie isoidomoi? Bie carta omoi dine oreducue. Timoteo cue diga ite. Coco uaina oreducoco. Cristomo naimie jiai duilla jira, naimiedi cai amana eruaide. Jusiñamui jitailla jira, ie rafue llollena, Jesucristo oretagamieducue. Naimiemo jai duidomoi. Naimiena raise inocana jaidomoi.

*Naimaci facaina Pablo jide*

<sup>3</sup> Cai Nama Jesucristo Moodi Jusiñamui. Omoi facaina Jusiñamuimo coco jiaia, naimiemo iobillacinona jaca fecadicoco.

<sup>4</sup> Jesucristona nia omoi inuana coco fidia jira, nana creyentiaina nia omoi isiruillana coco fidia jira, iobillacinona jaca fecadicoco.

<sup>5</sup> Jusiñamui dine ico omoi illemo omoi ocurilla jira, iese icana jaidomoi. Jesucristo rafuena nano omoi cacajamona, Jusiñamui dine illemo ocuridomoi. Omoi jai cacaja rafuedi uanaicino.

<sup>6</sup> Diga illanomo, diga comini iena jiai jai cacadimaci. Iena inuamona Cristo dibeimo naimaci comeciai jai meidoga. Iena inuamona marecinodo jai jaidimaci. Ie isoidomoi. Jusiñamui omoina duenaillana jai uinotomoi. Uanaicinona omoi raise uinuamona, iedo jaidomoi. Ie marecinona finocana jaidomoi.

<sup>7</sup> Epafra luamona naie rafuena cacadomoi. Naimiena isiruiticai. Jesucristo dibeimo coco isoi, naimie jiai llofuiana majide. Omoi motomo cai inena jira, Cristo dibeimo cai facaina naimie raise majiuide.

<sup>8</sup> Naimiemona omoimo ite rafuena fididicoco. Jusiñamui Joreño omoina canuamona, jiaie creyentiaina omoi isiruillana fididicoco.

<sup>9</sup> Ie jirari omoi facaina jaca jidicoco. Omoi rafuena coco fidiamona, Jusiñamuimo omoi finolle rafuena omoi eo raise uinollena jidicoco. Nana naimiemo ite abi uinuacinona omoi eo raise uinuana jitaidicoco.

<sup>10</sup> Cai Nama: “Mare” omoina raillana jitaidicoco. Naga mare rafue omoi finocana jaillana jitaidicoco. Jusiñamuina raise omoi uinocana jaillana jitaidicoco.

<sup>11</sup> Nie isoide ramo omoi jiria, nana naimie siño ebirede uaido naimiedi omoi comeciaina ocuinotajana jitaidicoco. Iocire omoi illana jitaidicoco.

<sup>12</sup> Caina ie cominina naimie jai itataja jira, nana ie comini diga naimie illanomo ico jaca ititacai. Ie muidona naimiemo iobillacinona omoi fecacabillasas.

<sup>13</sup> Jeacino anamo navui cai illa jira, jitreidinomo iticai isoidicai. Jeacino anamona caina Jusiñamui jai jillotajamona, caina ie isiruiga Jito cominina itatate.

<sup>14</sup> Naimie Jito muidona cai jeacinomona jillobidicai. Naimiedi cai jeacinona oni dotajamona, naiena jai faitate. Naiena ico abido llinofeite.

*Cristo muidona Jusiñamui ricaillifue anamo inedicai*

<sup>15</sup> Jusiñamuina cionidicai; iadedi Cristomona naimiena uinoticai. Jaca bue nia inena, Crsito nano jaca ite.

<sup>16</sup> Cristo uaido Jusiñamui nana rana finode. Monamo ite rana finode. Eniruemo ite rana finode. Cai ciua rana finode. Cai cioinena rana finode. Cominina finode. Ie jaienisaina finode. Janabana finode. Dofina finode. Taifena finode. Cristo uaido nana rana finode. Cristona iobitallena, nana rana finode.

<sup>17</sup> Nano dofoconi Cristo jaca ite. Naimie uaido naga ra marena icana jaide.

<sup>18</sup> Naimiedi nana creyentiai imaci illaima. Fiodaitinomona naimie nano jillodimena jira, cai fiodaia, ico jiai jilloitacai. Naimiedi naga ra baifemo faite. Naimiedi nana comini baifemo jiai faite.

<sup>19</sup> Jusiñamui isoi naimie ite. Jusiñamui jitailla jira, Cristomo nana Jusiñamuimo ite siño uaidi ite.

<sup>20</sup> Cristo finoca rafue muidona, Jusiñamuidi nana cominina naimie dibeimo itataiacade. Ua nana naimie dibeimo inedinona naimie dibeimo itataiacade. Cruzmo Cristo fiodailla jira, Cristo diaillamona, Cristona cai inoia, Jusiñamui ricaillifue anamo jai inedicai.

<sup>21</sup> Jusiñamui dibeimo navui inedomoi. Naimiena nabaillana jitaifedomoi. Omoi comeciainona naimiena enoidomoi. Marainedicinona finouidomoi;

<sup>22</sup> iadedi cruzmo naimie abi illanona, nainomo Cristo fiodailla jira, naimiedi naimie dibeimo omoina itatate. Jusiñamuimona mareuidinona omoi illena, omoimo nicino inellena, Jusiñamui dine ico omoi ia, naimie dibeimo omoina jai itatate.

<sup>23</sup> Naimiena raise ñnocana omoi jaia, danomo abido omoi jaiñenia, iese itomoi. Cristo rafuena navui cacadomoi. Ie jira Cristo dine omoi illemo ocuridomoi. Diga comini naie rafuena jai cacadimaci. Naie rafuena llocana jaidicue.

*Pablo Cristo rafuena llofuecabite*

<sup>24</sup> Omoimo Cristo rafue cue llua muidona, duere sefuidicue; iadedi iocire nia iticue. Omoi creyentiai facaina Cristo isoi duere sefuidicue.

<sup>25</sup> Jusiñamui cuena oretaja jira, naimie rafuena ailluena cominimo eo raise cue llollena, omoi creyentiai facaina llofueticue.

<sup>26</sup> Cai jaiagai bie rafuena uiñoñedimaci; iadedi Jusiñamuina ñnotinodi iena birui uiñotimaci.

<sup>27</sup> Jusiñamui naimacina iena uiñotade. Naie rafuedi eo ebirede. Judiuaiñedinodomo; iadedi bie rafue omoimo jai duide. Omoi comeciaino Cristo illana jai uiñotikai. Ie jira naimie ebirede illanamo ico omoi jaca illemo ocuridomoi.

<sup>28</sup> Cristo rafuena llofuetikai. Nana cominimo Cristo dibeimo naimaci iacanana llotikai. Cristona naimaci eo raise ñnollena, Cristo isoi naimaci marebicaillena, naimaci abi uiñuana llotikai.

<sup>29</sup> Ie jira bie rafuena llofuecabiticue. Nana Cristo cuemo iga uaido eo llofuecabiticue.

## 2

<sup>1</sup> Omoimo eo comecina facadicue. Iena omoi uiñuana jitaaidicue. Laodicea raila nairaimo jiai eo comecina facadicue. Diga comini cuena nia cioñedimaci. Naimacimo jiai eo comecina facadicue.

<sup>2</sup> Omoi comeciaina ocuiñotallena, iese omoimo comecina facadicue. Dani omoi isiruillanona, ni Jusiñamui rafuena omoi eo raise marena uiñollena, omoimo comecina facadicue. Naie rafuedi Cristona llote.

<sup>3</sup> Cristodi nana rafuena uiñote. Eo abina uiñote. Naimie rafue raise cai uiñollena, naimie caina canocabide.

<sup>4</sup> Naimaci ñaiamona omoina bu jifuei raillanona, buena omoimo lloticue.

<sup>5</sup> Omoi dine ñedicue; iadedi cue comecidi omoi dine ite. Omoimo cue comecina facadicue. Danomo omoi marena illa jira, Cristona omoi raise ñnocana omoi jailla jira, iobidicue.

<sup>6</sup> Cai Nama Jesucristona omoi ñnuamona, naimie lloga rafue finocana omoi jai.

<sup>7</sup> Naimie dibeimo raise icana omoi jai. Naimiena ñnocana omoi jai. Omoi lloraini omoina llofuia isoi, naimiena ñnocana omoi jai. Jusiñamuimo iobillacino eo fecacana omoi jai.

*Cristona cai ñnuano, cai illa rafue*

<sup>8</sup> Jiae comini naimaci jamai comeciai facajacinomona omoi jifuei raillanona, abina omoi rairui. Uanañedinomo comeciaina jamai facadimaci. Naimaci einamacimona iena otimaci. Naie rafuedo omoi jaillana jitaaidimaci. Cristo rafuedo omoi jaillana jitañedimaci.

<sup>9</sup> Ero, Cristomo nana Jusiñamui uai ite. Eniruemo billanona, Cristo ñmana jaide. Naimiemona Jusiñamuina uiñotikai.

<sup>10</sup> Cristomo omoi jainaiaila jira, naimiemona nana omoi jitaillacinona oitomoi. Nana comini naimie anamo itimaci. Nana illacomini naimie anamo itimaci. Taife naimie anamo ite. Janaba naimie anamo ite.

<sup>11</sup> Cristomo omoi duilla jira, omoi comeciaino ite jeacino anamona omoina naimie jillotate. Omoi abiaina detatajamona naimie iena finoñede; iadedi omoi comeciaino ite jearede iuai meidujamona jillobidomoi. Naimie iena finode.

<sup>12</sup> Naimie dibeimo cai illamona, jai bautizagacai. Naimie dibeimo cai illamona, cai jeacino anamo jai ñedicai. Cristo fiodaite; iadedi fiodaillamona Jusiñamui naimiena jillotate. Jusiñamuina omoi ñnua jira, jeacino anamo jai ñnedomoi. Naie anamona Jusiñamui omoina jiai jillotate.

<sup>13</sup> Jeacino anamo jiae omoi illamona, naimiemona fiodaitino isoidomoi. Omoi marañede jitaillacino anamo jiae itomoi. Cristomo omoi jai duillamona, omoi jeacinona oni dotajamona, naie anamona Jusiñamui omoina jai jillotate. Cristo dibeimo omoina itatate.

<sup>14</sup> Moisés micori jiae llogacinona jiae cai ñnoñena jira, Jusiñamui riccaillifue anamo itikai; iadedi cruzmo Cristo fiodailla jira, naie llogacino anamo jai ñedicai. Ie muidona Jusiñamui caimo ibana ofeite.

<sup>15</sup> Cruzmo Cristo fiodailla facaiseconi Taifedi anafefide. Janabadi anafefide. Dofidi anafefide. Dusisiñodi anafefide. Naimie siño rafuena finuamona, Cristo uai naimaci uai baifemo uaillana uiñotikai.

*Cristomo ite rafuedo omoi jai*

<sup>16</sup> Cristo rafuedo omoi jailla jira, omoi guiga rana bu fimaia, naimaci ñaiamo cacarefiño. Judíuai einamací rafue dine omoi jaiñenia: “Omoi mareiñedomoi” bu raia, naimaci ñaiamo cacarefiño.

<sup>17</sup> Naie isoide rafuedo jaie jaidicai; iadedi iedo birui jaiñedicai. Cristo rafuedo birui jaidicai.

<sup>18</sup> Dajerie llofueraini jiaie rafuedo jaidimaci. “Abina iedoñoeno” raitimaci. “Jusiñamui jaienisaina seda” raitimaci. Nicairillacinodo jaidimaci. Naimaci isoi omoi jaiñenia: “Maraiñedomoi” omoína naimaci raia, naimaci ñaiamo cacarefiño. Naimaci illa isoi iñoeno. Naimaci llucacino anamo iñoeno. Naimaci llucacinodo omoi jaia, omoi jitaillanomo Cristo dine riñeitomoi. Naimaci comeciái jearena jira, jamai buena uifñoñenano abina iedotimaci.

<sup>19</sup> Cristo rafuedo jaiñedimaci. Cristomo cai duilla jira, naimie caina ocucabide. Naimiemona cai illena Jusiñamui jitailla isoi, fueoticaí. Jusiñamui jitailla isoi, naimie díbeimo cai raise illena, naimiena cai raise ñinollena, naimiemona fueoticaí. Cristomo cai duilla jira, dani coninina nabaidicai.

<sup>20</sup> Cristo fiodaillamona, jiaie rafue anamo jai iñedicai. Naimiena ñinoñedino rafue anamo jai iñedicai; iadedi naie rafuedo nia jaidomoi. Damierie llofuerainidi diga rana fimaidimaci.

<sup>21</sup> “Buena jetañoeno. Buena guiñoeno” raitimaci.

<sup>22</sup> Ero, naie fimaica guille ra ite, cai guillena. Iena cai guilla mei, jai buena iñede. Naimaci fimaiduacino cominimona otimaci. Jusiñamuimona oñedimaci.

<sup>23</sup> Naie fimaiduacínodi eo abí uifñoacino isoide. Naiedo bu jaia: “Jusiñamuina eo raise sedadicaí” raitimaci. “Abi iedoñedicai. Cai abina isiruiñedicai” raitimaci; iadedi naie isoide llucacinodo bu jaia, naimie comecimo ite jeacinomona jilloñede. Naimiedi jeacino finocana nia jaide.

### 3

<sup>1</sup> Jeacino anamo jaie itomoi. Fiodaillamona Cristo jillua jira, jeacino anamona jai jillobidomoi. Ie jira Cristomo ite rafuedo omoi jai. Monamo Jusiñamui ecimo Cristo ite. Jusiñamui naimieri iobilla jira, naimie ecimo ite.

<sup>2</sup> Cristomo ite rafuemo omoi comeciaina facacana jai. Bene ite maraiñede rafuemo omoi comeciaina facañoeno.

<sup>3</sup> Bene ite maraiñede rafue anamo jai iñedomoi; iadedi Jusiñamui ecimo naimie jai illa jira, Cristomo omoi duilla jira, naimie finoacaga rafuena omoi finollena, omoína naimie canoite.

<sup>4</sup> Cristomo jai duidomoi. Naimie abido bia, naimie bairenia, naimie cominina omoi illa jira, naimie diga jaca iitomoi.

#### *Omoi comeciaino ite jeacinona fainonocai*

<sup>5</sup> Cristomo omoi jai duilla jira, omoi comeciaino ite jeacinona fainonocai. Omoi aiñede riño diga iñoeno. Omoi iniñede iima diga iñoeno. Jeare finoca rafuemo omoi comeciaina facañoeno. Omoi maraiñede jitaillacinodo omoi jaiñoeno. Rana nicidoñoeno. Rana omoi nicidoia. Jusiñamuina raise sedañedomoi; iadedi naimie ifomo rana sedadomoi.

<sup>6</sup> Naie isoidicínona comini finua jira, naimiena naimaci ñinoñena jira, Jusiñamuidi naimacina duere finoite.

<sup>7</sup> Naie isoide rafuedo jaie jaidomoi.

<sup>8</sup> Nana bie isoide rafuedo jaiñoeno. Iciríñoeno. Omoi ecimo itinona jeare finoñoeno. Jiaie cominina jeare ñaiñoeno. Jearede rafuena ñaiñoeno.

<sup>9</sup> Tainona lloñoeno. Omoi comeciaino ite jeacino anamo jaie itomoi. Naicino anamo omoi jai iñena jira, naicínodo jaiñoeno;

<sup>10</sup> iadedi jiaie rafuedo birui jaidomoi. Bie rafue omoi comeciaina marena itatate. Omoi comeciaino bie rafue itatacana jaillamona, Jusiñamui rafuena uifñoacana jaidomoi. Naimie isoi omoi illena, naimie omoi comeciaina iese itatate.

<sup>11</sup> Cristo rafuedo birui omoi jailla jira, Jusiñamuimona nana creyentiaidomoidi daje isoidomoi. Dajerie judíuai itinodomoi. Dajerie judíuaiñedinodomoi. Dajerie judíuai isoi abina detatatinodomoi. Dajerie abina detatañedinodomoi. Dajerie abina uifñoatinodomoi. Dajerie abina uifñoedinodomoi. Dajerie patrón anamo itinodomoi. Dajerie patrón anamo iñedinodomoi. Cominimona iese itomoi; iadedi Jusiñamuimona daje isoidomoi. Cristo díbeimo omoi illa jira, jai amatiaína eruaidomoi. Cristomo omoi duillacino jiaie rafue baifemo faite.

<sup>12</sup> Jusiñamui omoína fetode. Omoi comeciaina maretate. Omoína isiruite. Ie jira jiaie cominina duenaí. Jiaie cominina cano. Abi iedoñoeno. Abi biríñoeno. Iciríñoeno.

<sup>13</sup> Dani omoi ibana oñeno; iadedi bu diga omoi icirillafue ia, naiena raise fino. Iena raise finuanona, abido ietañeno. Tena feita. Ie mei naimie diga marena ñaino. Ero, cai Nama omoi jeacinona oni dotade. Ie muidona omoi ecimo itino diga icirillafue omoi finoia, iena feita.

<sup>14</sup> Coninina omoi isiruicana jai. Isiruillacino nana jiaie llucacino baifemo faite. Coninina omoi isiruia, danomo marena iitomo.

<sup>15</sup> Jusiñamui omoina fetua jira, Cristomo daajena jai duidomo. Cristo omoi comeciaina uri itatajamona, nana comini diga uri i. Omoi comeciai uri illamona, Jusiñamuimo iobillacinona feca.

<sup>16</sup> Cristo rafuena omoi eo ñuana jitaidicue. Naie rafuena coninimo omoi llofue. Iena raise uñollena, coninina omoi cano. Nie isoide Jusiñamui rafuena omoi roia, Jusiñamuimo iobillacinona fecajanona, nana omoi comeciainona iocire rono. David micori cuega salmos omoi roia, Jusiñamui Joreño omoina birui cuetataga ruana omoi roia, omoi comeciainona iocire rono.

<sup>17</sup> Buena omoi lloia, buena omoi maijia, cai Namamo omoi comeciaina facajano, iena fino. Cai Nama muidona, cai Moo Jusiñamuimo iobillacinona jiai feca.

#### *Coniniri creyentiai illa rafue*

<sup>18</sup> Inirediañua, omoimo rafuena lloiacadicue. Cai Namamo omoi jainaiaila jira, naimie jitailla jira, omoi iniñiai anamo raise omoi i. Naimaci uaina raise ñino.

<sup>19</sup> Airedino, omoimo jiai lloiacadicue. Omoi ainiaina isirui. Naiñaiñua diga iciricabiñeno. Naiñaiñuaimo riire lloñeno.

<sup>20</sup> Uruiai, omoimo rafuena lloiacadicue. Nana omoi mootiai uaina ñino. Nana omoi eiñiai uaina ñino. Iena omoi ñinoia, cai Nama eo iobite.

<sup>21</sup> Mootiai, omoi uruaina jamai icifeno. Naimacina omoi jamai icia, comecina facaitimaci: “¿Niese cai mootiai uaina raise ñinoitica? Tena eo sefuiruitica?”. Ie muidona omoi uaina raise ñinoñeitimaci.

<sup>22</sup> Patrones anamo itino, nana omoi patrones ocuica uaina ñino. Omoimo naimaci eruaiñenia, omoi patrones facaina raise maiji. Cai Namana omoi ñinua jira, cai Namana raise omoi iobitaiacana jira, omoi patrones facaina raise maiji.

<sup>23</sup> Buena omoi maijia, omoi comeciainona maiji. Dani comini facaina maijiñedomo; iadedi cai Nama facaina maijidomo. Ie jira raise maiji.

<sup>24</sup> Naimie jai llua isol, cai Namamona ibana ico feñoitomo. Cai Nama Cristo facaina omoi maijidomo;

<sup>25</sup> iadedi Jusiñamui raise maijiñedinona duere finoite. Jusiñamuimona naga maijidomie ie maijia diese feñoite.

## 4

<sup>1</sup> Patrones, omoimo lloiticue. Naimaci omoi anamo illa jira, omoi diga maijedinona raise iba. Naimacina jifueñeno. Omoi Nama monamo llamona, omoimo eruaiñe. Naimie anamo omoi illa jira, omoi anamo itinona marena raise fino.

<sup>2</sup> Jusiñamui diga ñaicana jai; iadedi omoi comeciaina facajanona omoi jii. Naimiemo iobillacinona feca.

<sup>3</sup> Cristo rafuena llocana cue jailla jira, cárcelmo birui iticue; iadedi naie rafue nia lloiacadicue. Jusiñamui nana comini Cristo dibeimo jai jitaillana lloiacadicue. Ie jira cai facaina omoi jii. Jusiñamuidi comini comeciaina jetajana omoi jii. Naimaci comeciaina Jusiñamui jetajamona, naimacimo naie rafuena lloiacadicue.

<sup>4</sup> Naimaci iena raise cacailena, naie rafuena raise lloiacadicue.

<sup>5</sup> Creyentiañedino motomo omoi ia, marena omoi i. Naimacimo Cristo rafuena llono.

<sup>6</sup> Bu diga omoi ñaia, caimare ñaino. Nie isoide Cristo rafuena omoimo bu jicanoia, raise marena fairio.

#### *Damierie ie uaina orede*

<sup>7</sup> Tiqicodi nana cuemo ite rafuena omoimo lloite. Naimiena isiruitica. Naimiedi Cristona eo ñnote. Cristo rafuena eo raise llocabite. Cai Nama facaina cue diga eo maijide.

<sup>8</sup> Cai illana omoi uñollena, omoi dine naimiena oredicue. Omoi comeciaina ocuiñotaite.

<sup>9</sup> Naimie diga Onésimo jai oredicue. Naimiedi creyente. Cristo rafuedo raise jaide. Naimiena jiai isiruitica. Naimiedi omoi comini imie. Nana bene jai suide rafuena omoimo lloitiaimaia.

<sup>10</sup> Cárcelmo Aristarco cue diga ite. Omoimo ie uaina orede. Marcos ie uai jiai orede. Naimiedi Bernabé ama. Omoimo naimiena navui lloiticue. Omoi dine naimie ria, naimiena feño.

<sup>11</sup> Jesús ie uai jiai orede. Naimie mameci jiaicidi Justo. Judíuaimona dani naimaci cuena canode. “Naimaci jeacinona naimaci fainonocaillamona, Jusiñamui ie dibeimo cominina jai jitaide” naimaci llamona, cue comequina ocuiñotadimaci.

<sup>12</sup> Epafraas ie uaina jiai orede. Naimie omoi comini imie. Jesucristo dibeimo naimie maijide. Jusiñamui diga naimie ñaia, omoi facaina jaca duere jicabide. Jusiñamui rafuedo raise omoi jaillena, ie omoi raise itabillena, Jusiñamui jitaillacinona omoi raise finollena, omoi facaina jicabide.

<sup>13</sup> Omoi facaina naimie eo maijide. Laodiceamo itino facaina eo maijide. Hierápolismo itino facaina jiai eo maijide.

<sup>14</sup> Cai médico Lucas ie uaina jiai orede. Naimiena isiruiticai. Demas ie uaina jiai orede.

<sup>15</sup> Laodiceamo ite creyentiaimo cue uaina cue oretajana llono. Ninfasmo cue uaina cue oretajana llono. Naiñaiño jofomo oficabide creyentiaimo cue uaina cue oretajana llono.

<sup>16</sup> Bie cartana omoi facaja mei, Laodiceamo ite creyentiaina bie cartana facata. Naimacimo jiaie cartana jiai oredicue. Iena omoi jiai faca.

<sup>17</sup> Arquipomo llono: “Cai Nama fetocamedio. Naimie rafuena llocana raise o jai” llono.

<sup>18</sup> Cue uaina omoimo oredicue. Dama bie uaina cueticue; iadedi nana bie carta cuemona illana uiñotomoi. Cárcelmo cue illana cue facaina feitaño omoi jii. Jusiñamui omoina duenaioillasa. Mai. Cue cuega rafue jai fuite. Pablocicue.

## TESALÓNICAMO ITE CRISTONA HNOTINOMO PABLO NANO ORETAGA RABE

### *Uaiduacino*

<sup>1</sup> Tesalónicamo ite creyentiai, omoimo cartana cueticue. Pablodicue. ¿Nigacino? ¿Nie isoidomoi? Silvano cue diga ite. Timoteo cue diga jiai ite. Iaimaiiai uaina orediaimaiiai. Cai Moo Jusifnamuimo, cai Nama Jesucristomo jai jainaiaidomoi. Ie jira iaimaiiai omoi duenaillana uifocana omoi jaillana jitaaidicai. Iaimaiiai omoi uri itatajana omoi uifocana jaillana jiai jitaaidicai.

### *Tesalónicamo ite creyentiai Jusifnamui uaina raise ifnotimaci*

<sup>2</sup> Jusifnamuimo cai jiaia, naimiemo omoi facaina iobillana jaca fecacabidicai. Omoi facaina jicabidicai.

<sup>3</sup> Cai Moo Jusifnamuimo cai jiaia, omoina comeciticai. Jusifnamuina ifnotomoi. Naimiena isiruitomoi. Ie jira naimie facaina duere maijidomoi. Cai Nama Jesucristo billemo eo ocuridomoi. Iese omoina comeciticai.

<sup>4</sup> Omoina naimie isiruillamona, Jusifnamui omoina fetuana uifotocai.

<sup>5</sup> Jamai cai uaido Cristo rafuena omoina llofueñedicai; ia siño uaido iena llofueticai. Jusifnamui Joreño uaido iena llofueticai. Naie rafuena ifnuana llofueticai. Omoi diga cai jaiie ia, nie isoi cai illana raise uifotomoi.

<sup>6</sup> Cai illa isoi ificaidomoi. Cai Nama illa isoi ificaidomoi. Iemona duere sefuidomoi; ia Jusifnamui Joreño omoina iocire itatajamona, Jusifnamui uaina iocire feifotomoi.

<sup>7</sup> Ie jira nana Macedoniamoi ite creyentiai omoimona fueotimaci. Nana Acayamo ite creyentiai omoimona jiai fueotimaci.

<sup>8</sup> Omoimona Macedoniamoi ite comini cai Nama uaina fididimaci. Acayamo ite comini jiai fididimaci. Ailluena nairaiiai Jusifnamuina omoi ifnuana jai fididimaci. Ie jira naimacimo Cristo rafuena omoi ifnuana jai lloñedicai.

<sup>9-10</sup> Omoi dine nano cai ria, caimare caina feifotomoi. Cristo rafuena omoi cacajamona, jiraraina sedajana faifonocaida, cajede nanoca Jusifnamuina jai sedadomoi. Jusifnamui Jito abido billemo birui jiai ocuridomoi. Iese jiaie creyentiai omoina birui ifaicabitimaci. Cristo fiodaillamona Jusifnamui naimiena jaiie jillotate. Naimiena cai ifnuamona, Cristo Jusifnamui riicaillifuemona caina jai jillobitade.

## 2

### *Pablo Tesalónicamo llofuaia rafue*

<sup>1</sup> Cue nabaiñiai, omoi diga jaiie cai ia, tainomoi jaiñedicai.

<sup>2</sup> Omoi dine cai nia riñenia, Filipomoi iticai. Nainomoi iticai caina jeare finodimaci. Iena jai uifotomoi. Caina jeare finodimaci; ia cai comecina Jusifnamui ocurifnotajamona, Jusifnamui rafuena omoina llofueticai. Ailluena comini iena jitaifñedicai; ia iena llofueticai.

<sup>3</sup> Uanaifñedicinona jaca llofueñedicai. Jearedicinona jaca llofueñedicai. Jiferillacinona jaca llofueñedicai;

<sup>4</sup> iadedi Jusifnamui uifogonodica. Ie jira caina naimie oretajamona, ie rafuena llofueticai. Cominina iobitallena llofueñedicai; iadedi Jusifnamuina iobitallena llofueticai, Jusifnamui cai comecina raise uifua jira.

<sup>5</sup> Cai llofuiacino diga omoina bifueñedicai. Omoimona ucube ollena, iese llofueñedicai.

<sup>6</sup> Cominimona iobillacinona jitaifñedicai. Omoimona jitaifñedicai. Jiainomona jiai jitaifñedicai; iadedi Cristo oretaganona cai illa jira, cai jitaia, omoimona iobillacinona jicaredicai.

<sup>7</sup> Uruuina raise sedaraiño isoi, fecuise omoina llofueticai.

<sup>8</sup> Jusifnamui rafuena omoi raise uifollena, omoina cai eo isiruillamona, niadedi omoi facaina fiodaiacadica.

<sup>9</sup> Omoi motomo cai ucube ollena, jiaie rana maijiuidicai. Omoina cai duere finoñellena, nagarui iese maijiuidicai. Iena raise uifotomoi. Iese Jusifnamui rafuena omoina llofueticai.

<sup>10</sup> Omoi motomo cai illana raise uifotomoi. Jusifnamui jitailla isoi, nainomoi iticai. Marañede rafuena finoñedicai. Mare rafuedo jaca jaidicai. Iena uifotomoi. Jusifnamui iena jiai uifote.

<sup>11</sup> Omoi uruiiai omoi llofuaia isoi, omoina llofueticai. Omoimo diga icaiño Jusifnamui rafuena llofueticai.



<sup>12</sup> Jusiñamui jitaillacinona omoi finollena, iena llofueuidicai. Monamo ie cominina sedajanomo omoi jaca illena, naimie omoina jai fetode. Nainomo ie siño uai anamo jaca iitomo.

<sup>13</sup> Jusiñamuimo cai jiiia, omoi facaina iobillacinona fecacabidicai. Jusiñamui rafuena caimona omoi jaiie cacajamona, iena raise feiñotomo. Cominimona cai oga rafue isoi feiñoñedomo; ia Jusiñamuimona cai oga rafuena feiñotomo. Cai lloga rafue omoi comeciai uai meidocana jaiide. Ie jira Jusiñamuimo iobillacinona fecacabidicai.

<sup>14</sup> Judeamo ite creyentiai isoi duere sefuidomo. Omoi cominimona duere sefuidomo. Naimaci judíuiai cominimona duere sefuidimaci.

<sup>15</sup> Judíuiai comini cai Nama Jesúna jaiie meinetimaci. Jusiñamui facaina lloraini micoriaina jiai jaiie meinetimaci. Caina jiai birui duere finodimaci. Jusiñamuina iobitañedimaci. Jusiñamui rafue dibeimo jiai iñedimaci.

<sup>16</sup> Judíuiaiñedinomo Cristo rafuena cai lluana jitañedimaci. Jusiñamui judíuiaiñedinona jillotajana jitañedimaci. Iese jeacino finocana nia jaidimaci; ia ja muidomo Jusiñamui riicallifue anamo jai itimaci.

### *Tesalónica comini dine Pablo abido jaiacade*

<sup>17</sup> Omoimona cai billa mei, nigarui illanona, omoina dane cioacadicai. Omoina cioiñedicai; iadedi omoimo comecina facadicai. Omoi dine eo jaiacadicai.

<sup>18</sup> Ua eo jaiacadicue. Diga icaiño jaiacadicai; ia Taife cai jaillana jitañede.

<sup>19-20</sup> Caina omoi jaca iobitaja jira, omoina cioacadicai. Jesús abido bia, naie facaise omoiri eo iobiticaí. Iemo ocuridicai. Caina iocire itataitomo. Omoi muidona iobiticaí.

## 3

<sup>1</sup> Cai comeci jarire illamona, Atenas railla nairaimo fiebidicoco;

<sup>2</sup> iadedi Timoteo omoi dine oredicoco. Naimiedi coco ama isoide. Cristo rafuena cai diga Jusiñamui facaina llofuecabite. Cristo rafuena omoi raise ñnotallena, omoi comeciaina ocuiñotallena, naimiena oretaticoco.

<sup>3</sup> Duere sefuillamona bu bie uai sefuiruillana jitañedicai. Creyentena cai illamona, jaca duere cai sefuillana uññotomo.

<sup>4</sup> Omoi motomo jaiie cai ia, iena llofueticai. Omoi birui duere sefuillamona cai lluana raise uññotomo.

<sup>5</sup> Cue comeci jarire illamona, Cristona omoi ñnuana raise uññoiacadicue. Omoina Taife ramo faicabillamona, tainomo cai maijiana jacinaiticai. Ie jira Timoteona oredicoco.

<sup>6</sup> Omoimona Timoteo jai abido billamona, omoie mare rafuena cocomo llote. Cristona ñnocana jaidomo; naimie llote. Coninina isiruitomo. Cocona caimare comecitomo. Omoina coco cioacana isoi, cocona dane cioacadomo; naimie llote.

<sup>7</sup> Birui duere sefuidicai; iadedi omoie rafuena cai cacajano, cai comeci marena ite.

<sup>8</sup> Cristo rafuena ñnocana omoi jaillana jai cai uññuamona, cai comeci marena ite.

<sup>9</sup> Omoiri eo caimare jai iticai. Ie jira Jusiñamuimo iobillacinona eo fecaacadicai.

<sup>10</sup> Omoina dane cai cioillena, naimiemo nagarui jiidicai. Naimiena nia omoi raise ññoñenia, omoina naimiena raise ñnotaacadicai. Ie jira omoina cioacadicai.

<sup>11</sup> Iese omoi facaina, cai Moo Jusiñamuimo, cai Nama Jesúmo jicabidicai. Omoi dine caina naimie oretajana jiidicai.

<sup>12</sup> Cai Nama coninina isiruitacana omoi jaillana jitañedicai. Caina omoi isiruilla isoi, nana jiaionona omoi isiruillana jiidicai.

<sup>13</sup> Omoi comeciai ocuiñollena, omoi comeciai Jusiñamui jitailla isoi, marena illena jiidicai. Nana ie comini diga cai Nama Jesús abido bia, Jusiñamui dine omoi ia, omoi comeciai marena illena jitañedicai. Iese omoi facaina jicabidicai.

## 4

### *Naimaci marena illena llofueete*

<sup>1</sup> Jaiie rafuena lloiacadicue. Cai Nama Jesúmo omoi jai duilla jira, Jusiñamui jitailla isoi omoi illana jitañedicai. Iese birui itomo; ia nagarui iese omoi illana jitañedicai. Ie jira cai llua isoi, omoi jai.

<sup>2</sup> Cai Nama Jesús jitailla jira, navui iena llofueticai.

<sup>3</sup> Jusiñamui jitailla isoi omoi marena illena, omoi aññede riño diga iñeno.

<sup>4</sup> Nagamíiai riñoña ie aina otena, mare; ia maraññede rafuena fiñoño. Nagamíiai dajena daje riño uana Jusiñamui jitaide. Dañaiño diga iaimaii jionaillena jiai jitaide.

<sup>5</sup> Naimiena ññoñedino isoi, omoi ai uana jitañede. Naiñaiñuiai abina jamai cioillena riñoña otimaci.

<sup>6</sup> Jiaie creyentemo jeacinona finoñeno. Naimie aina jamai aifedoñeno. Naie isoide rafuena bu finoia, cai Nama naimiena duere finoite. Iena navui omoimo lloticue.

<sup>7</sup> Jearede rafuena cai finollena, Jusiñamuidi caina fetofede; iadedi mare rafuena cai finollena caina fetode.

<sup>8</sup> Bie llofuiacino nie creyente inoñenia, cue llofuiacinona jamaide; ia Jusiñamui Joreño naimiemo illamona, Jusiñamui llofuiacinona jiai jamaide.

<sup>9</sup> Jiaie creyentiaina omoi isiruillana omoimo eo lloñeiticue. Jusiñamui omoina coninina isiruillana jai uñotade.

<sup>10</sup> Nana Macedoniammo ite creyentiaina jai isiruitomaci; iade nia isiruicana omoi jai.

<sup>11</sup> Uri omoi i. Dani omoimo ite rafuena omoi uiuicai. Jiainomona ucubena jicañeno; ia omoi ucube ollena, omoi onolli diga rairuioicaiñeno omoi maji.

<sup>12</sup> Ie mei omoi jitailla ra iite. Iemona Cristona inoñedinno omoina jiai mameriñeitimaci.

### *Jesucristo dane abido billena llote*

<sup>13</sup> Omoi raise uñollena, daje rafuena lloticue. Omoi creyentiaimona dajerie jai fioidaitimaci. Jesúna inoñedinomona bu fiodaia, fiodaillamona jilluamo naimaci ocuirifena jira, sunaitimaci; iadedi naimaci sunailla isoi, omoi illana jitañedicue. Fiodaillamona jilluamo jai ocuiridomoi.

<sup>14</sup> Jesús fiodaillamona naimie jilluana inotica. Ie jira Jesús abido billa facaise, jai fiodaite creyentiaina Jusiñamui jilloitajana jiai jai inotica.

<sup>15</sup> Cai Nama llofui isoi, bie rafuena lloticue. Jesús abido bia, jai fiodaite creyentiai, nia fiodañede creyentiai diga, daacaiño naimie dine a jaiticai.

<sup>16</sup> Cai Nama Jesús abido bia, Jusiñamui dinena naimie billanona, caina jidaite. Ie jaienicai caina uaidoite. Jusiñamui ie trompeta daacaiño jiai fiite. Jai fioidaitino nano jilloitimaci.

<sup>17</sup> Iemei nia fiodañedinodi como jillodino diga uillie motomo naimiemo dafaifillena, Jesús caina uite. Iemei naimie diga jaca iticai.

<sup>18</sup> Bie llofuiacino diga conini comeciaina omoi ocuiño.

## 5

<sup>1</sup> Bie rafue suilliruina uñoñedicai. Bie rafuena omoi jai uñua jira, iena dane eo cueñeiticue.

<sup>2</sup> Cai Nama abido billana jai uñotomoi. Fiiredimie naiona ebena billa isoi, naimie abido biite.

<sup>3</sup> "Uri iticai. Marena iticai" Cristona inoñedinno raia, naie facaise naimacimo duere sefuillifue suite. Urue riño jigicomo casilla isoi, ebena suite. Naiemona jilloñeitimaci.

<sup>4</sup> Naie facaise suia, Cristo billena omoi jai uñuamona, fiiredimie naiona ebena billa isoi, jacinaiñeitomoi. Cristona inoñedinno isoi, inedomoi.

<sup>5</sup> Uanaicinona omoi jai uñuamona, Cristo ie cominina jai jaidomoi. Jeacino anamo omoi jai inena jira, Cristona inoñedinno dibeimo jai duñedomoi.

<sup>6</sup> Ie jira abina sedacana omoi jai. Abina rairuioicaida omoi jai. Jifaidino isoi ebena omoi jaiñeno.

<sup>7</sup> Cristona inoñedinno abina sedacana jaiñedimaci. Rairuioicaida ebena jaidimaci.

<sup>8</sup> Cristo ie cominina jai cai illa jira, ebena cai jaiñena. Imaci abina riidollena, soldaduai jogobe icodi ite. Imaci ifogi icodi jiai ite. Ie isoide. Cai comeciaina eenollena, Cristona inocana mai cai jailli. Jiaino isiruicana mai cai jailli. Jusiñamui dine ico cai illemo ocuiricana mai cai jailli.

<sup>9</sup> Caina duere finollena, Jusiñamui caina fetofede; iadedi cai Nama Jesucristo finoca rafue muidona, duere finollemona cai jilloillena, caina fetode.

<sup>10</sup> Cristo cai facaina jai fiodaite. Ie jira birui cai fiodaia, naimie bille facaise nia fiodañedinona cai ie, naimie diga jaca iticai.

<sup>11</sup> Ie jira coninina ocuiñotacana omoi jai. Cristo dibeimo coninina itatacana omoi jai. Iese birui jaidomoi; ia nia iese omoi jai.

### *Omoi creyentiaina llofueraini uaina ino*

<sup>12</sup> Cue amatiai, jiaie rafuena lloticue. Omoi creyentiaina llofueraini uaina ino. Cristo jitailla jira, omoi afemo itimaci. Cristo dibeimo omoina raise itatallena, omoi facaina llofuetimaci.

<sup>13</sup> Omoina naimaci canua jira, naimacina isiruillanona, naimaci uaina raise omoi ino. Coniniri uri omoi i.

<sup>14</sup> Omoi motomona majiacaiñedinona imaci majillesa ocui. Duere sefuillamona jai comecina ocuiñonidinona comecina ocuiñota. Raise inollena, Cristona nia raise inoñedinona jiai cano. Fecuisse naimacina ui-uillanona, naimacina cano.

<sup>15</sup> Omoïna jiaimie duere finoia, ibana oñeno; iadedi naimiemo mare rafuena fino. Nana cominimo mare rafuena fino.

<sup>16</sup> Nie isoide rafue omoïmo ia, caïmare omoï i.

<sup>17</sup> Jusiñamuimo nagarui jii-jii.

<sup>18</sup> Nie isoide rafue omoïmo ia, Jsuiñemui jitailla jira, naimiemo iobillacinona feca. Jesucristomona Jusiñamui jitaillacinona jai uifnoticai.

<sup>19</sup> Jusiñamui Joreñoa jamaiñeno.

<sup>20</sup> Jusiñamui Joreño uaido lloraini llofuiana jamaiñeno;

<sup>21</sup> Iadedi Jusiñamui Joreño uaido naimaci llofuiana facaci. Mare rafuedo jaca omoï jai.

<sup>22</sup> Nana marañede rafuemono eneno oni omoï i. Naie isoide rafuena omoï abimo omoï oñeno.

<sup>23</sup> Ie jira Jusiñamuimo omoï facaina jiiiticue. Naimie omoïna jai uri itatate. Naimie omoïna nagarui marena itatacana jaillana jitaïdicue. Iese omoï jaia, cai Nama Jesucristo dane abido bille facaise, naimie jitailla isoï, omoï comeciai marena iite.

<sup>24</sup> Jusiñamuidi ñnogamiëna jira, iese omoïna finoite.

<sup>25</sup> Cue amatiai, Jusiñamuimo cai facaina omoï jiiicabi.

<sup>26</sup> Cue facaido nana creyentiaina caïmare uaido.

<sup>27</sup> Cai Namamo cai duilla jira, naimie jitailla jira, bie cartana nana creyentiai uicomo faca.

<sup>28</sup> Cai Nama Jesucristo omoïna duenaïllasa. Mai. Pablodicue.

## TESALÓNICAMO ITE CRISTONA HNOTINOMO PABLO IE EMODOMO ORETAGA RABE

### *Uaiduacino*

<sup>1-2</sup> Tesalónicamo ite creyentiai, omoimo cartana cueticue. Pablodicue. ¿Nigacino? ¿Nie isoidomoi? Silvano cue diga ite. Timoteo cue diga jiai ite. Iaimaiai uaina orediaimaiai. Cai Moo Jusiñamuimo, cai Nama Jesucristomo jai jainaiaidomoi. Ie jira iaimaiai omoi duenaillana uifnocana omoi jaillana jitaídicaí. Iaimaiai omoi uri itatajana omoi uifnocana jaillana jiai jitaídicaí.

*Cristo dane abido bia, naimiena inoñedinona duere fñoite*

<sup>3</sup> Jusiñamuimo cai jñia, omoi facaina naimiemo iobillacinona fecacabidicaí. Cristona inocana raise jaidomoi. Coniniri isiruicana raise jaidomoi.

<sup>4</sup> Ie jira marena omoi illana jiaie creyentiai illanomo llocana uiticaí. Duere sefuidomoi; iadedi danomo abido jaiñedomoi. Cristona inocana jaidomoi. Iena llocana uiticaí.

<sup>5</sup> Jiaínomona birui duere sefuidomoi; ia inocana jaidomoi. Iemona Jusiñamui omoi facaina illana uifnoticaí. Omoi duere sefuillamona, fueocana jaidomoi. Iemona naimie jitailla isoi, ja muidomo monamo ie cominina sedajanomo iitomoi.

<sup>6</sup> Jusiñamui omoína duere finodinona ico duere fñoite. Omoi facaina ibana oite. Iese naimie fñoia, naimiemona mare.

<sup>7</sup> Cai Nama Jesús abido bia, duere sefuillamona jilloiticaí. Monamona ie siño jaienisaí diga biite. Irai boua isoi ana biitimaci.

<sup>8</sup> Jusiñamuina inoñedinona diese duere fñoitimaci. Cai Nama Jesús rafuena naimaci inoñena jira, naimacina duere fñoitimaci.

<sup>9</sup> Inoñena jira, jaca faifitimaci. Jaca llejí cacaitimaci. Jusiñamui illanomo jaca iñeitimaci. Ie ebirede uaina uifñoñeitimaci.

<sup>10</sup> Cristo bille facaise naimiemo iobillacinona fecaiticaí. Naimieri nana naimiena inotino rajjicaitimaci. Omoimo cai lloga rafuena omoi jai inua jira, iese iitomoi.

<sup>11</sup> Ie jira omoi facaina jicabidicaí. Naimie jitailla isoi, omoína naimie marena itatajana jidicaí. Omoína naimie fetuamona, ie uaido mare rafuena finocana omoi jaillana jidicaí. Ie uaido naimiena inocana omoi jaillana jidicaí.

<sup>12</sup> Iese omoi jaillemona, naimie abido bille facaise naimiena iobitaitomoi. Omoiri naimie jiai iobite. Jusiñamui, cai Nama Jesucristo diga, caina duenaillamona iese iiticaí.

## 2

### *Jesucristo abido bille rafue*

<sup>1</sup> Cai Nama Jesucristo abido billena lloiacadicue. Naimiemo ico cai dafaiñillena jiai lloiacadicue.

<sup>2</sup> “Cai Nama jai abido bite” raillana omoi cacaia, raire jarire iñeno. Rucaicueriñeno. “Jusiñamui Joreño iena cuemo jai llore” damie raia, iena inoñeno. Nie lloraima iena lloia, iena inoñeno. “Pablomona cue feiñoga carta iena llore” damie raia, iena inoñeno.

<sup>3</sup> Naie isoide rafue diga omoína jiaíno jifueiacania, iena inoñeno. Cai Nama nia biñena facaise, eo ailluena comini naimiena enoitimaci. Iemei Taife dinena damie biite. Ja muidomo naimie faifite;

<sup>4</sup> iadedi nano jiaie rafuena fñoite. Taife dinena naimie billanona, jiraraí baifemo iacanite. Jerusalémo Jusiñamui jofomo illanona, “Jusiñamuidicue” raite.

<sup>5</sup> Omoi dine navui cue ia, bie rafuena omoimo lloticue.

<sup>6</sup> Jusiñamui Joreño naimie nia billena rairuillana jai uifnotomoi. Jusiñamui jitaillirui facaise naimie biite.

<sup>7</sup> Taife marañede rafuena birui bainino fñotate. Jusiñamui Joreño naimiena marañede rafuena birui marefodo finuana rairuide. Jusiñamui Joreño naimie rairuiñena mei,

<sup>8</sup> Taife dinena marañedimie biite; ia cai Nama Jesús abido ebire bia, fraiñuamona naimiena meineite.

<sup>9</sup> Cai Nama Jesús nia abido biñenia, comini jifuellena, Taife uaido bie marañedimiedi diga siño rafuena fñoite.

<sup>10</sup> Cominina eo marañedicinodo jifueite. Naie comini ico faifitimaci. Jusiñamui ie uanaicinona naimaci inoñena jira, jilloiacaiñeitimaci.

<sup>11</sup> Ie jira Jusiñamui naimacina tainocinona inotaite.

<sup>12</sup> Jusiñamui ie uanaicinona naimaci inoñena jira, marañede rafuena naimaci ebiruilla jira, Jusiñamui naimacina duere fñoite.

*Jusiñamui omoína jai fetode*

<sup>13</sup> Jusiñamuina iinoñedino isoi Jusiñamui omoína duere finoñeite. Naimie omoína jai fetua jira, naimiemo iobillacinona jaca fecacabidicai. Omoi jilloillena, nano dofoconi omoína fetode. Ie Joreño uaido naimie jitaillacinona omoi finollena, naimie uanaicinona omoi iñuamona, omoína fetode.

<sup>14</sup> Ie rafuena cai llumona, Jusiñamui omoína jai jillotate. Iemona cai Nama Jesucristo ebirede illanomo jaca iitomoí.

<sup>15</sup> Ie jira, Cristona iñocana omoi jai. Cai llogacinodo omoi jai. Iena caimona jai cacadomoí. Cai cartamona iena jiai cacadomoí.

<sup>16</sup> Omoi facaina cai Nama Jesucristomo, cai Moo Jusiñamuimo, jicabidicai. Naimie caina isiruite. Cai comeciaina jaca ocuiñotade. Caina duenaillamona naimie lloga rafue suillemo raise ocuiridicai.

<sup>17</sup> Naimie omoi comeciaina nia ocuiñotallena juidicai. Nie isoide rafuena omoi finoia, naie rafue omoi marena finollena juidicai. Buena omoi ñaia, omoi marena ñaillena jiai juidicai.

**3***Cai facaina omoi jiana jitaídicai*

<sup>1</sup> Daje rafue nia lloiacadicue. Cai facaina omoi jiana jitaídicai. Cai Nama rafue llocana jaillana jitaídicai. Omoi iñua isoi, jiaíno iñuana jiai jitaídicai.

<sup>2</sup> Maraiñedinomona cai jillobillena, omoi jiana jitaídicai. Ailluena comíni Cristona iñoñedimaci;

<sup>3</sup> ia cai Nama jaca iñogamie. Omoi comeciaina ocuiñotaite. Maraiñedinomona omoína eenoite.

<sup>4</sup> Cristomo cai duilla jira, cai llogacinona omoi jai iñuana jai uiñotícaí. Iena nia iñoitomoí.

<sup>5</sup> Cai Nama Jesús omoína Jusiñamui omoína isiruillana uiñotajana jitaídicue. Cristo duere sefuide; iadedi íe Moo jitailla rafuena sefuiruiño finocana jaide. Iese Jusiñamuimo omoi facaina juiticue.

*Maijuillasa*

<sup>6</sup> Cai Nama Jesucristo jitailla jira, jiaíe rafuena nia lloiticue. Jiaíe creyente maijiacaiñenia, naimie diga eo nabairiño. Iena navui omoímo lloticue; ia damierie íese ia, naimaci diga eo nabairiño.

<sup>7</sup> Caimona fueo. Navui omoi motomo iticai; ia cai ucube ollena, jaca maijidicai.

<sup>8</sup> Guillena ibaño guiñedicaí; ia nagarui eo maijidicai, omoína duere cai finoñellena.

<sup>9</sup> Cristo facaina cai maijia jira, omoimona ra jamai cai jicallena, caimo uai íte; iadedi caimona omoi fueollena íese jicañedicaí. Omoi ra ollena, omoi maijiana jitaídicai.

<sup>10</sup> Navui omoi motomo cai illa facaise lloticai: “Bu maijiacaiñenia, guiñena”.

<sup>11</sup> Omoi motomo damierie jai maijiñenana jai fididicai. Maijiño jai ítimaci.

<sup>12</sup> Cai Nama Jesucristomo cai duilla jira, naie isoidinomo maijillena lloticai. Uainino maijiamona ucube naimaci uana jitaídicai.

<sup>13</sup> Cue amatiai, nie isoide mare rafuena finollena sefuiruiño.

<sup>14</sup> Cue jai cueda cartamo íte rafuena bu iñoñenia, nana creyentaina naimiena uiñota. Naimie meidaillena, naimie diga nabairiño.

<sup>15</sup> Naimiena enoiño; ia creyentena naimie nia illamona, naimiena fecuise llofue.

*Fuiduacino*

<sup>16</sup> Cai Nama omoi jaca uri itatajana jitaídicai. Naimie omoi diga jaca íite.

<sup>17</sup> Cuenca canollena, naimiemo cue llua isoi, jiaímie bie carta cueda; iadedi cue mameci buene dama cueticue. Nana cartamo íese cue mamecina cueticue. Pablocicue.

<sup>18</sup> Cai Nama Jesucristo nana omoína duenaillasa. Mai. Macaibaite.

## TIMOTEOMO PABLO NANO ORETAGA RABE

*Pablo Timoteona uaiduacino*

<sup>1-2</sup> Timoteo, bie carta omo cueticue. ¿Nigacino? ¿Nie isoidio? Pablodicue. Cristo Jesús oretagamiedicue. Ie rafue lollena, naimie cuena orede Naimiena cue cioillena, naimie isoi cue illena, naimie abido billemo ocuiridicue. Jusiñamui cuena jiai orede. Naimiedi cai Jilloitaraima. Cue llofuaiacinomona Cristona o raise #nua jira, cue jito isoi cue mamecao. Cai Moo Jusiñamui, cai Nama Jesucristo diga, ona jai duenaite. Iena uiñocana mai o jai. Ona jai uri itatatiamaiai. Iena uiñocana mai o jai.

*Cristo rafuena tainona llofuerañi llofuiacinodo jaiñeno*

<sup>3-4</sup> Macedoniamio jaie jaidicue, Efesomo o fiebicaillena omo lloticue. Nainomo dajerie Cristo rafuena raise llofueñedimaci; iadedi jiaiforie llofuetimaci. Diga #gaiaina facafacacimaci. Imaci usumatiai mamecido siadocabitimaci. Iemona conini uaina uaitaside. Jusiñamui jitailla isoi comini marena illana llofueñedimaci. Jusiñamuina cai #nuamona, marena iticai. Iena llofueñedimaci. Ie jira naimaci uaina lliicaita.

<sup>5</sup> Jusiñamuina comini isiruillena, jiaie cominina jiai naimaci isiruillena, Jusiñamui uaina llofueticai. Naimaci comeci jeaninana jitaicai. Jusiñamuina raise naimaci #nuana jiai jitaicai. Ie jira Jusiñamui rafuena llofuecabiticai.

<sup>6</sup> Dajerie llofuerañi iese llofueñedimaci; iadedi jamai ñaitimaci.

<sup>7</sup> Moisés micori jaie llogacinuaido llofueiacacimaci; iadedi iena llofuiana uiñoñedimaci. Naie llogacinuaina ua uiñoñedimaci.

<sup>8</sup> Iena raise llofuegana, Jusiñamuina uiñoñedinona naimiena uiñotallena, mare. Iena uiñoticai.

<sup>9-10</sup> Moisés micori llogacinuaidi mareuidinomo jainaiañede. Jiaionomo jainaiaide: Jusiñamui uaina #noñedinomo lloga uaina #norainidinomo, Jusiñamuina jitañedinomo, jeacino finorainimo, jeare ñaicabitinomo, Jusiñamuina enoidinomo, eina meinetinomo, moon meinetinomo, jiaie cominina meinetinomo, aiñede riño diga itinomo, iniñede iima diga itiañaiñuaimo, daje isoide iima diga conini aifuedotinomo, comena fiudinomo, taino llorainimo, taino lluana jifueridinomo, uanai rafue facaisena iñedinomo. Nana Cristo rafue facaina iñedinomo Moisés micori llogacinuai ua jainaiaide;

<sup>11</sup> ia naie rafue cuemo jai jainaiañede. Ie mare rafuena cue lollena, Jusiñamui cuena jai orede. Maremiena Jusiñamui illamona, naimie rafue jiai eo ebirede.

*Jusiñamui caina duenailla jira, Pabloti iobide*

<sup>12</sup> Cuena fetua jira, cai Nama Cristo Jesús iobidicue. Naimiena cue #nollena, naimie cuena uiñuamona, cuena fetode, naimie rafue cue lollena. Iena lollena, cue comecina jiai ocuiñotade.

<sup>13</sup> Jaie naimiena jeare ñaiticue. Naimiena #notinona jiai duere finodicue. Abina cue uiñoñena jira, naie facaiseconi naimiena nia cue #noñena jira cuena duenaillamona, naimie cuena fetode.

<sup>14</sup> Cuena eo duenaite. Iemona naimiena #noticue. Naimiena jiai isiruiticue.

<sup>15</sup> Bie lluidi mare cue uiñuamona, nana comini buena #nuana jitaicue. Marañedinona naimaci jeacinomona jilloitallena, eniruemo Jesucristo bite. Ero, nanoca jeacinona finoraimadicue;

<sup>16</sup> iadedi Jesucristo cuena duenaite. Naimiena cue #nuamo jaie fecuise ocuiride. Nana jeacinona finorainimo fecuise ocuiride, naimiena #nollena. Naimiena cai #nuamona, Jusiñamui diga jaca iiticai. Cuena duenailla jira, biruimona naimiena #noitnodi naimie naimacina duenaillana uiñoitimaci.

<sup>17</sup> Jusiñamuidi nanocamie. Jaca fioidañeite. Naimiena cionidicai. Naimie damiede. Jiaiena iñede. Naimiena jaca iobicabillasa. Iena jitaicue.

<sup>18</sup> Ero, Timoteo, cue jito, omo rafue lloiacadicue. Nano o llofueraimana jaiacana facaise ailluena Cristo rafuena llofuerañidi ona jaie llotimaci: "Naimie raise marena llofueite" llotimaci. Iena comecianona, o comeci ocuiñocana o jai, Cristo rafuena riidocana o jaillena.

<sup>19</sup> Cristona #nocana o jai. O comecina marena finocana o jai. Dajerie naimaci comeci iuaimo comeciaina facañedimaci. Ie jira Cristona jai #noñedimaci.

<sup>20</sup> Iese ite Himeneo. Alejandro jiai jai daje isoide. Jai #noñediaimai. Ie mei iaimaiaina Taife anamo jai itabacaitaticue, duere sefuillena. Iaimai fueollena, Jusiñamuina jeare ñaiñellena, iese itabacaitaticue.

## 2

*Nana comini facaina jüiticaí*

<sup>1</sup> Diga rafue omo lloiticue; iadedi daje rafue motomo ite. Nanoca rafue. Iena omo lloiticue. Jusiñamui diga omoi ñaia, nana comini facaina jüi. Naimaciri iobillacinona Jusiñamuimo feca.

<sup>2</sup> Uri cai illena, Jusiñamuina raise cai sedallena, Jusiñamui jitailla rafuena cai finollena, illaicomini facaina cai jüi.

<sup>3</sup> Iese cai jüia, Jusiñamuimona mare. Naimiedi cai Jilloitaraima.

<sup>4</sup> Naimiedi nana comini naimaci jeacinomona jilluana jitaide. Uanaicinona naimaci uñuana jiai jitaide.

<sup>5</sup> Nana nairaiaí imaci Jusiñamuidi jaca dajede. Comini diga Jusiñamui facaisena ñairaima jaca dajede. Naimiedi Cristo Jesús. Comini Jusiñamui facaisena naimie ñaicabite. Comini facaisena ñairaima jaca dajede. Naimiedi Cristo Jesús. Naimie imanana, comini facaisena ñairede. Te muidona comini diga Jusiñamui jai nabairede. Jusiñamui diga comini jiai jai nabairedimaci.

<sup>6</sup> Cai jeacinomona cai eneno illena, Jesucristo nana cai facaina jai fodaite. Naimie jitailla facaiseconi Jusiñamuidi cominina bie rafuena jai uñotade.

<sup>7</sup> Bie rafue cue lollena, Jusiñamui cuena fetode. Judüaifedino cue lollena, bie rafue naimaci ñinollena, uanaicinona naimaci uñollena, cuena orede. Tainona loñedicue.

<sup>8</sup> Ie jira naga roracomo ite iñiaí, cai comini onolliaí a ñuitacabilla isoi, comeciaino jeacino iñenanomona, Jusiñamuimo jüana jitaidicue. Naimaci comeciaino icirillacino iñedemo, Jusiñamuimo jüi. Naimaci comeciaino uaitajacino iñedemo, Jusiñamuimo jüi.

<sup>9-10</sup> Riñoniaimo jiai lloiticue. Roracomo omoi jiaia, abi ieduaomo comeciaina facañenamona, omoi ifotiena fino. Jamai ebinai raillano, abi ieduaomona abina finora jitañeno. Jamai ebinai raillano, abi ieduaomona eo raifide iniroina jitañeno; iadedi mare rafuena omoi finuamona, ebinaitomoi. “Jusiñamuina ñnoticaí” omoi raillanona, naimie jitailla isoi, marena omoi finolle.

<sup>11</sup> Rollena comini ofia, ñañenanomona, uaitañenamona omoi fueo.

<sup>12</sup> Omoi ofia, omoi iñiaína llofuiana jitañedicue. Nainomo omoi ñañena. Hiñaí omoi anamo illana jitañedicue. Iese omoi riñoniaimo lloiacadicue.

<sup>13</sup> Jusiñamui Adán micorina nano finua jira, iese lloticue. Adán micori finua mei, Eva micorina jiai finode.

<sup>14</sup> Taifedi Adán micorina jifueñede; iadedi Eva micorina jifujete. Ie mei naie riño jeacinona finode.

<sup>15</sup> Iemona jilloite; iadedi uruiaí jococana jaite. Riñoniaidi Jusiñamuina ñnoia, jiaie cominina isirua, Jusiñamui jitailla rafuena finoia, ie abina eenoia, jilloitimaci.

## 3

*Creyentiaína sedaraini illa rafue*

<sup>1</sup> Bicinodi uanaicino. Creyentiaína llofueraimana bu jaiacania, naimie comecimo mare jitaillacino ite.

<sup>2</sup> Bie isoide llofueraimana jaiacadimena jitaidicue. Naga comini naimie mare raillamie. Dañaiñona airedimie. Abi eenotimie. Ebena iñedimie. ñnogamie. Jiaie comini naimie jofomo riadedi, raise nafuecabitimie. Jusiñamui uaina raise llofuecabitimie.

<sup>3</sup> Jifairuiñedimie. Fuirirainidimie. Raire icirirainidimie. Ucubena nicidoñedimie.

<sup>4</sup> Naimie cominina raise sedadimie. Naimie anamo naimaci illanona, naimie uruiaí ie uaina raise ñnotadimie. Ie isoidimie llofueraimana jaillana jitaidicue.

<sup>5</sup> Iese naimie iñenia, ie anamo itinona naimie raise sedañenia, çñiese jiaie creyentiaína raise sedaite?

<sup>6</sup> Como creyentena jaidimena creyentiaína llofueraimana fetofeno, naie diga naimie abi iedoi raillano. Abi ieduaomona, Taife isoi jeacino finoite.

<sup>7</sup> Llofueraimana jaiacadimena creyenteñedino: “Mare” raiñenia, naimiena fetofeno. Iese naimiena raiñenia, naimie joreñona jeare ñaitimaci. Iemei Taife ramo jiai faite, naimie abido danomo uallena. Ie muidona naimie uaina jaca cacareññeitimaci.

*Diáconuai illa rafue*

<sup>8</sup> Diáconuai creyentiaí llofueraí isoi marena illa. ñnouiganona illa. Jifairañena. Ucubena nicidoñena.

<sup>9</sup> Naimacidi Cristona cai ñnua rafuena jeanide comeciainomona ñnua.

<sup>10</sup> Bu omoi fetocania, naimacina nano facaci. Roracomo jiaie rana nano mañita. Iena raise finoia, diáconuaina jaite.

<sup>11</sup> Diáconuai ainiaí jiaí inogañaiñuaina illa. Jiaie comini joreñona ñaiñena. Jirorainina. Naga rafuena marena raise finua.

<sup>12</sup> Nana diáconuai aidi dañaiñorie. Diáconuai uruiaí naimaci uaina raise inua. Diáconuai imaci anamo itinona raise sedajana uñua.

<sup>13</sup> Diáconuai marena maijia, comini naimacimo iobillacinona fecaitimaci. Cristo Jesúsna inuano, naimiena marefodo jiaí lloitimaci.

*Jusiñamuina inotino*

<sup>14</sup> Timoteo, raire o dine jaiacadicue; iadedi uicodo bie rafuena omo cueticue.

<sup>15</sup> Are cue riñenia, daní omoi creyentiaí diese ofia, Jusiñamui ie cominina marena omoi illana omoi uñollena, omo cueticue. Cajede Jusiñamuina jai sedadicaí. Uanaicinona riidoticaí.

<sup>16</sup> Jusiñamui caina Cristona jai uñotagafuedi jiaie rafue baifemo faite. Iena cai uñuanona, raiticaí:

Eniruemo Cristodi imana jai bairede.

Jusiñamui Joreñodi caina naimie uai siñonana uñotade.

Jusiñamui jaienisaí naimiena jiaí ciotimaci.

Jiaie nairaiaimo naimiena lloticaí.

Iena cacajamona, ailluena cominidi diga nairaimona naimiena birui inotimaci.

Monamo naimie abido jai jaide.

## 4

*Jiaínodi jiaiforie rafuena lloitimaci*

<sup>1</sup> Jusiñamui Joreño caimo raise lloite: “Jesucristo nia abido biñena facaiseconi damerie creyentiaí Cristona faionocaitimaci. Taife díbeimo ite lloraini lluana cacarefillamona, Janabamona ite lluacínodo jaitimaci. Taifemona ite lluacínodo jaitimaci”.

<sup>2</sup> Naie llorainidi: “Uanaicinona lloticaí” raitimaci; iadedi taino llocabiitimaci. Naimaci comeciaí jai tainomo iite.

<sup>3</sup> Ima riño ie aina ollena rairuitimaci. Riño ima ie inina ollena rairuitimaci. Dajerie guille rana fimaidoitimaci. Jusiñamui iena fimaidoñede; ia creyentiaí uanaicinona uñuanona, iobillanona guillena, naimiedi naga rana finode.

<sup>4</sup> Nana Jusiñamui comuitaga guille radi mare. Iobillano iena cai feiñuanona, guiticaí.

<sup>5</sup> Jusiñamui llua jira, Jusiñamuimo cai jiaí, nana guille radi jai mare. Iemona marañede rafue jaca caimo comuñeite.

*Jesucristo rafuedo raise inocana jai*

<sup>6</sup> Timoteo, cue lluana creyentiaimo o lloia, Jesucristo díbeimo raise maijidio. Cristo uaina inocana o jailla jira, mare llogacinodo o jailla jira, raise maijidio.

<sup>7</sup> Jamai rafuemo, jamai iñgaiaimo o comecina facañeno; iadedi Jusiñamui jitailla rafuena finocana o jai.

<sup>8</sup> Mairillena o abi llarocaiadedi, mare; iadedi Jusiñamui rafuena o facajia, eo mare. Abi llarocaja baifemo Jusiñamui uaidi eo faite. Jusiñamui rafuedi o comecina birui ocuiñotaite. Jusiñamui dine jairuido o jaillena, o comecina marena jiaí raise finotaite.

<sup>9</sup> Bie lluacínodi uanaicino. Ie jira iena cai inua.

<sup>10</sup> Cai jillobillena, cajede Jusiñamuimo ocuiridicaí. Ie jira duere sefuillano maijidicaí. Jeacinomona Jusiñamuidi nana cominina jillobitaacade. Naimiena inotinona jai jillotate.

<sup>11</sup> Nana creyentiaimo cue lluana raise llofue.

<sup>12</sup> Naimacina o llofueia, conruena nia o illamona: “O afemo iticaí” naimaci raiadedi, damamai iese raitimaci. Mare illacínodo o jai. Ie mei iese raiñeitimaci. Marena o ñaiamona, marena o illamona, jiaie cominina o isiruillamona, Jusiñamuina o inuamona, o jeanide rafuena o finoñenamona, naimacidi fueoitimaci.

<sup>13</sup> O dine nia cue riñenia, creyentiaí ofia, Jusiñamuina ciegafuaina ado faca. Iena llono. Iena llofue.

<sup>14</sup> Creyentiaína llofueraini navui ofidemo, Jusiñamuimona o baitajacinona o feiñollena, naimaci onolliaí o ifogimo jonetimaci onolliaí o ifogimo jonetimaci. Naie facaiseconi Jusiñamui naimacina naicinona ona llotatate. Naicinona birui faionocaiñeno.

<sup>15</sup> Iena eo uiuicai, nana comini Cristona inocana o jaillana uñollena.

<sup>16</sup> O comecina raise eeno. Marena raise llofue. Cristo uaina inocana o jai. Iese o jaia, jecacino finuamona jilloitio. Iese ona cacadino jiaí jilloitimaci.

## 5

*Timoteo afemo itino diga ie illa rafue*



<sup>1-2</sup> Eimíaina illamona, o afemo itinona riire llofueño; iadedi o moomo o llua isoi, naimacina fecuise llofue. O anafemo itinona o amataimo o llua isoi, llofue. O afemo itíñaiñuaina o eimo o llua isoi, llofue. O anafemo itíñaiñuaina o miríñotiaimo o llua isoi, llofue. Naiñaiñuaimo jeare comecina facañeno.

<sup>3</sup> Naiñaiñuaina canollena, feciñuai comini íñenia, naiñaiñuaina cano.

<sup>4</sup> Feciñomo uruiai ia, naimaci naiñaiñona canua, naiñaiño naimacimo duilla jira. Eina-macina illamona, iemona naiñaiñodi ibana oite. Iese itena, Jusiñamuimona mare.

<sup>5</sup> Feciñomo uruiai íñenia, da Jusiñamuimo naiñaiño ocuiride, naimie naiñaiñona canollena. Jusiñamuimo nagarui jicabite. Bie isoide feciñuaina cano;

<sup>6</sup> iadedi Jusiñamuimo duiñede rana ebiruiga feciñona canoñeno. Jusiñamui anamo naiñaiño jai raise íñenamona, Jusiñamuimona naiñaiñodi jai fioidatíñaiño isoide. Fioidate cominina jaca canoñedicai.

<sup>7</sup> Ie jira creyentiaimo buena llono, feciñuaina jeare bu ñai raillanona.

<sup>8</sup> Ie cominina canoñedimie Cristo uaina jai fainonocaide. Naimiedi Cristona ñinoñedimie baifemo eo jearedimie.

<sup>9</sup> Creyentiaina sedarainina canolle feciñuai mameciaina o joneia, iese jone: Jai jion-aidíñaiñuai diese mameci jone. Dajede iniredíñaiñuai mamecina jone.

<sup>10</sup> Mare rafue naiñaiñuai finocabilla jira, jiaie cominidi naiñaiñuaidi mareñaiñuai rail-lañaiñuai. Ie uruiai raise sedadíñaiñuai. Cominina nafuecabitiñaiñuai. Jiai creyentiaina abina íedoñeno canocabidíñaiñuai. Duidinona canocabidíñaiñuai. Diese mare rafuena finocabidíñaiñuai mameci jone.

<sup>11</sup> Feciñuai diese mameci o joneia, nia jionaiñede feciñuai mameciaina joneño. Naiñaiñuai nano llotimaci: “Ínina dane oñeticai. Da Cristona sedaiticai” llotimaci. Ie mei uri íñenanomona, íimana niciduamona, inina jitaitimaci. Ie jira naiñaiñuai mameci joneño.

<sup>12</sup> Naiñaiñuai navui llucacina jai fainonocailla jira, jiaie comini naiñaiñuai joreñuaina ñaitimaci.

<sup>13</sup> Naiñaiñuai diga jofomo macarirullamona, rairaidimaci. Eo ñaillaredimaci. Naiñaiñuai ñaiñenacinuaido ñaitimaci.

<sup>14</sup> Nia jionaiñede itíñaiñuai iese íñellena, naiñaiñuai inina dane uana jitaídíe. Ie mei uruiaiñenitimaci. Naiñaiñuai jofona sedaitimaci. Ie mei budi naiñaiñuaina jeare ñaiñeite.

<sup>15</sup> Cristona dajerie fainonocaida, Taife díbeimo jai jaidimaci.

<sup>16</sup> Creyente cominimona feciño iade, da naimie naiñaiñona canua. Jiaie creyentiaimo naiñaiñona canolle rana jicañena. Ie muidona comininide feciñuaina canorenitimaci.

<sup>17</sup> Creyentiaina llofueraini marena maijia, raise íbauiga. Naimaci lloia, naimaci jiai llofueia, eo raise íbauiga.

<sup>18</sup> Moisés micorí jiaie ciegafuiai iena llote: “Trigo oni juillena jurareta saisiia, ie fuena maiñeno, ie guillena”. Guillamona ibana jai ote. Cristo jiaie llote: “Maijídímiedi íbauiga”.

<sup>19</sup> Creyentiai llofueraimana damie llogídoia, iena cacareñeno. Mena comini, ñibai daje amani comini iese naimina llogídoia, iemo cacarei.

<sup>20</sup> Creyentiai llofuerainimona bu jeacina finocabia, nana creyentiai uicomo naimiemo riire llono, jiaie creyentiai daje isoi íñellena.

<sup>21</sup> Dacinodo naga jeacino finoraimamo llono. Nagamiemo riidoñeno llono. Fecuisse damiemo lloño, naimiedi o nabaina jira. Jusiñamui caina ciode. Jesucristo caina ciode. Jusiñamui fetoca jaienisai caina jiai ciodimaci. Ie jira dacinodo llono.

<sup>22</sup> Jeacino naimiemo ia, naimie jeacino facaisena o íñellena, creyentiai llofueraimana jai llena, buna raire fetoño. Jeacinomona oni eneno i.

<sup>23</sup> Eo o duia, da jinua jiroño. O duicabilla jira, janore vino jiro, o jebe manollena.

<sup>24</sup> Jeacino dajerie finoa, iena uíñotícaí, juez isoi Jusiñamui iena nia lloñena. Jeacino jiaino finoa, iena uíñoñedicai; iadedi jiairuido Jusiñamui lloia, iena uíñotícaí.

<sup>25</sup> Ie isoide. Mare rafue bu finoa, iena uíñotícaí; iadedi birui iena cai uíñoñenia, jicarena finoñena jira, jiairuido iena uíñotícaí.

## 6

<sup>1</sup> Jusiñamuina ñnote maijirainidi naimaci patrones eo ñnua. Ie mei Jusiñamuina ñinoñedino Jusiñamuina jeare ñaiñeítimaci. Cai llofuacina jamaíñeítimaci.

<sup>2</sup> Jesucristona naimaci patrones ñnoia, maijiraini naimaci uaina jiai ñnua. Naimaci comeciai facañena: “Patrón creyentena illa jira, daní conima cai isiruilla jira, raise maijíñeíticai”; ia: “Raise maijíticai” comeciaina facaja.

### *Uanaíñedícinona llucacino*

<sup>3-4</sup> Cai llogacínodi uanaicino. Cai Nama Jesucristona llotícaí. Bie llogacínomona naimie jítaille isoi cai illanona, raise uíñotícaí. Jiaicínodo bu llofueia, abí íedote. Abí uíñoñede.

Uai eo uaitaiacade. Ie meinoconi comini abina uradoidimaci. Daajena comeeciaina lloifnedimaci. Jiaie comini joreñona ñaitimaci. Cai fiiena bitimaci.

<sup>5</sup> Uai uaitatimaci, naimaci comeeciái marañeno illa jira. Uanaicinona jai uiñoñedimaci. “Cristo uai llumona, ailluena ucubena oiticaí” raillanomo comeeciaina facadimaci. “Iemona caimare iiticaí” raillanomo comeeciaina facadimaci.

<sup>6</sup> Ie iadedi iese ifede. Cristona eo raise cai ñnuamona, caimo ñese ite ra diga caimare iticaí.

<sup>7</sup> Cai jeiciaí, jaca buenidicaí. Cai fiodailla mei, cai rana uiñeiticai. Cai radi benomo fiebicaiete.

<sup>8</sup> Ie jirari, cai guille ia, cai ñiroi ia, caimare bene cai illa.

<sup>9</sup> Eo ucuberedinona jaiacadinona Taife eo ramo faite. Taife uaina ñnuanona ucube ollena, ucuberedinona jaiacadinodi diga marañede rafuena finodimaci. Ja muidomo imaci abí faffitimaci.

<sup>10</sup> Ucubena eburillanona, ucuberedinona jaiacadino naga jeacinona finocabidimaci. Ucube ollena, dajerie Cristona jai fañonocaidimaci. Ie muidona eo duere sefuidimaci.

*Jusiñamui uaina ñnocana jai*

<sup>11</sup> Ero, Timoteo, odi Jusiñamui fetocamiedio. Nana cue como lloga rafuemona oni eneno o i. Mare rafuedo o jai. Jusiñamui jitailla rafuena finocana o jai. Jesucristona ñnocana o jai. Jiaie cominina isirui. Mare rafue dibeimo o comeeciaina jone. Riicinodo cominina llofueñeno.

<sup>12</sup> Jeacino dibeimo o ifellena, Jesucristona ñnuanona, llocana o jai. Jaca itatajacinona marena raise ñno. Jusiñamui ona fetode, o jaca illena. Navui diga cominimo Jesucristona o ñnuana marefodo llotio.

<sup>13</sup> Ie isoide Jesucristo. Ponce Pilato ñine jaiie naimie itemo, marefodo: “Imiedicue” llotie. Jusiñamuidi nana rana cajetade. Naimie caína jaca ciode. Jesucristo caína jiaí jaca ciode. Ie jira uanaicinona omo lloticue.

<sup>14</sup> Cai Nama Jesucristo ñia abido biñenia, nana omo cue llogacinuai ñno. Jearede rafuena finofeno, jiaie comini ñaie llogacinuaina uaitañellena.

<sup>15</sup> Naimie jitaillirui Jusiñamuidi eniruemo Jesucristona ñane oretaitie. Jusiñamuidi maremie. Nanocamie. Cai nanoca cai moto illaíma. Cai nanoca Nama.

<sup>16</sup> Da jaca naimie fiodañeite. Eo isire lligañote ra ñinomo naimie ite. Nainomo jaca bu iaírei rinide. Bu naimiëna jaca cionide. Naimiedi jaca siñonasa. Naimiemo iobillacinona jaca cai fecacabillasa. Iena jitaídicue.

<sup>17</sup> Eo ucuberedinomo llono: “Abina iedoñeno. Ucubedi fuirede. Ie jira ucubena uamo ocuiríñeno; iadedi Jusiñamui mo ocuirí”. Cai comeeciái jaisillena, naimiedi caimo rana eo raise fecacabide.

<sup>18</sup> Ucuberedinomo jiaí llono: “Omoí ucube diga mare rafuena fino. Jiaie cominimo ucubena caidíñeno fecajana cano”.

<sup>19</sup> Ie muidona iese naimaci finoia, monamo naimaci isiruiga rana iite, jiaíruído iena. Iese naimaci jaiá, jaca itatajacinona marena raise ua uiñoitimaci.

*Fuiduacino*

<sup>20</sup> Timoteo, cue omo llogacinona fañeno raise uiuicai. Jamai rafuemo cacareñeno. “Uanaicinona eo uiñoticaí” dajerie raitimaci; iadedi uiñoñedimaci. Naimaci ñaiana cacareñeno.

<sup>21</sup> Dajerie iena cacajano, Cristona ñia uiñoñedimaci. Jusiñamui ona duenailasa. Jaca ñinori omo rafuena lloticue. Mai. Pablodícue.

## TIMOTEOMO PABLO IE EMODOMO ORETAGA RABE

### *Uaiduacino*

<sup>1-2</sup> Timoteo, carta omo dane cueticue. ¿Nigacino? ¿Nie isoidio? Pablodicue. Jusiñamui cuena jitailla jira, Cristo Jesús oretagamiedicue. Cominimo jaca itatajacinona llovena, cuena oretate. Cristo Jesús cai ñnuamona, naimie diga jaca iiticaí. Cue isiruiga jito isoidio. Cai Moo Jusiñamui, cai Nama Jesucristo diga, ona jai duenaite. Iena uñocana mai o jai. Ona jai uri itatatiñamaiaí. Iena uñocana mai o jai.

### *Jusiñamuimo iobillacinona fecade*

<sup>3</sup> Mare cue comecimona cue usumatiaí micoriaí isoi, Jusiñamuina sedadicue. Timoteo, nagarui Jusiñamuimo cue jñia, o facaisena iobillacinona fecadicue.

<sup>4</sup> Cue comeci caimarefacillena, ona eo cioacadicue. Navui cue o facadoia, o eiana comeciticue.

<sup>5</sup> Cristo Jesús o ñnuana dane jiaí comeciticue. O usuño Loidadi ñnote. O ei Eunicedi jiaí ñnote. Ie mei ñnotio. Naimiena o ñnuana jai uñoticue.

<sup>6</sup> Ie jira o comecina dane ocuiño, Jusiñamui uai o llofuellena. Cue onolli o ifogimo navui joneticue, ona fetollena, naimie uaina o llovena. Jusiñamuimona o baitajacinona naie facaiseconi feñnotio.

<sup>7</sup> Jusiñamuidi cominina o jaciruillana jitañede. Cai comeciaina ocuiñotajanona, caina jiaie cominina isiruitallena, cai comeciaina eenotallena, ie Joreño caimo fecade.

<sup>8</sup> Ie jira cai Nama rafuena o lluaña meiruiñeno. Cárcelmo cue illa jira, cuena jiaí meiruiñeno. Cristo Jesús rafue muidona duere sefuidicue. Naie rafue muidona duere o jiaí sefua, rairuioicañeno i. Jusiñamui o comecina ocuiñotaite.

<sup>9</sup> Naimie isoi cai marena illena, caina fetuano, jeacinomona caina jillotate. Cai finoca rafue muidona caina jillotañede; iadedi naimie jitailla jira, caina jillotate. Enirue nia finoiñena facaiseconi caina jaie duenaite. Cristo Jesús caina iena jai uñotade.

<sup>10</sup> Cai jilloitaramadi Cristo Jesús. Caimo Jesús jai bairia jira, Jusiñamui caina duenaillana jai uñoticai. Fiodaillamona naimie jai jillode. Iemona jiaí jilloiticaí. Naimie mare rafuemona naimie caina Jusiñamui dibeimo jaca illacinona jai uñotade.

<sup>11</sup> Bie rafuena llovena, cuena fetode. Cuena oretaja jira, biena llofueticue.

<sup>12</sup> Ie jira duere sefuidicue; iadedi cue illana meiruiñedicue. Cue ñnogamiena cue uñua jira, naimie bille ñnori naimiedi nana cuemo naimie jai iga rafuena cue llofuellena, cuena raise enoite.

<sup>13</sup> Cue llua isoi o i. Uanaicinona lloticue. Cristo Jesús ñnocana o jai. Jiaie cominina isiruicana o jai, Cristo Jesús mo jainaiailla jira.

<sup>14</sup> Jusiñamui Joreño caimo illa jira, omo naimie lloga uanaicinona fainonocaiñeno uuiucaí. Uanaicinona o fainonocaiñellena, naimie ona canoite.

<sup>15</sup> Diga Asiamo ite cominidi cuena fainonocaidimaci. Naimacimona Figelo cuena fainonocaide. Hermógenes cuena jiaí fainonocaide.

<sup>16</sup> Onesiforo daje isoñede. Diga icañeno naimie cue comecina ocuiñotade. Cuena meiruiñede. Cai Namadi Onesiforo jofomo itino duenaillasa.

<sup>17</sup> Romamo Onesiforo navui ria, cuena isire jenuano, cuena baite.

<sup>18</sup> Efesomo jaie cue ia, naimie cuena jiaí canode. Iena raise uñotio. Cai Nama ico abido bia, cai Namamona naimie iba feñuana jitaidicue.

## 2

### *O maijia rafuena raise fuido*

<sup>1</sup> Cuena fainonocaidino isoi iñeno; iadedi cue jito, Cristo Jesús ona canuano, Cristo dibeimo o comecina ocuiñocana jai.

<sup>2</sup> Diga cominimo cue lluaña navui cacadio. O uaina ñnotinomo cue lluaña llono, iena jiaie cominina naimaci llofuellena.

<sup>3</sup> Cristo Jesús rafue muidona duere o sefua, rairuioicañeno i. Cai Nama rafuena o riiduamona, naimie soldado isoidio.

<sup>4</sup> Ie illaíma uai naimie ñnoiacania, soldadodi soldadoñede rafuena maijicañena. Ie illaíma iobitallena, ie illaíma ocuica rafuena finoacanite. Ie isoide. Da Cristo Jesús rafuena o fino, naimiena iobitallena.

<sup>5</sup> Reglamentos llua isoi naimie raise jifanoñena, jifanoramadi bue isoide rana cioñede. Ie isoide. Ibaña o feñollena monamo o jai, Cristo Jesús lluado raise o jai.

<sup>6</sup> Illimo duere maijiraimadi maijia jira, naiemona naie guilledi oga. Ie isoide. Duere o maiji, ibana feiñollena.

<sup>7</sup> Cue lluomo o comecina facacabi. Cai Nama ona canoite, iena uifñollena.

<sup>8</sup> Jesucristo fiodaillamona jillode. Iena comeci. Naimie usumadi David micori. Jesucristona cue llua jira,

<sup>9</sup> marañedimie isoi cárcolmo duere jai sefuidicue; iadedi Jesucristo rafue nia llocana jaide.

<sup>10</sup> Ie jira Jusiñamui fetocano facaina duere sefuidicue, Cristo Jesúsna naimaci ñnuamona naimaci jilloillena, monamo naimaci jaca illena.

<sup>11</sup> Bie lluacinodi uanaicino:

Naimie dibeimo cai jaillamona, naimie diga jaca iiticaí.

<sup>12</sup> Naimie muidona cai duere sefua, naimie diga iiticaí, ie cominina naimie sedalle facaiseconi.

Naimiena cai janoia, naimie caina jiaí janoite.

<sup>13</sup> Naimie raise cai ñnoñenia, naimie uai meidoñena muidona, naimiedi nia ñnogamie.

### *Timoteo illa rafue*

<sup>14</sup> O cominimo biena dane llono, iena comecillena. Jusiñamui facaina naimacimo llono: Uaina jamai uaitañeno, mare rafuena naicinomona comuñena jira, naicinona cacadino comeciaina maretañena jira.

<sup>15</sup> Marena maiji, Jusiñamui ori iobillena. O meiruiñellena, naimie o maijia jibuaia, marena maiji. Uanaicino o uifñuamona, naimie uaina marena raise llofue.

<sup>16</sup> Jamai ñaiana cacarefiñeno. Comini jamai ñainoicaia, Jusiñamui jitailla rafuena finocana jañedimaci.

<sup>17</sup> Diga rafue naiemona comuide. Mocollonaitate duico cai abimo illa isoi, naie rafue llocana jaide. Himeneo naie rafuedo jaide. Fileto dajedo jiaí jaide.

<sup>18</sup> Uanaicinona fainonocaidiaimaiaí. Coco ñnu isoi, llofueñediiamaiaí. “Cai fiodaia, cai abi ico jilloñeite” llofuetiiaimaiaí. “Cristona cai ñnu facaise jai jillodicaí. Cai fiodaia, cai joreño jaca iite” llofuetiiaimaiaí; iadedi cai abi ico jillollena ñnoñediiamaiaí.

<sup>19</sup> Ie ia Jusiñamui comini jaca ñnocana jaidimaci. Ie cominimo Moisés micori jaie lluamona, iaimaiaí finoca rafuena jiaí ñaite: “Jusiñamuidi ie cominina uifñote. ‘Jusiñamuina ñnoticue’ raitimiedi marañede rafuemona eneno illasa” llote. Ie jira iaimaiaimona eneno o i.

<sup>20</sup> Ero, ucuberedimie jofomo diga guillirue joneuilla ra jai ite. Eo jitairede rana jai ite. Janore jitairede rana jiaí jai ite.

<sup>21</sup> Ie isoide. Jusiñamui dibeimo itinomona naga isoide comini ite; iadedi jeacinomona eneno bu ia, Jusiñamui naimiena fetoite, ie eo jitailla rafuena finollena. Jusiñamui dibeimo raise maijite.

<sup>22</sup> Ie jira conirueni comeciá jitailla marañede rafuemona eneno o i. Marena i, Jusiñamui jitailla isoi. Jesucristona ñnocana jai. Nana cominina isirui. Uri i. Mare comeciainona nana cai Namana sedadino diga iese i.

<sup>23</sup> Jamai ebena rafuemo iñeno. Naiemona icirillacinodi comuide. Iena uifñotio.

<sup>24</sup> Jusiñamui facaina llofueraimadi raire iciriñena. Nana cominina nabairilla. Marena fecuise llofuega. Riicaiñena.

<sup>25</sup> Naimie uaina jitañedinona fecuise llofuega. Ie mei Jusiñamui naimaci comeciá iuaina nibaí meidotaite, uanaicino dibeina uifñollena.

<sup>26</sup> Ie mei abi uifñuana, Taife anamona jilloitimaci. Taifedi naimacina ie anamo jai itatate.

## 3

### *Jusiñamui dibeimo iñedinomona abina rairui*

<sup>1</sup> Bie lluacinomo comecina raise faca. Jesucristo abido bille facaise iaírei ia, creyentena illena eo sefuirenite.

<sup>2</sup> Naie facaiseconi comini dani imaci abina isiruitimaci. Ucubena ollena eo ñicidoitimaci. Abina iedoitimaci. Abina biriitimaci. Jusiñamuina eo jeare ñaitimaci. Naimaci moo uaina, naimaci ei uaina ñnoñeitimaci. Jiaie cominimo iobillacinona jaca fecañeitimaci. Jusiñamuina jaca jitañeitimaci.

<sup>3</sup> Jiaie cominina duenañeitimaci. Comeciaina jaiarenitimaci. Jiaie comini joreñona eo jeare ñaitimaci. Naimaci comeciaina eenoñeitimaci. Ebe isoi naga rana duere finoitimaci. Mare rafuena jitañeitimaci.

<sup>4</sup> Naimaci nabaiñiaina janoñeitimaci. Jiaie cominimo comeciaina facañeitimaci. Eo abina iedoitimaci. Naimaci comeciá jitailla rafuena finoacanitimaci. Jusiñamui rafuena isiruiñeitimaci.

<sup>5</sup>“Jusiñamuina sedadicaí” raitimaci; iadedi Jusiñamui uaina jamaitimaci. Bie isoide comini diga nabairiñeno.

<sup>6</sup> Naimacimona dajerie jiaie jofuemo macaritimaci, naie jofuemo ite riñoniaina jifuijana llofluellena. Diga jearede rafuena finuano, naie riñoniai ebena itimaci. Naimaci comeciai iuailai raire meidocana uitimaci.

<sup>7</sup> Naga lloraíma lluomo naiñaiñuai cacareidimaci; iadedi uanaicinona jaca uiñoñedimaci.

<sup>8</sup> Naimaci comeciai eo maraiñede. Jusiñamui uaina iñoñedimaci. Jannes, Mambres diga, Moisés micori lloga uai jaie uaitatíaimaiaí. Ie isoi bie comini uanaicinona birui jiaí jitaíñedimaci.

<sup>9</sup> Nana comini naimaci rafue jamai ebe isoi finoca rafue uiñuamona, Jannes iaimaiaí Mambres rafue jaie fuilla isoi, naimaci rafue raire fuite.

#### *Timoteo uanaicinona iñuanona jailla*

<sup>10</sup> Timoteo, cuena uiñotio. Cue llofuiana uiñotio. Cue illana uiñotio. Cue jitailla rafuena uiñotio. Cristona cue iñuana uiñotio. Iciríñeno fecuise lloticue. Cominina isiruiticue. Duere cue sefua, cue comecina ocuiñoticue. Iena uiñotio.

<sup>11</sup> Antioquiámo, Iconiomo, Listramo cuena duere finodimaci. Duere sefuidicue; iadedi nana naiemona cue Nama cuena jillobitade.

<sup>12</sup> Jusiñamui jitailla rafuena finuano, Cristo Jesús uaido jaidinodi duere sefuitimaci.

<sup>13</sup> Ie facaiseconi maraiñedinodi maraiñede rafuena finocana jaitimaci. Jifueraini daje isoi jifuericana jaitimaci. Naimacidi abido naimacina jiaí jifueitimaci. Iese jaitimaci;

<sup>14</sup> iadedi cue llofua uaido iñocana odi jai. Cuemona jai fueotio. O usuñomona jai fueotio. O eimona jai fueotio. Ie jira uanaicinona jaie iñotio.

<sup>15</sup> O uruenamona Jusiñamuina mare cuegafuaína cacadio. Naie cuegafuaí cai jilluana caimo llote. Cristo Jesúsna cai iñuamona, jillobidicaí. Iena caimo jai llote.

<sup>16</sup> Comini nana naie cuegafuaína cuetimaci; iadedi Jusiñamui jitailla isoi, naga cuetimie cuete. Ie jira nana naie cuegafuaí Jusiñamuimona ite. Cominimona iñede. Ie jira naie cuegafuaímona uanaicinona uiñoticaí. Cai maraiñedinona caimo llote. Cai comeciai marena illena, Jusiñamui jitailla isoi, caimo llote.

<sup>17</sup> Iese llote, naimiemo cai duillamona, nana Jusiñamui rafuena cai raise uiñollena. Raise uiñuamona, Jusiñamui rafuena raise llofuerenticaí. Naga Jusiñamui jitailla rafuena jiaí raise finoreniticaí.

## 4

<sup>1</sup> Jaiiruido Cristo Jesúsdi illaímana eniñuemo abido biite. Illaíma isoi ie cominina sedajite. Naimiena iñoñenamona nia cajedinona duere finoite. Jai fioidaitinona jillotajanona, naimiena iñoñenamona, naimacina duere finoite. Jusiñamuidi birui caina jaca ciode. Cristo Jesús birui caina jaca ciode. Iena cue uiñuamona, bie uai omo lloiticue.

<sup>2</sup> Naimiena iñoñedinona Cristo duere finoñellena, naimie rafuena naimacimo jaca llono. Comini o dafaífa, comini ofia, comini o dine ria, naimacimo iena lloitiosa. Naimaci jitaia, llono. Jitaíñenia, jiaí llono. Jeacinona bu finoia, naimacimo llono. Marena naimaci illena, naimacimo llono. Fecuise jaca llofue.

<sup>3</sup> Jaiiruido dajerie uanaicinona jitaíñeitimaci. Jaiifuena jitaítimaci. Naimacimo dani naimaci cacacana rafuena llollena, diga llofuerainina jenoitimaci.

<sup>4</sup> Uanaicinona fainonocaida, iñgaíai icinuaído facajitimaci.

<sup>5</sup> Timoteo, o comecina eeno. Duere o sefua, rairuioicaíñeno i. Jesucristo rafuena llocana o jai. O llofuacinona marena fuído.

<sup>6</sup> Jai iairei ite cue meinellirui.

<sup>7</sup> Cai Nama rafuena llocana cue jaillano, iena marena jai riidoticue. Cue illa dinori jai fuiafade. Cai Namana fainonocaiñedicue.

<sup>8</sup> Cai Namamona marena cue illa jira, monamo íbana feiñoiticue. Iemo jai ocuridicue. Iena cai Nama cuejena eenote. Naimie abido billiruiemo iena feiñoiticue. Caina raise uiñuamona, dama cuemo fecañeite; iadedi nana naimie abido billena jitaídinomo íbana jiaí fecaite.

#### *Pablo damierena ñaia rafue*

<sup>9</sup> Timoteo, raire cue dine bi.

<sup>10</sup> Biniemo ite rafuena Demasdi eo ebiruilla jira, Tesalónicamo naimie jaillano, cuena fainonocaide. Galaciamo Crescentedi jai jaide. Dalmaciamo Tito jai jaide.

<sup>11</sup> Dama Lucas cue diga ite. Marcos o diga ati. Cuena canollena, naimiena jitaídicue.

<sup>12</sup> Efesomo Tíquicono oredicue.

<sup>13</sup> O bia, cue fiebide iniroina ati. Troasmo Carpio jofomo fiebide. Cue libros ati, cue rabiaí diga.

<sup>14</sup> Alejandro raillamie navui cuena jeare finode. Naimiedi lloemona rana finoraima. Cai Nama naimiemo iba oite.

<sup>15</sup> Naimiemona o abi rairui. Naimie cue llwana eo jitaiñede. Iena uaitate.

<sup>16</sup> Illaicomini dine cue rafue nano cue riidoia, jaca buna cue facaina riidoñede. Nana cuena fainonocaidimaci. Jusiñamuidi naimacimo iba uana jitaiñedicue.

<sup>17</sup> Cai Nama cue facaina ite. Cue comecina ocuiñotade, nana judiuañedonomo naimie uai raise cue llollena. Naimie muidona cue fiodaisailanomona jillobidicue.

<sup>18</sup> Cai Nama naga marañede rafuemona cuena eenoite, monamo ie cominina sedajanomo cue raise rillena. Iobillacino naimiemo jaca fecacabillasa. Iena jitaidicue.

*Fuiduacino*

<sup>19</sup> Diga cominimo cue uai oredicue: Priscamo, Aquilamo, Onesiforo jofomo itinomo.

<sup>20</sup> Corintomo Erasto fiebide. Miletomo Trófimo duide fainonocaidicue.

<sup>21</sup> Rollime nia iñenia, cue dine bi. Diga comini omo naimaci uai oredimaci: Eubulo, Pudente, Lino, Claudia, ua nana creyentia.

<sup>22</sup> Cai Nama o comeci ocuiñotajasa. Naimie nana omoina duenaillasa. Mai. Pablocicue.

## TITOMO PABLO ORETAGA RABE

### *Uaiduacino*

<sup>1</sup> Tito, omo cartana oretaiacadicue. ¿Nigacino? ¿Nie isoidio? Pablodicue. Naimie cominina cue illamona, naimie jitailla rafuena cue finuamona, Jusiñamui anamo llofuecabiticue. Ie rafuena llofuellena, Jesucristo ie oretagamiedicue. Jusiñamui fetocanona innotallena, naimacina uanaicinona uinotallena, Jusiñamuina naimaci raise sedallena, cuena oretate.

<sup>2</sup> Naimie diga jaca cai illemo cai ocuirilla jira, Jusiñamuina sedadicaí. Enirue nia iñena facaiseconi, Jusiñamuidi cai jaca illena jaie lloste. Naimie taino jaca lloñede.

<sup>3</sup> Iemei naimie jitaillarui caína ie rafuena jai uinotade. Naie rafuena cue llollena, naimie cuena oretate. Naimiedi cai Jilloitaraima.

<sup>4</sup> Tito, bie carta omo cueticue. Cue isoi o inua jira, cue jitona cue mamecao. Coco Moodi Jusiñamui. Coco Jilloitaraimadi Jesucristo. Iaimaiaí ona jai duenaitiaimaiaí. Iena uinocana mai o jai. Ona uri jai itatatiamaiaí. Iena uinocana mai o jai.

### *Creyentiaína sedaraini illacinuaí*

<sup>5</sup> Nainomo ite rafue o fuidollena, Creta railla uiasimo ona fañonocadicue. Creyentiaína sedallena, naga nairai illanomo llofuerainina o fetuana navui omo lloticue.

<sup>6</sup> Creyentiaína llofuerainina o fetoia, nagamie bie isoidimiena feto: Nana comini naimie mare raillamie. Dañaiñona airedimie. Nana naimie uruiaí creyentiaína itimie. Nana comini naimie uruiaí mare raillamie. Naimie uruiaí ie uaina innotimie.

<sup>7</sup> Jusiñamui facaina naimie maijia jira, creyentiaí sedaraimadi maremiena illa. Abina iedoñena. Raire iciriñena. Jifairuiñena. Fuiriruiñena. Ucubena nicidoñena.

<sup>8</sup> Ie jofomo cominina raise feiñua. Mare rafue icinona isiruilla. Ie comecina eenua. Marena illa. Jusiñamui jitailla rafuena finua. Ie abina eenua.

<sup>9</sup> Naie uai raise llofuiamona comini comeciaina ocuinotallena, naimie uaina uaitatinona llicaitallena, cai llofuiá isoi uanaicinona inocana naimie jailla.

<sup>10</sup> Ie isoidinona feto, ailluena comini Cristo rafuena raise inoñena jira. Tainocinuaina ñaicabitimaci. Cominina jifuecabitimaci. Judíuaí creyentiaímona diga comini iese itimaci.

<sup>11</sup> Ie jira naimacina llicaita. Naimacidi diga cominina uri itatañedimaci. Uanañedicinona llofuetimaci, ucube bifuiano ollena.

<sup>12</sup> Naimacimona comini rafuena lloaraima navui raite: “Cai Creta cominidi jaca tainona llouidimaci. Naimaci comeciadi jico comeci isoide. Jearedimaci. Guillardimaci. Rairaidimaci” raite.

<sup>13</sup> Naimiedi uanaicinona lloste. Ie jira creyentiaímo riire llono, naimaci Jusiñamui uaina raise inollena.

<sup>14</sup> Judíuaí igaiaina naimaci inoñellena, comini lletarafuena naimaci inoñellena, naimacimo riire llono. Damierie uanaicinona jitañedimaci.

<sup>15</sup> Ero, mareuidinomona naga ra mare. Jusiñamuina inoñedinomona naga ra jearede. Naimaci comeciadi jai jearena jira, jearerie comeciaina facacabidimaci.

<sup>16</sup> “Jusiñamuina uinoticaí” raitimaci; iadedi Jusiñamuina uinotnedimaci. Naimaci finoca rafuemonona iena uinoticaí. Jusiñamui naimacina eo gaiñede. Buena inoñedimaci. Ie jira mare rafuena finuana uinotnedimaci.

## 2

### *Creyentiaí marena illena, uanaicinona llofue*

<sup>1</sup> Tito, Jusiñamuina inoñedino isoi iñeno. Odi uanaicino llofue, naimaci marena raise illana uinollena.

<sup>2</sup> Uaicimaiaína llofue. Canamacina jiaí llofue: Jifaiñeno. Inogamiéna jai. Uairico isoi iñeno. Jusiñamui uaina raise ino. Omoi ecimo itinona isirui. Duere omoi sefuiá, omoi comeciaina ocuiño.

<sup>3</sup> Uaicinuaina llofue. Cañaiñuaina iese jiaí llofue: Marena omoi i, Jusiñamui jitailla isoi. Jiaie comini joreñuaina ñaiñeno. Jifaiñeno. Mare rafuedo omoi jaillamona, omoi anafeiñaiñuái mare rafuedo jaitimaci.

<sup>4</sup> Naiñaiñuái inina isiruillena, naiñaiñuái uruaina jiaí isiruillena,

<sup>5</sup> uairico isoi iñellena, jearede rafuena finoñellena, jofomo raise maijillena, cominina duenaillena, naiñaiñuái iniñiaí uaina inollena, jiaie comini Jusiñamui uaina jamaiñellena, naie cañaiñuáimona fueoitimaci.

<sup>6</sup> Einamacimo llono. Coniruenimo jiai llono: Ieñede ramo omoi comeciaina facañeno. Uairico isoi iñeno.

<sup>7</sup> Tito, naga rafue o finua ñese, mare rafuedo o jai. O llofuia, uanaicinona llono. Jamai ebe isoi llofueño.

<sup>8</sup> Marena llofue. Marena o llofuia, ¿ñese comini o uai uaitaitimaci? Uaitañeitimaci. Iemei o ñibeimo iñedino meidaitimaci, caimo jearede rafue iñenia. Ie jira cairi ñañeitimaci.

<sup>9</sup> Patrón anamo itinomo iese llono: Omoi patrón uaina ñino. Naimie jitailla rafuena raise fino. Naimie uaina oñeno.

<sup>10</sup> Rana fiñeno. Naimie raruiai raise seda. Iese naimaci ia, naimaci raise maijia, naimaci patrón: “Jusiñamui uai mare” raito. Jusiñamuidi cai Jilloitaraima.

<sup>11</sup> Jusiñamui caina duenaillana jai cai uifua jira, naicinona llofue. Naimiedi nana cominina jillotaicade.

<sup>12</sup> Naimie uai caimo llote: “Cue ñibeimo iñede rafuena eneno faionocai. Marañede rafuena jitañeno. Uairico isoi iñeno. Omoi ecimo itinomo, jiaie cominimo taino lloñeno. Naimaci rana fiñeno. Jusiñamui uaina ñnocana jai”. Iese cai illana Jusiñamui birui jitaide.

<sup>13</sup> Jiai caimo llote: “Jesucristo abido billemo caimare ocuiri. Naimiedi ebire biite. Ie uai ñño. Naimiedi cai Jusiñamui. Jiai cai Jilloitaraima”.

<sup>14</sup> Cairi naimiedi fiodaite, cai jearedicinomona cai jilloillena. Naimie cominina cai illena, mare rafuena iocire cai finollena, cai comeciaina marena dote.

<sup>15</sup> Naie rafuena llofue. Marañede rafue comini finoia, naimacimo llono. Illaima uai isoi llono. Cominidi o uaina jamañellena, raise llofue.

### 3

#### *Creyentia illacinuai*

<sup>1</sup> “Omoi illaicomini uai anamo i” creyentiaimo dane llono. Omoi illaicomini llucinona ñno. Mare maijille ia, iena raise fino.

<sup>2</sup> Jiaie cominina jeare ñañeno. Fuirifñeno. Fecuisse uiuciai. Nana comini diga marena ñaino.

<sup>3</sup> Jiaie cai jiai ebe isoidicai. Jusiñamuina ñnoñedicai. Taife caina jifue. Dani cai comeci jitaillacino railla isoi finoidicai. Diga ie jearede rafuena finoidicai. Jiaie cominina jeare finoidicai. Marairaidicai. Abina uradoisoidicai. Cominidi caina enoisoidimaci. Coninina jiai enoisoidicai.

<sup>4</sup> Ie ia Jusiñamuidi maremienana jai fididicai. Naimie caina isiruillana jiai fididicai.

<sup>5</sup> Ie mei Jusiñamui caina jillotate. Mare rafuena cai finoñedicai; iadedi caina duenaillamona, caina jillotate. Cai jeacinona oni dotajanona, cai comeciaina dote. Ie jira naimie ñibeimo cai comeciaina dobaiñoticai. Jusiñamui joreño cai comeciaina marena finode.

<sup>6</sup> Ie joreño caimo raise fecade, Jesucristo finua muidona. Jesucristo cai Jilloitaraima.

<sup>7</sup> Ie jira naimiemona marebicaidicai. Caina duenaillamona, marebicaidicai. Caina ie cominina itatate. Iemona naimie diga jaca illemo ocuiridicai.

<sup>8</sup> Tito, cue llucinodi uanaicino. Jusiñamuina ñnotino marena maijillena, cue llucinona llo-llocai. Cue llucinona mare. Ie jira nana cominidi iena cacacabillasa.

<sup>9</sup> Ebena ñañeno. Omoi usumatiai mameciaina jamai sia-siadoñeno. Moisés micori llogacinuaina uaitañeno. Naicino diga buena oñedicai, Jusiñamui jitaillacinona cai finollena.

<sup>10</sup> Roracomo comini comeci jiaifocaitatimie ia, naimiemo llono: “Iena finoño”. Dacaiño o llumona naimie ñnoñenia, dane llono. Ie mei ñnoñenia, naimie diga omoi ñañeno. Naimie diga omoi nabairifñeno.

<sup>11</sup> Uanaicinodo naimie jai jaiacañede. Jeacinona jai finode. Naimie iena jai uifote.

#### *Fuiduacino*

<sup>12</sup> Artemas o dine cue oretaia, Tíquico o dine cue oretaia, Nicópolis railla nairaimo are sedaño raire bi. Nainomo rollime facaiseconi cue comeci illana jitaide.

<sup>13</sup> Zenas railla abogado Apolos iaiaiaia diga cano, iaiaiaiaia oni jaiacana jira. Iaiaiaiaia jitaile rana feca.

<sup>14</sup> Dueredino ia, naimacina canollena, creyentiaimo: “Marena maiji” jiai llono. Naimaci jamai iñellena, iese llono.

<sup>15</sup> Cue diga itino naimaci uaina omo oredimaci. Jesucristona cai ñnua jira, caina isiruitinomo cue uaina llono. Jusiñamui nana omoina duenaillana uifocana omoi jaillana jitaicue. Mai. Pablodicue.



## FILEMÓMO PABLO ORETAGA RABE

### *Filemómo Pabloti carta orede*

<sup>1</sup> Filemón, bie carta o dine oredicue. ¿Ñie isoidio? Pabloticue. Jesucristo rafue cue lluamona, cárcelmo iticue. O dine cue uai oredicue. Timoteo cue diga ite. Ie uai jiai orede. Cai Moo Jusifiamuimo jai cai jainaiailla jira, naimiedi coco ama. Coco diga Cristo facaina o maijia jira, ona isiruiticoco.

<sup>2</sup> Coco uaina Apiamo jiai oredicoco. Cristo dibeimo naiñaiño illamona, naiñaiñodi coco miriño. Coco uaina Arquipomo jiai oredicoco. Naimiedi coco isoi Cristo rafuena llocana jaide. O jofomo rollena oficabidinomo coco uaina jiai oredicoco.

<sup>3</sup> Cai Moo Jusifiamui, cai Nama Jesucristo diga, omoina jai duenaite. Iena mai uiñocana omoi jai. Iaimaia omoina uri jai itatate. Iena omoi uiñocana mai omoi jai.

### *Filemón Cristona ñnocana jaide*

<sup>4</sup> Jusifiamui diga cue ñaia, o facaina cue jiaia, naimiemo iobillacinona fecadicue. Mare rafuena o finuana cue fidiã jira, naimiemo iobillacinona fecadicue.

<sup>5</sup> Cai Nama Jesúsna ñnocana o jaillana fididicue. Nana creyentiaina o isiruillana jiai fididicue.

<sup>6</sup> Cristo dibeimo cai illa muidona, naimiemonã diga marecinona feiñotica. Cristona o ñnuamona, jiaie creyentiaina o nabaia, omonã naie marecinona uiñoitimaci. Naga mare ra uiñocana naimaci jaillana jitaide.

<sup>7</sup> Cue ama, creyentiaina o isiruilla jira, iobidicue. O muidona creyentiaie comeciã caimare uri illa jira, cue comeci iocire ite.

### *Onésimo facaina Pablo ñaite*

<sup>8</sup> Cue comeci iocire ite; iadedi daje rafuena o diga ñaiacadicue. Cristo uai cuemo illamona ñaiñeiticue;

<sup>9</sup> iadedi conima coco isiruilla jira, o diga ñaiticue. Jai uaicimadicue. Jesucristo rafuena cue llua muidona, cárcelmonã jai ñaiticue.

<sup>10</sup> Onésimo facaina ñaiacadicue. Cárcelmo cue illa facaiseconi, cue muidona Cristona naimie ñnua jira, naimie cue jironã jaide.

<sup>11</sup> Omo naimiedi marañede rafue navui finode. O mullaïma naimie illanona, raise maijñede. Bene aïsiãmonã, Cristona naimie ñnote. Cuenã birui eo canode; iadedi birui o diga raise iacade.

<sup>12</sup> O dine naimiena abido oretaiticue. Dama naimiena oretañeiticue; iadedi naimiena cue eo isiruillamona cue comeciã jiai oretaiticue.

<sup>13</sup> O facaina naimie cuenã birui canode. Cue diga naimie fiebillana jitaide;

<sup>14</sup> iadedi: "Jee" o ñia raiñena jira, iese finoñeiticue. Iena omo jicañeiticue. Omo cue jicanuamona buena o finuana jitañedecue; iadedi dama o comeci jitailla jira, mare rafuena o finuana jitaide.

<sup>15-16</sup> O anamo naimie ñia ite; iadedi Cristona naimie jai ñnua jira, naimie o isiruiga amana feiño. Naimiena isiruiticue. O dine naimie jaca abido illena, o ñinena janorena facaise cue ñie navui bite. Naimiedi o mullaïma; ia naimiedi jiai birui o ama. Naimiena isiruillanona feiño.

<sup>17</sup> O nabaina iticuenã cuenã o feiñua isoi, naimiena feiño.

<sup>18</sup> Naimie marañede rafuena omo navui finode. Omo naimie ñia debia, cue facaina jone.

<sup>19</sup> Iena ñbaiticue. Bie carta dama cue cuiãmonã, naimie debiana cue ñbajana uiñotio. Omo eo lloñeiticue; iadedi cue muidona Cristona o ñnua jira, ailluena cuemo debedio.

<sup>20</sup> Cue ama, coco Nama Cristomo coco jainaiailla jira, cue jitailla rafuena fino. Ie mei cue comeci uri iite.

<sup>21</sup> Cue jitailla rafue o finollena uiñoticue. Cue jitailla rafue baifemo o finollena uiñoticue.

<sup>22</sup> Jiaie rafuena lloiacadicue. O jofomo daje cuarto cuejena fino. Cue facaina o jiaia, Jusifiamui jitaia, o dine jaiticue.

### *Damierie imaci uaina jiai orede*

<sup>23</sup> Omo Epafrañs ie uaina orede. Jesucristo rafue llua muidona, cárcelmo cue diga naimie ite.

<sup>24</sup> Marcos ie uaina orede. Aristarco ie uaina orede. Demas ie uaina orede. Lucas ie uaina orede. Cristo rafue naimaci lluanona, naimaci cue diga maijide.

<sup>25</sup> Cai Nama Jesucristo nana omoi creyentiaie comeciãna ocuiñotajamonã omoina duenailasa. Mai. Macaibaite. Pabloticue.

## HEBREOS COMINIMO ORETAGA RABE

*Jesucristo rafuena jai cai cacajamona, Jusiñamuiña jai uiñoticaí*

<sup>1</sup> Jusiñamuidi caina ie rafuena jai uiñotade. Iena omóimo ja lloiticue. Cai jaiagai micoriaimo Jusiñamuidi ie rafuena llote. Naimacimo ie rafuena llollena, jiaicaiño ie jaienisaina orede. Jiaicaiño nicai anado Jusiñamui ie rafuena llote. Iena llollena, jiaicaiño ie facaina lloraini micoriaina orede;

<sup>2</sup> iadedi eniruemo ie Jito billamona, Jusiñamui rafuena jai cai cacajamona, Jusiñamuina birui jai uiñoticaí. Ie Jito uaido, mona diga, eniruena jaie finode. Ie Jito uaido nana rana jaie finode. Na comini diga jiai finode. Jusiñamuidi nana ra, nana comini diga ie Jito anamo ico illena jai llote.

<sup>3</sup> Ie Jito uaido nana naie rana finocana uite. Naimie muidona Jusiñamui marena ebirenana uiñoticaí. Jusiñamui marena naimie illa isoi, naimiemona Jusiñamuina uiñoticaí. Eniruemo billanona, cai comecimo ite jeacino facaina naimie fiodaite. Monamo abido jaillanona, illaimana naimie illamona, Jusiñamui abimo naimie jaide. Naimieri Jusiñamui iobillamona, Jusiñamui abimo naimie jaide. Illaimana naimie dane illa jira, Jusiñamui abimo naimie jaide.

*Jusiñamui Jito Jusiñamui jaienisai baifemo faite*

<sup>4</sup> Jusiñamui Jitona naimie illamona, naimie illano Jusiñamui jaienisai illano baifemo faite. Ie illanomona naimie Jusiñamui jaienisai baifemo faiana uiñoticaí.

<sup>5</sup> Jusiñamuidi: “Cue Jitodio” Cristomo llote; iadedi ie jaienisaimo iese lloñede. Jiaicaiño llote: “Naimie Moodicue. Naimie cue Jito” llote. Ie jaienisai ie Jito baifemo fañena jira, ie jaienisaimo iena jaca lloñede.

<sup>6</sup> Ie dajede Jito eniruemo oretaja facaiseconi Jusiñamui llote:

Nana cue jaienisai naimiemo iobillacinona fecaja;

<sup>7</sup> iadedi jiaie rafuedo ie jaienisaina ñaite:

Cue ocuilla rafuena naimaci finollena, cue ocuilla diese naimacina oretacabitue.

<sup>8</sup> Ie Jitona ñaianona raite:

Cue isoi o illa jira, cominina o sedajafue jaca iite.

Eo marecinodo cominina jaca sedadio.

<sup>9</sup> Mare rafue finuana jitaideo.

Marañedicinona finuana jitañedio.

Ie jira ona caimare jai itataticue.

Monamo o abido billanona, cue jaienisai baifemo ona caimare itataticue raite.

<sup>10</sup> Jiaicaiño Jusiñamui ie Jitona raite:

Cue isoi o illa jira, o uai diga nanodofocni eniruena jaie finodio.

Mona jiai finodio.

<sup>11</sup> Bie eniruedi mona diga ico fuite.

Iniroi fuilla isoi, iñeite;

iadedi odi jaca iitio.

<sup>12</sup> Eniruena mona diga meidotaitio;

iadedi odi jaca daje isoitio.

Jaca iitio

raite.

<sup>13</sup> Ie Jitomo biena llote; ia ie jaienisaimona damiemo iese lloñede. Ie Jitomo llote:

Illaimana o illamona, cue nabei dine ana rai.

Nana o dibeimo iñedinona o anamo itataticue.

<sup>14</sup> Ie jaienisaimo iena lloñede; iadedi naimacina oretacabite, ie Jitona ñnotinona canollena.

Ie jira nana naiemona, ie Jito ie jaienisai baifemo faiana uiñoticaí.

## 2

*Jusiñamui caina jillotaja rafuena cai jamañena*

<sup>1</sup> Jusiñamui Jito siño jitonana jira, naimie birui lloga rafuena eo raise cai cacajasa. Naiemona abido cai jaiñellena, naiena cai feitañellena, naiena eo raise cai iinuasa.

<sup>2-3</sup> Ero, Jusiñamui ie jaienisaina jaie oretajanona, Moisés micorimo diga rafuena jaie llote. Naie lloga rafuena bu raise finoñenia, iena bu raise ñnoñenia, Jusiñamui naimiena eo duere finode. Jusiñamui jaienisai lloga rafue mare; iadedi Cristo birui lloga rafue jaienisai jaie lloga rafue baifemo faia jira, Cristo rafuena cai ñnoñenia, Jusiñamui caina duere finollemona

ua jilloñeiticai. Ero, naimie cai jeacinomona caina jillotaiacade. Naie rafuena cai jamaia, iena cai iñoñena, naimie caina duere finollemona ua jilloñeiticai. Cai Nama Cristo naie rafuena jaie llote. Naimiena cacadinodi caimo iena jai llotimaci. Cristo rafuedi uanaicinona llotimaci.

<sup>4</sup> Jusiñamui uai diga jiaiforiede siño rafuena naimaci finuamona, Cristo rafuedi uanaicinona uiñotica. Naimie jitailla diese naga creyentemo Jusiñamuidi ie uaina itatate. Naga creyente naimie dibeimo raise maijillena, ie uaina itatate. Naga creyentemo naie uai illamona, Cristo rafuedi uanaicinona uiñotica. Ie jira naie rafuena cai iñuasa.

*Cai isoi illena, Jesucristo iimana jaide*

<sup>5</sup> Jusiñamuidi ie jaienisaina oretauide, ie jitailla rafuena naimaci finollena; iadedi naimaci anamo comini ico illena jaca lloñede. Cristo anamo comini ico illena llote.

<sup>6</sup> Jusiñamuimo David micori iena jaie llote:

Cai jamai bue isoidicai; iadedi caimo comecina facadio.

Jamai cominidicai; iadedi caina canodio.

<sup>7</sup> Caina cominina o finua jira, o jaienisai isoi iñedicai.

Fiodaiñedimaci; iadedi nana enirue rana o finuanona, Adán micori anamo iena jaie o itataja jira, caina eo iobitadio.

<sup>8</sup> Nana rana naimie anamo o itatajana jaie llotio.

Iese llote; iadedi nana naie lloga rafue nia suiñede, jeacinona Adán micori jaie finua jira.

<sup>9</sup> Jesúsane dane lloiticue. Naimiena uiñotica. Eniruemo naimie jaie billamona, Jusiñamui ecimona naimie billa jira, Jusiñamui jaienisai illa isoi, dallu naimie iñede. Comena jaide. Cai facaina duere sefuillanona, naimie fiodaite. Caina Jusiñamui dueruillanona, nana cai facaina Jesús fiodaite. Naimie fiodailla jira, ie abimo naimiena Jusiñamui abido itatajamon, Jusiñamui naimiena iobitade.

<sup>10</sup> Jusiñamui nana rana finode. Nana cominina comuitate. Naimiena iobitallena, nana finode. Naimie jitailla jira, naimiemona marena jira, Jusiñamui ie Jitona orede. Cai facaina fiodaillena, ie Jitona orede. Cai jeacino facaina fiodaite. Ie Jito fiodaillamona, ailluena Jusiñamui cominina jaidicai. Naimie illanomo ico iitica. Naimie jitailla jira, ie Jito duere sefuillanona fiodaite. Duere sefuillana ie Jito jai uiñuamona, naimiena iñotnodicaina jai raise canorede.

<sup>11</sup> Naimie fiodaillamona marebicaidicai. Naimie dibeimo jai cai illa jira, daajena mooredicai. Ie jira naimiedi: “Cue cominidomoi” caina meiruiñeno llote.

<sup>12</sup> Jusiñamui facaina lloraini micoriai llogacinomona naie rafue uanaicinona uiñotica. Jesús ie ico finolle rafuena jaie llotimaci:

Ie cominimo ie Moo rafuena lloite.

Ie comini diga naimie ofia, daajena Jusiñamuimo roitimaci jaie llotimaci.

<sup>13</sup> Jesúsane dane ñaitimaci:

Ie comini diga naimiedi Jusiñamuina iñocana jaite.

Jusiñamui cominina damierie jailla jira, naimacidi jiai naimie comini ñaitimaci. Naimaci ñaia isoi, Jusiñamui cominina birui jaidicai.

<sup>14</sup> Jusiñamuina iñotnodi cominina jira, cai isoi naimie illena, Jesúsdi comena jaide. Cai fiodailla isoi, naimie jiai fiodaite. Taife uaina cai iñoia, jeacino finodica. Iemona fiodaicana jaidicai. Jeacino anamona caina Jesús jai jillotaja jira, Jusiñamuimona Taife uai jai saide. Jusiñamui dibeimo iñenanomona jai jillodica.

<sup>15</sup> Jesús nia fiodaiñena, nana cai illa dinori fiodaillana jaciruicana jaidicai. Jesús jai fiodailla jira, caina jaciruillacino anamona jillobitade.

<sup>16</sup> Jeacino anamo naimaci iñena jira, Jusiñamui jaienisaimo ie comecina facañede; iadedi Abraham micori isoi iñotnomo naimie comecina facade. Naimicina naimie jilloitallena, naimiedi comena jaide.

<sup>17</sup> Comena naimie illena, Jusiñamui naimiena orede. Cai isoi naimie duere sefuillena, naimiena orede. Cai isoi ramo naimie Taife faiamona, naimie fueollena, naimiena orede. Cai illana raise uiñote. Iemona caina dueruite. Jusiñamui jitaillacino finuana raise uiñote. Ie jira Jusiñamui diga cai facaina nanoca ñairaimana naimie raise jaide. Ie jira cai jeacinona oni dotajana Jusiñamuimo jicanote.

<sup>18</sup> Naimie duere sefuilla jira, naimie ramo Taife faia jira, cai ramo Taife faia isoi, naimie caina canorede. Taife uai naimie iñoñena jira, caina canorede. Taife uaina cai fimoñellena, cai comeциаina ocuiñotade.

### 3

*Jesús Moisés micori baifemo faite*

<sup>1</sup> Cue amatiai, jeacino anamo omoi jai iñena jira, ie dibeimo omoina Jesús jai fetua jira, naimie siño jitona jira, naimiemo omoi comeciaina faca. Naimiēna ja ñaiticue. Ie rafuena lllollena, Jusiñamui naimiēna orede. Naimie lloga rafuena jai cai ñnuamona, naimiedi Jusiñamui diga cai facaina nanoca ñairaima.

<sup>2</sup> Ie Moo cominina naimie raise sedajanona, naimiedi ie Moo uaina ñnuanona, iena finode. Nana Israel cominina naimie sedajanona, Moisés micori Jusiñamui uaina ñnuanona, iena finode.

<sup>3</sup> Jusiñamui mona Jesúsdi Moisés micori baifemo faite. Moisés micori mare; iadedi naimie caina jillotañede. Jesús caina jillotaja jira, Moisés micori baifemo Jesúsdi Jusiñamui iobide. Cai jillua jira, Jusiñamui cominina jaidicai.

<sup>4</sup> Buena cai finuamona, naimie cominina jaiñedica; iadedi naimie caina ie cominina dama itatarede.

<sup>5</sup> Naimie facaina maijiano, Jusiñamui llua isoi, Moisés micoridi nana hebreos cominina raise sedade. Ie cominimo Moisés micori Jusiñamui naimiemo lloga uaina raise llote. Naimiēmona Jusiñamui ico lllolle uaidi uanaicinona uiñotica.

<sup>6</sup> Jusiñamui facaina maijanona, Moisés micori ie cominina sedade; iadedi Cristodi Jusiñamui Jitona jira, naimie ie cominina sedade. Naimiēna cai ñnocana jaia, naimiemo caimare cai ocuiria, Jusiñamui ua cominidicai.

*Jusiñamui mona abido cai jaiñellena, bie rafuēmona cai fueua*

<sup>7</sup> Jusiñamui Joreño caimo birui lloia, iena cacarei. Ero, Jusiñamui jaie llua cuetatate:

<sup>8</sup> Omoi jaiagai isoi iñeno.

Jofue iñenanomo omoi jaiagai ia, cue uaina ñnoñedimaci.

<sup>9</sup> “Naimie uaina raise uiñotica;” raillanona, cuena facacibitimaci.

Cuarenta años cue siño finoca rana cioidimaci; iadedi jaca ñnoñedimaci.

<sup>10</sup> Naimacimo lloticue: “Omoi diga iciriticue.

Cue dibeimo omoi illamo omoi comeciaina facañedomoi.

Cue lloga uaido jaiacañedomoi”.

<sup>11</sup> Omoi diga cue icirilla jira, nainomo uri illena, omoimo cue lloga eniruemo jaca jaiñeitomoi.

<sup>12</sup> Cue amatiai, cai jaiagai rafuena cai uiñuamona, cai fueua. Uanai Jusiñamui mona abido omoi jaiñellena, naimie jai lloga rafuena omoi ñnocana jai. Omoimona bu raise ñnoiacañenia, naimiemo llono.

<sup>13</sup> Jusiñamui rafuena omoi raise ñnollena, nagarui conini omoi comeciaina ocuiñota. Omoimona jeacinona ebiruiñellemona, jeacino anamo omoi iñellesa, birui Jusiñamui rafuena raise ñno. Jeacino anamo omoi dane jaia, Jusiñamui rafuena ñnoñeitomoi. Iemona naimie riicaillafue anamo dane iitomoi.

<sup>14</sup> Cristomo cai duilla jira, naimie caina jaca canuanona, cai comeciaina marena caimare jaca itataite. Nana cai ille dinori naimiēna cai nano ñnuua isoi, cai ñnocana jaia, marena caimare iitica.

<sup>15</sup> Ie jira naimiēna ñno. Bie jaie cuega:

Jusiñamui lloga uaina birui cacarei.

Jofue iñenanomo cai jaiagai ia, Jusiñamui uaina ñnoñedimaci

cuega. Naimaci isoi iñeno.

<sup>16</sup> Egiptomona Moisés micori anado jaidimaci. Diga icaiño Jusiñamui uaina cacadimaci; iadedi iena raise ñnoñedimaci.

<sup>17-18</sup> Cuarenta años jofue iñenanomo itimaci; iadedi naimiēna naimaci ñnoñena jira, Jusiñamui naimaci diga icirite. Naimiēna ñnoñena jira, naimacimo Jusiñamui llote: “Omoimo cue lloga eniruemo jaca jaiñeitomoi” llote. Ie jira jofue iñenanomo naimacimo Jusiñamui jai lloga eniruemo jaiñeno fioiditimaci.

<sup>19</sup> Jusiñamui uaina naimaci ñnoñena jira, naie Canaán railla eniruemo jaca jaiñedimaci. Naimaci comeciari jaca uri illana uiñoñedimaci.

## 4

<sup>1</sup> Jusiñamui dibeimo raise cai illamona, Jusiñamui cai comeciari birui uri illana jitaide. Naimie lloga uai nia sañede. Caimona damerie iese iñellesa, cai jaiagai isoi cai iñellena, abina rairuicana mai cai jailla.

<sup>2</sup> Jusiñamuidi comini comeciari uri illana jitaide. Cai jaiagaimo iena llote. Diga icaiño naie mare rafuena cacadimaci; iadedi iena naimaci ñnoñena jira, iemona buena oñedimaci.

<sup>3</sup> Jusiñamuidi cai comeciari uri illana birui caimo jai llote. Cristo ie mare rafuena jai cacadica. Naimie uaina cai ñnuua jira, cai comeciari jai uri ite. Cai jaiagai comeciari uri iñede. Moisés micori cuiamona iena uiñotica. Cuega:

Naimaci diga Jusiñamui icirilla jira, naimacimo lloga eniruemo jaiñfedimaci

Comeciai uri illana jaca uiñoñedimaci  
cuega. Jusiñamuidi nana comini comeciai uri illana jitaide. Eniruena naimie finocamo,

comini comeciai uri illana jitaide.

<sup>4-9</sup> Iena Moisés micori jaie cuega:

Seis digarui raifi illanona, Jusiñamui nana rana finode.

Naimiemona nana naimie finoca ra mare.

Naimie comeci caimare uri illamona, siete iruimo jafaici ote

cuega. Jusiñamuidi nana comini comeciai uri illana nia jitaide. Moisés micori facaise cai jaiagai comeciai uri illana jitaide; iadedi naimiena naimaci iñoñena jira, naimaci comeciai jaca uri iñede. Moisés micori fiodailla mei, bie eniruemo Josué micori cai jaiagaina ifode; iadedi naimaci rilla mei, Jusiñamuina naimaci iñoñena jira, naimaci comeciai jaca uri iñede.

Josué micori illa facaisemona diga años illanona, David micori comeciai uri illana jiai llote: Naimie uaina birui omoi cacaia, iena iño

llote. Naiemona Jusiñamui cai comeciai uri illana jitaillana uiñoticaí. Naimiena iñnotinodicaímo naie rafue jai duide.

<sup>10</sup> Jusiñamuina cai iñnuamona, cai comeciai jai uri ite. Cai comeciai uri illena, jiaie rafuedo jaiñedicaí. Naimiena cai iñnuamona, naimie illanomo ico iiticaí. Nana naimie finoca rafuena naimie fuidua mei, nainomo uri iiticaí.

<sup>11</sup> Cai jaiagai iñoñedimaci. Cai faifiñellena, naimaci isoi cai jaiñena; iadedi Jusiñamui uaina iñnocana mai cai jailli. Jusiñamuina cai iñnuamona, naimiedi cai comeciai uri itatate.

<sup>12</sup> Naimiena cai iñoñenia, naimie iena uiñote. Naimie jaca ite. Naimie siño. Ie jira naimie lloga uai jaca sañede. Jaca siño. Cai comeciaino riire baite. Eo jairedede lloebi bue isoide jaitaia, iena oni econuanona, nana nainomo fo ite rana bairetate. Ie isoide Jusiñamui lloga uai. Nana cai comeciaino iticinona riire bairetate. Nana cai comeciaina facajacinuaina riire bairetate.

<sup>13</sup> Jusiñamuimona buna reirinde. Jusiñamui nana caina ciode. Nana cai finoca rafuena uiñote. Nana cai comeciaino iticinona uiñote. Ie jira naimie uaina iñnocana mai cai jailli

*Jesúdi cai facaina Jusiñamui diga nanoca ñairaima*

<sup>14</sup> Jesúdi naie uaina cai iñnuamo canoite, naimiedi cai facaina Jusiñamui diga nanoca ñairaimana jira. Ie Jito illamona, monamo Jusiñamui abimo birui naimie illamona, cai facaina Jusiñamui diga naimie ñaicabite. Ie jira naimiena iñnocana jaiticaí.

<sup>15</sup> Taife cai ramo faia, cai comeciaino raise cai ocuiñoñenia, Jesús caina canorede. Cai ramo faia isoi, Taife naimie naga isoide ramo faite; iadedi Taife uaina naimie iñoñede. Iemona Taife ramo faiaicóna iñoñenana naimie uiñua jira, jeacinona oñede. Caina canorede. “Naimacina cano” ie Moomo llocabite.

<sup>16</sup> Cai facaina ie Moo abimo naimie illa jira, cai comeciaina naimie ocuiñotaicana jira, Jusiñamuina jaciruiñeno naimiemo cai jia. Naimie caina duenailamona, cai jeacinona feitaite. Cai comeciaina jiai ocuiñotaite.

## 5

<sup>1</sup> Naga Jusiñamui diga ñairaima comini facaina ñaia jira, caina naimie jai feiñua jira, Jusiñamui diga jaciruiñeno jai ñaiticaí. Moisés micorimo Jusiñamui jaie llua isoi, Aarón micorina Jusiñamui fetuanona, jeacino facaina comini Jusiñamuimo faga toiniaina fecauidimaci. Cominina Jusiñamui feiñollena, imaci ñairaima Jusiñamui diga ñaite.

<sup>2</sup> Nana comini isoi naimiedi jeacino finuamona, comini facaina Jusiñamui diga ñairaima ñaiana raise uiñote. Jusiñamui dibeimo raise jaiñedinona fecuise canorede.

<sup>3</sup> Comini facaina toiniaina fecauide; iadedi naimiemo jeacino illa jira, naimie facaina toiniaina jiai fecauide.

<sup>4</sup> Naimie jitaila jira, Jusiñamui diga ñairaimana buna jaiñede; iadedi naimiena Jusiñamui fetua jira, iena jaide. Jusiñamui Aarón micorina fetuana uiñoticaí.

<sup>5</sup> Cristo jitaila jira, cai facaina Jusiñamui diga ñairaimana naimie jaiñede; iadedi naimiena Jusiñamui fetua jira, cai facaina ñairaimana jaide. Ie Jitona naimie illamona, Jusiñamui naimiena fetode. David micori jaie cuegafuaimona iena uiñoticaí. David micori Jusiñamui lluanu jaie cuega:

Cue Jitodio. Jai o Moodicue

cuega.

<sup>6</sup> Ie Jitona jiaicaiño Jusiñamui ñaite:

Melquisedec micori isoi ona comini facaina cue diga ñairaimana jaca itataticue.

<sup>7</sup> Eniruemo Cristo ia, imana naimie jailla jira, duere sefuide. Naimie fiodaicana iairei ia, Jusiñamuimo eo juide. Naimie fiodaifena Jusiñamui jillotarede; iadedi Jusiñamuimo ado

llote: “Cuena llegi cacaitañeno; iadedi cue comeci jitailla isoi finoñeno. O comeci jitailla isoi fino” llote. Jusiñamui uaina naimie raise ñnua jira, Jusiñamui naimie jiana cacajano fairiote.

<sup>8</sup> Naimiedi Jusiñamui Jito; iadedi Jusiñamui naimiena llegi cacatate. Iemona Jusiñamuina ñnocana jaca jaillana naimie uiñote.

<sup>9</sup> Naimiena ie Moo oretajanona, ie jitailla rafuena naimie raise marena fuidua jira, Jusiñamui ecimo naimaci jaca illena, nana naimiena ñnotinona jillotaite.

<sup>10</sup> Melquisedec micori isoi comini facaina ñairaimana jaca illena, Jusiñamuidi naimiena fetode. Melquisedec micori uai jaca saiñena jira, naimie ifomo illena, jiaimiena jaca fetoñede. Ie isoi Jesús uai jaca saiñede.

*Cristo dibeimona abido danomo jaiñeno*

<sup>11</sup> Bie isoide rafuena omoimo lloiacadicue. Bie rafue ñirede; iadedi Cristo rafuena omoi raise cacaiñena jira, omoi comeciai iena raise jitañena jira, omoimo iena raise llonidicue.

<sup>12</sup> Cristo rafuena are omoi cacaja jira, iedo omoi raise jaidomoidena, llofuerainana jaidomoi; iadedi iedo nia raise omoi jaiñena jira, jiaimie omoina llofuiana nia jitaidomoi. Cristo dibeimo omoina itatate rafuena nia jitaidomoi. Cristona nano omoi cacaja rafuena nia jitaidomoi. Cristo rafuena ñnocana nia raise jaiñedomoi. Eo janorede janosa monoi ijina jitaicabide. Einamací isoi guillena nia jitañede. Janosa isoidomoi. Creyentena bu como jaia, Cristo rafuedo nia eo jaiñede. Iena eo uiñofede. Monoi ijina jitaide isoide. Janosa monoi iji jirua mei, jiaie guille guillamona moonaita. Cristo rafuena are cacadomoi; iadedi janosa isoi nia itomoi. Nia moonaiñedomoi isoidomoi.

<sup>13</sup> Janosa monoi ijina nia jitailla jira, naimie nia moonaiñenana uiñoticaí. Naimie nia abina uiñofede. Jusiñamui jitailla isoi marecinona finuana nia uiñofede.

<sup>14</sup> Guilledí moonaitimie ie. Ie isoide. Cristo rafuedo raise jaidimiedi Cristo rafuena uiñocana jaide. Iemona marecinona finollena, llofuiana uiñote. Maraiñedicinona finoñellena, llofuiana jiaí uiñote.

## 6

<sup>1</sup> Diga icaíño bie rafuena jai cacadomoi. Cristona nano cai cacaja rafuena raise cai ñnuamona, jiaie Cristo rafuena raise uiñocana mai cai jailla. Cai nano cacaja rafuena cai fueociacana siadocabiñelli. Cristo dibeimo caina itatañede rafuedo navui jaidicai; iadedi cai comeciai iuai birui jai meidoticaí. Cristo dibeimo itatate rafuedo birui jaidicai. Jusiñamuina ñnuamona, naimie dibeimo jaidicai.

<sup>2</sup> Cristo dibeimo bautizajana jai uiñoticaí. Llofueraimana jaillena fetuana jai uiñoticaí. Creyentiaína naimaci sedallena, naimacimo cai onolli jonianona, Jusiñamuimo cai jianona, naimaci fetuana jai uiñoticaí. Nana creyentiaí fiodaillamona jilluana jai ñnoticaí. Jusiñamuidi naimiena ñnoñedinona íco jaca duere finollena jai ñnoticaí.

<sup>3</sup> Naie isoide rafue mare; iadedi iena cai raise ñnuamona, Jusiñamui jitailla jira, naimie caina canuamona, jiaie Cristo rafuena fueocana mai cai jailli.

<sup>4</sup> Uanaicinona omoi comeciai uiñuamona, Cristona omoi ñnuamona, Jusiñamui Joreño omoimo illamona,

<sup>5</sup> Jusiñamui uaina mare omoi uiñuamona, Cristo uai siñonana omoi uiñuamona, abido danomo omoi jaiñellena, abina rairuicana omoi jai.

<sup>6</sup> Cristo dibeimona omoimona bu sofetena, jiaimie naimiena jillotanide. Jeacinona finocana naimie jaia, Jusiñamui ie jeacino oni dotañeite. Cristona naimie jitañena jira, Cristo fiodaillana jai jitañede. Cristona jeare jai finode. Cristo finoca rafuena jamaide. Cristona naimie jitañenia, ¿ñiese naimie jillobite? Jillobiñeite. Ie jira abido danomo omoi jaiñellena, abí rairuicana omoi jai.

<sup>7</sup> Ero, iena jiaie rafuedo lloiticue. Jusiñamui noci deitacabilla jira, enirue naimie riaticabilla jira, iemo riará sicuanona, iena ie nama raitia, naiemona ie llisillana naimie uamona, Jusiñamui iobide;

<sup>8</sup> Iadedi naie eniruemona riará sicoñenia, maraiñede. Monaigi cuiraio diga naiemona dama sicoia, maraiñede. Jusiñamui nainomo noci deitate; iadedi naiemona llisillana onide. Naie enirue caimanide. Maraiñede. Ie nama iobiñena jira, iena fañonocaide. Naie enirue isoidomoi. Jusiñamuimona mare rafuena cacadomoi. Iena ñnocana omoi jaia, naimie omoina iobitaite. Iena omoi jitañenia, naimiemona duere sefuitomoi.

*Jusiñamui llua jira, cai comeciai ocuiñocana jaidicai*

<sup>9</sup> Cue isiruiçomoi, abí rairuillicinona omoimo lloticaí; iadedi cai llofuicino omoimo duiñenamo cai comeciaina facañedicai. Cristona ñnocana omoi jaillamo cai comecina facadicai.

<sup>10</sup> Jusiñamui omoına raise uifñote. Naimiena omoi isiruillamona, jiaie creyentiaina omoi isiruillamona, naimacina navui canodomoí. Naimacina nia canodomoí. Ie jira naimiemona duere sefuiñeitomoí.

<sup>11</sup> Omoi comeciainona jiaie creyentiaina omoi canua isoi, Cristo rafuedo nana omoi ille dinori ñnocana omoi iocire jaillana jitaídicaí. Naimie diga ico jaca omoi ille jira, iese omoi jaillana jitaídicaí.

<sup>12</sup> Cristo rafuedo omoi jaillamona omoi sefuiruiñenana jitaíñedicaí. Jusiñamui lloga uaina ñnocana jaidino isoi, omoi jaillana jitaídicaí. Naimiena naimaci ñnuamona, naimie lloga uai fecuise naimaci ocurillanona, naimie lloga uaina oitimaci. Naimaci isoi omoi jaiá, naimie lloga uaina jiaí oitomoí.

<sup>13</sup> Ero, Jusiñamuidi Abraham micorimo lloga uaina uifñotomoí. Naimiedi Jusiñamuina jira, uanaicinona llote. Tainona lloñede.

<sup>14</sup> Abraham micorimo llote: “Ona jaca canoíticue. O diga jaca iitícue. Cue llua jira, o jito comuie. O uruina eojebuitaiticue” llote.

<sup>15</sup> Abraham micorí naimie lloga uaina ñnote. Iena suillemo fecuise ocuride. Ie jito Isaac micorí, Jusiñamui llua isoi, comuie.

<sup>16</sup> Uanaicino cai locabillana jiaie comini uifñollena, Jusiñamui mamecina lliñoticaí. “Jusiñamui caina ciode” lloticaí. “Uanaicinona cai lloñenia, Jusiñamui caina duere finoite” lloticaí. Ie jira cai lloga uaina buna uaitañede.

<sup>17</sup> Ie isoide. Jusiñamuidi ie finolle rafuena caimo jai llote. Naimie lloga uai meidonillana cai uifñuana naimie jitaide.

<sup>18</sup> Naimiedi Jusiñamuina jira, ie uai naimie jai llua jira, naimie tainona llonillana uifñoticaí. Ie jira naimie lloga uai naimie finuana uifñoticaí. Naimiena cai ñnuamona, naimie anamo cai illa jira, caina naimie eenua jira, cai comeciái ocuifñocana jaidicaí. Naimie illanomo ico cai jaca illemo ocuridicaí.

<sup>19</sup> Naie rafuena Jusiñamui llua jira, cai comeciái ocuifñocana jaidicaí. Ie lloga uaina naimie finollemo ñnoticaí. Monamo Jusiñamui illanomo ico cai illena eo raise uifñoticaí. Nainomo fiebillena, barco ie lloelluna illemo dotaja isoi, cai comeciái naganomo iñellena, Jesús caina eenote.

<sup>20</sup> Jesús nainomo jai illa jira, naimie muidona nainomo jiaí iiticaí. Cai facaina nainomo ie Moo diga ñaicabite. Cai facaina nanoca ñairaimana jaca ite. Melquisedec micorí ñaia uai saíñena isoi, Jesús cai facaina ñaia uai jaca saíñeite.

## 7

### *Melquisedec micorí illa isoi, Jusiñamui diga ñairaimana Jesús jaide*

<sup>1</sup> Iena omoi raise uibifñollena, Melquisedec micorí rafuena omoimo lloíticue. Naimie micorídi Salem railla nairai ie illaíma. Naimiedi comini facaina cai Moo Jusiñamui diga ñairaima. Cinco illaímana Abraham micorí anafetaja mei, ie jofomo Abraham micorí abido billano, nainomo naimie dine Melquisedec micorí bite. Abraham micorímo marecinona Melquisedec llote: “Birui Jusiñamui ona canode. Naimie ona jaca canollena uifñotícue” llote.

<sup>2</sup> Jusiñamui diga ñairaimana Melquisedec illa jira, naimiemo Abraham micorí dajerie rana fecade. Naie cinco illaímana anafetajanona, naimaci rana bairuanona, nana naie ramona, raiá uaimona ie décima facaina rana Melquisedecmo fecade. Melquisedec micorídi Salem railla nairai illaíma. Melquisedec mameci oni dobaíñuamona, “Cominina raise marena sedadimie” railla. Ie cominina raise sedajamona, ie comini uri illa jira, comini illano Salem railla mamecina jonega.

<sup>3</sup> Naimie moona, naimie eina, naimie cominina uifñofñedicaí. Naimie jeiciaruina uifñofñedicaí. Naimie fodaillaruina uifñofñedicaí; iadedi Jusiñamui Jito isoi Jusiñamuimona naimie feiñoga uai saíñena jira, comini facaina Jusiñamui diga ñairaimana jaca jaide. Naimie ifomo jiaimie iñena jira, naimie ñairaimana nia ite isoide.

<sup>4</sup> Ero, cai cominimona Abraham micorí cai jaigai baifemo faite; iadedi Melquisedec micorí Abraham micorí baifemo faite. Ie jira naimiemo ie décima facaina rana fecade.

<sup>5</sup> Moisés micorimona Abraham micorí uruiai Jusiñamui lloga uaina cacadimaci. Naimacimo Jusiñamui ie sedaja jofo finuana llote. Nainomo maijidinomo nainomo maijiana llote. Abraham micorí uruaimona Leví railla nairaina fetode. Nainomo maijidino comini facaina Jusiñamui diga ñaíuidimaci. Jusiñamui ocuica rafue naimaci maijia jira, naimaci comini ramona décima facaina rana feiñouidimaci.

<sup>6</sup> Melquisedec micorímo Abraham micorídi ie rana fecade; iadedi Melquisedec micorí Abraham micorí cominiñede. Leví railla nairai imieñede. Naisomo Abraham micorí dine

Melquisedec micorì billanona, Abraham micorìmo marecinona llote: “Jusiñamui ona jaca canoite. O diga jaca iite” llote.

<sup>7</sup> Melquisedec micorì Abraham micorì baifemo faia jira, naie marecinona naimiemo llote.

<sup>8</sup> Ero, Melquisedec micorìmo Abraham micorì rana fecade; iadedi Melquisedec micorì fiodaillaruina uifnoñedicaì. Naimie uai saiñena jira, jiaimie naimie ifomo jaca iñede. Comini facaina Jusiñamui diga ñairainimo naimaci ramona décima facaina cai judiúi cominidi fecauidimaci; ia naie ñairaini fiodaicana jaillana uifnoticaì. Naimaci uai sailla jira, jaino naimaci ifomo meiduidimaci.

<sup>9-10</sup> Leví micorìdi Abraham jito. Leví micorìmona Leví railla nairai comuide. Naimacidi Jusiñamui diga ñairainina jaidimaci. Cominimona décima facaina rana feiñouidimaci. Leví micorì nia comuiñenia, Melquisedec micorìmo Abraham micorì décima facaina rana fecajamona, Abraham micorì Leví ie usumana jira, Melquisedec micorìdi Leví nairai baifemo faiana uifnoticaì. Melquisedec micorìdi Jusiñamui diga ñairaini baifemo faiana uifnoticaì. Melquisedec isoi Cristo illa jira, Cristodi Leví baifemo faiana uifnoticaì. Cristodi nana naie ñairaini baifemo faiana jiai uifnoticaì.

<sup>11</sup> Jusiñamui diga ñairaini finouilla rafuedo Jusiñamui jitailla isoi marebicaiñedicaì. Naimaci finouilla rafuedo cai jillobidicaidena, jiaie rafuena jitañedicaì. Naie rafuedo cai jillobiñena jira, Jusiñamuidi Cristona orede. Cai facaina Cristo ñairaimana jaillena, naimiema orede. Caina jillobitallena, naimiema orede, jiaie rafuedo cai jillobiñena jira. Jusiñamui Moisés micorìmo jiaie llua isoi, comini facaina nano ñairaimadi Aarón micorì. Naimiedi Leví railla nairai imie. Naimie jitonaiamona comini facaina ñairainina itimaci. Iena uifnotomoi. Aarón jitonaiamona Cristo iñede. Aarón maijia rafuemo Cristo duiñede; iadedi Melquisedec rafuemo duide.

<sup>12</sup> Comini facaina ñairainina jaillana jai meidua jira, Jusiñamuidi naimaci rafuena jiai meidote.

<sup>13</sup> Iena lloiticue. Aaróndi Leví railla nairaimo duide. Dani Leví nairaidi comini facaina ñairainidimaci. Dani naimacidi comini facaina Jusiñamuimo rana fecauidimaci. Cristo naie nairaimo duiñede.

<sup>14</sup> Cristo jiaie nairaimo duide. Judá nairaimo duide. Judá nairaimona Jusiñamui Jito comuillana uifnoticaì. Naie nairaimona comini facaina ñairaimana bu jaillana Moisés micorì jiaie jaca lloñede.

<sup>15</sup> Cristo billa jira, Moisés micorì lloga rafue meiduana uifnoticaì. Melquisedec micorì illa isoi, comini facaina ñairaimana Cristo jaca iite.

<sup>16</sup> Moisés micorì lloga rafue isoi, Cristodi ñairaimana jaiñede; iadedi Jusiñamui uaido ñairaimana naimie jaide.

<sup>17</sup> Jusiñamui lloga uaimona iena uifnoticaì. David micorì naimiema jiaie cuega: Melquisedec micorì illa isoi, odi comini facaina ñairaimana jaca iitio cuega.

<sup>18</sup> Comini facaina ñairaimana jaillena Moisés micorì jiaie cuega. Naiemona jilluana comini oñena jira, naie uai jai saide. Naiedo jaillamona, naimaci jeacinomona jilloñedimaci. Naiedo jaillamona, naimaci comeciaina ocuiñotañedimaci. Naiedo jaillamona, naimaci Jusiñamuina nabaiñedimaci.

<sup>19</sup> Naiedo jaillamona, Jusiñamui jitailla isoi marebicaiñedicaì. Iedo birui jaiñedicaì. Jiaie rafuemo birui ocuiridicaì. Cristo finoca rafue muidona, Jusiñamuina cai nabaiillamona, Jusiñamui diga birui ñairedicaì.

<sup>20</sup> Jusiñamui llua jira, Cristo cai facaina ñairaimana jaide.

<sup>21</sup> Leví micorì jitonaiadi imaci jeiciamona, comini facaina ñairainina jaidimaci. Naga icaiño Jusiñamuidi naimacina ñairainina jaillana fetoñede; iadedi ie lloga uaina jira, Cristo cai facaina ñairaimana jaide. David micorì Jusiñamui llua jiaie cuega:

Cue jai llua jira, cue llua fina iticue.

Cristomo lloticue: “Comini facaina ñairaimana jaca iitio”

cuega.

<sup>22</sup> Jesús ñairaimana jaca illa jira, naimie jailla rafue Moisés micorì lloga rafue baifemo uaide.

<sup>23</sup> Moisés micorì lloga rafue anamo ailluena ñairainidi itimaci. Naimaci fiodaicana jailla jira, ailluena ñairaini jitaide, fiodaicino ifomo meidollena.

<sup>24</sup> Naimie jaca illa jira, Cristo ñairaimana jaca iite. Naimie ifomo jaca buna meidoñeite.

<sup>25</sup> Naimie jaca illa jira, comini facaina Jusiñamui diga jaca ñaicabite. Ie jira Cristodi nana Jusiñamui dibeimo iacadinona, naimaci jeacinomona, ua jaca jillotarede.

<sup>26</sup> Caina canollena, naimie isoide nanoca ñairaimana jitaidicaì. Ie Moo isoi naimiedi mareuidimie. Naimiemo jeacino jaca iñede. Jeacino finouidino dibeimo naimie iñede. Jusiñamuidi ie ecimo naimiema itatate. Ie jira naimie caina canorede.



<sup>27</sup> Jusiñamui mo fecallena, naimaci jeacino facaina naimie iba oñellena, Moisés micori llua isoi, nanoca ñairainidi nagarui toiniaina fatimaci. Dani naimaci jeacino facaina nagarui iese finodimaci. Iemei comini facaina nagarui iese jiaí finodimaci. Cristo naimaci isoíñede. Naimie jitailla jira, comini jeacino facaina naimie fiodailla jira, comini facaina daciaño fiodaite. Naimaci jeacino facaina naimie dane fiodaíñeite.

<sup>28</sup> Moisés micori facai ñairainidi jeacina finocana jaidimaci. Fiodaicana jiaí jaidimaci; iadedi jiaie rafue birui illa jira, ie uaido Jusiñamuidi ie Jitona ñairaimana jaillana jai fetode. Naimiedi jaca mareuidimie. Jeacino jaca fiñoñede.

## 8

*Cristo muidona jiaie rafue birui ite*

<sup>1</sup> Cristomo ite rafuena lloiticue. Cai facaina ñairaimana birui naimie ite. Illaimana naimie illa jira, monamo Jusiñamui ecimo ite.

<sup>2</sup> Jusiñamui illanomo naimie illanona, nainomo cai facaina birui ñaicabite. Moisés micori facaise comini finoca jofomo Jusiñamui diga ñaiuidimaci; ia birui Jusiñamui finoca illanomo Cristo illamona, cai facaina ñaicabite.

<sup>3</sup> Moisés micori naga ñairaima jeacino facaina Jusiñamui faga toiniaina fecauillena llote. Cristodi comini jeacino facaina toiniaina fecañede; iadedi naimie jitailla jira, cai jeacino facaina naimie dama fiodaite.

<sup>4</sup> Moisés micori jiaie llua isoi, benomo ite ñairaini faga toiniaina fecauilla jira, eniruemmo Cristo nia ia, ñairaimana naimie jainide.

<sup>5</sup> Comini facaina Jusiñamui diga ñaillena, Moisés micori facaise naie ñairaini Jusiñamui jofomo jaisoidimaci. Iemona Cristo monamo finocabilla rafuena uiñoticaí. Monamo cai facaina Jusiñamui diga Cristo birui ñaicabite. Iemo naimie comecina facajanona, Jusiñamui jofona Moisés micori jiaie niacania, Jusiñamui naimiena llofuet: “Monamo iticue; ia cue jofu eniruemmo jiaí finoitomoí. Sinaí railla anedu navui o ia, ona llofueticue. Ona cue llofuia isoi, cue jofona fino” llofuetu.

<sup>6</sup> Eniruemmo Cristo birui iñenamona, monamo cai facaina Jusiñamui diga birui ñaicabite. Cristomona cai cacaja rafuedi Moisés micori facaise ñairainimona cai cacaja rafue baífemo faia jira, Cristodi Moisés micori facaise ñairaini baífemo faite. Cristomona cai cacaja rafuedi cai comeciai marena itatate. Ie jira, bie rafue jiaie rafue baífemo faite.

<sup>7</sup> Moisés micori facaina rafuedo jaillamona, Jusiñamui jitailla isoi buna marebicaiñede. Ie jira Jusiñamui jiaie rafue illena llote.

<sup>8</sup> Moisés micori lloga uaina cai jaiagai iñoñena jira, Jusiñamui jai llote:

Naie cominimo jiaie rafuena ico jiairuido lloiticue.

<sup>9</sup> Naimaci jaiagaimo cue lloga rafuena jiaie lloticue.

Naie facaiseconi Egiptomona naimacina canuanona, naimacina atidicue;

iadedi Moisés micorimo cue lloga rafuedo jaiñedimaci.

Ie jira naimacina fainonocaidicue.

<sup>10</sup> Naimacimo jiaie rafuena ico jiairuido lloiticue.

Iena naimaci uiñuamona, cuena raise iñoitimaci.

Naimaci Jusiñamuidicuenta jira, naimaci cuena sedaitimaci.

Cue anamo raise naimaci illa jira, cue comininitimaci.

<sup>11</sup> Nana naimaci cuena uiñoitimaci.

Ie jira naimacimo: “Cai Namana omoi iño” buna niese lloñeite.

Jamai bue isoidinomona cuena iñoitimaci.

Jamai bue isoíñedinomona cuena jiaí iñoitimaci.

<sup>12</sup> Naimacina cue duenallamona, naimaci jeacina jaca faitaiticue llote.

<sup>13</sup> Jiaie rafuena Jusiñamui jai llumona, Moisés micorimo lloga rafue jai saillana uiñoticaí.

Moisés micori lloga rafue caimo jai duiñede. Cristomona jiaie rafuena birui jai cacadicaí.

## 9

*Hebreos comini Jusiñamui jofona eniruemmo jiaie nitimaci. Monamo Cristo birui illanona, Jusiñamui ecimo naimie ite*

<sup>1</sup> Jusiñamuidi Moisés micorimo diga rafuena jiaie llote. Naie rafuemona cai fueollena, iena lloiticue. Naimiena sedajana llote. Naimie sedalle jofu finuana jiaí llote.

<sup>2</sup> Jusiñamui llua isoi, hebreos comini naie jofona nitimaci. Jedaciede iniroimona finoca jofona nitimaci. Naie jofu jeraimo mena cuartos ite. Nano fo jailla cuartomo Jusiñamuina nagarui sedadimaci. Nainomo lamparin isoi de ra ite. Siete diga naie boadi ite. Mesa jiaí ite. Nainomo doce llomenico joide.

<sup>3</sup> Mena cuartos illena iniroina sebiñoga. Naie baifemo iticuartodi Jusiñamui illano.

<sup>4</sup> Naie iniroi facai oromona finoca mesa ite. Nainomo caimare soride rana jobaisoidimaci. Baifemo iticuartomo cajón ite. Ie emodo oro iena jonega. Cajón jeraimo oromona finoca nogo ite. Nainomo ite maná railla fariñana eruaide guille. Aarón micorí jiguída nainomo jai ite. Jusiñamui uaido naie jiguída dacaiño llisilla jira, nainomo ite. Jusiñamui cuega nofici ibici jiai ite.

<sup>5</sup> Cajón emodo ibaillabicidi ite. Ie emodomo nagafebei dine oromona finoca mena Jusiñamui jaienicí joreño ite. Conimamo fo eruaide. Naie motomo Jusiñamui quenirena baireuide. Naie rafuena raise omoi jai uñua jira, iena omoimo are lloñeiticue.

<sup>6</sup> Naie isoide rana finodimaci. Iemei Jusiñamui diga ñairainimona damierie nano fo jailla cuartomo nagarui jaidimaci. Moisés micorí llua isoi, nainomo ite rafuena finollena, iedo jaidimaci.

<sup>7</sup> Baifemo iticuartomo jaca jainidimaci. Nanoca ñairaima naga año nainomo darui dama jaide. Jurareta faja mei, fo jaillanona, diruena naie cajón ibaillabicimo llerede. Dama naimie jeacino facaina diruena nano llerede. Chivo fajanona, dane fo jaide, ie comini jeacino facaina diruena llerellena. Iena finuamona, cominina duenailamona, Jusiñamui naimaci jeacino facaina ibana oñede.

<sup>8</sup> Jusiñamui Joreño caina llofuiamona, biena birui uñoticaí. Naie jofonía ia, jamai comini fo jainina jira, Jusiñamui diga, cominidi atona nabairinidimaci.

<sup>9</sup> Bie rafuena birui nia finodimaci. Moisés micorí lloga uaido bu jaia, ie jeacino facaina faga toiniaina Jusiñamuimo fecallena jobaide. Iena finocabidimaci; iadedi Jusiñamui jitailla isoi, naiemona naimaci comeciaina raise finonidimaci.

<sup>10</sup> Jusiñamuina naimaci raise sedallena, Moisés micorí diga guille fimaide. Jiruana jiai fimaide. Naimaci abiaina finollena jiai llote. Nie isoide guille, nie isoide jirolle, niese naimaci abiaí finollena, nana naie isoide rafuedo jaidimaci. Cristo nia biñena facaiseconi iese jaidimaci, naimaci comeciaina raise finobitallena; iadedi Cristo billamona, jiaie rafue birui ite.

<sup>11</sup> Moisés micorí finoca jofomo Jusiñamui dine Cristo jañede; iadedi Jusiñamui abimo monamo Cristo jai jaide. Nainomo cai facaina Cristodi ñairaimana jai jaide. Ie jira Jusiñamuina jai nabaidicaí. Cai comeciái raise jai finobide.

<sup>12</sup> Naimie fiodailla mei, dane jilluanona, Jusiñamui dine monamo naimie abide jaide. Toiniaí diruena Moisés facaise ñairaini fecaja isoi, cai jeacino facaina Jusiñamuimo Cristo naga año fecañede; iadedi dacaiño naimie fiodaillamona, naimie diruedo cai jeacino facaina caina jillotate.

<sup>13</sup> Marañede rafuena finoa, Moisés micorí llogacino anamo itino Jusiñamuina sedallena, naimie jofomo jainidimaci. Moisés micorí jaie llua isoi, toiniái diailla mei, jobaide toiniái ie jusefo oni faianona, Jusiñamui jofomo jairedimaci. Nainomo naimiēna sedallena, fo jairedimaci. Iemona Jusiñamui naimacina duere finoñede.

<sup>14</sup> Toiniaína fañeno Jusiñamuina birui sedadicaí. Cristo fiodaiacana jira, naimie diaillamona, cai jeacino facaina Jusiñamui caina duere finoñeite. Cristo comeci jitailla jira, Jusiñamui Joreño naimiēna oretaja jira, naimie fiodaite. Cristodi Jusiñamui Jitona jira, naimiemo jeacino iñena jira, cai jeacino facaina naimie fiodaillamona, cai comeciaina raise finobitade.

<sup>15</sup> Cristo jai finoca rafue muidona, Cristo monamo jailla jira, jiaie rafue birui ite. Bie rafuedi comini Jusiñamui diga jaca illena llote. Nana Jusiñamuina inotino ie. Moisés micorí lloga uai anamo itinodi jeacinona finocana jaidimaci. Naimaci jeacino facaina faga toiniaina Jusiñamuimo jaie fecauidimaci; iadedi Cristo jai fiodailla jira, naimiēna bu inoia, naimie jeacino facaina Jusiñamui birui ibana oñeite. Nana Jusiñamuina inotinodi naimie jai llua isoi, naimie diga jaca iitimaci.

<sup>16-18</sup> Jusiñamui jofonía jai finua mei, Moisés micorímo Jusiñamui llote: “Cue lloga rafuena raise finodomoi. Bie jofomo cuena sedallena, faga toiniái dirue diga bie jofona llereca. Nana naiemo ite rana jiai llereca. Iena o finuamona iobiticue. Cue lloga uai finocana mai o jai” llote. Iese naie rafue jaie tainede. Cristo fiodailla jira, Jusiñamuimona birui jiaie rafue caimo ite. Cristo diailla jira, Cristo fiodaillamona, bie rafue jai tainede. Bie rafuedo cai jaillamona, cai jeacinomona jai jillobidicaí.

<sup>19</sup> Ie cominimo nana naimiemo Jusiñamui lloga rafuena Moisés micorí llua mei, faga jurareta dirue diga, faga chivo dirue diga, nana naie lloga rafue cuegabiaina llerede. Cominina jiai llerede. Naie dirue jinui diga nano faite. Febecode ra jiairede iniroi diga maiga. Iemei naie ra diga naie diruena llerede.

<sup>20-21</sup> Jusiñamui jofona dirue diga llerede. Nana nainomo ite rana jiai llerede. Llote: “Jusiñamui llua isoi, biena finodicue. Naimie llua jira, bie dirue illa jira, naimie caina duere finoñeite”.

<sup>22</sup> Moisés micorimo Jusiñamui llua isoi, raise finobillena, nana rana dirue diga llerede. Toiniai fajamona, dirue illa jira, Jusiñamuidi jeacino facaina ibana oñede; iadedi jeacino facaina iba oñellena, jiaie rafuena Moisés micorimo lloñede.

*Cristo fiodailla jira, Jusiñamui cai jeacinona oni dotade*

<sup>23</sup> Jusiñamuidi Moisés micorimo toiniaina fajana jaie llote. Naie llua finuamona, Jusiñamui iba oñede. Birui cai jeacino oni dotallena, Jusiñamuidi Cristo fiodaillana jitaide. Cristo fiodaillafue faga toiniiai baifemo faia jira, monamo cai jaca illena, jeacinona oni dotallena, Cristo fiodaite.

<sup>24</sup> Naimie fiodaillamona, cai facaina ñairaimana Cristo jaide. Cai facaina Jusiñamui diga ñaillena, enirue ite Jusiñamui jofomo jaiñede; iadedi monamo Jusiñamui abimo naimie jaillanona, Jusiñamui diga cai facaina ñaicabite.

<sup>25</sup> Dacaiño cai facaina monamo Jusiñamui dine naimie jaide. Moisés micori facaise nanoca ñairaima Cristo isoñede. Naimie naga año Jusiñamui jofomo fo iticuartomo darui jaide. Naimie dirue uiñede; iadedi toiniaina fajanona, ie diruena uite.

<sup>26</sup> Cristo iese itena, nano facaisemona diga icaiño comini jeacino facaina naimie fiodaite. Iese iñena jira, enirue mo birui dacaiño naimie billanona, naimie jitailla jira, naimie dacaiño fiodaite. Jeacino anamo cai iñellena fiodaite.

<sup>27</sup> Nana dacaiño fiodaiticai. Iena uiñotica. Fiodailla mei, Jusiñamui uicomo iitica. Naimiena cai iñoia, caina feiñoite. Naimiena ñnoñedinona duere finoite.

<sup>28</sup> Dacaiño Cristo jai fiodaillana uiñotica. Comini jeacino facaina dacaiño jai fiodaite. Naimie dane bia, fiodaillena biñeite; iadedi dane bia, naimiedi ie billemo iocire ocuiritinona monamo Jusiñamui illanomo uite.

## 10

<sup>1</sup> Moisés micori facaise naie ñairainidi Jusiñamuimo fecallena, toiniaina fajanona uisoidimaci; iadedi Jusiñamui jitailla isoi, naiemona marebicaiñedimaci; iadedi Moisés micori lloga uaimona jeacino cai finuana uiñotica. Jusiñamui cai jeacino oni dotajana uiñotica. Jusiñamui jaca mareuidimena uiñotica. Jusiñamuina nabaillena janore uiñotica. Cristo jiaie rafue caimo jai iga. Naimie fiodailla jira, cai jeacino jai feide. Jusiñamuina raise nabairedicai.

<sup>2</sup> Naie faga toiniiai Jusiñamuimo fecajamona comini marebicaidena, naiena fecarainidimaci. Naimaci jeacino dacaiño dotaiadedi, faga toiniaina dane fecañedimaci; iadedi naimacimo jeacino jaca illa jira, faga toiniaina fecauidimaci.

<sup>3</sup> Naiena fecauillamona, jeacinona finocana naimaci nia jaillana uiñotimaci.

<sup>4</sup> Toiniai dirue illa jira, Jusiñamuidi comini jeacinona jaca feitañede. Dama Jesús dirue illamona, Jusiñamuidi comini jeacinona feitate.

<sup>5</sup> Enirue mo jaie billanona, Jusiñamuimo iena Cristo llote: Jeacino facaina toiniiai fajana jai jitañedio.

Le jira enirue mo comena jaillena, comini jeacino facaina cue fiodaillena, cuena oredio.

<sup>6</sup> Jeacino facaina ailluena faga toiniaina jai jitañedio.

<sup>7</sup> Iena cue uiñuamona, enirue mo cue billanona, o jitailla rafuena finoiticue.

O facaina lloraini micoriai iena jaie cuetimaci llote.

<sup>8</sup> Cristo llua dane ñaiticue. Cristodi Jusiñamui Moisés micorimo llogacinona ñaite. Jusiñamui jaie llua isoi, naimiemo cominidi jeacino facaina faga toiniaina jaie fecauidimaci. Iena Jusiñamui birui jai jitañede.

<sup>9</sup> Cristodi: "Jusiñamui jitailla rafuena finuaibiticue" llua mona, Moisés micorimo llogacinon jai saillana uiñotica. Jiaie rafue birui illana jiai uiñotica.

<sup>10</sup> Jusiñamui jitailla jira, Jesucristona orede. Cai facaina naimie fiodaillena naimiena orede Jesucristo ie Moo jitaillacinona finuamona, cai jeacinomona jai jaca jillobidicai. Jai marebicaidicai.

<sup>11</sup> Nana Moisés micori llogacinodo jaide ñairainidi nagarui comini jeacino facaina faga toiniaina Jusiñamuimo fecauidimaci; iadedi naie rafue naimaci finuamona, Jusiñamui naimaci jeacinona feitañede;

<sup>12</sup> iadedi dacaiño Cristo fiodaillamona, Jusiñamuidi nana cai jeacinona feitate. Bene naimie finoacaga rafue fuilla jira, illaimana jira, Jesús Jusiñamui ecimo abido jaide.

<sup>13</sup> Nana naimie dibeimo iñedinona naimie emodofillemo naimie birui ocuicide.

<sup>14</sup> Dacaiño Cristo fiodaillamona, naimiena cai ñnuamona, Jusiñamuimona jaca marebicaidicai.

<sup>15</sup> Jusiñamui facaina lloraima micori ciegafuemono Jusiñamui Joreño caina iena uiñotade. Naimie facaina lloraima micori Jusiñamui llua jaie iese cueba:

16 Hebreos cominimo jiaie rafue ico jiairuido lloiticue.

Cue rafuena naimaci uifnuamona, cuena raise inoitimaci.

17 Jiai cuega:

Naimaci jeacino jaca feitaitecue.

18 Cristo jai fiodailla jira, jeacinona Jusiñamui jai feitaja jira, faga toiniaina naimiemo fecajana dane jai jitaiñede.

*Jusiñamuina cai nabaiili*

19 Cue amatiai, Jesús fiodailla jira, Jusiñamuina jaciruiñeno birui nabairedicai. Naimie cai Moo jai illanona, naimie diga meiruiñeno jaciruiñeno birui jiai ñairedicai.

20 Moisés micori facaise nanoca ñairaima fo iticuartomo jaillena, sebiñoga iniroi oni dibeimo jaidimaci. Iese Jusiñamui illanomo ridimaci. Jamai comini nainomo jainidimaci; iadedi Cristo jai fiodailla jira, Jusiñamuina atona birui nana nabairedicai. Naimie diga birui atona nana ñairedicai.

21 Cristona jai cai inua jira, cai facaina nanoca ñairaimana naimie illa jira,

22 cai mare comeciainona Jusiñamui diga birui cai ñaiili. Naimiena eo cai inuamona, cai comeciai jeanillamona, naimie dibeimo cai bautizajamona, naimiena mai cai nabaiili.

23 Cristo caina jilluana inoticai Monamo naimie diga cai illemo ocuiridicai. Jusiñamui inogamiena jira, naie rafuena inocana mai cai jailli.

24 Jiaie creyentiaimo cai comeciaina cai facaja. Conini cai isiruitacana cai jailli. Coninimo cai mare rafue finocana cai jailli.

25 Rollena omoimona damierie ofcabiñedimaci. Naimaci isoi omoi ineno; iadedi Jusiñamuina sedallena oficabi. Abido omoi danomo jaiñellena, conini comeciaina ocuiñotallena, oficabi. Jesucristo abido billirui iaiei illa jira, naimiena raise inollena, conini omoi comeciai ocuiñocana mai omoi jai.

26 Cristo finoca rafuena bu uifua mei, iena naimie inoñenia, jeacinona naimie finocana jailla jira, Jusiñamui naimie jeacinona feitañeite. Cristo fiodaillana bu jamaia, Jusiñamui ie jeacinona feitañeite;

27 iadedi Jusiñamuidi naimiena duere finoite. Eo jacirede rafue anamo iite. Iraimo Jusiñamui nana naimie dibeimo inedinona duere finoite.

28 Moisés micori jaiie cuega: "Jusiñamui llote: 'Menamie naimiena daje isoi lloillamona, Moisés micori llogacinona jamaidimiena dueruiñeno meinega'".

29 Iese duere sefuillana jaiie llote; iadedi birui ite lloga rafue bu jitaiñenia, bai duere sefuite. Jusiñamui Jitona bu jitaiñenia, Jusiñamui birui lloga uaina bu jitaiñenia, Cristo fiodaillana bu jamaia, Jusiñamui Joreña jeare bu ñaia, Jusiñamuimona naimie eo duere sefuite. Cristo fiodaillamona, Jusiñamui naimiena inotimiena marebicaitarede. Jusiñamui Joreño naimiena duenaite; iadedi iena naimie jai jamaitaia, iena naimie jai jitaiñenia, Jusiñamui naimiena bai duere finoite.

30 Ero, Jusiñamui jaiie llote: "Maraiñedicinona bu finoia, ibana oiticue. Cuena inoñedinona duere finoiticue" llote.

31 Jusiñamui duere finollicino anamo bu ia, eo jacirede rafue anamo jai ite. Naie duere finollicino anamo omoi inellena, Jusiñamui lloga rafuena jamaiñeno.

32 Creyentiaina nano omoi jaillamo dane comeciaina faca. Creyentiañedinomona eo duere sefuidomoi; iadedi Cristona inocana jaidomoi.

33 Omoimona damierie marefomo navui duere sefuidomoi. Omoiri jaisitimaci. Omoina jifanododimaci. Omoina jeare finodimaci. Damieriena meinetimaci.

34 Cárcelmo jonetinona duenaillamona, naimacina canocabidomoi. Cristomo omoi duilla jira, creyentiañedinomo omoi rana bairodimaci; iadedi omoi comeciai nia iocire itomoi. Omoi ramo omoi comeciaina eo facañedomoi; iadedi Cristomo jai omoi duilla jira, naimie omoi comeciaina jaca marebicaitaja jira, iemo omoi comeciaina facajamona, iocire itomoi.

35 Jusiñamuimona iba ico omoi feiñua jira, Cristona nia inocana omoi jai.

36 Jusiñamui jitaillacino omoi finollena, monamo jaca omoi illena, nie isoide ramo omoi jiria, Jusiñamuina nia inocana omoi jai.

37 Jusiñamui biena llua jira, iese suite:

Cristo abido billirui iaiei illa jira, naimiena inocana omoi jai.

38 Naimie nia abido biñenia, omoina cue jai marebicaitaja jira, cuena inocana mai omoi jailli;

iadedi cuena jitaiñedinori iobiñedicue.

39 Naie isoidino jillobiñeitimaci. Naimaci isoi inedicai. Jusiñamuina inocana cai jaillamona, jaca jillobidicai. Ie jira naimiena inocana mai cai jailli.

## 11

*Jusiñamuina #nocana jaidicai*

<sup>1</sup> Jusiñamuina cioñedicai; iadedi naimie illana #noticai. Naimie lloga uaina #nocana jaidicai. Naimie lloga uai suillena #noticai. Ie lloga uai suillemo ocuridicai.

<sup>2</sup> Cai jaiagaimona damierie iese #nocana jailla jira, Jusiñamuimona marebicaidimaci.

<sup>3</sup> Jusiñamui finoca rana birui ciodicai; iadedi jaie nano dofoconi jaca buena ifñede. Naie facaiseconi dama ie uaido Jusiñamuidi eniruena finode. Mona finode. Nana rana finode. Nana rana comuitate. Iena #noticai.

<sup>4</sup> Cai jaiagai rafuena ja lloiticue, naiemona cai fueollena. Abel micori Jusiñamuina jaie #nuamona, naimiemo faga toica llaudana fecade. Ie feiñuamona, Jusiñamui naimieri iobide. Jusiñamuina ie ama Caín raise #noñena jira, naimie fecaca rari iobiñede. Iena feiñoñede. Abel micori Jusiñamuina #nua jira, Jusiñamuimona naimie marebicaide. Abel micori jaie fiodaite; iadedi Jusiñamuina cai raise #nollena, naimiemonia nia fueoiticai.

<sup>5</sup> Enoc Jusiñamuina jaie #note. Naimiedi Jusiñamuina eo iobitate. Moisés micori cuegafuiaimona iena uiñotica. Jusiñamuina #nuamona, Jusiñamuina eo iobitaja jira, naimie fiodaifñede; iadedi fiodaifñeno monamo Jusiñamui naimiema naimiema uite.

<sup>6</sup> Jusiñamuina cai #noñenia, naimiema iobitañedicai. Jusiñamuina cai nabaiacania, naimiema cai raise sedaacania, naimie illana #noticai. Naimiema cai nabaiacania, cai jitai raillano, caina canollena #noitica.

<sup>7</sup> Noé micori Jusiñamuina jaie jiai #note. Jusiñamui #co suille rafuena naimiemo lote. Enirue buillena lote. Iena #nuanona, Noé micori aillue balsa emodomo jofona finode. Enirue buillamona ie comini diga jilloiacana jira, Jusiñamui lua isoi, balsana finode. Jusiñamui lluaana Noé micori #nua jira, jillode. Noé micori Jusiñamui lluaana #note; iadedi naimie facaise ite comini #noñena jira, Jusiñamui ricallafue anamo itimaci. Jusiñamuina naimie #nua jira, Jusiñamui uruena naimie jailla jira, Jusiñamuimona Noé micori marebicaide.

<sup>8</sup> Abraham micori Jusiñamuina jaie jiai #note. Ie moo eniruemona naimie jaianillena Jusiñamui naimiemo lote. Are ite eniruemo naimie jaianillena lote. “Jiaie enirue omo iiticue” Jusiñamui lote. Abraham micori #note; iadedi ie jaillinona uiñoñede.

<sup>9</sup> Jusiñamui lloga eniruemo Jusiñamuina #nocana jaide. Naie eniruemo ride; iadedi naie enirue naimiemo nia raise duiñede. Chivo itiraimona niga iniroimona sebiñoña jofomo naimie jaca ite. Ie jito, Isaac micori, naie isoide jofomo jiai ite. Isaac micori jito, Jacob micori, naie isoide jofomo jiai ite. Jusiñamuidi nana naimacimo daje isoide rafuena lote: “Bie enirue omoimo iiticue” lote.

<sup>10</sup> Abraham micori mare jofona fiñoñede, naie eniruemo naimie jaca iacaiñena jira; iadedi Jusiñamui diga monamo jaca illemo naimie ocuride. Monamo Jusiñamui mare finolle illanomo ocuride.

<sup>11</sup> Abraham micori aidi Sara micori. Jusiñamuina Sara micori #nua jira, Jusiñamui naiñaiño abina nairitate. Naiñaiño eo jionaide; iadedi uruesite. Naiñaiño Jusiñamui lua isoi, naiñaiño uruesillana #note.

<sup>12</sup> Abraham micori jiai eo jionaide; iadedi jitona comuitate. Naimie jitomona naimie nairai eo jebuide. Facadonide ucuai isoi jebuidimaci. Facadonide conillie isoi jebuidimaci. Ailluena ucuai illa jira, naimaci facadonidicai. Ailluena conillie illa jira, iena facadonidicai. Ie isoide. Eo ailluena Abraham micori uruai illa jira, naimacina facadonidicai.

<sup>13</sup> Abraham micori, Isaac micori, Jacob micori Jusiñamuina #nocana jaidimaci. Nana naimacimo Jusiñamui lloga uaina suiñedemo fiodaítimaci. Nia fiodaifñenia, Jusiñamui llogacina cacadimaci. Iena #notimaci. Ie jira bie eniruemo naimaci jaca illemo comecina facañedimaci;

<sup>14</sup> iadedi monamo jaca illemo comeaiena facadimaci.

<sup>15</sup> Naimaci jaie billa eniruemo comeaiena naimaci facadena, nainomo abido jaidimaci;

<sup>16</sup> iadedi jiaie illanomo comeaiena facadimaci. Jusiñamuina nabaillemo, monamo Jusiñamui diga jaca illemo comeaiena facadimaci. Naimiema naimaci #nua jira: “Jusiñamuidi cai Moo” naimaci raia, Jusiñamui naimaciri meidaifñede. Ie jira monamo Jusiñamui naimaci illanona jai finode.

<sup>17-18</sup> Jusiñamuina Abraham micori #nua jira, ie jitona comuitate. Jusiñamui Abraham micorimo lote: “O jito Isaacmona o nairai eo jebuite” lote. Iemei Jusiñamui Abraham micorina facacite. Abraham micori naimiema #nuana raise uiñollena, facacite. “O jitona fano” Abraham micorimo lote. Abraham micori Jusiñamuina #nuanona, ie jito faiacade.

<sup>19</sup> Ie jito fiodailllemona, Abraham micoridi Jusiñamui naimiema jilloitallena #note. Isaac micori fiodaifñede; iadedi fajamona jillode.

<sup>20</sup> Isaac micorí Jusiñamuina jiai ñnote. Naimie fiodaiaacania, Jusiñamui ie llogacino finollena ñnuamona, mena ie urue iaímaíamo ie uaina fecade. Llote: “Jusiñamui llua isoi, jebuicana jaitomíco”.

<sup>21</sup> Jacob micorí Jusiñamuina jiai ñnote. Naimie fiodaiaacania, Jusiñamuimo jüanona, ie jiguidamo juita naidaidemo, José micorí ie mena urue iaímaíamo marecinona llote. Jusiñamui ie llogacino finollena ñnuanona, llote: “Jusiñamui llua isoi, jebuicana jaitomíco. Naimie omicono canoite” llote.

<sup>22</sup> José micorí fiodaiaacania, ie comínimo llote: “Jusiñamui omoina canuano, Egiptomona ico jiairuído omoi jaillena ñnoticue. Omoi jaiia, cue illaiciaina omoi diga uíño. Canaán railla eniruemo omoi ria, nainomo cue illaiciaina raino”.

<sup>23</sup> Moisés micorí moo, ie ei diga Jusiñamuina jiai ñnotiaímaíai. Hebreos comíni jebuíñellena, naie facaiseconí Egipto illaíma nana hebreos ísaíaina meiniana llote. Iaímaíai jito jeicia mei, iaímaíai uruena daje amani fivui reidíiaímaíai. Jusiñamuina ñnuanona, naimie maresana eruaila jira, jacíruiñeno naimiena jofomo fo reide. Illaíma luamona Jusiñamui naimiena jillotajana ñnotiaímaíai. Ie jira Faraón jisa anamo comuide. Faraóndi Egipto nairai illaíma.

<sup>24</sup> Moisés micorí Jusiñamuina ñnote. Naimie eimienamona, naimíedi Faraón jisa ie jitona mamecireacaíñede;

<sup>25</sup> iadedi naimíedi Jusiñamui naimiena ie comínina Egiptomona jillotajana ñnote. Jusiñamui naimie fetua jira, ie comíni díbeimo naimie iacade. Ie comíni diga duere sefuiacade. Jusiñamuina ñnoñedino diga ie comeci jamai iobitaíacaíñede.

<sup>26</sup> Faraón jisa anamo naimie comuilla jira, naimíemo eo aillue rana ite; iadedi Egiptomo ite ebirede ramo ie comecina eo facañede. Jusiñamuimona iba naimie íco feíñoíacana jira, Jusiñamui jito billemo ie comecina facajano, duere sefuide.

<sup>27</sup> Ie jira Egiptomona Moisés micorí Faraóna jacíruiñeno oni jaide. Jusiñamui naimiena eenuana ñnote. Jusiñamuina cioíñede; iadedi Jusiñamui illana naimie ñnua jira, ñnocana jaide.

<sup>28</sup> Jusiñamui ie comínina jillotajana Moisés micorí ñnua jira, Jusiñamui llua isoi, pascua railla rafuena finode. Ie comínimo toíca llauda fallena llote. Ie dírué nase fuemo jidellena llote. Naie naío Jusiñamui jaíenici nana nano doforanina meinesíñellena. Jusiñamui lluana finodimaci.

<sup>29</sup> Egiptomona naimaci billa mei, jiaírede railla monaíllai ruica díne jaillena, Jusiñamuina ñnotímaci. Jusiñamui Moisés micorímo lluana naimaci ñnuamona, jinui motodo saferedífoodo ruica jaidímaci; iadedi Egipto soldaduái daje isoi ruica jaíacadímacimo, nana corobaitímaci.

<sup>30</sup> Canaán railla eniruemo hebreos comíni rilla mei, Jericó railla nairai díne ridímaci. Jusiñamuina ñnuanona, Jusiñamui llua isoi finodímaci. Siete dígarui Jericó ecímo naimaci macarilla mei, Jusiñamui llua isoi, naie llaígafo ana bíjide. Naie nairaina emodofidímaci.

<sup>31</sup> Naie facaiseconí Jericómo Rahab micorí fiodaíñede. Naiñaiñodi calliredíñaiño. Nana Jericó comíni Jusiñamuina ñnoñena jira, fiodaítímaci; iadedi jofue íñenanomo, nia Canaám hebreos comíni riñena facaise, Jusiñamui finoca rafuena naiñaiño fidiano, naiñaiño Jusiñamuina ñnote. Mena hebreos comíni iaímaíana naiñaiño feíñua jira, Jericó nairaina emodofilla facaise naiñaiñoña meineñedímaci.

<sup>32</sup> Diga jiaie comíni Jusiñamuina ñnocana jaidímaci; iadedi nana naimaci finoca rafuena cue cuellena, abí juanide. Naimacimona damíerie mameciaina jamai cueíticue: Gedeón micorí, Barac micorí, Sansón micorí, Jefté micorí, David micorí, Samuel micorí Jusiñamui facaina jaie llorainina jiai eo cueñéíticue.

<sup>33</sup> Jusiñamui naimacina canuamona, ñnotímaci. Ie jira damíerie naimaci bacauaina emodofidímaci. Illaíma isoi jiaíno naimaci comínina raise marena sedadímaci. Jusiñamui llogacino suíllana cíodímaci. Leones naimacina riíacanamona damíerie jillode.

<sup>34</sup> Iraímo usíllamona damíerie jillodímaci. Lloebí diga meíniamona damíerie jillodímaci. Jiaíno jamai bue isoidino; iadedi jamai bue isoiñedinona jaidímaci. Jobaíme raise finuamona, jiaíno ímaci bacauai soldaduaina judaítíade.

<sup>35</sup> Dañaiñorie riñoniaímona uruíaí fiodaílla mei, fiodaíllamona Jusiñamui damíeriena jillotate. Illaícomínimona jiaíno duere fiodaítímaci. Jusiñamuina faínonocaiacaíñena jira, naimacina meinetímaci. Naimaci fiodaiaacania, monamo Jusiñamui diga íco jaca illena naimaci ñnua jira, Jusiñamuina faínonocaiñeno fiodaítímaci.

<sup>36</sup> Jiaíno duere sefuidímaci. Naimaciri jaisítímaci. Naimacina jeare ñaitímaci. Rao diga naimacina duere fatímaci. Damíeriena maianona, cárcelmó jonetímaci.

<sup>37</sup> Damíerie nofíci diga faírínuamona, meinetímaci. Damíerie ramo faitímaci. Meinelena, naimacina serrucho diga denaísíte. Damíerie lloebí diga meinetímaci. Jiaíno

buenidimaci. Naimaci iniroi jamai igoi ie. Dueredimaci. Naimaci iniroi raise ifede. Aime guisoidimaci. Jiaie cominimona duere sefuisoidimaci.

<sup>38</sup> Jiaie cominimona jamai bue isoidimaci; iadedi Jusiñamuimona jamai bue isoifedimaci. Damierie jofonidimaci. Ie jira jamai jai jaicaisoidimaci. Jofue ifenanomo jaidimaci. Eniruemo jamai biita inuidimaci.

<sup>39</sup> Jusiñamuina inocana jaidimaci. Naimaci finoca rafuemona Jusiñamui comini naimaci illana uifoticaí. Jusiñamuina inotimaci; iadedi nana naimacimo Jusiñamui lloga rafue naimaci illa facaise suiñede.

<sup>40</sup> Jusiñamui jitailla jira, naimaci illa facaise nana naimacimo lloga rafue suiñede; iadedi naimie jitailla jira, fiodaillena Cristona jai orede. Ie cominina birui cai jiai jaillena, Cristona jai orede. Ie jira cai diga danomo monamo Jusiñamuina nabaitimaci. Nana naimie lloga rafue jaca suite.

## 12

*Jesús finoca rafuemo cai comeciaina cai facalli*

<sup>1</sup> Cai jaiagai Jusiñamuina inocana jaillana uifoticaí. Ie jira caidi naimaci isoi, Jusiñamuina inocana birui mai cai jailli. Marena riire cai aisiacania, ailluena rana abiñedicaí. Ie isoide. Jeacinona cai finoñellena, naimiena raise cai inollena, jeacino finuacina mai cai fainonocaiilli. Nie isoide rafue caimo ia, Jusiñamui jitaillacina finocana mai duere cai jailli.

<sup>2</sup> Jesús finoca rafuemo cai comeciaina cai facalli. Cai jeacino facaina naimie fiodailla jira, cai comeciaina naimie ocuiñotajana, Jesúsna inoticaí. Cruzmo marañedimie isoi fiodaite. Fiodaillamona jilluana naimie uifua, naimie fiodaite. Ie Moo ecimo dane illena naimie uifua, iocire fiodaite. Illaimana naimie illamona, ie Moo ecimo birui ite. Jesúsna cai comeciaina facajamona, caimare mai cai jailli.

<sup>3</sup> Jusiñamui dibeimo ifedinomona Jesús eo duere sefuide. Ie isoi cai duere sefuia, Jesúsna cai comeciaina facajamona, cai comeciaina ocuiñotacana mai cai jailli.

<sup>4</sup> Jusiñamui dibeimo ifedinomona duere sefuillamona, Jesús isoi duere nia sefuifedomoí. Omoína nia meifedimaci.

<sup>5</sup> Duere omoi sefuia, bie jaiie cuegafuina feitaño. Naimie cominina omoi illamona, Jusiñamui llote:

Cue uruiái, omoína cue duere finoia, cuena nia ino.

Duere sefuillamona, cuena fainonocaiño.

<sup>6</sup> Omoína cue isiruillamona, omoína duere finodicue.

Cue dibeimo omoína raise itatallena, omoína duere finodicue.

Nana cue cominina cue llofuecabillamona, naimacina duere finodicue llote.

<sup>7</sup> Naimie jitaillacina cai finollena, caina duere finode. Ie uruiaina cai illamona, caina duere finode. Ero, nana ie uruiaina isiruillamona, naimaci ie jitaillacina finollena, naga eniruemo ite moo ie uruiaina duere finocabide. Ie isoide Jusiñamui. Ie jitaillacina cai finollena, caina duere finocabide.

<sup>8</sup> Caina inotallena, Jusiñamui caina duere finoñenia, naimie cominiñedicaí. Naimiedi nana ie cominina duere finocabide.

<sup>9</sup> Cai eniruemo ite cai mootiai caina duere finoia, naimaci uaina inoticaí. Ie isoide. Cai Moo Jusiñamui caina isiruillamona, caina duere finoia, naimie uaina cai inua. Naimiena cai inuamona, monamo naimie diga ico jaca iiticaí.

<sup>10</sup> Naimaci comeciái llua isoi, cai eniruemo ite mootiai dallu caina duere finode. Cai Moo Jusiñamui caina llofuellena, caina duere finode. Naimie illa isoi, mare rafue dibeimo caina itataiacade.

<sup>11</sup> Jusiñamuimona duere cai sefuia, iena gaiñedicaí. Iena jitaifedicaí; iadedi naiemona cai fueoia, jeacina dane cai finoñellena, naimie jitailla isoi marecina finocana jaiticaí.

*Jusiñamui rafuena cai cacaía, iena cai aruiruiñena*

<sup>12</sup> Nie isoide ramo caimo jiria: "Jusiñamui caina nibai canoñede" raiticaí. Iemona naimiena fainonocaiacadicaí; ia iemo cai comeciaina cai facañena. Jusiñamui rafuena cai sefuirua, duere cai sefuia, nie isoide rafue caimo ia, cai comeciaina ocuiñocana mai cai jailli. Jusiñamui caina canuamona, naimiena cai raise inuamona, cai comeciái ocuiñocana mai cai jailli.

<sup>13</sup> Jiaie rafuedo cai jaiñena; iadedi Cristo rafuedo raise inocana mai cai jailli. Iese cai jaija, Cristo rafuedo naimaci jiai raise jaillena, jiaie creyentiaina canoiticaí.

<sup>14</sup> Nana comini diga uri omoi í. Jusiñamui jitailla isoi, marecina fino. Iese bu iñenia, Jusiñamui jitailla isoi bu marebicaiñenia, Jusiñamui illanomo jaca ifeite.

<sup>15</sup> Jusiñamui caina duenailamona, nana cominina jillotaiacade. Omoimona buna Jusiñamui duenailacinona faimonocaillana jitaiñedicue. Omoimo iese suia, iemona conini gaiñenacino comuirede. Iena jitaiñedicue. Omoí comeciaí daje isoi lloillana jitaidicue.

<sup>16</sup> Jearede rafuena jaca finoñeno. Esaú micorí jaié finoca rafuena uiñotomoi. Jusiñamui ie moo Isaac micorimo mare rafuena suillena llote. Esaú nano doforamiéna illamona, ie moo fiódaille mei, Jusiñamui jai lloga rafue ie moo uai diga, ie moo ra diga, naimie feiñoiacade. Naimie moo nai fiódaiñena facaise daciaño Esaú aimetailla jira, ie amamona guillena jicade. Iemei naie guille ifomo ie moomona feiñolle uaina ie amamo fecade. Naie facaise dama ie jitailla ramo comecina facade.

<sup>17</sup> Ie amamo ie uaina fecaja mei, ie comeci iuai meidote. Naie uai naimiemo dane illana abido jitaide; iadedí ie moo ie amamo jai fecade. Esaú eo eede; iadedí ie moo ie uai naimiemo jai fecanide. Jusiñamui lloga rafuemo Esaú comecina facañede. Naimie isoi Jusiñamui rafuena omoí jamaiñeno.

<sup>18</sup> Moisés micorí facaise cai hebreos cominimo Jusiñamui ie rafuena jaié llote. Sinaí railla anedumona llote. Iena cacajanona, naie comini eo jaciruitimaci. Jusiñamui naie anedumo billanona, anedumona irai boode. Jiai jitibicaide. Nainomo aifi eo ite. Eo boriuide. Eo gurude.

<sup>19-20</sup> Trompeta ficirenana cacadimaci. Iena ciuanona, iena cacajanona, eo jaciruitimaci. Jusiñamui naimacimo jai llote: “Bene cue illa jira, jaca buna bie anedumo biñena. Nainomo bu bia, nie toiniaí nainomo macaria, nofici diga fairinuamona, naimiema omoí meine” llote. Jusiñamui lluaa cacajamona, eo jaciruitimaci. Moisés micorimo: “Jusiñamui caimo nia lluaa jai jitaiñedicaí” llotimaci.

<sup>21</sup> Eo jacirede ra illa jira, nana comini diga Moisés jiai jaciruite.

<sup>22</sup> Sinaí anedumona lloga rafuedo birui jaiñedicaí; iadedí jiaie rafuedo birui jaidicaí. Birui Jusiñamuina atona nabaidicaí. Cai hebreos comini isoi, Sión railla anedumo Jerusalémo Jusiñamui jofomo naimiema nabaiñena jaiñedicaí. Monamo Jusiñamui ite; iadedí birui naimiema atona nabaidicaí. Cai fiódala, naimie dine jaiticaí, naimie diga jaca cai illena. Nainomo ie jaienisai naimiemo iobillacinona fecacabidimaci.

<sup>23</sup> Ailluena comini diga, Cristona birui inoticaí. Nana caina Jusiñamui fetuanona, cai mameciaí monamo ite rabenicomo jai cueba. Jusiñamui nana comini comeciaina uiñote. Naimiema inotinomona ailluena jai fiódaitimaci; ia naimie ecimo naimaci joreñuai jiai jai itimaci.

<sup>24</sup> Jesús fiódalla jira, Jusiñamuina nabairedicaí. Naimie fiódalla jira, caimo jiaie rafue birui ite. Naie rafuena cai inuamona, cai comeciaí jai marena iticaí. Jiai cai jeacinona oni dotade. Iena jiai jai feitate. Abel micorí jaié fiódala, naiemona Jusiñamui buna ie jeacinona feitañede; iadedí Jusiñamui Abel micorí meinetimiemo ibana ote.

<sup>25</sup> Ero, Jusiñamui rafuena omoí cacaia, iena jamaiñeno. Iena aruiruiñeno. Moisés micorí facaiseconí naie comini Jusiñamui lloga rafuena cacadimaci. Jiaimo iena jitaiñedimaci. Iena inoñedimaci. Ie jira Jusiñamui naimacina duere finode. Cristomona jiaie rafue birui cacadicaí. Bie rafuedí Moisés lloga rafue baifemo faite. Jusiñamui duere finollicinomona buna jillobinide. Cai duere sefuiñellena, Cristo rafuena cai inua.

<sup>26</sup> Moisés micorimo ie rafue llua facaise, Jusiñamui naie eniruena niraidotade. Jusiñamui jairuido jiai llote: “Eniruena dane niraidotaiticue. Ucuaina, fivuina, jítoma diga, jiai niraidotaiticue” llote.

<sup>27</sup> Naimie lloga uaimona enirue fuillena uiñoticaí. Monamo ite ra fuillena jiai uiñoticaí. Nana naie rana naimie fuidoite; iadedí naimiema cai inua jira, naimie caina fuidoñeite. Ico cai illinona jai finode. Iena naimie fuidoñeite.

<sup>28</sup> Illaimana naimie illamona, naimie caina sedaite. Ie jira naimiemo iobillacinona cai fecaja. Naimiema cai inuamona, naimiema cai raise sedajamona, naimiema cai iobitaja.

<sup>29</sup> Naimiema inoñedinona Jusiñamui eo duere finolle jira, naimiema jaciruillanona naimiema cai inua.

## 13

### *Jusiñamuina cai iobitaja*

<sup>1</sup> Dani conini jiaie creyentiaína isiruicana omoí jai.

<sup>2</sup> Abraham micorí Jusiñamui jaienisaina uiñoñeno jaié nafuete. Jiaie illanomona jiaie creyentiaí bia, naimaci inillino iñena jira, naimacina nafue. Jusiñamuimona ibana feiñoitomoi.

<sup>3</sup> Cristo rafue muidona damierie creyentiaí cárcelmo itimaci. Nainomo omoí jiai itomoidena, naimacina feitañeno. Naimacina isiruillamona cano. Damierie creyentiaí duere sefua, naimacina jiai cano. Jaiaruido naimaci isoi nibai duere sefuitomoi.



<sup>4</sup> Airedimie jiaie riño diga illemo ie comecina facañena. Inirediñaiño jiaie iima diga illemo ie comecina facañena. Ie añede riño diga bu ia, ie iniñede iima diga bu ia, marañede. Iena finoñeno. Iena bu finoia, ie jeacino Jusiñamui lloñenia, Jusiñamui naimiena duere finoite. Naiñaiñoña jiaie duere finoite.

<sup>5</sup> Ailluena ucube ollena, iemo niciñeno. Omoimo ite ra diga caimare i. Iena Jusiñamui facaina lloraima jae uega: "Jusiñamui llote: 'Omoina jaca canoiticue. Omoina jaca fainonocaiñeiticue' llote".

<sup>6</sup> Naiena cai uiñuamona, cai comeciaina ocuiñoiticaí. Jiaie cuegafue isoi lloiticaí: Cai Nama caina canoite.

Ie jira cai comeciaí jarire finoñeiticai.

Buena jaciruiñeiticai.

Jiaimie buena caina jaciruitanide.

<sup>7</sup> Cristo rafuena omoimo navui lloganomo omoi comeciaina faca. Naimacimona Cristo rafuena nano cacadomoi. Cristo dibeimo naimaci illamo omoi comeciaina facajanona, naimaci isoi Jesucristona ñnocana mai omoi jai.

<sup>8</sup> Naimie jaca ñnogamiëna uiñoticaí. Naimie ie lloga uaina jae jaca finode. Iena birui finode. Ico iena jaca finoite. Ie jira naimiena cai ñnuu.

<sup>9</sup> Cristo ieñede rafuedo jaiñeno. Diga jiaie llofuiacino ite; iadedi iedo jaiñeno. Jusiñamui caina canuamona, cai comeciaina birui ocuiñocana jaiticaí. Moisés micorimo lloga rafuedo navui jaidicaí. Diga ra fimaide; iadedi naiedo cai jaillamona, cai comeciaí raise illena, buena oñedicaí.

<sup>10</sup> Cruzmo Cristo fiodaillamona, cai jeacino facaina fiodaite. Moisés micori lloga rafuedo nia jaidino Cristo rafuemo duiñedimaci. Naie comini facaina ñairaini Cristo rafuemo duiñedimaci.

<sup>11</sup> Moisés rafue llua isoi, nanoca ñairaima toiniaina faja mei, naie dirue dacaiño naga año fo iticuartomo uite; iadedi naie toi abi naimaci comini illanomona jino uite. Iena jai jitaiñena jira, nainomo iena jobaide.

<sup>12</sup> Ie isoide. Cristona comini jitaiñena jira, ie comini nairaimona jino uillanona, naimiena meinetimaci. Nainomo jeacino facaina fiodaite, comini comeciaina raise finollena.

<sup>13</sup> Ie jira Moisés micori lloga rafuena cai fainonocada, dani Jesucristo rafuedo cai jailli. Naimiena jeare finodimaci. Caina jeare finoia, naimiena jaca ñnocana cai jailli.

<sup>14</sup> Beno jaca cai illemo ocuriñedicaí; iadedi monamo Jusiñamui diga cai jaca illemo ocuridicaí.

<sup>15</sup> Jesús finoca rafue muidona, Jusiñamuimo iobillacinona jaca cai fecaja. Jusiñamuina cai uiñuamona, naimiemo iobillacinona jaca cai fecaja.

<sup>16</sup> Marecinona finocana mai cai jailli. Jiaie creyente jitai raillano, omoi raruiaimona naimiena omoi cano. Iena omoi finoia, Jusiñamui omoiñi iobite.

<sup>17</sup> Omoi llofueraini uaina ñno. Naimaci anamo raise omoi i. Cristo dibeimo omoina raise itataiacadimaci. Iese naimaci finoacaiñenia, Jusiñamui naimacina duere finoite. Naimaci uaina omoi ñnoia, Cristo dibeimo caimare majiitimaci. Naimaci uaina omoi ñnoñenia, sunaitimaci. Sunailla jira, naimaci llofuiacinomona buena oñeitomoi.

<sup>18</sup> Jusiñamui diga omoi ñaia, cai facaina omoi jii. Jusiñamuimona cai comeciaina marena illana uiñoticaí. Naimie jitailla isoi, mare rafuena finocana jaiacadicaí.

<sup>19</sup> Omoi dine cue raire illena cue facaina Jusiñamuimo eo omoi jii.

#### *Naimaci marena jaca illana jitaide*

<sup>20</sup> Jusiñamui conini omoi comeciaina uri itatajana jitaidicue. Cai Nama Jesús fiodailla mei, Jusiñamui naimiena jai jillotate. Jusiñamui llua isoi, Jesús fiodaite. Naimie fiodailla jira, Jusiñamui cai jeacinona feitate. Naimie fiodailla jira, naimie anamo cai illamona, caina raise sedarede.

<sup>21</sup> Jusiñamui ie jitaillacino omoi finuana canoite. Cristona omoi ñnuana canoite. Mare rafuena omoi finuana canoite. Jesucristo uaido omoina canoite, naimie jitaillacinona omoi finollena, Jesucristomo iobillacinona cai jaca fecajasa. Iena jitaidicue.

<sup>22</sup> Cue amataí, bie cartana caimare feño. Eo are rafuena cueñedicue. Janore cueticue.

<sup>23</sup> Cai ama Timoteo cárcelmona jai jino bite. Cue dine naimie raire bia, omoi dine naimiena atiitcue.

<sup>24</sup> Nana omoi llofuerainimo cue uaina oredicue. Ua nana creyentiaimo cue uaina oredicue. Itaiamona bitino imaci uaina jiaí oredimaci.

<sup>25</sup> Jusiñamui omoina jaca duenaillana omoi uiñuana jitaidicue. Mai. Macaibaite.

## SANTIAGO ORETAGA RABE

### *Uaiduacino*

<sup>1</sup> Caimaci, omoimo cartana oredicue. Santiagodicue. Cue mameci jiaicidi Jacobo. ¿Nigacino? ¿Nie isoidomoi? Jusiñamui jitailla rafuena cue finuamona, bie rafuena llofuecabiticue. Cai Nama Jesucristo facaina jiai llofuecabiticue. Cai doce nairaiaimo omoi duillamona, omoi jai judaisilla jira, omoimo cue uaina oredicue.

### *Ramo omoi jiriadedi, omoi comeciaina mairita*

<sup>2</sup> Amatiai, diga ie ramo omoi jiriadedi, eo iobilla.

<sup>3</sup> Ramo omoi jiriadedi, Jusiñamui uaina raise omoi inuana uifioitomoi. Iemona omoi comeciai mairillemona, inocana omoi jaitomoi. Biena omoi uifua jira, iobilla.

<sup>4</sup> Mairicana omoi comeciai jaia, omoi comeciaidi marebicaite. Marebicaillamona, omoi comeciaino buena fiebicaiñeite. Nana Jusiñamui llogacinuaina ja muidomo inoitomoi;

<sup>5</sup> iadedi omoimo rafue ia, niese nibaiana omoi uifioñenia, Jusiñamuimo jica. Ie mei omoimo naimiedi abi uifioracinona iite. Jusiñamuidi nana naimiemo llotinomo iena caidiñeno icabilla jira, omoimo iena jiai iite;

<sup>6</sup> iadedi omoi jicaia, uai inuanona jica. Omoi comeciai inoñenia, jicañeno. Comecina inoñedimiedi aifi betaja jorai isoide. Naimie comeci naganomo iite.

<sup>7</sup> Naimiedi Jusiñamuimona ra feifiolemo tainona sedaite.

<sup>8</sup> Naie isoidimiedi nana naimie illa dinori ie comeci naganomo iite.

<sup>9</sup> Naimie ramo jiriadedi, Jusiñamuimona naimie jamai bue isoifiena jira, duerede creyente iobilla;

<sup>10</sup> iadedi ramo jirillamona ie ucubena naimie faifia, Jusiñamuimona naimie ucubedi ieñena jira, ucuberede creyente iobilla. Safia isoi, naimie ico safenaite.

<sup>11</sup> Jitoma a ia, eo ecasillamona, safia safenaite. Llriride. Ie mei jai ebinide. Jai iñede. Ie isoi ucuberedimie safenaite, naimie maijianona. Ie mei naimie ucube bene jamai fiebite; ia Jusiñamui diga naimie jaca illamona, naimie jaca iobite.

### *Nana mare rafue Jusiñamuimona feifioticai*

<sup>12</sup> Ramo jiritimiedi ie comeci mairia, caimare iite. Jai naimie facacifilla mei, naimie comeci mairilla mei, Jusiñamuidi naimiena caimare itataite. Jusiñamui jai llote: “Cuenta isiruitinona cue illanomo jaca itataiticue”.

<sup>13</sup> O ramo bu faia, lloñeno: “Jusiñamuidi cuenta ramo faite”. Maraiñede rafue dibeimo naimie iñena jira, naimiedi buna ramo jaca faifede.

<sup>14</sup> Cai comecimo naie jitaillacino illa jira, ramo faia uai inoticaí. Naie facaiseconi caimona ebirena jirari, iena finoacadicai.

<sup>15</sup> Cai jitailla jira, jeacinona finodicai. Jeacinona finocabillanona jaillano, faifiticai.

<sup>16</sup> Ero, cue isiruiga amatiai, Jusiñamui omoína ramo faitatañena jira, naimiemona da mare rafue billa jira, dani omoi abina jifueñeno.

<sup>17</sup> Nana mare rafue cai Moomona feifioticai. Naimiedi monamo iite lligaiñoraniaina jai feinode. Naie radi nagarui daje isoi lligaiñoñede; iadedi naimie daje isoifede. Naimie comeci jacanano danoconi nagarui iite.

<sup>18</sup> Naimie jitailla jira, ie uai lluno, naimie caína ie uruiaina itatate. Ie uruiamona nano doforanidicai.

### *¿Nie isoide rafuena finoacadicai?*

<sup>19</sup> Cue isiruiga amatiai, Jusiñamui rafuemo raise cacarei. Ie mei naie uaina uaitañeno. Jiai raire iciriñeno.

<sup>20</sup> Icirillamona, Jusiñamuidi cai marena jitailla isoi, buna jaca marebicaiñede.

<sup>21</sup> Ie jira nana maraiñedicinona oni fañonocai. Jusiñamui uai omoi comecimo fecuise abi iedoñeno nagarui feifiocana omoi jai. Naimie ie uai omoi comecimo jai itatate, iduai eniruemo cai rilla isoi. Iduai sicuamona, llisilladi iite. Jusiñamui uai cai comeciaino itabillamona, caína jillotarede.

<sup>22</sup> Cacajamona iena inocana jai. Cacajanona iena omoi inoñenia, dani abina jifuetomoi.

<sup>23</sup> Bu naie uaina cacajamona inoñenia, naimiedi acaranimio eruaidimie isoide.

<sup>24</sup> Ie uiecona eruaiide. Naimie jailla meinoconi, ie eruaiilla ie uiecona jai raire feitate.

<sup>25</sup> Jusiñamui llogacinona bu eo facajia, iena feitañede. Tena inote. Naie uaidi jearedicino ie finuamona naimiena marena itatate. Jusiñamui uaina naimie feitañena jira, iena inua jira, naimie comeci caimare iite.

<sup>26</sup> “Jusiñamuina sedadicue” raillanona ie comecina facadimiedi jeare ñaia, marañeno ñaia, dama naimie abina jifueite. Jusiñamuina taino sedade.

<sup>27</sup> Cai Moo Jusiñamuina bu marena raise sedaacania, diga rafuena finoite: Naimiedi moonidinona canoite. Feciñuaina canoite, imaci sure illa facaiseconi. Jeacinona jiai finoacaiñeite. Jusiñamui dibeimo iñedino isoi iacaiñeite. Jusiñamui naimie iese sedajia, Jusiñamuimona eo mare.

## 2

### *Nana cominimo comeaiina lloitaicadica*

<sup>1</sup> Amatiai, cai Nama Jesucristo uai eo ebirede. Naimiena omoi inua jira, naimacimo daje isoi comeaii lloillamona, nana cominina daje isoi nafue.

<sup>2</sup> Ero, omoi roracomo mena ima bia, ¿nie imana nafueitomo? Dame ucuberedimie. Naimiemo oro ie anillos ite. Eo mare iniroina jitade.

<sup>3</sup> Ucuberedimieo llotomoi: “Bai bene bancomo rai”. Dueredimieo llotomoi: “Bai bene naidai. Raiacania, eniruemo rai”.

<sup>4</sup> Iese omoi lloia, damiena jai raise nafuetomoi; ia damiena jai raise nafueñedomoi. Iaimaia iniroimo omoi eruailamona, nafuetomoi. Mare rafuemo comeaiina facañedomoi.

<sup>5</sup> Cue isiruiga amatiai, cacarei. Jusiñamuidi dueredinona fetode. Cominimona dueredimaci; ia Jusiñamuimona duenidimaci, naimiena naimaci eo inua illa jira. Naimiena naimaci isiruilla jira, naimie cominina jai jaidimaci. Naie isoidinomo jai lloite: “Omoimo cue illanona iiticue”.

<sup>6</sup> Ero, Jusiñamui dueredinona nafueite; iadedi dueredimiena jai nafueñedomoi. Dueredinomona duere sefueñedomoi; ia dueredimiena jai duere finodomo. Ucuberedinomona duere sefuicabidomoi; ia ucuberedimiena raise nafuetomoi. Majitallena, juez dine ucuberedino omoina uitatatimaci, omoina llogidollena. Dueredino iese omoina finoñedimaci; ia ucuberedinodi iena finocabidimaci.

<sup>7</sup> Cristomo omoi jainaiaillamona, ucuberedino naimiena jeare jiai ñaitimaci.

<sup>8</sup> “Cristo llogacino finodica” raillanomo comeaiina facajamona ucuberedimiena omoi nafueia, cuemona mare. Cristo naiena iese caimo lloite: “O jofe ecimo itinona isirui, dama o abina o isiruilla isoi”. Iese omoi ia, cuemona mare;

<sup>9</sup> iadedi nana cominina daje isoi omoi nafueñenia, jeacinona jai finodomo. Jai Jusiñamui llogacinona inoñedomoi. Jusiñamui llogacinomona jai marañeno itomoi.

<sup>10</sup> Nana Jusiñamui llogacinuaimona daje llogacinona omoi inoñenia, Jusiñamuimona nana naie llogacinuaina jai inoñedomoi.

<sup>11</sup> Jusiñamui caimo jai lloite: “O aiñede riño diga iñeno. O iniñede ima diga iñeno”. Jiai lloite: “Jaiimiena meineñeno”. O aiñede riño diga iñedio; iadedi jaiimiena o meineia, nana Jusiñamui llogacinuai jai inoñedio.

<sup>12</sup> Jaiiruido Jusiñamuidi juez isoi omoimo lloite. Omoi comeaiimo iticino diese omoimo lloite. Ie jira marena ñaino. Marena i.

<sup>13</sup> Ero, omoimo naimie lloia, jiaie cominina omoi birui duenaiñenia, Jusiñamui naie facaise omoina duenaiñeite. Omoimo riire lloite. Omoina duere finoite; iadedi jiaie cominina birui omoi duenaia, Jusiñamui naie facaise omoina jiai duenaite. Duere sefullena omoimo lloñeite.

### *Jusiñamuina cai inuamona, diga rafuena cai fnua*

<sup>14</sup> Amatiai, “Jusiñamuina inoticue” raitimiedi mare rafuena jaca finoñenia, ¿nieie naie inoracinodi naimiena jillotaite? Jillotañeite.

<sup>15</sup> Jiaie rafuedo iena lloiticue. Omoimona daje creyente iniroinia, guille iñenia,

<sup>16</sup> naie creyente omoi dine bia, naimiemo omoi lloia: “Mai jai. Rosiruiñeno. Marena ailluena guño”; ia naimiemo jaca buena omoi fecañenia, ¿bue ñellena iese naimiemo raitomoi?

<sup>17</sup> Ero, Jusiñamui omoi inuamona mare rafuena omoi finoñenia, omoi inoracino iefede.

<sup>18</sup> Omoimona dame cuemo nibai lloite: “Jusiñamuina raise inoticue”. Jiaimie cuemo nibai lloite: “Mare rafuena finocabidicue”. Iaimaiaimo lloiticue: “Jusiñamuina cai raise inoia, mare rafuena finocabitica. Mare rafuena cai inuamona, Jusiñamuina cai raise inuana uifioitica”.

<sup>19</sup> Dajede Jusiñamuidi illana inotio. Iena o inuano, mare; iadedi jananiai iena jai inotimaci. Ie jira Jusiñamuina jaciruitimaci.

<sup>20</sup> “Jusiñamuina raise inoticue” nibai nia raitio. Abina raise nia uifioñedio. Mare rafue o jiai finoñenia, dama abi o inoracinodi iefede.

<sup>21</sup> ¿Niese Jusiñamuimona cai usuma Abraham micoridi marebicaide? Naimiedi mare rafuena finuamona marebicaide. Jusiñamui jitailla rafuena naimie finuamona, faga ocaina isoi, naimiedi Jusiñamuimo ie jitona fecade. Naimie jitodi Isaac micori.

<sup>22</sup> Abraham micori ñnote. Mare rafuena jiai finode. Mare rafue naimie finuamona, naimie jai raise ñnote.

<sup>23</sup> Iemona Jusiñamui ie llogacino suide. Iena Moisés micori cuete: “Abraham micori Jusiñamuina ñnote. Ie jira Jusiñamuimona naimie marebicaide”. Jiai cuete: “Naimiedi Jusiñamui nabai”.

<sup>24</sup> Abraham micori rafuemona daje rafuena uiñoticaí. Dama ie ñnoracino diga jaca bu marebicaíñede; iadedi Jusiñamuina ñnuano, mare rafuena finuano, marebicaide.

<sup>25</sup> Jiaie rafuedo iena lloiticue. Jaiie Rahab raillañaño ite. Naiñaño callirediñaño. Mare rafuena finuano, naiñañodi Jusiñamuimona marebicaide. Naiñañodi ie jofomo Josué ie rafuena uraimaiaina feñote. Naiñaño nairaidi iaimaiaina meinellena jenodimaci. Meinehellena, naiñaño iaimaiaina reide. Ie mei iaimaiaina bainino oretate. Mare rafuena naiñaño finuamona, Jusiñamuimona naiñaño marebicaide.

<sup>26</sup> Ero, bumo ie joreño jai iñenia, cajeñede. Ie isoide. Mare rafue bu finoñenia, ie ñnoracinodi ieñede.

### 3

#### *Cai fuiaimona jeacinodi comuide*

<sup>1</sup> Amatiai, omoimona diga comini creyentiaina llofuerainina jaiñeno. Jusiñamuidi juez isoi ñco lloite. Llofueraini jiaie comini baifemo uiñuamona, Jusiñamui rafuena naimaci eo raise ñnoñenia, Jusiñamui naimacina jiaino baifemo duere finoite. Iese riire naimacimo lluaña jaciruillano, llofuerainina ailluena jaiñeno.

<sup>2</sup> Nana caidi diga maraiñede rafuena finocabidicaí. Maraiñedicinona bu ñaiñenia, jai marebicaide. Naimie nana ie comeci namarede.

<sup>3</sup> Jiaie rafuedo iena lloiticue. Caballos cai jitailla rana finollena, imaci fuemo lloemamona finoca janorede rana joneticai. Ie mei nana caballo ie abina namatadicaí.

<sup>4</sup> Riire aifi aillue botena ñine uiacade; iadedi eo janorede quilla diga, ie jailla ñine piloto botena dataoicaide.

<sup>5</sup> Ie isoide cai fuiai. Eo janorede; iadedi cai fuiaimona diga rafuena comuide. Ero, eo janorede iraimona nana rasillaina bootate.

<sup>6</sup> Cai fuiaidi irai isoide. Caimo jeacinona eo finotate. Nana cai comeciaina jearetatate. Taifemona ie uai ote. Nana cai ille dinori caina jearedicinona finotaicade.

<sup>7</sup> Nana rana toiredicaí: ocainaiaí, sillíñiaí, ofomaiaí, eniruemona biicaidino, lliciaí. Nana toiredicaí;

<sup>8</sup> iadedi jaca bu ie fuena namatanide. Cai fuiai jaca eo maraiñede. Iemona eo maraiñede rafue icabite.

<sup>9</sup> Cai fuiai diga cai Namamo, ua cai Moomo, marecinona lloticaí. Caina naimie finuamona Jusiñamuina eruaidicaí; iadedi cai fuiai diga naimiena jeare jiai ñaiticaí.

<sup>10</sup> Cai fuedi dajede; iade marecinona ñaiticaí. Maraiñedicinona jiai ñaiticaí. Amatiai, iese cai ñaiñena.

<sup>11</sup> Ero, daje pozomona mare jinui, erireden jinui diga, oñedicaí.

<sup>12</sup> Amatiai, higuera railla riaramona aceitunadi comuiñede. Uvas railla riaramona higo railla riaradi jiai comuiñede. Cuere de jinuiimona mare jinuiña oñedicaí. Cai fuiaimona jeacino comuiñellena, cai fuiaína cai namataja.

#### *Ua abi uiñoracino*

<sup>13</sup> Omoimona, ¿bu ua abi uiñote? Naimie ua abi uiñoiña, naimie marena illamona, iena uiñoitomoi. Abi iedoñeno mare rafuena naimie finoia, naimiemo ua abi uiñoracino illana uiñoitomoi;

<sup>14</sup> iadedi naimie abi eo uradoia, dama naimiemo ite ramo comecina facaia, naimie abi uiñoracino diga naimie abina iedoñena. Jai tainona llote. Naimie llua isoi iñede.

<sup>15</sup> Naie isoide uiñoracinodi Jusiñamuimona iñede. Bie enirue ie. Comini ie. Taife ie.

<sup>16</sup> Comini abina uradoia, ñani naimacimo ite ramo comeciaina naimaci facaia, comini uri iñedimaci. Diga maraiñede rafue naimacimo ite.

<sup>17</sup> Jusiñamuimona ite ua abi uiñoracinodi mare. Bumo ia, uri ite. Riinide. Comeci jinide. Jiaie cominina duenaite. Mare rafuena finocabide. Cominina raise nafuete. Abi tainona jifueñede.

<sup>18</sup> Bu uri ia, jiaie cominina uri itatate. Ie jira naimie marena iite, Jusiñamui jitailla isoi.

## 4

*¿Bue ñellena uri iñedicai?*

<sup>1</sup> ¿Bue ñellena fuiriruidomoi? ¿Bue ñellena iciriruidomoi? Omoi começiaimo maraiñedicino illa muidona. Omoi começiaimo maraiñeno jitaillacino illa muidona. Naie jitaillacino omoi começiaimo namataacana muidona.

<sup>2</sup> Rana jitaïdomoi. Iena omoi feiñoñena jira, naimaci rana fiïllena, comena meinetomoi. Eo uradoidomoi. Omoi jitaïlle rana feiñoñena jira, fuiridomoi. Omoi jitaïlle rana Jusiñamuimo omoi jicañena jira, iena feiñoñedomoi.

<sup>3</sup> Jiaicaiño Jusiñamuimo jicadomoi; iadedi raise jicañedomoi. Ie jira iena feiñoñedomoi. Dani omoi jitaïlla ra feiñoñena, omoi comeci jaisillena, jicadomoi.

<sup>4</sup> Jusiñamuina birui raise jitaïñedomoi; ia naimie dibeimo iñedinona jai jitaïdomoi. Bie eniruego ite rafuena omoi isiruïllamona, Jusiñamuina jai raise nabaiñedomoi. ¿Ñiese iena uiñoñedomoi? Bu naie rafuena isiruiacania, Jusiñamui dibeimo jai iacaiñede.

<sup>5</sup> Jusiñamui cuetatagafuiaina raise facañedomoi. Naiedi caïmo lloite: “Jusiñamui omoïmo jai fecaca Joreñodi omoi comecina eo raise namataacade”.

<sup>6</sup> Caina eo duenailla jira, naimie dibeimo cai raise illena, Jusiñamuidi caina eo canoacade. Jusiñamui cuetatagafuiái iena lloite: “Jusiñamuidi abi iedotimiena canoñede; iadedi abi iedoñedimiena canode”. Naimie dibeimo iacaiñedimiena ñaite. Naimie dibeimo iacadimiena canuana jiaï ñaite.

<sup>7</sup> Ie jira Jusiñamui anamo omoi i. Naimiena raise omoi iino. Taife uaina jitaïñenanona, naimie uaina oni caiño. Ie mei omoïmona naimie oni jaite.

<sup>8</sup> Jusiñamuina nabaiïllena, naimie dine iaïre omoi i. Ie mei naimie omoi ðine iaïreno iite. Jeacinona finoraiñi, omoi começiaï iuaïllaina meido. Naganomo omoi começiaïna facañeno. Omoi começiaïna marena fino.

<sup>9</sup> Maraiñede rafue omoi jai finuamona, omoi sunai. Jaisiñeno, ie ia omoi jeacino facaina omoi mai ee. Caimare iñeno; ia omoi jeacino facaina omoi mai sunai.

<sup>10</sup> Jusiñamui dibeimo abina iedoñeno omoi i. Ie mei naimie omoi começiaïna iobitaite.

*Jiaïno jinafomo jeare ñaïñeno*

<sup>11</sup> Amatiai, maraiñede rafuena naimaci finoiadedi, jiaïno jinafomo jeare ñaïñeno. Creyente jinafomo bu jeare ñaïa, creyentena bu jicoïa, creyentena naimie isiruiñena jira, Jusiñamui uaina raise iñoñede. Jusiñamui uaina naimie iñoñenamona. Jusiñamui uaina jiaï jamaiñocaide.

<sup>12</sup> Jusiñamuidi maraiñede rafuena finodimiena duere finoite. Cai jeacinomona caina jillotarede. Cai jeacino facaina caina duere finorede. Ie jira jiaïe creyentena jicoñeno.

*Ico are caïmo suite rafuena uiñoñedicai*

<sup>13</sup> Jiaïe rafuena lloiacadicue. Nibai llotomoi: “Birui jiaïe nairaimo jaiticai. Birui cai jaiñenia, ico are jaiticai. Rana fecajamona ucube cai ollena, nainomo daje año iticai”.

<sup>14</sup> Iese llotomoi; iadedi ñie isoide rafue ico are illena uiñoñedomoi. Cai ille ðinori uillie illa isoi iticai. Dallu bene iticai. Ie mei jai iñedicai.

<sup>15</sup> Ie muidona omoi llua: “Cai Nama jitaïa, ñia iticai. Cai Nama jitaïa, ñie isoide rafuena finoiticai”.

<sup>16</sup> Iena lloñedomoi; iadedi dani omoi começiaïna facajano llotomoi. Iemona eo abina iedotomoi. Abina ieduadi maraiñede.

<sup>17</sup> Mare rafuena finuana uiñoñimiedi; mare rafuena finoñenia, jeacino jai finode.

## 5

*Ucuberedinomo llucino*

<sup>1</sup> Ucuberedino, daje rafuena omoïmo jiaï lloiacadicue. Omoïmo ramo jirite. Ja eo duere sefuitomoi. Ie jira cuiri-cuiri ee.

<sup>2</sup> Omoi raruiaï ja sabite. Omoi mare iniroï ja sabite, ibuisai guilla jira.

<sup>3</sup> Omoi ucube ja iefieite. Iefiena jira, comini omoi faïfillana uiñoñimaci. Abina faïfitomoi, iraimo ra boa isoi.

<sup>4</sup> Ero, aïlluena ucube irairuillaï iena jai eenotomoi. Naie facaisedi jai ride. Omoi maijiraïni maijiraïmona ucubedi omoïmo ñia ite. Omoi eniruego maijiraïmaci; ia naimacina raise ibañedomoi. Jai eedimaci. Cai nanoca Nama iena cacade.

<sup>5</sup> Omoi illa ðinori aïlluena raruiaï omoïmo ite. Nana omoi começiaï jitaïlla rafuena finodomoi. Omoi comeci jitaïlla isoi itomoi. Naie iba ollirui jai ride.

<sup>6</sup> Maredinona duere finodomoi. Ñie isoide rafuena omoïmo finoñedimaci. Abina riidoñedimaci; iadedi naimacina meinetomoi. Ie jira Jusiñamuimona ja duere sefuitomoi.

*Cai Nama billemo fecuise omoi ocuiri*

<sup>7</sup> Amatiai, cai Nama billemo fecuise omoi ocuiri. Cominidi imaci illimona riaru feiñuana sedadimaci. Noci deillemo fecuise ocuiri. Ie mei riaru llisillana otimaci.

<sup>8</sup> Ie isoi cai Nama billemo fecuise ocuiri. Omoi comeciai rucaicueriñeno, cai Nama billemo illa jira.

<sup>9</sup> Duere omoi sefua, Jusiñamui juez isoi omoi lloi raillano, “Jiaie creyente muidona duere sefuidicue” raiñeno. Jusiñamui omoi illana raise uñote.

<sup>10</sup> Amatiai, Jusiñamuina lloraini micoriaimona cai fueua. Cai Nama dibeimo ñaitimaci. Duere sefuidimaci; iadedi eecuñedimaci.

<sup>11</sup> Naimaci Jusiñamuina fainonocaiñena jira: “Naimaci comeciaidi caimare itimaci” raiticai. Job micorina jiai comecitacai. Naimie jiaie ite. Naimie eefieno duere sefuide. Duere sefuide; ia Jusiñamuina fainonocaiñede. Ie mei ja muidomo nie isoide cai Nama naimiena finuana uñotacai. Cai Namadi naimiena duenailla jira, naimiena raise canode. Caina jiai duenaite. Ie jira caina jiai canoite.

<sup>12</sup> Cue amatiai, nanoca rafuena nia lloiacadicue. Omoi lloga uai omoi finollena jiaie comini uñollena, Jusiñamui mamecina llotomoi. “Tena cai linoia, cai lloga uaina cai finoñena, Jusiñamui caina duere finoite” raitomoi. Omoi lloga uai omoi finollena, Jusiñamui mamecina jamai ebena llinoñeno. Monamo ite ra mamecina jamai ebena llinoñeno. Eniruemo ite ra mamecina jamai ebena llinoñeno; iadedi nie isoide rafuena omoi llumona, uanaicinona jaca llono. Iese llono, Jusiñamui omoina duere finoi raillano.

<sup>13</sup> Omoimona duere sefuidimie ia, naimie Jusiñamuimo jicaja. Comeci caimare itimie ia, Jusiñamuimo iobillacinona rua.

<sup>14</sup> Duidimie ia, naimaci naimieri Jusiñamuimo jillena, creyentiaina sedarainina uaidua. Naimacidi farena naimie abimo gia, cai Namamo jianona, naimie ie duicomona jilloillena.

<sup>15</sup> Inuano jiaia, jilloite. Cai Nama naimiena jillotaite. Naimie finoca jeacinona oni jiai dotajite.

<sup>16</sup> Ie jira coninimo omoi marañedicinona llono. Ie mei Jusiñamuimo coniniaina omoi jii, omoi duicomona omoi jilloillena. Jusiñamuimo marebicaidimie jiaia, diga rafuena finorede.

<sup>17</sup> Eliana comecitomoi. Jiaie ite; ia naimiedi cai isoide. Jusiñamuimo jüide, noci deiñellena. Ie mei daje amani fiemona abimo atomonado jaca deiñede.

<sup>18</sup> Ie mei dane jüide, noci deillena. Ie jira noci deide. Ie mei riaru dane sicode.

<sup>19</sup> Amatiai, omoimona damiedi Jusiñamui ie uanaicino dibeimona jiaia, dane Jusiñamui dibeimo naimiena bu itataia, eo mare.

<sup>20</sup> Iena bu finoia, naimiena ie uañedicinomona itatate. Faiñillemona jai jillotate. Jusiñamuidi naimie jeacinuaina oni dotajamona, iemona jiai jillotate. Mai. Santiagodicue.

## PEDRO NANO ORETAGA RABE

### *Tuude cominimo Pedrodi cartana cuete*

<sup>1</sup> ¿Nigacino? ¿Nie isoidomoi? Bie carta omoimo oredicue. Pedrodicue. Jiaie comini motomo birui itomoi. Ponto railla eniruemo itomoi. Galacia railla eniruemo itomoi. Capadocia railla eniruemo itomoi. Asia railla eniruemo itomoi. Bitinia railla eniruemo itomoi. Diga eniruemo omoi tuua jira, bie rafuena omoimo lloiacadicue.

<sup>2</sup> Naimie jitaillamona, cai Moo Jusiñamui omoina fetode. Naimie Joreñodi omoimo illamona, omoi comeaiina marebicaitate. Jesucristona omoi ñnollena, omoi jeacinomona omoi jilloillena, Jusiñamui omoina fetode. Jesucristo fiodailla jira, naimie diailla jira, naimie cominina jaidomoi. Jusiñamui omoina duenaillana uifocana mai omoi jai. Jusiñamui omoina uri itatajana uifocana mai omoi jai.

### *Jesucristo diga jaca cai illemo ocuridica*

<sup>3</sup> Naimiedi cai Nama Jesucristo ie Moo illanona, cai Moo Jusiñamuimo iobillacinona cai fecacabillesa. Naimie caina eo dueruillamona, naimiedi cai comeaiina raise finode. Fiodaillamona Jesucristo jillua jira, naimie diga jaca cai illena, ñnocana cai jaillemo jiai ocuridicai.

<sup>4</sup> Omoi ocuririllafuedi monamo ite. Faiññeitomoi; ia nainomo caimare marena jaca iitomoi. Jusiñamui iese omoina itataite.

<sup>5</sup> Jusiñamuina omoi ñnuua jira, naimie illanomo ico omoi illena, ie uaido naimiedi omoina birui sedade. Ico Cristo bia, iena raise uifoitomoi.

<sup>6</sup> Ieri iobidomoi; iadedi dallu diga rafuemonona duere sefuidomoi.

<sup>7</sup> Jiaie rafuedo iena lloiticue. Ero, ua oro raise omoi uifollena, orona facacitomoi. Irai emodomo rainajamona, cocuillamona, gajamona, difai oro jai fiebide. Iena "Mare" llotomoi. Oro eo raifide; iadedi jaca iñede. Ie isoide. Cristona omoi ua ñnuana facacillena, diga rafuemonona duere sefuidomoi. ñnocana omoi jaillamona, Jesucristo abido bille facaiseconi Jusiñamuidi omoina: "Mare" lloite. Omoiri eo iobite.

<sup>8</sup> Jesucristona jaca cioñnedomoi; iadedi naimiena jai isiruitomoi. Naimiena jaca cioñnedomoi; iadedi naimiena jai ñnotomoi. Ie jira eo iocire itomoi.

<sup>9</sup> Cristona omoi ñnuamona, jeacinomona jai jillobidomoi.

<sup>10</sup> Jusiñamui facaina lloraini micoriaidi Jusiñamui omoina jai duenaillana jaie llotimaci. Jusiñamui omoina jilluana jaie llotimaci. Iena naimaci raise cacaiñenia, naiemo comeaiina facauidimaci.

<sup>11</sup> Cristo Joreño naimacina uifotajamona, Cristona llotimaci. Cristo duere sefuillena llotimaci. Fiodaillamona naimie jilloillena jiai llotimaci. Monamo naimie abido jaillena llotimaci. Bumo iese ico suillena uifoiacadimaci. Naie facaise illemo comeaiina jiai facadimaci.

<sup>12</sup> Jusiñamuidi naie rafue naimacimo duiñenana uifotade. Naimacina naie rafue caimo duillana jiai uifotade. Jusiñamui ie Joreñona monamona naimacimo oretajanona, ie uaido naimaci lluaamona, naimie facaina llorainimona bie mare rafuena birui jai cacadomoi. Jusiñamui jaienisa; bie rafuena jiai raise uifoiacadimaci; ia cai isoi iena uifoiñedimaci.

### *Naimie jitaillacinona cai fnollena, Jusiñamui caina fetode*

<sup>13</sup> Ie jira omoi comeai raise marena fino. Ebena jaiñeno. Jesucristo abido bia, Jusiñamui omoina jai jilloitajana ua raise uifoitomoi. Iemo iocire ocuiri.

<sup>14</sup> Jusiñamuina omoi nia uifoiñena facaise dan; omoi comeai; jitaillu rafuedo jaisoidomoi. Naimiena omoi jai ñnuua jira, naimiena omoi nia uifoiñega facaise finoca rafuedo birui omoi jaiñeno. Mare urui; imaci moo uaina ñnotimaci. Jusiñamui uruiaina omoi jai illa jira, naimie uaina ñno.

<sup>15</sup> Jusiñamui ie uruiaina omoi illena, jai omoina fetode. Naimie mareuilla jira, marena omoi i.

<sup>16</sup> Iena naimiedi jaie cuetatate: "Cue mareuidimiena isoi, marena omoi i".

<sup>17</sup> Cai Moona Jusiñamui illamona, naimiemo birui jidomoi; iadedi juez isoi nagamiemo ico Jusiñamui llua jira, nana omoi ille dinori jaciruicana omoi jai. Nagamiena ie marañede finoca rafue diese duere finoite; ia marañede rafuena finoñedimiena duere finoñeite.

<sup>18</sup> Omoi einamac; rafuedo jaie jaisoidomoi. Naie rafue jamaifue. Naifuemonona Jusiñamui omoina jai jillotate. Hatajamona omoi jeacinomona jillotañede. Ucubedi raire cueruide. Raire cueruide ra diga omoina jillotañede;

<sup>19</sup> iadedi Cristo diruedo naimie daciaño fiodaillamona, omoina jaca jillotate. Cai comini imaci jeacino facaina mare toica laudana fauidimaci; ia Cristomo jeacino ifena jira, cai jeacino facaina birui daciaño fiodaite.

<sup>20</sup> Caina jilloitallena, enirue nia ifena facaiseconi Jusiñamui Cristona jaie fetode. Naimiena omoi uifollena, birui bene eniruemo Jusiñamui naimiena oretate.

<sup>21</sup> Cristo muidona Jusiñamuina inotomoi. Cristo fiodaite; ia lemona Jusiñamui naimiena jillotate. Ie mei monamo ie ecimo naimiena dane itatate. Ie jira Jusiñamuina inotomoi. Omoi fiodaia, dane jilloillemo jiai jai ocuiridomoi.

<sup>22</sup> Uanaicinona omoi inuamona, omoi comeciai jai jeanidimaci. Ie muidona jiaie creyentiaina isirucana omoi jai. Omoi comeciaimona conini omoi isirui.

<sup>23</sup> Jusiñamui cominina jai jaidomoi. Naimie uaido iese jaidomoi. Comini uaido iese jaidomoi. Naimie uai jaca fufite. Jaca iite. Naie uaido naimie cominina jaca iticai.

<sup>24</sup> Jusiñamui facaina lloraima micori iena jaie cuete:

Nana cominidi raiticiai isoidimaci.

Safia dallu ebirede; iadedi raiticiai ie safia diga are ifede.

Ie isoide. Diga rafuena finuanona, dallu iticai.

Are ifedica;

<sup>25</sup> iadedi Jusiñamui uai jaca ite

cuete. Naie uaidi mare rafue. Naie rafuena birui jai cacadomoi.

## 2

<sup>1</sup> Jusiñamui cominina cai illa jira, jiaie cominina gaiñenacinona fainonocai. Nana jifuuacinona fainonocai. Abina caitajacinona feita. Nana abi uradoillacinona feita. Jiaie comini joreña ñaifeno.

<sup>2</sup> Ero, raise moonallena, raise eairellena, janosa mono iijina jitaide. Ie isoide. Omoi comeciai raise marena illena, Jusiñamui rafuena jitaidomoi.

<sup>3</sup> Cai Nama omoina duenaillana jai omoi uifruamona, naimie uaina inocana jai.

*Cristodi jofomo ite nanoca nofici isoide*

<sup>4</sup> Ie cominina raise omoi illena, Jusiñamui rafuena finocana jai. Naimie omoina jai fetode. Naimiemo omoi raise duillana jitaide. Iena omoi raise uifollena, jiaie rafuedo iena lloiticue. Naimiedi jofona niacade isoide. Noficimona niacade. Diga noficina jitaide. Naimie naie noficiaina jai fetode. Nanoca nofici diga naie jofonillana tainede. Cristodi naie nanoca nofici isoide. Cai nairai Cristona jaie jitaifidimaci; iadedi Jusiñamuimona naimie mareddimena jira, Jusiñamui naimiena fetode. Caidi jiaie noficiai isoidicai. Ie jofona nillena isoillena, Jusiñamui caina fetode.

<sup>5</sup> Naimiena cai jai inua jira, naimie cominina jai jaidicai. Naimie diga jai atona ñairedicai. Naimie diga jiaie comini facaina jiai ñaicabiticai. Naimiena cai raise sedallena, Jesucristo caina canuamona, Jusiñamui jitaillacinona finocana jaidicai.

<sup>6</sup> Jusiñamui facaina lloraima iena jaie cuega:

Ero, Jerusalémo cue jofona nillena, daje noficina fetoiticue.

Eo mare noficina fetoiticue. Cue Jitona ñaiticue.

Naimiena jai fetodicue. Naimiedi eo mare.

Naimiena inuamona, comini iobitimaci

cuega.

<sup>7</sup> Naimiena omoi inoia, Jusiñamui omoina iobitaite. Naimiena omoi inoñena, faifitomoi. Jusiñamui facaina lloraima micori iena jaie cuega:

Jofona finoraini jitaifena noficidi nana naie jofomo ite noficiai baifemo jai faiga cuega. Ie isoide. Cai nairai Cristona jitaifede; iadedi Jusiñamui naimieri eo iobide.

<sup>8</sup> Dane cuega:

Nine naimaci macaria, naie noficimona eicaitaillamona, uaitimaci

cuega. Cristona cuete. Cristo uaina naimaci inoñena jira, Jusiñamui llua isoi faifitimaci.

*Pedro Jusiñamui fetocanona llofue*

<sup>9</sup> Jusiñamui jai fetocanodomoi. Naimiemo omoi jai duillamona, naimie diga atona ñairedomoi. Jusiñamui ua cominidomoi. Naimiena omoi nia inoñena, jeacino anamo omoi illa jira, jitreddinomo itomoi isoidomoi. Naiemona omoina jai jillobitate. Naimie anamo jai omoi illamona, userednomo jai itomoi isoidomoi. Eo mare rafue omoimo naimie finua jira, iena llocana omoi jai.

<sup>10</sup> Jai Jusiñamui cominidomoi; iadedi birui Jusiñamui cominidomoi. Naimie omoina duenaillana jaie uifonedomoi. Birui iena uifotomoi.

*Pedro Jusiñamui jitaillacinona finocana cai jaillana llofue*



<sup>11</sup> Cue isiruiگانodomoï. Jusifamui illanomo omoï birui jainaiaila jira, eniruemو jaca ifeïtomو. Eniruemو jaca omoï ifena jira, jeacinona finocana jaiïeno. Jeacino omoï comeciaina namataacana jira, iena ebiruiïeno, naie anamo omoï i raillano.

<sup>12</sup> Jusifamuina ifnoïedino motomo omoï illamona, mare rafuena finocana jai. Omoina birui jeare ñaitimaci; iadedi omoï marena illana naimaci uifnuamona, Jusifamuina ico naimaci ifnoia, naimieio iobillacinona fecaitimaci.

<sup>13</sup> Cai Namamo omoï duilla jira, illaicomini anamo raise i. Riai diga omoï nanoca illaima uaina ifno.

<sup>14</sup> Naimacina omoï illaicomini fetua jira, omoï gobernadores uaina ifno. Maraiïede rafue omoï finoa, omoina duere finoitimaci; iadedi mare rafuena omoï finoa, omoï iobitimaci.

<sup>15</sup> Jusifamuidi mare rafuena omoï finuana jitaide. Iena omoï finua jira, omoina ebena ñaitino uaina llicaitaitomو.

<sup>16</sup> Jusifamui anamo cai illamona: "Jiaie illaima uaina ifnoïeticai" raiïeiticai. Cai enirue illaima uaina cai ifnoïenia, jeacinona finodicai. Jusifamui dibeimo cai illa jira, naimie jitaillacinona finocana cai jailli.

<sup>17</sup> Nana cominimo marena fino. Nana creyentiaina isirui. Jusifamuina jaciruiocaida ifno. Riai diga omoï illaima uaina ifno.

#### *Cristo duere sefuilla rafuemona fueoiticai*

<sup>18</sup> Patrón anamo damierie itomو. Omoï patrón ocuica uaina ifnocana omoï jai. Omoï patrón marena fecuise ocuica, naimie uaina ifno. Naimie raire iciria, naimie ocuica uaina jiai ifno.

<sup>19</sup> Maraiïede rafuena omoï finoïenia, omoï patrón omoina duere finoia, Jusifamuimo omoï comeciaina facajanona, ibana ofeno. Ifana omoï ofenia, Jusifamuimona mare.

<sup>20</sup> Maraiïede rafuena omoï finoa, omoï patrónomona duere sefuitomو; iadedi maraiïede rafuena omoï finoïenia, omoï patrón omoina duere finoia, ibana omoï ofenia, Jusifamuimona mare.

<sup>21</sup> Duere omoï sefuia, ibana ofeno. Iese omoï illena, Jusifamui omoina fetode. Cristo cai facaina ibana ofeno duere sefuide. Naimie isoi cai illena, naimie isoi rafuena finocana cai jailli.

<sup>22</sup> Naimiedi maraiïede rafuena jaca finoïede. Tainona jaca lloïede.

<sup>23</sup> Comini naimiena jeare ñaitimaci; iadedi naimiedi uai ofede. Naimie duere sefuide; iadedi: "Omoina ico duere finoiticue" raiïede. Naimiedi Jusifamui naimacina ico raise duere finollena uifnote.

<sup>24</sup> Cruzmo naimie fiodaillamona jeacino anamo cai ifnellena, cai jeacino facaina naimie fiodaite. Jusifamui jitailla isoi naimie fiodaite. Naimie jai duere sefuilla jira, cai jeacinomona jai jillodicai.

<sup>25</sup> Sedaïega toica llaudaiai isoi jai ebena jaisoidicai. Cai sedaraima anamo jai iticai. Naimiedi cai comeciaina jai eenote.

### 3

#### *Pedrodi inirediñaiñuaina, aïredino diga llofue*

<sup>1-2</sup> Inirediñaiñuai, omoïmo jai lloiacadicue. Omoï iniñiai uaina ifno. Nibai birui Cristo rafuena ifnoïedimaci; iadedi omoï marena illamona, Cristo dibeimo naimacina itataitomو. Jusifamui uaina omoï ifnuamona, omoï marena illamona, damierie Cristona ifnoitimaci.

<sup>3</sup> Dañaiñorie abina eo finocabidimaci, naiñaiñuaina jiaie comini ebinaillena. Naiñaiñuai ifotena eo finocabidimaci. Eo raifide rana jitacabidimaci. Eo ebirede raifide iniroina jitacabidimaci. Naie isoide ra comecina marena itataïede; ia Jusifamui jitaillacinodo jaillamona, comeci marena ite. Jiaie comini omoina ebinai raillano, iese omoï ifeno;

<sup>4</sup> iadedi jiaie comini omoina ebinaillena, omoï comeci marena fino. Omoï iniñiai uaina ofeno. Naimaci jitailla rafuena fino. Omoï comeci iese ia, Jusifamuimona eo mare.

<sup>5</sup> Cai jaiagai facaise Jusifamuina ifnotiñaiñuai iese itimaci. Cue birui llofuia isoi, naiñaiñuai abina jai finodimaci. Naiñaiñuai iniñiai uaina ifnotimaci.

<sup>6</sup> Iese Sara micori ie ini Abraham micori uaina ifnote. Ie anamo naiñaiño illa jira, ie ocuica uaina jaca ifnote. Mare rafuena finocana omoï jai, buena omoï jaciruiïenia, naiñaiño isoi iitomو. Iemona naiñaiño uruiaina jaitomو isoitomو.

<sup>7</sup> Aïredino, omoïmo jai lloiacadicue. Omoï ainaiïmo comeciaina faca. Cai isoi naiñaiñuai mairiïena jira, naiñaiñuaina isiruillamona, naiñaiñuaina marena raise seda. Jusifamui omoina duenaillamona, naimie cominina jai jaidomو. Omoina jai jillotate. Omoï ainaina omoï raise sedaïenia, Jusifamuimo daajena raise jünidomوico.

*Cristo dibeimo cai illa rafue*

<sup>8</sup> Daje isoi comeciai lloicana jai. Coninina duenai. Naga creyentena isirui. Jiaisona cano. Abina iedoñeno.

<sup>9</sup> Omoína jiaie comini duere finoia, ibana oñeno. Omoína naimaci jeare ñaia, ibana oñeno; iadedi naimaciri marena ñaino. Mare rafuena cai finollena, Jusiñamui caina fetode. Iese cai jaia, Jusiñamui dinena: “Mare” caina raite.

<sup>10</sup> Jusiñamui facaina lloraima micori iena jaie cuega:

Marena uri jaca bu iacania, jeare ñaiñeno.

Tainona lloñeno.

<sup>11</sup> Jearede rafue finuana fainonocai. Mare rafuedo jai.

Omoi ecimo itino diga, uri icana omoi jai.

<sup>12</sup> Naimie jitailla rafue omoi finoia, Jusiñamui iena uifnuamona, omoína raise sedade.

Naimie diga omoi ñaia, iena cacade;

iadedi marañede rafue bu finoia, Jusiñamui naimie diga icirite.

<sup>13</sup> Mare rafuena omoi finocana jaia: “Marañede rafuena naimaci finua jira, naimacina duere finoiticaí” rainidimaci;

<sup>14</sup> ia mare rafuena omoi finuamona omoi duere sefua, Jusiñamui omoína canoite. Omoína duere finodinona jaciruiñeno. Jarire iñeno;

<sup>15</sup> ia omoi comeciai jitaillamona Cristona seda. Naimiedi cai Nama. “¿Bue ñellena Cristona ñnotomoi?” omoimo bu jicanoia, uaina raise ono. Fecuisse iciriñeno, uaina ono.

<sup>16</sup> Mare rafuena finocana jai. Omoína jiaño jeare ñaia, mare rafuena omoi finocabillamona meidaitimaci. Omoi marena illamona, tainona naimaci lluaña bairenite.

<sup>17</sup> Mare rafuena omoi finuamona, Jusiñamui jitaillamona omoi duere sefua, dama iese duere sefuitomoi; ia marañede rafuena omoi finuamona omoi duere sefua, omoi muidona.

<sup>18</sup> Cristomo omoi comeciaina faca. Dacaiño cai jeacino facaina naimie fiodaite. Naimie mareuidimie; iadedi marañedino facaina fiodaite. Jusiñamui dibeimo caina itataiacade. Naimiena meinetimaci; iadedi naimie joreño jaca ite.

<sup>19</sup> Ie joreñodo naimie jaillanona, jaie fiodaitino imaci joreñuai eenoranomo ie finoca rafuena lluaide. Naimaci nia fiodañenia, Jusiñamuina jaca ñnoñedimaci; ia Cristo ie finoca rafuena naimaci joreñuaimo lluaide.

<sup>20</sup> Jusiñamui rafuena jaie ñnoñedimaci. Noé micori facaise Jusiñamuidi naimaci naimiena ñnuamo fecuisse ocuride. Jinuimona jillobillena, Noé micori ie balsana finode. Ocho digamie jillobidimaci.

<sup>21</sup> Ie isoide. Omoi bautizaia: “Jusiñamui dibeimo jai iticaí” llotomoi. “Jeacinomona jai jillobidicaí” llotomoi. Omoi abimo ite jearenamona jillobiñedomoi; iadedi omoi comeciai jai marena ite. Fiodaillamona Jesucristo jillua muidona, jillobidicaí.

<sup>22</sup> Naimie jillua mei, monamo abido jai jaide. Jusiñamui ecimo naimie illamona, Jusiñamui uai naimiemo ite. Nana Jusiñamui jaienisai naimie anamo jai itimaci. Taifena Jesucristo anafefilla jira, Jesucristo anamo naimie ite; ia naimiena nia janafefitañede.

## 4

### *Jusiñamuimona cai feiñoga uai diga, naga jiaie creyentena cai canua*

<sup>1</sup> Cai isoi naimie illamona, Cristo duere sefuide. Naimie duere sefuide; ia jeacinona finoñede. Duere omoi sefua, naimie illamo omoi comeciaina faca.

<sup>2</sup> Nana omoi ille dinori comini jitaillacinodo jaiñeno; iadedi Jusiñamui jitaillacinodo omoi jai.

<sup>3</sup> Jusiñamuina uifnoñedinono isoi jaie bie isoide rafuena finouidomoi: Omoi aiñede riñoniai diga isoidomoi. Omoi iniñede iñiaí diga isoidomoi. Jearede rafuena ebruitomoi. Jifairuidomoi. Jiruana ebruitomoi. Jusiñamui rairuica jiraraina sedaudomoi.

<sup>4</sup> Naie isoide rafuena omoi jai finoñenia, Jusiñamuina uifnoñedinodi omoiñi rajjicaidimaci. Omoína jeare ñaitimaci.

<sup>5</sup> Iese itimaci; iadedi Jusiñamui uicomo ico itimaci. Naimacina duere finoite. Nia fiodañedinona duere finoite. Jai fiodaitinona jiaí duere finoite.

<sup>6</sup> Naimaci nia fiodañena facaise, Jesucristo rafuena cacadimaci. Jeacino muidona nana fiodaitimaci; iadedi naimaci navui ñnoia, naimaci joreñuai, Jusiñamui isoi, jaca itimaci.

<sup>7</sup> Bie enirue raire fuite. Ie jira ebena jaiñeno. Comeciaina raise faca. Jusiñamuimo raise jillena, iese omoi jai.

<sup>8</sup> Coninina isiruicana omoi jai. Omoi isiruillacino jiaie rafue baifemo faite. Jiaimie diga nicino ia, naimiena omoi isiruillemona, naicinona raire feitaítomoi.

<sup>9</sup> Jiaie cominina jafueoicaida feiñoñeno; ia caimare feiño.

<sup>10</sup> Creyentiaina omoi jailla facaise Jusiñamuimona omoi uaina feiñotomoi. Naimie dibeimo omoi majillena feiñotomoi. Nagamiemo daje isoide uai ifede. Omoi uai diga, naga jiaie creyentena cano.

<sup>11</sup> Cristo rafuena bu llofueia, Jusiñamui naimiemo llua isoi, naimie llofua. Jiaie creyentena bu canoia, naimiena Jusiñamui canuamona, naimie canua. Jusiñamuina cai iobitallena, nana cai finua rafuemonu Jesucristo mamecido iese cai jailla. Illaimana naimie illamona, caina jaca sedade. Naimiemo iobillacinona jaca cai fecacabillasa. Iena jitaidicue.

*Cristo dibeimo cai illamona, duere sefuiticaí*

<sup>12</sup> Cue isiruijanodomoi. Eo duere omoi sefua, rajicaiñeno. Creyentiaina omoi jailla jira, duere sefuitomoi. Jusiñamuidi Cristona raise omoi inuana facacite.

<sup>13</sup> Cristo jai duere sefuide. Naimie isoi omoi duere sefua, ieri iobi. Naimie dane bene bia, naimie bairiari eo iobitomoi.

<sup>14</sup> Creyentiaina omoi illamona, omoina bu jeare ñaia, caimare omoi i. Iemona Jusiñamui Joreño omoimo illana uñoitomoi. Naimie: “Mare” omoina raite.

<sup>15</sup> Jainodi cominina meinetimaci. Rana fiidimaci. Maraiñede rafuena finodimaci. Naimacimo duide rafuena abimo ofeno. Naie isoide rafuena bu finoia, duere sefuite. Iena omoi finoñeno. Naie isoide rafuena omoi finuamona omoi duere sefuillana jitaiñedicue.

<sup>16</sup> Creyentiaina omoi illamona omoi duere sefua, ieri meiruiñeno; iadedi creyentiaina omoi illamona, iobillacinona Jusiñamuimo feca.

<sup>17</sup> Jeacino facaina Jusiñamuidi comini birui duere finocabide. Jeacino facaina ie cominina nano duere finode. Ie mei naimie cominiñedinona duere finode. Naimie cominina cai illamona, caina janore duere finoite; iadedi naimie cominiñedinona cai baifemo eo duere finoite.

<sup>18</sup> Jusiñamui facaina lloraíma micori iena jaie cuega: “Mareuidinodi niadedi jillobitimacimo, ¿ñiese comeciaina jearedinodi jillobitimaci? ¿Ñiese maraiñedinodi jillobitimaci? Nibai jaca jillobitimaci?” cuega.

<sup>19</sup> Iena omoi uñuamona, mare rafuedo jai. Jusiñamui jitaillamona duere omoi sefua, mare rafuedo jai. Jusiñamui caimo finuana omoi uñuamona, naimie anamo raise i. Naimie omoina raise eenoite. Ie lloga uaina jaca finoite.

## 5

*Pedro creyentiaina nia llofuede*

<sup>1</sup> Creyentiaina llofueraini, omoimo rafuena lloiacadicue. Cuedi jiaí llofueraimadicue. Cristo fiodalana ciodicue. Naimie ebire abido bia, jiaie creyentiaí diga iena cioiticue. Iese cue illamona, omoimo lloiacadicue.

<sup>2</sup> Omoi anamo ite creyentiaina raise seda. Naimacina raise llofue. Jiaimie railla jira, llofueño; iadedi omoi jitailla jira, llofue. Rana ollena llofueño; iadedi iocire llofue.

<sup>3</sup> Omoi anamo itinona riire llofueño; iadedi mare rafuedo omoi jaillamona, naimacina llofue.

<sup>4</sup> Cai creyentiaí nanoca sedaraimadi Cristo. Naimie abido bia, naimiemonu ibana feiñotomoi. Naimie diga jaca iitomoi.

<sup>5</sup> Conirueni, omoi llofueraini uaina raise ino. Coninimona abina iedoño. Jusiñamui facaina lloraíma micori iese jaie cuega:

Bu abina iedoia, Jusiñamuimona maraiñede; iadedi bu abi iedoñenia, Jusiñamuimona mare. Jusiñamui naimiena duenaite cuega.

<sup>6</sup> Iese illa jira, cai Jusiñamui siñona jira, naimie anamo abina iedoño mai raise omoi i. Iemona naimie jitailliruido omoina iobitaite.

<sup>7</sup> Nie isoide rafue ia, Jusiñamui omoina canocabillana omoi uñuamona, omoi comeciá jarire finoño. Naimie omoina eenoite.

<sup>8</sup> Ebena jaiñeno. Jeacino finuamo abina rairui. Taife caina ramo faicabite. Janallari ie rille jenua isoi, Taife omoina jenocabide. Jeacino omoi finuana jitaide.

<sup>9</sup> Naimie ra faia uaina inoñeno; ia Cristona inocana jai. Omoi duere sefuilla isoi, nana jiaie creyentiaí duere sefuidimaci. Iena omoi uñuamona, omoi comeciá ocuiñocana jai.

<sup>10</sup> Cai Jusiñamui caina eo duenaite. Cristomo jai cai duilla jira, Jusiñamui illanomo íco jaca iiticaí. Dallu birui duere cai sefua, Jusiñamui cai comeciaina raise finoite. Cai comeciaina raise ocuiñotaite.

<sup>11</sup> Illaimana naimie illamona, caina jaca sedade. Naimiemo iobillacino cai fecacabillasa. Iena jitaidicue.

*Naga creyentiaimo carta oria rafue*

<sup>12</sup> Silvanona uifnotomoi. Naimiena bie cartana cuetataticue. Cristomo naimie duilla jira, cue ama isoi naimie ite. Cuemona naimiedi raise inogamie. Omoi dine oretallena, janorede cartana cuetataticue. Bie rafuena dane lloiacadicue: Bie rafuedi Jusifamui ie. Naimie caina duenaillana omoi uifnamona, bie rafuena inocana jai.

<sup>13</sup> Babiloniamo ite creyentiai omoi dine imaci uaina oredimaci. Naimacina Jusifamui jai fetuamona, creyentiaina jaidimaci. Marcos ie uaina jiai orede. Cristomo naimie jai duilla jira, naimie cue jitona eruaide.

<sup>14</sup> Conini omoi isiruillamona, nana creyentiaina eo caimare uaido. Cristomo jai omoi duilla jira, naimie omoi comeciaina uri itatajana uifnocana mai jai. Macaibajte. Pedrodicue.

## IE EMODOMO PEDRO ORETAGA RABE

### *Pedro creyentiaimo carta orede*

<sup>1</sup> ¿Nigacino? ¿Nie isoidomoi? Bie carta omoimo oredicue. Simón Pedrodicue. Jesucristo díbeimo maijiamona, ie rafuena lloticue. Cuen a oretajamona, ie lloga uaina finodicue. Cai isoi jai inotomoi. Cai Jusiñamui marena illa jira, Jesucristo marena illa jira, Jesucristo omoína jillotaja jira, jai inotomoi. Jusiñamuimona cai isoi omoi illa jira, bie carta omoi dine oredicue.

<sup>2</sup> Jusiñamuina omoi uñuamona, cai Nama Jesús omoi uñuamona, iaímaiaí omoína duenailana uñocana jai. Iaímaiaí omoi uri itatajana uñocana jai.

### *Creyentiaí marena illa rafue*

<sup>3</sup> Jesús siñona illamona, bene cai marena illena, naimiedi nana rafue caimo jai iga. Naimiena cai uñocana jaillamona, caimo ite. Naimie uai ebirede. Naimie jaca mareuidimie. Naimie isoi cai illena, caina jai fetode.

<sup>4</sup> Naimie iese illamona, eo mare rafuena caimo jai lote. Jiaie rafue baifemo faite. Bie rafue muidona jeacinomona jillobidicai. Cai comeciaí jaie jitailla jira, faificana jaidicai; iadedi naimie rafuena cai inuamona, naimie illa isoi, icana jaidicai.

<sup>5</sup> Jesucristona jai inotomoi. Naimiemo omoi duillamona, mare rafuena finocana jai. Jusiñamui jitaillacinona finocana jai. Iemona abina uñocana jai.

<sup>6</sup> Jearede rafue finocana jaifeno; iadedi omoi comeciaina eeno. Iena ocuñocana jai. Jusiñamuina sedacana jai.

<sup>7</sup> Jiaie creyentiaína isiruicana jai. Nana cominina isiruicana jai.

<sup>8</sup> Naie isoidicinona jitaidomoi. Iedo omoi raise jaia, cai Nama Jesucristona eo raise uñocana jaitomoi;

<sup>9</sup> iadedi edo omoi jaifenia, abina nia raise uñoñedomoi. Omoi jeacinomona jai jilluana jiaí jai feitatomoi. Mare rafuena finocana jaillena, omoi jeacinomona jillobidomoi. Iena feitañeno.

<sup>10</sup> Cue amataí, naie isoidicinona finocana jai. Iemona Jusiñamui omoína fetuana raise uñoitomoi. Abido danomo jiaí jaifeitomoi.

<sup>11</sup> Iese omoi jaia, cai Jilloitaraímana naimie illamona, cai Nama Jesucristo ie illanomo omoína eo marena feiñoite. Nainomo naimie anamo jaca iitomoi.

<sup>12</sup> Ie jira bie isoide rafuena diga icaíño omoimo lloticue. Bie rafuena uñotomoi. Bie rafue uanaicinona jai raise uñocaidomoi.

<sup>13-14</sup> Cai Nama Jesucristo cuemo jai llua jira, raíre cue fiodaillena uñoticue. Nia cue fiodaifenia, bie rafuena omoimo diga icaíño lloticue. Iese omoimo cue lloia, cuemona mare.

<sup>15</sup> Bie rafue omoi raise nagarui uñollena, omoína birui canoiticue. Cue fiodaile mei, nagarui bie rafuena omoi feitañenana jitaídicue. Ie muidona bie rafuena jai cueticue.

### *Pedro Cristona ebirenana jaie ciede*

<sup>16</sup> Jamai rafue omoimo lloñedicai. Omoína jifueiacaiñedicai. Cai Nama Jesucristo siñonana lloticai. Naimie abido billena jiaí lloticai. Naimiena ebirenana jaie ciodicai.

<sup>17-18</sup> Eniruemo naimie jaie ia, anedu muidomo naimie diga jaidicai. Jusiñamui nainomo jiaí illa jira, naie illano mare. Naie facaise Jusiñamui lluaana cacadicaí. Jusiñamui naimiena iobitaíacade. Ebire lloti: “Bimie cue isiruiga Jito. Naimieri iobidicue”. Iena jaie cai ciuana, birui naimie siñonana lloticai.

<sup>19</sup> Naiemona Jusiñamui facaina jae lloraini micoriaí lloga rafue suillena jai raise uñoticai. Naimaci lloga rafuemo omoi comeciaina faca. Lamparín jitreidinomo lligaiñua isoi, naie rafue cai comeciaina uanaicinona uñotade. Monairacuduna cai cioia, iaírei monaille ua illana uñoticai. Ie isoide. Cristo dane baíreia, iena raise uñoticai. Jusiñamui facaina lloraini micoriaí rafuena cai uñuamona, uanaicinona ua uñoticai.

<sup>20</sup> Biena uñoticai. Dani comeciámoma Jusiñamui facaina lloraini micoriaídi naimaci lloga uaina llofueñedimaci.

<sup>21</sup> Dani naimaci comeciaí jamai facajamona naie rafuena oñedimaci; iadedi Jusiñamui Joreño naimacimo illamona, naimacina iena uñotajamona, Jusiñamui rafuena jino llotimaci.

## 2

### *Pedro tainona llofuerainina lloti*

<sup>1</sup> Cai jaíagái facaise tainona llofueraini itimaci. Birui ie isoide. Omoi motomo tainona llofueraini itimaci. Jusiñamui rafuena raise llofueñeitimaci; iadedi naie rafuemona omoína

itataicanitimaci. Naimaci facaina Jesucristo fiodaite; iadedi: “Jesucristo cai Nama” raiñeitimaci. Naimaci finolle rafue muidona, raire ebena faifitimaci.

<sup>2</sup> Naimaci jearede rafuedo ailluena comini jaitimaci. Naimaci muidona, ailluena comini Cristo rafuena jearuitimaci. Cristo rafue uanaicino; ia iese lloñeitimaci.

<sup>3</sup> Ucube ollena, naimaci tainona llofuiacinodo omoina jifueiacanitimaci; iadedi Jusiñamui riicallafue anamo jai itimaci. Jusiñamui naimacina ico duere finoite.

<sup>4</sup> Naimie ecimo ite jaienisaimona damierie jeacino jaie finua jira, Jusiñamui naimacina jai oni dotade. Naimie riicallafue anamo naimaci jai illamona, naimacimo ite uai jai iñede. Jitiredinomo jai itimaci. Naimacina duere finoite, nana comini Jusiñamui dine illirui ia.

<sup>5</sup> Jusiñamui Noé micori facaise ite cominina jaie duere finode. Noé micori Jusiñamui ie mare rafuena naimacimo lloite; iadedi Jusiñamuina iinoiacaiñedimaci. Eo noci deitajamona, enirue buillamona, Jusiñamui naimacina duere finode. Naiemona Noé micorina, ie siete comini diga, jillotate.

<sup>6</sup> Sodoma railla nairai, Gomorra railla nairai diga, Jusiñamuidi bootate. Naimiena naimaci iinoñena jira, naimacina fuidode. Naiemona naimiena iñoñedinodi fueua.

<sup>7</sup> Sodomamona Jusiñamui Lot micorina jillotate. Lot micori maremie. Eo jearede rafuena naie nairai finua jira, Lot micori comeci jarire ite.

<sup>8</sup> Naimaci motomo naimie illamona, nagarui naimaci marañede rafue naimie ciuamona, naimie comeci uri iñede.

<sup>9</sup> Naimiena jaie iñoñedinona Jusiñamui jai duere finode; iadedi Jusiñamui naimiena iñotino ramo faiamona jilloitajana uñote. Jusiñamui naimiena iñoñedino naimie riicallafue anamo illana jai uñote. Ico naimacina duere finoite.

<sup>10</sup> Jearede jitaillacino finocabinidona ua duere finoite. Jusiñamui uaina jamaidinona ua duere finoite. Bie tainona llofueraini marefodo llofuecabitimaci. Naimaci jitaillacinona llofuecabitimaci. Jusiñamui jaienisaina jaciruiñeno jeare ñaitimaci.

<sup>11</sup> Jusiñamui jaienisai uai naimaci baifemo faite; iadedi Jusiñamui illanomo naimaci illamona, bie tainona llofuerainina jeare ñañedimaci.

<sup>12</sup> Ocainai ai abina raise uñofñena muidona, cai rillena naimacina fatikai. Bie tainona llofueraini ocainai ai isoidimaci. Naimaci raise uñofñega rafuena jeare ñaitimaci. Ocainai ai faifilla isoi, faifitimaci.

<sup>13</sup> Jiaie cominina naimaci duere finua dinori duere sefuitimaci. Birui ite rafuena nagarui ebruitimaci. Danomo omoi guicabia, naimaci illa jira, raise nabairinidomoi. Jearedimaci. Jearede rafuena naimaci eburuilla jira, raise conini diga nabairinidomoi.

<sup>14</sup> Riñona naimaci cioia, naiñaiño diga eo iacadimaci. Jeacinona finocana jaicabidimaci. Cristona nia raise iñoñedinona jeacinona finotaiacadimaci. Rana eo nicidotimaci. Jusiñamui naimacina duere finoite. Jai faifitimaci.

<sup>15</sup> Cristo rafuena faionocaillanona, jiaie rafuedo birui jaidimaci. Balaam micori rafuedo jai jaidimaci. Balaam micori Beor micori jito. Ucube ollena, Balaam micori uanaicinona jaie lloiacaiñede; iadedi jiaie rafuena llollena, jiaie nairai dine jaide.

<sup>16</sup> Naisona naimie jaidemo, ie burra naimie diga ñaite. Jeacino naimie finoñellena, ie burra naimie diga ñaite. Uairico isoi Balaam micori jaiñellena, naimie diga ñaite. Birui bie tainona llofueraini, Balaam isoi, jiaie rafuedo jaidimaci.

<sup>17</sup> Omoina canoñedimaci. Jinui iñena pozo isoidimaci. Naiemona buena oñedomoi. Monamo ite uillie isoidimaci. Riire aifi bia, naie uillie oni ñaitade. Bie tainona llofuerainimona buena oñedomoi. Naimaci comeciai daje isoi lloñedimaci. Jusiñamui naimacina ico duere finoite. Jusiñamui illanomo naimaci iñenano, jitiredinomo jai iitimaci.

<sup>18</sup> Jamai ñaia diga abina iedotimaci. Uanañede rafuemona, como Cristomo iñotinona ramo faitimaci. “Jearede rafue finuana mare” raitimaci.

<sup>19</sup> “Cai jitailla rafuena finoredicai?” raitimaci. Iese raitimaci; iadedi jeacino anamo jai itimaci. Jeacino finocana naimaci jailla jira, ie anamo jai itimaci.

<sup>20</sup> Cai Nama Jesucristo. Naimiedi cai Jilloitarama. Naimiena naimaci jaie iñuamona, marañedicino anamona jai jillodimaci; iadedi marañedicinona dane finocana jaidimacina, naie marañedicino anamo dane itimaci. Eo fodo jai jaidimaci.

<sup>21</sup> Cristo rafuena jaie uñofñedimaci. Birui iena uñotimaci; iadedi naie mare rafuedo raise jaiñedimaci. Iena faionocaillamona, eo jai fodo jaidimaci.

<sup>22</sup> Cai comini iena iese llocabitimaci; “Jico ciuia mei, ie ciuiana dane abido guite. Chanchona cai jocua mei, ie jearede illanomo raire abido jaicabide”. Cristo rafuemona danomo abido jaidinodi daje isoidimaci.

### 3

<sup>1</sup> Cue isiruiganodomoí. Navui jiaie carta omoímo oredicue. Birui dane cueticue. Bie rafuena jai uiñotomoí; iadedi iena omoí ua raise uiñollena, iena dane cueticue. Iemo omoí comeciaí raise facajana jitaídícue.

<sup>2</sup> Jusiñamui facaina jaie lloraini micoriaí lloga rafuena jai uiñotomoí. Cai Nama caina oretajanona, ie lloga rafuena omoímo jai llotícaí. Naimie muidona jillobidomoí. Bie rafuemo omoí comeciaí facajana jitaídícue.

<sup>3</sup> Biemo nano omoí comeciaina faca. Cristo nia abido biñenia, Cristo rafuena uaitatino iitimaci. Naimaci jitailla rafuedo jaitimaci.

<sup>4</sup> Jicanoítimaci: “¿Ñiese Cristo nia abido biñede? Enirue finua facaisemona nana ra daje isoi comucana jaide. Cai mootiaí jai fiodaicana jaidimaci. Cristo jaca biñeite”.

<sup>5</sup> Iese raitimaci; iadedi iese iñede. Jaie suide rafuemo comeciaina facaacaiñedimaci. Jusiñamui jaie lluamona, ie uaido mona finode. Enirue jai finode. Jínuimona iena finuamona, jínuimona eniruedi bairede.

<sup>6</sup> Jinui diga Jusiñamuidi Noé micori facaise cominina jaie fuidode.

<sup>7</sup> Jusiñamui mona, enirue diga, ico fuidollena jai llote. Mona, enirue diga, bootaite. Ie jitaillirui Jusiñamui naimiena iñofedinona iese duere finoite. Ie uai jai llote; ia nia suiñede.

<sup>8</sup> Cue isiruiganodomoí. Biena feitañeno. Ie lloga uai jaca suite. Cai Namamona daruidi mil años isoide. Naimiemona mil añodi daruibicaide isoide.

<sup>9</sup> Damierie comeciaí facadimaci: “Are suiñena jira, cai Nama ie lloga uaina níbaí finoñeite”. Iese cai Nama iñede; iadedi comini naimiena iñuana fecuise sedade. Comini imaci uai meidollena sedade. Naimaci faifillana jitaíñede. Ie muidona nia abido biñede. Ie lloga uai nia suiñede.

<sup>10</sup> Firiraima billa isoi, cai Nama ebena abido biite. Naimie bia, mona eo ficirenamona fuite. Jitoma, fivui diga, ucuai diga, bootajamona, fuite. Enirue, nana benomo ite ra diga, bootaite.

<sup>11</sup> Bie rafue suillena uiñotícaí. Naie cai uiñuamona, Jusiñamui jitailla rafue finocana cai jailla. Naimiena raise cai sedajasa.

<sup>12</sup> Naie facaise billemo iocire cai sedaja. Raire suillena, naimie jitailla rafuena raise fino. Naie facaise Jusiñamui mona bootajamona, iena fuidoite. Jitoma, fivui diga, ucuai diga bootajamona iena fuidoite.

<sup>13</sup> Naimie jai llua isoi, jiaie mona, jiaie enirue diga illena sedadícaí. Nainomo Jusiñamui jitailla isoi marena jaca iitícaí. Nainomo mare rafue finocana jaitícaí.

<sup>14</sup> Cue isiruiganodomoí. Bie rafue nia suiñena jira, naimie abido nia biñena jira, jeacino finoñeno i. Uri icana omoí i. Iese omoí ia, naimie abido bia, omoína: “Mare” raite. Omoiri iobite.

<sup>15</sup> Raire abido cai Nama biñenia, naimiedi comini naimiena iñuamo ocuiride. Iena uiñotícaí. Cai isiruiga ama Pablo, bie isoide rafue omoímo navui cuete. Cristo naimiena uiñotaga rafue diese cuete.

<sup>16</sup> Nana naimie cartaiamo bie isoide rafuena cuete. Naimie cartaiamo diga rafue ite. Dajerie rafue irirede. Cristo rafuena raise uiñofedino, Cristona raise iñofedino iena tainonana llofuecabitimaci; iadedi iemona faificana jaidimaci. Jiaie Cristona ciegafuaina tainonana llofuecabitimaci.

<sup>17</sup> Bie rafue birui uiñotomoí. Iena omoí uiñuamona, jearede rafue finocabidino rafuedo jaiñeno. Abido danomo omoí jaiñellena, iemona abina rairui.

<sup>18</sup> Cai Nama cai duenaillana uiñocana jai. Naimiedi cai Jilloitaraíma. Naimiena omoí uiñocana jaillamona, naimiena nabai. Naimiena birui cai iobitajasa. Naimiena ua jaca cai iobitajasa. Mai. Macaibaite. Pedrodicue.

## JUAN NANO FUEÑE ORETAGA RABE

*Jusiñamui diga cai jaca illena, Juan cuete*

<sup>1</sup> Cue uruina omoi isoilla jira, omoimo cartana oredicue. ¿Ñie isoidomoi? Nano dofoconi itimiena lloiacadicue. Naimiedi Jesucristo. Jiaie llofueoicaigano diga, jaie cai motomo naimie illamona, naimie llofuiana cacadicaí. Naimiena ciodicai. Naimiena jiaí jetadicaí. Caina Jusiñamuina uiñotade. Jusiñamui diga cai jaca illena, jiaí caina llofue.

<sup>2</sup> Jusiñamui dinena billanona, iimana jaide. Naimiena jaie raise cai ciua jira, naimie rafuena birui omoimo lloiacadicue. Ie Moo diga nano jaca ite; ia cai dine naimie billamona, naimiena jai ciodicai.

<sup>3</sup> Cai ciua rafuena, cai cacaja rafuena, omoimo lloiticue. Jusiñamuina cai diga omoi nabaillena jitaídicue. Jusiñamui jito Jesucristona, cai diga omoi nabaillena jiaí jitaídicue.

<sup>4</sup> Omoi comeciaí caimareficaillena, omoimo bie rafuena cueticue.

*Jusiñamuidi jaca mareuidimiena jira, useredinomo ite isoide*

<sup>5</sup> Jesucristomona cai cacaja rafuena omoimo ja lloiticue. Jusiñamuidi jaca mareuidimiena jira, useredinomo ite isoide. Naimie comecidi jaca jeanina jira, jitreidinomo iñede isoide.

<sup>6</sup> “Jusiñamuina nabaidicaí” cai raia, iadedi jeacinona finocana cai jaia, tainona lloticaí. Uanaicinodo nia jaiñedicai.

<sup>7</sup> Jusiñamui jeacino jaca finoñede. Naimie isoi jeacino finoñeno cai jaia, coninina nabaidicaí. Jesucristo fiodaillamona, naimie diaillamona, Jusiñamui cai jeacinona oni dotade. Iena feitate.

<sup>8</sup> “Caimo jeacino jaca iñede” cai raia, dani cai abina jifueticaí. Uanaicinodo nia jaiñedicai.

<sup>9</sup> Naimiemo cai finoca jeacino cai lloia, Jusiñamui cai jeacinona dotaite. Nana cai marañedicinona dotaite. Naimie inogamiēna jira, naimie maremiēna jira, iese finoite.

<sup>10</sup> “Omoimo ite jeacino” Jusiñamui llote; iadedi: “Jeacino finocabiñedicai” cai raia, “Jusiñamui tainona llote” raiticaí. Iemona naimie uaina jai uaitaticaí.

## 2

*Cai facaina riidotimiedi Cristo*

<sup>1</sup> Cue uruai isoi cue mamecaomoi. Jeacino finocana omoi jaiñellena, omoimo birui cueticue. Jeacinona omoi finuana jitañedicue; ia jeacino bu finoia, Jusiñamuimona naimie facaina riidotimie jai ite. Jesucristo maremiēna jira, cai facaina caina riidoite.

<sup>2</sup> Cai jeacino facaina naimie fiodaite. Iemona Jusiñamui riicailliue anamona jillobidicaí. Jesucristo cai facaina fiodaite; ia nana comini facaina jiaí fiodaite.

<sup>3</sup> Jusiñamui llogacinona cai inuamona, naimiena cai uiñuana jai uiñoticaí.

<sup>4</sup> “Naimiena uiñoticue” raitimiedi ie llogacinuai inoñenia, naimiedi tainona lloraima. Uanaicinona uiñoñede;

<sup>5</sup> ia Jusiñamui llogacinuaina inotimiedi Jusiñamuina eo isiruicana jaite. Naimiena cai isiruillamona, naimiena cai nabaillana jai uiñoticaí.

<sup>6</sup> “Cristona nabaidicue” raitimiedi, Cristo isoi, mare rafuena finoite.

*Cristo rafuedo jaidomoi*

<sup>7</sup> Cue isiruiganodomoi. Creyentiana omoi jailla facaise bie rafuena cacadomoi. Ie jira jiaie rafuena birui omoimo cueñeticue;

<sup>8</sup> ia naicinona abido dane lloiticue. Cristo iedo jaide. Iedo jiaí jai jaidomoi. Jeacino anamo omoi jaie illamona, jitreidinomo itomoi isoidomoi; ia Cristo rafuena omoi jai uiñuamona, useredinomo jai itomoi isoidomoi.

<sup>9</sup> “Cristo rafuedo jaidicue” raitimiedi jiaie creyentena enoia, Cristo rafuedo nia jaiñede. Jitreidinomo naimie nia ite isoide.

<sup>10</sup> Jiaie creyentena bu isiruia, Cristo rafuedo raise jaide. Iedo naimie jaia, jiamiena jeacinona finotañeite;

<sup>11</sup> iadedi jiaie creyentena bu enoia, jitreidinomo nia ite isoide. Jeacino anamo nia ite. Uisimidimie ie jaillinona raise uiñoñena isoi, Jusiñamui dine rillena raise uiñoñede. Ie isoi abina uiñoñede.

<sup>12</sup> Cue uruai isoi cue mamecaomoi. Cristo muidona omoi jeacino Jusiñamui jai dotajamona, nana omoimo bie cartana cueticue.

<sup>13-14</sup> Einamaci, Jusiñamuina are omoi jai inuamona, omoimo bie cartana cueticue. Naimie nano dofoconi jaca ite. Conirueni, jeacinona finoñellena omoi comeciaina ocuiñuamona, Jusiñamui uai omoi comeciaino raise itabillamona, marañedimiena omoi jai anafetitaja



jira, omoimo bie cartana cueticue. Naimiedi Taife. Uruiai, Jusiñamui uaina omoi como ñnuamona, omoimo bie cartana cueticue.

<sup>15</sup> Omoi ecimo maraññede rafuena ebiruiñeno. Iena bu ebiruia, cai Moo Jusiñamuina isiruiñede.

<sup>16</sup> Cai comeciaino ite maraññede jitaillacinodi Jusiñamui ieñede. Cai uisido ebire jaide rafuedi Jusiñamui ieñede. Raruiái diga, abi ieduacinodi Jusiñamui ieñede.

<sup>17</sup> Jusiñamui ieñede rafue jaca fuite. Naie isoide rafuedo jaidinodi jiaí faifitmaci; iadedi Jusiñamui jitaillacinona finodimie Jusiñamui illanomo jaca iite.

#### *Cristona abi caitadino rafue*

<sup>18</sup> Cue uruiái isoidomoi. Jesucristo abido billirui iaiei jai ite. Nanoca Cristona abi caitadimie billena jai fididomoi. Ailluena Cristona abi caitadino birui jai bairedimaci. Iemona Jesucristo abido billirui iaiei illana jai uiñotomoi.

<sup>19</sup> Cai creyentiaí motomo nano itimaci; ia Cristo dibeimo naimaci iñena jira, naimaci llofuiana cai nafueñena jira, cai motomo birui fiebiñedimaci. Caimona naimaci jailla jira, Cristomo naimaci duiñenana jai uiñoticaí.

<sup>20</sup> Jesucristomona Jusiñamui Joreña jai omoi feiña jira, nana omoi Jusiñamui dibeimo ite rafuena jai uiñotomoi.

<sup>21</sup> Ie jira uanaicinona bu llofueia, iena uiñotomoi. Uanaññedicinona bu llofueia, iena jiaí uiñotomoi.

<sup>22</sup> Tainona llofuerainina ja cueticue. “Cristo cai jilloitaramañede” llotinodi taino llofueraini. “Jusiñamuidi cai Mooñede” llotinodi taino llofueraini. “Jesúdi Jusiñamui Jitoñede” llotinodi taino llofueraini.

<sup>23</sup> Cristona ñnoñedinodi Jusiñamuina jiaí ñnoñedimaci. Cristona ñnotino Jusiñamuina jiaí ñnotimaci. Jusiñamui Joreño omoimo illamona, iena jai uiñotomoi.

<sup>24</sup> Ie jira creyentiaína omoi jailla facaise omoi cacaja rafuedo ñnocana nia omoi jai. Iedo omoi ñnocana jaia, Jusiñamui Jitona raise nabaitomoi. Jusiñamuina jiaí raise nabaitomoi.

<sup>25</sup> Jusiñamui caimo jai llua isoi, naimie diga jaca iiticaí.

<sup>26</sup> Omoina damierie jifueiacana jira, bie rafuena jai cueticue.

<sup>27</sup> Jusiñamui Joreña jai feiñotomoi. Omoina Jusiñamui rafuena naimie uiñotaja jira, jiaie rafuena llofuerainina jai jitaññedomoi. Jusiñamui Joreño uanaicinona omoina uiñotacabide. Naimie omoina uiñotaja isoi, Cristona nabaicana omoi jai.

<sup>28</sup> Cristo ico abido biite. Omoi jacinaiñellena, naimiena omoi meiruiñellena, naimiena birui raise omoi nabai.

<sup>29</sup> Jusiñamui maremiéna cai uiñuamona, nana mare rafuena finocabidino naimiemo duillana jiaí uiñoticaí.

## 3

#### *Juandi Jusiñamui cominina llua rafue*

<sup>1</sup> Jusiñamui caina isiruillamona, naimie cominina jai jaidicaí. Iemo omoi comeciaina facajana jitaídicae. Naimiéna naimaci uiñofñena jira, Jusiñamuina ñnoñedino cai uiñoga rafuena jiaí raise uiñofñedimaci.

<sup>2</sup> Ero, birui Jusiñamui cominidicaí. Cristo dane bia, cai illena nia raise uiñofñedicaí; ia naimie illa isoi cai ico illena jai uiñoticaí. Ico naimiéna cai cioillemona, iena raise uiñoticaí.

<sup>3</sup> Iemo cai ocuirillamona, naimie marena illa isoi, cai comeciái marena itataja.

<sup>4</sup> Jeacinona finocana bu jaia, Jusiñamui llogacinuaina ñnoñede. Jusiñamui llogacinuaina bu ñnoñenia, jeacinona jai finode.

<sup>5</sup> Jusiñamui dinena Cristo billanona, imana jai jaide. Cai jeacinona oni dotallena, eniruemo naimiedi bite. Naimiemo jeacino jaca iñena jira, jeacino dibeimo naimie jaca iñede.

<sup>6</sup> Naimiéna nabaidimiedi jeacino finocana jaiñede. Jeacinona finocana jaidimiedi Cristona nia raise cacaiñede. Naimiéna nia raise uiñofñede.

<sup>7</sup> Cue uruiái isoidomoi. Cristo llua isoi tainona llofueraini birui itimaci. Jeacino finuana rairuiñedimaci. Naimaci omoina jifueñellena, abina rairui. Jesucristo jaca maremie. Mare rafuena finocana cai jaia, naimie isoi mareniticaí;

<sup>8</sup> ia jeacino finocana bu jaia, Taifemo duide. Nano dofomona Taifedi jeacino finocana jaide. Ie jira Jusiñamui Jito bite, Taife rafuena anafetitallena.

<sup>9</sup> Naimiemo Jusiñamui uai illamona, Jusiñamui cominina jaidimiedi jai jeacinona finocana jaiñede. Jusiñamui cominina jaillamona, jeacino finocana naimie jainide.

<sup>10</sup> Temona Jusiñamui dibeimo itinona raise uiñoticaí. Taife dibeimo itinona jiaí raise uiñoticaí. Mare rafuena finocana jaiñedimie Jusiñamuimo duiñede. Jiaie creyentena isiruiñedimie Jusiñamuimo jai duiñede.

*Coninina cai isiruilla rafue*

<sup>11</sup> Creyentiaina omoi jaiilla facaise: “Coninina isirui” raillana cacadomoi. Jiaie creyentiaina nia omoi isiruiñenia, Jusiñamuimo nia duiñedomoi.

<sup>12</sup> Cañ micorimona cai fueua. Naimie ie amana isiruiñena jira, Taiife naimiena ramo faiamona, ie amana meinete. Ie ama Jusiñamui jitailla rafuena finouide; ia Cañ micori Jusiñamui jitailla rafuena finoñede. Uradoillamona ie amana meinete.

<sup>13</sup> Ie isoide. Jusiñamui jitailla rafuena birui cai finuamona, Jusiñamui dibeimo iñedinodi caina enoidimaci. Ieri jacinañeno.

<sup>14</sup> Cristona nia cai iñoñena facaise jeacino anamo cai illa jira, Jusiñamuimona fioidaitino isoidicai. Jiaie creyentena cai isiruia, Cristomo jai cai duillana jai uiñotica; ia jiaie creyentena bu isiruiñenia, jeacino anamo naimie nia ite.

<sup>15</sup> Jiaie creyentena bu enoia, naimiemo ie meinelle uai jai ite. Naie isoidimie Jusiñamuimo nia duiñede.

<sup>16</sup> Cristomona cai fueua. Naimie jitailla jira, cai facaina fiodaite. Iemona jiaie creyentiaina cai isiruillana uiñotica. Ie jira naimaci facaina naimaci ramo jiriñellena fiodaicanitica.

<sup>17</sup> Jiaie creyentiaina cai isiruillamona, naimacina canoitica. Omoimo ra ia, jiaie creyentemo ra iñenia, naimiena omoi canoñenia, Jusiñamuina raise isiruiñedomoi.

<sup>18</sup> Cue uruiñai isoidomoi. “Jamai uaido jiaie creyentiaina isiruitica” cai raiñena; iadedi cai finoca rafuemonona naimacina cai canua.

*Jusiñamuimo jaciruiñeno juredica*

<sup>19</sup> Jiaie creyentiaina isiruicana cai jaiia, Jusiñamui cominina cai illana raise uiñotica. Jusiñamui mudonona cai comeci uri ite.

<sup>20</sup> Cai comecimo iticinona uiñotica. Siñonamiēna jira, Jusiñamui iēna jiaie uiñote.

<sup>21</sup> Cai comecimo jeacino iñenia, Jusiñamuimo jaciruiñeno juredica.

<sup>22</sup> Naimie llogacinona cai iñoia, naimie jitaillacinona cai finoia, naimiemo cai jicaca rafuena birui feiñotica.

<sup>23</sup> Naimie Jito Jesucristo cai iñuana jitaide. Cristo llua isoi, coninina cai isiruillana jiaie jitaide.

<sup>24</sup> Naimie llogacinuaina cai iñoia, naimiena nabaidica. Caina jiaie nabaide. Naimie Joreño caimo illamona, naimie caina nabaillana jai uiñotica.

**4***Juan tainona llofuerainina llua rafue*

<sup>1</sup> Omoina isiruiticue. Naga llofueraima uaina iñoñeno. Ailluena tainona llofueraini birui illa jira, Jusiñamuimona naimaci feiñoga uaina nica naimacina facaci:

<sup>2</sup> “Jusiñamui dinena Jesucristo billanona, imana jaide” naimaci lloia, Jusiñamuimona naimaci uaina otimaci;

<sup>3</sup> ia “Jusiñamui dinena Jesucristo biñede” naimaci lloia, Jusiñamuimona naimaci uaina oñedimaci. Cristona abina caitadimieimona naimaci uaina otimaci. Naimie billena jai fididomoi. Comini comeciaina feidocana birui jaidimaci.

<sup>4</sup> Ero, Jusiñamuimo jai cai duillamona, Jusiñamui caimo ite. Taino llofueraini dibeimo omoi jaiñena jira, naimaci llofuiana oñedomoi. Naie taino llofuerainimo Taiife ite; ia Jusiñamui Taiife baiñemo faite.

<sup>5</sup> Naie tainona llofueraini Jusiñamuina iñoñedinomo duidimaci. Naimaci ecimo ite rafuena llofuecabitimaci. Jusiñamuina iñoñedino naimaci llofuiana ebruitimaci.

<sup>6</sup> Jusiñamuimo jai duidicai. Jusiñamuina iñotino cai llofuiana cacaacadimaci; ia Jusiñamuina iñoñedino cai llofuiana cacaaiñedimaci. Iemona Jusiñamui uaina llofuerainina uiñotica. Iemona tainona llofuerainina jiaie uiñotica.

*Jusiñamui caina isiruilla rafue*

<sup>7</sup> Omoina isiruiticue. Coninina cai isiruilla. Jusiñamui caina isiruillamona, caina jiaionona isiruitade. Ie isoi isiruitinodi Jusiñamui comini. Jusiñamui rafuena uiñocana jaidimaci.

<sup>8</sup> Jusiñamuimo cai duillamona, caina jiaionona naimie isiruitaja jira, jiaionona isiruiñediniedi Jusiñamui rafuena nia uiñofede.

<sup>9</sup> Jusiñamui caina isiruillamona, ie dajede Jito eniruemo orede. Naimie fiodaillamona, Jusiñamui dine jaca iitica. Ie finoca rafuemonona Jusiñamui caina isiruillana jai uiñotica.

<sup>10</sup> Jusiñamuina cai isiruillana ñaiñedicue; ia Jusiñamui caina isiruillana ñaiticue. Cai jeacino facaina fiodaillena, ie Jito eniruemo orede. Iemona cai jeacinona feitate. Iemona isiruillana raise uiñotica.

<sup>11</sup> Caina Jusiñamui isiruilla isoi, coninina cai isiruilla.

<sup>12</sup> Buna Jusiñamuina jaca cioñede; iadedi coninina cai isiruillamona, Jusiñamui caimo illana jai uiñoticaí. Naimiena isiruicana jiai jaidicaí.

<sup>13</sup> Naimie Joreño caimo itatajamona, naimiena cai nabaillana uiñoticaí. Caina naimie nabaillana jiai uiñoticaí.

<sup>14</sup> Bie rafuena jiai uiñoticaí. Jusiñamui ie Jitona eniruemo jaié oretate. Naimiena ñnoñedinona jilloitallena, naimiena oretate. Naimie Jitona ciodicaí. Ie jira iena birui lloticaí.

<sup>15</sup> “Jusiñamui Jitodi Jesús” llotimiedi Jusiñamuina nabaide. Jusiñamui naimiena jiai nabaide.

<sup>16</sup> Ie jira Jusiñamui caina isiruillana uiñoticaí. Caina jiaínona naimie isiruitade. Iedo cai jaillamona, caina nabaide. Naimiena jiai nabaidicaí.

<sup>17</sup> Temona Jusiñamuina isiruicana jaiticaí. Naimie uicomo ico nana cai ille facaise naimiena jaciruiñeíticaí. Jusiñamui Jitona Cristo illanona, Jusiñamui cominina cai jiai illanona, naimiena birui jaciruiñeíticaí.

<sup>18</sup> Jusiñamuina cai isiruia, naimiena jaciruiñeíticaí. Eo raise naimiena cai isiruia, ¿niese naimiena jaciruiticaí? Naimiena cai jacirua, naimie caina duere finuana jaciruiticaí. Jusiñamuina jaciruitimiedi Jusiñamuina nia raise isiruiñede.

<sup>19</sup> Nano Jusiñamui caina isiruilla jira, caidi naimiena isiruiticaí.

<sup>20</sup> “Jusiñamuina isiruiticue” raitimiedi jiaie creyentena enoia, jai taino llote. Creyentena ciode; ia naimiena isiruiñede. Jusiñamuina cioñede. ¿Niese ie cioñenamienna isiruite?

<sup>21</sup> Jusiñamui iena caimo jai llote: “Cuena isiruitimie jiaie creyentena jiai isiruite”. Ie jira coninina isirui.

## 5

### *Taife ie rafuena anafefitaticaí*

<sup>1</sup> Jusiñamuimona Jesús billana cai ñnoia, Jesús cai Jilloitaraimana cai ñnoia, Jusiñamui cominina jaidicaí. Jusiñamuina cai isiruia, nana naimie cominina jiai isiruiticaí.

<sup>2</sup> Jusiñamuina cai raise isiruia, naimie llogacinuaina cai ñnoia, naimie cominina jiai isiruiticaí.

<sup>3</sup> Jusiñamuina cai isiruia, naimie llogacinuaina jiai jai ñnoticaí. Naimie uai raise ñnuamona, iena finollena sefuiruiñeíticaí.

<sup>4</sup> Jusiñamui díbeimo itinodi Taife ie rafuena anafefitaticaci. Cristona cai ñnuamona, Taife ie rafuena anafefitaticaí.

<sup>5</sup> Jesúsdi Jusiñamui Jitonana cai ñnuamona, Taife rafuena anafefitaticaí.

### *Jesucristodi Jusiñamui Jito*

<sup>6</sup> Jesucristona dane ñaiticue. Naimiedi Jusiñamui Jitona ñnoticaí. Naimie bautizajamona, naimie fiodaillamona naimiedi Jusiñamui Jitonana uiñoticaí.

<sup>7</sup> Uanaicinona naimie uiñuamona, Jesucristo bautizaja facaise Jusiñamui Joreño caina iena jiai uiñotade.

<sup>8</sup> Jusiñamui Joreñomona, Jesús bautizajamona, Jesús fiodaillamona, Jesúsdi Jusiñamui Jitonana raise uiñoticaí.

<sup>9</sup> Jesús bautizaja facaise “Jesúdi cue Jito” Jusiñamui caimo llote. Jesúsna comini lloia, iena feiñoticaí. Comini llua baifemo Jusiñamui llua faia jira, Jusiñamui lluaana jiai ua feiñoticaí.

<sup>10</sup> Jesúsdi Jusiñamui Jitonana cai ñnuamona, cai comeiaí daje isoi lloide; ia Jusiñamui ie Jitona lluaana ñnoñedinodi: “Jusiñamui taino llote” raitimaci.

<sup>11</sup> Biena ñaiticue. Jusiñamui naimie diga caina jaca itataiacade. Naimie Jitona cai ñnuamona, iese caina jai itatate.

<sup>12</sup> Jusiñamui Jitona ñnotino Jusiñamui diga jaca iitimaci; ia naimiena ñnoñedino Jusiñamui diga jaca ñneitimaci.

### *Jusiñamui caina raise uiñote*

<sup>13</sup> Jusiñamui diga ico omoi jaca illena omoi raise uiñollena, bie cartana jai cueticue.

<sup>14</sup> Jusiñamuina cai ñnuamona, naimiena jai jaciruiñeíticaí. Naimiemo cai jiaia, naimie jitailla isoide rafuena cai jicaia, naimie caina cacajana raise uiñoticaí.

<sup>15</sup> Iese cai jiaia, naimie jaca fairuana jiai uiñoticaí.

<sup>16</sup> Jiaie creyente jeacino finuana omoi cioia, naimie facaina Jusiñamuimo jii. Temona Jusiñamui díbeimo naimiena dane itataitomoí. Jusiñamui rafuena jamaidimie facaina omoi jiaana lloñeíticue. Naimie faificana jaiacade.

<sup>17</sup> Jusiñamui llogacinona bu ñnoñenia, jeacino jai finode; ia naimie facaina omoi jiaia, Jusiñamui iena feitaite. Faificana jaiacadimie facaina omoi jiaana lloñeíticue.

<sup>18</sup> Jusiñamui comini jeacinona finocana jaiñeítimaci. Naiemona Cristo caina eenote. Ie jira Taife caina duere finonide.

<sup>19</sup> Jusiñamuimo jai duidicai. Naimie anamo jai iticai; ia naimiena ñnoñedino Taife anamo jai itimaci.

<sup>20</sup> Jusiñamui Jito jaie eniruemo billana uiñoticai. Iemona caina nanoca Jusiñamuina uiñotade. Naimiena cai ñnuamona, nanoca Jusiñamuimo jai duidicai. Jesucristomo jiai jai duidicai. Ie jira Jusiñamui diga ico jaca iiticai.

<sup>21</sup> Cue uruiái isoidomoi. Daje rafuena nia lloiticue. Jiraraímona abina rairui. Jusiñamui ieñede rafuedo omoi jaiñeno. Mai. Juandicue.

## JUAN IE EMODOMO ORETAGA RABE

### *Uanaicinona coninina cai isiruilla*

<sup>1</sup> Juandicue. Creyentiaina sedaraimadicue. Ñoo, ¿nie isoidio? Cue uaina o dine oredicue. O uruiamo cue uaina jiai oredicue. Jusiñamui ona jai fetuamona, Cristo ie uanaicinona cue uiñua jira, omoina isiruiticue. Nana naie uanaicinona uiñotinodi omoina isiruitimaci.

<sup>2</sup> Naie uanaicinona cai uiñua jira, omoina isiruiticai. Iena uiñocana jaca jaiticai.

<sup>3</sup> Cai Moo Jusiñamui ie Jito Jesucristo diga, caina jaca duenaite. Iaimai caina jaca uri itataite. Uanaicinona cai uiñuamona, iaimaiaina cai isiruillamona, iese iiticai.

<sup>4</sup> Caimo cai Moo llua isoi, uanaicinodo o uruiamona dajerie jailla jira, iobidicue.

<sup>5</sup> Ñoo, daje rafue omo lloiacadicue. Bie rafuena navui uiñotio. Cristo rafuena nano cai ñnoia, bie rafuena uiñoticaí. Coninina cai isiruillana ñaiticue.

<sup>6</sup> Iena ñaiacadicue. Coninina cai isiruillanona, Jusiñamui llogacinona ñnocana jaidicai. Cristona nano omoi ñnoia, Jusiñamui llucacinona cacadomoi. Coninina cai isiruillana cacadomoi.

### *Diga taino lloraini ite*

<sup>7</sup> Diga taino lloraini illa jira, iena ñaiticue. Jesucristo monamona jai billanona, imana jaiñenana llofuecabitimaci. Bu iese llofueia, cominina jifuate. Naimiedi Cristona abi caítadimie.

<sup>8</sup> Cristo rafuedo omoi jailla jira, Jusiñamuimona buena omoi faifñellena, omoi abina rairui. Jusiñamuimona ibana feiñoitomoi.

<sup>9</sup> Cristo llogacinona bu fainonocaia, Cristo rafuedo bu jaiñenia, Jusiñamuina ua uiñofñede; iadedi Cristo rafuedo bu jai, cai Moo Jusiñamuina uiñote. Ie Jitona jiai uiñote.

<sup>10</sup> O jofomo Cristo rafuedo jaiñedimie bia, Cristo rafuena cue llofua isoi naimie llofueñenia, naimiena nafueñeno. “Jusiñamui ona canuamona, marena o jai” lloñeno.

<sup>11</sup> “Marena jai” o lloia, naimie marañede rafue facaina jai itio.

### *Rafuena nia lloiacade*

<sup>12</sup> Diga rafue ite omoimo cuellena; iadedi aillue cartana cueñeiticue. Omoi dine raire cue illemo ocuridicue. Danomo cai rillamona ñaiticai, cai comeciai caimarecallena.

<sup>13</sup> O dine o euñño uruiaidi imaci uaina oredimaci. Naiñaiñodi Jusiñamui fetocañaiño. Mai. Juandicue.

## JUAN IE EMODOMO JIAIE ORETAGA RABE

### *Gayo mare rafue finocana jaide*

<sup>1</sup> Juandicue. Creyentiaina sedaraimadicue. Gayo, bie carta o dine oredicue. ¿Nie isoidio? Cristo ie uanaicinona coco uifua jira, ona isiruiticue.

<sup>2</sup> Cue isiruirgamiedio. Nana o finua rafue marena jaillana jitaicidicue. O ecairenana jiai jitaicidicue. O comeci marena illana jai uifnoticue.

<sup>3</sup> Cue dine dajerie creyentiai bite. Uanaicinodo omoi jaillana llote. Cristo rafuedo omoi jaillana llote. Ie jira iobidicue.

<sup>4</sup> Uanaicinodo omoi jailla jira, eo iobidicue. Cue muidona Cristona omoi inua jira, cue uruaidomoi isoidomoi. Uanaicinodo omoi jailla jira, eo iobidicue.

<sup>5</sup> Cue isiruirgamiedio. Naga icaifio jiaie creyentiaina o canoia, eo mare. Nia o uifnoega creyentiai o illanomo ria, naimacina o canoia, ua eo mare.

<sup>6</sup> Naie isoide creyentiaina o isiruillana jai fididicue. Rollena creyentiai ofia, ona marena ñaitimaci. Naimaci jaillinomo naimaci jaia, naimacina o canoia, Jusiñamui jitailla isoi, ua eo mare.

<sup>7</sup> Naimie rafue llua muidona, jai macaritimaci. Jusiñamuina uifnoedimomona jaca buena feifnoedimaci.

<sup>8</sup> Creyentiaina cai illa jira, naimacina cai canua. Naimacina cai canua jira, uanaicinona llocana jaidicai.

### *Diótrefes marañede*

<sup>9</sup> O dine ite creyentiaimo cartana jai oredicue. Diótrefesna janore ñaiacadicue. Naimiedi eo uicoidimie. Naimiedi cue uaina uifnoiacañede.

<sup>10</sup> O dine cue ria, naimie finoca rafuena omoimo lloiticue. Cuen jeare ñaite. Jiaie illanomona bite creyentiaina feifnoiacañede. Naimaci feifnuana rairuide. Roracomo naimacia, naimacina jino dotade.

<sup>11</sup> Jeacino finoraini isoi omoi ifieno; iadedi marecinona finoraini isoi omoi i. Marecino finocabidimiedi Jusiñamui ie. Jeacino finocabidimiedi Jusiñamuina ua uifnoñede.

### *Demetrio marena ite*

<sup>12</sup> Nana creyentiaidi Demetriona marena ñaitimaci. Uanaicinodo naimie jaide. Iese naimiena jiai ñaiticai. Cai llucacnodi uanaicinona uifnotio.

### *Rafuena nia lloiacade*

<sup>13</sup> Diga rafuena cueiacadicue; iadedi cueñeiticue.

<sup>14</sup> Raire ona cue cioillemo ocuridicue. Ie mei ñaiticoco.

<sup>15</sup> Uri o i. Cue dine ite o nabaiñaidi uaina omo oredimaci. O dine ite cue nabaiñaiimo cue uaina oredicue. Mai. Juandicue.

## JUDAS ORETAGA RABE

### *Judadi Jusiñamui fetocanomo cartana orede*

<sup>1</sup> Cue nabaiñiaí, bie carta omoi dine oredicue. ¿Nie isoidomoi? Judadicue. Ie rafuena llolena, Jesucristo dibeimo jai maijdicue. Jacobo cue ama. Jusiñamui omoína jai fetuana cue uñuamona, bie cartana oredicue. Cai Moo Jusiñamui omoína isiruite. Jeacinona omoi finoí raillano, Jesucristo omoína jai sedade.

<sup>2</sup> Jusiñamui omoína eo duenailana omoi uñocana omoi jaillana jitaídicue. Naimie omoi comeciaina raise uri itatajana omoi uñocana omoi jaillana jitaídicue. Naimie omoína eo isiruillana omoi uñocana omoi jaillana jitaídicue.

### *Tainocinona llofueraíni ite*

<sup>3</sup> Cue isiruigano, omoímo Jusiñamui caina jai jillotaja rafuena iocire cueiacadicue; iadedi jiaie rafue birui illa jira, omoímo cueticue. Jusiñamuimona cai feiñoga rafuena omoi eo riiduaña jitaídicue. Naie rafuena Cristo oretaganomona cacadicaí. Naie rafuena meidonidicaí. Ieconí duide. Jusiñamui jiaie rafuena lloñeite.

<sup>4</sup> Caímo ite rafuena omoi eo riiduaña jitaídicue. Cai creyentiaí motomo dajerie tainocinona llofueraíni illa jira, iena jitaídicue. Uanaicinona llofuecana naimaci illamo cai comeciaina facadicaí; iadedi Jusiñamui jitaillacinona finoñedimaci. “Jusiñamui caina duenailamona, jeacino finocana cai jaia, cai jeacinona oni dotaite” llofuecabitimaci. “Cai jeacino facaina caina duere finoñeite” llofuecabitimaci. “Jeacino finocana cai jaiacania, caimona mare” llofuecabitimaci. “Jesucristo cai Namana” llofueñedimaci. Naimie lloga rafuedo jaiacaiñedimaci.

“Naimaci isoidinona duere finoíticue” Jusiñamui jiaie llote. Naimie duere sefuillacino anamo jai itimaci.

<sup>5</sup> Iemona omoi raise fueollena, bie rafuemo omoi comeciaina faca. Bie rafuena navui llofueticaí. Iena raise cacadomoi; iadedi iena dane ubiño. Iena lloíticue. Ero, bie eniruemo naimaci billena, Egiptomona Jusiñamui cai jaiagaina bitatate. Naimiena naimaci iñoñena jira, bie eniruemo riñedimaci; iadedi Jusiñamuidi jofue iñenanomo naimaci fiodaillena llote. Iemona naimaci fiodaitimaci. Ie isoide. Naimiena birui omoi iñoñenia, omoína duere finoite.

<sup>6</sup> Ero, bie rafuemonona omoi fueua. Jusiñamui ecimo ite jaienisaímona dajerie imaci illanona jiaie jitaíñedimaci. Naimie isoi iacadimaci. Naimaci illano naimie ecimo jiaie itimaci. Naimaci jitailla rafuena naimaci finollena, naimie ecimo illana fainonocaidimaci. Iemona naimie naimacina jai oni dotade. Naimie illanomo dane iñeítimaci. Naimacimo ite uai jai iñede. Naimie ricaiillafue anamo jai itimaci. Naimie dine nana comíni illruí ia, naimacina duere finoite. Naimacimona omoi fueua. Jeacinona Jusiñamui dibeimo itino finoia, Jusiñamui naimacina duere finoite.

<sup>7</sup> Ero, bie rafuemonona omoi fueua. Sodoma railla nairaí micoriaí maraiñedicinona jiaie eo finouidimaci. Gomorra railla nairaí micoriaí daje isoidimaci. Nainomo íanorí ite nairaíai daje isoidimaci. Naimaci aññede riñoniaí diga itimaci. Naiñaiñuaí iniñede iññaí diga itimaci. Coninina aífedotimaci. Iemona Jusiñamui naimacina jiaie duere finode. Nana naimaci illanona raise jiaie jobaitate. Naimacimona omoi fueua. Jusiñamui nana jeacinona finodinona duere finoite.

<sup>8</sup> Naie tainocinona llofueraíni daje isoidimaci. Nicaírillaífuado jaillamona, ebena jaidimaci. Naimaci abimo jearede rafuena finodimaci. Jusiñamui uaina jamaidimaci. Jusiñamui jaienisaína jeare ñaitimaci.

<sup>9</sup> Miguelna mameciredede jaienici isoi iñedimaci. Miguel Jusiñamui nanoca jaienici. Moisés micorí fiodailla mei, Miguel Moisés micorí abina raíacade. Taife diga Moisés micorí abina uaitate. Taife Moisés micorí abina baíroacade. Miguel iena jiaí jitaide. Miguel Taife diga riire ñaite; iadedi Taifena jeare ñaíñede. Miguel ie comecina facañede: “Cuemo ite uai Taifena oni oretallena”; iadedi naimiemo llote: “Jusiñamui ona duere finoite”.

<sup>10</sup> Naie taino llofueraíni íese iñedimaci. Jusiñamui jaienisaína jeare ñaitimaci. Ocainaíai imaci comeciái uñuacínodo jailla isoi, naie taino llofueraíni imaci uññoga rafuedo jaidimaci. Iemona ja mudímo faífitimaci.

<sup>11</sup> Caín micorí isoi naimaci illa jira, Jusiñamui naimacina duere finoite. Jusiñamui jitailla rafuena Caín micorí finoacaiñena jira, ie ama micorí diga icíríte. Icírillamona Caín micorí ie ama micorína jiaie meinete. Caín micorí rafuedo naie taino llofueraíni jaidimaci. Naimaci jitailla rafuena naimaci finua jira, Jusiñamui naimacina duere finoite. Balaam micorí isoi naimaci illa jira, naimacina duere finoite. Ucube ollena, Balaam micorí uanaicinona jiaie

lloñede; iadedi cai judíuaí comínina jeacinona finotate. Ucube ollena, naie taino llofueraini Balaam micori rafuedo jaidimaci. Uanaicinona jaca llofueñedimaci. Coré micori isoi naimaci illa jira, Jusifiamui naimacina duere finoite. Moisés micori uaina Coré micori iñoñena jira, Jusifiamui naimie micorina meinete. Jusifiamui uaina naie taino llofueraini iñoiacañena jira, jiai faifitimaci.

<sup>12</sup> Dani omoi nabairillamona danomo omoi guia, naie taino llofueraini jiai bitimaci. Naimaci illa jira, raise nabairinidomoi. Meiruiñeno eo gutimaci. Dani naimaci comecimo ite jitaillacinona finodimaci. Omoina canoacaiñedimaci. Marañedimaci. Monamo jamai ite uillie isoidimaci. Afí naie isoide uillie oni ñaitade. Ie mei noci deide. Noci deiñenia, enirue saferena jira, buena sicoñede. Marañede. Naie taino llofueraini marañedimaci. Naimacimo marecino iñena jira, llisiñede riana isoidimaci. Llisilla facaise riana llisiñenia, marañede. Riana llisiñenia, iena oni aiñodicai. Marañena jira, safenaite. Naimaci marañena jira, naie taino llofueraini jiai safenaitimaci.

<sup>13</sup> Naie taino llofueraini jearede rana finocabidimaci. Eo bagode monailai isoidimaci. Monailai eo bagoia, monailai fuemo jearede rana oni ñaicosite. Ucuaina eruailamona naiona cai macarillana uifotícaí; iadedi ucudu ana feia, cai macarillana raise uifñedicai. Naie taino llofueraini ana fede ucudu isoidimaci. Comini uanaicinona uifñotañedimaci. Naimaci llofuiacinomona Jusifiamui jitailla rafuedo cai raise jaillana uifñedicai. Jusifiamui naimacina duere finoite. Naimie illanomo jaca iñeitimaci. Jitiredinomo jaca iitimaci.

<sup>14</sup> Naimacina Enoc jaiete lloite. Adán micori facaisemona Enoc facaisemo Adán cominimona siete moodi comuide. Enoc lloite: “Ero, cai Namadi ie ailluena jaienisai diga biite,

<sup>15</sup> nana naimiena iñoñedinona duere finollena. Naimie jitailla rafuena naimaci finoñena jira, marañedicinona naimaci finua jira, naimiena naimaci jeare riire ñaia jira, naimacina duere finoite” lloite.

<sup>16</sup> Naie taino llofueraini creyentiaina sedarainina uaitaside. Jusifiamuina jeare ñaoidimaci. Dani naimaci jitailla rafuena finouidimaci. Eo abina biruidimaci. Jiaie cominimona rana jamai feiñollena, nano naimacina iobitadimaci. Iobitajano, rana jamai jicadimaci. Naimaci isoi omoi iñeno.

#### *Cristona iñotonomo llucino*

<sup>17</sup> Cue isruiga amatiai, cai Nama Jesucristo oretagano jai llogacinona omoi comeci.

<sup>18</sup> Raitimaci: “Jesucristo nia abido biñena facaiseconi naimie uaina iñoñedino jaca iitimaci. Naimaci jearede jitaillacinodo jaitimaci” raitimaci.

<sup>19</sup> Naie taino llofueraini comini comeciai daje isoi lloillana itatañedimaci. Jusifiamui dibeimo iñede rafuena gaidimaci. Jusifiamui Joreño naimacimo iñede.

<sup>20</sup> Cue isruigano, naimaci isoi omoi iñeno; iadedi Jusifiamui rafue iñocana mai omoi jai. Naie rafuedi mare. Jusifiamui Joreño omoina canuacínodo Jusifiamuimo omoi jai.

<sup>21</sup> Jusifiamui omoina isruillacinona uifñocana omoi jai. Jusifiamui ecimo cai jaca illemo fecuise ocurri. Caina cai Nama Jesucristo duenailla jira, naimie ecimo jaca iiticaí.

<sup>22</sup> Diga comini naie taino llofueraini rafuedo jaidimaci. Iemona dajerie Jusifiamui uaina raise nia iñoñedimaci. Naimacimo llono: “Mai iño.

<sup>23</sup> Dajerie cominina Jusifiamui duere sefuillacinomona jillote”. Taino llofueraini rafuedo naimaci jailla jira, niadi faifitimaci. Naie rafuedo naimaci jailla jira, damierie jeacinona eo finodimaci. Jeacinona naimaci finua isoi omoi finoi raillanona, naimacina jaciruiocaída duenai.

#### *Jusifiamuimo iobillacinona cai fecacabillasa*

<sup>24</sup> Jusifiamuidi omoina jeacinona finoñenana itatarede. Naimie uicomo omoina iño itataite. Omoina jeacinona omoi jaca finoñedena nainomo itataite. Nainomo iocire iitomoi.

<sup>25</sup> Jusifiamuidi jaca dajede. Cai facaina cai Nama Jesucristo fiodaillamona, caina cai jeacinomona jai jillotate. Jusifiamuimo iobillacinona cai fecacabillasa. Naimiedi siño. Naimie uai ebirede. Nana radi naimie anamo ite. Naga rana naimie ocuillena, naimiemo siño uaidi ite. Jaié jaca iese naimiedi ite. Birui jaca iese naimie ite. Ico jaca iese naimie iite. Mai. Macaibaite. Judadícue.



## JUAN ICO SUILLE RAFUENA CUIAFUE

### *Jesucristo ico suille rafue lluana cueticue*

<sup>1</sup> Jesucristona cueticue. Juandicue. Jesucristo facaina maijicabidicue. Ie dibeimo itinomo iena Jesucristo llollena, Jusiñamui naimiena bie rafuena uiñotade. Jaiiruido ico ebena suille rafuena uiñotade. Cuena iena uiñotallena, iena cuemo llollena, ie jaienici cue dine oretate.

<sup>2</sup> Jusiñamui cuena birui uiñotaga rafuena jai cueticue. Jesucristo cuemo birui lloga rafuena jai cueticue. Nana birui cue ciua rafuena jiai jai cueticue.

<sup>3</sup> Bie ico suille rafuena ado facacabidinodi caimare iitimaci. Biena cacacabidino iena ñnuamona, caimare iitimaci. Bie rafue suillirui iairei illa jira, iemo raise cacarei.

### *Siete creyentiai illanuaimo bie carta oredicue*

<sup>4</sup> Asia railla eniruemo ite creyentiai, omoi dine cue uai oredicue. Siete illanomo omoi illamona, bie rafue omoi uiñuana jitaidicue. Iena omoi uiñollena, buena cueticue. Jusiñamui ie Joreño diga, Jesucristo diga, omoína duenaicabide. Omoína uri itatacabite. Iena omoi uiñocana mai omoi jai. Jusiñamui jaiie jaca ite. Birui naimie jaca ite. Ico jaca iite. Ie Joreño naimie abimo illamona, omoína bie rafuena raise cacataite. Iena ñnotaitaite.

<sup>5</sup> Ie Moo uaina raise ñnuamona, eniruemo naimie illa facaise Jesucristo ie Moo rafuena raise atona llouide. Naimie fodaite; iadedi naiemona jillode. Naimie dane fiodaifena jira, nana illaicomini naimie anamo jai itimaci. Caina jaca isiruite. Naimie fiodaillamona caina cai jeacinomona jai jillobitade.

<sup>6</sup> Naimie fiodaillamona naimie cominina jaidicai. Naimie anamo illaima isoi caina sedallena, caina itatate. Naimie cominina cai illa jira, naimie Moo Jusiñamui diga atona birui ñairedicai. Ie muidona naimiemo iobillacinona jaca cai fecacabillasa. Naimie caina sedajasa. Iena jitaidicue.

<sup>7</sup> Ero, eniruemo uillie motodo Jesucristo biite. Naimie bia, nana comini naimiena cioitimaci. Naimiena jaiie meinete nairaidi naimiena cioitimaci. Duere sefuillana jacinailamona nana comini eecuitimaci. Iese jaca suite.

<sup>8</sup> Cai Nama Jusiñamui cuemo lote: “Jaca bue nia ifenia, jaiie jaca iticue. Nana rana finodicue. Nana ra cue uaido icana jaide. Birui iticue. Nana ra fuilla mei, jaca iiticue. Siño jitodicue”.

### *Juan Cristona ciode*

<sup>9</sup> Daajena Cristomo cai duilla jira, omoi amadicue isoidicue. Cristomo cai duillamona, birui duere sefuidicai. Cominina ico naimie sedaia, nainomo iiticai. Naimie cai comeiciaina ocuiñotajamona iemo birui ocuridicai. Jusiñamui uaina cue llua jira, Cristo rafuena cue llua jira, duere cue sefuillena, Patmos railla uiasimo birui iticue. Cárcelmo illa isoi duere sefuillena, illaicomini bene cuena birui oredimaci.

<sup>10</sup> Jusiñamuina cue sedajamona, naimie Joreño cuena namatajamona, iniñenamona nicañrilla isoi cue jinafo dine damie ado lluana cacadicue. Trompeta isoi ie uaidi ficirede.

<sup>11</sup> Cuemo lote:

—O cioacalle rafuena cueno. O cacaacalle rafuena cueno. Ie mei bie siete illanuaimo iena oreta: Efesomo, Esmirnamo, Pérgamomo, Tiatiramo, Sardimo, Filadelfiamo, Laodiceamo. Diese illanuaimo oreta —lote.

<sup>12</sup> Cuemo llotimiena cue cioillena, jinafo dine erodaticue. Siete oromona finoca lampariniai cidodicue. Naga lamparin ie oromona finoca rairacomo raide.

<sup>13</sup> Naie lampariniai motomo imana eruaidimiena cidodicue. Naimiedi Cristo. Areroina jitade. Oromona finoca cinturóna jitade.

<sup>14</sup> Naimie ifotirai userede ñiroi isoi eo userede. Naimie uisi irai boa isoi eruaide.

<sup>15</sup> Naimie eillidi bronce eo dua isoi quenirede. Naimie uai aillue ille tua isoi eo ficirede.

<sup>16</sup> Ie nabeillimo siete ucuduna lliide. Naimie fuemo nagafebei eo jairede loebi ite. Naimie uieco eo quenirede, jitoma eo lligaiñua isoi.

<sup>17</sup> Naimiena cue ciuamona, naimie uicomo fiodaitimie isoi ana uaidicue; iadedi ie nabeilli diga cuena jetajamona raite:

—Cuena jaciruiñeno. Siño jitona cue illamona, jaiie jaca iticue. Ico jaca iiticue.

<sup>18</sup> Jaiie fiodaiticue; iadedi naiemona jaiie jillodicue. Jaca iiticue. Dane fiodaifneiticue. Cue uai siñona jira, comini fiodailliruina lloticue. Cuena ñnoñedino fiodailla mei, naimaci joreñuai illinona jiai lloticue.

<sup>19</sup> O como ciua rafuena cueno. Omo cue ja lolle rafuena cueno. O ciolle rafuena jiai cueno.

<sup>20</sup> Ailluena rafue omo lloiticue. Ona iena uiñotaiticue. Cue nabeillimo siete ucuduaina ciodio. Bie siete ucuduaidi bie siete creyentiai llofueraini isoide. Bie siete lamparíniaidi bie siete illanomo ite creyentiai isoide. Bie creyentiaina ja ñaiacadicue —raite.

## 2

### *Cristo Efesomo ite creyentiaimo lloga rafue*

<sup>1</sup> Cristo cuemo lote:

—Efesomo ite creyentiaimo llolena, nainomo ite llofueraimamo cue lluaña cueno: “Cue nabeillimo siete ucuduai ite. Siete oromona finoca lamaríniaidi motomo iticue. Omoína ñaiticue. Omoí llofueraima cue anamo ite. Omoí motomo cue illamona, cuena nabaidomoi.

<sup>2</sup> Omoí motomo cue illa jira, omoí illana raise uiñotitcue. Omoí comeciaí ocuiñocana iciríñeno itomoi. Marañedicinona finoraini diga nabairiñedomoi. Omoí motomo damierie ‘Cristo oretagaca’ raitinona facaciamaña, naimaci tainona llorainina uiñotomoi.

<sup>3</sup> Omoí comeciaí ocuiñocana jaicabidomoi. Cue muidona duere sefuidomoi; iadedi iena sefuiruiñedomoi. Cuena ñnocana ñia jaidomoi.

<sup>4</sup> Iese itomoi; iadedi omoí abi rafue cuemona birui janore ite. Creyentiaina omoí nano jailla facaise cuena eo isiruitomoi; iadedi birui iese cuena isiruiñedomoi.

<sup>5</sup> Iemo omoí comeciaina faca. Cue ñibeimo dane raise i. Cuena omoí nano isiruilla facaiseconi omoí illa isoí, cue jitaillacinona birui omoí fino. Cue ñibeimo omoí comeciaí dane raise iñenia, omoína duere finoiticue. Iemona omoí lamparín oni uiticue. Omoí creyentiaina ñaiticue. Cue ñibeimo raise omoí iñenia, jairuido omoí illanomo creyentiai iñeitimaci.

<sup>6</sup> Omoína marecinona jiaí lloiticue. Nicolaítas railla comini finoca rafuena gaiñedomoi. Iena jiaí gaiñedicue. Eo marañede rafuena finocana jaidimaci.

<sup>7</sup> Jusiñamui Joreñomona cue lloga rafue ite, omoí creyentiai iena. Bie rafue bu cacajia, iena jiaí ñnua. Cuena raise ñnotinomo Jusiñamui illanomo ite riarana iticue. Ie lllilemona jaca iitimaci” cueno.

### *Cristo Esmirnamo ite creyentiaimo lloga rafue*

<sup>8</sup> Cristo cuemo lote:

—Esmirnamo ite creyentiaimo llolena, nainomo ite llofueraimamo cue lluaña cueno: “Jaie jaca iticue. Eniruemo jaie cue ia, fioidaiticue; iadedi ñaiemona jai jilloditcue. Jaca iitcue.

<sup>9</sup> Cue cominina omoí illa jira, duere sefuidomoi. Omoí duerenana uiñotitcue. Benomo dueredomoi; iadedi Jusiñamuiomona duenidomoi. Naimie dine ico omoí ia, buerenitomoi. Damierie omoína jeare ñaiana uiñotitcue. Naimacidi judíuái comini; iadedi cue ñibeimo iñeditimaci. Taife anamo itimaci.

<sup>10</sup> Ico omoí duere sefua, jaciruiñeno. Taife cárcelmo omoimona damieriena itataite. Abido danomo omoí jaillena, iese omoína duere finoite. Diez digarui duere sefuitomoi. Omoí ille ñinori cuena ñnocana omoí jai. Duere sefuillamona bu fioidaia, cue diga jaca iite.

<sup>11</sup> Jusiñamui Joreñomona cue lloga rafue ite, omoí creyentiai iena. Bie rafue bu cacajia, iena jiaí ñnua. Jusiñamuidi cuena raise ñnotinona naimaci jeacino facaina ibana oñeite. Iraimo faifñeitimaci; ia Jusiñamui dine jaca iitimaci” cueno.

### *Cristo Pérgamomo ite creyentiaimo lloga rafue*

<sup>12</sup> Cristo cuemo lote:

—Pérgamomo ite creyentiaimo llolena, nainomo ite llofueraimamo cue lluaña cueno: “Nagafebei eo jairede lloebi cuemo ite.

<sup>13</sup> Omoí illana uiñotitcue. Taife anamo itino motomo itomoi; iadedi cuena ñnocana ñia jaidomoi. Omoimona Antipas micorina navui meinetimaci. Naimie micoridi cue rafuena raise llofueuide. Naie facaise cuena fañonocaiñedomoi;

<sup>14</sup> iadedi cuemona janore rafue omoí diga birui ite. Omoimona damieriedi Balaam micorí llofuaiacínodo jaidimaci. Balaam micorí Balac micorímo jaie llua jira, omoí jaiagai jeacino fioidimaci. Balac cominimo omoí jaiagai diga nabairillena lote. Ie jira omoí jaiagai jiraraimo fecaca guillena naimaci diga gutimaci. Iemei naimacimona ainiaina otimaci. Jusiñamuina ñnoñedinomona ainiaina otimaci. Naie mona jearede rafue comuide. Omoimona birui damierie iese isoídimaci. Cuena ñnoñedinomona ainiaina otimaci.

<sup>15</sup> Omoimona damierie nicolaítas railla llofuaiacínodo jiaí jaidimaci. Naimaci llofuaiacínodi uanañedicino.

<sup>16</sup> Naie llofuaiacínomona eneno mai omoí i. Iedo jaiñeno. Naie llofuaiacínodo jaidinomo: ‘Omoí comeciaí iuai dane meido’ llono. Iena naimaci finoñenia, cue ñibeimo naimaci raise iacañenia, cuemo ite lloebi diga cuena ñnoñedinona duere finoiticue.

<sup>17</sup> Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai ñnua. Judíuiai jaiagaimo maná railla guille cue illa isoi, cuena raise ñnotinomo monamo jai ite maná isoi iitícue. Biena ñaitícue. Imaci comeciaina ocuiñotajacinona iitícue. Cue cominina naimaci illamona, naimacimo userede nofcina jiai iitícue. Nainomo mameci ite. Dani naiena feiñotino naie mamecina uiñoitimaci” cueno.

*Cristo Tiatiramo ite creyentiaimo lloga rafue*

<sup>18</sup> Cristo cuemo llote:

–Tiatiramo ite creyentiaimo lllollena, nainomo ite llofueraimamo cue lluaña cueno: “Jusiñamui Jitona cue illanona, bie rafue omoimo lloiacadicue. Cue uisi irai isoi boode. Cue eilli bronce eo dua isoi quenirede.

<sup>19</sup> Omoi finoca rafuena uiñotícue. Jusiñamuina omoi isiruillana uiñotícue. Jiaie cominina omoi isiruillana uiñotícue. Cuena omoi ñnuana uiñotícue. Jiaie creyentiaina omoi canocabillana uiñotícue. Duere sefuidomoi; iadedi omoi comeciiai ocuiñuana uiñotícue. Navui iese icana jaidomoi. Birui bai lliai jaidomoi;

<sup>20</sup> iadedi cuemo omoi diga rafue ite. Omoi motomo marañede riño ite. Jezabelna ñaitícue. Naiñaiñona omoi oni dotañena jira, cuemo omoi diga rafue ite. ‘Jusiñamui rafuena jino llua uai cuemo ite’ naiñaiño llote. Uanaiñedicinona llofuecabilla jira, omoimona damieriena jifuate. Jearede rafuena llofuecabite. Omoi aiñede riño diga illana llofuate. Omoi iniñede ñima diga illana llofuate. Jiraraimo fecaca guille guillena llofuate. Iena guilla jira, omoimona damierie naie jiraraina sedade. Iese naiñaiño llofuecabite.

<sup>21</sup> Naiñaiño comeci iuai meidollena are sedadicue; iadedi naiñaiño naie jearede rafuena fainonocaiacañede.

<sup>22</sup> Naiñaiño duere sefuillena, naiñaiñona duitaitícue. Naimaci comeciiai iuai naimaci meidoñenia, naiñaiño llofuiacínodo jaidinona jiai eo duere finoitícue.

<sup>23</sup> Naiñaiño dibeimo itinona meineitícue. Nana creyentiaidi nana comini comeciiai iuaillaina cue uiñuana jiai uiñoitimaci. Nana comini comeciiai facajacinona cue uiñuana jiai uiñoitimaci. Ie jira omoi finolle rafue diese cuemona duere sefuitomoi.

<sup>24</sup> Jezabel llofuiacínodo jaiñedinomo ja lloiticue. Taife come uiñoñega rafuena uiñote. Iena nia uiñoñedomoi. Omoimo jiaie rafuena lloñeiticue;

<sup>25</sup> iadedi cue nia abido biñenia, cuemona omoi uiñoga rafuena ñnocana mai jai.

<sup>26</sup> Cue Moomona cue uaina feiñotícue. Cuena raise ñnuamona, abido cue bia, cue jitaillacinona finocabidinomo cue uaina iitícue. Naie facaise cue uai diga cue anamo ite nairaiaina raise sedaitimaci.

<sup>27</sup> Naimacina riire raise sedaitimaci, cue jitailla rafue naimaci finollena. Iena naimaci finoñenia, naimacina duere finoitimaci, lloedosi diga, nogo eo llaila isoi.

<sup>28</sup> Cuena ñnotinomo monairaicuduna jiai iitícue.

<sup>29</sup> Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai ñnua” cueno.

### 3

*Cristo Sardimo ite creyentiaimo lloga rafue*

<sup>1</sup> Cristo cuemo llote:

–Sardimo ite creyentiaimo lllollena, nainomo ite llofueraimamo cue lluaña cueno: “Jusiñamui Joreño cuemo ite. Naimie Joreño omoina canocabide. Omoina sedacabide. Siete ucuduai cuemo jiai ite. Omoi llofueraimana ñaitícue. Omoi finoca rafuena uiñotícue. ‘Cristona raise ñnotica’ raitomoi; iadedi omoi comeciaimona raise ññedomoi.

<sup>2</sup> Cue dibeimo raise dane i. Cuena dane raise ñnocana jai. Cuena jai fainonocaiacadomoi. Jusiñamui omoi finoca rafueri iobiñede.

<sup>3</sup> Cue rafuena jai cacajamona, iena ñnotomoi. Iedo dane jai. Omoi comeciiai iuaina dane meido. Cue dibeimo dane raise omoi iacaiñenia, firiraima bainino billa isoi, omoina duere finollena, ebena biitícue. Omoi ñine cue billiruina uiñoñeitomoi.

<sup>4</sup> Omoimona damierie jearede rafuena finocana jaiñedimaci. Jusiñamuimona naimaci comeciiai marena jira, cue ñine naimaci illena, userede ñiroina jitaítimaci.

<sup>5</sup> Cuena ñnocana jaidinodi userede ñiroina jitaítimaci. Cuemo ite rabenicomona naimaci mameciaina doñeiticue. Cue illanomo jaca iitimaci. ‘Naimacidi cue comini’ cue Moomo lloiticue. Naimie jaienisaimo iena jiai lloiticue.

<sup>6</sup> Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai ñnua” cueno.

*Cristo Filadelfiamo ite creyentiaimo lloga rafue*

<sup>7</sup> Cristo cuemo llote:

—Filadelfiamo ite creyentiaima llovena, nainomo ite llofueraimamo cue lluaena cueno: “Mareuidimedicue. Uanaicinona jaca lloticue. David micori jirona cue illamona, illaimana cue illa jira, siño uai cuemo ite. Ie muidona cue jitailla diese cominina feiñoticue. Jusiñamui illanomo naimaci illena, naimacina feiñoticue. Cue jitailla diese cominina feiñoedicue.

<sup>8</sup> Omoi finoca rafuena uñoticue. Omoina cue canua jira, jaca buna cue rafuena omoi lluaena itatanide. Jamai bue isoidomo; iadedi cue rafuena ñnocana jaidomo. Cuena janofedomoi.

<sup>9</sup> Omoi dine damerie Taife anamo itimaci. Naimacidi judiui; iadedi cue dibeimo iñedimaci. Tainona llocabitimaci. Ero, omoi dine naimacina cue bitatajamona, omoina cue isiruillana uñoitimaci. Cue dibeimo naimaci jailla mei, cuemo iobillacinona fecaitimaci.

<sup>10</sup> Nana cuena ñnoñedinona ico eo duere finoiticue. Iemona cuena naimaci ñnoñenana uñoiticue. Omoi duere sefuiñellena, naie facaisemona omoina jillotaiticue.

<sup>11</sup> Eniruemo ebena abido biiticue. Cuemona ibana omoi feiñoñeni raillano, cue dibeimo ñnocana omoi jai. Cue dibeimo raise omoi jaiñenia, cuemona jaiimie omoi facaina ibana feiñoite.

<sup>12</sup> Cuena raise ñnotino comeciaina ocuiñotaiticue. Cue illanomo jaca itimaci. Cuemo naimaci duilla jira, cue jiaie mamecina naimaci abimo cueiticue. Jusiñamui mamecina naimaci abimo cueiticue. Jusiñamui illano mamecina naimaci abimo cueiticue. Naimie illanodi comue Jerusaléna mameciredo. Naimiemona, monamona ico ana biite.

<sup>13</sup> Jusiñamui Joreñomona cue lloga rafue ite, omoi creyentia iena. Bie rafue bu cacajia, iena jiai ñnua” cueno.

*Cristo Laodiceamo ite creyentiaimo lloga rafue*

<sup>14</sup> Cristo cuemo llote:

—Laodiceamo ite creyentiaimo llovena, nainomo ite llofueraimamo cue lluaena cueno: “Siño Jitodicue. Cue lloga uaina jaca finocabidicue. Uanaicinona jaca llocabiticue. Cue uaido Jusiñamui nana finode. Nana comuitate.

<sup>15</sup> Omoi finoca rafuena uñoticue. Cue rafuedo jaillana nia fañonocaiñedomoi; ia cue rafuedo eo raise jaiñedomoi. Janore ñnocana jaidomo.

<sup>16</sup> Omoi finoca rafuena cue gaiñena jira, cuemona omoina oni dotaiticue.

<sup>17</sup> ‘Ucuberedicai’ raitomoi. ‘Raruiaredicai. Nana cai jitailla ra caimo ite’ raitomoi. Cuemona iese iñedomoi. Cuemona dueredomoi; ia iena uñofedomoi. Cuemona caimare iñedomoi. Cuena omoi raise ñnoñena jira, uisimidino isoidomoi. Taimiedomoi isoidomoi.

<sup>18</sup> Ie jira omoina dajerie rafuena llofueiticue. Cuemona omoi eo duerena jira, omoi comeciara raise iñena jira, omoimo fiebidicinona cuemo jica. Cuemona ono. Omoi duenillena, cuemona eo mare oro isoide rana ono. Omoi taimieñelle isoifellena, cuemona omoi meiruiñellena, userede ñiroi isoide ra cuemona ono. Omoi uisina cioille isoillena, cuemona manue ono. Omoi comeciaina ñaiticue. Cuena raise omoi ñnoia, buena omoi comeciaino fiebiñeite.

<sup>19</sup> Cue isiruigano cue dibeimo raise illena, naimacimo riire llocabiticue. Cue uaina naimaci ñnollena, naimacina jiai duere finocabidicue. Ie jira cue dibeimo raise omoi i. Jecino omoimo ia, iena fañonocai.

<sup>20</sup> Ero, nase tuticue isoidicue. Bu cuena cacajia, cue fo billena cuena uaidoia, nasena bu econoia, fo jaiticue. Naimiena nabaillanona, naimie diga guiticue. Omoi comeciaina ñaiticue. Cue rafuena omoi cacaja mei, iena omoi ñnoia, cuena feiñoitomoi. Iemona conini nabaiticai.

<sup>21</sup> Eniruemo cue Moo jitailla rafuena jaiie cue fuidua mei, naimie ecimo abido jai iticue. Cueri naimie iobillamona, illaimana cue illamona, naimie ecimo jai iticue. Ie isoide. Cuena raise ñnotino monamo cue ecimo itataiticue. Cue cominina naimaci illa jira, naimacina iobitallena, cue ecimo naimacina nabaiticue.

<sup>22</sup> Jusiñamui Joreñomona cue lloga rafue ite, omoi creyentia iena. Bie rafuena bu cacajia, iena jiai ñnua” cueno.

## 4

*Juan Jusiñamui illanomo ciua rafue*

<sup>1</sup> Dallu illanona monamo cue eruaia, jiaie rafuena ciodicue. Nainomo Jusiñamui illanomo econoga nasena ciodicue. Ailli cue diga ñaitimiedi cuena uaidote. Naimie uai trompeta isoi ficiredo. Llote:

—Monamo bi. Jaiiruido sulle rafuena omo acataiticue.

<sup>2</sup> Jusiñamui Joreño anamo cue illamona, nicairilla isoi Jusiñamui illanona ciodicue. Nainomo naimie ana raillana ciodicue.

<sup>3</sup> Naimie eo quenirede. Eo raifide ebirede noficina eruaide. Jaspe railla noficina eruaide. Jaspe enefebecodo ciode. Cornalina railla noficina eruaide. Cornalina jiairede. Naie illano ecimo ameona ciodicue. Ameo mocorena jira, esmeralde railla noficina eruaide.

<sup>4</sup> Naie illano ecimo veinticuatro rairabici jiai ite. Nainomo userede iniroina jitajanona veinticuatro einamaci ana raidimaci. Naimaci ifogimo oromona finoca nuicirai ite.

<sup>5</sup> Jusiñamui illanomon boricabide. Jiai gurucabide. Bue isoi eo ficirede. Naie illano uicomo siete reitirai boode. Naie reitiraidi Jusiñamui Joreño mamecido nainomo boode.

<sup>6</sup> Jusiñamui illano uicomo vidriona eruaide joraina ciodicue. Eo quenirede. Naimie illano ecimo cuatro cajedino ite. Diga uisi naimaci uiecomo ite. Diga uisi naimaci emodomo ite.

<sup>7</sup> Damie leónna eruaide. Jiaimie jurareta jitona eruaide. Jiaimie ie uieco come uiecona eruaide. Jiaimie feede majaiñona eruaide.

<sup>8</sup> Nagamiaimo seis iaico ite. Ailluena uisi naimaci iaicuaimo ite. Naimaci abimo uisi jiai eo ite. Nagarui iniñeno jaca llotimaci:

Mare, mare, mare.

Cai siño Nama Jusiñamuidi eo mareuidimie.

Jaie jaca ite. Birui ite. Ico jaca iite.

<sup>9</sup> Naimaci iese llua jira, Jusiñamuina iobitadimaci. Naimiemo iobillacinona naimaci iese fecaia,

<sup>10</sup> naie veinticuatro einamaci Jusiñamui uicomo ana bitadajanona, naimiemo iobillacinona jiai fecadimaci. Naimieri iobillanona, naimaci nuiciraina naimie dine faianona,

<sup>11</sup> rotimaci:

Cai Nama Jusiñamui, ona eo iobitaiacadica.

Odi mareuidio.

Nana rana comuitatio.

Nana cominina comuitatio.

O jitailla jira, naimaci itimaci.

Ie jira iobillacinona omo fecacabidicai.

## 5

### *Juan Jusiñamui illanomo ferinoga rabe illana ciode*

<sup>1</sup> Jusiñamui illanomo cue nia eruaia, naimie nabellimo ferinoga rabe illana ciodicue. Nagafebeimo cuega rafue jai ite. Siete nitaca ra illanoma, naie rabe raise ibaibide.

<sup>2</sup> Jusiñamui ie nanoca jaienici ado lluaana cacadicue. Naimie jicanote:

—¿Bumo ite uaidi nitaca rabe econollena, naie rabena facallena?

<sup>3</sup> Monamo itinomona, enirue itinomona, jai fioidaitinomona, bumio ie uai iñede, naie rabe oni econollena. Naie rabe facanidimaci.

<sup>4</sup> Jaca bumio naie uai iñena jira, eo eedicue.

<sup>5</sup> Naie facaise naie veinticuatro einamacimona damie cuemo llote:

—Mai eñeno. Judá nairai ie Leónna mameciredimiedi iena econorede. Naimiedi David micori comini imie. Ie dibeimo iñedinona jai emodofilla jira, naimiemo uai ite, naie siete nitaca rana oni suiñollena, naie rabena econollena.

<sup>6</sup> Naie facaiseconi Toica Llaudana ciodicue. Jusiñamui illano uicomo naimie ite. Naie cuatro cajedino naimie ecimo ite. Naie veinticuatro einamaci naimie ecimo jiai itimaci. Faga llaudana eruaide; iadedi jai jilluamona naidaide. Naie Toica Llaudadi Cristo. Naie Llaudamo siete sigai ite. Siete uisi naimiemo jiai ite. Naie uisidi Jusiñamui Joreño mamecido ite. Nana cominina canollena, naimacimo Cristodi Jusiñamui Joreña jai orede.

<sup>7</sup> Naie facaise Jusiñamui ie nabellimona naie rabena ote.

<sup>8</sup> Iena naimie ua mei, naie cuatro cajedino, naie veinticuatro einamaci diga, naimiema sedallena, naimie uicomo ana bitadatimaci. Nagamiemo guitarrana eruaide arpa ite. Nagamiemo oromona finoca copa ite. Naga copamo caimare soride ra boode. Naie radi Jusiñamuimo comini jiacino mamecido ite.

<sup>9</sup> Llaudana sedallena, naimaci arpas taillanona, comue ruana rotimaci:

O marena jira, o uai ite, naie rabe econollena.

Ie nitaca rana oni suiñoitio.

Jiaino jaie ona meinetimaci.

O fiodailla jira, o diaillamona, Jusiñamui dibeimo naga nairaimona cominina itatatio.

Naimaci jeacinomona jillotatio.

<sup>10</sup> Naimacina jai fetodio.

O comini naimaci illamona, Jusiñamui diga atona ñacabitimaci.

Naimie anamo jairuido eniruemo ite cominina sedaitimaci.

Ie jira naie rabena oni suiñoredio.

<sup>11</sup> Iemei dane eruallamona, naimie ecimo eo ailluena Jusiñamui jaienaisaina ciodicue. Naie cuatro cajedino ecimo, naie veinticuatro einamací ecimo itimaci. Diga illa jira, facanide.

<sup>12</sup> Ado llotimaci:

Bie Toica Llauda isoidimie jaie fiodaite; ia jai jillode.

Naimie eo mareuidimiena jira, Jusiñamui ie uai naimiemo jai illamona, Jusiñamui nana naimiemo jai illamona, Jusiñamui naimiema eo abina uifotajamona, naimiema jiai iobitaiacadicaí.

Naimiema cai iñuanona, naimiemo iobillacinona feacaadicaí.

<sup>13</sup> Ie facaise nana comini, nana Jusiñamui comuitaga ra diga, lluaa cacadicue. Monamo itino, enirue itino, jai fiodaitino, monallaimo itino lluaa cacadicue. Llotimaci:

Jusiñamuina jaca cai iobicabillasa. Toica Llauda isoidimiena jaca cai iobicabillasa. Iobillacinona jaca feacaadicaí. Caina jaca sedallesa.

<sup>14</sup> Naie cuatro cajedino raitimaci:

—Ie isoi jiai lloiacadicaí.

Ie facaise naie Llauda isoidimiena sedallena, naie veinticuatro einamací ana bitadatimaci.

## 6

### *Juan siete nitaca ra oni suiñuana ciodicue*

<sup>1</sup> Toica Llauda isoidimie iobillacinona naimaci fecaja mei, Llauda isoidimie daje nitaca ra oni suiñuana ciodicue. Naie cuatro cajedinomona damiedi gurua uai isoi lluaa cacadicue. Naimie llote:

—Mai bi.

<sup>2</sup> Naimie llua mei, userede caballo billana ciodicue. Caballo emodo itimie sicuira ite. Illaimana jira, naimie ifogimo nuicirai jide. Ie bacauai anafettallena, oni jaide.

<sup>3</sup> Iemei Llauda isoidimie jaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

<sup>4</sup> Naimie llua mei, jiairede caballo billana ciodicue. Caballo emodo itimie are lloebi illamona, Jusiñamui jitailla jira, caballo emodo itimie eniruemo itinona uri itatañede. Naimaci uri iñena jira, conini icirilla jira, conini meinetimaci.

<sup>5</sup> Iemei Llauda isoidimie jaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

Naimie llua mei, jitirede caballo billana ciodicue. Aime guille facaise illa jira, caballo emodo itimie onollimo ra facaradi ite.

<sup>6</sup> Naie cuatro cajedino motomona damie llote:

—Guille raise iñena jira, comini aime guitimaci. Daje kilo trigo ie core darui maijia ua ucube diese raifide. Iemona llomenicono finoia, dacaño guille raifi ite. Tres kilos cebada ie core darui maijia ua ucube diese raifide. Iena damie oia, iemona llomenicono finoia, dacaño amani guille raifi ite. Illimo riana nia ite; ia iena iballena ucube baiñede. Ie muidona aime guitimaci —llote.

<sup>7</sup> Iemei Llauda isoidimie jaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

<sup>8</sup> Naimie llua mei, liai usereide caballona ciodicue. Ie emodo itimie mamecidi fiodaitimie. Jusiñamui uai naimiemo illa jira, naimie jailla mei, ailluena fiodaitino itimaci. Jobairillemona, aime guillemona, duicomona, riirede ocainaiamona fiodaitimaci. Atuedo meinetasiñeite; iadedi eo ailluena meinetasiite. Riaí uaimona ie cuarta facaina comini fiodaitimaci.

<sup>9</sup> Iemei Llauda isoidimie jaie nitaca ra oni suiñode. Suiñua mei, Jusiñamuimo caimare soride boode rana jobaisoillanona ciodicue. Naie illano anamo comini joreñuaina ciodicue. Jusiñamui rafuena naimaci llua jira, “Jusiñamui cominidicaí” naimaci llua jira, Jusiñamuina iñofedino naimacina meinetimaci. Jai fiodaillamona naimaci joreñuai Jusiñamui illanomo jai itimaci.

<sup>10</sup> Jusiñamuimo ado llotimaci:

—Cai Nama, siño jitodio. Mareuidimiedio. O uaina jaca finodio. ¿Niruido caina meinetinona duere finoitio? ¿Niruido ibana oitio?

<sup>11</sup> Jusiñamui cominina illamona, naimacimo Jusiñamuidi userede areroina jitallena fecade. Llote:

—Janore jisa seda. Ibana nia oñeiticue. Cue dibeimo omo maijia isoi, cue cominina nia meineitimaci. Naimacina meinia mei, ibana oiticue.

<sup>12</sup> Iemei Llauda isoidimie jiaie nitaca ra oni suiñuana ciodicue. Suiñuana, aillue ñuisaño suide. Jitoma eo jitireficaide. Fivuidi diruena eruai. Jiairede.

<sup>13</sup> Riirede aifi riarana ana llutaja isoi, monamona eniruemo ucuai llude.

<sup>14</sup> Ferinoga rabe oni uilla isoi, mona iñebicaide. Naga anedu, naga uiasi diga jiai oni jaide.

<sup>15</sup> Ie jira illaicomini, jamai bue isoñedino, ucuberedino, patrón anamo itino, patrón anamo iñedino, ua nana comini jaciruillamona reiritimaci. Damierie nofici moto ifomo reiritimaci. Damierie anedu motomo reiritimaci.

<sup>16</sup> Anedumo llotimaci. Noficimo llotimaci:

—Caina ibaillena, cai emodomo ana uai. Jusiñamui riicaillafuemona caina reirita. Llauda isoidimie riicaillafuemona caina reirita.

<sup>17</sup> Iaimaiaí riicaillarui jai ite. Naiemona buna jillobinide —llotimaci.

## 7

### *Juan ailluena Israel comini Jusiñamui sello diga nitajana ciod*

<sup>1-2</sup> Naie facaise jiaie ico suille rafuena ciodicue. Cuatro Jusiñamui jaienicina ciodicue. Damie jitoma billanomo ite. Jiaimie jitoma jaillanomo ite. Jiaie iaimaiaí beicimo itiaiaiaiaí. Aifi biñellena itimaci. Ie muidona monaillai dine aifi iñede. Aifi iñena jira, amenaiaí nirariñede. Eniruena monaillai diga maraiñeno finollena naimacimo uai ite. Naie facaise jiaie jaienici jitoma billanomona billana ciodicue. Naimiedi cai cajede Jusiñamui ie sellona uite. Jiaie jaienisaímo ado llote:

<sup>3</sup> —Eniruena aifi diga maraiñeno nia finoñeno. Monaillaina maraiñeno nia finoñeno. Amenaiaína maraiñeno nia finoñeno. Jusiñamui dibeimo itino uiecuai itofiai sello diga nia cai nitañenia, eniruena maraiñeno finoñeno.

<sup>4</sup> Ailluena comini sello diga nitade. Ciento cuarenta y cuatro mil diese nitajana cacadicue. Nana naimaci Israel cominimona itimaci.

<sup>5</sup> Judá micori cominimona doce mil ite. Rubén micori cominimona doce mil ite. Gad micori cominimona doce mil ite.

<sup>6</sup> Aser micori cominimona doce mil ite. Neftalí micori cominimona doce mil ite. Manasés micori cominimona doce mil ite.

<sup>7</sup> Simeón micori cominimona doce mil ite. Leví micori cominimona doce mil ite. Isacar micori cominimona doce mil ite.

<sup>8</sup> Zabulón micori cominimona doce mil ite. José micori cominimona doce mil ite. Benjamín micori cominimona doce mil ite. Diese nitade.

### *Juan ailluena comini userede iniroina jitajana ciod*

<sup>9</sup> Naie facaise ailluena cominina ciodicue. Ailluena jira, naimacina facadonicicue. Naga nairaiaimona itimaci. Naga jiaie ñaia uaido ñaitino itimaci. Jusiñamui uicomo itimaci. Toica Llauda isoidimie uicomo itimaci. Userede iniroina jitadimaci. Naimaci onollimo raforuai ite.

<sup>10</sup> Ado llotimaci:

Bie Llauda isoidimie jiaie fiodaillamona, cai jeacinomona Jusiñamui caina jai jillotate.

<sup>11</sup> Naie facaise nana Jusiñamui jaienisaí naimie ecimo naidaillana ciodicue. Naie veinticuatro einamací ecimo, naie cuatro cajedino ecimo jiai naidaidimaci. Naie facaise Jusiñamui uicomo ana bitadajanona, naimiena sedadimaci.

<sup>12</sup> Raitimaci:

Bie comini isoi omo iobillacinona jiai feacaadicaí.

Odi mareuidimedio. Abina eo uñotio. Odi jaca siño jitodio.

Ie jira iese lloticaí.

Ona jaca cai lobitajasa.

<sup>13</sup> Naie facaise naie veinticuatro einamacimona damie cuemo jicanote:

—¿Userede iniroina jitadinodi nímaci? ¿Ninena bitimaci?

<sup>14</sup> Uai oticue:

—Uiñoñedicue. Cuemo llono.

Naimie uai ote:

—Bimacidi eo duere sefuilla facaise Jusiñamuina ñnoñedino meinégano. Naimaci iniroina jai jocoritimaci. Llauda isoidimie jiaie fiodailla jira, naimie diruedo jocuamona, naimaci iniroi jai userede. Naimaci iniroina lloticue; ia naimaci comeciaina jiai ñaiticue. Llauda isoidimie fiodailla jira, naimaci comeciái jai jeanide.

<sup>15</sup> Ie jira Jusiñamui uicomo itimaci. Nainomo naimiena jaca sedaitimaci. Naimiena jaca iobitaitimaci. Naimie ocuilla rafue jaca finoitimaci. Naimacina naimie raise nabaillamona, naimacina raise eenoite.

<sup>16</sup> Dane duere sefuiñeitimaci. Nana naimaci jitailla ra naimacimo iite. Aime dane guñeitimaci. Naimaci jiroacalle ra jaca iite. Eo ecasillamona dane duere sefuiñeitimaci. Iemona dane usitañeitimaci.

<sup>17</sup> Jusiñamui illanomona Llauda isoidimie naimacina raise sedaja jira, raise marena iitimaci. Naimacina naimie raise sedajamona, jaca iitimaci. Jusiñamui naimacina raise duenaillamona, duere sefuillamona dane eeñeitimaci. Dane sunañeitimaci.

## 8

*Juan Llauda isoidimie iraiie nitaca ra oni suiñuana ciode*

<sup>1</sup> Toica Llauda isoidimie iraiie nitaca ra oni suiñuanona, media hora monamo tiñ raññoicaide.

<sup>2</sup> Iemei siete Jusiñamui jaienici naimie uicomo illana ciodicue. Nagamiemo daje trompetana fecade.

<sup>3</sup> Naie facaise jiaie jaienici billanona, Jusiñamuimo caimare soride ra jobaisoillano ecimo naidaide. Naie jobaisoillanodi oromona finoca. Ie onollimo oromona finoca cucharón eruaide ra ite. Ailluena caimare soride ra naimie feiñua mei, iena jobaide. Ie facaise nana Jusiñamuina ñnotino jiiacino Jusiñamuimo jaide.

<sup>4</sup> Jobaillamona Jusiñamui uicomo a jaide. Nana Jusiñamuimo jiiacino diga a jaide.

<sup>5</sup> Naie facaise Jusiñamuimo jobaisoillanomona boode reici jaienici uanona, cucharóna eruaide ramo iena jonianona, eniruemo iena ana dotade. Ie jira gurucabide. Bue isoi eo ficirede. Naganomo boricabide. Ñuisaño suide.

*Juan trompetas fillana cacade*

<sup>6</sup> Iemei naie siete jaienici naimaci trompetas fillana llinote.

<sup>7</sup> Damie ie trompetana fite. Filla jira, monamona janorede hielo, boode ra diga, dirue diga, eniruemo uaide. Atuedo enirue boofede; ia ailluena boode. Riai uaimona ie tercera facaina boode. Nainomo nana amenaia; boode. Nainomo nana raiticño boode.

<sup>8</sup> Jiaie jaienici ie trompeta fite. Filla jira, Jusiñamui anedu isoide boode ra monaillaimo faite.

<sup>9</sup> Iemona monaillai diruena jaide. Atuedo iese jaiñede; ia ailluena iese jaide. Riai uaimona ie tercera facaina diruena jaide. Ie muidona ie tercera facaina llicia; fiodaite. Nainomo ite botemona ie tercera facaina jiai anabaite.

<sup>10</sup> Jiaie jaienici ie trompetana fite. Filla jira, monamona aillue boode ucudu eniruemo uaide. Iemona ie tercera facaina illenia; ie tercera facaina jorainia; diga erireficaide.

<sup>11</sup> Ie muidona naie ucudu Ajenjona mameciredede. Riai uai oni dobañuamona "Eriredimie". Iemona jinui erireficaide. Iena jiruamona, ailluena comini fiodaitimaci.

<sup>12</sup> Jiaie jaienici ie trompetana fite. Filla jira, jitoma, fivui diga, ucuai diga, fuiride. Iemona aremona cuatro horas raise usenide. Naiona cuatro horas eo jitrede.

<sup>13</sup> Iemei jaienici ado cuiriollana cacadicue. Monamo feianona llote:

—Eniruemo itino ua eo duere ja sefuitimaci. Daje amani jaienici imaci trompetana nia fiñede. Iena naimaci fia, comini eo duere sefuitimaci.

## 9

<sup>1</sup> Jiaie jaienici ie trompeta fite. Filla jira, naie facaise monamona eniruemo damie ucudu mamecido jai uaillana ciodicue. Naimiemo Jusiñamui daje llavena fecade. Enirue eo ana ite ifo nase ie. Nainomo Taife comini, Janaba comini diga itimaci.

<sup>2</sup> Llave diga naie ifo ie nasena econote. Ie facaise ifomona eo ailluena uillie jino bite. Ie muidona jitoma raise bainide. Mona jitredecaide.

<sup>3</sup> Uilliemona fioduaina eruaillanona, Taife comini, Janaba comini diga jino billanona, nana eniruemo bitimaci. Jusiñamui llua jira, acaido isoi fioduai eruaidinodi maitimaci.

<sup>4</sup> Raiticño naimaci guillena, ibena naimaci guillena Jusiñamui rairuide. Naimie jitailla jira, naimie sello diga nitañeganona duere finodimaci.

<sup>5</sup> Jusiñamui jitailla jira, cinco fivui naimacina duere finoitimaci; ia cominina meineñeitimaci. Acaido isoi isire maitimaci. Eo isirenite.

<sup>6</sup> Iese ico suia, eo duere comini sefuilla jira, fiodaillana jitaitimaci. Naimaci abina meinecanitimaci. Fiodaiacanitimaci; ia fiodainitimaci.

<sup>7</sup> Fioduaidi jobaime dine jaide caballuaina eruaidimaci. Naimaci ifogimo oromona finoca nuicirai eruaide radi ite. Naimaci uiecuai cominina eruaidimaci.

<sup>8</sup> Naimaci ifotie arena illanona, riño ifotiena eruaide. Naimaci isiduai leones isiduaina eruaide.



<sup>9</sup> Naimaci abiaimo ico isoi ra ite. Lloeomona finoca rana eruaide. Naimaci feiamona, ailluena caballuaina jobairillanomo jaillena riire sonode carretas isoi ficiredimaci.

<sup>10</sup> Naimaci omacai acaido isoide. Naie diga maillanona, cinco fivui cominina duere finoitimaci.

<sup>11</sup> Naimaci illaimadi naie ana ifona sedadimie. Judiuai uaimona naimie mamecidi Abadón. Griego uaimona naimie mamecidi Apolión. Oni dobañuamona naimie mamecidi Cominina Fuidodimie.

<sup>12</sup> Daje duere sefuilla rafue jai fuite. Mena nia suiñede.

<sup>13-14</sup> Naie facaise jiaie jaienici ie trompeta fite. Jusiñamui uicomo ite caimare soride ra jobaisoillano ite. Oromona finoca. Nainomo cuatro sigai ite. Nainomona jaienicimo damie llote:

–Eufrates railla ille fuedo cuatro maiga jaienicina suiño –llote.

<sup>15-16</sup> Iena finode. Naimaci anamo eo ailluena soldaduai ite. Doscientos millones soldaduai illana fididicue. Bie facaise, bie hora, birui, bie fivui, bie año, Jusiñamui jitaila facaise ailluena cominina meinetimaci. Atuedo meineñedimaci. Riai uaimona ie tercera facaina meinetimaci.

<sup>17</sup> Soldaduai caballos emodo itimaci. Soldaduai jogobemo ra ite. Daje facaise eo jiairede. Daje facaise mocorede. Daje facaise borarede. Caballos ifogiai leones ifogiaina eruaide. Naimaci fueмона boode radi, uillie diga, azufre boa isoi jino bite.

<sup>18-19</sup> Naimaci fueмона bite rado ailluena cominina meinetimaci. Ie tercera facaina meinetimaci. Caballos omacai jaiona eruaidimaci. Naimaci omacaimo jaiona eruaide ifogiai itimaci. Ailluena cominina jiai duere finodimaci.

<sup>20</sup> Iese ie tercera facaina meinetimaci; ia fiebidino naimaci jeacinomona naimaci comeciai iuaina jaca meidoñedimaci. Taifena nia sedaacadimaci. Janabana nia sedaacadimaci. Oromona, platamona, bronceмона, noficimona, amenamona finoca jiraraiaina nia sedaacadimaci. Naie isoide radi cajeñena jira, jaca cioñede. Naie isoide radi jamai rana jira, jiai jaca buena cacaiñede. Jaca macariñede. Cajeñede; ia iena sedacabidimaci.

<sup>21</sup> Conini meinecabitimaci. Aimaniai dine jaicabidimaci. Naimaci aiñede riño, naimaci iniñede iima diga icabitimaci. Rana ficabidimaci. Jeacinona finocana nia jaidimaci.

## 10

*Juan Jusiñamui jaienici, econoga rabenico diga, billana ciodo*

<sup>1</sup> Ie facaise Jusiñamui illanomona eniruemo jiaie jaienici billana ciodicue. Naimiemo Jusiñamui uai eo ite. Uillie motomo naimie ite. Naimie ifogi afemo ameo ite. Naimie uieco jitoma isoi quenirede. Naimie idai eo boode amena isoi eruaide.

<sup>2</sup> Naimie onollimo econoga rabenico ite. Eniruemo naimie ria, naimie nabei eilli monaillai emodomoida. Ie jarifebei eilli eniruemo naidaide.

<sup>3</sup> León eo irilla isoi, ado llote. Naie facaise siete guraa ñaia isoidino uai cacadicue.

<sup>4</sup> Naimaci lluaana cacaja mei, iena cueiacadicue; iadedi monamona damie cuemo llote:

–Naie lluaana lloñeno. Iena cueñeno.

<sup>5</sup> Naie jaienici ie nabei onolli mona dine ñuitajanona,

<sup>6</sup> Jusiñamuimo llote:

–Jaca itio. Monana nainomo ite ra diga finodio. Eniruena nainomo ite ra diga jiai finodio. Monaillai nainomo ite ra diga jiai finodio. Cue baifemo o faia jira, uanaicinona cue lluaana uñotio. O lloga uaina jaca suite.

<sup>7</sup> Iraie jaienici ie trompeta ja fiite. Filla mei, bie facaise Jusiñamui ie facaina lloraini micoraiimo jai lloga rafue suite. Comini naie rafue jai raise cacaiñedimaci; ia iena ja raise cacaitimaci –llote.

<sup>8</sup> Monamona cuemo ailli llotimie dane llote:

–Jaienici onollimo econoga ite rabenicono llinaui.

<sup>9</sup> Ie jira jaienici dine cue jaillanona:

–Iena cuemo ine –llocicue.

Uai ote:

–Iena ono. Iena mai guiño. Ciifo isoi o fueмо iena cacaitio; iadedi o jebemo erirede ra isoi iena cacaitio.

<sup>10</sup> Llinua mei, iena guiticue. Ciifo isoi naimereде rana cacadicue; ia guilla mei, erirede ra isoi cue jebemo ite.

<sup>11</sup> Cuemo dane llote:

–Omo cue lolle rafuena lloitio. Ailluena cominimo ico suille rafuena lloitio. Illaicominimo ico suille rafuena lloitio.

## 11

*Juan menamie Jusiñamui rafuena llwana cacade*

<sup>1</sup> Cuemo Jusiñamui radosina fecade. Jerusalémo ie jofona facallena, cuemo fecade. Llote: —Mai jai. Cue jofomo niga metros ite facajai. Atona ruica jiai faca. Nainomo cuemo jobaisoillanona jiai faca. Niga comini naie jofomo ite jiai faca.

<sup>2</sup> Cue jofo ecimo ite taibirina facañeno. Naie illano judúuaifñedinomo jainaiaide. Cue jitailla jira, Jerusaléna naimaci emodofillamona, daje amani años abimo atomonado iena duere finoitimaci.

<sup>3</sup> Naie facaise menamiemo cue uaina iiticue. Iaimaiái cue lolle rafuena daje amani años abimo atomonado lloitiiaimaiaí. Comini comeci uai meiduana iaimaiái jitailla jira, sunaillamona, ebinide iniroina jitaitiaimaiaí —llote.

<sup>4</sup> Iaimaiái mena olivos railla riera mamecido itiaimaiaí. Enirue Namana Jusiñamui illanona, naimie uicomo mena ite lamparín ie raíraco mamecido itiaimaiaí.

<sup>5</sup> Iaimaiái na duere bu finoacania, naimiena meineitiaimaiaí. Iaimaiái fue mona boode ra billanona, naimiena meinetiaimaiaí iaimaiái na duere finodino iese fiodaitimaci.

<sup>6</sup> Iaimaiái Jusiñamui rafue lolle facaiseconi noci deitañellena, iaimaiáimo Jusiñamui uai iite. Jñui diruena jaitallena iaimaiáimo uai iite. Iaimaiái jitaicabilla facaise, diga isoide rafue finuamona cominina duere finoitiaimaiaí;

<sup>7</sup> Iadedi Jusiñamui rafue iaimaiái llua mei, eo ana ite ifomona ocainana eruaillanona, Taife jino biite. Jino billanona, iaimaiái diga fuirite. Iaimaiái na anafefitaja mei, iaimaiái na meineite.

<sup>8</sup> Raiafomo joneñeitimaci; iadedi iaimaiái abi Jerusalén naisomo jamai fiebite. Jerusalén comini jearede rafue finua jira, Jusiñamui rafuena naimaci jitaifñena jira, Sodoma jaie ite nairai isoidimaci. Egipto jaie ite nairai jiai isoidimaci. Jerusalémo Jesúsna jaie jiai meinetimaci.

<sup>9</sup> Raiafomo iaimaiái joniana rairuitimaci. Darui amani abi atomonado ailluena comini, naga nairaiáimona iaimaiái na jibuisaíbitimaci.

<sup>10</sup> Nana eniruemo ite comini iaimaiái fiodaillari iobitimaci. Iaimaiáimona comini duere sefuilla jira, iaimaiái jai fiodailla jira, iobitimaci. Rafuena finuana, daní coninina rana fecaitimaci.

<sup>11</sup> Darui amani abi atomonado illanona, fiodaillamona iaimaiái na Jusiñamui dane jil-lotaite. Ie mudiona naidaitiaimaiaí. Nana iaimaiái na ciodino eo jacinaitimaci.

<sup>12</sup> Naie facaise monamona damie iaimaiái na uaiduana cacadiaimaiaí. Llote: —Bene mai bi.

Ieconí iaimaiái na enoidimacidi uillie motomo monamo iaimaiái jaillana ciodimaci.

<sup>13</sup> Naie facaise aillue ñuisaño suide. Ie jira janore facai Jerusalén goide. Riaí uaimona ie décima facai goide. Naiemona siete mil comini fiodaitimaci. Fiodaifñedino jacinaiillamona:

—Jusiñamuidi ua siño jito —lloitimaci.

<sup>14</sup> Mena duere sefuilla facaise jai fuite. Nia daje suifñede; ia raire suite.

*Juan iraié trompeta fillana cacade*

<sup>15</sup> Naie facaise jiaie jaienici ie trompetana fite. Monamo itino ado llotimaci: Jusiñamui, Cristo diga, illaíma isoi, eniruemo ite cominina biruimona jaca sedaite. Naie comini naimie anamo raise iitimaci.

<sup>16</sup> Naie veinticuatro enamaci Jusiñamui ecimo illanona, naimie uicomo ana bitadajanona naimiena sedadimaci.

<sup>17</sup> Llotimaci:

Jusiñamui, caí Nama, omo iobillacinona feacaacacai.

Siño jítodio. O jitailla rafuena jaca finodio.

O uaido bie cominina jai sedadio.

<sup>18</sup> Ona naimaci ñinoñenamona, o diga iciritimaci; iadedi naimacina emodofidio.

Bie facaise jai fiodaitino jillotajamona, ona naimaci ñinoñena jira, naimacimona ja íbana oitio.

Jearede rafuena naimaci finua jira, naie facaise ona ñinoñedinona duere finoitio.

O díbeimo maijidino, o facaina lloraíni, nana ona ñnotino omona íbana feifñoitimaci.

Ñíbai jamai bue isoidimaci.

Ñíbai jamai bue isoifñedimaci; iadedi omona íbana feifñoitimaci.

<sup>19</sup> Naie facaise monamo ite Jusiñamui sedajano nase econuana ciodicue. Naie fo ite cajóna ciodicue. Ieconí boricabide. Bue isoi eo ficirede. Gurucabide. Ñuisaño suide. Monamona noci deilla isoi, ailluena hielo ana llude.

## 12

*Juan daje riñona, eo aillue jaiõ diga, ciõde*

<sup>1</sup> Naie facaise monamo daje riñona ciõdicue. Naiñaiñona cue ciuamona, Jusiñamuidi eniruemo itinomo iõo suille rafuena cue uifuaña jitaide. Naiñaiño iniroidi jõtoma isoi bairedẽ. Naiñaiño eilli anamo fivui ite. Naiñaiño ifogimo nuicirai isoi doce ucuduai ite.

<sup>2</sup> Jai uruesite. Jocoacana jira, como isiredẽ.

<sup>3</sup> Ie facaise monamo jiaimena ciõdicue. Naimiedi Taife. Naimie illamona jiaie rafue suillena uifotucue. Naimiedi eo aillue jaiona eruaide. Jiairedẽ. Siete ifogi naimiemo ite. Diez sigai naimiemo ite. Naga ifogimo nuicirai ite. Riai uaimona naimiedi dragõn.

<sup>4</sup> Naimie omacai diga ailluena ucuaña eniruemo ana butade. Riai uaimona ie tercera facaina butade. Ie uruena gutallena, riño uicomo naidaita naiñaiño jocollena sedade.

<sup>5</sup> Naiñaiño iimana jocode; ia jaiõ naimiema gutañede. Nana nairaiaí naimie anamo iõo illanona, naimacina ie jitaillacinona finotajamona, naimacina eo riire sedaite. Naimacina naimie nia sedañenia, monamo Jusiñamui ie illanomo naimiema uite. Ie ecimo Jusiñamui naimiema itatate.

<sup>6</sup> Iemei naie riño jofue iñenanomo raire jaide. Nainomo Jusiñamuidi ie illinona jai finode, naiñaiño ie. Daje amani años abimo atomonado naiñaiñona sedaite.

<sup>7</sup> Naie facaise monamo Jusiñamui jaienisaídi jaiona eruaidimie diga fuiridimaci. Jaiona eruaidimie jaienisaí diga jiaí fuiridimaci. Jusiñamui jaienisaí illaíma mamecidi Miguel.

<sup>8</sup> Naimaci dinena emodofidimaci. Jaiõ ie jaienisaí anafella jira, Jusiñamui illanomo naimaci illano jai iñede.

<sup>9</sup> Eniruemo jaiona eruaidimie ie jaienisaí diga dotadimaci. Naie jaiodi Taife. Satanás. Jaiona Taife jaie jaillanona, eo ailluena cominina jai jifue.

<sup>10</sup> Monamo damie ado lluaña jai cacadicue:

–Jusiñamui lloga uai jai suide. Ie cominina raise jillotate. Naimie uai eo siño. Ie uai Cristomo illanona, Cristodi cominina raise sedaite. Eniruemo Taifena jai dotaja jira, Jusiñamuina bu raise iñoñenia, jeacinona bu finoia, Jusiñamui uicomo birui naimie finocabilla isoi, Taife caina llogidoñeite.

<sup>11</sup> Toica Llauda isoidimie naimaciri fiõdaila jira, naimie rafuena naimaci lluañona, Taifena emodofidimaci. Fiõdaitimacina, naie rafuena llocana jaiacadimaci.

<sup>12</sup> Ie muidona iobi. Monamo omoi illanona, iobi; iadedi eniruemo bu ia, monaillaimo bu ia, eo duere sefuite. Eniruemo Taife jai illa jira, naimiema duere sefuitimaci. Naimie eo icirite. Nainomo naimie are iñellena uifote. Naimie icirillamona eniruemo itino eo duere sefuitimaci –llote.

<sup>13</sup> Eniruemo jaiona eruaidimie dotajamona, naiñaiñona duere finollena, naimiedi iimana jai jococa riñona racade.

<sup>14</sup> Naimiema jilloillena, Jusiñamui mena iaico, majaiño iaico isoi, naiñaiñomo ite. Feañona, jofue iñenanomo daje amani años abimo atomonado illena nainomo jaide. Naiñaiñona Jusiñamui eenollena, nainomo jaide.

<sup>15</sup> Ie facaise jaiona eruaidimie fueñona eo ailluena jinui bite. Ille isoi tote, naiñaiñona corobaitallena;

<sup>16</sup> ia enirue bojuamona, nana jinui nainomo ana jaide. Enirue naiñaiñona canua jira, naiñaiño corobaiñede.

<sup>17-18</sup> Naie facaise jaiona eruaidimie riño diga icirillamona, naiñaiño comini diga jobairiacade. Nana Jusiñamui llogacino iñotino diga, nana “Jesúmo duidicai” raitino diga, jobairiacade.

## 13

*Juan mena riñede ocainana ciõde*

<sup>1</sup> Naie facaise monaillai fueño cue naidailanona, daje riñede ocaina monaillaimona billana ciõdicue. Naimiemo diez sigai ite. Naga sigaimo nuicirai raide. Naimiemo siete ifogiai ite. Ie ifogiamo Jusiñamuina jeare ñaia mameci ite.

<sup>2</sup> Naie ocaina abijañallarina eruaide. Ie eilli oso eillina eruaide. Ie fue león fueña eruaide. Eniruemo itinona sedallena, naimiemo aillue jaiona eruaidimiedi ie siño uaina fecade.

<sup>3</sup> Naimiemo ite ifogimona daje jai bofede. Fiõdaitena eruaide; ia naimona jai jillode. Naimieri rajicaillamona, nana eniruemo ite comini naimie ðibeimo jaidimaci.

<sup>4</sup> Ocainamo ie uaina aillue jaiona eruaidimie fecaja jira, jaiona sedajanona, iobillacinona naimiemo fecadimaci. Ocainana jiaí sedajanona, iobillacinona fecadimaci. Raitimaci:

–Naimie siño jito. Naimiema buna emodofinide.

<sup>5</sup> Naimiemo Taife uai illa jira, abina uradoillamona, Jusiñamuina eo jeare ñaite. Taife jitailla jira, cuarenta y dos fivui iesse nana cominina sedade.

<sup>6</sup> Jusiñamuina eo jeare ñaicabite. Naimie illanona eo jeare ñaicabite. Nana Jusiñamui ecimo itinona eo jeare ñaicabite.

<sup>7</sup> Taife uai naimiemo illa jira, Cristona eniruemo ite ñnotino diga jobairite. Naimacina emodofide. Iemona nana comini naga nairaiamona naimie anamo itimaci.

<sup>8</sup> Nana Jusiñamui rabenicomo cueñega mameciai diese ocainana sedaitimaci. Jusiñamuidi naimaci mameciaina naimiemo ite rabenicomo eniruena nia finoñena facaise jaca cueñede; ia Toica Llauda isoidimie fiodailla jira, Jusiñamui naimiema ñnotino mameciaina naie rabenicomo jai cuete. Naimie illanomo jaca illena, naimaci mameciaina cuete.

<sup>9</sup> Omoi jeforena jira, raise fueollena, bie rafuemo cacarei.

<sup>10</sup> Duere sefuillena, naie facaise cárcelmo Cristona ñnotinona joneitimaci. Naimacina meinia mei, naimacina meinetino Jusiñamuimona daje isoi ibana feiñoitimaci. Ie muidona Cristona ñnotino comeciai ocuiñocaida ñnocana jailla.

<sup>11</sup> Naie facaise jiaie riirede ocaina eniruemona billana ciodicue. Toica Llauda isoi naimiemo mena sigai ite. Aillue jaio isoi ñaite.

<sup>12</sup> Monaillaimona bite ocaina uai eniruemona bite ocainamo jiai ite. Ie uai diga, nana cominina monaillaimona bite ocainana sedatate.

<sup>13</sup> Eo siño rafuena finocabite. Comini cioillena, monamona eniruemo boode ra ana bitatate.

<sup>14</sup> Siño rafuena finuamona, Taife jitailla jira, eniruemo itinona jifuede. Iena naimaci sedallena, cominina monaillaimona bite ocaina joreño finuana ocuide. Monaillaimona bite ocaina lloebi diga navui bofiamona jai jillode.

<sup>15</sup> Joreño finua mei, eniruemona bite ocaina iena ñaitatate. Iena bu sedañenia, ocaina naimiema meiniana ocuide.

<sup>16</sup> Nana cominimo naimie númerona cuetatate. Número cuetatañenia, naimie mamecina cuetatate. Ie nabeillimo cuetatañenia, ie uiecomu cuetatate. Jamai fue isoidinomo cuetatate. Jamai fue isoiñedinomo cuetatate. Ucuberedinomo cuetatate. Ucubenedinomo cuetatate. Patrón anamo itinomo cuetatate. Patrón anamo iñedinomo cuetatate.

<sup>17</sup> Iese bumo iñenia, rana ibanide. Rana fecanide. Bie mamecidi bie ocaina ie mameci. Mamecina cuetatañenia, naimie ie númerona cuetatate.

<sup>18</sup> Iena raise cacaillena, iemo omoi comeciaina faca. Abina uiñotimie bie númerona uiñote. Come mamecido ite. Bie númerodi seiscientos sesenta y seis.

## 14

### *Juan 144,000 comini ruana cacade*

<sup>1</sup> Naie facaise Jerusalémo Sion railla anedu muidomo Toica Llauda isoidimie naidaillana ciodicue. Naimie diga ciento cuarenta y cuatro mil comini itimaci. Naimaci uiecuai itofiaimo naimie mameci, ie Moo mameci diga, jai cuega.

<sup>2</sup> Monamona damie ñaiana cacadicue. Aillue ille surua isoi, eo ficirede. Eo gurua isoi jiai ficirede. Ailluena comini arpas tailla isoi, naimie ñaiana cacadicue.

<sup>3</sup> Jusiñamui illanomo bie ciento cuarenta y cuatro mil comini comue ruana rotimaci. Naie cuatro cajedino nainomo ite. Naie veinticuatro einamaci nainomo itimaci. Dani bie ciento cuarenta y cuatro mil comini bie comue ruana rotimaci. Jiaino iena fueonidimaci. Bie ciento cuarenta y cuatro mil comini eniruemona naimaci dibeimo iñedinomona jai jillodimaci.

<sup>4</sup> Bie ciento cuarenta y cuatro mil comini jearede rafuena ebiruiñedinaci. Llauda isoidimie rafuena ñnocana jaidimaci. Llauda isoidimie fiodailla jira, eniruemo itinomona naimacidi nano jillodino Jusiñamui iena, Llauda isoidimie iena.

<sup>5</sup> Cristo rafuedo jeacinona finocabiñeno raise jaidimaci.

### *Juan daje amani jaienici rafue lluaana cacade*

<sup>6</sup> Naie facaise mona motomo jaienici feiana ciodicue. Naga nairaimo, nana eniruemo itinomo mare rafuena lluaide.

<sup>7</sup> Ado llote:

—Jusiñamuina ñnuanona naimiema seda. Naimiemo iobillacinona feca. Naimiemo ñnoñedinona ja duere finoite. Monana, enirue diga, monaillai diga, ille diga, naimie finua jira, naimiema seda.

<sup>8</sup> Jiaie jaienici billanona llote:

—Babilonia railla nairai illano eo aillue; iadedi ja iñeite. Nainomo itino ja fuitimaci. Jeacinona nainomo itino eo finua jira, jiaie nairaiaina jeacinona jiai eo finotatimaci. Babiloniamo jai itino isoi, Jusiñamuimona duere sefuitimaci.

<sup>9</sup> Naie facaise jiaie jaienici billanona, ado llote:

—Monailaimona bite ocaïana bu sedaia, ie joreña bu sedaia, ie uieco itofemo, ie onollimo ocaïna cuetataga ra bumò ia,

<sup>10</sup> Jusiñamui riicaillafuemona, naimacina duenaiñenamona, jaca eo duere sefuitimaci. Irai motomo jaca duere sefuitimaci. Azufre boa isoi irai boode. Jusiñamui jaienisaidi Llauda isoidimie diga, iena cioitimaci.

<sup>11</sup> Naie irai illano jaca bouamona, ie uillie jaca baireite. Nainomona naie duere sefuidino jaca jilloñeitimaci. Iese naimaci fioidañeno jaca duere sefuitimaci —llote.

<sup>12</sup> Bie rafue suille facaise Jusiñamui lloga uaina raise ñnuanona, Jesús dibeimo raise illanona, comeciai ocuiñocana naimaci jaille.

<sup>13</sup> Iemei monamona Jusiñamui Joreño llote:

—Biena cueno: “Biruimona Jesúna ñnuamona, meineganodi caimare iitimaci. Jesús dibeimo naimaci illamona, navui duere sefuidimaci. Iemona uri iitimaci. Ieri Jusiñamuimona ibana feiñoitimaci”.

*Juan Jusiñamui eniruemo itinona duere finua rafuena cacade*

<sup>14</sup> Naie facaise monamo cue eruaia, userede uilliena ciodicue. Uillie emodo Cristo raide. Himana eruaide. Naimie ifogimo oromona finoca nuicirai ite. Ie onollimo jairede lloebi ite.

<sup>15</sup> Jusiñamuina sedajanomona jiaie jaienici billanona, Cristomo ado llote:

—O lloebi diga eniruemo ite riarana cota, iena ollena. Jai einaite —llote.

Iese llote; ia cominina duere finollena ñaite. Naimaci duere finua facaisena ñaite.

<sup>16</sup> Jaienici llua isoi, ie lloebi diga Cristo cotade. Nana iena finode. Cominina duere finode.

<sup>17</sup> Jusiñamuina sedajanomona naie facaise jiaie jaienici bite. Naimie onollimo jairede lloebi jiaie ite.

<sup>18</sup> Teconi Jusiñamuimo jobaisoillanomona jiaie jaienici bite. Eniruemo boode ra dotaja uaidi naimiemo ite. Lloebiredimiemo ado llote:

—Jai einaila jira, naimacina o ollena, o lloebi diga illimo ite uvaiaina tino.

Iese llote; iadedi cominina duere finollena ñaite.

<sup>19-20</sup> Jaienici llua isoi, ie lloebi diga tinode. Uvas ua mei, Jerusalén ecimo iji ollena ifomo dotade. Naie iji jino eo tote. Cominina ñaiticue. Jusiñamui riicaillafue anamo eo duere sefuitimaci. Eo diaitimaci. Trescientos kilómetros dirue eniruemo emododo toite. Caballo ifogi facaise a llerite.

## 15

*Juan siete jaienisai cominina duere finoacana ciodicue*

<sup>1</sup> Naie facaise monamo jiaie rafuena ciodicue. Ieri eo rajicaidicue. Iena cue ciuamona, Jusiñamuidi eniruemo itinomo suille rafuena cue uñuana jitaide. Siete jaienisaina ciodicue. Nagamie cominina duere finoacade. Naimaci finoacalle rafue diga, Jusiñamuidi cominina duere finuana fuite. Temona ie riicaillifue saite.

<sup>2</sup> Aillue joraina eruaide rana jiaie ciodicue. Quenirede. Uifinide. Boode ra diga tamiana eruaide. Jorai fuemo monailaimona bite ocaïana emodofidinona ciodicue. Ocaïna joreño anamo jai iñedimaci. Ie cuetataga número anamo jai iñedimaci. Naimaci onollimo Jusiñamui arpas illanona, naimacina taillanona,

<sup>3</sup> Jai emodofilla jira, Moisés micori ie ruana rotimaci. Moisés micori Jusiñamui facaina jiaie maijuide. Jeacinomona naimaci jiaie jai jillua jira, Toica Llauda isoidimie ie ruana jiaie rotimaci:

Eo siño ebirede rafuena finodio.

Jusiñamuina o illanona, jaca siño jitudio.

Mare rafuena jaca finocabidio. O lloga uai jaca finodio.

Naga nairai o anamo jai itimaci.

<sup>4</sup> Cai Nama, nana comini ona jaciruillamona, ona ñnoitimaci.

O marena jira, omo iobillacinona fecaitimaci.

O duere finoca rafue muidona nana comini ona sedaitimaci.

<sup>5</sup> Jusiñamuina sedajanomo dane eruaidicue. Ie fo iticuartomo ciodicue.

<sup>6</sup> Naiemona siete jaienisai billana ciodicue. Nagamie cominina duere finoacade. Eo userede linomona finoca ñinroina jitade. Oromona finoca cinturones naimaci jogobemo jitade.

<sup>7</sup> Naie cuatro cajedinomona damie naga jaienicimo oromona finoca copana fecade. Copamo Jusiñamui eniruemo itinona eo duere finollicino ite isoide. Jusiñamui jaca illa jira, ie lloga uai suicana jaite.

<sup>8</sup> Jusiñamui ebirede siño uai illamona, ie sedajanomo uillie eo illana ciodicue. Bie siete jaienisaimo ite rafue ñia suiñena jira, Jusiñamuina sedajanomo buna fo jainide.

## 16

*Juan eniruemmo copas oni totajanona cide*

<sup>1</sup> Ie sedajanomona Jusiñamui naie siete jaienisaïmo ado llote:

—Cue riicaillafue omoi copamo illa jira, eniruemmo itinona duere finollena, omoi copas oni tota.

<sup>2</sup> Daje jaienici iena finode. Eniruemmo ite cominina duere finode. Monailaimona bite ocaina cuetataganona jiai duere finode. Ocaina joreñona sedadinona duere finode. Naimaci abiaïmo jodollaïaina comuitate. Iemona duere sefuidimaci.

<sup>3</sup> Iemei jiaie jaienici ie copa oni totajamona, monaïllaina duere finode. Nana monaïllaidi fioidaitino dirue isoi jaide. Eo jearedena eruaide. Nana nainomo ite cajedino fioidaitimaci.

<sup>4</sup> Iemei jiaie jaienici ie copa oni totajamona, nana illiaï, nana jorainiaï diga, duere finode. Diruena jaide.

<sup>5-6</sup> Naie facaise nana jinuina sedacabide jaienici llote:

—Jusiñamui, o jaca mareuidimedio. Ona inotinona eniruemmo itino meinia jira, o facaina llorainina naimaci meinia jira, naimacina o raise uifnuamona, naimacina duere finodio. O cominina naimaci meiniamona, naimaci finua isoi, ibana oitio. O cominina naimaci meinia jira, diruena ja jiroitimaci.

<sup>7</sup> Jusiñamuïmo caimare soride ra jobaisoïllanomona jiaie jaienici llote:

—Cai Nama Jusiñamui, ua siño jitodio. Naimaci finocabilla isoi naimacina jai duere finodio.

<sup>8</sup> Naie facaise jiaie jaienici ie copa oni totajamona, jitomana duere finode. Eo lligaiñotajamona, eniruemmo itino eo usidimaci.

<sup>9</sup> Eo usidimaci; iadedi Jusiñamuina jeare nia ñaitimaci. Naimacina duere finollena, naimiemo uai illana uifnotimaci; ia naimie dibeïmo naimaci comeciaï iuaina meidoïa-caiñedimaci. Jeacinona finuana fainonocaiacaiñedimaci. Naimiemo iobillacinona fecaa-caiñedimaci.

<sup>10</sup> Naie facaise jiaie jaienici ie copamona ie duere sefuillacinona monaïllaimona bite ocaina sedajano dine totade. Ie muidona nana enirue jitreñicaide. Eo duere sefuillamona, comini imaci ifena ainitimaci.

<sup>11</sup> Duere sefuillamona, Jusiñamuina jeare ñaitimaci. Naimaci abiaïmo ite jodollaïai isirede; iadedi naimaci comeciaï iuaina meidoñedimaci. Jeacinona finuana fainonocaiñedimaci.

<sup>12</sup> Naie facaise jiaie jaienici ie copamona ie duere sefuillicinona Eufrates railla ille dine totade. Ie muidona naie aillue ille safenaite. Safenaïllamona, jitoma billanomo ite nairaïai illaïcomini, imaci soldaduai diga, ruica dine raise birenitimaci.

<sup>13</sup> Naie facaise aillue jaïo fueмона, monaïllaimona bite ocaina fueмона, naimie facaina lloraima fueмона, daje amani jananiaï billana ciodicue. Nagamiemona daje janaba bite. Nai jananiaï jerocina eruaide.

<sup>14</sup> Taifemona bite. Siño rafuena finocabite. Nana illaïcomini, imaci soldaduai diga uaidollena, naimacina oreite. Danomo ofillena illaïcominina uaidoite. Jusiñamui diga jobairillena, danomo ofitimaci. Naimie diga jobairillamona, Jusiñamui ua siño jitona nana comini uifnotimaci.

<sup>15-16</sup> Armagedón railla illanomo ofitimaci. Naie illano mamecidi judiuaï uai mameci. Ieconï cai Nama cuemo llote:

—Fuiriraima isoi ebena biiticue. Cue billemo ocuridimie iocire iite. Cue billemo naimie ocuria, cue bia, naimie cue jitaillacinona finuamona, naimie meiruiñeite.

<sup>17</sup> Naie facaise jiaie jaienici jafaïci dine ie copamona ie duere sefuillicinona totade. Ieconï ie sedajanomona Jusiñamui llote:

—Bie duere sefuillicino diga, cominina cue duere finoacanacino ja fuite.

<sup>18</sup> Ieconï boricabide. Bue isoi eo ficirede. Gurucabide. Eo aillue ñuisaño suide. Comini comuilla facaisemona iese ñuisaño jaca suiñede.

<sup>19</sup> Iemona nanoca nairaï illano daje amani facaina goide. Nana jiaie illanuai jiaï goïdimaci. Jusiñamuidi Babilonia railla nairaina raise uifnuamona, nana ie riicaillafuemona iena eo duere finode.

<sup>20</sup> Naie ñuisañomona naga uiasi jai cioñena. Naga anedu jiaï cioñena.

<sup>21</sup> Monamona noci deïlla isoi, hieïlo jiaï ana jurude. Naga hieïlo cuarenta kilos nibai merede. Cominimo baïllanona, eo duere sefuidimaci. Eo duere sefuillamona, Jusiñamuina nia jeare ñaitimaci.

## 17

*Juan eo marañede riñona duere sefuillana cide*

<sup>1</sup> Naie facaise naie siete copas diga ite jaienisaïmona cue dine damie billanona cuemo llote:

—Cue diga bi. Eo marañe ñe riño duere sefuillana omo acataitucue. Monailai emodomo nañaiño jai raide isoide. Nañaiño ñodi nanoca nairai illano mamecido ite. Nana illaicomini naie nairai anamo itimaci.

<sup>2</sup> Nañaiño ñona sedajamona, nañaiño diga, illaicomini ñe jearede rafuena finocabidimaci. Nañaiño ñona nabaillamona, eniruemo ite comini jearede rafuena eo eburuitimaci —llote.

<sup>3</sup> Nicairilla isoi, jaienici cue joreño ñona uillanona, jofue iñenanomo cue joreño ñona uite. Eo jiairede riurede ocaina emodomo naie riño raillana ciodicue. Jusiñamuina eo jearede ñaiacino ocaina abimo eo ite. Ocainamo siete ifogiai ite. Diez sigai jiai ite.

<sup>4</sup> Naie riño jiduirede iniroi, jiairede iniroi diga jitade. Eo raifide quenirede ra diga, nañaiño abi eo finobide. Dajerie ra oromona finoca. Dajerie perlas railla ramona finoca. Ie diga ie abi eo finobide. Nañaiño onollimo oromona finoca copana uite. Nainomo eo marañe ñe jearede rafuena finocana uite isoide.

<sup>5</sup> Jusiñamui nañaiño finoca rafuena uifotaïacana jira, nañaiño uiecomo mameci jai cuetataga: “Nanoca Babilonia raillañaiño ñe ñe. Cuemona eo jearede rafue comuicana jaicabide. Cue muidona comini jearede rafuena finocabide”.

<sup>6</sup> Nañaiño ñodi ailluena Jusiñamuimo duidinona, ailluena ua Jesúna ñnotinona meinetajana eo eburuite. Nañaiño ñona cue cioa, eo rajicaidicue.

<sup>7</sup> Jaienici cuemo jicanote:

—¿Bue ñe rajicaidid? Nañaiño ñe ñe ite rafuena omo lloiticue. Nañaiño ñe ñe ocaina emodomo raide. Naie ocaina rafuena jiai lloiticue.

<sup>8</sup> Naie ocaina navui ite; ia birui jai iñe. Ico eniruemona, eo ana ite ifomona, dane biite; iadedi faifite. Ieri Jesucristona ñnoñedino rajicaïtimaci. Jesucristona naimaci ñnoñena jira, monamo Jusiñamuidi ie rabenicomo enirue ña finoñena facaise naimaci mameciaina jaca cueñede. Naimie illanomo jaca iñeitimaci.

<sup>9</sup> Ocaina rafuena omo ja lloiticue. Jusiñamui ona uifotajanona iena cacaitio. Bie siete ifogidi siete anedu mamecido ite. Riño nainomo raide.

<sup>10</sup> Ie siete ifogidi siete illaicomini mamecido ite. Naimacimona cinco illaicomini jai iñe. Damie cominina birui sedade. Jiaimie cominina ña sedañede. Cominina naimie sedaia, are naimacina sedaite. Dallu sedaite.

<sup>11</sup> Ifomona bite ocainana dane lloiticue. Cominina jiai sedaite; ia bie siete illaicomini sedajacinomo duite. Cominina naimie sedaja mei, naimie faifite.

<sup>12</sup> Ie diez sigaidi diez illaicomini mamecido ite. Diez nairaina sedaitimaci; iadedi ña sedañedimaci. Cominina dallu sedallena, ocainamona naimaci uaina feiñoïtimaci.

<sup>13</sup> Daje isoi comecina lloitimaci. Ocainana nabaitimaci. Naimie jitailla rafuena finuanona, naimie anamo iitimaci.

<sup>14</sup> Toica Llauda isoidimie diga jobairitimaci; ia Llauda isoidimie ie comini diga emodofite. Llauda isoidimie nana illaicomini baifemo faia jira, nanoca imienna jira, naimacina emodofite. Ie cominina naimie fetode. Naimienna ñnotimaci. Jai emodofitimaci —llote.

<sup>15</sup> Jaienici ña llote:

—Riño monailai emodomo raillana ailli ciodio. Monailaidi nana comini mamecido ite. Naga nairai mamecido ite.

<sup>16-17</sup> Naie diez illaicomini ñe ñe, ocaina diga riño ñona enoitimaci. Nañaiño ñona duere finoïtimaci. Jusiñamui jitailla jira, naimie jitailla rafue fuidollena, naimie lloga uai suillena, naimaci comecina daje isoi lloitaite. Ocaina anamo naimacina itataite. Riño ñona iese fuidoïtimaci. Nañaiño iniroina oni dotatajanona, nañaiño tañaiño ñona iite. Nañaiño ñona meineïtimaci. Ie llicisina riïtimaci. Ja muidomo iraimo nañaiño ñona dotaitimaci. Iese nañaiño ñona duere finuanona, nañaiño ñona fuidoïtimaci.

<sup>18</sup> Bie riño ñe ñe nanoca nairai illano mamecido ite. Naie nairai anamo nana eniruemo ite illaicomini iitimaci —llote.

## 18

*Juan Babilonia railla nairai illano goilla rafuena ciode*

<sup>1</sup> Ie facaise monamona jiaie jaienici ana billana ciodicue. Naimie uai siño. Naimie uai siño ña jira, eniruena lligaiñote.

<sup>2</sup> Ado llote:

—Iena Jusiñamui duere finuamona, Babilonia nairai illano jai nana goide. Comini nainomo jai iñedimaci. Nainomo Taife jaienisaï birui itimaci. Jananiaï nainomo birui itimaci.

<sup>3</sup> Nia goïñenia, bie nairai jeacinona eo finuamona, nana nairai iena eburitimaci. Bie nairai nabaillamona, nana illacomini jearede rafuena jiai finocabidimaci. Jearede rafuemonana nana rana fecaraini bie nairaimona ailluena ucubena ganacabidimaci —llote.

<sup>4</sup> Naie facaise monamona damie llote:

—Cue comini, bie nairaimona birui mai eneno oni i. Jeacinona omoi finoi raillano, naie facaise omoi duere sefui raillano, birui eneno mai oni i.

<sup>5</sup> Bie nairai jeacino eo finocana jaidimaci; iadedi iena Jusiñamui uifnuamona, naimacina jai duere finoacade.

<sup>6</sup> Jusiñamui, naimaci finua dieise ibana ono. Naimacina ua eo duere fino.

<sup>7</sup> Jeacino finuamona iobidimaci. Iemona abi iedotimaci. Jeacino finuana eo eburitimaci. “Illaicomini dicai. Nana cai jitailla ra caimo ite. Feciño isoi duere jaca sefuiñeiticai” comeaiaina facadimaci;

<sup>8</sup> iadedi cai Nama Jusiñamui naimacina ebena eo duere finoite. Duicomona, sure illamona, aime guillamona fioiditimaci. Naimaci jofue booite. Jusiñamui siño jitona jira, naimacina raire fuidoite —llote.

<sup>9</sup> Bouamona uillie naimaci cioia, sunaillamona, naie nairai diga nabairite illacomini eo eeditimaci.

<sup>10</sup> Duere sefuillena naimaci jaciruilla jira, aremona lloitimaci:

—Ero, Babilonia eo aillue nairai illano; iadedi duere finuamona ua raire fuite —lloitimaci.

<sup>11</sup> Naimaci rana naie nairai jai ofena jira, rana fecaraini eo sunaillamona eo eeditimaci.

<sup>12</sup> Iese fecacabidimaci: oro, plata, abi finollena raifide ra, diga eo mare raifide iniroi, diga caimare soride rabiciaci, elefante sigainiai, jofona nille ra, bronze, lloeona, mare nofici,

<sup>13</sup> guille caimaretade ra, caimare soride ra, vino, guille ie aceite, mare harina, core, juraretaiai, toica llaudaiai, caballos, carretas, comini. Vendellena, cominina aticabidimaci.

<sup>14</sup> Sure illamona lloitimaci:

—Caimona omoi comeai jitailla rana ja ofeitomoi. Omoi eburuiga rana ja ofeitomoi.

<sup>15</sup> Duere sefuillena naimaci jaciruilla jira, nainomona ucubena jai ofenamona, rana fecaraini aremona ado eo eeditimaci. Sunaitimaci.

<sup>16</sup> Lloitimaci:

—Naie nairai eo duere sefuidimaci. Nia duere sefuñenia, eo mare rana, mare iniroi diga eburitimaci. Eo raifide abina finolle rana eo eburitimaci. Oromona finoca ra, perlamona finoca rana eo eburitimaci;

<sup>17</sup> iadedi nana naie nairai, ie raifide ra diga, jai raire fuite —lloitimaci.

Nana botes imaci capitanes, nana botemo maijuidino diga, nainomo jaidino diga, botedo rana fecaraini diga,

<sup>18</sup> aaremona uilliena ciuamona, naie nairai bouana fidiano, lloitimaci:

—Naie nairai nana jiai nairai baifemo navui faite. Jiaie nairai ie isoi ebinide.

<sup>19</sup> Sure illamona, naimaci ifogimo imuicina faianona, eeditimaci:

—Bie nairai eo duere sefuide. Bie nairaimona boteredinodica; navui ailluena ganadica; Bie nairai jai raire fuite.

<sup>20</sup> Naie facaise monamona damie llote:

—Monamo itino, naie nairai fuillari mai iobi. Jusiñamui cominina jai jaidomoi. Naimie facaina navui maijidomoi. Naimie rafuena navui llofueuidomoi. Naie nairaimona duere sefuidomoi; iadedi omoi facaina Jusiñamui ibana jai ote.

<sup>21</sup> Naie facaise jiaie jaienicimo siño uai illanona, eo aillue nofici llunuanona, monaillaimo iena faite. Llote:

—Bie nofici dane cai cioñena isoi, Babilonia railla nairai dane ifñeite. Jusiñamui iena eo riire fuidoite.

<sup>22</sup> Nainomo buna dane roñeite. Buna guitarrana eruai de arpas jaca taiñeite. Buna firacaina jaca fiñeite. Buna trompetana jaca fiñeite. Nainomo buna rana jaca niñeite. Rana jaca finoñeite. Buna jaca doberifñeite. Llomeniconana finollena, buna dane maijiñeite.

<sup>23</sup> Nainomo naiona lamparinai dane boofñeite. Rafue dane ifñeite. Eo caimare iobitaja rafue dane ifñeite. fraisiñeitimaci. Saiñeitimaci. Naie nairai rana fecaraini navui nanoca fecaraini. Naimacina Taife canua jira, ailluena nairaiaina navui jifuecabidimaci.

<sup>24</sup> Naie nairai ailluena Jusiñamuina inotinona meinetimaci. Ailluena Jusiñamui facaina llorainina meinetimaci; iadedi naimacina Jusiñamui duere finua jira, ua eo mare —llote.

## 19

<sup>1</sup> Ie facaise monamo eo ailluena comini ado lluaana cacadicue. Jusiñamuimo llotimaci: Ona cai iobitajasa. Caina jai jillotatio.

O uai ebirede. Odi siño jitodio.

<sup>2</sup> O anamo itinona raise uifnuamona, uanaicinona o uifnuamona, naimacina duere jai finodio.



Naie jearede rafuena finode riñona jai duere finodio.  
Naie riño ailluena cominina jearede rafuena finotate.  
Ailluena o facaina maijidinona jai meinetaide;  
iadedi iba jai otio.

<sup>3</sup> Iemei dane llotimaci:

—Ona cai iobitajasa. Duere sefuillena, naie nairai jaca boode. Naimaci jaca duere sefuitimaci —llotimaci.

<sup>4</sup> Naie veinticuatro einamaci, naie cuatro cajedino diga, Jusiñamui ecimo ana bitadajanona, naimiëna sedadimaci. Llotimaci:

—Omoi llucacino mare. Ie isoi jai lloiacadicai. Jusiñamuina cai iobitajasa.

<sup>5</sup> Jusiñamui illanomona damie llote:

Nana cai Jusiñamuina facaina maijidino iobitajasa.

Nana naimiëna inotino naimiëna iobitajasa.

Jamai bue isoidino naimiëna iobitajasa.

Jamai bue isoifedino naimiëna iobitajasa.

*Juan Toica Llauda isoidimie aina ua rafuena cacade*

<sup>6</sup> Naie facaise monamo eo ailluena comini lluaana cacadicue. Ailluena jinui surua isoi ficirede. Eo gurucabilla isoi ficirede. Llotimaci:

Cai Nama Jusiñamuina cai iobitajasa.

Naimie siño jito. Nana cominina birui jai sedade.

<sup>7</sup> Eo iobidicai. Naimiëmo iobillacinona eo cai fecajasa.

Llauda isoidimie ie aina ua rafue facaise jai suide.

Naiñaiño jai finobide.

<sup>8</sup> Mare iniroi naiñaiñomo jai ite. Eo userede. Quenirede. Jeanide

llotimaci. Iese iniroina llotimaci; ia Cristo, ie comini diga, jaca illena ñaitimaci. Ie ai diga, ini ie riño jaca caimare illa isoi, nana naimie comini diga, naimie caimare jaca iite. Naie mare iniroidi, Jusiñamui jitaillacinona finuamona, naimie inotino imaci mare finoca rafue isoide.

<sup>9</sup> Jaienicu cuemo llote:

—Biena cueno: “Llauda isoidimie aina ua rafue dine uaidoganodi caimare iitimaci”. — Iemei llote:

—Jusiñamui iena llua jira, uanaicinona omo lloticue.

<sup>10</sup> Jaienicu uicomo eillimo ana bitadaticue, naimiëna sedallena; ia cuemo llote:

—Dama ite. Cueno sedaño; ia dama Jusiñamuina seda. Jesús ie dibeimo itinona uanaicinona jai uifotade. Ie jira naga o diga naimiëna inotino isoi, Jusiñamui facaina jiai maijidicue. Naga Jusiñamui facaina maijidimie Jusúna llocabite. Ie muidona dama Jusiñamuina seda.

*Juan userede caballo emodomo itimiëna ciode*

<sup>11</sup> Naie facaise mona ecorillana ciodicue. Nainomo userede caballona ciodicue. Naie emodomo itimiëmo mena mameci ite. Inogamiëna mameciredede. Uanaicinona Llocabitimiëna jiai mameciredede. Naimacina raise uifuaamona, naimie dibeimo ifedina duere finollena, naimaci diga jobairite.

<sup>12</sup> Naimie uisidi irai isoide. Illaimana jira, naimie ifogimo ailluena nuicirai ite. Naimiëmo cueda mamecina buna uifofede. Dama naimie iena uifote.

<sup>13</sup> Naimie jitaca iniroi ie dibeimo ifedino diruemo mutaca. Jusiñamuina naimie uifotaja jira, Jusiñamui Uairedimiëna mameciredede. Naimiedi Jesucristo.

<sup>14</sup> Naimie jinafona soldadaui isoi Jusiñamui facaina itino monamona billana jiai ciodicue. Eo mare userede jeanide iniroina jitadimaci. Userede caballuai emodomo itimaci.

<sup>15</sup> Eniruemo ite nairaiaina emodofillena, naimie fuemo jairede lloebi ite. Naimacina emodofilla mei, naimacina naimie jitaillacinona finotallena, naimacina eo riire sedaite. Jusiñamui siño jitona jira, naimie riicailifue anamo itinona eo duere finote.

<sup>16</sup> Naimie iniroimo, naimie idaimo jai cueda: “Nanoca Illaima. Nanoca Nama”.

<sup>17</sup> Naie facaise jaienicu jitora lligaiñuano ciodicue. Nana inoniaina uaidote:

—Llicisina mai riabi. Jusiñamuidi ailluena cominina ja meiniamona rille eo iite.

<sup>18</sup> Naimacina emodofillamona, ailluena llicisi ja iite. Ailluena cominina ja meinite. Illaicomini itimaci. Soldadaui illaicomini itimaci. Caballuai itimaci. Caballuai emodomo jiacabidino itimaci. Diga comini ite. Jamai bue isoidino itimaci. Jamai bue isoifedino itimaci. Patrones anamo itino itimaci. Patrones anamo ifedino itimaci. Naimaci llicisi mai riabi —llote.

<sup>19</sup> Naie facaise monaillaimona bite riirede ocainadi enirue illaicomini diga ofide. Naimaci soldaduai jiai ofidimaci. Userede caballo emodomo itimie diga, naimie dibeimo itino diga jobairiacadimaci.

<sup>20</sup> Userede caballo emodomo itimie ie dibeimo itino diga naimacina emodofide. Ocainana gaitadimaci. Naimie facaina tainona lloraima jiai gaitadimaci. Naie lloraima ocaina uai diga cominina jifuecabite. Siño rafuena finuamona, ocaina cuetataga ra itinona, ie joreñona sedadinona jifuecabite. Naie iaimaiaina gaitaja mei, eo boode iraimo iaimaiaina cajena dotadimaci. Azufre boa isoi irai boode.

<sup>21</sup> Caballo emodomo itimiedi ie fuemo ite lloebi diga iaimaia soldaduaina meinete. Jaienici llua isoi, inoniai naimaci llicisina ritimaci. Iemona eo monidimaci.

## 20

### *Juan mil años Taife maiana cide*

<sup>1</sup> Naie facaise monamona jaienici billana ciodicue. Eniruemo eo ana ite ifo llave naimiemo ite. Aillue lloeo ie onollimo ite.

<sup>2</sup> Aillue jaiona eruaidimiena gaitade. Naimiedi Taife. Ria: uaimona Satanás. Jiaici dragón. Mil años iese illena lloeo diga naimiena maite.

<sup>3</sup> Ana ite ifomo naimiena dotade. Llave diga ifona ibaide. Cominina ramo faifellena, naimacina jeacinona finotaifellena, naimie uaina itatañede. Mil años cominina jifuenide. Mil años fuilla mei, dallu naimiena jino oretaite, cominina ramo faillena.

<sup>4</sup> Ie mei monamo diga jueces illanuaina ciodicue. Jusiñamui uai diga nainomo itinodi marañede rafue finodinomo jamai duere sefuillicinona lloitimaci. Ie facaise jai meineganona jiai ciodicue. Eo duere sefuilla facaise “Jesús cominidicai” naimaci llua jira, Jusiñamui uaina naimaci llua jira, naimaci ifogiaina jaitajanona, naimacina meineganodimaci. Monaillaimona bite ocainana sedañedimaci. Ie joreñona sedañedimaci. Ie cuetataga ra naimaci uiecomo, naimaci onollimo iñede. Navui fiodaitimaci; ia iemona bie facaise jai jillobitimaci. Imaci abiai diga Jusiñamui naimacina jillotaite. Cristo diga mil años eniruemo itinona sedaitimaci.

<sup>5</sup> Naimacidi nano jilloidino. Naie mil años nia fuiñenia, jiaie jai fiodaitino nia jilloñeitimaci; ia mil años fuilla mei, jilloitimaci.

<sup>6</sup> ¡Nano jilloidino caimare marena iitimaci! Dane fiodañenamona Jusiñamui illanomo jaca iitimaci. Faifñeitimaci. Cominina sedajanona, comini Jusiñamuina raise uifollena, comini Cristona raise uifollena, naimacina canoitimaci. Cristo diga mil años naimacina sedaitimaci.

<sup>7</sup> Bie mil años fuilla mei, Jusiñamuidi ana ite ifomona Taife jino oretaite.

<sup>8</sup> Nana eniruemo ite nairaiaina jifuaibite. Gog raila illaicominina, Magog raila nairaiái diga, jifueite. Naimaci nairaiaina ofitaitaite. Eo ailluena naimaci illa jira, conilliena cai facadonina isoi, naimacina facadonidicue. Jusiñamuina inotino diga jobairillena, ofitimaci.

<sup>9</sup> Danomo ofillanona, Jusiñamuina inotinona ciribitaitimaci. Jerusaléna, Jusiñamui isiruga nairaina, ciribitaitimaci. Naie facaise monamona boode ra billanona, jobairiacadonina fuidoite.

<sup>10</sup> Cominina eo jifuecabite; ia ie facaise Jusiñamuidi Taifena eo boode iraimo dotaite. Azufre boa isoi irai boode. Nainomo monaillaimona bite ocainana jaiie dotade. Naimie facaina tainona lloraima jaiie dotade. Nainomo ua jaca duere sefuitimaci

### *Juan aillue rairabicina cide. Nainomona Jusiñamui duere finollicinona llua cacade*

<sup>11</sup> Naie facaise aillue userede rairabicina ciodicue. Illaimana naimie illamona, nainomo Jusiñamuina jiai ciodicue. Naimie siño illamona, mona enirue diga jai iñede.

<sup>12</sup> Naie facaise Jusiñamui uicomo nana fiodaitino naidaillana ciodicue. Jamai bue isoiñedino itimaci. Jamai bue isoidino itimaci. Naimacimo juez isoi Jusiñamui lloillena, itimaci. Ie rabenicuaimo naimaci jai finoca rafuena jibuide. Naimaci finoca rafue nainomo jai cueda. Iemei Jusiñamui jiaie rabenicona jibuide. Naimie diga jaca ille comini mameciai nainomo jai cueda. Naimaci mameciai nainomo iñenia, naimaci finoca rafue diese Jusiñamui naimacimo duere sefuillena llote.

<sup>13</sup> Monaillaimo ite corobaitino abiai, joreñuai diga, jilloitimaci. Raigano abiai joreñuai diga jilloitimaci. Naimaci finoca rafue diese Jusiñamui naimacimo duere finollena lloite.

<sup>14</sup> Naimaci abiai naimaci joreñuai diga iraimo dotaite. Jaca faifitimaci. Naiemona jaca jilloñeitimaci. Jusiñamuimona eneno jaca itimaci.

<sup>15</sup> Monamo ite rabenicomo cueñega comini mameciai diese itinona iraimo dotaite.

## 21

### *Juan comue monana, comue enirue diga cide*

<sup>1</sup> Birui ite mona, birui ite enirue diga jai iñede. Monaillai jiai jai iñede. Iemei comue mona ciodicue. Comue eniruena jiai ciodicue.

<sup>2</sup> Comue nairai illanona ciodicue. Comue Jerusaléna ciodicue. Jusiñamui illanomona, Jusiñamuimona bite. Naimiemona billa jira, naie nairai eo mare. Eo ebirede finobide riño ie inina ua facaise isoi, eo ebirede.

<sup>3</sup> Jusiñamui illanomona damie ado llote:

—Comini motomo Jusiñamui illano jai ite. Naimaci diga naimie iite. Naimie comininitimaci.

<sup>4</sup> Naimaci illanomo naimie iite. Naimacina naimie nabaillamona, naimie jitailla jira, naimacina caimadoite. Dane eñeñitimaci. Fiodaiñeñitimaci. Sunaiñeñitimaci. Duere sefuiñeñitimaci. Birui ite rafuemo comeaiena naimaci nainomo facañena jira, ie facaise sunaiñeñitimaci —llote.

<sup>5</sup> Jusiñamui llote:

—Ero, nana ra comuena birui finoiticue. Cue llucino uanaicinona jira, cue llucinona cue finua jira, bie rafuena cueno.

<sup>6</sup> Iemei cuemo llote:

—Bie rafue jai fuite. Jaca bue nia iñenia, jaiie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitodicue. Naimaci illena comini jinuina eo jiroacana isoi, cuena ñnotino comeiaí eo caimare itataiticue. Ibañaño cue diga illena, naimacina jaca itataiticue.

<sup>7</sup> Cuen a raise ñnotinona iese itataiticue. Jaca naimaci Jusiñamuiniticue. Naimaci jaca cue comininitimaci.

<sup>8</sup> Jiaño jaca eo boode iraimo jaca iitimaci. Azufre boa isoi irai boote. Naiemona jaca jilloñeñitimaci. Cuemona eneno jaca iitimaci. Dñese nainomo iitimaci: abido danomo jaidino, cuena raise ñnoñedino, jearede rafue finocabidino, cominina meinetino, aiñede riño diga icabitino, inñede ñma diga icabitino, aiñinai, jiraraina sedacabidino, tainona llocabitino —llote.

### *Juan comue Jerusaléna llote*

<sup>9</sup> Naie facaise naie siete jaienisai imaci copamo cominina duere finollicinona navui ite isoide. Naimie cuemo llote:

—Cue diga mai bi. Iima ie aina jai ua isoi, Toica Llauda isoidimie ie cominina jai ote. Ie ai isoidimaci. Llauda isoidimie jai oga comini illanona omo acataiticue.

<sup>10</sup> Nicañilla isoi, Jusiñamui joreño cue joreñoa eo a ite aillue anedumo uite. Nainomona, Jusiñamuimona, monamona Jerusalén billana ciodicue. Jusiñamui iena jira, eo mare.

<sup>11</sup> Nainomo Jusiñamui illa jira, naie illano eo quenirede. Eo mare raifide nofici isoi quenirede. Jaspe railla noficina eruaila jira, enefebecodo ciode.

<sup>12</sup> Te llaigafo eo a ite. Eo jedaciede. Doce nasiaí ite. Naga nasemo daje jaienicí ite. Israel micori uruiaí mameciaí naie nasiaímo cuega. Doce uruiaí illa jira, naga naserie daje mamecí cuega.

<sup>13</sup> Jitoma bicabillano dine eruaide llaigafomo daje amani nase ite. Jitoma jaicabillano dine eruaide llaigafomo daje amani nase ite. Naga beici dine eruaide llaigafomo daje amani nase ite.

<sup>14</sup> Naie llaigafo anamo doce nofici ite. Nainomo Toica Llauda isoidimie ie doce llufueoicaigano mameciaí cuega.

<sup>15</sup> Cue diga ñaite jaienicimo oromona ra facara ite. Naie nairai facallena ite. Ie nase, ie llaigafo diga, facallena ite.

<sup>16</sup> Naie nairaina naimie facajamona, nagafebei daje isoi illana uñoticue. Dos mil doscientos kilómetros nagafebei are ite. Dos mil doscientos kilómetros nagafebei a ite.

<sup>17</sup> Ie llaigafona jiai facade. Sesenta y cuatro metros a ite. Comini facaja isoi, jaienicí iena facade.

<sup>18</sup> Ie llaigafo jaspe railla noficimona finoca. Bie nairai difai oromona finoca. Enefebecodo ciode.

<sup>19</sup> Diga eo quenirede noficina eruaide ra llaigafomo ite noficimo jai nitade. Nano jaspe. Enefebecodo ciode. Iemei zafiro. Mocorede. Jiaie ágata. Mocorede. Jiaie esmeralda. Mocorede.

<sup>20</sup> Jiaie ónice. Jiairede userede diga faiga. Jiaie cornalina. Jiairede. Jiaie crisólito. Orona eruaide. Jiaie berilo. Mocorede. Jiaie topacio. Borarede. Jiaie crisoprasa. Mocorede. Jiaie jacinto. Jiduirede. Jiaie amatista. Jiduirede. Naie llaigafo anamo ite noficiái doce diga ite.

<sup>21</sup> Ie doce nasiaídi perlas. Userede. Naga nase daje perlamona finoca. Bie nairai naisuaídi difai oro. Enefebecodo ciode.

<sup>22</sup> Bie illanomo Jusiñamuina sedajanona cioiñedicue. Nana bie illanodi naimie sedajano. Cai Nama Jusiñamui, Toica Llauda isoidimie diga, nainomo illa jira, iaimaiaí uicomo sedaiticai.

<sup>23</sup> Jusiñamui siñona jira, nainomo comini jitomana jitaiñeitimaci. Fivuiña jitaiñeitimaci. Jusiñamui, Llauda isoidimie diga, iena lligaiñoite.

<sup>24</sup> Nana comini iaimaiaina nabaicana jaitimaci. Nana illaicomini iaimaiaí dine billanona, iaimaiaimo iobillacino jaca fecaitimaci.

<sup>25</sup> Bie nairai nasiaí jaca ibaiñeite. Nainomo naionadi jaca iñeite.

<sup>26</sup> Iaimaiaimo iobillacinona fecallena, nana comini nainomo biitimaci.

<sup>27</sup> Nainomo jeacino jaca iñeite. Jearede rafue finodino nainomo biñeitimaci. Tainona lloraini biñeitimaci. Dani Llauda isoidimie ite rabenicomo cuega mameciaí itinodi nainomo biitimaci. Bie rabenicomo Jusiñamui illanomo jaca iitino mameciaí jai cuega.

## 22

<sup>1</sup> Naie facaise jaienici cuena daje ille acatate. Nainomo ite jinui jiruamona cominina jaca itataite. Uifinide. Jusiñamui, Llauda isoidimie diga, illanomona tote.

<sup>2</sup> Nanoca naiso motodo tote. Nagafebelle dine jaca itataite amenaiaí ite. Naga fivui llisillamona, naga fivui llisilla ite. Ie ibiaí illamona, comini caimare marena itimaci.

<sup>3</sup> Jeacino nainomo iñena jira, Jusiñamui jaca buna duere finoñeite. Jusiñamui, Llauda isoidimie diga illamona, naimie comini naimiena jaca sedaitimaci.

<sup>4</sup> Naimiena marefodo cioitimaci. Naimiemo naimaci duillamona, naimaci uiecuai itofiaimo naimie mameci cueite.

<sup>5</sup> Nainomo naionadi iñeite. Lamparina jitaiñeitimaci. Jitomana jitaiñeitimaci. Cai Nama Jusiñamui naimacina lligaiñoite. Illaicomini isoi jaca iitimaci.

*Juan Jesucristo billirui iaiei illana cacade*

<sup>6</sup> Jaienici cuemo llote:

—Bie lluacinodi uanaicino. Naimie facaina llorainimo ie rafuena llolena, ie uaina itatate. Naimiena inotinona ico suille rafuena ja uñotaiaicade.

<sup>7</sup> “Raire biiticue” Cristo llote.

Bie rabenicomo ite ico suille rafuena inotinodi caimare iitimaci.

<sup>8</sup> Juandicue. Bie rafuena cacadicue. Iena ciodicue. Iena cue cacaja mei, iena cue ciua mei, iena cuemo acataga jaienici uicomo ana bitadaticue. Naimiena sedaacadicue;

<sup>9</sup> iadedi cuemo llote:

—Dama ite. Cuena sedañeno. O diga, naimie facaina lloraini isoi, bie rabenicomo ite llogacinona inotino isoi, naimie dibeimo jiaí maijidicue. Dama Jusiñamuina seda.

<sup>10</sup> Bie rafue suillirui iaiei illa jira, iena jino llono. Iena uñota.

<sup>11</sup> Bie rafuena bu inoñenia, naimie jitailla jira, marañede rafue naimie finoacania, iena nia finoite. Jearede rafue bu finoacania, iena nia finoite; ia bie rafuena naimie inoia, naimie jitailla jira, mare rafue naimie finoacania, mare rafuena finocana jailla. Jusiñamui jitaillacinona bu finoacania, naimie jitaillacinona nia finocana jailla.

<sup>12</sup> Jesucristo cuemo llote:

—Ero, raire biiticue. Naimie finoca rafue diese nagamiemo ibana fecaiticue.

<sup>13</sup> Jaca bue nia iñenia, jaié jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitodicue.

<sup>14</sup> Naimaci iniroina naimaci jocoia, caimare iitimaci. Naimaci comecina ñaiticue. Ie jeacinona oni dotacamie jaca itataite amena llisillamona lliite. Cue cominina naimie illamona, Jusiñamui illanomo ie nasedo jaicabite;

<sup>15</sup> ia naimacina jeacinona naimaci fañonocaiñenia, Jusiñamui illanomo marañede rafuena finocabidino, aima dine jaicabidino, añede riño diga icabitino, inañede iima diga icabitino, cominina meinotino, jiraraina sedacabidino, tainona llocabitino duiñeitimaci.

<sup>16</sup> Creyentiaina bie rafuena uñotallena, cue jaienici o dine jai oretaticue. David micori ie jitodicue. Monairaicudu bairia isoi, Jusiñamui jitaillacinona cue finollena, baireiticue — llote.

<sup>17</sup> Bie facaise Jusiñamui Joreñodi, Cristo jai oga ai railla comini diga, naimiena nia inoñedinona uaidote:

—Bie rafuena mai cacarei. Iena mai ino. Iena bu inoia, jiaimiemo iena lluai: Iena mai cacarei. Iena mai ino.

Jiroacadimiemo lloticue:

—Mai jiruaibi. Bie jinua raifiñede. Biena o jiroacania, jaca iitio. Iese lloticue; ia ie comecina ñaiticue. Bie rafue inuana ñaiticue.

<sup>18</sup> Bie ico suille rafue ite rabeniconu bu façajia, naimiemo rafuena lloiacadicue. Bie rafue baifemo bu lloia, bie rafuena bu meidoia, bie rabenicomo ite duere finuacino isoi, Jusiñamui naimienu duere finoite.

<sup>19</sup> Bie rafuena bu jamaia, Jusiñamui naimienu duere finoite. Jaca illena Jusiñamui ie mamecina ie rabeniconu jaca cueñeite. Comue Jerusalémo jaca duiñeite. Naienu jai lloticue.

<sup>20</sup> Cristo raite:

—Bie rafue jaca suite. Ua raire biiticue.

Ienu raire suillenu jiai jitaicue. Cai Nama Jesús raire billenu eo jitaicue.

<sup>21</sup> Naimie duenaillacinonu nana Jesucristonu ñnotino uiñocanu jaillanu jitaicue. Macaibaite. Juandicue.